

景定建康志

周应合

文硕阁

wenshuoge.com

目录

关于我们	4
提要	6
卷首	7
卷一	11
卷二	18
卷三	24
卷四	34
卷五	41
卷六	46
卷七	49
卷八	57
卷九	63
卷十	66
卷十一	72
卷十二	77
卷十三	83
卷十四	86
卷十五	96
卷十六	105
卷十七	134
卷十八	156
卷十九	166
卷二十	186
卷二十一	197
卷二十二	218
卷二十三	241
卷二十四	264
卷二十五	282
卷二十六	294
卷二十七	331
卷二十八	352
卷二十九	363
卷三十	381
卷三十一	389
卷三十二	407
卷三十三	416

卷三十四		432
卷三十五		440
卷三十六		445
卷三十七		452
卷三十八		469
卷三十九		477
卷四十		490
卷四十一		500
卷四十二		507
卷四十三		516
卷四十四		537
卷四十五		556
卷四十六		564
卷四十七		575
卷四十八		582
卷四十九		608
卷五十		621

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案景定建康志五十卷宋周应合撰应合武宁人自号溪园先生举淳佑间进士官至实录院修撰以上章劾贾似道谪饶州通判是书乃其以承直郎差充江南东路安抚司干办公事时所作也宋自南渡後建行宫於金陵改为建康府高宗尝驻蹕其地设江南东路安抚司以治之为沿江重镇乾道庆元时屡辑地志而记载尚多阙畧景定中宝章阁学士江东安抚使知建康府马光祖始属应合取旧志重加删定增入庆元以後之事正讹补缺别编成书凡分疆域山川城阙官守儒学文籍武卫田赋风土祠祀等十类援据该洽条理详明凡所考辨俱见典核如论丹阳之名本出建业论六朝扬州常治建业後始为广陵一郡之名论金陵埋金之说为驱人凿山之术皆极精确可据洵地志之有体要者也明嘉靖万历间是书尚有刊本在南京国子监见黄佐南雍志中然所存板止七百五十九面则亦已阙佚不全其後流传遂絶朱彝尊曝书亭集有是书跋称周在浚尝语以曾覩是书阙本访之三十年未得後始从曹寅处借归録之盖亦罕覩之本矣乾隆四十六年六月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷首

钦定四库全书

景定建康志卷首

原序

郡有志即成周职方氏之所掌岂徒辨其山林川泽都鄙之名物而已天时验於岁月灾祥之书地利明於形势险要之设人文着於衣冠礼乐风俗之臧否忠孝节义表人材也版籍登耗考民力也甲兵坚瑕讨军实也政教修废察吏治也古今是非得失之迹垂劝鉴也夫如是然後有补於世郡皆然况陪都乎昔忠定李公尝言天下形胜关中为上建康次之自楚秦以来皆言王气所在句践城之六朝都之隋唐而後为州为府为节镇为行台五季僭伪睨消实开吾宋混一之基南渡中兴此为根本章往考来图志宜详於他郡而乾道有旧志庆元有续志皆畧而未备观者病之庆元迄今逾六十年未有续此笔者宝佑丁巳光祖蒙恩来司留钥因閱前志编摩在念一年而勤民二年而整军三年而易阬荆州未暇也已未重来汲汲守御补尺籍治战舰备器械固城池日不暇给未几鼓枻惊涛风餐露驰於舒蕲江黄之间往复无虑数四元勲振旅长江肃清光祖始得以休于郡兴滞补弊之余爰及斯文有幕客周君应合博物洽闻学力充赡旧尝为江陵志纪载有法乃以是属之开书局于郡圃之鍾山阁下相与研古订今定凡例而裒篇帙先为留都録四卷隆炎创兴之盛宫城建置之详与夫云汉昭回之章皆备録焉揭为一书之冠冕其次为地理图为侯牧表为志为传合为五十卷表起周元王四年越城长干之时以至于今千七百载年经类纬曰时日地曰人曰事类之所由分也志凡十一曰疆域二曰山川三曰城阙四曰官守五曰儒学六曰文籍七曰武卫八曰田赋九曰风土十曰祠祀传凡十一曰正学二曰孝弟三曰节义四曰忠勲五曰直臣六曰治行七曰耆旧八曰隐德九曰儒雅十曰贞女大畧备矣始于三月甲子成于七月甲子献之天子玉音嘉焉用不敢閤传之无穷补其阙遗续其方来则有望於後之君子景定辛酉良月初吉观文殿学士光禄大夫沿江制置大使知建康军府事兼管内劝农营田使金华郡开国公食邑三千户食实封六百户马光祖书

进建康志表

臣光祖言鍾阜帝王之宅忝备居留职方土地之图辄成纪载敬裒竹简冒彻枫宸臣光祖惶惧惶惧顿首顿首窃以紫盖东南势雄建业青山表里景似洛阳吴晋以来皆号京畿秦楚之间已占王气洗前日六朝之陋肇吾宋万世之基历数有归太阳升而燭火熄神武不杀膏泽下而江水清爰重昇州遂开节镇嘉佑之进大国龙飞犹軫於初潜绍兴之创新宫马渡喜逢於再造发天作地藏之胜着祖功宗德之隆建邦设都非列城之能擬诏今传後岂鉅典之可虚臣叨佩玉麟密瞻铜凤职在承流而宣化?当章往而考来阬治八年而重临曷报恩徽之厚图经三岁则一上敢违令甲之严廼选幙僚恪修郡乘揭琅邪而首録昭弁冕之常尊诸地诸邑诸城继加詮次十表十志十传序列编摩四八万言皆聚此书千七百禩如指诸掌辨山林

川泽之名物粹衣冠礼乐之风流善有劝而恶有惩往者过而来者续兹盖伏遇皇帝陛下性明日月道整乾坤帝书九丘言九州圣学夙深於稽古天下一日行一遍远模盖得於传家运艺祖仁皇高宗之心兼创业中兴太平之事既彻疆於江表行复竟於关中臣未能刊浯溪之碑且此效雍州之録汉光投戈讲艺愿益恢輿地之披周宣备器修车何但美东都之会所有新修景定建康志五十卷计四十六册谨随表上进以闻臣无任瞻天望圣激切屏营之至臣光祖惶惧惶惧顿首顿首谨言景定二年八月日观文殿学士光禄大夫沿江制置大使知建康军府事兼管内劝农营田使江南东路安抚使马步军都总管行宫留守节制和州无为军安庆府三郡屯田使暂兼淮西总领金华郡开国公食邑三千户食实封六百户臣马光祖上表

献皇太子牋

右光祖伏以龙盘胜地叨分居守之符鹤禁丽天辄献职方之乘既先尘於丹宸敢继彻於青闱光祖惶惧惶惧叩头叩头惟建业之名区实仁皇之潜邸前收图於开宝聪明神武不杀者夫後驻蹕於建炎险阻艰难备尝之矣再造中天之业永垂万世之基光祖筦钥才卑冕旒恩大承流宣化敢忘载笔之勤考古订今庶遂阙文之备恪遵着令悉上送官兹盖伏遇皇太子殿下恭敬温文贤圣仁孝行必正道宫中常务於观书建以元良天下咸安於主器凡属乾坤之内宜周日月之明光祖俯效编摩仰裨省览星重辉海重润益绵景祚之隆车同轨书同文行复輿图之盛所有新修景定建康志四十五册谨随牋上献瞻望宫庭下情无任激切屏营之至光祖惶惧惶惧叩头叩头谨牋景定二年八月日具位马光祖上牋

景定修志本末开庆己未春三月裕斋先生金华郡公以大制帅再尹留都请于朝以京湖旧幕客周应合充江东安抚使司干办公事兼明道书院山长编程子书毕明年六月命饌师于池阳又明年二月趣还建康甲寅应合至自池阳拜公玉麟堂公命之曰建康大都会也自庆元而後图志未续实大阙典而庆元以前之书纪载甚畧不无舛讹图志三岁一上法也吾再至此又及三年将成此书而丐归焉属笔于子母逊应合避席曰留都钜典当属之大手笔应合浅学謏闻不足以辱隆委敢顿首固辞公曰子尝修江陵志矣图辨表志粲然有伦轻车熟路今何辞焉禊节适逢甲子宜以是日开书局于鍾山阁下即叶石林紬书之旧所也速为之及吾未去以前成书可也应合稟命而退时有疾未愈欲少俟调理徐受条教而割命?至矣入局修纂谨如甲子之期则请于公曰旧志二百八十板所记止於乾道续志二百二十板所记止於庆元庆元至今所当续者六十余年之事不敢略亦不敢废前志也公曰乾道庆元二志互有详略而六朝事迹建康实录参之二志又多不合今当会而一之前志之阙者补之舛者正之庆元以後未书者续之方为全书况前志散漫而无统无地图以考疆域无年表以考时世古今人物不可泯者行事之可为劝戒者诗文之可以发扬者求之皆阙如也子其用江陵志之凡例彙而辑之备前志之所未备此吾所望也应合又请于公曰谨奉教矣而未可以速成也庆元续志之作实因朱舜庸金陵事类之编舜庸郡人也其编犹积二十稔而後成况非郡人者乎况欲合前後而修为全书乎愿寛以岁月广招局官与郡之士友而共成之公不许应合乃条上四事一曰定凡例应合昨修江陵志为图二十附之以辨其次为表为志为传为拾遗所载犹不能备建康又非江陵比也自吴以来国都于此其事固多於江陵若我朝建隆

开宝之平江南天禧之为潜邸建炎绍兴之建行宫显谟承烈着在留都凤阙章固宜备録然混於六朝之编列於庶事之目官府杂载君臣并纪殊未安也今欲先修留都宫城録冠于书首而建康地图年表次之十志又次之【一曰疆域二曰山川三曰城阙四曰官守五曰儒学六曰文籍七曰武卫八曰田赋九曰风土十曰祠祀】十传又次之【一曰正学二曰孝悌三曰节义四曰忠勲五曰直臣六曰治行七曰耆旧八曰隐德九曰儒雅十曰贞女】传之後为拾遗图之後为地名辨表之纬为四曰时【年世甲子】曰地【疆土分合都邑改更】曰人【牧守更代官制因革】曰事【着成败得失之迹以寓劝戒】志之中各着事迹各为考证而古今记咏各附于所为作之下凡图表志传卷首各为一序而留都録之序则请公命笔公皆可之二曰分事任乾道旧志庆元续志各有规模今用前凡例会而为一庆元以前之未备者庆元以後之未书者皆欲增修无阙岂一手两耳目所能周遍误承隆委辞不获命何敢自有其事窃惟幕府环列儒宗林立所当博师三长共成一书金陵故家文献所聚耆旧英俊尤宜周询庶几凭藉衆力早有成书之期欲乞请官十员招士友数人入局同共商确分项修纂公不许三曰广搜访纂修既欲其备搜访不厌其详自幕府以至县镇等官自寓公以至诸郷士友自戎帅以至将校欲从阃府转牒取会凡自古及今有一事一物一诗一文得於记闻当入图经者不以早晚不以多寡各随所得批报本局以凭类聚考订增修其有远近博物洽闻之士能记古今事迹有他人所不知者并请具述从学校及诸县缴申其閤閱子孙能收上世家传行状墓志神道碑及所着书文与先世所得御札勅书名贤往来书牋并请録副申缴其山巔水涯古今高人逸士有卓行而不求闻达者亦请冥搜详述以报本局其有闻见最博考证最精者当议优崇诸吏民父老中有能记忆旧闻關於图志者并许具述实封投柜置府门三日一开类呈其条具最多而事迹皆实者当行犒赏公皆从之行牒及榜四曰详参订切惟诸司幕府参佐宾僚学富才宏皆应合所愿求教然望尊职重有非书局所敢一一屈致者容应合每卷修成初藁各以紫袋封传诸幕悉求是正其未当者与未尽者各请批注行间以凭删修次藁再以紫袋传呈如初俟定本纳呈钧览仰求笔削然後付之锱梓仍乞选差局吏两名分管书局事务书吏十名誊类草藁书写板樣客司虞 四名以备关借文籍传呈书藁等用公皆从之越一月应合又请於公曰成书之期既不可缓修书之事浩若望洋应合自入局以来主一无适夜以继日疲精书传极力丹铅修书之藁未半刻梓之匠已集既同官之难屈非只手之可办有长子天骥见为淮西总所催运官欲乞移文总所给假数月专在书局为检閱校讎之助有壻吴畴见为安丰六安县主簿亦留总幕乞令往来为助公从之凡纂一事必禀命於公每成一藁必取正於公夜考古书朝订今事右分编藁左付刻梓自禊节以来周两甲子而大略粗备若留都录四卷地理图及地名辨一卷年表十卷官守志四卷儒学志五卷文籍志五卷武卫志二卷田赋志二卷古今人表传三卷拾遗一卷此皆乾道庆元两志之所无而创为之也若疆域志三卷山川志三卷城阙志三卷祠祀志三卷因前志之所有者十之四增其所无者十之六合为五十卷凡一千六百余版印标为二十四册外目录一册上之阃府其书板首尾九百九十四片为厨架五所钥而藏之紬书堂中选书吏以掌其啓闭每卷每类之末各虚梓以俟续添固未敢以为成书也尝闻南轩先生因修郡志而示训曰削去恠妄订正事实崇厚风俗表章人才是编也於前之八字无能为役於後之八字或庶几焉虽然金陵自有城邑以至于今千七百年王伯废兴之故山川风景之殊国都城市之变迁田里民物之登耗忠臣义士之遗烈洪儒骚客之流风衣冠礼乐之隆污典章文物之因革所以兴感慨而寓劝戒者岂五十卷之图书所能尽其纪载而两甲子之日力所能毕其编摩也哉姑以

奉公之命而不敢怠於其職耳昔司馬文正公之修通鑑也粹千三百六十二年之事為三百五十四卷之書聚諸賢之助閱十有九年而後成猶曰歲月迫趣缺謬不能自保今之所修郡志耳既無司馬公之學力又無書局官之衆力且未有十九年之日力而欲記千七百年之成敗得失於五十卷書之間其為缺謬何可勝言刊而正之姑有望於後之君子云景定辛酉歲七月甲子豫章周應合謹書

景定建康志卷首

卷一

钦定四库全书

景定建康志卷一 宋 周应合 撰

大宋中兴建康留都录一

臣光祖恭惟本朝以仁立国圣圣相承用绵亿万世无疆之休普天之下莫非治迹考之建康为尤着粤自艺祖皇帝应天顺人肇造区夏江南底定不戮一人廼即南唐故府为昇州治此盖创业之远模而至仁之根本也肆于真宗皇帝笃生圣嗣封国于昇尹兹东土府号江宁其後入继大统是为仁宗皇帝德侔天地道久化成此盖太平之盛典而至仁之充周也至我高宗皇帝复受天命再造鸿业翠华南渡首幸江宁廼即府治以建行阙卑宫克俭不忍劳民洋洋圣谟启佑我後此盖中兴之丕基而至仁之迆续也迨移蹕钱塘世命重臣留守于兹後百三十五年臣叠叨误恩洊司留钥人微责重惧弗胜任惟忠惟实图报万分凡所以兴滞补弊抚军恤民布宣圣天子之深仁厚泽以固藩篱而护堂奥者一事不敢苟且一刻不敢暇逸力之所至粗无废事惟府志一书尚为阙典虽乾道有旧志庆元有续志而纪载踈略不无谬讹自庆元以後六十余年未续其书者所部诸郡图志略备而都会之府独阙无以章往考来非所以隆陪京而备文献臣实惧焉矧稽之令甲有诸郡图志三岁一来上之文盖将以考修废而验兴除也臣之再至岁又及三志而上之兹惟其时於是选委官属臣周应合置书局于府廨鍾山阁楼下相与考古订今凡四閱月修纂成书为图凡十有五【曰龙盘虎踞形势图曰历代城郭互见图曰建康府境方括图曰金陵建阊所部图图分上下曰府城图曰府治图曰上元县图曰江宁县图曰句容县图曰溧水县图曰溧阳县图曰府学图曰明道书院图曰青溪先贤堂图】为表凡千七百年【侯牧表起周元王四年以至于今为表者十】为志凡十【一曰疆域二曰山川三曰城阙四曰官守五曰儒学六曰文籍七曰武卫八曰田赋九曰风土十曰祠祀】为传凡三卷而图之後有辨传之後有拾遗志之中各着事迹各为考证若图若辨若表皆旧志所未有而创为之若志若传因旧志而删修者十之四增其所无者十之六合为四十有六卷皆府志也又有大於府志者宫城建置之详隆炎创兴之盛备录宜也而旧志所载不过数行顾以凤阙龙章杂书於六朝之编混列於庶司之目甚非臣子尊君之意臣尤惧焉谨於未成府志之先恭修留都录四卷行宫为卷之一建隆以来诏令为卷之二建炎以来诏令为卷之三御书御制为卷之四又有诏札不独繫於建康而守臣立石于此者则録於第四卷末揭为一书之冠冕昭如日星万目共覩皆知大分之有常尊留都之有钜典凡厥庶民是彝是训以近天子之光则於宣德流化未必无小补云景定二年岁次辛酉六月吉日观文殿学士光禄大夫沿江制置大使知建康军府事兼管内劝农营田使江南东路安抚使马步军都总管行宫留守节制和州无为军安庆府三郡屯田使暂兼淮西总领金华郡开国公食邑二千六百户食实封六百户臣马光祖顿首顿首谨书

年月日

行宫记载

开宝七年冬十月艺祖皇帝谓臣曹彬曰南方之事一以委卿切勿暴虐生民务广威信使自归顺八年十二月彬上露布江南平诏置昇州

天禧二年二月真宗皇帝诏以昇州为江宁府册命皇太子行江宁尹充建康军节度使进封昇王

嘉佑四年四月翰林学士臣胡宿言於仁宗皇帝曰陛下建国於昇宜进昇为大国无得封上从之

建炎元年尚书右仆射兼中书侍郎臣李纲言於高宗皇帝曰天下形胜关中为上建康次之宜以长安为西都建康为东都各命守臣葺城池治宫室积糗粮以备临幸则天下之势安矣上出其章付中书卫尉少卿臣卫肤敏言建康实自古帝都外连江淮内控湖海为东南要会之地宜急趣下严诏夙期东幸中书舍人臣刘珪亦言金陵天险前据大江可以固守廷臣率附其议而伯彦潜善主幸东南二年五月上至江宁府驻蹕神霄宫诏改江宁府为建康府三年闰七月上发建康如浙西绍兴二年上命江南东路安抚大使臣李光即府旧治修为行宫臣光乞增创後殿上许之六月以图进呈上曰但令如州治足矣若止一殿虽用数万缗亦未为过必事事相称则土木之侈伤财害民何所不至象箸之渐不可不戒由是制度简俭不雕不斲得夏禹卑宫室之意六年六月右仆射臣张浚谓东南形势莫重於建康实为中兴根本奏请圣驾以秋冬临幸建康七年三【月】辛未上至建康十一月上谓张浚曰朕来建康行宫

皆因张浚所修之旧不免葺数间小屋为寝处之地当与卿观之初不施丹雘盖不欲劳人费财也八年正月上将还临安参知政事臣张守言曰陛下至建康席未及煖愿少安於此以繫中原之心臣赵鼎持不可壬戌上召张浚至宫中谕之曰朕来日东去卿在此无与民争利勿兴土木之工浚悚息承命浚见地无砖面再三叹息上曰此事非难但艰难之际一切从俭庶少纾民力朕为人主虽以金玉为饰亦无不可若如此非特一时士大夫之论不以为然後世以朕为何如主也癸亥上发建康戊寅上至临安府遂定都焉三十二年正月上复至建康二月还临安初上谓辅臣曰将来幸浙西建康宫宇令有司照管它时复幸免更营造以伤民力赵鼎奏曰即令建康府拘收是年中书门下省言建康府已除行宫留守诏应合行事件并依西京留守司体例施行自是江南东路安抚司常兼留守每岁四季月準令入宫点视留守司属官一员从之

行宫规制

行宫在天津桥之北御前诸军都统制司之南

宫门在宫之南皇城南门之北

寢殿在宫之中

朝殿在寢殿之南

复古殿在寢殿之後

罗木堂在复古殿之後

御膳所在朝殿之左

进食殿在复古殿西南

直笔阁在朝殿之右

内东宫在宫之左南位之右

孝思殿在内东宫之後

资善堂在学士院之右

南位在内东宫之左御苑之右

大射殿在御教場之北

小射殿在复古殿西北

天章阁在皇城门内宫门外东南隅与学士院相对学士院在皇城门内宫门外西南隅与天章阁相对御教場在军器库之南

走马廊在进食殿之西南隅

御苑在皇城东门之内御马院之北南位之左

八僊台在御苑东北

凉館在御教場内【元符间元时敏作记今刻石在学士院】

高斋在宫之东北隅【庆历间胡宿作记今刻石在学士院】

御辇院在天章阁之後

御马院在皇城司之左

军器南北两库在走马廊之前

御酒库在资善堂之右

御醋库在御酒库之右

钱物库在御教場門之右

内侍省在宫之右军器库之左

皇城司在天章阁之左

皇城周四里二百六十五步高二丈五尺下濶一丈五尺绍兴二年即旧子城基增筑

皇城南門正对天津桥御街一直

皇城东门对後军教場城上有看教楼前有日华桥皇城西门对江宁县前大街前有月华桥

东待漏院在皇城南門外之左

西待漏院在皇城南門外之右

东阙亭在东待漏院之左

西阙亭在西待漏院之右

亲事营在东待漏院之左

护龙河分青溪之水自东虹桥下流入河遶皇城东北西之三隅至西虹桥下与青溪水复合为一

行宫留守

绍兴八年以来被命留守者自臣章谊始以江南东路安抚大使兼领後者因之或为留守?为
主管留守司公事

章谊【绍兴八年二月以端明殿学士安抚大使兼行宫留守司公事】叶梦得【绍兴八年
六月以资政殿学士安抚制置大使兼行宫留守司公事】孟忠厚【绍兴十三年正月以少
傅节度使信安郡王安抚制置大使兼行宫留守司公事】张守【绍兴十四年正月以资政
殿大学士安抚制置大使兼行宫留守司公事】晁谦之【绍兴十五年四月以敷文阁直学
士安抚使兼行宫留守司公事】郑滋【绍兴十八年五月以显谟阁学士安抚使兼行宫留
守司公事】俞俟【绍兴十九年四月以敷文阁直学士安抚使兼行宫留守司公事】王晌
【绍兴十九年十二月以直秘阁安抚使兼行宫留守司公事】杨愿【绍兴二十二年四月
以资政殿学士安抚使兼行宫留守司公事】王循友【绍兴二十三年二月以朝散郎主管
安抚司公事兼行宫留守司公事】宋觐【绍兴二十四年五月以敷文阁直学士安抚使兼
行宫留守司公事】张焘【绍兴二十六年二月以宝文阁学士安抚使兼行宫留守司公事
】韩仲通【绍兴二十九年六月以敷文阁学士安抚使兼行宫留守司公事】王纶【绍兴
三十一年三月以资政殿大学士安抚使兼行宫留守司公事】张焘【绍兴三十一年十月
以资政殿学士安抚使兼行宫留守司公事】张浚【绍兴三十一年十二月以特进观文殿
大学士安抚使兼行宫留守司公事】陈俊卿【绍兴三十二年八月以中书舍人安抚使兼
行宫留守司公事】陈之茂【隆兴元年五月以直徽猷阁主管安抚司公事兼行宫留守司
公事】张孝祥【隆兴二年三月以敷文阁待制安抚使兼行宫留守司公事】吕擢【隆兴
二年十一月以直徽猷阁主管安抚司公事兼行宫留守司公事】汪澈【乾道元年二月以
端明殿学士安抚使兼行宫留守司公事】王佐【乾道元年十月以直宝文阁主管安抚司
公事兼行宫留守司公事】陈之茂【乾道二年八月以徽猷阁直学士安抚使兼行宫留守
司公事】方滋【乾道二年十月以敷文阁待制安抚使兼行宫留守司公事】史正志【乾
道三年九月以集英殿修撰安抚使兼行宫留守司公事】唐瑑【乾道六年三月以秘阁修
撰主管安抚司公事兼行宫留守司公事】洪遵【乾道七年六月以端明殿学士安抚使兼
行宫留守】叶衡【淳熙元年正月以敷文阁学士安抚使兼行宫留守司公事】胡元质【
淳熙元年五月以朝议大夫安抚使兼行宫留守司公事】刘珙【淳熙二年三月以资政殿
大学士安抚使兼行宫留守】陈俊卿【淳熙五年十月以特进观文殿大学士安抚使兼行
宫留守】范成大【淳熙八年四月以端明殿学士安抚使兼行宫留守】钱良臣【淳熙十
年九月以端明殿学士安抚使兼行宫留守】章森【淳熙十五年八月以朝散大夫安抚使
兼行宫留守】余端礼【绍熙二年二月以焕章阁学士安抚使兼行宫留守】郑侨【绍熙
四年七月以显谟阁学士安抚使兼行宫留守】张均【庆元元年正月以宝文阁学士安抚
使兼行宫留守司公事】赵彥逾【庆元三年五月以资政殿学士安抚使兼行宫留守司公
事】钱象祖【庆元四年十二月以华文阁学士安抚使兼行宫留守司公事】吴玕【庆元
六年闰二月以镇安军节度使开府仪同三司安抚使兼行宫留守】李沐【嘉泰二年十二
月以徽猷阁学士安抚使兼行宫留守司公事】丘密【嘉泰四年四月以敷文阁学士安抚
使兼行宫留守司公事】叶适【开禧二年六月以朝请大夫安抚使兼行宫留守司公事】
徐谊【开禧三年九月以朝散大夫安抚使兼行宫留守司公事】丘密【开禧三年十二月
以资政殿学士安抚使兼行宫留守】何澹【嘉定元年八月以观文殿学士安抚使兼行宫

留守】杨辅【嘉定二年八月以龙图阁学士安抚使兼行宫留守司公事】黄度【嘉定三年正月以朝请大夫安抚使兼行宫留守司公事】刘榘【嘉定六年正月以朝议大夫安抚使兼行宫留守司公事】李大东【嘉定八年十一月以朝请大夫主管安抚制置司公事兼行宫留守司公事】李珣【嘉定十年二月以宝谟阁学士安抚使兼行宫留守司公事】李大东【嘉定十二年七月以中奉大夫安抚使兼行宫留守司公事】余嵘【嘉定十五年十月以朝议大夫安抚使兼行宫留守司公事】丘壽迈【宝庆元年正月以朝议大夫安抚使兼行宫留守司公事】赵善湘【宝庆三年二月以中奉大夫安抚使兼行宫留守司公事】李壽朋【绍定六年七月以朝议大夫安抚使兼主管行宫留守司公事】陈韡【端平元年十月以朝请大夫安抚使兼行宫留守】别之杰【嘉熙二年正月以朝请大夫安抚使兼行宫留守】杜杲【淳佑二年四月以华文阁学士安抚使兼行宫留守】董槐【淳佑四年四月以朝奉大夫安抚使兼行宫留守】赵以夫【淳佑五年六月以中奉大夫安抚使兼行宫留守】赵葵【淳佑七年六月以枢密使参知政事督视军马兼安抚使兼行宫留守】吴渊【淳佑九年二月以端明殿学士安抚使兼行宫留守】王埜【淳佑十二年二月以宝章阁直学士安抚使兼行宫留守】丘岳【宝佑三年三月以宝文阁直学士安抚使兼行宫留守】马光祖【宝佑三年八月以宝章阁直学士安抚使兼行宫留守】赵与?【宝佑六年二月以观文殿学士安抚使兼行宫留守】马光祖【开庆元年四月以资政殿学士再为安抚使兼行宫留守】

行宫匙钥司

内侍一员掌之 廨舍在西阙亭之右

属官三员

一员干办行宫大内八作司

一员干办行宫大内事务

一员监行宫大内门干办事务

守把杂役

亲事官二十四人系行在皇城司差到看管殿宇守把皇城门

八作司二百五十人专备修造工役

防守军兵系於建康府诸军差拨

养种园一所在城东一里余中为正堂北向正堂东南为杏堂东北为百花堂东为砌台西为

梅堂西北为竹间亭乾道三年建【并系匙钥司兼掌启闭】

景定三年留守臣姚希得奉旨修葺行宫準差承信郎内辖司提举鲍体仁到府检计合修去处曰寝殿曰朝殿曰复古殿曰进食殿曰大射殿曰小殿子曰御膳所曰东待漏院曰学士院曰天章阁曰山子阁曰入内内侍省曰射弓亭曰小射堂曰会通门曰会茶亭曰东华门曰内藏库曰桩积库曰皇城门里外曰宫门曰西班牙房曰皇城司备屋曰东西阙亭曰走马廊曰山子堂共二十六处其诸殿透换梁栋须使巨材多方经营以供其用自当年六月兴工入冬暂歇又自四年四月续次兴作至八月毕工除朝廷科拨到一十万贯外本府计增用一十一万五千四百余缗米四百二十三石事讫闻奏准苑使李忠辅传奉圣旨行宫修葺颇夥赐臣一千两镀金香合一具龙涎香一百饼纈罗二十疋拣芽小龙茶四斤清馥香三十贴并赐监修官通判臣冯端亮纈罗香茶有差

景定五年留守马光祖任内重修养种园 行宫养种园在东门外一里而近旧以内臣掌宫务园废不治景定甲子冬始诏留守司兼任其事节冗约浮挾奸剔蠹居亡何课入倍昔乃斥其羨经营此园薙草锄荆宣湮逵壅规模固在也爰即旧宇撤而新之矢棘翬飞丹雘炫耀凡为堂四为序三为台一门间神宇暨守视庖湄之所莫不备具繚以修垣四百七十余丈仅再葺钜竹如云梅杏松桂脱斧斤而就培植清陰周匝始有禁籞气象董是役者江东安抚司参议官潘大临凡糜钱一万一千三百贯有奇米一百八十八石有奇

正堂名熙春计一十一间 梅堂名玉雪计八间四面堂名面面云山计二十八间
杏堂名清华计九间 牡丹亭名怀洛计九间 百花亭名芳润计八间

景定建康志卷一

卷二

钦定四库全书

景定建康志卷二 宋 周应合 撰

留都錄二

建隆以来诏令

建隆元年赐江南国主书朕奋发侧微经纶草昧削平多垒辅翊前朝唯坚金石之心用保河山之誓历事三主于兹十年洎世宗上僊少帝嗣位仰承顾命敢怠初心属并寇之幸灾结匈奴而入鄙寻奉专征之命方图却敌之功岂谓师次郊圻变生仓卒人心所属天命有归竟列干戈逼趋京阙千夫之长不息於懽呼三事之臣共伸於推戴勉从禅让若坠冰渊非不能致命捐躯盖无益於周之宗社矣国主雄材奕叶武畧守邦抚吴楚之全封绍扬徐之旧业备观兴替深识变通共保懽盟永安疲瘵远惟英晤当鉴诚怀【正月】

二年答江南李煜手表朕以江南旧邦世有令德承袭基业保乂黎元而能远奉中朝克遵礼命备见奉先之志用嘉述职之诚言念忠纯方深延纳载披手翰弥慰朕怀赐李煜嗣位礼物诏睠彼江左世抚旧邦积善降祥聿生令器国主知奉先之道倾事大之心克稟贻谋绍光奕叶嗣位允符於衆望为邦果契於永图遐倾附内之心益洽同文之化属新承於基构宜特沛於朝恩专命近臣往申庆赐今遣枢密承旨王仁贍赐国主礼物具如别录【十月】

三年谕李煜诏朕抚宁寰宇爱育黎元每思致理之方务在从人之欲今据横海飞江水鬪怀顺诸指挥员寮节级兵士各称有骨肉见在江南乞取归京国主素推仁爱必念流离可令所司分析军兵怜其割爱悉遣过江体予馭远之怀庶叶同文之化【五月戊午】

四年赐李煜诏杜廷望至为先令具延泳传宣令发遣显德二年後隔过朝廷员寮兵士及扬州户口都过江北所有将率一二千人不免恐惧只希年岁间番次发遣其扬州户口见括勘相次起遣过江北事朕为万邦之君虑一物失所俾慰丘园之恋免伤羁旅之情今览敷陈备知诚欵载惟倾顺嘉叹良多【八月戊子】

又谕李煜泉州陈洪进遣军将魏仁济上言四月二十二日据将吏等状以张汉思不恤军民勒归私第请洪进镇抚连城恭听朝命朕以泉南一境早顺大朝远倾拱极之心不絶充庭之贡自前附庸江左阻越中原屡有凶徒改易主帅盖节制之无术致士庶之不宁今洪进洞识机宜深明去就励丹衷而上表越沧海以来宾朕抚御华夷理须延纳所期遐裔皆遂乐康若此後不稟朝章辄陵主将当徵锐旅往讨不恭载惟明達之心必体怀柔之意【十一月丁巳】

】

乾德元年答李煜诏朕推恩馭远稽古临朝念秦汉以来久絶附庸之制闽越之地素为藩服之封圻者阻限中原依凭江左帅臣屡易军镇不宁陈洪进为衆所推上章听命顷班诏爵用慰远人将降制书明谕朝旨国主爰形奏牋深述事宜虽认恭勤谅难俞允苟依所请是朕食言则洪进一心未省为臣之所泉南二郡独作无告之民上为人君安忍行此不移前诏当体予怀【十二月】

又答李煜诏王者之礼诸侯也异姓谓之叔舅诏书赐之不名载乎礼文见之史册顾惟凉德慨慕前王矧彼大邦宜加异数国主礼存事上义执劳谦请呼君前之名诚为忠顺俯同臣下之制何辨等威难议允俞良深嘉叹【十二月】

二年答李煜诏所上表谢示谕泉南等州事者惟彼二州甚为僻远爰从近岁继有变更初从効沦亡不能传嗣汉思愚蔽又失衆心陈洪进为下所推寻来请命朕虽德薄义在君临苟爽怀来是亏柔远且漳南之地复隔海隅终虑遐陬或更生事所宜示以朝命安其物情近已特授洪进节麾委以镇抚推公示信固无私焉在予素心应所备悉【二月乙卯】

又谕李煜诏朕抚宁邦国爱育黎民欲礼让之兴行期干戈之偃戢爰自江表内附商旅南通车书虽嘉於混同关市每烦於候接其间不无羣小罔顾宪章或尚气以凭陵或使酒而喧竞每达朕听深用恍然虽曾指挥尚未严肃已降宣命自今诸处不令客旅过江只於江北置务折博凡有货币但於彼处贸易载惟通晤当体睠怀【八月乙未】

谕李煜朝覲诏勅李煜尔事我大朝素坚臣节望日展倾谕之礼颇尽恭?凝旒推待遇之恩每从优异金石之心诚虽固丹青之怀抱未伸将欲弭中外之间言莫若孰君臣之厚契苟非会面何以宣心是用专遣廷臣往谕朕旨当体诚意暂覲阙庭竚俟来仪以慰延望故兹示谕想宜知悉

谕江南管内勅榜勅江南管内州县军镇官吏军人百姓等朕统御万邦抚临亿兆推至诚而待物期率土以归心布惠行仁是予本志兴兵勤衆非我愿为惟彼江南言修臣礼久被抚怀之化颇倾依附之心贡封章则惟见恭勤修外貌则多从减降既云事大每欲包荒甘言常信其赤心内稔岂疑其奸计而又衅倾诚款请降册封既礼分之未亏故我心之无间使人频至词旨愈专是以特降诏书俾其畧诣京阙外则弭寰区之宅论内则尽鱼水之深情终日包藏一旦彰露不唯多方托故悬避来朝而乃修葺城池选练军旅教习战阵抽点乡兵为拒扞之计谋作攻守之准备朝廷养寇垂二十年心狠貌恭突然自败向展为臣之礼都为观釁之方每云倾输尽彰狡诈复念一方生聚积岁诛求奉其矫伪之心成彼疮痍之苦中外士庶请余讨除纵朕心独欲含容奈衆议皆怀愤悱既行问罪须至兴师今者禁卫出军云台选将授幄中之成算奋堂上之奇兵荆渚楼船顺流而下余杭戈甲合势而趋岭南则数路齐驱湖外则分头竞入水陆兼进左右夹攻絶其飞走之门可见覆亡之势役不再举其在于兹江南军人百姓等久在偏方阻沾皇化谅达变通之理必知逆顺之规应伪命文武官僚等事於伪邦各

怀明识所宜详观事势审择安危本主既终是执迷羣臣须自求多福或能率师徒而送款或能举郡邑以来降俟尔效忠即当行赏玉帛官爵我无爱焉以节镇来归则便颁节钺以郡邑向化则便赐郡符并令伪命职官各更加等酬獎去危得路转祸有门勿失良时自貽後悔百姓等各安家业无至忧惊王师所临军法甚峻已指挥诸军兵士不得杀人放火及掳掠人口发掘坟墓必令万旅不犯秋毫候收复江南日特放租税三年所有相次李煜差点到百姓刺面配军人等候收复日并放逐稳便归农各令倍加安恤摧枯拉朽竚成平定之功薄赋轻徭永乐混同之化凡尔黎庶各体我怀故兹榜示各令知委答李煜奏峡口舟船诏勅李煜省所奏峡口有舟船到岸事具悉朕思自尔守国今十四年瞻言保护之心着在久长之义然於近日继有间言或云修葺城池或云教习舟楫在城则选练军伍向外则抽点乡兵又於边上收得文字进来备见尔臣密所行意度或言禀奉宣旨或则自称朝廷向所倾输并云减降如斯机计都自罔欺惟朕心诚素无疑间骤兹闻达深用惊嗟而又方务包容是以别推恩旨因修国信专遣使臣庶尔暂来与吾面会定君臣之厚契释中外之疑怀兼於沿江量差兵士俾令巡警免尔忧虞何期峡口经由戍兵排布既来邀截须至杀伤兼封到弓箭进呈足明事实尔既未来朝覲彼又先起鬪争向所传闻兹乃证验今披所奏全似执迷岂衆臣蔽固而不知使大义仓皇而遽失所言二弟见在朝廷从善则方领雄藩举家帖泰从谏则见居公馆异礼接延日令抚安固无忧惧设若恩意减薄何以及斯宜体朕怀以保终始今并收到文帖封往故兹诏示想宜知悉

答钱俶进李煜书诏勅钱俶省所奏不拆重封进呈江南李煜送到书事具悉卿位冠师坛心倾王室铭钟镂鼎迴高表率之勲翼子貽孙不坠贞忠之节负上将纵横之畧秉大朝征伐之权得外境之来缄具封函而上进可明倾竭深副倚毗足观久大之谋永保山河之寄其为嘉赏不舍寐兴故兹獎谕想宜知悉

招谕李煜诏勅李煜朕法天临人开怀恕物每以爱民为念未尝黷武肆情而况待尔之恩素为殊异比期会面深欲宣心岂谓未体瞻怀惑於疑间致此嬰城之役应知失策之由或以为困在危途且无外援攻之则必取守之则必亡朕心未然良有以也但念满城生聚万旅攻围偶误计於一人致罹殃於兆庶矧惟终始素欲保全迺来虽有差违朕亦为尔体悉却虑方兹隔越未得悔陈许乃自新特颁明旨惟尔衷抱当用沉思岂不知先君坟茔每加保护在京骨肉尽礼接延尔虽疑迷朕无渝变由尔未能开悟致令困彼蒸黎今者览将帅之上言请梯之速进师徒之势迅若风驱旬月之间必见瓦解将俞所奏宁不軫怀失路之人所宜指示逆流之水用使开通辟兹効顺之门协以好生之义失於此际悔亦难追朕既不能爱彼生灵尔亦何路全其家国若能日度一日谋无定谋久长之间如何了夺从谏等先因贡奉来至京师久兹驻泊邮亭尽当体认朝旨俾令归复用达诚怀儆蔽固之能除斯忧危之顿释君臣之分可保如初祸福两途尔当审择故兹诏示想宜知悉

招谕江南勅榜勅江南人户等朕君临万国子育兆民惟思於恤物爱人岂憚於宵衣旰食瞻惟江表久隔皇风窃号偷名盗据其土地急徵厚歛割剥於黎元是兴吊伐之师往救凋残之弊捷音继至我武惟扬荡巢穴以非遥混车书而在即百姓等咸居伪俗未被朝恩先行告谕之文俾识怀柔之意如能向王师而効顺慕皇化以倾心即当永保安宁仍令倍与存恤若是

潜谋结集不认招携便遣分兵剪除必是全家诛戮惟兹祸福宜自择焉特示明文无貽後悔凡尔黎庶体我诚怀故兹榜示各令知悉

开宝八年平江南曲赦门下惟彼江南久从割据泊中原之有主奉正朔以投诚朝廷推恩保护尤至而李煜不量力分每纵奸儉诈为事大之恭勤每欲欺天而观望修葺城垒弥年为固守之方招诱豪强终日有包藏之志显然彰露达子听闻犹推以异恩许其入覲坚心背顺称疾不朝向来诈欺一朝俱败送蜡书则勾连逆寇肆凶徒则刼掠王民问罪之师驻蹕周岁朕念一城生聚逃告无门由愚駮之狂迷致民人之涂炭叠令招谕坚更拒违以致雷电师徒同怀忿怒一举而孤城自溃临危则逆竖擒降南方既平万彙同庆既洽昇平之化宜申旷荡之恩限赦书到日昧爽以前应江南管内州县诸色罪人【云云】太阳委照沴气已平庆此新恩当知朕意

除李煜官制孙皓降晋叔宝入隋咸膺列爵之封悉赦後时之罪兹惟故事可举而行李煜承累世之遗基据六朝之故地朕奄有天下底定域中苞茅虽贡於王庭辑瑞不趣於朝会泊偏师问罪銳旅傳城犹冀怀来颇闻固拒尔自貽於悔吝余岂忘於哀矜是用尽涤瑕疵并推恩渥升帝傳之秩列环卫之班兼启侯封式隆宠数勉膺休命宜保令图可光禄大夫检校太傅右千牛卫上将军封违命侯食邑三百户

诏建昇州为建康军江宁府勅朕以只畏昊穹保宁基构荷鸿禧之总集佑丕绪之縣昌眷予宗藩实惟元嗣聪和植性务时习以相资孝友惇方尤夙成而有裕爰稽輿颂式举彝章载增煮土之封弥固维城之业表兹南纪允谓奥区式示壮猷特崇巨屏宜建昇州为建康军江宁府【天禧二年二月戊辰】

天禧封昇王制王者尊奉宗庙必建於列藩承卫邦家允属於元子所以保定区宇亿宁神只用茂本枝聿隆天序朕仰膺真佑恭守丕基集鸿瑞之殊尤启庆源之渊邈是用上稽灵意下顺羣心爰开宝玉之邦式重盘维之寄举兹公诏诞告多方皇子崇仁保运功臣忠正军节度壽州管内观察处置等使特进检校太尉兼中书令使持节壽州诸军事行壽州刺史壽春郡王食邑三千户食实封一千三百户某敦厚慈仁聪明睿智英姿体於云日美德冠於珪璋识达几微动成乎先见学探闕奥克显於生知茂扬为善之风特表问安之喜而中外臣庶奏疏洽闻仰誉徽之日新愿典章之载举既难谦抑是用俯从六朝奥区南夏雄屏建其茅社锡以旌旄佐兼帝保之崇阶视台仪之重进褒功之懿号增食采之真封尔其靖共对越成命可开府仪同三司守太保兼中书令行江宁尹充建康军节度管内观察处置等使进封昇王食邑二千户食实封一千户赐宣德守正功臣勲如故仍令所司择日备礼册命【二年二月丁卯】立昇王为皇太子制朕以纂绍庆基寅恭宝命缅怀圣绪只守大伦详观方策之书具载典彝之训古先哲后临御中区何尝不崇建天枝登隆国本谨玉符之命召严象辂之威容适及昌期顾兹上嗣欲懋修於三善繫永正於万邦爰揆嘉辰诞颁明制皇子崇仁保运宣德守正功臣建康军节度管内观察处置等使开府仪同三司守太保兼中书令行江宁尹上柱国昇王食邑五千户食实封二千三百户【仁宗旧名】惠和天赋谨敏夙成发自妙年蔚为令器趋紫庭而遵教造丹宸以问安孝本因心礼皆中度而自毓英徽於兰殿进封爵於金坛佐以

儒臣导之经术春诵之功匪懈日新之德弥高乃眷具僚三陈封奏冀陟元良之位用符历代之文仰法前星俯从羣辟念宗祔之所赖命匕鬯而是司金议大同官占协吉重明贰极不其盛欤可立为皇太子改名【仁宗庙讳】所司择日备礼册命大赦天下文武常参官子为父後见任官者赐勲一转【二年八月十五日】

张士逊罢相知江宁府制入幹万几以总代天之职出倡九牧以宣美俗之风维时辅弼之贤迭为朝廷之重其颁明制以告治庭推忠协谋佐理功臣特进行礼部尚书同中书门下平章事集贤殿大学士上柱国清河郡开国公食邑四千三百户食实封一千四百户张士逊识用冲深器怀沈远早从朝路既陪东学之游肆翼天飞遂正中阶之列秉节在位宣劳有年念经邦务之烦庸寄藩符之秩天台之峻司寇帅於五刑泽国之饶秣陵都于一会载更显序往布寬条於戏君之遇臣要始终而尽礼下之报上无出处而或渝允迪乃休以服朕命可特授刑部尚书知江宁府兼管内劝农使改赐推诚保德翊戴功臣【天圣七年二月丙寅】

王安石罢相知江宁府制门下入则冠宰路之重百辟之所仪刑出则寄帅垣之尊万邦之所宪法苟非令德奚称异恩粤予端揆之臣久托机衡之任锡之宠渥均厥贤劳推忠协谋同德佐理功臣光禄大夫行尚书礼部侍郎同中书门下平章事监修国史上柱国太原郡开国公食邑三千一百户食实封八百户王安石稟明哲之姿蹈柔嘉之则学问渊博为时儒者之宗议论坚明有古直臣之烈咨畴伟望升冠近司忧勤百为夷险一节方藉壮猷之助且观盛化之流遽上封章愿还政事确诚莫夺茂典载加正位天官之联升华殿幄之侍仍加赋邑以重藩维於戲纳忠告猷卿所素尚尊德乐道朕岂敢忘母怠乃心而不予辅可特授行吏部尚书观文殿大学士知江宁军府事兼管内观农使兼江南东路屯驻驻泊兵马钤辖加食邑一千户食实封四百户改赐推诚保德崇仁翊戴功臣【熙宁七年四月丙戌】

王安石自江宁府拜昭文相制门下乾健坤顺二气合而万物通君明臣良一德同而百度正眷予元老时廼真儒若砺与舟世莫先於汝作有袞及綉人久伫於公归起升冢席之崇播告路朝之听推诚保德崇仁翊戴功臣观文殿大学士特进行吏部尚书知江宁府上柱国太原郡开国公食邑四千六百户食实封一千二百户王安石信厚而简重敦大而高明潜於心神驰天人之极摯尊厥德性泝道义之深源延登杰才裨参魁柄传经以谋王体考古而起治功训齐多方新美万事尔则许国予惟知人谗詖稽天孰斧斨之敢缺忠气贯日虽金石而自开向厌机衡之烦出宣屏翰之寄遽周岁历殊拂师瞻宜还冠於宰司以大厘於邦采兼华上馆衍食本封载更功号之隆用侈台符之峻於戲制天下之动尔惟枢机通天下之志尔惟蓍龟系国重轻於乃身致民仁壽於当代往服朕命图成厥终可特授依前行吏部尚书同中书门下平章事昭文馆大学士兼译经润文使加食邑一千户食实封四百户改赐推忠协谋同德佐理功臣【熙宁八年二月癸酉】

王安石罢昭文相再判江宁府制门下入居丞弼用表仪於百官出总翰藩将师帅於九牧地虽中外之异体亦重轻之均推忠协谋同德佐理功臣特进尚书左仆射兼门下侍郎同中书门下平章事昭文馆大学士监修国史兼译经润文使上柱国太原郡开国公食邑六十六百户食实封二千户王安石得古人之风蘊真儒之学眷方深於台辅志弥懋於政经挈持纲维

纠正法度俄属伯鱼之逝遽兴王导之悲引疾自陈丐闲斯确宜仍宰路之秩载加袞钺之荣於戲大官大邑以庇身建节虽临於乡郡嘉谋嘉猷而告后乃心犹在於朝廷纳忠不忘怀德甚还可特授检校太傅依前尚书左仆射同中书门下平章事使持节都督洪州诸军事行洪州刺史镇南军节度洪州管内观察处置等使判江宁府兼管内劝农使充江南东路兵马钤辖加食邑一千户食实封四百户改赐推诚保德崇仁翊戴功臣【九年九月丙午】

右二十五制皆大诏令錄前十八制知江南之所以平而创业之规着焉录仁皇初潜封册三制知昇国之所以大而太平之典在焉其後所錄四制则士逊安石皆以宰相出守又见江军之所以重而大臣之用舍有所关焉万年其监于兹臣顿首顿首谨录

景定建康志卷二

卷三

<史部,地理类,都会郡县之属,景定建康志>

钦定四库全书

景定建康志卷三 宋 周应合 撰

留都錄三

建炎以来诏令【所錄惟大诏令凡宰执使相被命为都督宣抚制置大使及守臣之被特恩而可考者錄之】建炎诏幸江宁府国家历运中微干戈未弭因时巡省盖顺权宜以江宁府王气龙盘地形绣错据大江之险兹惟用武之邦当六路之冲实有丰财之便将移前蹕暂驻大邦外以控制於多方内以经营乎中国尚虑有司排办过於奉承百姓追呼疲於道路徯齐民之或扰岂菲德之敢安将来巡幸缘路州郡及两浙路江东监司江宁府不得分毫骚扰以安人心【三年三月二十八日】

诏改江宁府为建康府建康之地古称名都既前代创业之方又仁祖兴王之国朕本繇代邸光膺宝图载惟藩潜之名实符建启之义盖天人之允属况形胜之具存兴邦正议於宏规继夏不失於旧物其令父老再覩汉官之仪亦冀士夫无作楚囚之泣江宁府可改为建康府其节镇旧号如故【三年五月八日】

制授刘光世江南东路宣抚使建康府置司门下朕观高帝创兴王之业亦安能久居於汉中孝文怀良将之风则未尝不在於钜鹿眷吾当世之杰克继昔人之贤旄袞交辉俾东西而作镇鼓旗相应庶表里以济功载?休辰敷告列位起复宁武宁国军节度使开府仪同三司充两浙路安抚大使马步军都总管兼知镇江军府事兼管内劝农使彭城郡开国公食邑四千八百户食实封二千一百户刘光世威严而持重沉毅而尚谋勇冠军中幼已从於父战名闻阃外壮自取於侯封屡宣入卫之劳茂着勤王之绩迨偃藩於京口实扞寇于淮濱吴汉在军隐若敌国李积护塞贤於长城尽经理之百为见忠纯之一节幸天心之悔祸属敌境之按兵敢恃小康遽忘远略临泗滨而列戍良所重烦抚江左以宣威式从改命益资雅望还控上游视黄合以参华仍墨綬而从事用加采食昭示邦彝廉蔺相欢应体公家之急贾冯不伐伫观远业之成於戲殫廩廩之储以参兵斯欲赖一朝之用极名器之宠而命帅岂其美百姓之观维予一人注意以畴咨与彼万方劳心而属望尔之责也往其钦哉可特授检校太傅依前起复宁武宁国军节度使开府仪同三司充江南东路安抚使建康府置司加食邑五百户食实封三百户封如故主者施行

赐刘光世辞免不允诏勅光世省所再上劄子奏辞免恩命事且悉朕以安危之计寄於二三

将帅之臣既命世忠出营淮泗则夫建邺上游之地非时伟望其孰镇之惟卿忠谊世济勲名并高茹痛恤起从戎事家讎国患宁忘厥图发号移屯军声益振固已威先万里之外矣方兹委重宜有宠行顾将相之官已登极品则帝傅之秩姑示褒崇往体眷怀毋烦坚避所请宜不允故兹诏示想宜知悉

赐江东宣抚使刘光世诏勅光世朕惟吴越之区既留警蹕江淮之险宜植藩篱顾贵池姑孰之津直下蔡历阳之会接九江之冲要临建业之上游分宿重兵是资伟望眷予勋旧深体艱虞闻指意以具孚请从移戍驰封章而来上曾靡告劳卿能若斯朕复何虑载嘉恭顺深动叹咨惟孝於亲则必扬後世之名惟忠於君则当徇公家之义念此中外安危之计属卿二三将帅之臣情若弟兄毋蓄墙之怨义均寮案共输许国之诚所期戮力以同心用克折冲而御侮丹青不朽将并列於云台带砺弗渝亦咸书於盟府乃所望也岂不韪欤已除卿江东淮西路宣抚使故兹诏示想宜知悉秋冷卿比平安好遣书指不多及

赐建康府路安抚大使吕颐浩乞给假不允诏勅颐浩省所奏比因饮食不时遂致胃弱因伤寒变为疟疾伏望俯念衰残给假将治才候稍安即兼程起发前去事具悉为臣之规固重於进退许国之谊宜徇於安危乃眷元臣实勤多难扁舟径去身虽远於朝廷魏阙遐瞻心谅存於王室属此防秋之急肆先作牧之求素志克伸何恙不已中兴江表今复见於夷吾薄伐太原尚有劳於吉甫其趣介圭之覲副兹侧席之思所请宜不允仍依累降指挥疾速前来行在奏事讫之任故兹诏示想宜知悉秋热卿比安好遣书指不多及

赐建康府路安抚大使吕颐浩辞免不允诏勅颐浩省所奏劄子辞免恩命事具悉君子处已以用舍为行藏大臣立朝寄安危於进退卿中辞政柄出拥麾旄闵劳机务之繁优假真祠之逸惟乃心王室能忘国步之艱顾无踰老臣用倚帅藩之托赐环趣召弭节来朝苍生之望素高元老之猷益壮垂绅正笏精神端可以折冲缓带轻裘谈笑何难於却敌维吾旧德宜体眷怀勉图克复之功毋徇撝谦之节所请宜不允故兹诏示想宜知悉

绍兴赐叶梦得辞免安抚大使不允勅书朕惟多事以来厥民涂炭大军之後所至荆榛日求绥馭之良庶复纂承之旧惟大江襟带之会实前古国都之余地关安危势控南北岂独赖兵民之镇盖将期农战之修非吾耆旧之英孰任倚毗之大爰颁优诏用畀剧权谓与人而同忧必不日而引道乃形逊牒殊拂眷怀其趣届於提封以毋勤於軫虑所请宜不允故兹诏示想宜知悉秋冷卿比平安好遣书指不多及

赐江南东路安抚大使兼知建康府充壽春府滁濠和州无为军宣抚使李光辞免不允诏勅李光省所奏辞免恩命事具悉朕惟侍从之贤出入迭用其在朝则矢谟禁闕为心腹之臣在外则折冲大邦膺屏翰之寄时有缓急任随重轻朕方擢卿从班首冠六聯之长属建康谋帅所急在兹虽坐执铨衡甚宜其职而宣威方面无以踰卿肆陞秘殿之华以壮长城之托亟祗成命勿事牢辞所请宜不允

赐镇江建康府宣抚使韩世忠诏勅世忠朕惟时已戒寒守当严备循江流而扼险顾力散以

难周联形胜以宿师则势专而易应眷昇润东西之府据江淮南北之冲走集所趋舳舻交会封疆之接鸡犬相闻曾无数舍之遥奚假两军之重乃命江东之戍更莅池阳遂因京口之屯并临建邺仍资威望分控长淮惟卿勇不顾身忠无择事宽其分部庶能展足以赴功睦乃比邻尚克同心而济务念国家之至计繄将相之协恭勉就大勲毋怀小忿譬犹捕鹿要为犄角之图有若献豸皆获公私之利往体朕意伫观厥成已除卿镇江建康府淮南东路宣抚使故兹诏示想宜知悉秋冷卿比平安好遣书指不多及

乾道御札赐知建康府江东安抚使史正志金带朕以江东方面控制两淮卿能悉意奉公协济王事职务振举朕实嘉之今遣中使甘昇赐卿金带以示褒劝之意至可领也【五年十一月】

赐新除知建康府洪遵诏厥今重镇莫如秣陵异时谋帅多取政涂之旧非特藉赖威望镇临兵民亦惟尝侍帷幄知德意志虑之详焉卿文学政事着于中外当涂分守尤号循良宽吾顾之忧无易卿者夫繇诸侯而列方伯释铜鱼而佩玉麟固足以为吏士之光矣况乎粉榆故乡近在封部之间哉勉称恩荣毋烦逊避【七年六月十二日】淳熙御札赐知建康府江东安抚使刘珙勅刘珙朕轸念元元靡忘宵旰每郡国小有水旱之虞则焦劳惻怛惟恐一物之失所非得吾九牧之良忧国如家视民犹已饥者推吾此意先事而为之备安能拯斯民於无事哉卿以枢机旧臣往厘别都属竝江诸郡岁适不登而建业为甚乃能前虑却顾预讲荒政或广储而贱粢或发廩以劝分或旁采於荆湘或泛招於商旅凡可以为赈恤之具靡所不至是以谷虽俭而市价不翔田亩虽伤而农人不至於饥饿转徙今兹多稼新穀已升则斯民遂可以免艰食之患而安有生之乐矣夫丰荒之事所不能无然方民病而後图与夫先事而为计其利害得失则固有间此赵抃之所以守越苏轼之所以守杭皆如是道而朕之所以有取於卿不忘乎嘉叹也故兹奨諭想宜知悉秋热卿比平安好遣书指不多及赐刘珙辞免不允诏朕深惩守帅之数更遴择循良而久任眷陪都之重地烦宥府之旧人逮此累年底于多绩召公南国当自适於憩棠裴度北门顾奚妨於卧镇宁容引疾遂欲合符勉思自养之方庸体仰成之意所请宜不允【五年闰六月】

赐知建康府陈俊卿诏大江东西并置连帅其属任等耳若乃外控淮甸内屏浙右建牙作牧兼寄留都之管龠则於选择抑又重焉卿蚤傅初潜简知惟厚久仪宰路望实具孚前以从臣摄行帅事凡兵民之利病江山之形胜固尝深思而熟讲矣嗣成前绩人胥谓宜矧卿不憚暑行既开洪府今秋高气爽舟輿安适造朝之镇乃复告劳乎式遄其驱毋遏朕命所辞宜不允【五年八月十日】绍熙御札赐知建康府江东安抚使章森勅章森省所奏劄子创造见管军兵营屋等事具悉陪都重地军籍尤备聯校束伍必有营垒之固而事功创举实资长才卿禁涂之英折符守龠政平讼理民用安业乃能以其余力体国远虑列楹旧址繕治一新夫经画有方则民不病扰居处既定则士不知劳若兵与民均安而亡害且足以儆军实修武事为藩翰经久之计其利溥矣成劳上闻深为嘉叹故兹奨諭想宜知悉春暖卿比平安好遣书指不多及

除曾从龙督视军马制门下朕祇承洪业远慕骏功督江左之军而国势张晋赖谢安之畧视

淮右之师而皇威畅唐资裴度之筹顾采薇治外之孔严宜蒸民任贤之尤急妙简元枢之望尽提诸将之权肆諏刚辰式涣孚号金紫光禄大夫知枢密院事兼参知政事曾从龙学醇而识邃德厚而器閎蚤擅两都之伦魁蔚为三代之王佐炳谋国之智先见洞乎蓍龟励事君之忠精诚贯乎金石再践政涂之峻独颢宥府之崇一念虑必图义於邦家一訃谟必思安於社稷气塞乾坤之大志期宇宙之清况太乙之神来格久占福曜之临而甲子之历有开适应初阳之复趣迎善气特命元戎皇天付予有家莫重要冲之守宁王遗我大宝适资艰运之扶维文武之全才蕴沉深之大畧就陞使领仍衍并畚总表撑里拓而定规摹合前茅後劲而受节度风生草木声震山川圣策定则有功可必应兵之胜真儒用而无敌何难勅敌之平注倚非轻延登有待於戏义问之拒逆亮收万全於指顾之间张浚之却伪齐奏三捷於谈笑之顷朕方恢於祖烈尔宜迈於前修衆思集则精神强列戍睦则首尾应亟菑攘於外侮用勛相於中兴可除枢密使督视江淮军马加食邑食实封

除新知建康府曾从龙参知政事制勅庆历之开太平范仲淹为参预元佑之新大化吕公着为疑丞朕遵晦十年厉精一旦趣召先朝之彦俾还近辅之联诞?丝纶敷告簪绂资政殿学士新知建康府曾从龙学根乎正大气抱乎纯明其重足以挫衆纷屹然鼎吕其静足以烛羣动了若蓍龟蚤服在於大僚耻苟同於污俗不合则去有待而行鹤鸣九臯久闻声而乐只凤翔千仞迄览德以来思予兴相见何晚之嗟尔动可为忠言之喜举昔大对劝今力行嘿有契於此心期共繇於斯道更化则可善治宜增重於本朝折冲何必临边奚尚劳於外服爰辍居留之寄聿严共政之图莅勅局以提纲拓爰田而衍赋并昭异数式獎英猷噫六典建於周家莫先乎设参而置辅庶绩凝於虞室尤在乎同寅而协恭勉殫訃谟之忠共济垂拱之治可除参知政事加食邑五百户食实封三百户

除赵葵督视江淮军马制【续兼知建康府江东安抚使行宫留守】门下朕若稽在昔无竞维人南仲往城而玁狁于襄文后所以严治外之政召虎来旬而淮汉庶定宣王所以成攘夷之功我有荅臣夙蕴英略允谓文武兼资之彦久赞东西二府之权庸就枢联陞进使范仍执国政翼宣化原兹适会於时艰所当急者兵务用烦戒道俾往视师士听无譁王言作命通奉大夫知枢密院事兼参知政事权监修国史日历同提举编修勅令同提举编修经武要略长沙郡开国公食邑三千三百户食实封六百户赵葵抱开物成务之学富康时经远之謦识洞几微得知国知兵之要世传忠孝播有臣有子之诗颢经制者十年尽劬瘁之一节朕公入奏旗常之勲绩屡书威誉再驰旃裘之君长咸怖出则老熊当道入而猛虎在山休名雅似於仲淹勇退直希於若水属时改纪有诏予环甲兵之问至庙堂肆俾分治股肱之寄在忠力未尝辞难种蠡霸越之可期房杜相唐而有待载畴绩用趣正使端当疆事之未宁而敌情之叵测分数不明而兵屯无以统一赏罚不信而士卒无以激昂孰宽顾忧卿独勇往惟气势合则可以制胜惟精神运则可以折冲水陆之备必严风寒之护必密兵事不由中御盍思运量之宜廷臣汝择自从盍广忠贤之助实倚长算克济多虞庙论既得以参闻治脉庶几於融贯并衍邑租之入於昭礼貌之隆於戏王导仗黄钺而督晋师江左赖之清宴裴度荷雕戈而执蔡丑淮右以之底宁圣策定则有功真儒用则无敌罔愧前哲则维汝能可特授枢密使兼参知政事督视江淮京西湖北军马依前通奉大夫长沙郡开国公加食邑一千户食实封四百户赐赵葵辞免不允诏勅赵葵省所奏劄子辞免兼知建康府兼行宫留守江东安抚使恩命事具

悉朕观晋人备御北方之略大将必有定居戴渊都督六县而镇合肥桓冲亦督七州而镇上明所以据形势立根本也卿以夙望授钺既合江淮荆楚而尽护之陪都留钥之寄复付卿而不吝者亦晋人命戴渊桓冲意也兵事尚密卿勿多云所辞宜不允故兹诏示想宜知悉

特转赵葵三官制门下朕倚任大臣饬严外治筹帷幄而决胜夙推谟略之长锡斧钺以视师允藉威名之重属封疆之告警幸边备之素修遂以捷闻用宽忧顾犹未举舍爵策勲之典其可稽加地进律之恩诞告朝伦咸聼朕命通奉大夫枢密使兼参知政事督视江淮京西湖北军马兼知建康军府事兼管内劝农使兼行宫留守江南东路安抚使马步军都总管兼营田使提举编修经武要略权监修国史日历同提举编修勅令长沙郡开国公食邑四千三百户食实封一百户赵葵恢闳而沈厚刚大而裕和识足以照万微智足以应羣物知子莫若父尝许以开济之才事君能致身所守者精忠之节再践凝密益资赞襄顷缘疆场之间虑有甲兵之问迨天之未阴雨如人之护风寒若思患而为之防当先事而为之备於时有建督之议适契予衷俾卿冠环枢之聯特为朕往览观上下流之势激昂文武士之心经营孔艰处分已审此邦不足平也恃吾有以待之俄闻蠡螭之来敢肆虎狼之侮我衆素饱坐折遐冲王师如飞欲贾余勇惟事豫则立而策先定故兵应者胜而力不劳已信敌忾之威正欲解严之际以精诚体国厥既肯留念股肱服勤宜先懋赏是用陟三阶而眡左光禄之旧陪多邑而食我公田之腴以示恩徽以隆枋任於戏在师中承天宠丕昭锡命之公铺淮瀆修我戎嗣有还归之喜兵事以暇而整军容非礼不严必和衆而後可定功必有常而後可立武祗若予训以图尔成可特授宣奉大夫依前枢密使兼参知政事督视江淮京西湖北军马兼知建康军府事兼管内劝农使兼行宫留守江南东路安抚使马步军都总管兼营田使提举编修经武要略权监修国史日历提举编修勅令长沙郡开国公加食邑一千户食实封四百户

赐赵葵辞免不允诏勅赵葵省所上表再辞免视师朞年特转三官依前枢密使兼参知政事督视江淮京西湖北军马兼知建康府江东安抚使行宫留守仍加恩命事具悉朕观宣王中兴之雅知召虎平淮之功当其告成用锡尔祉宠命便蕃焉其四章曰无曰予小子召公是似释者谓王欲虎无自谦损耳五章曰锡山土田于周受命释者谓使受赐于岐周显其先也至卒章又曰对扬王休天子万壽是其拜命必归美于上君臣俱荣朕甚慕之日泗之捷实卿胜算少迟入覲将图尔成褒赏之行周邦咸喜今顾本之朝廷与士大夫之力自谓无赫赫之名而欲辞之谦母已过乎幕府上功已诏第赏俾予一人以宁亦惟汝嘉亟共朕命勿重有请所辞宜不允

拜赵葵右丞相兼枢密使制门下常德以立武夙资御侮之臣歌出车以劳还式副登庸之选迺眷机廷之彦久颞督钺之雄旬宣既奏於肤公体貌聿崇於次揆其敷言綍以谕朝绅宣奉大夫枢密使兼参知政事督视江淮京西湖北军马兼知建康军府事兼管内劝农使兼行宫留守江南东路安抚使马步军都总管兼营田使提举编修经武要略权监修国史日历同提举编修勅令长沙郡开国公食邑六千三百户食实封一千八百户赵葵忠实而疏通沈潜而刚劲鍾南岳之英气为西平之世臣仁不异远义不辞难蚤奋经营之略文能附衆武能威敌允兼牧御之长勲绩纪于旗常声名震于草木洵陪宥密深契眷知顷边遽之戒严升使端而授任色词慷慨毅然请行指授雍容虑无遗策尽护诸将于今三年坐收泗上却敌之功增

重江介留台之地朕惟折冲在乎强本寬民所以备边矧将序情而闵其劳肆因告成而锡尔祉太尉相尊等耳既久居位望之隆人杰吾能用之又何爱钧衡之重爰立诸右式遄其归北斗神枢仍本五兵之柄金章紫绶峻跻二品之阶并衍畚耜特优宠数於戏及闲暇而明国政朕素定於宏谟建辅弼以成天功尔尚钦於明命必和衆乃为保大必同心斯可图安克壮其猷祇若兹训可特授金紫光禄大夫右丞相兼枢密使提举国史院实录院提举编修国朝会要提举编修经武要略长沙郡开国公加食邑一千户食实封四百户主者施行

赐赵葵辞免不允诏勅赵葵省所三上奏辞免特授金紫光禄大夫右丞相兼枢密使长沙郡开国公加食邑食实封恩命事具悉朕以卿久劳于外延登次辅既命撤幕属边以遽告为朕少留江上指授吏士非临机达权畴克尔载覽封奏知敌已遁去介圭入覲兹惟其时遂欲归田何耶诗云来归自镐我行永久此吉甫所以多受祉也式遄其驱以副钦仁所辞宜不允不得更有陈请令疾速赴都堂治事故兹诏示想宜知悉

除马光祖沿江制置大使知建康府兼江东安抚使制朕畴咨旧人易畀鉅镇召虎之经营江汉夙敏戎公毕公之申画郊圻用成嘉绩载加徽数式重中权端明殿学士正奉大夫京湖安抚制置大使兼知江陵军府事兼管内劝农营田使兼夔路策应大使兼总领湖广江西京西财赋湖北京西军马钱粮专一报发御前军马文字提领措置屯田兼京湖屯田大使武义郡开国侯食邑一千户食实封一百户马光祖刚毅近仁质直好义老略经世兼麓细之才俊识爽邦该体用之学顷繇留钥往镇上流商画边筹指授将略垦田积腐之粟募兵捐燧之货士饱而歌人百其勇雅分忧江湖之上数布喜京岷之间时嘉乃功既锡尔祉荆州控聯蜀道虽尽护西北之风寒建邺拱卫行都宜重植东南之根本惟熟器使则履屐当惟精运掉则臂指随频频元戎十乘之行益壮长江万里之险以大经制以远精神百姓如慈母鞠育于怀三军若严师鞭辟其侧旌旗为之改色波涛依然安流肆陞书殿之恩华一新帅垣之风采噫张咏威惠相济久渴借留之心颐浩弹压为长式慰邇来之望昔尹兹土今见其人克践前猷母俾专美可依前正奉大夫特授充资政殿学士沿江制置大使知建康军府事兼管内劝农营田使江南东路安抚使马步军都总管行宫留守节制和州无为军安庆府郡屯田使加食邑四百户食实封一百户【开庆元年二月】

赐马光祖辞免不允二诏勅光祖省所奏辞免除资政殿学士沿江制置大使知建康府江东安抚使行宫留守恩命事具悉经营南纪久宣阃外之劳保厘东郊申锡师中之命卿忠忱体国俊杰识时缓带轻裘居有边筹之暇中权後劲克共武服之严屡奏肤公式嘉懋绩惟荆州重地既遮蔽於风寒顾建邺陪都宜培垣於根本峻升书殿增重制垣载烦戎乘之行用慰旧镇之望引以自近谅复奚辞河内得恂熟知牧御之略江左有导其究镇重之规亟体注怀毋庸谦执所辞宜不允故兹诏示想宜知悉春暖卿比平安好遣书指不多及勅光祖省所再上奏辞免除资政殿学士沿江制置大使知建康府江东安抚使行宫留守恩命事具悉江左东南根本毗周分陕必如召公留爱甘棠庶几重封殖之卿前治建邺民习教条士知纪律易闾上流去思如渴今兹付卿旧镇是还百姓以慈母三军以严师拊摩训督克成厥终正所望於卿又何辞焉所辞宜不允不得再有陈请故兹诏示想宜知悉春暄卿比平安好遣书指不多及

獎諭馬光祖賜金帛?張之寇肆擾江濱卿始則啓元乘以征行繼復集舟師而赴援恤鄰之誼固宜爾而體國之念殊可嘉因任進職已示褒寵復頒金帛用旌爾勞至可領也【景定元年四月二十六日】

授馬光祖資政殿大學士制勅朕儀圖江閩申命制臣比援上流嘗藉濟師之力茲?大號用陞顧問之班仍專斧鉞之權因任藩垣之寄丕昭寵渥載錫贊書資政殿學士正奉大夫沿江制置大使知建康軍府事兼管內勸農營田使江南東路安撫使馬步軍都總管行宮留守兼節制和州無為軍安慶府三郡屯田使金華郡開國侯食邑一千四百戶食實封二百戶馬光祖強毅而端方宏深而肅括志存社稷固將左執弭而右屬橐令稟朝廷用能晨受命而夕就道往返風濤之上驅馳兵革之間靡憚其勞率先以往當彼寇披猖之甚適我兵調遣之艱曲盡乃心無落吾事爰肆放於褒賞庸懋獎於忠勤加隆名於一字之榮仍寵任以六師之重以酬前績以勵後圖噫股肱宣力四方身雖居於閭闔君臣相須一體心毋遠於闕庭勉對恩徽益思報効可依前正奉大夫特授充資政殿大學士沿江制置大使知建康軍府事兼管內勸農營田使江南東路安撫使馬步軍都總管行宮留守兼節制和州無為軍安慶府三郡屯田使時暫兼淮西總領金華郡開國侯加食邑四百戶食實封一百戶

賜馬光祖辭免不允詔勅光祖省所奏辭免除資政殿大學士仍舊任恩命事具悉陪都為經營四方之根本中興以來如浚如俊卿皆以元勲碩輔再鎮撫是邦草木知其威名敵人不敢起飲江之想頃上流之備不戒騎 漲于汴黃至勤宰臣擐甲督戰一洗而清之卿累月驅馳上下勞績用懋所調麾下將士亦屢以得隼開幕府上功炳如也進書殿之鴻名仍閩府之舊寄見知而悅疇不謂宜異章引避曾是以為榮乎夫師以氣為主以直為壯今我之氣直且壯矣勉圖常武之功嗣對遄歸之寵所辭宜不允故茲詔示想宜知悉夏熱卿比平安好遣書指不多及

御札獎諭馬光祖筑宜城勅光祖古舒與秋浦相望一衣帶水昔人所謂風寒處也移治以來雖建立官吏而蕩無堡障民有搖心或請板筑宜城而守之議久不決屬者丞相行邊采其策卿以制閩任其事且佐其費向之荒墟今為堅壘設敵南來猝攻之不能克欲舍之深入則懼吾金湯之擬其後此國家以淮西三郡隸昇閩之初意也竣事來告忠勞至矣予嘉乃績寤寐嘆賞卿其益恢遠略以紓予北顧之憂故茲獎諭想宜知悉春寒卿比平安好遣書指不多及【景定二年三月】

特轉馬光祖光祿大夫制經始不日而成閩帥干方之略有功見知則說公朝勵世之規眷言藩屏之賢能設金湯之險肆盼寵數式獎勵庸資政殿大學士正奉大夫沿江制置大使知建康軍府事兼管內勸農營田使江南東路安撫使馬步軍都總管行宮留守兼節制和州無為軍安慶府三郡屯田使時暫兼淮西總領金華郡開國公食邑二千三百戶食實封四百戶馬光祖挺文武之全才膺安危之重寄當鐵騎倏游魂而至佩玉麟分方面之憂樽俎折冲屹若蔽遮於近甸樓船下瀨隱然犄角於上流迨邊陲之肅清贊廟謨之恢拓自舒移治有郡虛名至煩竹符之親臨決就宜城而改筑難與慮始昔嗟作舍之莫成知無不為今有制垣之任責二紀之荊榛蔽野一朝之雉堞连云滌濤皖之氛埃生蘄黃之氣勢倂圖來上宵旰頓寬其疊

进於穹阶以显旌於殊绩噫长江号天堑卿其护腹背之风寒圣人有金城朕方赖股肱之忠力益闢规画以副眷怀可特授光禄大夫依前充资政殿大学士沿江制置大使知建康军府事兼管内劝农营田使江南东路安抚使马步军都总管行宫留守兼节制和州无为军安庆府三郡屯田使时暂兼淮西总领金华郡开国公加食邑四百户食实封一百户

赐马光祖辞免不允诏勅光祖省所再上奏辞免任责浚筑宜城特转两官仍令学士院降奨諭恩命事具悉赏以劝劳国之彝典矧宜城板筑就绪遂为江南一障蔽厥劳茂矣劝奨其可已乎巽腴洊腾备见谦挹虽曰宰臣之指授亦惟阃制之经营二等进官受之奚过亟祗成命勿复有言所辞宜不允不得再有陈请故兹诏示想宜知悉春寒卿比平安好遣书指不多及

御札又赐马光祖卿忠勤一节中外具知长江天堑赖以安妥前岁之援上流旧岁之筑宜城又近绩之最着者朕甚嘉之洊览来奏欲释阃寄非朕所乐闻也增秩甫新倚重正切愿毋遐心嗣对光宠【景定二年】

授马光祖观文殿学士制勅制垣底绩聿观三载之成书殿冠班昭示四方之劝诞颁异数采耸具瞻资政殿大学士光禄大夫沿江制置大使知建康军府事兼管内劝农营田使充江南东路安抚使马步军都总管行宫留守节制和州无为军安庆府三郡屯田使时暂兼淮西总领金华郡开国公食邑二千六百户食实封五百户马光祖识远而气宏道周而业鉅天机错综冰壶玉监之高明学力雄浑泰山乔岳之负载能应则五官之并用尽忠则一髮之不欺京师衆大之居每思前尹金陵六朝之旧爰重中权逮往抚於荆襄久宣劳於江汉视仪政路式表儒猷赵拊一琴累疏欲归廉范五袴陪都怀旧宵旰倚寬於忧顾风涛靡憚於泝沿赅然重临惠此四履郛於冀如制水坐屹胜形晋及楚其余波具有远烈方且设险守国造舟为梁青铁铸兵黄金募士或偃息或燕乐予拮据予蓄租既消骑火之红正念玉关之老効式臻於久任职乃锡於隆名紫宸地殊非但序迁之宠金城日壮尚惟柄用之图繫我誉髦对揚休命可特授观文殿学士依前光禄大夫沿江制置大使知建康军府事兼管内劝农营田使充江南东路安抚使马步军都总管行宫留守节制和州无为军安庆府三郡屯田使时暂兼淮西总领金华郡开国公加食邑四百户食实封一百户

手诏奨諭马光祖勅光祖卿前自渚宫重临江阃荏苒三载勤劳百为援枹鼓以掎角上流之师悉赋輿以板筑宜城之垒蒐卒补逃亡之虚籍散金募游击之健儿金鑠緑沉森罗武库蒙冲鬪舰照映怒涛凡皆军中节缩之羸靡烦公上拋降之助知鞠躬而尽力不矜能而伐功载嘉元戎卫社之忠深得大臣体国之谊赐玺书而褒美伫袞绣之来归故兹奨諭想宜知悉冬寒卿比平安好遣书指不多及【景定二年十月二十五日】

第二次除马光祖沿江制置大使知建康府江东安抚大使行宫留守制勅朕简求近弼重镇陪京念昔全江淮以济中兴允资硕望矧今崇诗书而谋元帅讵舍旧人起之田间付以居守爰疏茂渥申锡賛书观文殿学士光禄大夫提举临安府洞霄宫金华郡开国公食邑三千七百度户食实封七百度马光祖器伟量闢资凝猷远炳蓍龟之先见凜松栢之後凋方叔元老克壮其猷历蕃宣於四国君陈嘉谋入告尔后尝唯诺於一堂顷以荅臣洊分江阃投鞭欲渡有

颺回雾塞之显忧杖钺以先助霆击电扫之胜势威名犹在谊槩可嘉朕慨念留都控扼天塹虽千羣奚用已屹立金汤之形然一物不牢敢少怠衣枷之戒孰寛忧顾无若老成兵将素服其拊循民吏夙安其条教龙盘虎踞山川不易於镇临鱼钥麟符麾帜一新於号令以壮外攘夷狄之畧以恢北定中原之规噫拚以清修固再临於益部琦以勲辅尚三典於相台勉企前修益光贤业可依前观文殿学士光禄大夫特授沿江制置大使兼知建康军府事兼管内劝农营田使兼江南东路安抚大使马步军都总管兼行宫留守节制和州无为军安庆府三郡屯田使食邑实封如故【景定五年四月】

赐马光祖辞免不允二诏勅光祖省所奏辞免依旧职除沿江制置大使兼江东安抚大使兼知建康府恩命事具悉维今江阬内护留都每辍将相大臣往任保厘重寄卿硕肤厚德典刑宿儒其威名荐着於镇临其惠泽素覃於牧守兹谋元帅母踰老臣昔黄霸潁川前後八年而愈治郭汲并部儿童数百以来迎成命既颁彼民大悦人惟求旧初何惜於重临事不辞难亦胡为而多逊所请宜不允故兹诏示想宜知悉春暄卿比平安好遣书指不多及【景定五年四月】

勅光祖省所再上奏辞免依旧除沿江制置大使兼江东安抚大使兼知建康府行宫留守恩命事具悉已丑诏书谕卿至矣胡犹未孚朕意昔臣仲淹事我仁祖於再抚陕西之日有惊破贼胆之謠顾今秣陵为国钜镇表淮里江而分阬所赖折冲中权後劲之得人孰若图旧是用起卿家食司钥陪都若夫遮蔽风寒之规摹绸缪牖户之知略驾轻就熟固饶为之母但以膂力既愆辞速就国可也所辞宜不允不得再有陈请故兹诏示想宜知悉春暄卿比平安好遣书指不多及【景定五年四月】乙丑赐马光祖丐祠不允三诏勅光祖省所奏乞畀丛祠事具悉卿曩事光帝为股肱臣简注不忘起之家食重付北门之管屹为长江之防曾未几时龙湖僊去所留以遗予冲眇者一二臣外尤藉卿以寛顾忧焉昔人有卧摠留台者岂得遽以疾谗乎如云满岁渐欲引年兹固未可尔其体眷倚益懋壮犹是亦卿所以报先帝之遇也所请宜不允故兹诏示想宜知悉夏热卿比平安好遣书指不多及【四月】

勅光祖省所奏乞畀祠廩以便养痾事具悉维周之隆率东诸侯者以六师申豫防之戒报诰则曰尔身在外心在王室上下交修用答扬光训访予落止亦惟股肱宣力之臣追先帝殊遇治于闲暇之时作周匹休卿有方叔克壮之犹膺毕公保厘之寄以国为家以民为身其可属负兹而忽彻桑土商颺寢劲江防为先惜分陰以护风寒精神折冲徒得卿重从容裘带斯可养恬无弃尔成懋乃攸绩所请宜不允故兹诏示想宜知悉夏热卿比平安好遣书指不多及【六月】

勅光祖省所再上奏乞祠廩事具悉周经营江浒必召伯之有成汉餉馈关中惟鄼侯之专属师旅以暇而整威惠以久而孚卿虽三命於居留今甫踰年之宅牧我戎未定靡归聘宁不永怀旧人远省知若勤岂宜易退阬寄不可数易疆事母恃不来与其慕赤松之从游孰若勉干木之偃息曷为洵奏未烛予衷不刚不柔而德修足食足兵而民信典听朕愍图功攸终所请宜不允不得再有陈请故兹诏示想宜知悉秋热卿比平安好遣书指不多及

御札獎諭馬光祖提師應援覽奏以寇迫舒城元戎銳於一出忠忱為國威聲懍敵諸將有所倚賴事功何患不集予甚嘉之安慶城高池深固無足慮萬一有窺江之謀則豫防力竭必使無透漏乃可切宜勉旃庶寬忱顧【咸淳元年八月】

丙寅賜馬光祖丐祠不允二詔勅光祖省所奏乞畀叅祠事具悉卿以文武威风三尹陪京江汭經營厥功茂焉召伯有成王心則寧朕用寬北顧之憂采薇出車之勤瘁靡日忘之今天塹雖既清而陰雨之防不可忽迨我暇矣建威銷萌繫卿是賴其可謂事幾沓來而圖田里之安處謹護風寒惟卿遠慮無恙于恤成乃圖功亦惟舊人不克遠省昔元佑初留龔洛師者未釋位詔諭之曰視國如家忠臣可以忘年卿年至未也勉為國計勿復懷歸所請宜不允故茲詔示想宜知悉春寒卿比平安好遣書指不多及【正月】

勅光祖省所再上奏乞畀叅祠事具悉朕聞任賢責成者久而不易體國經遠者華皓而益堅角巾東第之言未聞羊祜之從欲卧護北門之寄豈曰裴度之辭勞矧卿克壯其猶盍思不解于位耆壽俊在服詎宜止足之謀樽俎間折冲奚必驅馳之役傥使卿遂山林之志孰為朕分疆場之憂無踰老臣罔或自介用逸所報先帝亦惟以救圖功所請宜不允不得再有陳請故茲詔示想宜知悉春寒卿比平安好遣書指不多及

景定建康志卷三

卷四

钦定四库全书

景定建康志卷四 宋 周应合 撰

留都録四

御制 御书

真宗皇帝御制御书

观龙歌【中使自茅山取龙入献乃作歌送还山中】四灵之长唯虬龙虬龙变化故难同三茅福地羣僊宅灵物潜形在此中池内僊人驯扰得至今隐现谁能测乘云蠢动独标奇行雨嘉生皆荷力常人竞取暂从心才出山檻兮无处?中使勤求深有意欲献明庭兮陈上瑞初献一龙朝魏阙偶挹二龙离洞穴人心龙心若符契一去一住何神异我覩真龙幸不惊至诚祝龙龙好听但祈风雨年年顺庶使仓箱处处盈

仁宗皇帝御书

飞白尧舜佛安字赐知江宁府钱公辅

飞白帝佛字赐知江宁府傅尧俞

高宗皇帝御制御书

题金华宫石上十二字云虎踞龙蟠耸金陵之王气【高宗御名】书

【庆元旧志载在第九卷书画类注云即绍兴初临幸日所书也今在府治又於第十卷末云此十二字非是御书盖谓御书不宜书御名又谓石在府治车驾至建康即入行宫未尝幸府治又谓唐润州毕刺史之名与高宗庙讳同此字疑为毕所书也今以旧志详之其不可信有四建康行宫系绍兴二年命李光建帝初至建康实建炎二年五月其时未有行宫暂驻蹕神霄宫即保安寺也旧志乃谓车驾至建康即入行宫一不可信也驻蹕神霄之时尝以华藏寺暂为府治盖旧府治欲建行宫故守臣出寓华藏其後行宫既成始改府治于行宫之东南隅则今之府治实非建炎以前之旧治旧志乃以高宗未尝幸府治而证御书之非是安知此地未为府治之先游幸不曾到此指今府治为旧府治其不可信二也金华乃梁宫名去台城三里旧志九卷记云御书金华宫石十卷记云元刊致一斋竹石间与金华宫石错立两卷自为

抵牾其不可信三也九卷直书曰高宗御书十卷又指为毕刺史书其不可信四也恭觀高宗前後宸翰字体与臣黄庭坚字相近此石所题十二字亦然庭坚字法自为一家唐人字学虽精未见有字体与庭坚同者前此守臣以此十二字为高宗御书而严奉于玉麟堂之东必有见矣岂可以唐润州刺史之名偶同御名而意彼为是耶况昇润各州以润州刺史之名而证昇州之字亦未为确也今不敢不记於御书之列俟正於後之君子】

御制诗赐张浚曰愿同越句践焦思先吾身卒章曰高风动君子属意种蠡臣【建炎二年至建康时】

御书孝经十八章真草相间赐秦桧

御书周易乾卦赐秦桧

御书决策元功精忠全德之碑十字赐秦桧

御书六轴赐王安节王珙【本藏其家】

御草书王安石诗赐赵撙纷纷扰扰十年间世事何尝不强顏亦欲心如秋水静应须身似岭云闲【刻石在保宁寺】

孝宗皇帝御制御书

武经龟鉴序赐王彦曰古之有天下国家者未尝去兵故曰天下虽安忘战必危自司马之法坏後之言兵者必曰孙武观其消息盈虚合於天道横斜曲直应变无穷可谓善之善矣朕於此每有感焉尝欲考古今之成败较谋略之短长以合於武放示诸将庶政方繁有所未暇保平军节度使王彦以其所编次武经龟鉴来上采掇前代已然之迹着其得失必取武书以验之诚得我心之所同然者斯亦勤矣噫文武一道也三代以六卿命帅汉以御史大夫护军凡为将者安可不学耶霍去病谓顾方略如何者此一时有激而云非万全之计不当以为法也彦宜益懋勉俾无愧於此书岂不美哉嘉叹之余因题于篇首隆兴甲申岁秋九月甲子选德殿书赐王彦【彦时为建康都统制刻石在本司】

御批赐郭振卿廉正自守朕深知之但诸军统兵官切宜待遇以礼随其高下付与事权严其阶级【如兵官有过当由卿自治之无使小人侮慢兵官如此则阶级不严】庶可统率士卒不至犯分缓急可以责任卿宜体此【振时为建康都统制刻石在本司】御札赐阎仲朕惟将帅之弊每在蔽功而忌能尊已而自用故下有沉抑之叹而上无胜筭之助殊不知兼收衆善不揜其劳使智者献其谋勇者尽其力迨夫成効则皆主帅之功也昔赵奢解阨与之围始令军中有谏者死及许历进北山之策而奢许诺卒败秦师奢为封君与廉颇同位果何害焉卿当以奢为法毋蹈前弊用副注委已尝面谕此意故兹亲札宜体至怀

皇帝御制御书

题赵葵墨梅诗曰溪藤踈影势千寻笔补春工着意深止渴调羹归妙手谁知一片岁寒心

御书明道书院四大字赐为额

御书忠勤楼锦绣堂六大字赐吴渊

御书忠实不欺之堂裕斋桂山十字赐马光祖御书景福万年之殿六大字赐茅山元符观

御书灵休介福元坛六大字及圣德仁佑之殿六大字褒僊镇宝四大字宝珠杯三大字赐茅山崇禧观御书玉气凝润鹤情超辽八字赐司徒师坦

诏札碑刻【御书御制不专繫於建康而立石在府者録于此】

太宗皇帝御制戒石铭曰尔俸尔禄民膏民脂下民易虐上天难欺

高宗皇帝御札曰近得黄庭坚所书太宗皇帝御制戒石铭恭味旨意是使民于今不厌宋德也因思朕异时所历郡县其戒石多置栏檻植以草花为守为令者鲜有知戒石之所谓也可令摹勒庭坚所书颁降天下非惟刻诸庭石且令置之座右为晨夕之念岂曰小补之哉【绍兴二年七月吕颐浩立石府治】

仁宗皇帝御制放生文曰哀汝等前生中作何罪业变入恶道生胎卵湿化有无足两足多足等故我今思曰汝往世曾为酷煞生人过为凶恶不忠国君不重父母十恶三业六情尽牵五业皆惑饮食盈腹而不美衣重过度而不华软硬染心温冷着意疼痒动念龕滑见情目乱杂色耳耽嬉声口贪诸味鼻□鼻香心无所足意起望外荣尊登天而不高威人仗煞而不足伏为汝等各归人世莫为畜种信行三宝奉成斋戒乐闻佛法永无罪障三世一切佛救此业因信心回向不作过恶得成佛果【庆历七年八月七日降下至和三年四月十四日立石本府法光寺】

徽宗皇帝手诏朕承祖宗遗休余烈崇经术设学校兴贤能以待天下之士高爵重禄承之庸之以待士之在官者盖与之修政事理人民以立太平之基致唐虞三代之隆宜有豪杰特立之材忠信志义之人比肩相望焜耀一时为世盛事而比年以来怀僭乱之异谋干殊死之极宪如赵谗储侔王桀刘曷之徒或贤科异等勲阀世胄或出入禁闥侍从之领?为搢绅士大夫之大辱闾巷无知愚夫愚妇之所愤疾武夫悍卒未尝知书者咸羞道而喜攻之其故何也岂利心胜而义不足以动之欤抑劝导率励之方有所未至欤夫经传所载君臣之分忠义之训荣辱祸福之戒岂不深切着明今诵其言而不能效之行事深虑薄俗浸渍士风陵夷失崇养之指害教化之原为天下後世笑卿当师儒之任以学行致大官其思所以劝励兴起俾知尊君亲上之美无复暴戾邪僻之行以居德而善俗以化天下与後世称朕意焉故兹诏示奉行

母怠付李邦彦【政和八年二月刻石府学】

大观圣作之碑【刻石今在溧水句容县学大成殿】

高宗皇帝籍田手诏朕惟兵兴以来田亩多荒故不憚卑躬与民休息今疆场罢警流徙复业朕亲耕籍田以先黎庶三推复进劳赐耆老嘉与世俗跻於富厚昔汉文帝频年下诏首推农事之本至於上下给足减免田租光于史册朕心庶几焉咨尔中外当体至怀故兹诏谕想宜知悉【绍兴十六年八月守臣晁谦之刻石府治】

御札颁戒石铭【见前】

御书兰亭修禊序【刻石在溧阳县】

孝宗皇帝戒谕军帅五事

主帅唯务廉正日前弊事当一切措置革去军中财赋不得循习旧弊交结妄用巧作名目虚破官钱诸军器械衣甲等除上教一副外更当桩办两副

专充出战使用即不得将已造下军器轮转作见造数目重叠支破官钱遇陞差将佐等当依公选择不得私受情嘱或以喜怒行事入队战士不得差拨杂役【乾道七年十二月十六日差中使宣引带御器械王明至便殿御札出诸袖中亲以授之令朝夕閱视未几差王明统戎池州继为步帅马帅有功无过圣训之力也淳熙三年九月立石建康马军司】

手诏戒谕漕臣曰朕躬节俭以先天下无暴征无苛取期吾元元跻于富庶之域郡国之间宜若公私交裕矣今顾不然丰年乐岁中外少事或未免於匱乏州迫其县县迫吾民其故安在无乃赋入寡而用度衆欵吏二千石有能不能欵将辍费妄用莫知撙节欵朕既深居九重无以徧察故分道置台寄耳目于尔漕臣职当计度欲其计一道盈虚而经度之也职在按察欲其蚤正素治毋使至于病民也厥或异此朕何赖焉且汝不闻黍苗之诗乎我任我犂我车我牛谓美召伯能成转运之功也後世以是名官宁无意耶曰阴雨膏之言能养民如膏雨也其卒章曰王心则宁言家给人足乃能安王之心也汝等得不深思古谊视所部为一家周知其经费而通融其有无廉察其能否而裁抑其耗蠹数者备矣郡计何患乎不足郡计足则属邑寬属邑寬则民力裕民力裕则吾宵旰之虑释国有信赏於汝何吝若乃有余者取之不足者聽之逮其失事然後从而劾之斯亦晚矣是则黜罚之行奚独郡守而已诸道转运其明知朕意【淳熙六年三月丁丑臣雄臣淮臣良臣奏事殿中天慈惻怛有民力未裕之叹因出亲笔手诏示臣等臣等再拜跪受退即捧读紬绎至再至三仰见圣明总核庶职軫忧元元所以加惠至厚天下幸甚臣等恭惟陛下俭德冠乎帝王仁心同乎天地爰自即位池台弗增车服随给横恩妄予毫发不私厚赋重征蠲贷略尽是宜财力全实无媿前古之盛乃名藩大府犹以病告致勤九重宵旰之念士夫交议莫识所由及恭覩宸奎勅戒漕臣将使审计经度任州县

有无之责乃知圣鉴高远推见本原德意志虑非臣等所及臣等谨奉明指宣布中外越二日又请刊石以副墨徧赐诸道制曰可臣等窃以天下譬犹一身一身之间血脉流贯则四支和平天下之势上下通融则百职修举此理之必然也昔刘晏号古今计臣之冠究所设施不过取羨补乏蠲荒歛丰其後兴利之臣乃不问有无一切殫竭国计未赢而民力惫矣是故转漕之任一道是寄盈虚缓急所当共体若乃智虑不通规为不豫悉取其有余以徼强济之名安视其不足而诿旷败之责自谋善矣谓公上何兹非置使之本意也今云章昭回圣谟广大凡厥奉承曷敢不敬敢不丕应诗云肃肃王命仲山甫将之邦国若否仲山甫明之臣等不佞尚能恪意悉力以助扬圣意若其受诏不与夫称职有闻则当甄序以诏赏罚既入石谨拜手稽首而书于下方中奉大夫参知政事权监修国史同提举详定一司勅令华亭县开国伯食邑九百户食实封三百户赐紫金鱼袋臣钱良臣通议大夫枢密使东阳郡开国公食邑五千户食实封一千七百度臣王淮正奉大夫右丞相兼提举编修玉牒提举国史院提举编修国朝会要提举详定一司勅令鲁郡开国公食邑四千四百度食实封一千四百度臣赵雄谨书淳熙六年五月日朝奉大夫江南东路转运判官借紫臣王师愈被旨刻于厅事】

御札付淮西总领李若川绍兴三十年淮西总领所收支钱粮数目并隆兴元年收支钱粮并添支数目并要子细开具头项疾速奏来【臣先及昨以司农少卿董饷淮右属时北兵侵軼边圉绎骚孝宗皇帝欲考金谷出纳与夫兵兴以来添支数目盖尝亲洒宸翰俾速奏闻臣不肖不才猥忝先职复值江淮俶扰供亿夥繁懍涉渊冰惧弗克绍仰观昭回之光窃以谓参稽收支此特有司之事圣虑宏远云章下垂非惟责任臣工者为不轻而规恢中兴端足以诏万世矣用取刊诸琬琰并侈畴昔之荣遇云嘉定元年三月望日朝议大夫太府少卿总领淮西江东军马钱粮专一报发御前军马文字兼提领措置屯田曲周县开国男食邑三百户借紫臣李洪拜手稽首谨书】

御笔临晋王羲之二帖【刻石溧阳县】

御书唐韩愈进学解

御书阴符清淨二经【刻石句容县凝神庵】

皇帝御制训廉铭周典六计吏治条陈以廉为本乃良而循彼肆贪虐与豺虎均肥于而家多瘠吾民纵迨於法愧其冠绅货悖而入菑及後人我朝忠厚黜贪为仁咨尔羣辟是训是遵 谨刑铭民吾同胞疾痛犹已报虐以威刑非得已仰惟祖宗若保赤子明谨庶狱惻怛温旨金科玉条豪析铢累夫何大吏蔑弃法理逮于郡邑滥用笞箠典聽朕言式克钦止戒飭士习手诏朕亲御路朝首兴教化士风所繫尤务作新比年以来习尚浇漓文气卑鹵纯厚典实视昔歉焉岂涵养之未充抑薰陶之或阙咨尔训迪之职毋拘内外之殊各究乃心俾知所向矫偏适正崇雅黜浮使人皆君子之归如古者贤才之盛副予至意惟尔之休

録用勲臣後手诏虞廷之赏延于世汉氏之官长子孙春秋谓成季之勲宣孟之忠而无後为善者惧矣朕慨思开国以来勲臣之裔有能世济其美而不能世其祿者仰所在州军体访保

明具以实闻以备録用

戒贪吏手诏朕闻祖宗立法悉从寛厚惟赃吏之罚独不少贷为其蠹国害民也朕待遇臣下未尝少恩训廉有铭正欲善诱不谓迩来贪风转炽国与民俱匱而士大夫之家益肥间有自号清流而居官之污浊尤甚朕将何赖焉自今小大之臣各宜洗心涤虑毋徇于货贿其或不悛有淳熙之法在举而行之非朕得已也故兹札示想宜体悉【以上并刻石本府】

【臣马光祖跋云臣恭惟皇帝陛下以忠厚制刑赏以典则柄废置以正直作福威率由宪章发为辞命谓虞氏之赏汉人之官皆世也今勲伐余几得无有降在皂隶者乎我其收之是以有録用之诏谓污吏之罚淳熙之法未远也今民生终窶得无有壑其人以自封者乎我其艾之是以有举行之诏天声雷动宸画奎垂巍巍煌煌荡人耳目可以蹶虞而跻汉跻宝佑於淳熙矣若时臣庶固有宅命义之正烛理慾之分不勉而忠不砥而厉者至於赏罚辨其前宠辱忧其後则虽中人以下犹将蹶然自度曰以身殉货孰与以身殉国者之昌以忠烈泽子孙孰与以货财杀子孙者之殃违彼而就此利初而安终家伊吕人夷齐事可日月致也彼有倚闥阅以为庸而先猷之弗绍濯襟裾以为洁而素践之弗符饗其名而违其实者天青日白必无幸焉臣服在管钥甚庆甚盛获承丕显休命宣昭而摹勒之岂惟勒之式克则之又朝夕之尚帅东诸侯与其属有司胥保胥诲以劝于帝之廸宝佑五年八月初吉宝章阁学士通奉大夫沿江制置使江南东路安抚使马步军都总管兼营田使知建康军府事兼管内劝农使兼行宫留守节制和州无为军安庆府三郡屯田使兼提领江淮茶盐所武义县开国男食邑三百户臣马光祖拜手稽首谨言】

御笔戒贪吏朕於赃吏无所贷以其惟威惟虐大为吾民仇民吾赤子而仇之是与寇贼奸宄者同科而何以为天子之命吏古人喻贪以狼以硕鼠直目以物类之恶者盖不得复言人矣惟彼贪夫憍莫之惩侵牟矫罔知盈厌朕夙兴夜寐忧苦万民封培本根每思弗莠郡国之吏乃淫纵其欲以蠹厥生间闻田里凄砭人眼惻怛以还又甚自愧朕惟民生寡乏由於贪官之肆诛求贪官充斥由於监司之不按察抑无瑕可以戮人轨度其信而後可以治人初亦无以大相过耶我朝戢贪家法具在中兴而後特为详密监司不按劾而台臣弹奏则坐监司罪此绍兴十一年九月之诏也以发擿而为殿最不劾则重行贬黜则是年十月之诏也上下相蒙习为媮惰当寘重宪悉具臧否连衔闻奏违则弹劾又十三年九月与三十二年十二月之诏也又如乾道元年之正月四年之六月淳熙九年之三月十二年之六月庆元二年六年之正月皆有诏而诏不止是也率以外台耳目不当蔽塞失察之罪凜乎其甚严今监司不廉问不按发间一二见或辄用胷臆而贪者顾得免朕独安取此兹当岁首肆用咸与惟新继自今仰诸路监司各举其职无或以避碍纵蠹贼每半岁具劾过赃吏若干来上当视多寡为殿最视殿最加赏罚而主之以必行郡守於民为亲又当助监司所不及此当以正岁为殿最赏罚亦如之或本路本州无所劾而台谏论列则监司郡守皆以殿定罚咨尔部刺史而下典听朕言无同于厥辜自取瑕殄其有治状廉声孚于衆听者亦须摭实奏闻以俟甄録荐贤受赏朕不汝吝

【太保右丞相兼枢密使兼太子少师益国公臣贾似道大中大夫知枢密院事兼参知政事

兼太子宾客臣朱熠端明殿学士通奉大夫签书枢密院事兼权参知政事兼太子宾客臣皮龙荣端明殿学士中大夫同签书枢密院事兼太子宾客臣沈炎等恭惟皇帝陛下一德当极万年敬休惟欲又我受民祈天永命肆念仁心仁闻而下不被其泽罔匪贪官污吏鵠义夺攘不厌不止以故元元寡遂至治未臻上勤圣怀忧劳夙夜乃月正元日亲洒奎画俾部刺史而下廉问按发以劾吏之多寡为使指之殿最治一州者则宽其期殿最亦如之宸毫蜚动汉章昭回与岁功以俱新时期同宇以皆泰其视先汉当春时议振贷诏下宽大书斯为卓绝无前矣臣等恭读圣训至于再三实为生民立命为万世开太平非可与异时一发号施令之不匿厥指者并谕也部刺史而下能恪守仰遵不负殿而以最闻继是吏当称其职民当安其业邦本所在永永不摇社稷长远终必赖之臣等忝联迹列亲奉德音弗克钦承是为有负谨欲将上项御笔刻之琬琰立之朝堂仍以墨本盼之郡国令勒石治所以永观省因拜手稽首扬言曰获上党穗文之祥不若宝此笔得河洛图书之秘不若佩此训欲一道之得福星不若先惩劝以厉其激扬清浊之志欲万物之皆吐气不若严诛赏以计旌别淑慝之功使凡见此者皆当竦然而作如在殿陛之侧而闻丁宁之音相与濯去旧习以课来效臣等不胜大愿取进止正月八日三省同奉圣旨依观文殿学士光禄大夫沿江制置大使知建康军府事兼管内劝农营田使江南东路安抚使马步军都总管行宫留守节制和州无为军安庆府三郡屯田使暂兼淮西总领金华郡开国公食邑三千户食实封六百户臣马光祖立石恭书曰皇上改元景定之明年月正元日特发睿思亲御宸毫历举祖宗黜贪之诏申飭训告颁示羣臣盖念民生之寡遂由於吏习之多贪吏贪弗革由於监司按察之不严自今必以按吏多寡为殿最而劝惩之大哉王言淳勤惻怛雷霆震肃之中皆雨泽滂霈之意严诛赏之令所以浚惠养之仁昭祖宗之心所以永上天无疆之命也臣职叨分阃祇昭明训既铭於心复刻于石谨拜手稽首言曰先民有训世无赏罚虽尧舜不能化天下天下之吏人品不齐不赏而劝不罚而惩者上也闻赏而劝闻罚而惩者次也赏而不劝罚而不惩斯为下矣圣人从而刑之盖有不得已焉者臣少尝诵书至盘庚之篇有曰朕不肩好货敢恭生生鞠人谋人之保居又曰无总于货宝生生自庸此盘庚戒贪之辞也成汤之时宜非盘庚比敢有徇货时谓淫风臣下不正其刑墨犹见於制官刑敝有位之时尧舜之时宜非商比浑敦穷奇檮杌饕餮犹不能无必待流放窜殛而後天下咸服是虽尧舜至治之世不能无贪臣尧舜至仁之君不能无严刑也然罪止於四它无闻焉圣心之易孚而人心之易化故也今我皇上之心同符尧舜流放之刑既除奸凶有人心者皆宜洗濯旧染精白一心以承休德圣意丁宁犹虑有下品之吏闻罚而不知惩者於是按察殿最之法不容不严且明信且必也法如江河使人易避刑期无刑圣人本心为吏者闻此诏必自谨其身而不待监司之按察然後为吏之善为监司者奉此诏必申敝所部使部内无可按之吏然後为令之孚天下皆无可按之吏然後为圣化之成臣与所部之吏之监司何幸亲逢尧舜之君身为尧舜之臣以观圣化之成哉臣尝闻先师臣德秀之言曰万分廉洁止是小善一点贪污便是太恶拳拳服膺久矣大学曰无诸己而后非诸人臣愿事斯语与同为监司者敝之以无负圣天子黜贪之令又曰有诸己而后求诸人臣愿事斯语与同为监司者勉之以无负圣天子举廉之意谨拜手稽首书于下方】

卷五

<史部,地理类,都会郡县之属,景定建康志>

钦定四库全书

景定建康志卷五 宋 周应合 撰地理图序

周官大司徒掌建邦之土地之图与其人民之数以佐王安扰邦国以天下土地之图周知九州之地域广轮之数辨其山林川泽丘陵坟衍原隰之名物职方氏掌天下之图辨其邦国都鄙周知其利害盖方国各自为图掌於职方入於司徒则谓之天下土地之图大司徒合而图之则谓之建邦土地之图然则上矣皇朝令郡国图经三岁一来上即成周所谓天下土地之图也龙盘虎踞帝王之宅襟江带湖形胜之区自吴以来英主经营四方莫不以此为根本我宋中兴是为留都地至重矣由职方土地之图以入於建邦土地之图诂容阙典於是考古证今为图凡十有五曰龙盘虎踞形势图曰历代城郭互见图曰建康府境方括图曰金陵建阊所部图图分上下曰府城图曰府治图曰上元江宁句容溧水漂阳五县图曰府学图曰明道书院图曰青溪先贤堂图地有当辨者附於图後

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

<史部,地理类,都会郡县之属,景定建康志,卷五>

辨丹阳

丹阳之辨有三一辨其字二辨其地三辨其治按西汉地理志字从杨东汉郡国志字从阳自晋至唐见於史传者或为杨或为阳无定字也江南地志云郡国有赭山其山丹赤寰宇记云赭山亦名丹山唐天宝中改为绦岩山丹阳之义出此山临平湖湖亦以丹阳名今此山在溧水句容两县之间以此证之则丹为山名山南为阳故曰丹阳字从阳者为是晋地理志於丹杨郡之丹杨县注云山多赤柳以此证之丹杨即赤柳之异名字从杨者为是二字各有所据世或疑之窃谓右史字多通用如豫章名郡取义於木而字不从樟会稽名郡取义会计而字或从郚岂容以今字之拘而疑古字之通哉况柳之赤山之丹未必不互相因也丹山之有丹杨则因木取义宜也丹杨山之南曰丹阳因方取义亦宜也二字之通毋庸深辨而地则不可不辨耳盖地之名丹阳者不一周成王封熊绎於丹阳乃荆楚之所始其地在荆州不在扬州唐地理志丹州咸宁郡有府五丹阳居其一此在关内道古雍州之域亦不在扬州也史记楚怀王与秦战於丹阳司马贞索隐云此丹阳在汉中则又属梁益之州而非扬州也秦置鄣郡有县曰丹阳汉改故鄣为丹阳郡此实隶扬州孙吴析溧阳以北六县为丹阳治建业亦隶扬州自东晋以至於唐丹阳郡有分有合而皆隶扬州其名偶与荆雍梁益之丹阳同而其地实异盖九州之域自禹而分不可紊也如秭归县有丹阳城枝江县有丹阳聚地皆属荆北史中有封丹阳侯者数人地皆在雍於此无辨则丹阳见於史传者多前之以彼为此者未必知其讹今之书此遗彼未必不疑其略矣丹阳之地名不一固所当辨而丹阳之属扬州者其治不二或者犹有疑焉汉志云丹阳郡治宛陵盖今之宁国府也杜佑通典云以丹阳郡隶润州盖今之镇江府也吴宝鼎中尝割丹阳附吴兴盖今之安吉州也人多惑於三说遂疑丹阳之不在建邺领治所皆在建邺隋开皇初虽尝徙治江都而大业随废唐武德二年置扬州东南道行台治江宁三年以江宁溧水二县置扬州六年又以延陵句容隶扬州以地言之皆建邺也虽武德九年尝徙治江都而贞观七年复治江宁矣则隋唐之间扬州常治建邺而徙江都者亦暂尔至於五代伪吴杨行密虽以江都为扬州而金陵实为别都至伪唐又自广陵而迁治金陵矣若以今之扬州言之则广陵一郡之名耳若无关於建邺以古扬州言之则禹贡九州

之一之总名建邺乃其州之钜镇而治所多在焉今於六朝表中书扬州之事从古也本朝表中不书扬州之事从今也是不可以不辨

辨金陵

金陵何为而名也考之前史楚威王时以其地有王气埋金以镇之故曰金陵又曰地接金坛其山产金故名於是因山立号置金陵邑至秦始皇时望气者谓其地有天子气又埋金宝於山以厌之昔有一碣在靖安道复置唐武德九年又废之以其县隶润州天宝元年始改润州为丹阳郡又改曲阿为丹阳县皆非两汉六朝之丹杨也又尝考诸县治汉丹阳郡统县十七秣陵句容丹阳溧阳江乘皆隶焉晋丹阳郡统县十一建邺江宁丹阳溧阳江乘句容秣陵皆隶焉隋丹阳郡统县三江宁溧水隶焉其丹阳名县於润境者亦唐天宝以後也非两汉六朝之旧也是不可以不辨

辨扬州

或问禹贡扬州之域北距淮东南距海不专在建邺也宋朝扬州治广陵不复隶建邺也今以扬州刺史及州牧入建康志何哉曰自汉以来扬州无常治或徙壽春或徙曲阿或徙历阳皆暂尔而治建邺之时独多汉末扬州之地南属吴者十四郡而扬州治建邺合肥以北属魏而扬州治壽春晋平吴以後徙壽春之扬州合治建邺至元帝渡江都扬州统丹阳等郡宋以扬州为王畿六朝都建邺时若扬州牧若刺史皆以大臣诸王兼殊不知丹阳之名本出建邺而郡治寓於宛陵者暂尔自建安以来丹阳郡治常在建邺常以宰辅诸王为尹隋以前未尝改也夫置丹阳治建邺者孙权也割丹阳附吴兴者孙皓也平吴以後复吴兴所有之丹阳归於建邺者晋也平陈以後废丹阳郡而置溧水县者隋开皇也废蒋州而复置丹阳郡者隋大业也以江宁溧水复置丹阳县者唐武德也尝放润州类集曰今之润境举非丹阳地而唐以丹阳名郡何也盖唐天宝以前唯有润州未有昇州是时润所领县六江宁句容在焉二县乃丹阳故地天宝初改州为郡因以名之迨至德二载始割出二县增以溧水漂阳建为昇州而丹阳之名遂存於润杜佑通典以天宝以前州县为定故载润而阙昇後之作方志者曾不审此往往只据佑所书而在秦在汉皆繫於二郡之间误矣又云汉元封二年改鄣为丹阳其城在今江宁府东南八里即汉丹杨太守及晋丹杨尹之所治隋平陈废之平其城以为田大业初间题为埋金碑其文曰不在山前不在山後不在山南不在山北有人获得富了一国耆老指为秦时古碑近年遂为好事者取去是金陵之名始於楚秦千数百年於此矣前辈固尝疑之盖谓宝剑在地气射斗牛光怪烛天其下有宝熊商嬴政方恶其地气之异而欲消去之乃复埋金宝於其地是益其气也安得为知乎及见靖安道间埋金碑之语然後知熊商嬴政知术相袭以愚黔首而千数百年无能发其诈者地有王气楚秦所忌故将凿山以泄其气也役其人以凿山则人未必从於是借埋金之说以致凿山之人曰山有金也曰吾尝埋金於山也人皆有求金於山之心则皆不爱其凿山之力求不获则凿不已不待驱而从也又设为山前山後山南山北之语以惑之神其有金之地将以眩其求金之人盖人知其地之有金而莫知其金之所在则遍山而求之遍山而凿之金未有获而山之气泄矣求金之人皆无所得而楚秦之君求泄山气之谋遂矣则是埋金之说所以为驱人凿山之术岂真埋金也哉吁熊商嬴政

将以愚黔首适自愚耳山融川结天地之气为之岂区区智术所能变之哉惟修德足以永天命惟施仁足以固人心惟行帝王之道足以消奸雄之变圣贤以理御气大抵然也不是之务而求以人力胜地气复以智术致人力熊商终无救於楚之灭嬴政终无救於秦之亡岂非甚愚也哉当时言天子气以五百年为期自是四百九十年而晋元帝渡江建都金陵适符其数商与政如之何哉故着斯辨以发金陵之诈而祛黔首之惑云

辨建邺

楚名此地曰金陵秦改金陵为秣陵汉建安中孙权改秣陵为建邺晋建兴初避愍帝讳改建邺为建康建邺建康岂有异地哉世俗或疑其非者有二说晋书太兴三年分淮水北为建邺南为秣陵此所谓淮水者盖指秦淮而言耳秦淮之水来自建邺之东而西注於江故晋於此水之南置县曰秣陵名因秦旧也此水之北置县曰建邺名因吴旧也或者不察建邺自有之淮误指为桐柏所导之淮遂谓建邺移在江北可谓谬矣又一说龙川陈亮上孝宗皇帝书有曰今之建邺非昔之建邺或者又执此语以为建康非建邺之证谬尤甚焉龙川所谓建邺今昔之异者指其城郭而言耳非言其地之非昔也【龙川万言书云今之建邺非昔之建邺也臣尝登石头钟阜而望今城直在沙觥之傍耳钟阜之支陇隐隐而下今行宫据其平处以临城市城之前则逼山而斗絶焉此必後世之读山经而相宅者之所定江南李氏之所为非有据高临下以乘王气而用之之意也本朝以至仁平天下不恃险以为固而与天下共守之故因而不废耳臣尝问之钟阜之僧亦能言台城在钟阜之侧大司马门当在今马军新营之傍耳其地据高临下东环平冈以为固西城石头以为重带元武湖以为险拥秦淮青溪以为阻是以王气可衷而运动如意若如今城则费侯景数日之力耳曹彬之登长干兀木之上雨花台皆俯瞰城市虽一飞鸟不能逃也】盖建邺古都城实倚钟阜而都城南门距秦淮尚七八里此吴晋之旧规龙川所谓昔之建邺也伪吴时徐知诰大城昇州拓旧址二十里跨秦淮南北之地尽入城中北距钟山甚远而南距雨花长干诸山则甚迫矣知诰据此以为南唐之伪都皇朝既平江南即南唐故府以为州治今城郭皆知诰之旧此龙川所谓今之建邺也谓建邺今城非昔城则可谓建邺今地非昔地则不可因为此辨以正或者之谬【不欲指言其人故或之】

辨越台

越城者建康作古之城句践范蠡之所营也越台者越城之故址也考之史传无异辞矣【详见越城】越而楚楚而秦秦而汉汉而吴晋宋齐梁陈攻守於此者西则石头南则越城皆智者之所必据刘濞於此避条侯温峤於此破王含刘裕於此拒卢循萧懿於此拒慧景萧衍於此屯王茂皆越城越台也郡国志云越城在县南六里实录云越城在淮水南一里半祥符图经云越城在秣陵县长千里宫苑记云范蠡筑城在瓦官寺南金陵事迹云南门外有越台与天禧寺相对今府城之南江宁尉廨之後军寨之间台犹存也访古者每兴感焉近世诗人有作越台曲者乃为之说曰越女嫁江南国主为妃以其地卑湿运越土筑此台以居焉见此诗者并为一谈牢不可破【越台曲云玉顔如花越王女自小娇痴不歌舞嫁作江南国主妃日日思归泪如雨江南江北梅子黄潮头夜涨秦淮江江边雨多地卑湿旋筑高台梳晓粧千艘

命载越中土喜见越人仍越语人生脚踏乡土难无复归心越中去高台何易倾曲池亦复平越姬一去向千载不见此台空有名】使其考古必知误矣借曰越女运土筑台事果有之南唐宫室初不在秦淮之南其妃筑台以居必不在宫室之外不待智者而知其非矣设南唐不史见之骏说以泯句践范蠡作古之遗基岂容无所辨哉

辨马鞍山

乾道旧志及六朝事迹编皆云陈後主祯明三年隋将济江陈遣南康太守鲁肃将兵以铁鎖横江隋将杨素击之争马鞍山四十余战隋军死者五千余人指金陵马鞍山为是庆元续志引宜黄侯慧纪传云隋师济江慧纪率将士三万人舩舰千余沿江而下欲趋台城遣南康太守吕肃将兵据巫峡以五条铁鎖横江隋将杨素奋兵击之四十余战争马鞍山及磨刀涧以此纠旧志为非今以资治通监及三国志南史证之乾道庆元二志皆不能无误陈无鲁肃亦无吕肃慧纪所遣以拒隋兵者盖南康内史吕忠肃也杨素与忠肃四十余战争马鞍山乃在巫峡间非金陵之马鞍山也山名偶同耳按蜀志先主为陆逊所攻升马鞍山陈兵自绕此在吴蜀接境处杨素所争即此山也况隋之攻陈贺若弼自广陵济进军鍾山顿白土冈韩擒虎自横江济进拔姑孰由新林至石子冈皆不经金陵之马鞍山慧纪遣吕忠肃使据巫峡以鎖江与杨素遇而有争山之战则其山在彼不在此明矣人名之异山名之同皆不可以不辨

景定建康志卷五

卷六

钦定四库全书

景定建康志卷六 宋 周应合 撰

建康表总序

春秋表年以首事太史公年表经纬之後之纪事者法焉国之郡乘皆有表而例不同今考诸古建康城邑始於周【建康地本属春秋之吴取之吴而城长干者越勾践也取之越而置金陵邑者楚熊商也时周命未改也吴越楚有地之时皆周也】郡县始於秦为都始於孙吴自城而都地寢大周元王四年越城长干时也周命勾践为伯时也未城邑前不可表也作建康表断自元王以下表之纬四一曰时表其世年而记其灾祥二曰地表郡县之沿革与疆土之分合三曰人表牧伯之更代与官制之因革四曰事表其得失之故成败之由美恶具书劝戒寓焉其年月可考者为年表不可考者为世表世不可考者随代附见表如左【或问国始於勾吴都始於孙吴今表不始吴而始越何也曰始越之说四春秋此地属吴特泛言耳吴国於李城邑未见於此地入於越越始城之未城不可表既城不可不表一也始城之年周王命勾践为伯未命伯之前不当表越城此地而为伯不可以不表二也春秋何始於平王盖周书至此而终故鲁春秋自此而始今考勾践之时正当春秋之终则表始於勾践亦取法鲁春秋之遗意三也三代之王也诸侯封而大者莫多於周之後次莫如殷禹之子孙寥寥也少康有田一成有衆一旅而祀夏配天少康之子封於会稽以奉禹祀此越之始也勾践乃其二十世孙也城吴地而周伯之太史公谓其有禹之遗风今表越所以存禹四也或又曰表越是矣不冠以越而冠以周何也曰勾践之时周命未改一国之主在越天下之主在周勾践虽强一则曰致贡於周二则曰以尊周室赐胙为伯必得周命而东诸侯服焉今以周之世表越之事亦春秋尊王之法也】

建康表一【自周元王四年己巳至东汉献帝建安己亥为世表】

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

建康表二【起吴大帝元年辛丑至天纪四年庚子凡六十年为年表】

吴【太祖大皇帝姓孙氏讳权字仲谋吴郡富春人也其先出自周武王母弟卫康叔之後武公子惠孙曾耳为卫上卿因以孙为氏春秋时孙武为吴王阖闾将因家于吴太祖乃武之後也祖锺父坚坚生容貌奇异仕汉为破虏将军长沙太守灵帝末董卓作乱坚乃自长沙举兵破卓军於阳夏长驱入洛修祭汉陵庙屯军城南甄官井上见五色气使人入井得汉传国玺文曰受命于天既寿永昌方圆四寸上纽交五龙一角缺後仍投井中坚生四子策权翊匡策为吴侯临终以後事付弟权曰举江东之衆决机於两阵之间与天下争衡卿不如我举贤任能各尽其心以保江东我不如卿权既统事以周瑜程普吕范为爪牙鲁肃诸葛瑾步骘陆逊为腹心招延英俊而分部诸将镇抚山越讨不从命初坚娶钱塘吴氏孕策梦月入怀孕权又梦日入怀以告坚坚曰日月陰阳之精极贵之象吾子孙其兴乎其後权破曹操军於赤壁又破操军於濡须坞操叹曰生子当如孙仲谋其後又破关侯定荊州及曹丕代汉称魏使邢贞册权为吴王军师张昭怒其无礼羣臣议称汉上将军九州伯不应受魏封权曰九州伯於古未闻昔沛公亦受项羽封为汉王盖时宜尔复何损也赵咨使魏还曰北方终不能守盟宜改年号正服色应天顺人权纳之十一月权就吴王位於武昌大赦改明年为黄武元年後七年公卿上表劝正尊号遂即帝位大赦改元追尊父坚为武烈皇帝兄策为长沙桓王立子登为皇太子百官皆行赏醵寡孤独量给谷绵百姓免今年租赋天下赐酺五日传四主合六十年都建康】

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

<史部,地理类,都会郡县之属,景定建康志,卷六>

景定建康志卷六

卷七

<史部,地理类,都会郡县之属,景定建康志>

钦定四库全书

景定建康志卷七 宋 周应合 撰

建康表三【起西晋太康庚子至东晋元熙已未凡一百四十年为年表】

晋【司马氏受魏禅都洛阳是为西晋自武帝炎至愍帝邺四主五十二年而中宗元帝睿即位於建康遂都焉是为东晋元帝乃宣帝懿之曾孙琅琊恭王觐之子嗣父为琅琊王永嘉元年因陈敏作乱以琅琊王为安东将军都督扬州江南诸军事假节镇建业讨陈敏余党廓清江表至建兴戊戌受愍帝诏即晋王位改元建武明年愍帝凶问至始即帝位改元大兴其建武以前事属西晋建武以後事属东晋合两晋论之自泰始至太康元年凡十有六年而吴始平自太康元年至建武元年凡三十九年而西晋改为东晋都於建康自元帝建武至恭帝元熙十一主凡一百三年而禅於刘裕元熙以後事系於宋太康以前事系於吴故建康晋表始於太康讫於元熙合一百四十年不分西东总曰晋表】

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

<史部,地理类,都会郡县之属,景定建康志,卷七>

景定建康志卷七

卷八

<史部,地理类,都会郡县之属,景定建康志>

钦定四库全书

景定建康志卷八 宋 周应合 撰

建康表四【起南宋永初庚申至昇明戊午凡五十九年为年表】

宋【高祖武皇帝姓刘氏讳裕字德舆彭城绥舆里人也汉楚元王交二十一世孙晋哀帝兴宁元年癸亥三月壬寅夜生帝神光照室尽明是夕甘露降于墓树产夜而皇妣赵氏殂帝及长雄杰有大度事继母以孝闻尝游京口竹林寺独卧讲堂中上有五色龙章衆僧见之惊以白帝帝乃喜曰上人无妄言皇考墓在丹徒秦史所谓曲阿丹徒间有天子气者也时有孔子恭者善占摹帝尝与经墓问之曰此墓何如子恭曰非常地也帝由是益自负行止时见两小龙附翼之樵渔山泽同侣亦或覩焉困于贫贱不修廉隅小节时人莫能识唯琅邪王谧独深敬重之尝于下邳舍逆旅会一沙门谓帝曰江表方乱能安之者其在君乎既而忽失僧所在帝惊而异之至晋隆安中平孙恩卢循有功桓玄篡位迁天子于寻阳帝随桓修入朝玄妻刘氏谓玄曰昨见刘德舆龙行虎步视瞻不凡恐非人下者宜早为其所玄曰方欲北清中原非刘裕莫足使若关陇平定徐思其宜裕还丹徒潜谋匡复乙卯帝因游猎会同谋者二十七人愿从者百十人丙辰平旦城门开驰入称有诏遂擒桓修斩之以徇帝尝造游击将军何澹之左右见帝光曜满室以告澹之澹之以告玄玄不以为意及闻义兵起方惧或曰刘裕力弱岂办之有成玄曰刘裕足为一世之雄刘毅家无担石之储擣菹一掷百万何无忌刘牢之外甥酷似舅共举大事何谓无成时推帝总徐州府事孟昶为长史居守檀凭之为司马刘穆之为府主簿帝率二州之衆一千七百人进及竹里移檄京师三月戊午逆破皇甫敷等於罗落桥进败桓谦将於覆舟山玄出自西掖门策马石头城轻舟南逸王谧率百辟推高祖领扬州帝固让以王谧为扬州刺史留台朝廷肃然各守职王谧命尚书以帝为使持节都督徐兖青冀幽并八州诸军事镇军将军徐州刺史镇石头丁卯焚桓温神主于宣阳作晋主于太庙甲午天子至自江陵庚午诏进帝侍中车骑将军都督中外诸军事録尚书帝固让抗表归藩是月旋镇京口○义熙三年二月帝入朝乙卯旋镇丹徒○四年春正月诏高祖入辅申前命且为扬州刺史録尚书事○五年秋七月加帝北青冀二州刺史○六年六月进太尉中书监加授黄钺余如故○帝自左里旋师天子遣侍中黄门劳师于行所○七年春正月乙未振旅而归京师进大将军扬州牧给班剑二十人其後又平刘毅及司马休之北灭姚秦剋洛阳东还建康封十郡为宋公备九锡明年进爵为王增封十郡元熙二年正月天子遣使奉册禅位于帝如汉魏故事奉表陈让太史令骆达奏曰自晋义熙元年太白昼见经天凡七占曰太白经天民更主异姓兴焉义熙七年五虹见于东方占曰五虹见天子黜圣人出十三年镇星入太微有立王徙主之兆元熙元年冬有黑龙四登于天易传曰冬龙见天子亡社稷大人受命冀州

道人释法称告其弟子曰嵩神言江东有刘将军汉家苗裔当受天命吾以璧三十二镇金一饼与之刘氏卜世之数也於是羣公卿士固请乃从之初汉光武立社於南阳汉末而其树死刘备有蜀乃应之而兴及晋末年旧根复萌至是而茂盛乃受法驾于南郊坛柴燎祭于上帝礼毕严驾还宫御太极前殿大赦改元永初自永初庚申至昇明戊午八主都建康合五十九年而禪位於齐】

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

<史部,地理类,都会郡县之属,景定建康志,卷八>

景定建康志卷八

卷九

<史部,地理类,都会郡县之属,景定建康志>

钦定四库全书

景定建康志卷九 宋 周应合 撰

建康表五【起南齐建元己未至中兴辛巳凡二十三年为年表】

齐【太祖姓萧讳道成字绍伯汉相国何二十四代孙宋元嘉四年丁卯岁生姿表英异龙颡
钟声鳞文遍体年十三从雷次宗学於鸡笼山仕宋有功累迁自建康令至刺史冠军将军明
帝常嫌太祖非人臣相且民间流言萧姓当为天子愈以为疑会桂阳王休范反命太祖讨平
之百姓曰全国家者此公也苍梧王凶暴猜忌欲加大祸陈太妃骂之曰萧道成有功於国今
若害之後谁为汝署力也乃止太祖谋杀苍梧王而迎立汝陰王沈攸之之乱又讨平之进太
尉都督十六州诸军事寻进扬州牧位相国摠百揆封十郡为齐公备九锡位诸王公上未几
进爵为王宋帝禅位依魏晋故事即位改元自建元己未至中兴辛巳七主都建康合二十三
年而禅於梁】

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

<史部,地理类,都会郡县之属,景定建康志,卷九>

景定建康志卷九

卷十

<史部,地理类,都会郡县之属,景定建康志>

钦定四库全书

景定建康志卷十 宋 周应合 撰

建康表六【起萧梁天监壬午至太平丁丑凡五十六年为年表】

梁【高祖武皇帝姓萧名衍字叔达与齐朝同为汉相国何之後皇考顺之字文纬齐高祖族弟参预佐命封临湘侯累至领军将军丹阳内史高祖以宋大明元年甲辰岁生於秣陵县同夏里三桥宅初皇妣张氏常梦抱日已而有孕乃生帝帝生有奇异之光两髀骈骨状貌殊特顶上隆起日角龙颜重岳虎顾舌文为八字顶有浮光身映日无影为儿童能蹈空而行有文在左手曰武及长博学多通好筹畧有文武才干流辈咸推许焉所居宅常若有云气人有遇者体辄肃然起家巴陵王参军迁卫军王俭府东阁祭酒王俭一见深相器异请为户曹属谓庐江何宪曰此萧郎三十内当作侍中出此则贵不可言齐竟陵王子良开西邸招文学之士高祖与沈约谢朓王融萧琛范云任昉陆倕等并游焉号为八友王融俊爽识鉴过人尤敬异高祖每谓所亲曰宰制天下必在此人累迁随王谘议行经牛渚逢风入泊龙渚有一老人谓曰君龙行虎步贵不可言天下将乱能安之者其在君乎拜黄门侍郎入直殿省与萧湛等定策封建阳侯建武二年解司州围走魏军还为太子中庶子领羽林监顷之出镇石头四年败魏军於雍州进使持节雍乐南北秦四州军事雍州刺史东昏侯立六贵八要擅权用事高祖曰政出多门乱其阶矣永元二年长兄懿自益州刺史罢还朝被害高祖密谋曰昏虐暴主诛戮朝贤生民涂炭卿等同心嫉恶共兴义举良在今日是日建牙於军门收拾甲士三万余人马一千匹船三百艘引荊州军下沔南立新野郡以集新附三年二月己巳南康王宝融即帝位於江陵改永元二年为中兴元年遥废东昏为涪陵王以高祖为左仆射假黄钺西台置百官司马八月次芜湖据姑孰使曹景宗萧颖达领马步进屯江宁使王茂进据越城十月壬午高祖镇石头命衆军围城卫尉张稷北徐州刺史王珍国斩东昏首送高祖使吕僧珍勒兵封府库图籍燹庶凶党王咺之以下四十八人并诛之宣德皇后下令追废涪陵王为东昏侯依汉海昏故事授高祖中书监扬徐军事大司马録尚书骠骑大将军扬州刺史封建安公食邑万户给班剑四十人假黄钺依晋武陵王司马遵承制故事己卯高祖入屯闕武堂下令一切淫刑滥罚赋役并原放明年正月齐和帝自江陵遣侍中席阐文黄门侍郎乐法才慰劳京邑诏进高祖剑履上殿入朝不趋赞拜不名加前後羽葆鼓吹置左右长史从事中郎掾属各四人寻进相国封十郡为梁王备九锡丙午命王冕十有二旒建天子旌旗出警入蹕丙辰齐帝禅位於梁依晋宋故事齐百官豫章王綝等八百一十九人及梁台侍中臣云等百一十七人并上表劝进太史令蒋道秀陈天文符?六十四条乃即位改元自天监壬午至太平丙子四主都建康合五十五年而禅於陈】

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

<史部,地理类,都会郡县之属,景定建康志,卷十>

景定建康志卷十

卷十一

<史部,地理类,都会郡县之属,景定建康志>

钦定四库全书

景定建康志卷十一 宋 周应合 撰

建康表七【起南陈永定丁丑至祯明己酉凡三十三年为年表】

陈【高祖姓陈氏讳霸先字兴国吴兴长城下若里人汉太丘长寔之後本居颍川寔玄孙晋太尉准准生匡匡生达永嘉初为丞相掾随晋南迁拜太子洗马出为长城令悦其山水遂家焉常谓所亲曰此地山川秀丽当有王者兴焉二百年後我子孙必鍾斯运高祖即达之十一世孙也少倜傥有大志意气雄杰好史籍读书长於谋策明纬候孤虚遁甲又善武艺不事产业家贫每以捕鱼为事身長七尺五寸日角龙颜垂手过膝髭生连骨普通中尝游义兴馆於许氏夜梦天开数丈有朱衣四人捧日而至纳於高祖口中惊觉腹内犹热心独喜之初仕乡为里正後逃於义兴吴兴太守萧映过从之建业映遂用为吏映镇广州奏高祖为参军从令招集士马高祖率兵大破贼军梁高祖闻深异之遥授直合将军封新枋县子遣使图其形貌入观之既而萧映卒高祖送映丧至大庾岭梁帝诏高祖为交州司马领武平太守与刺史杨南讨李贲定交址以功除振远将军西江督护高要太守侯景作乱高祖厚结豪杰同谋义举以救京师侯安都张偲等率衆来附将东下萧勃闻之使鍾休悦留高祖不许度岭言侯景骁雄天下无敌援军前後无敢当锋岭北王侯又已自相屠戮君之踈外岂可暗投未若且住始兴以张形势高祖泣谓休悦曰君辱臣死谁敢爱命吾行计决矣勃既不能止因合蔡路养等以兵遏高祖军高祖大破之於大庾岭进镇南康乃遣使间道往江陵禀承节度於梁湘东王萧绎是为元帝承制授高祖持节明威将军交州刺史改封南野县伯高祖乃修南康古城居之人常远望见城上有紫云气垂覆左右深结事之寻迁南江州刺史改封长城侯大宝二年六月高祖发自南康下顿西昌潁石水旧有二十四滩滩多巨石行旅为难自高祖之发水暴涨高数丈三百里间巨石皆没时有龙见於水滨约高五丈五彩鲜明军人观者大欢庆焉时湘东王遣王僧辩督衆讨侯景师次湓城高祖率戈甲三万将往会焉高祖闻西军乏粮乃分三十万斛米以资西军是年侯景废简文帝纲而立豫章嗣王栋帝遣长史沈褒奉表於江陵劝湘东王绎即位王授高祖都督会稽东阳新安临海永嘉五郡诸军事平东将军东扬州刺史大宝三年壬申春正月发自豫章二月次桑落洲时王僧辩亦率军发自湓城与高祖会於白茆湾共登岸立坛刑牲饮血结盟约进平侯景词理悲切泪下沾衣於是平定侯景进镇京口是岁梁元帝即位於荆州使拜高祖为司空领南徐州刺史元帝为魏军所戮高祖与僧辩共迎立元帝第九子江州刺史晋安王方智为帝入居建康承圣四年夏五月北齐送贞阳侯萧渊明归主梁嗣王僧辩纳之贬帝为皇太子高祖遣使苦谏僧辩僧辩不从往返数四高祖愤叹乃密与徐度侯安都周文育等谋部衆攻僧辩大败就擒遂缢杀之高祖却废贞阳侯而

复奉方智为帝改元绍泰进高祖中外诸军事加班剑鼓吹明年进位丞相扬州刺史封义兴公太平二年春正月加高祖班剑三十人置丞相别榻以近宸坐广州刺史萧勃反沿流而下江州刺史余孝顷起兵应之高祖命侯安都讨平之八月进位太傅加黄钺剑履上殿入朝不趋前後羽葆鼓吹皂轮车九月进加相国封十郡为陈公备九锡之礼十月戊辰进爵为王加二十郡冕十有二旒建天子旌旗出警入蹕乘金根车驾六马备副车置旄头云罕乐舞八佾设钟簋宫悬陈台百官一依旧式辛未帝禅位於陈王策命曰惟王乃圣乃神钦明文思二仪并运四节合叙天赐智勇人挺雄杰爰初投袂日夜勤王王公卿士莫不攸属敬从人神之愿授帝位於尔躬四海困穷天禄永终王其允执厥中乃命太保王通太尉长史王瑒奉皇帝玺绶受终之礼一依唐虞故事梁帝逊位於别宫高祖三让羣臣固请以梁太平二年冬十月乙亥设坛於南郊即皇帝位柴燎告天礼毕輿驾旋建康宫临太极前殿大赦改梁太平二年为永定元年自永定丁丑至祯明己酉五主皆都建康合三十三年而并於隋】

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

<史部,地理类,都会郡县之属,景定建康志,卷十一>

景定建康志卷十一

卷十二

<史部,地理类,都会郡县之属,景定建康志>

钦定四库全书

景定建康志卷十二 宋 周应合 撰

建康表八【起隋开皇己酉至周显德己未凡三百八十年为世表】

【隋受周禅都长安改元开皇九年而灭陈故陈表至是年终隋表以是年始自隋以来非都建康而事见於此者为世表】

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

<史部,地理类,都会郡县之属,景定建康志,卷十二>

景定建康志卷十二

卷十三

<史部,地理类,都会郡县之属,景定建康志>

钦定四库全书

景定建康志卷十三 宋 周应合 撰

建康表九【国朝建隆以来为年表】

【少保马亮序金陵古之名地也昔周太王长子避位奔江南百姓从而君之自号勾吴太伯吴亡於越越亡於楚楚亡於秦其间千余年不常厥居秦有天下置三十六郡涉历两汉其地尚属丹阳郡三国时孙权始建都邑晋室渡江宋齐梁陈因之无迁易焉隋灭陈而禅唐至玄宗时乃为昇州唐祚告絶五代继立当是时也九州分裂海内横流擅其地而称霸王者非一江淮则杨氏据之西都广陵李氏承之而都金陵宪章纪律惟李氏可采金陵则辄号江宁府矣圣宋开基混一区宇後主以开宝八年乙亥岁十一月二十七日城陷归阙金陵复为昇州至丙午岁凡三十二年且牧守一十七人虑年代寢远好事者无以诒其姓名余忝守郡条职参史氏故为题名记欲使往者来者得以显其名位到罢月日庶几乎千载之下知皇宋之有人焉】

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

<史部,地理类,都会郡县之属,景定建康志,卷十三>

卷十四

钦定四库全书

景定建康志卷十四 宋 周应合 撰

建康表十【国朝建炎以来爲年】

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

<史部,地理类,都会郡县之属,景定建康志,卷十四>

景定建康志卷十四

卷十五

<史部,地理类,都会郡县之属,景定建康志>

钦定四库全书

景定建康志卷十五 宋 周应合 撰

志總序

倚相读九丘史迁作八书丘以州别故九书以类从故八班固志而十之丘与书之法备焉志者识也後皆因之元和有郡县志元丰有九域志天下郡县各有志此建康志所由作也建康为今留都视他郡尤重今考其地自有城邑以来千七百年间因革凡几为城为邑为州为府为郡为国为都其治不同也曰金陵曰江乘曰秣陵曰建邺曰丹阳曰江宁曰昇曰建康其名不同也或置州刺史或置郡太守或置府尹或建帅阃或建大都督行台或建节镇或封侯王其制又不同也至於山川之形胜风物之表着兴君谊辟之代见忠臣烈士之世出盛衰得失之可示劝戒者岂一简所能尽哉於是彙而辑之为志凡十一曰疆域二曰山川三曰城阙四曰官守五曰儒学六曰文籍七曰武卫八曰田赋九曰风土十曰祠祀属辞比事其目各着於篇

疆域志一

金陵古扬州之域在周为吴春秋末属越楚灭越并有其地始名金陵秦兼诸侯置郡县属郢郡改秣陵汉兴封韩信为楚其後更封诸王荆吴江都是也武帝初置刺史属丹阳郡後汉因之建安十六年孙权自京口徙治秣陵明年改为建业晋武平吴以为丹阳郡及扬州刺史治建兴初改为建康元帝渡江都焉以宰相领扬州改丹阳太守为尹宋孝武分浙江东为东扬州以扬州为王畿寻复旧历齐梁陈咸都於此隋平陈废丹阳郡立蒋州於石头大业初复置丹阳郡唐武德二年为扬州东南道行台尚书省七年复蒋州罢行台为扬州大都督府九年州徙治江都以其地属润州贞观七年复为扬州治所至德二载析置江宁郡乾元元年改昇州兼置浙西节度使上元二年州废为上元县大顺元年复置昇州天佑二年伪吴大城昇州建大都督府武义二年改为金陵府天祚三年封徐知诰齐王建西都改江宁府晋天福二年李昇僭位国号唐皇朝开宝八年复为昇州天禧二年陞江宁府建康军节度建炎三年车驾南渡诏改建康府绍兴七年驻蹕明年置留守古称金陵帝王之宅东南形胜之地大略可考自秦之南游隋之平陈将以厌其气而析其地也然孙权据吴会以鼎峙晋元渡江实为王畿宋齐梁陈因以有国其间从事河洛规取中原几致混一累朝衣冠礼乐号为中国正统吴唐割据经营规画用力勤矣识者谓开圣人创垂之业而成中兴恢复之功者实基於此稽之前代因革分合名号靡常盖自禹贡以迄於今为都者七为治所者十有一为国者六为州者五

为府者三为郡者十有四而侨置者九为县者十有九废并者十侨寓者四今属於府者五类而辨之作疆域志

地为都

孙吴建都四世凡六十年东晋建都十一世凡一百三年南宋建都八世凡五十八年南齐建都七世凡二十三年萧梁建都四世凡五十五年南陈建都五世凡三十三年【吴志及南史】

吴志张紘谓孙权曰秣陵楚威王所置名为金陵地势冈阜连石头昔秦始皇东游会稽经此县望气者云金陵地形有王者都邑之气故掘断连冈因改名秣陵今处所具存地有其气天之所命宜为都邑权善其议未能从也後刘备东宿秣陵因观地形亦劝权都之权曰智者意同遂都焉又献帝春秋刘备至京谓孙权曰吴去此数百里即有警急赴救为难将军有意屯京乎权曰秣陵有小江百余里可以安大船吾方理水军当移据之备曰芜湖近濡须亦佳权曰吾欲图徐州宜近下也诸葛亮亦曰鍾阜龙盘石城虎踞真帝王之宅晋温峤议迁都豫章三吴之豪请都会稽二论纷然未有所适王导曰古之金陵旧为帝里孙仲谋刘玄德皆言王者之宅由是不行盖吴以来将欲经营四方未尝不以此为根本云六朝事迹云南朝建都之地不过建康京口豫章江陵武昌数处其疆弱利害前世论之详矣吴孙策以会稽为根本大帝嗣立稍迁京口其後又尝住公安又尝都武昌盖往来其间因时制宜不得不尔及江南已定遂迁建邺保有荆扬而与魏蜀抗衡其宏规远略晋宋而下不能易也故孙皓舍建邺而之武昌吴因以衰梁元帝舍建邺而守江陵梁遂以亡李嗣主舍建邺而迁洪府南唐遂不能以立王导断然折会稽豫章之论而以建邺为根本自晋而下三百年之基业导之力也【孙皓议迁都武昌陆凯上疏曰武昌土地危险非王都安国养民之处船泊则沈溧陵居则峻危苏峻之乱温峤议迁豫章三吴之豪请都会稽二论纷纭未有所适王导曰古之金陵圣王所居孙仲谋刘玄德皆言王者之宅古之帝王不以丰俭移都由是峤等之议不行齐萧颖胄议迁夏口柳忱以巴峡未实不宜轻舍根本摇动人心帝不从俄而巴东之兵至峡口迁都之议遂息梁元帝临荆峡二十年情所安恋不欲归建邺故府臣僚皆楚人并欲都江陵周洪正谏曰士大夫言圣王所都本无定处若黔首未见入建邺便谓犹列国诸王今日副百姓心不可不归建邺南唐嗣主用唐镐计迁豫章而王都官舍军垒十不容其一二自公卿下至军士莫不思归】我宋中兴留都有录已见书首

地为治所

越筑城治长干里楚置金陵邑治石头秦改为秣陵县治後汉分扬州置吴郡治建邺建安十六年孙权自京口徙治秣陵明年又城石头改秣陵为建邺吴既克关侯都武昌以吕范领丹阳太守治建邺永安中分溧水以北六县为丹阳郡仍治建邺晋武帝平吴以为丹阳郡及扬州刺史治太康三年分淮水北为建邺南为秣陵更置江宁县宋孝武以扬州为王畿寻复旧【为都见前此不重述】隋平陈废丹阳郡置蒋州治石头唐武德二年为扬州东南道行台置尚书省八年为扬州大都督府贞观七年复为扬州治所至德二载改为江宁郡治所乾元

以後改为昇州治所仍置节镇【寰宇记云天宝末明皇以金陵自古雄据之地禄山方乱不可以县统之乃置昇州加节制】上元二年复废为上元县光启三年还为昇州治所仍置节镇天佑二年伪吴杨行密大城昇州建大都督府其子溥改为金陵府治石晋天福二年建西都改为江宁府治李昇僭位号南唐因即居之至我圣宋初平江南置昇州治天禧二年改为江宁府治建炎三年改为建康府治绍兴三年以府治建为行宫迁府治於行宫之东南隅详见城阙志中兴以来江东安抚司沿江制置司淮西总领所江东转运司江淮提领所江淮都督府皆治於此详见官守志地所属分埜

两汉地理志吴地斗分埜隋地志自斗十二度至女七度为星纪周礼保章氏注星纪吴分埜通典曰在天官於斗则吴之分野晋永嘉中岁星荧惑太白聚牛女之间识者以为吴越之地当兴王者是岁元帝登宝位故史臣曰星斗呈祥金陵表庆苻坚会羣臣谋南寇石越对曰今岁星镇斗牛福德在焉垂象弗差苻融曰岁镇在斗牛吴越之福不可伐此其大略

地所属国名

吴国在周属吴太伯之国有固城在溧阳溧水两县之间即吴所筑也夫差为越所灭至汉高祖时以丹阳会稽豫章三郡五十三城立兄子濞为吴王景帝时国除东汉末以其地封孙策为吴侯弟权袭之曹操封为吴王三国鼎峙吴亦称帝因都焉【详见为都】

越国越本夏少康之後封於会稽周元王四年用范蠡计灭吴尽有其地筑城於此以谋吞楚【详见越城】致贡於周元王赐胙命为伯越兵横行江淮号霸王後七世为楚所灭

楚国周成王时初封熊绎於丹阳乃在荊州非此所谓丹阳也其後国寢疆地寢广至威王时灭越尽有吴越之地置金陵邑於石头【详见山阜】及怀王末项燕自称楚秦灭楚以此地置鄣郡【详见所属郡】至汉高帝时封韩信於楚鄣郡属焉六年废

荊国汉高帝六年羣臣请以故东阳郡鄣郡吴郡封刘贾为荊王是年黥布反失国

江都国汉景帝既诛吴王濞徙汝南王刘非为江都王治故吴国至其子建国除後以其地置郡

昇国皇朝天禧元年封寿春郡王为昇王嘉佑四年翰林学士胡宿言陛下建国於昇犹次列国非所以重始封之地宜进昇为大国无得封从之国朝会要大国二十有四昇其一也

地所属州名

扬州禹贡北距淮东南据海皆扬州之域唐虞置扬州牧至汉武帝初置扬州刺史後汉因之分扬州之半置吴郡治建业後以封孙氏晋太康元年平吴徙治建康惠帝元康初有司奏扬州疆土旷远统理尤难於是割七郡置江州元帝渡江都扬州统丹阳吴郡宋孝武分浙江东

五郡为东扬州治会稽而扬州仍领丹阳等十五郡大明三年以扬州所统六郡为王畿以东扬州为扬州八年复旧景和元年罢东扬州隋徙扬州治江都置大都督府以句容延陵曲阿等县属焉大业中废唐武德二年河间王孝恭平辅公祐以江宁溧水丹阳溧阳安业复置为东南行台尚书省治江宁七年废寻复为大都督府领上元金陵句容丹阳溧水溧阳凡六县九年徙治江都贞观七年复旧至德中复治江都秦观扬州集序云汉刺史无常治後之称扬州者指其所治而已

义州晋元帝置陈太建元年废为建兴郡领建安同夏乌山江乘临沂湖熟凡六县

蒋州隋平陈废丹阳郡於石头立蒋州唐武德二年废七年复置於金陵县寻废

昇州唐乾元元年以江宁郡改置昇州顏真卿尝以昇州刺史兼浙西节度使上元二年废光啓三年复置天佑二年伪吴封徐温齐公大城昇州武义二年改金陵府皇朝开宝八年复置天禧二年改为江宁府

茅州唐初置领琅邪金山县後废武德三年以句容延陵复置七年废

地所属郡名

故鄣郡秦置汉元封二年更名丹阳郡吴永安中以芜湖以南十三县复为故鄣治宛陵

丹阳郡汉置治宛陵志云领宛陵於潜江乘春谷秣陵故鄣句容泾丹阳石城湖熟陵阳芜湖黟溧阳歙宣城凡十七县後汉因之建安十三年孙权分为新都郡二十六年权始置丹阳郡自宛陵治建业领县十九永安中分置故鄣郡丹阳所领惟溧阳以北六县晋太康元年改建业复为秣陵宋齐间分丹阳立毗陵郡丹阳所领惟建康秣陵丹阳江宁永世溧阳湖熟句容八县隋平陈废大业初复置领江宁溧水以当涂来属割延陵句容等县属江都唐初废为州天宝元年复置领丹徒丹阳延陵句容江宁金坛凡六县至德二载析置江宁郡

建兴郡陈太建元年以义州南琅邪彭城郡地置领建安同夏乌山江乘临沂湖熟凡六县属扬州

江宁郡唐至德二载以润之江宁句容宣之溧水溧阳置乾元元年改昇州

义兴郡晋永兴中以丹阳之平陵永世及割吴兴郡置四县立义兴郡以赏周玘创义之功属扬州

地所置侨郡名

淮南郡本秦九江郡汉立淮南王国後为郡晋治寿春成帝初苏峻祖约作乱於江淮石聪南

侵淮南百姓南渡者转多於是侨立淮南郡以处之领于湖繁昌当涂逡遁定陵襄垣凡六县宋大明六年以淮南故郡并宣城入於姑孰隋废以当涂属丹阳更於寿春置

南琅邪郡晋元帝於江乘之金城立琅邪郡属扬州领临沂阳都及怀德三县在旧江宁县东北五十里成帝咸和六年复琅邪比汉丰沛宋大明四年以郡隶王畿五年行幸琅邪郡原遣囚繫陈大建元年废为建兴郡魏郡广川郡高阳郡堂邑郡四郡并咸康四年侨立并所统县并寄居京邑

南东海郡南东平郡南兰陵郡晋元帝以江乘置四郡穆帝时以南东海七县出居京口

地所置府号

金陵府伪吴武义二年改昇州为金陵府大和五年伪吴建都金陵寻罢天祚三年封徐知诰为齐王建为西都改江宁府

江宁府天祚三年改金陵为江宁府石晋天福二年李昇建国伪号唐皇朝开宝八年改昇州天禧二年以昇州为江宁府置军国建康命寿春郡王为府尹建炎三年改建康府

建康府建炎三年五月丙戌诏改江宁府为建康府节镇旧号如故

地所统县名【存者丹之】

上元次赤县唐上元二年废昇州以江宁地置属润州後废宝应元年复置光啓三年置昇州属焉通监云大顺元年置昇州於上元县以张雄为刺史县初仍江宁旧治白下村光启中徙凤台山西寰宇记云国朝迁南唐司会府今府治之东御前後军营是其地建炎徙今治在城东隅距行宫才一里

江寧次赤县【临江归化金陵白下】晋太康元年分秣陵置临江明年改江宁後废永嘉中复置隋并秣陵建康同夏地入焉大业初属丹阳郡唐武德三年即县置扬州更名曰归化七年号金陵属蒋州明年徙白下村称曰白下属润州正观七年复名归化九年复为江宁至德二载置江宁郡而县废乾元元年复置属昇州上元二年州废以其地置上元县南唐割上元南十九乡当涂北二乡因旧名复置隶金陵府图经云古县治南临浦水在城西南七十里实录云南唐在州城西偏西即吴冶城东临运渚今天庆观东即其地国朝移郭下在城西北距行宫三百步輿地广记云唐既改江宁为上元南唐复析上元置江宁分治郭下

句容次畿县汉置属丹阳郡有句曲山其形如句字因以名县汉武帝封长沙定王子党为句容侯国除复为县吴赤乌八年使校尉陈勲发屯兵三万凿句容中道至云阳西城以通吴会船舰唐武德二年於县置茅州七年州废属蒋州九年隶润州会昌四年升望县乾元元年属昇州上元二年州废属润州光启三年复置昇州县隶焉国朝因之县治在府东九十里晋毛

宝传烧苏峻句容积聚峻颇乏食晋桓修传王恭将伐南谯王尚之遣何澹之向句容修与辅国将军陶无忌距之修至句容而恭败唐武德五年李靖讨辅公祐兵先至丹阳公祐大惧弃城东走李世积追之公祐至句容兵能属者才五百人

溧水次畿县隋开皇中析溧阳丹阳置属蒋州大业初属丹阳郡唐上县武德三年属扬州九年属宣州乾元元年属昇州上元二年昇州废属宣州光启三年复置昇州县属焉国朝因之县治在府东南一百二十里唐武德二年杜伏威遣行台左仆射辅公祐攻李子通渡江攻丹阳克之进屯溧水龙纪二年孙儒尽举淮南之衆济江前军至溧水杨行密使李神福拒之又行密传大顺二年孙儒屯溧水行密遣李神福屯广德皆此地也

溧阳次畿县秦置溧水所出南湖也汉初属江都元封中属丹阳郡前汉封梁敬王子钦後汉封陶谦皆为溧阳侯吴省为屯田志云封潘璋为溧阳侯又云孙皓封孙蒋为溧阳侯晋太康元年复置分为永平隋开皇十八年并入溧水唐武德三年析江宁溧水复置隶扬州九年隶宣州乾元元年属昇州明年属宣州寻复上元元年又属宣州未几又复宝应元年属宣州光启三年复属昇州国朝因之旧治在溧水县东南九十里天复三年移治今所在府东南二百四十里通典汉旧县子胥奔吴乞食之所即此溧阳也元和郡国志溧水在溧阳县南六里

秣陵县【金陵建业】更治所凡六楚威王以其地有王气埋金镇之号曰金陵秦始皇改为秣陵属鄣郡建康实录云秦县城在旧江宁县东南六十里秣陵桥东北汉属丹阳郡武帝封江都王子纆为秣陵侯後汉复为县孙权据京口徙治改曰建业晋太康元年复为秣陵三年分淮水北为建业南为秣陵宋书云县治去京六十里今故冶村是也义熙中移於鬪场栢社实录云在江宁县东南渡长乐桥古丹阳郡是也元熙元年省扬州禁防参军县治移其处图经云在宫城南八里一百步小长子巷内梁末北齐军於秣陵故城跨淮立桥栅当是其地隋并入江宁景德二年置秣陵镇今在江宁县东南五十里

建业县晋书太康三年分秣陵淮水北为建业建兴初避帝讳改建康县旧有城在吴冶城东实录云县治在故都城宣阳门内古御街东寰宇记云咸和六年徙出宣阳门外御街西建初寺门路东是也隋省入江宁江乘县秦置方輿志云始皇登会稽从江乘还过吴汉属丹阳郡王莽曰相武後汉复旧吴省为典农都尉晋武帝复置咸康七年析南境为临沂属琅琊郡陈大建元年属建兴郡南史郑袭尝为令

丹阳县汉元朔初封江都王子敢为丹阳侯後汉为县晋封孙韶为丹阳侯南朝复为县隋废武德二年析江宁溧水复置属扬州正观七年省入当涂天宝元年复置县属丹阳郡非旧地矣

湖熟古县名汉属丹阳郡武帝封江都王子胥行为湖熟侯一云姑孰後汉亦为侯国吴省为典农都尉晋武复置陈属建兴郡汉兴平二年孙策攻扬州转攻湖熟江乘晋苏峻之乱毛宝烧句容湖熟积聚义熙九年罢临沂湖熟脂泽田以赐贫人宋元嘉二十二年浚淮起湖熟废田千余顷二十八年徙越城流人淮南流人於姑孰皆此地元和郡国志云在旧江宁县东南

七十里今在上元县丹阳乡去县五十里淮水北古城犹在永平县【永安永世】汉元封中置属丹阳郡寻废吴分溧阳复置改曰永安孙休封弟谦为永安侯孙皓封孙洪为永平侯晋武又改永世惠帝分置平陵并永世凡六县属义兴郡寻复旧名宋省入溧阳

平陵县详见吴国城下今废

安业县唐武德二年析江宁溧水置今废

同夏县梁武帝生於秣陵同夏里大同元年因以置县陈属建兴郡隋省入江宁图经云县东十五里有同夏浦旧有城今上元县长乐乡是其地

临沂县本徐州琅琊国县晋咸康七年分江乘西界侨置属南琅琊郡陈属建兴郡吴蔡靚诸葛恢梁孟智陈明仲璋皆尝为令实录云县城在京江独石山西临大江在旧江宁县北四十里南徐州记云县有落星山属慈仁乡去县四十里今上元县长宁县摄山之西白常村盖其地距上元县三十八里

怀德县【费】晋大兴元年琅邪国人随帝渡江者几千户立怀德县以处之属丹阳郡永复为汤沐邑後属琅邪郡其地寄建康北境实录云县城在宫城南七里建初寺前路东後改曰费移於宫城三里西北耆闾寺西宋元嘉十五年省入建康临沂古迹编云费县与琅邪分界於潮沟村在县北九里今在上元县鍾山乡

即丘县本晋琅邪国县元帝置属南琅邪郡宋元嘉八年省入阳都

阳都县本汉城阳国县後汉改为琅邪国晋废元帝置属南琅邪郡宋大明五年省入临沂

地所接四境

建康府东西二百三十五里南北四百六十里东至本府界首二百四十里自界首至镇江府四十里西至本府界首一十里自界首至和州八十三里南至本府界首二百四十里自界首至宁国府一百二十里北至本府界首四十九里自界首至眞州一百一十里东南到本府界首二百八十五里自界首至常州一百八十五里西南到本府界首九十里自界首至太平州三十里东北到本府界首一百三十五里自界首至镇江府四十五里西北到本府界首二十二里自界首至眞州一百二十七里自府界到东京陆路一千四百四十五里水路一千七百七十里到西京陆路一千八百里水路二千一百九十五里

上元县附郭东西九十五里南北八十五里东至句容县界八十里以周郎桥中分界西至江宁县界一里以御街中分为界南至江宁县界七十里以永丰乡北白米湖为界北至眞州六合县界四十九里以瓜步大江中流为界东南到句容县界七十里以东陈村为界自界首到句容县三十五里西南到江宁县界四里以大隱乡为界东北到句容县界六十里以章桥为

界自界首到句容县八十里西北到真州六合县界二十九里以湖熟大江中流为界自界首到六合县八十五里江宁县附郭东西八十五里南北九十八里东至上元县界一里以御街中分为界西至和州乌江县界四十里以鳊鰲洲大江中流为界自界首至乌江县一十五里南至溧水县界九十三里以乌刹桥为界自界首至溧水县四十五里北至上元县界五里以金陵乡为界东南到句容县界七十里以湖山乡为界自界首到句容县九十里西南到太平州当涂县界一百六里以章公塘为界自界首到当涂县一十七里东北到上元县界二十五里以崇礼乡为界西北到上元县界五里以金陵乡为界

句容县东西七十里南北一百二十里东至镇江府丹徒县界五十里以山口为界自界首至丹徒县五十里西至上元县界二十里以周郎桥中分为界自界首至上元县七十里南至溧水县界六十里以丁塘村为界自界首至溧水县三十里北至真州扬子县界七十里以下蜀大江中流为界自界首至扬子县六十里东南到镇江府金坛县界六十里以茅山崇元观西堆为界自界首到金坛县六十里西南到江宁县界七十里以上义山东绿杨村为界自界首到江宁县九十里东北到丹徒县界六十五里以左桥为界自界首到丹徒县四十五里西北到上元县界八十里以东阳镇霸桥为界自界首到上元县六十里

溧水县东西八十二里一百三步南北一百五十五里三十八步东至句容县界三十七里以浮山

顶为界自界首至句容县四十里西至上元县界三十五里以乌石桥为界自界至上元县八十

五里南至宁国府宣城县界一百一十里以四

牌坊为界自界至宣城县一百三十里北至江

宁县界四十五里以上义山为界自界至江宁县七十五里东北到句容县界四十里以望湖冈为界自界到句容县五十里东南到溧阳县五十里以分界山为界自界到溧阳县七十里西南到宁国府宣城县界一百三十五里以崑山乡为界自界到宣城县一百里西北到江宁县界四十五里以乌刹桥为界自界到江宁县七十五里

溧阳县东西一百五十里南北一百六十里东至常州宜兴县界一十五里以葑埭牌为界自界首至宜兴县七十里西至溧水县界八十五里以三塔墩为界自界至溧水县四十里南至广德军界七十里以石屋山分流为界自界首至广德军八十里北至金坛县界八十里以长塘湖港荻场为界自界首至金坛县四十里东南到宜兴县界八十里以白塔山为界自界首到宜兴县四十里西南到宣城县界一百二十里以湖东北岸为界自界首到宣城县一百三十里东北到宜兴县界四十五里以五家村为界自界首到宜兴县六十五里西北到溧水县界七十五里以曹山陆路为界自界首到溧水县四十五里

景定建康志卷十五

卷十六

钦定四库全书

景定建康志卷十六 宋 周应合 撰

疆域志二

镇市

淳化镇在上元县东四十五里凤城乡淳化五年置金陵镇在江宁县南六十里本陶吴铺景德二年改为镇

秣陵镇在江宁县南五十里

常宁镇在句容县东南五十里天禧元年以镇置寨下蜀镇在句容县北六十里

土桥镇在上元县东南六十里与句容县两界

东阳镇在句容县西北六十里郡国志云楚汉之际改秣陵为东阳郡因为名有馆驿

江宁镇在江宁县西南六十里

邓步镇在溧水县南一百二十里乾道四年正月差官收税宝佑四年权镇张师鲁申府移东坝市收税孔家堰镇在溧水县南四十五里

固城镇在溧水县南九十五里

高淳镇在溧水县南一百里

举善镇俗名戴步在溧阳县南三十五里

杜渚镇在溧阳县西南六十里乾道四年移税额於溧水县邓步

古市按宫苑记吴大帝立大市在建初寺前其寺亦名大市寺宋武帝永初中立北市在大夏门外归善寺前宋又立南市在三桥篱门外鬪场村内亦名东市又有小市牛马市谷市蚬市纱市等一十所皆边淮列肆稗贩焉内纱市在城西北耆闾寺前又有苑市在广莫门内路东

盐市在朱雀门西今银行花行鷄行镇淮桥新桥笪桥清化市皆市也【旧志】

考证南史徐度传云徐嗣徽任约等来寇高祖与敬帝还都时贼已据石头市?居民并在南路去台遥远恐为贼所乘乃使度将兵镇於冶城筑垒以断之以此知六朝市?多在淮水之北冶城之东也 通典梁有大市南市北市令大南北三市丞陈淮水北有大市自余小市十余所 隋食货志言陈时淮水北有大市十余所置官司税敛既重时甚苦之 庾阐扬都赋云其宝货则瑶琨琅玕青碧素珉阳球散火陰田潜珍云英水玉错耀龙鳞焕若金膏晃若银烛瑠璃冰清而外映珊瑚触石而上翹牙簞列文於象齿火布濯秽於炎焱西岨石城则舟车之所会东尽金塘则方驾之所连 梁庾肩吾游市诗云旗亭出御道游目暂回车

晋史廷尉张闳住在小市南史後废帝元徽二年张敬儿破贼宣阳门庄严寺小市 丹阳记曰苑城市谓之苑市秣陵有门场市寰宇记云东晋咸和中置七尉右尉在纱市今属上元县鍾山乡张循王北庄前平地是也 宫苑记南尉庄草市北湘宫寺前其地在今上元县治东北齐东昏侯宫中立宫市使宫人屠沽帝为市魁後主重关市之征以阳惠明为大市令

汤泉市在上元县神泉乡汤山延祥院之前去城六十里

栖霞市在上元县长宁乡摄山栖霞寺之前去城四十五里

索墅市市有索墅坊在上元县清化乡去城五十里泉都市在上元县泉水乡亦名龙都去城五十五里东流市市有桥曰东流以水流自东因名之在上元县宣义乡去城四十里

花林市南至曹村五里北至大江十二里齐梁诸坟多在其地属上元县清风乡去城三十五里

龙湾市在上元县金陵乡去城一十五里

竹筱市在上元县长宁乡去城二十里

蛇盘市在上元县开宁乡去城二十里有馆驿

麒麟市在上元县开宁乡去城三十里

西干市在上元县长宁乡去城四十五里

章桥市在上元县长宁乡去城五十里

石井市在上元县长宁乡去城二十五里

五城市在上元县崇礼乡去城二十五里

土桥市在上元县丹阳乡去城六十里

湖熟市在上元县丹阳乡去城六十里

新林市在城西南二十里

板桥市在城西南三十里

铜井市在城西南八十里

东口市在城南长干桥下东今乌衣巷口是

西口市在城南长干桥下今西街口是

小口市在城西南江宁县安德乡

朱门市在朱门南

水桥市在江宁县归善乡

杜桥市在江宁县万善乡去城四十里

路口市在城南七十里

仓头市在句容县仁信乡去城九十里

柴沟市在句容县琅邪乡去城七十五里有馆驿白土市在句容县来苏乡

高友步俗名上步在溧阳县南二十五里

周城步在溧阳县西南四十五里

上兴步在溧阳县西六十里

黄连步在溧阳县西北五十五里

街巷

古御街按宫城记吴时自宫门南出至朱雀门七八里府寺相属晋成帝因吴苑城筑新宫正

中曰宣阳门南对朱雀门相去五里余名为御道夹道开御沟植槐柳梁武帝克东昏焚其奢淫服六十二种於御街今自天津桥直南夹道犹有故沟皆在民居即古御街也又有古御街在台城西掖门外按宫苑记吴太初宫北曰玄武门北直对台城西掖门前路东即古御街是也其实自大司马门出为御街自端门出为驰道自西掖门出为古御街端门即阊阖门

朱雀街按宫城记自宫门南出来苑路至朱雀门七八里府寺相属輿地志云朱雀门北对宣阳门相去六里名为御道夹开御沟植柳环渠吴纪曰天纪二年卫尉岑昏表修百府自宫门至朱雀桥夹路作府舍又开大道使男女异行夹道皆筑高墙瓦覆或作竹藩庾阐扬都赋云横朱雀之飞梁豁八达之遐冲

考证世说曰宣武出镇南州谓王东亭曰丞相初营建业无所因承而制置纡曲方此为劣东亭曰此丞相乃所以为巧也江左地促不如中国若使阡陌条畅则一览而尽故纡余委曲若不可测今台城在府城东北而御街迤邐向南属之朱雀门则其势诚纡回深远不可测矣侯景缘淮作塘自石头至於朱雀街十余里中楼雉相属宋彭城刘俊司空勔之长子勔见害於朱雀街俊兄弟平生不行此路

焚衣街在御街

考证齐东昏侯制四种冠五彩袍一月中二十余出晨出三更归夜出清晨返梁自襄阳出师废东昏侯焚奢淫异服六十二种於御街後人号其所曰焚衣街【杨虞部诗雉头金缕及珠胎?结香云画不开御路旁人空叹息逡巡红焰作青灰 马野亭诗玉指亲裁五彩衣尚方工作极纖奇看来亡国都缘此蕪向通衢了不遗鹢羽化为青烧去雉头还有紫?随更须大字书华表要使将来尽得知】

孔子巷在青溪侧大仁寺前西南古长乐桥东一里考证輿地志云孔子庙在乐游苑东隔青溪奉圣亭侯所奉之庙也旧在溪南丹阳郡之东南本东晋所立中废宋元嘉十九年诏复孔子庙至齐迁於今处以旧地为浮图今名孔子寺亦名孔子巷在城东南五里古长乐桥东 建康实录晋孝武太元十一年立宣尼庙故丹阳郡城前後移庙过淮水北以旧处为孔子寺亦呼其巷为孔子巷

国子监巷今镇淮桥北御街东旧比较务即其地考证南唐跨有江淮鳩集典坟特置学官滨秦淮开国子监里俗呼为国子监巷

乌衣巷在秦淮南晋南渡王谢诸名族居此时谓其子弟为乌衣诸郎今城南长干寺北有小巷曰乌衣去朱雀桥不远【旧志】

考证丹阳记曰乌衣之起吴时乌衣营处所也 晋记江左初立琅邪诸王居乌衣巷王敦谋逆导忧覆族使郭璞筮之卦成叹曰吉无不利淮水竭王氏灭子孙繁衍世说王导曰庾元规若来吾角巾还乌衣南 王僧?为御史中丞领骁骑将军甲族由来不居

此官王氏分枝居乌衣者位宦微减僧?为此官乃曰此是乌衣诸郎坐处我亦可试为尔
建康实録云纪瞻立宅於乌衣巷屋宇崇丽园池竹木有足赏翫焉 吴虎臣能改斋漫录云今
世小说尤可笑者莫如刘斧摭遗所载乌衣传引刘禹锡王谢堂前之句遂谓唐朝金陵人姓
王名谢因海舶入燕子国其实以乌衣为燕子国不知王者王导等人谢者谢鲲之徒也按世
说诸王诸谢世居乌衣摭遗之说亦何谬耶 艺苑雌黄云按輿地志晋王氏自立乌衣宅当时
诸谢曰乌衣之聚皆此巷也王氏谢氏乃江左衣冠之盛者故杜诗云王谢风流远又云於今
王谢即比观刘斧摭遗乃以王谢为一人名其言既怪诞遂托名於钱希白终篇又以刘梦
得诗实其事希白不应如此谬是刘斧妄言耳 宋书云谢鲲风格高峻少所交纳惟与族子灵
运瞻曜洪微并以文义赏会共宴处居在乌衣巷故谓之乌衣游鯤五言诗云昔为乌衣游戚
戚皆子侄其地在今城东南五里【刘禹錫朱雀桥边野草花乌衣巷口夕阳斜旧时王谢堂
前燕飞入寻常百姓家有释此诗者云乌衣者士服之多也朱雀桥边野草花喻无大贤也乌
衣巷口夕阳斜谓岁久儒服少也可怜王谢堂前燕谓二贤旧居不存也飞入寻常百姓家谓
此地俗人所居伤其时乃作是诗也

杨虞部诗人物风流往往非空余陋巷说乌衣旧时帘幕无从覓祇有年年社燕归

朱存诗閤闋沦亡桎梏移年年旧燕亦双归茅檐苇箔无冠盖不见乌衣见白衣

任斯庵诗羊车暇日劳挥麈玉树春风自满庭欲问乌衣旧时事静无秋燕有秋萤 曾极诗吴
兵曾驻黑云都江左夷吾此定居休把乌衣轻马粪悬鹑结驷揔丘墟○马野亭诗依依燕子
可怜生相向於人直有情不道华堂曾止息如今穷巷莫经营六朝盛事同流水千载遗踪只
旧城白日飞忙难话此话时须等夕阳明 阙名

乌衣池馆一时新晋宋齐梁旧主人无处可寻王谢宅落花啼鸟秣陵春】

运巷在今天庆观相接

考证沈约自序曰王父从官京师义熙十一年高祖赐馆於都亭里之运巷

世说叙录冶城在今运巷东旧里亭今俗呼为黄泥巷

主簿巷在明道书院右

考证明道先生程纯公尝为上元主簿政教在人至今呼为主簿巷

坊里

鍾山坊在行宫前东夹道

石城坊在行宫前西夹道

东锦绣坊在御街左

西锦绣坊在御街右

状元坊二一在御街左东锦绣坊南一在府学南报恩坊在御街右西锦绣坊南

安乐坊在御街右报恩坊北

金泉坊在御街右报恩坊南

嘉瑞坊在御街左状元坊南

舜泽坊在御街右金泉坊南

金陵坊在御街右舜泽坊南

建业坊在御街右镇淮桥西北

长乐坊在御街左镇淮桥东北

招贤坊在府治南

经武坊在府治左

武胜坊在府治东北

细柳坊在都统司後军寨前

青溪坊九曲坊并在府治东

嘉会坊在總领所前

尊贤坊在明道书院之右

东市坊在鱼市东

凤台坊在鱼市南

西市坊在鱼市西

鹭州坊在鱼市北

长春坊在东市之东

寬征坊在西市之南

清化坊欽化坊并在西市之北

朝宗坊佳麗坊并在西市之西

保寧坊在保寧寺前

廣濟坊在廣濟倉南近水西門

武定坊在鎮淮橋東南

崇勝坊在鎮淮橋西南

長干里在秦淮南

考證越范蠡築城長干 丹陽記大長干寺道西有張子布宅在淮水南 吳都賦曰長干延屬飛蕢舛互李喜注江東謂山間為干建業之南其間平地吏民居之故號為干 實錄云長干是里巷名江東謂山隴之間曰干建康南五里有山崗其間平地民庶雜居有大長干小長干東長干并是地里名小長干在瓦棺南巷西頭出江【羅北谷詩山隴中間號曰干此長干里盛衣冠想應王謝朝回後日日行人看綉鞍】

鳳凰里在今保寧寺後

考證宋元嘉十四年大鳥二集秣陵民王凱園中李樹上大如孔雀頭足小高毛羽鮮明文彩五色聲音諧從衆鳥如山鷄者隨之行三十步頃東南飛去揚州刺史彭城王義康以聞改鳥所集永昌里為鳳凰里今保寧寺是其處

表孝里在溧水縣

考證乾道四年邑人伊小乙割肝以療母疾知縣陳嘉善榜其居旌之

鄉社

金陵鄉【縣北】慈仁鄉【縣東北】鍾山鄉【縣西北】北城鄉【縣東北】清風鄉【縣東北】長寧鄉【縣東北】惟政鄉【縣東舊名惟信】開寧鄉【縣東北】宣義鄉【縣東】鳳城鄉【縣東】清化鄉【縣東】神泉鄉【縣東北】丹陽鄉【縣東南】崇禮鄉【縣東南】泉水鄉【縣東南】道德鄉【縣東】盡節鄉【縣南】長樂鄉【縣東】

右十八乡隶上元县

凤台东乡 凤台西乡【并县东南】安德乡【县西南】新亭乡【县东南】随车乡【县西】光宅乡【县西南】开元乡【县南】万善乡【县南】长泰南乡【县南】长泰北乡【县南】驯翬乡【县东南】惠化乡【县南】葛僊乡【县东南】建业乡【县南】永丰乡【县东南】归善乡【县西南】处真乡【县西南】铜山乡【县南】朱门南乡 朱门北乡【县南】横山南乡 横山北乡【县南】

右二十二乡隶江宁县

句容乡【县东南】福祚乡【县南】临泉乡【县西南】上容乡【县西南】承仙乡【县南】政仁乡【县南】茅山乡【县东南】崇德乡【县南】来苏乡【县东】望僊乡【县东北】移风乡【县东北】孝义乡【县北】仁信乡【县北】凤坛乡【县西北】琅邪乡【县西北】通德乡【县西】崇信乡【今废】

右十七乡隶句容县

上元乡【县东南】思鹤乡【县西】赞贤乡【县南】白鹿乡【县东南】丰庆乡【县东】归政乡【县东北】崇贤乡【县北】长壽乡【县北】山阳乡【县南】崇教乡【县西南】游山乡【县南】僊坛乡【县东南】安兴乡【县东南】仪凤乡【县南】永宁乡【县西南】唐昌乡【县东南】立信乡【县西南】

右十七乡隶溧水县

永成乡【县东北】福贤乡【县东】举福乡【县西南】明义乡【县西】惠德乡【县南】德随乡【县南】从山乡【县西南】桂壽乡【县西南】奉安乡【县西北】崇来乡【县西北】来苏乡【县北】允泰乡【县北】允定乡【县北】

右十三乡隶溧阳县【本县旧领乡十七端拱元年割昭德丰乐彰德三乡属建平县嘉佑六年分成乐乡并入永成福贤二乡今领乡十三】

铺驿

驿路五十一铺每铺相去十里

东门铺 东十里铺 蛇盘铺 麒麟铺

东流铺 崑仑壩铺 张桥铺【以上七铺属上元县】

江城湖铺 宣家岘铺 山口铺 庙林铺

下蜀铺 纪大店铺 【以上六铺属句容县】

右十三铺系东路直抵镇江府界炭渚铺

土门铺 夹堰铺 迟店铺 清水亭铺 园墓桥铺 秣陵铺 李村铺 路口铺

乌坵桥铺 【以上九铺属江宁县】

方墟铺 石头堰铺 乌山铺 齐家店铺 南亭堰铺 南十里铺 蒲塘铺 三角子铺 孔家堰铺
土山铺 罗家林铺 戴公堰铺 漆桥铺 朱家店铺 汤师娘铺
松儿堰铺 【以上十六铺属溧水县】

右二十五铺系南路直抵广德军界顾置铺

越台铺 石子堰铺 官庄铺 板桥铺

三城湖铺 江宁铺 青松林铺 铜井铺

葛家堰铺 【以上属江宁县】

右九铺系西路直抵太平州界慈湖铺

府前铺 西门铺 石碑冲铺 靖安铺 【以上属上元县】 右四铺系北路直抵滁州界宣化铺

县路十一铺每铺相去二十里此系诸县不通驿路处递传之路

石井铺 七里堰铺

右二铺属上元县界

周郎桥铺 县西门铺

右二铺属句容县界

县东门铺 菱塘铺 破湖铺

右三铺属溧水县界

黄运步铺 中桥铺 乌山村铺 县西门铺

右四铺属溧阳县界

永宁驿旧基在南唐仪仗院今为待漏院而驿徙置總领所西闪驾桥之南绍兴十五年晁公谦之建

江宁驿在江宁县西南五十里

秣陵驿在江宁县南五十里

七桥驿在溧水县南七十五里岁久圯坏仅存故址淳熙中重建榜曰迎华堂

石头驿张九龄有候使石头驿楼诗李白答裴侍御先行至石头驿以书见招诗云君至石头驿寄书黄鹤楼梦笔驿

考证江淹集云尝宿於冶亭梦见一夫自称郭璞谓淹曰吾有笔在公处多年可以见还淹乃探怀中得五色笔一管以授之嗣後为诗絶无美句时人谓之才尽按建康有冶亭在冶城又有东冶亭在秦淮上皆六朝士大夫饯送之所淹本集所载始末皆建康事也梦笔驿不知在何处 庚溪诗话云梦笔驿江淹旧居【姚宏诗一宵短梦惊流俗十载高名挂里间遂使晚生矜此意痴眠不读半行书

曾极诗晋尚清谈笔力衰文章高下亦随时景纯不作文通死五色毛锥付与谁】

金陵驿亦名蛇盘驿在上元县长乐乡蛇盘市俗呼余婆音之讹也淳熙十二年留守钱公良臣建

考证曾极有蛇盘驿诗【枳篱华屋半雕残列肆屠羊客卸鞍霸气销沉形胜歇龙盘何事作蛇盘 王半山题忆昔东游未有须扶衰重此驻肩輿市中年少今谁在鲁老当街六十余又重冈古道春风衷草色花光似故人却喜此身今漫浪田家随处得相亲】

东阳驿西至金陵驿四十五里淳熙十二年留守钱公良臣建

柴沟驿西至东阳驿十五里淳熙十二年留守钱公良臣建

下蜀驿西至柴沟驿十五里东至镇江府界十五里绍兴八年三月己巳车驾未入建康次下蜀驿有御座在焉淳熙十二年留守钱公良臣重建驿

太平驿在溧阳县治西街北太平兴国六年建嘉定十三年重建

望僊驿旧在句容县治南元丰二年移县治东

漆桥驿在溧水县南七十五里

官塘驿在溧水县东南二十五里

坊墟驿在溧水县北三十五里

淮源驿在溧水县东北三十五里

仪宾驿在溧水县南一百一十里

招贤驿在溧水县南一百一十里

莆塘驿在溧水县南二十五里

白马驿在溧水县东南四十里

延宾驿在溧水县西四十七里

青阳驿在句容县东二十里

竹里驿在句容县北六十里仓头市

云亭驿在句容县

右自漆桥以下十二驿今并废

昭华驿在句容县开宝中焚圯太平兴国二年移县街东或云望僊驿是也

中山驿在溧水县南三十步惠政桥西南

考证伪吴顺义中置後知县李彦重建伪唐昇元二年萧俨添置轩廊建炎焚毁绍兴八年李朝正重建鲁訢作记嘉定十五年史改之重修添置廊庑绍定四年史弥巩重修来者便之

马驿二所在下蜀东阳宝庆二年重修

道路

秦皇驰道

考证秦始皇三十六年东游自江乘渡江驰马於此【王荆公诗穆王得八骏万事不期修落
落千载间复此好远游车轮与马迹此地亦当留想当治道时劳者尸如丘】

吴帝驰道

考证吴都赋云朱阙双立驰道如砥

宋帝驰道

考证宋书大明五年孝武初立驰道自阊阖门至於朱雀门为南驰道又自承明门至玄武湖
为北驰道八年罢南北二驰道景和元年复立 宫苑记宋筑驰道为调马之所【杨虞部诗路
平如砥直如弦官柳千株翠拂烟玉勒金羈天下骏急於奔电更挥鞭 马野亭诗南城来到北
城隅更北直趋玄武湖一上雕鞍三十里两旁官柳数千株六朝都邑真如此旧日咸秦得似
无暑月行人不张盖漫天自有翠廔□】

小丹阳路今在江宁县横山乡陶吴镇西南十里与太平州当涂县接界里俗犹呼丹阳

考证晋咸康三年历阳内史苏峻叛陶回谓庾亮曰峻知石头有重城不敢直下必向小丹阳
南道步来宜设伏邀之可一战擒也亮不从峻果自小丹阳来迷失道夜行无复部伍亮闻乃
悔之

黄城大路在今上元县清风乡黄城村

考证梁太清二年侯景遣军至江乘拒邵陵王纶赵伯超谓纶曰若从黄城大路必与贼遇不
如径指鍾山突据广莫门出贼不意城围必解

湖头路在今玄武湖东北

考证南史东昏侯永元二年崔慧景奉江夏王内向遣中领将军王莹都督衆军据湖头筑垒
上带蒋山又王敬则举兵朝廷遣沈文季持节都督屯湖头备京口路

白杨路在城南十里石岗之横道

考证陈大建末始兴王叔陵反部麀下度小航将趋新林萧摩诃追擒於白杨路【马野亭诗
此路如何名白杨白杨林木苦非良开知宰树常多种想见坟莹在两旁三国英雄尘一窖六
朝兴废字千行行人过此休惆怅往古来今總混茫】

竹里路在句容县北六十里仓头市东有竹里桥南边山北滨大江父老云昔时路行山间西接东阳遶摄山之北由江乘罗落以至建康宋武帝讨桓玄其路经此今城东余婆岗至东阳路乃後世所开非古路也谢玄走马路在上元县崇礼乡土山下至今不生草详见土山下

姜巴路在小茅山後通延陵

考证真诰秦时有士周大宾及巴陵侯姜叔茂者来往句曲山下秦孝王时封侯故以姜巴名其路

制使姚公希得任内整砌街道先是东西锦绣坊及经武坊一带街衢多有损坏缺?去处不便往来景定三年三月十七日兴工至四月二十日毕重新布砌用砖二十余万口工物總费五万二千一百余缗米六十一石七斗有奇

桥梁

天津桥在行宫前旧名虹桥政和中蔡公薨建为石桥号曰蔡公桥後改今名

考证天津本西京大内前桥名即康节邵雍闻杜鹃处今移其名於此不忘京师之思也【石龟翁逢龙诗下马过天津听传禁漏频惟怜一桥月曾照六朝人金剥宫门字红飞粉壁尘中官来宿内因问帝乡亲周彦夫诗下车聊复问何如尚忆重来四纪余钟阜秦淮俱好在祇怜双鬓自萧疎聯鑣去作蒋山游路转天津遶御沟忽作故都禾黍恨洛阳宫殿燬千秋】

镇淮桥在今府城南门里即古朱雀航所【旧志】

考证按世说叙录及輿地志丹阳记皆云吴时南津桥也名曰朱雀航大宁二年王含军至丹阳尹温峤烧絶之以遏南衆定後京师乏良材无以复之故为浮航至咸康三年侍中孔坦议复桥於是税航之行者具材乃值苑宫初创材转以治城故浮航相仍至太元中骠骑府立东航改朱雀为大航晋起居注曰白舟为航都水使者王逊立之谢安於桥上起重楼上置两铜雀又以朱雀观名之实录云咸康二年新立朱雀航对朱雀门南渡淮水亦名朱雀桥本吴南津大航桥也王敦作乱温峤烧絶之权以浮航往来至是始议用杜预河桥法长九十步广六丈冬夏随水高下浮航相仍至陈每有不虞之事则剔之晋书王敦作逆明帝以应詹都督朱雀桥南诸军

事齐高祖讨袁粲黄回与粲通谋萧顺之率家兵据朱雀桥回遣覘之遂不敢出梁高祖以义师伐东昏东昏使江道林率兵出战退保朱雀航凭淮自固东昏又遣王珍国等列阵於航南开航背水以絶归路与王茂等战败一时投淮死者积屍与航等後至者乘之以济北齐兵至故秣陵陈高祖分兵御之遣杜陵顿航南

元徽中贼党杜黑蠡分军向航刘劭御之败死侯景兵至航建康令庾信率兵屯航北见景至命彻航始除一舶弃军走南塘游兵复闭航渡景乘胜至阙下乾道五年留守史公正志重造

得旧址增广一丈郡从事丘崇为之记【乾道五年十一月建康府重作镇淮饮虹二桥六年正月桥成惟二桥横跨秦淮据府要冲自江淮吴蜀游民行商分屯之旅假道之宾客杂?旁午肩摩毂击穷日夜不止淮水至其下奔流而西势益悍湍激射冲啮滋甚昔之为桥者又不暇顾计久远薄费而亟成重负而弱植之无何辄坏则姑补苴其甚仅取不废岁靡缗钱数百多或至千岌岌自若也留守待制史公厥既治成有废必举大备都邑之制乃因民所欲为作而新之率增其旧四之一镇淮长十有六丈为二亭其南属民以诏令饮虹长十有三丈加屋焉凡十有六楹而并广三十有六尺基以巨石甃以厚甃千寻之材世守之土必坚必良是度是营而属其事於浮图氏致胜法才又躬为程度俾以从事创意靡密有非工人所迨及者讫其成无一不合规模壮大气象雄伟隆然相望闐闐四合军民父老扶携纵观推美诵休曰公诚劳噫公所建立大於此者不可殫纪桥未足多也惟厥经始人徃故常役大用宏谓不可为公决作之未既累月十世之利卒号有济人乃大服推是而言则天下事有可以为而又以为不可为者独桥欤彼能者处之虽若不可以为而卒为之以成者又独桥欤公名正志字志道南徐人左文林郎建康府观察推官丘崇记】开禧元年丘公崇来为留守重建桥刘叔向为之记【金陵为古天险之区域郭宫室凡几变矣而秦淮则犹故也跨淮而济者有桥曰镇淮在吴为南津大桁在晋为朱雀航曰饮虹在晋宋间为万岁桥据都邑之冲屹波流之湍车马如云千艘鳞鳞北拱行阙鲸卧虎蹲此二桥者盖与秦淮相终始而邦人所恃以为安也岁在己丑今留守敦学侍郎丘公以抡魁入幕府覩斯桥之将颠毅然取而更造之规模调度有公所述丰碑在焉後三十五年绾麟符而来则桥非旧矣乃庀工度材彻旧架新纵横广袤一视前日惟剏二祠於镇淮之上渐复晋人铜雀观之遗意而两亭各浚巨井以济民之乏经始於嘉泰甲子十月庚戌明年乙丑三月丁卯桥成会其费为缗钱万四千有奇而鎔铖不以累诸人也嗟乎物之兴废岂偶然哉韩文公记王中丞新修滕王阁有曰此屋不修且坏前公为从事此邦适治新之公所为文实书在壁今三十年而公来为邦伯又易新之维此二桥与滕王阁之事适相似然惜不得当代宗工钜儒如文公者大书特书之尔开禧改元三月望从事郎建康府观察推官刘叔向记】宝佑四年桥坏於潦留守马公光祖重建之梁椅为之记【周夏官掌邦政而其属有司险以成桥梁郑大夫能整比其国至褰裳溱洧者輿之则谓之不知政金陵故有桥曰镇淮曰饮虹雄跨秦淮淮水集涧谿贯城邑以达於江奔流驶湍冲撼激射雨甚势益横不可俯而车马憧憧无停晷商人戍夫与诸道贡输之入於饕餮者舳舻戛摩桥不得休息大抵亡虑数十年辄弗支宝佑乙卯东阳马公自户部尚书出镇越明年修戎器缮闔舰剏游击营而奎翰之堂邮传之舍掾史之居哲人胜士之流风余址诸凡经度以序即功向二桥适同圯於潦公不移日召匠飭材以通判何君宗姚莅铢寸从官出工人欢趋岁十月桥成修广如其旧加坚缮焉万舟萦环遥岑掩映如巨鳌鼉负冠山以与阳侯角武而争雄也东西行者胥咨嗟咏歌以德公赐噫公之德於民独桥哉桥余事也然过都越国往往倾陔刈阡听民揭且厉水怒至即相望如万里隔间起而图之则又以其隐民者厉民故君子於以占政焉天地间运动流行一精神耳人以精神为事业则栉比而髮理枢旋而户随钜纲细目畴不在精义利用中公表里忠勤炯炯心目环吾土皆若车辙马迹朝夕至者桥诘足烦公咄嗟哉然尝观留侯客下邳间从容步游圯上而老人者以兵法授之迄持以兴汉兹岂适相邂逅然耶凭高而眺远临流而观逝子房於是志念深矣是邦一瞬关河公方蚤夜秣马厉兵思系单于颈献阙下而桥西直天堑东挟龙蟠志士忠臣过而生慨安知无衣褐之翁跪履之子把六韬三略往来论议其上将赴公精神以济登四海焉亦如此桥矣试以斯文招之门生从政郎

差充沿江制置使司干办公事梁椅谨记门生朝奉郎差充沿江制置使司参议官胡居仁谨书并题盖】六年桥毁於火留守赵公与?重建

饮虹桥一名新桥在凤台坊

考证建康实录南临淮有新桥本名万岁桥後改名饮虹新桥乃吴时所名至今俗呼为新桥袭其旧也乾道五年史公正志重建上为大屋数十楹极其壮丽与镇淮桥并新丘崇记之开禧元年丘公崇重建刘叔向记之宝佑四年马公光祖重建梁椅记之镇淮桥每与此桥同建诸记并附镇淮桥下兹不复载

日华桥在行宫城东华门跨护龙河

月华桥在行宫城西华门跨护龙河景定二年马公光祖重建

东虹桥在行宫之左府治之北景定二年马公光祖重建自书桥榜

西虹桥在景定桥北运司东景定二年马公光祖重建自书桥榜

景定桥在永宁驿北旧名清化俗呼为闪驾桥景定二年马公光祖重建改今名自书榜跨运渚

太平桥在运司西南旧名钦化俗呼为笪桥景定二年马公光祖重建改今名自书榜跨运渚

鼎新桥在太平桥西旧名小新景定二年马公光祖重建改今名自书榜

乾道南北二桥在古运渚上今斗门桥北二桥相望乾道中洪公遵建景定二年马公光祖重建自书榜斗门桥在乾道南桥之南景定二年马公光祖重建自书桥榜跨运渚

武定桥在镇淮桥东北淳熙中建景定二年马公光祖重建自书桥榜

崇道桥在天庆观东景定二年马公光祖重建自书桥榜

武卫桥在天庆观西旧名望僊桥景定二年马公光祖重建改今名自书榜

广富桥在月华桥北跨护龙河景定二年马公光祖重修

武胜桥在府治亲兵教场即北门桥

青溪七桥按实录注最北乐游苑东门桥【乐游苑在覆舟山南桥宜与今散福亭相连】次

南尹桥今潮沟大巷东出度此桥次南鸡鸣桥【即輿地志今所谓新安寺南东出开善寺路度此桥】次南募士桥次南菰首桥一名走马桥次南青溪中桥在湘宫寺门前巷东出度溪有桃花园次南有青溪大桥【今城东北有渠北通玄武湖南行经散福亭桥竹桥抵府城东北角外西入城濠里俗呼为长河即古青溪本在今竹桥西南行五代杨渚於此截溪立城由是青溪半在城外其在城中者岁久堙塞但城东北隅迤邐至上元县治东南上水闸以西一带青溪遗迹或见或隐桥亦不详所在】青溪中桥按建康实录青溪七桥次南中桥今上水闸里俗相传青溪中桥路【齐书始安王遥光反曹虎领军屯青溪中桥陈书隋军陷台城後主与张贵妃俱入井隋军出之晋王广命斩贵妃於青溪中桥即此地】青溪大桥按石迈古迹编实录云东出句容大路度此桥西即陈尚书令江总宅今上元县东南百余步段氏居乃江总宅也桥宜在此宅之东岁久堙废今不复有桥矣旧称青溪九曲盖自玄武湖引水从东北萦回达於秦淮其曲折有九故於其间跨桥有七今城外青溪皆已堙塞桥废久矣惟城内仅存一曲溪上长桥有四皆马公光祖所作也

运渚六桥按实录云孝义桥本名璧子桥次南杨烈桥宋王僧虔观鬪鸭处次南西州桥宜在今笄桥西次南高晔桥建康西尉在此今建兴寺北路东出度此桥宜在今乾道桥左右次南禅灵寺桥对禅灵渚宜是今斗门桥按建康实录注古城西南行者是运渚古城苑城也吴大帝赤乌三年使御史郗俭凿城西南自秦淮北抵仓城名运渚即此渚是也今宫城西北兴严寺前有沟迤邐至清化市东乃古运渚但自此西南悉堙塞不复可辨虽东南为宫城西堑疑非古迹然由宫墙堑至清化桥西折过钦化桥再南则运渚旧迹复见今乾道桥一带河是也六桥所在亦可髣髴得其次第清化桥即闪驾桥钦化桥即笄桥今桥与名皆非旧矣闪驾桥为景定桥钦化桥为太平桥皆马公光祖之所重建详见於前

飞虹桥杨文公谈苑云徐常侍铉仕江南日尝直澄心堂每襆被入直至飞虹桥马辄不进裂鞍断辔箠之流血掣缰却立铉贻书於余杭沙门赞宁答云下必有海马骨水火俱不能毁惟泓以腐糟随毁者乃是铉斲之去土丈余果得巨兽骨上脰可长三尺脑骨若断柱积柴焚三日不动以腐糟才泓之遂烂焉南唐有虹桥小虹桥飞虹桥皆傍宫桥也

南渡桥李白与酒客数人棹歌秦淮往石头访崔四侍御诗云舍舟共连袂行上南渡桥乃秦淮上桥也今不详其处

张侯桥吴张昭所造故名之晋义熙六年卢循焚查浦进至张侯桥其地在今城南不详其处

赤兰桥杜祭酒别传曰桓宣武館於赤兰桥南曰延贤里今城南有赤兰坊桥不详其处

长乐桥唐秦淮上有长乐桥又曰长乐渡在县东南六里今桐林湾是其地隶长乐坊

狮子桥在城北湘宫寺北

回龙桥在城西门

白下桥一名上春桥在城东门外其侧有白下亭重建桥记【金陵为六朝故都风土遗迹历历可考自上元县治东行里许有桥曰白下白下之义访诸故老无传焉宋元徽间征北将军张永屯白下唐武德中迁金陵县於白下村其地盖在东晋白石垒之下也国朝自六飞南驻以是邦为陪都白下一桥当江浙诸郡往来之冲不惟士夫民牧所必经行而日饮万马於秦淮旬给诸屯之粮饷舍此无他道也旧架木为之岁久朽蠹若将压焉人以病告前後邑宰熟眎而不敢为三衢郑君缉视事之初窃鄙前人作计之不远毅然欲取而更新之未几运石山积下筑万桩曰吾将以石易木为千百年不朽之利观者且喜且骇疑不克就甫五阅月而桥成长鲸卧波飞梁驾虚材良石坚天造地设虽怒涛激湍疾风甚雨而过者如登康庄得大安稳旁有宾饯之亭因桥而名亦就摧剥并葺治之更增其前楹三雄壮窈深气象夔别上元为邑赋第一孔以上悉输州家倾囊倒布力弗能继谒诸阃台得緡钱合二千米斛百自嘉泰癸亥九月壬午首事明年二月戊午讫工会其费为钱几四百万顾不轻矣而十八乡之民曾不与知虽畚鍤负不烦一人既成或者以白下之语不宜於举子请更之留帅文昌李公名以上春权也呜呼桥梁不修汉薛宣歉然於彭城之政徒杠舆梁易事也子产之智不及之郑君垂大惠於笑谈间是可书也因其请故不复辞嘉泰四年三月望日从事郎建康府观察推官刘叔向记】

长干桥在城南门外五代杨溥城金陵凿濠引秦淮遶城西入大江遂立此桥

铜桥在城东一十里按五代史李昇天祚三年十一月以步骑八万讲武於铜桥今字作桐讹也

高桥在城东一十五里属上元县长乐乡

考证金陵故事云梁乱庾信为建康令守朱雀门衆潰台城门已闭信走羈旅於此桥信有哀江南赋云高桥羈旅是也石迈古迹编云皋桥旧名高桥按庾信哀江南赋注云吴郡图经以皋伯通所居因名其桥曰皋後人转皋为高

南史齐徐嗣徽等复入丹阳至湖熟陈高祖追侯安都安都率马步拒之於高桥记室新书云高桥羈旅之士按郡国志云通门内有桥即汉皋伯通居此桥以得名梁鸿赁舂之所是吴自有皋桥在建康者乃高桥也庾信赋南史皆曰高崔令钦注石迈古迹编易高为皋绍兴十七年本县新治桥路易榜曰皋桥因承其误失於不考耳

石步桥在城东北四十五里即古罗落桥也

考证宋高祖起义丹徒进至罗落桥遇皇甫敷檀凭之战死即此地下有罗落浦北入大江又有罗落坊罗落干罗落山皆在其处今石步酒坊名罗落坊

钱公桥即章桥以西接张山亦曰张桥在府城东北五十七里上元句容二县以此桥为界

考证建炎元年高宗皇帝幸建康次张桥山水暴溢堤啮桥坏势甚可畏转运副使李谔黄崇

书被劾俱罢见孙覿所撰李谔行状淳熙十一年钱公良臣易为石桥运使赵公师揆榜曰钱公桥乾道志以为古罗落桥者非也余见石步桥

复古桥属上元县长乐乡去县十四里宣和间赐鍾茅山经此地桥损堙塞久不修复春夏塘水壅遏民颇病涉绍兴十年县治桥路因创复之改名复古桥

葛桥在上元县崇礼乡方山东南按齐书李安民传宋建安王景素反安民破景素於葛桥

墅城桥在城东三十里即晋谢玄别墅之所

檀桥在青溪按齐书刘瓛以儒学冠於当时京师士子贵游莫不下席受业瓛住在檀桥瓦屋数间上皆穿漏学徒敬慕不敢指斥呼为青溪

亭子桥在上元县清风乡黄城之东徐铉栖霞寺新路记云建高亭於路周跨重桥於川上即此桥也里俗呼为亭子桥去栖霞寺三里今土桥危险夏潦则民皆病涉

周郎桥在城东八十里上元县丹阳乡湖熟镇下临横塘【旧志】

考证石迈古迹编云旧传周瑜尝至此按吴书瑜渡秣陵破笮融薛礼转下湖熟此桥正通秣陵必瑜当时经历之地【马野亭诗周郎可是世英豪谈笑功成乃不劳尔日阿瞞犹避此兹时小寇定应逃双鞬锦领纷相逐大羽青丝各自操料得军行争看此霜天健鹞已辞绦】

土桥在城东七十五里

西流桥在城东北三十里

东流桥在城东北四十里

安济桥在城东北四十里即东流市桥淳熙十二年钱公良臣重修改今名

韩桥在城东北三十里

白水桥在城东北二十里

杨堰桥在城东二十里

走马桥按建康实录走马桥东有燕雀湖里俗相传今府治之东斜桥即走马桥也桥之东有水平澗是为燕雀湖或云惟政乡白荡湖即其地

右隶上元县境

板桥在城南三十里

考证吴後主闻晋师将至甚惧乃自选羽林精甲以配沈莹孙振等屯於板桥晋使王濬總蜀兵沿流直指建业司马佑帅六军济自三山遣周浚张乔等接战破吴军於板桥莹等皆遇害金陵故事云晋伐吴丞相张悌死之悌家在板桥西 建康实录云晋简文帝尝与桓温及武陵王曦同载游於板桥温遽令鸣鼓吹角车驱卒奔欲观其所为曦大恐求下车帝安然无惧色温由是惮服 梁武帝起兵令吕僧珍与王茂进军於白坂桥非此也【李白诗天上何所有迢迢白玉?斜低建章阙耿耿对金陵汉水旧如练霜江夜清澄长川泻落月洲渚晓寒凝独酌板桥浦古人谁可徵元晖难再得洒洒气填膺曾极诗轮转千年路欲迷板桥名在市朝非元晖太白微吟处独酌悠然命驾归】

新林桥在城西南一十五里扬州记云金陵南沿江有新林桥即梁武帝败齐师之处

白坂桥在城南

考证按梁吕僧珍传武帝次江寧僧珍与王茂进军於白坂桥筑垒垒立茂移顿越城僧珍犹守白坂

秣陵桥在城东南五十里

五城桥唐景云中造以渡淮广明元年废於火南唐保大十年重造国朝开宝八年又废详见五城

杜桥在城东南三十里

江宁桥在城南六十里临江宁浦

木龙桥在城南七十里

河亭桥在城东南一十五里

马务桥在城东南二十五里唐置马务於此

真武桥在城东南三十七里

令桥在城东南七十里临令水

乌刹桥在城东南九十三里

牧马桥在县东南三十九里南朝放牧者在此南出有浦水濶三丈深一丈有桥

右隶江宁县境

白鹤桥在县东南三里一十五步茅君内传云大茅君每年十二月二日驾白鹤於此会诸真故以名桥沈公桥在县南二十五里沈公谓沈庆之也

赭渚桥在县东一里二百四十一步

归善桥在县南一里一百七十五步

於乡桥在县南二十五里

西霸桥在县南三十二里

降灵桥在县东南二十七里

义城桥在县南二十里

高平桥在县西南三十五里

斜桥在县东五里

柳桥在县北二十五里有前柳桥後柳桥

悬毒桥在县西十五里

宣家桥在县西北三十里

永安桥在县南十里下有小港归於秦淮

降真桥旧记云在玉晨观西句容路三十里桥是也芦堰桥在县南三十里

集僊桥在县南有诗石可考【游冠卿题县之南桥作於元丰之三年元佑改元之秋岁适大水輿梁为之辄坏往来病涉愁叹满道乃请於府而新之购材董役未踰月而功就而桥素无题榜因其路入三茅遂以集仙名之且为小诗以记岁月兴废云南桥颓废长官差新作川梁代济舟上应星文横北极下飞虹影落中流惭无子产乘輿惠漫絶襄公弗道忧路接蓬山仙

世界品题今为邑人留予旧岁得集仙桥诗石上段於平易堂墙南角惜其不全好今年六月十六日风雨终夕又得石下段於堂之西破墙底因粘缀成文并以旧年筑地所得龟趺坐此石然隐伏显露虽各以时向使子不先得之顾今断石将安用焉特不过础柱砧衣且桥屋七间工役浩大而輿梁之复未知何日观是诗者可以知邑之事力视昔不侔云又四日记】

右隶句容县境

临淮桥一名惠政桥在县南二十步下即秦淮水也旧图云临淮桥前任司马公重建兵火烧毁复造土桥景德二年知县史良率衆钱重造版桥旧名浊水桥绍兴八年李朝正重建石桥嘉定五年坏於暴涨知县汤诜重建石桥榜曰惠政卓田为记

通济桥在县南二十五步旧有刘公攸所为记至绍兴八年知县李朝正重建石桥李南寿作记

巫家桥在县寨外三百步

栖贤桥在县南门外西南

易俗桥在县市

望京门桥在县北一里

南门桥在县南门外皇佑间邑人刘应之重建石桥僧从雅作记刻石

唐家桥在县市西二百五十步

楼家桥在县南门外二百七十步

马沉桥在县南去县三十七里

利涉桥在县北三里俗呼虎扞桥

安政桥在县北三里俗呼翻车桥

戴公桥在县南一十里

俞初桥在县南一十里旧图作俞母桥

大觉寺桥在县东南八里

莆塘桥在县南二十五里今废

白沛桥在县东北三十五里

长乐桥在县东北二十五里

李墅桥在县东北三十里

张墅桥在县东北三十里

段亭桥在县东六里

板阁桥在县东二十五里

王师桥在县东三十三里

神靖桥在县东南四十三里旧名神龙桥知县李公朝正易今名

白马桥在县东南四十里

梅塘桥在县东南一百二十里

邓步桥在县东南一百二十里

张沛桥在县东南八十五里

永昌桥在县南九十里旧图云呼为固城桥

漆桥在县南七十五里

马墅桥在县西一十五里

石埭桥在县西三十五里

汤桥在县西四十里

孟桥在县西三十五里

钱埭桥在县南三十五里

许村桥在县东南一十二里

右隶溧水县境

砚渎桥在县东北相传云晋谢公淶砚於此

东石桥在县东门外

新建桥在县南门外

谢家桥在县东

通微桥在县东南一里

僊人桥在县南十五里

南崑仑桥在县东南十八里

北崑仑桥在县北十里

乡党桥在县南三里

高要桥在县南二十五里通广德军路

高友桥在县南三十里

故县桥在县东南一十五里

青安桥在县西三里

平陵桥在县西北三十里今俗呼湖渎桥或名沙滩桥平陵城在桥西一里

奉桥在县南五十里

上兴步桥在县西北六十里

黄连步桥在县西北五十五里

舒塘桥在县西北五十五里通溧水县大路

板子桥在县西北六十里舒塘桥北

破堰桥在县西北六十里板子桥北

雨城桥在县西北六十五里破堰桥北

檀石桥在县北六十里

三了桥在县南四十里

石塘桥在县北二十里

望僊桥在县南一十里

社渚桥在县西南六十里

望婆桥在县西南五十里

横涧桥在县东南六十里

金皆桥在县南六十里

双涧桥在县西南五十里

招僊桥在县西三十里

斗门桥在县北二十里

冯塘桥在县北二十里

虎塘桥在县东北四十里

豆桥在县南二十里

张野桥在县南二十里

湖桥在县西一十八里

僊桥在县南六十里

王堰桥在县西南二十五里

洪桥在县西南六十五里

塘路桥在县北十五里

徐塘桥在县西二十七里

徐桥在县西北三十五里

南阳桥在县西四十里

西里桥在县西南六十里

春雨桥在县东旧曰东市桥嘉定十四年三月知县陆子通重修

西市桥在县西

璧桥在县北六十里祥符润州图经云径渎濶一十步县西十三里长塘湖北口至江宁府溧阳县三十七里春夏水深三尺胜五十石舟秋冬深一尺胜二十石舟隋大业末宣州永世令达奚明因晋宋之旧加疏决为桥璧甃两岸取其坚固今桥在溧阳县界

嘉定桥在县西北四十里陵跨中江本名中江桥俗名中桥或呼为通江桥唐开元中县令乔翔尝创浮梁本朝元佑三年建桥曰衆乐倾圯久之公私病涉庆元中县丞周文璞奉檄兴剏伐石粗集而不果成嘉定十一年俞运使建行部命县尉赵时颂重建改今名

右隶溧阳县境

二十四航旧在都城内外即浮桥也

考证按輿地志云六朝自石头东至运渎总二十四渡皆浮航往来以税行直淮对编门大航用杜预河桥之法本吴时南津大桥也一名朱雀桥当朱雀门下渡淮水王敦作逆温峤烧絶之今皆废【杜牧有诗青山隐隐水迢迢九月江南草未凋二十四桥明月夜玉人何处教吹箫 杨虞部诗青雀浮航夜照波星繁云静月华多江楼人凭栏干立直下天心耿耿河】

四航皆在秦淮上曰丹阳曰竹格曰朱雀曰骠骑考证按实录晋宁康元年诏除丹阳竹格等四航税注云王敦作逆从竹格渡即此航也朱雀航本吴时大航骠骑航在东府城外渡淮会稽王道子所立并丹阳郡城後航总为四航 今四航皆废镇淮桥即朱雀航旧所也详见桥类【杨虞部诗桥上层楼楼上梯秦淮两?绿杨堤春风影动波光碎翬翼孤飞雀并栖 马野亭

要问当时朱雀航秦淮岸口驾浮梁既为铜雀施重屋又作璇题揭上方波底净涵楼阁影桥闲望断水云乡不知此处今何在须有遗基在两旁】

津渡

石头津在城西方山津在石头津之东

考证隋食货志云郡西有石头津东有方山津各置津主一人曹一人直水五人以检察禁物及亡叛者

龙安津在城西北二十里与真州宣化镇相对今为靖安渡

南津在城西南

考证金陵故事云南朝置校尉以镇此津侯景入寇举朝无殉难之夫惟校尉江子一与弟二人同死王事梁书江子一尝为南津校尉

五马渡在上元县西北二十三里幕府山之前晋元帝与彭城等五王渡江处按晋书太安之际童谣云五马浮渡江一马化为龙及永嘉中元帝登大位乃其符云五马之名取此【曾极诗仲達欺孤与操同岂能长世抚提封瑶图暗换君知否班特浮江自化龙
杨备诗何事金陵王气鍾琅邪开幕?江東舟人忽见风云起一旦龙飞五马中】

麾扇渡在朱雀航之左

考证晋太安二年广陵相陈敏据建业顾荣密报刘準率兵临江敏令甘卓屯横江荣与周玘因卓兵断桥尽收船於淮水南敏自出军临大航岸荣以白羽扇挥之其军自溃因以为名【杨虞部诗旌旗烁日刃凝霜甲马如龙人似狼羽扇一麾风偃草策勲多谢頤丹扬 马野亭诗此扇拈来一羽轻如何退得十千兵百年雨露蒙君赐一日衣冠繫贼营正欲倒戈为向背远观挥手极分明而今但得旌旗白便可中原取次行】

五城渡在上元县东二十五里

考证晋王敦死王含钱凤乃率余党自栅塘西置五城造营按图经五城如却月势高二丈相去各二十丈 陶季直京都记五城边淮带湖祖道送归多集此处
唐景云中县令陆彦恭於城侧造桥度淮水即今之五城渡也

竹格渡按建康实录王敦作逆从竹格渡即此航也在今县城西南二里【輿地志云两岸要冲处并以航济西自石头东至征虏亭凡二十四所平陈惟此渡独存今旧桥西是其处】

马家渡在府界上

考证皇朝中兴编年纲目载云采石江濶而险马家渡江狭而平两处相去六十里皆与和州对?昔金人南侵直犯马家渡则此渡比采石尤为要害今分上下二渡

张公凸渡在上元县金陵乡长庆村之西正临大江与真州六合县梅家步相对自张公凸渡至南岸夏四十里冬五十里

考证石迈古迹编云隋文平陈宇文述以行军總管自六合济即此也今皆严备

堰埭

浮山堰庆元建康志云在城东南二十里梁天监十三年筑

考证按梁史天监十三年用魏降人王足计欲以水灌寿阳乃假太子左卫康绚节督卒二十万作浮山堰於鍾离不知何所据也今志云在建康

杜桥堰在城南三十里长五里濶一丈五尺堰杜桥浦水

真武桥堰在城南三十七里长三里濶二丈堰浦水通秦淮

牧马桥堰在城西南七十里长三里濶二丈五尺堰牧马浦水

百堰堰在句容县西南三十五里通秦淮属上元县界与福祚乡相接

黄城堰在句容县东三十里长一里深四丈灌田三百亩

陶堰在句容县南六十里其堰逐年填塞不能瀦水属临泉乡五都

范家堰在句容县西北三里湾曲长二里深四尺灌田二百亩在通德乡第二都

周戴新堰在句容县南一十五里通百堰堰

於家堰在溧水县南九十里长一十里

银林堰在溧水县东南一百里长一十一里即鲁杨五堰也

考证按前汉地理志丹阳郡芜湖注云中江出西南东至阳羨入海後汉郡国志芜湖中江在西又水经云中江在丹阳芜湖县南东至会稽阳羨县入於海孔穎达书义疏亦引汉史为证

今芜湖县南有支江俗称为县河经县市中东达黄池入三湖三湖丹阳顾城石臼湖也至银林正所谓中江东至阳羨即此也苏常承此下流常病飘没故筑银林五堰以窒之自是中江不复东而宣歙皆由芜湖西出达於大江故滨湖之地皆堤为圩田中江亦渐隘狭故老云当时虑後人复开此道则苏常之间必被水患遂以石砌五堰路又液铁以固石故曰银淋今讹为林

分水堰在溧水县东南一百里长一十五里

若李堰在溧水县东南一百五里长八里

何家堰在溧水县东南一百一十里长九里

余家堰在溧水县东南一百一十五里长一十里春冬载二百石舟

考证昔吴王阖闾伐楚因开此渎运粮东通太湖西入长江南唐书杨行密据宣州孙儒围之五月不解行密将台蒙作鲁阳五堰拖轻舸馈粮故军得不困卒破孙儒鲁阳者即於家等五堰是也故道尚存

百坡堰在溧水县西北一十里长一里濶一丈五尺竹墩堰在溧水县西北二十五里长一里濶一丈五尺乌利堰在溧水县西北四十里濶一丈八尺

青泥堰在溧水县南九十五里长十里

龙盘堰在溧阳县北六十里檀口桥前长一十步【阙】堰在溧阳县西南二十五里

鷄鸣埭建康实录青溪有桥名募士桥桥西南过沟有埭名鷄鸣埭齐武帝早游鍾山射雉至此鷄始鸣图经云今在青溪西南潮沟之上又按南史齐武帝数幸琅邪城宫人常从早发至湖北埭鷄始鸣故呼为鷄鸣埭若尔其埭又当近北父老传云今清化市真武庙侧是其处也二埭恐皆当时所历姑两存之【杨虞部诗辇出城时鸡未鸣春罗蝉翼赭袍轻蒙尘猎骑奔如电到此闻鷄第一声马野亭诗台城五里到青溪埭在青溪西复西向日只缘贪射雉当时过此始鸣鸡鸟翬用处亦无茂羽翮贡来谁敢稽更是游观须有节如何晨夕恣荒迷】

方山埭建康实录吴赤乌八年使校尉陈勲发屯田兵於方山南截淮立埭号方山埭又按南史湖熟县方山埭高峻冬月行旅以为难齐明帝使沈瑀修之瑀乃开四洪断行客就作三日便办其地今去城西四十五里栢冈埭赤山湖埭也宋元凶传决破栢冈方山埭以絶东军亦曰栢冈堰

南埭今上水闸也王荆公赠段约之诗云闻君更欲通南埭割我鍾山一半青正对今青溪阁

长溪埭在城南五十里濶二丈堰秣陵浦水通秦淮破岗埭按建康实录吴大帝赤乌八年使校尉陈勲作屯田发兵三万凿句容中道至云阳以通吴会船舰号破岗渚上下一十四埭上七埭入延陵界下七埭入江宁界於是东郡船舰不复行京江矣晋宋齐因之梁以太子名纲乃废破岗渚而开上容渚在句容县东南五里顶上分流一源东南流三十里十六埭入延陵界一源西南流二十六里五埭注句容界上容渚西流入江宁秦淮至陈霸先又堙上容渚而更修破岗渚隋既平陈诏并废之【以此知六朝都建康吴会漕输皆自云阳西城水道接至都下故梁朝四时遣公卿行陵乘舴艋自方山至云阳谢灵运为永嘉太守隣里相送於方山徐陵上容路碑有云涛如白马既碍广陵之江山曰金牛用险梅湖之路莫不欣兹利涉玩此修渠云阳今丹阳县】

县埭在溧水县东南八十里长二里濶二十里与溧阳县分界其埭上下有二????上一派西北入县界

景定建康志卷十六

卷十七

<史部,地理类,都会郡县之属,景定建康志>

钦定四库全书

景定建康志卷十七 宋 周应合 撰

山川志序

疆域帝王之所定也山川天地之所作也金陵未邑秣陵未县建邺未都之前或言地有王气或言有天子气非山川融结气何所指哉汉建安中诸葛亮曰鍾阜龙盘石城虎踞真帝王之宅张紘亦曰金陵地形有王者都邑之象自孙权之国江东以至我朝之建行阙帝王都邑实印斯言【秦皇时望气者言金陵五百年後有天子气乃断其连冈长陇疏水为淮将以泄其气也自是四百九十年而晋元帝渡江中兴江左适符望气者所言之数是知天地所作岂人力所能变哉】尝以山川形势验之鍾山来自建邺之东北而向乎西南大江来自建邺之西南而朝於东北由鍾山而左自摄山临沂雉亭衡阳诸山以达於东又东为白山大城云穴武冈诸山以达於东南又东南为土山张山青龙石碓天印彭城雁门竹堂诸山以达於南又南为聚宝山戚家山梓潼山紫岩夏侯天阙诸山以达於西南又西南绵亘至三山而止於大江此亮所谓龙盘之势也由鍾山而右近之为覆舟山为鷄笼山皆在宫城之後【东南利便书曰吴太初宫晋太初宫及我朝宫城皆北接覆舟山之麓牛首在其前即王导所谓天阙是矣】又北为直渎山大壮观山四望山以达於西北又西北为幙府卢龙马鞍诸山以达於西是为石头城亦止于江此亮所谓虎踞之形也其左右羣山若散而实聚若断而实续世传秦所凿断之处虽山形不聯而骨脉在地隱然相属犹可见也【左则方山石碓山之间右则卢龙山马鞍山之间耆老相传皆以为秦始皇凿断长陇之所】石头在其西三山在其西南两山可望而挹大江之水横其前秦淮自东而来出两山之端而注於江此盖建邺之门户也覆舟山之南聚宝山之北中为寛平宏衍之区包藏王气以容衆大以宅壮丽此建邺之堂奥也自临沂山以至三山围绕於其左自直渎山以至石头泝江而上屏蔽於其右此建邺之城郭也【杨万里诗云周遭故国是山围对景方知此句奇偶上伏龟楼上望一环碧玉缺城西】玄武湖注其北秦淮水遶其南青溪萦其东大江环其西此又建邺天然之池也【龙川陈亮论建邺形势东环平冈以为安西城石头以为重带玄武湖以为险拥秦淮青溪以为阻是以王气可乘而运动如意昔人诗咏石头城有山围故国潮打空城之句则石头城实临大江今大江远石头玄武涸为平田青溪九曲仅存其一非同昔日也】形势若此帝王之宅宜哉然自越以来千七百年山川不改城郭屡更人因地乎地因人乎昔周公定都洛邑曰有德者易以兴岂专恃乎山川哉山川不可以无考耳作山川志山川志一

山阜

鍾山一名蔣山在城東北一十五里周回六十里高一百五十八丈東連青龍山西接青溪南有鍾浦下入秦淮北接雒亭山漢末有秣陵尉蔣子文逐盜死事於此吳大帝為立廟封曰蔣侯大帝祖諱鍾因改曰蔣山案丹陽記京師南北并連山嶺而蔣山迢嶢嶷異其形象龍實作揚都之鎮諸葛亮云鍾山龍盤蓋謂此也【舊志】事迹金陵地記云秦始皇時望氣者云金陵有天子氣乃埋金玉雜寶於鍾山又云蔣山本少林木東晉令刺史罷還都種松百株郡守五十株宋時諸州刺史罷職還者栽松三千株下至郡守各有差

庾闡揚都賦云元皇帝渡江之年望氣者云蔣山上有紫氣時時晨見

晉謝尚齊朱應吳苞孔嗣之梁阮孝緒劉孝標并隱於此

山謙之丹陽記曰出建陽門望鍾山與覆舟似上東門首陽之與北邙也宋散騎常侍劉勰經始鍾嶺之南以為棲息聚石蓄水朝士雅素者多從之游又雷次宗元嘉中開館鷄籠山文帝為筑室於鍾山西岩下謂之招隱館齊周顒亦於鍾山西立隱舍遇休沐則歸仍造草堂寺以處僧慧納寺即顒之所居也後顒出為海鹽令孔稚圭作北山移文以讥之

梁武帝於鍾山西置大愛敬寺江表上已多游於此

侯景反邵陵王綸率西豐公大春等馬步三萬發自京口直據鍾山景黨大駭具舟欲逃阮孝緒因母疾用藥須得生人侵舊傳鍾山所出孝緒躬歷幽險累日不獲忽一日鹿前行至一所遂不見就求之果得沈約郊居賦曰惟鍾岩之隱郁表皇都而作峻蓋望秩之所宗含風云而吐潤又應教詩云靈山紀地德險峭資岳靈又云勢隨九嶷高氣與三山壯

寰宇記云自梁以前立佛寺七十所今存者六陳大寶元年齊軍於秣陵故縣跨淮立柵引渡兵馬周文育侯安都頓白土崗旌旗相望齊軍潛至鍾山龍尾進至幙府山皆此地也

後主與張機游是山常以松枝代麈尾故梅摯詩有千松麈尾之句

唐地理志江南道其名山衡廬茅蔣大历中處士韦渠年亦隱於此号遺名子顏真卿題其所隱之堂曰遺名先生三教会宗堂李白登梅崗望金陵詩有云鍾山抱金陵霸氣昔騰發內有定林庵荆公王安石嘗讀書於此【本下定林寺寺記云宋元嘉中建上定林在寶公塔東下定林在上定林西今皆廢】米元童榜曰昭文齋李伯時寫荆公真像於壁楊次公為之贊荆公詩云定林修木老參天是也今獨庵屋數間余皆不存庆历中大宋叶清臣嘗游鍾山之岩住八功德水

後半嶺間可容數人公字道卿因名道卿岩張文潛云予自金陵月堂謁蔣帝祠初出北門始辨色行平野中時暮春人家桃李未謝西望城濠水或流或絕多鵲鵲白鷺迤邐傍山風物天秀如行錦綉圖畫中旧讀荆公詩多稱蔣山風物信不誣矣

陳軒金陵集云鍾山寶公塔名玩珠取龍玩珠之義梅摯詩云珠峰塔影孤其山峰最秀者有屏風嶺巧石青林幽邃如畫在明庆寺前山之東有八功德水在悟真庵後梅摯記云梁天監中有胡僧寓錫於此山中乏水時有脰眉叟相謂曰予山龍也知師渴飲措之無難俄而一沼湧出後西僧繼至云本域八池已失其一自梁以來嘗取給御府寺僧云飲之可以愈疾又寶公塔西二里有洗鉢池興國寺西有道光泉以僧道光穿斷得名曰宋熙泉近宋熙寺之側寺東山嶺有定心石下臨峭壁寺西百余步有白蓮庵庵前有白蓮池乃策禪師退居之所又北高峯絕頂有一人泉仅容一勺多挹之不竭皆山之勝處也

石頭山在城西二里案輿地志環七里一百步緣大江南抵秦淮口去台城九里自六朝以來

皆守石头以为固以王公大臣领戍军为镇其形胜盖必争之地云【旧志】事迹宫苑记云周显王三十六年楚威王灭越置金陵邑即石头城江乘地记云石城山岭嶂千里相重若一游历者以为吴之石城犹楚之九疑也山上有城因以为名後汉建安十六年吴孙权乃加修理改名石头城用贮军粮器械今清凉寺西是也诸葛亮云石头虎踞真帝王之宅丹阳记石头城吴时悉土塼义熙初始加砖累甃因山以为城因江以为池地形险固尤有奇势亦谓之石首城范晔有初发石首城诗六朝记云吴孙权沿淮立栅又於江岸必争之地筑城名曰石头常以腹心大臣镇守之今石城故基乃杨行密稍迁近南夹淮带江以尽地利其形势与长干山连接晋伐吴王濬以舟师沿江而下自三山抵石城刘梦得有王濬楼船下益州一片降幡出石头之句晋室中兴常为险要必争之地谢尚赐輶车鼓吹戍石头

王氏举兵明帝以温峤守石头石城之东有巨石俗呼为塘冈乃王敦害周伯仁戴若思之处按建康实录晋元帝永昌元年敦收周顗戴渊杀於石头城东塘颓石上百姓冤之今记其处苏峻据石头王师既集峻攻大业垒陶侃将救之殷羡曰若救大业步兵不如峻但当急攻石头峻必救之大业自解侃从之峻果弃大业而救石头孙恩至京口元显守石头安帝时宋高祖北讨徐道覆卢循乘虚而出帝即班师四月至都帝曰贼衆我寡分其兵则测人虚实若聚衆石头则衆力不分遂移镇石头义熙六年发居民治石头城

宋文帝登石头城极望谓江湛曰向使檀道济在虜敢犯吾境邪石头仓城在石头城内宋元嘉二十七年魏人至瓜步丹阳尹徐湛之守石头仓城沈攸之事起齐高帝入朝堂遣戴僧静将腹心至石头经畧袁粲时苏烈守仓城门僧静射书与烈夜缒入城

宋大明中以其地为离宫景和元年修为长乐宫昇明中司徒袁粲出镇於此

齐武帝为世子即以为世子宫後多以诸王镇之梁侯景反陈武帝与诸军进景登石头城望官军之盛不悦乃以舡贮石沉塞淮口缘淮作城自石头迄青溪十余里楼雉相接帝於石头城西横壠筑栅直出东北悉力乘之景遂大溃

王僧辩讨侯景督衆军沿流而下进军於石头之斗城

安陆王大春以宁远将军领戍军事於石城徐嗣徽招北齐兵至阙下柳达摩等保石城陈霸先於石头南北岸絶其汲路又堙塞东门城中诸井达摩请和许之霸先陈兵石头南门送齐人北归及至皆杀之以後江边有警必先据石头以为扞御

陈宣帝太建二年其城复加修筑以贮军食

後主祯明元年徐孝克为都官尚书性清素常以石头津税给之隋平陈置为蒋州城辅公祐据江东用为扬州公祐平又於城置扬州大都督府後移扬州於广陵此城遂废唐武后光宅中徐敬业举兵使其徒崔洪渡江修石头以拒守敬业平分军三百人守之寻置为镇仍徙县仓以实之韩滉观察江东西德宗狩梁州乃筑石头五城自

京口至土山修塼壁起建业抵京岷楼雉相望於石头城穿井皆百尺今五城遗址尚存时议者言滉闻车驾在外聚兵石头阴蓄异志上疑之以问李泌对曰滉公忠清俭自车驾在外贡献不絶且镇抚江外十五州盗贼不起皆滉之功也所以修石头者滉见中原板荡为陛下将有永嘉之行为迎扈之备耳此为人臣忠笃之虑奈何更以为罪乎

李錡据润州属别将庾伯良兵三千人筑石头城南徐州记江乘县西二里有大浦发源於石城山东入大江此山与卢龙幕府诸山相连迤邐达於京口

左太冲吴都赋云戎车盈於石头盖谓石城也庾阐涉江赋曰发中洲之曲泝背石城之岩岨

谢灵运撰征赋云次石头之双岸究孙氏之初基

覆舟山亦名龙山又名龙舟山在城北七里周回三里高三十一丈东际青溪北临真武湖状如覆舟因以为名【旧志】

事迹宋书云覆舟山在县东十里锺山西形如覆舟輿地志山在乐游苑内此山与锺山形若断而

脉相连两山之间土中有石垦者不入知其为山之骨也 宋武帝举义兵讨桓玄玄将桓谦屯於东陵卞范之屯覆舟山西以拒之宋武疑有伏兵谓小将刘锺曰此山下当有伏兵卿可率部下往取之锺应声驰进果有伏兵数百一时奔走 元嘉改名玄武山以其在城之北也 陈高祖时齐兵踰锺山高祖衆军分顿乐游苑东及覆舟山北断其冲要齐军至玄武湖西北幕府山南将据北郊坛衆军自覆舟东移顿郊坛北与齐人相对纵兵大战即此地 宣帝太建七年輿驾幸乐游苑采甘露宴羣臣诏龙舟山立甘露亭鲍昭有侍宴覆舟山诗 宫苑记云阊风亭甘露亭瑶台皆在山上

鷄笼山在城西北六七里高三十丈周回一十里輿地志云在覆舟山之西二百余步其状如鷄笼因以为名【旧志】

事迹寰宇记云西接落星涧北临栖玄塘 宋改名龙山以黑龙常见真武湖此山正临湖上故名 元嘉十五年立儒馆於北郊命雷次宗居之次宗因开馆於鷄笼山齐高帝尝就次宗受礼及左氏春秋竟陵王子良尝移居鸡笼山下集四学士抄五经百家为四部要略千卷 晋元明成哀四帝陵皆在山南

幕府山在城西北二十里周回三十里高七十丈按輿地志在临沂县东八里晋元帝自广陵渡江丞相王导建幕府於此山因名焉山上有虎跑泉其西巔有仙人台其北里俗相传即古之宣武塲也【旧志】

事迹寰宇记云在城西北东北临直渚浦西接宝林山南接解浦 山有五峯南接卢龙石头 宋文帝元嘉二十七年魏人入寇至瓜步登幕府山观望形势 三国典略曰齐师伐梁大至於锺山龙尾周文育请战陈霸先曰兵不逆风文育曰事急矣当决之何用古法抽槊上马杀伤数百人齐军乃退屯幕府山又霸先衆军自覆舟东移顿郊坛与齐人相对霸先自率帐内麾下出幕府山南与吴明彻沈泰等首尾击之齐人大溃陈史载武帝破北齐军四十六万於幕府山下即此事也 後主祯明中尝幸此山校猎 宋明帝高宁陵在山西晋王导温峤亦葬山西

卢龙山在城西北二十五里周回一十二里高三十六丈东有水下注平陆西临大江今张陈湖北岗陇北接靖安皆此山也【旧志】

事迹晋元帝初渡江见此山岭绵延远接石头眞江上之关塞以比北地卢龙山因以为名

此山旧与马鞍山相接气势雄包自秦凿为二後置都船场圣妃庙其间至今沟内石骨连焉

马鞍山在城西北十里西临大江东与石头城接高八十五丈以形似得名【旧志】

事迹旧志载陈祯明三年宜黄侯慧纪遣南康太守鲁肃以铁锁横江隋杨素与鲁肃争马鞍山四十余战隋军死者五千人指为此地今考之史传陈无鲁肃慧纪所遣者南康内史吕忠肃也所争马鞍山乃在巫峡间非此地也山名偶同耳详见诸辨

四望山在城西北一十里周回三里高一十七丈东至龙安西临大江南连石城北接卢龙山【旧志】

事迹吴大帝尝与葛玄共登凤凰二年杀司市郎中陈声投於四望山下 晋苏峻反温峤奉陶侃为盟主同赴京师峤於四望矶筑垒以逼贼曰贼必争之设伏以逸待劳是制贼之一奇也

大壮观山在城北一十八里周回五里高二十八丈东连蒋山西有水下注平陆南临真武湖北临蠡湖事迹陈宣帝起大壮观於此山因以为名 太建十一年八月幸大壮观因大阅武命都督任忠领步骑十万阵於真武湖上登真武门观宴羣臣因幸乐游苑设丝竹之会仍重幸大壮观振旅而还

直渎山在城北三十五里周回二十五里高一十七丈旁有直渎洞东西有水流入大江【旧志】

事迹见直渎下

以上诸山皆在鍾山之右自城北绵亘达於城西

临沂山在城东北四十里周回三十里高四十丈东北接落星山西临大江西南有临沂县城

雉亭山在城东北四十里周回六里高五十丈北与旧临沂县相望今隶慈仁乡俗又呼为骑亭山【旧志】

事迹石迈古迹编云旧说齐武帝东游鍾山射雉因以为名或云吴大帝时蒋帝神执白扇乘马尝见形於此故又呼骑亭山

衡阳山在城东北四十五里周回九里高二十九丈在清风乡东临清塘西北有水下湖南接雉亭山【旧志】事迹旧传朗法师尝住此有衡阳神女忽来听讲後遂为此神因名其山曰衡阳今鍾山乡资福院有神像可考

掇山一名繖山盖其状似繖也在城东北四十五里周回四十里高一百三十二丈东连画石

山南接落星山西北有水注江乘浦入摄湖【旧志】

事迹輿地志云江乘县西北有扈谦所居村侧有摄山多药草可以摄生因名焉
江乘记云摄山形方四面重岭 南史齐明僧绍住江乘摄山後舍宅为寺今栖霞寺是也山有千佛岭按江總栖霞寺记明僧绍居士之子仲璋为临沂令於西峰石壁与度禅师镌造无量寿佛大同六年龕顶放光齐文惠太子豫章文献王竟陵文宣王始安王及宋江夏王霍姬齐田免?琢造石像梁临川靖惠王复加莹饰岭中道有沈传师徐铉张稚圭王雱等题名
梁绍泰中陈霸先与齐师战大败之追奔至摄山虏萧轨诛於城下即此也
陈後主与江總同游有诗 陈轩所集金陵有怀摄山十题曰白云庵清风轩唐公岩天开岩宴坐台中峰润明月台品外泉醒石磬石

白山在城东三十里周回八里高八十丈东接竹堂山南接蒋山北连摄山西有水下注平陆【旧志】

事迹輿地志云堦础碑石及麒麟狮子以石为之者悉出於此山 南史梁散骑常侍韦载有田十余顷江乘县之白山天嘉元年遂筑室居山屏絶人事不入篱门者十载

苻坚山在城东六十里周回一十五里高六十丈北连大城山【旧志】

事迹谢玄破秦归谢安在墅城问其方略玄於原野陈其营垒阵場次序指此山曰此若苻坚驻军之山也因以为名

大城山在城东七十里周回二十二里高八十二丈南连苻坚山西连鴈门山北连竹堂山

云穴山在城东八十五里周回二十里高九十七丈南有水流入石驴溪有洞穴甚幽邃天欲雨则穴中云出因名之

癸山按十道四蕃志有癸山在城东北四十七里碑石礎础多出於此

武岗山在城东二十五里里俗呼为石佛子庙【旧志】 事迹按石迈古迹编山有石佛十余躯旧传唐武后造未详乡民岁时祈祷一名墓山

土山一名东山在城东南二十里周回四里高二十丈无岩石故曰土山【旧志】

事迹輿地志云山下有湖自江山至京师此为半道今谓此山下道为半逻
晋石季龙入寇蔡谟所戍自土山至江乘 太元八年秦苻坚率衆号百万次於淮淝京师震惧命谢安征讨大都督谢玄入问计安夷然无惧色答曰已别有旨既而寂然玄不敢复言乃令张玄重请安命驾出土山墅张宴亲朋毕集方留玄围碁赌别墅游涉至夜方还府内逮明指授将帅各当其任又於土山营立楼馆植林竹甚盛每携中外子侄往来游集肴饌日费百金

世以此颇讥之安殊不屑意 上元县有两东山一在崇礼乡即土山是也晋书谢安寓居会稽栖迟东山此安之旧隐也在会稽後於土山营筑以拟东山今去县二十里一在鍾山乡蒋庙东北宋刘勔隐居之地勔尝经始鍾岭以为栖息及造园宅名为东山今去县十五里陈轩金陵集载李白李建勲东山诗皆指土山而作

梁书宋谢朓十岁能属文父庄游土山使朓命篇揽笔便就 梁末萧正德亦修筑以为墅沈约郊居赋云临巽隅兮纵目即堆塚而流盼虽东山之培塿乃文静之所宴

张山按石迈古迹编在城东南三十里淳化镇之北旧隶江乘县【旧志】

事迹南史齐钦明皇后葬江乘县张山或云今城东北六十里章桥西又有张山亦古江乘境

青龙山在城东南三十五里周回二十里高九十丈【今溧阳县界别有青龙山】

事迹南唐後主尝校猎於此

祈泽山有祈泽寺在城东南三十五里周回一十里高五十丈东连彭城山北连青龙山【旧志】

事迹旧经云初法师尝结茅於此有龙女来听讲既而神泉涌於讲座下後遂为祈祷水旱之所因此得名

丁山在城东南四十里周回一十七里高二十七丈石碓山在城东南四十里周回一十五里高二十七丈在上元县崇礼乡去县二十五里一名竹山【旧志】

事迹祥符图经云有大堽悉是石故名石碓或云碓亦作柜每春夏水溢衆流汇此山横据秦淮之上以柜遏水势 輿地志秦始皇时望气者云江东有天子气乃东游以压之又凿金陵以断其势今方山石碓是其所断之处也 孙盛云东至方山有直渎自渎至此山或云是秦所掘山今方山西九里有大堽枕淮合堽悉是石京师沟塘累石悉凿此堽取之

方山一名天印山在城东南四十五里高一百一十六丈周回二十七里四面方如城东南有水下注长塘流溉平陆輿地志湖熟西北有方山山顶正方上有池水丹阳记形如方印故曰方山亦名天印山【旧志】

事迹秦始皇凿金陵山疏淮水此山乃其断者故沈约郊居赋云聊迁情而徙睇识方阜於归津带修篁於桂渚肇举锺於强秦陈沈炯诗云淮源比桐栢方山似削成 吴大帝为仙者葛玄立观於此山 晋谢灵运东出邻里送至方山尝赋诗 宋何尚之为尚书令元嘉末致仕退居方山着为赋 齐武帝尝幸方山顾左右曰朕欲经始山之南复为离宫期胜新林苑徐孝嗣答曰绕黄山款牛首乃盛汉之事今江南未广愿少留神乃止 徐嗣徽兵至秣陵故治齐人跨淮立栅度兵夜望方山嗣徽等列舰於青堆至於七矶以

断周文育归路文育鼓噪而发嗣徽等不能制今方山南有青堆埠即其地
隶句容者名东方山非此所谓方山也

彭城山有彭城馆在城东南四十五里周回九里高二十七丈西连祈泽山北连青龙山

汤山在城东南六十里西接云穴山山不甚高无大林木有汤泉出其下大小凡六处汤涧绕其东南四时常热禽鱼之类入者辄烂以煮豆谷终日不熟草木濯之愈鲜茂旧有汤泉馆今废【余见圣汤院】

雁门山在城东南六十里周回二十里高一百二十五丈西连彭城山南连大城山北连陵山【旧志】

事迹山势连绵类北地雁门故以为名○輿地志云山东北有温泉可以浴饮之能治冷疾

竹堂山在城东南七十五里周回一十六里高九十二丈东连云穴山西连白山南连大城山北有水下注平陆【旧志】

事迹輿地志云白山雁门山竹堂山并连带在建康县东北绵联三四十里

横山在城东南一百二十里周回八十里高二百丈【旧志】事迹山谦之丹阳记云丹阳县东有横山连亘数十里或云楚子重至於横山是也又曰横望山四面望之皆横故有是名在城西南一百二十里接连太平州界

戚家山在城南天禧寺东

事迹郑文宝南唐遗事云韩熙载居戚家山

梓桐山在城南一十五里高三十八丈山下有谢氏诗楼及繙经台基存

聚宝山在城南雨华台侧上多细玛瑙石俗呼为聚宝山

紫岩山在城南一十五里高三十八丈【旧志】

事迹陈轩金陵集载李建勲春日紫岩山期客不至诗岩山在城南周回一十五里有吴纪功德石山谦之丹阳记曰秣陵县南有岩山山西有石室山东大道左有方石长一丈刻勒铭题赞吴功德孙皓所建也宋孝武帝改曰龙山明帝泰始中建平王休佑从上於岩山射雉日欲暮上遣左右壽寂之等逼休佑令坠马因共殴杀之

夏侯山在城南二十二里周回十里高三十五丈仪同三司夏侯亶居此因名之

甌蔽山在城南二十三里周回八里高二十五丈以形似名之

牛头山状如牛头一名天阙山又名仙窟山在城南三十里周回四十七里高一百四十丈【旧志】

事迹六朝记自朱雀门沿御道四十里至山下西峰中有石窟不测浅深梁武帝於下建寺名曰仙窟山又云山南有芙蓉峰北有大石如卧鼓其山中空可坐数十人其高九尺上下有小石吴时呼为石鼓河图内元经云山南峯地面有石洞高一丈五尺中有路相通时号为石鼓天欲雨则石鼓自鸣 宋书云山之南峰大明中尝立南郊坛於其上

朱京登牛头山诗有削成双峰玉骨清之句 建炎四年岳飞败金人於清水亭乌珠复趋建康飞设伏於牛头山上待之飞又以骑三百步卒二千人自牛头山驰至南门新城为营遂大破乌珠之衆所获负而登舟者尽以戈殪於水物委於岸者山积

观子山在城南三十里周回四里一百步高八十三丈东有水下注新林浦【旧志】

吉山在城南四十五里周回三里高一十丈西临大江【旧志】

事迹宋征虏将军建城侯吉翰葬於此因以为名

大青山在城南四十五里周回三十五里高一百二十五丈西有水下注平陆

陰山在江宁西南一十二里临大江【旧志】

事迹王导至此有陰山神见梦於导乃以其事闻上为立庙时人遂名其冈曰陰山

三山在城西南三十七里周回四里高二十九丈【旧志】事迹吴志天玺四年晋琅邪王伉帅六军济自三山晋书王濬自蜀发兵攻无坚城夏口武昌无相支

抗於是顺流鼓棹径造 元和郡国志云王濬伐吴宿於牛渚部分明白前至三山即此三山也輿地志云其山积石森郁滨於大江三峯行列南北相连号三山 鲍昭有还都至三山望石头城诗 谢元晖有晓登三山还望京邑诗 李白有诗云三山半落青天外是也

自临沂而下诸山皆在鍾山之左遶府城东北隅达於城东转东南隅以达於城南又转西南隅及西而止於江与隔水石头城马鞍诸山相望其地脉山势似断而续似散而聚似远而近环抱拱挹真如龙之盘也右在上元县界

湖山在江宁县南三十里周回七里高七十丈上有湖久旱不涸

车府山在江宁县四十里周回九里二百步高一百丈六朝常於此山藏车乘器甲故名

祖堂山在江宁县南四十五里周回四十里高一百二十七丈东有水下注平陆【旧志】

事迹宋大明三年於山南建幽栖寺因名幽栖山唐贞观初法融禅师得道於此为南宗第一祖师乃改为祖堂山

落星山在江宁县西南五十里周回二里高一十丈西临大江【旧志】

事迹旧图经云昔有大星落於此因以名之

铜山在江宁县东南七十里周回一十九里高一百丈【旧志】

事迹昔人采铜於此山故名 陈轩金陵集载鲍昭过铜山掘黄精诗云铜山昼深沉乳窦夜涓滴即此也属江宁县句容县北溧水县西亦各有铜山皆旧日采铜处

烈山去江宁县西南七十里近处真乡【旧志】

事迹近烈洲临江中流故曰烈山其山四面峭絶下瞰大江风涛汹涌商旅常泊舟依山以避风絶顶丛棘中旧有侯将军庙【陈永定初王琳聚兵於襄阳以窥台城造黄龙舟千艘泊於荻港阿而发忽西南风急琳谓得天助张帆直抵台城而下陈将侯瑱泊舟三百於芜湖随后而发战於烈山之下用抬竿以撞琳船遇之则破琳掷火焚之风逆自焚遂大败奔魏土人以侯瑱功烈甚盛故名山曰烈山以祠祀之岁久舟人以为陈簪头祠矣】宝佑初忽有僧披荆棘建庵其上自名为江心护国寺【曾慥百家诗选载晁无咎云金陵南数十里江心烈山崿然特起犹金山也家人云安得隐居于此作一絶云山如浮玉一峯立江似海门十顷开我欲此中成小隐莫教山脚有船来】

白都山在江宁县西南七十里周回五百步高【阙】丈西临大江【旧志】

事迹輿地志昔白仲都尝於此山学道白日昇天因以为名
吴志诸葛恪诛子竦载其母而走孙峻遣将军张承追斩於白都即此也

鼓吹山在城南八十里周回一十七里高八十丈东北有水四望孤絶宋孝武大明七年自江宁县南登山及陵望台盖登山奏鼓吹因以为名

龙山在城西南九十五里周回二十四里高一百一十二丈入太平州当涂县北有水以其山似龙形因以为名

慈姥山在城西南一百一十里二百步周回二里高三十丈輿地志山积石临江岸壁峻絶山

上出竹堪为箫管山南有慈姥神庙因名焉

天竺山在江宁县西南一百二十里周回一十七里高一十九丈【旧志】

事迹东南有水下注慈姥浦其北连冈十里本名多墅山唐上元二年有天竺兴福寺僧道融移寺於此山因以为名

右在江宁界

茅山在句容县东南四十五里周回一百五十里初名句曲山像其形也茅君得道更名曰茅山三十六洞天之数第八者曰金坛华阳之天此山是也

事迹史记封禅书云禹封泰山禅会稽晋灼曰本名茅山吴越春秋云禹巡天下登茅山以朝羣臣更名茅山为会稽亦曰苗山茅山记曰大茅山独高处黑帝命东海神埋大铜鼎於山顶深八尺上有盘石镇之又曰秦始皇帝二十七年游会稽还於此山埋白璧一双深七尺李斯篆刻文云始皇圣德平章江山巡狩苍川勒铭素璧又曰王莽地皇三年七月遣使者章邕献铜钟五口黄金百镒赠之於三茅君又曰光武建武元年遣使吴伦齎黄金五十斤献三茅君今山顶有埋金处上有聚石又曰中茅山独高处司命君埋丹砂六千筋镇於此山深三丈上有盘石镇之其山左右泉流下皆小赤色饮之延年益壽左真人就司命君乞得一十二筋以合九华丹山顶石坛石案香鑪今存今三阳百姓多长壽者盖太阳北阳朱阳三村耳茅君内传曰句曲山秦时为华阳之天三茅君居之因以为名外有金坛山因坛为号周时名其源泽为句曲之穴按山形曲折後人名焉真诰曰汉宣帝时有三茅君得道掌此山故谓之

茅山又曰金陵句容之句曲洞为第八洞天又曰句曲地肺土良水清谓之华阳洞天可以度世种民是处五灾不生又曰金陵洞墟之膏腴句曲之福地履之者万万知之者无一【内经福地志曰伏龙之地在柳谷之西金坛之右可以高栖金陵之福地也许迈别传曰延陵之茅山是洞庭西门潜通五岳茅君杂记云一名句曲山即三十六洞天华阳第八洞天也周回一百五十里东西四十五里南北二十里洞五门三门显二门隐又按陶先生茅山记略云东通王屋西达峨嵋南接罗浮北连岱岳汉元帝时咸阳人茅盈茅固茅衷并此山得道故号茅山三人常乘白鹤各据一岭唐咸通中东海蓬萊观龚道者初入此山辟谷茹芝十余年後因月朔正旦焚香洞门恍惚之间得入洞中经由一十三日备见洞府岩壁山川星辰日月灵异难详茅蒙字初成华阳人也隐华山修道秦始皇三十一年白日上昇是时先有民謡曰神仙得者茅初成驾龙上昇入太清时下玄洲戲赤城继世而往在我盈始皇闻之问故老曰此僊謡也於是有寻仙之意蒙之元孙盈得道于金陵句曲山上昇为东岳上卿司命眞君太元眞人居赤城时来句曲邦人改句曲为茅君山图经云汉时有三茅君各乘一白鹤来居其上故号为三茅君世传茅盈茅固茅衷皆茅蒙之後也山在句容县东南四十五里华山华阳县皆在句容县王荆公有诗云一峰高出衆山巔疑隔尘沙道里千俯视烟云来不极仰攀萝茑去无前人间已换嘉平帝地下谁通句曲天陈迹是非分草芥纷纷流俗尚师传苏魏公颂诗三士隐沦地上林句曲前謁来思访道属赋望游仙松隐飞轮路云收积玉巔华阳不知远趋驾似

行天 周益公必大诗千峯溧阳来势若西南犇遥拱三茅峯不敢迫至尊三茅如轩县?第俨弟昆正西辟夷涂羣仙之所门至今下泊宫往往弥旗幡】山中有大茅峰【在崇壽观北旧记云在崇僖观北独高处昔青童道君乘飈举少憩於此今犹有故飈轮之迹山之半有绣衣亭昔三天使者衣绣衣执金丹以九锡之命诏大茅君故以为名山之巔有泉名曰一人泉汲之不竭】中茅峰【在积金山北其侧有泉色赤而有味真诰云饮之延年山下之民率皆眉壽而无疾】小茅峯【在中茅峯之背有如卧龙松左徯桧】抱朴峰【即大茅峰北相连一峯是】白云峰【在中茅峯西】五云峰【在小茅峯之侧华阳洞上积金峯金菌山东高峰是也其峯甚峻昔茅君以三月十八日驾五色之云八景之輿伫於此山逾时而去故号为五云峰】积金峯【在大茅峯中茅峯之间二峯相连其长阿中有连石古谓之积金峰陶隐居所住之东有一横垄与之相对垄皆是石石形甚瓌奇即此峯也】叠玉峯【图经云大茅山上东南三山叠积亦有洞穴俗多呼叠石石之与玉犹为同类又作三角呼三角山今与葛僊坛相迓真宗未生仁宗时尝遣左璫诣茅山祷祈遇异人言玉真人已降生於宋朝璫问玉真人本是何人答曰古燧人氏章懿皇后亦梦羽衣数百人从一僊官自空而下曰此托生於夫人及生宫中火光属天始行步常持槐木简以筋鑽之真宗问曰何用曰试鑽火耳帝顾后妃曰异人之言信不虚矣令刻石元符宫】华盖峯【在崇壽观东南】又有四平山【真诰曰大茅西南有四平山俗谓之方山其下有洞屋名方台又曰幽馆惟得道者处焉】良常山【秦始皇登句曲山北叹曰巡狩之乐莫过於山海自今以往良为常也尔乃羣臣并称壽叹曰良为常矣乃改句容北垂为良常之山】华姥山【茅山记孙寒华即吴大帝之孙女於茅山修道成冲空而去号其山为华姥山徐铉复禁山记曰华阳洞天金陵福地羣僊之所都会京福之所兴作故其坛宇之盛答享之殷修奉之严樵牧之禁冠於天下圣历中官失其守望拜之地多所荒芜天佑间正素先生王君栖霞始复禁山之地由良常洞至雷平山十里而近入於萌隶者尽赎之刳茅者不得辄至墟墓不得杂处艺树蔽野植松为门川梁必通榛秽必剪建方坛於雷平之上造高亭於良常之前朝奉有至诚之地游居有税驾之所姜巴古国秦望旧封肃然清光复如开元天宝之盛矣陈轩金陵集张公环诗云人间独有当时月山际犹无後世樵盖谓此也】

勅禁山碑【访闻茅山界内祠庙寺观之侧树木多有诸色不顾条法擅行樵采及放野火焚烧山林须议专行指挥国家方延景贶以佑烝民眷彼名山存于方志或仁慈所治或眞宇攸依是为降福之场允为栖神之所故宜加礼敬答储休岂可斤斧竟臻樵苏无节致嘉生之罔植使灵迹以何观爰伸禁止之文用表肃恭之意令下昇州润州候宣命到於茅山四面立定界止严行指挥断絶诸色人并本寺观祠宇主首已下自今後不得辄有樵采斫伐及放野火烧葬令地分巡检官吏耆生壮丁觉察检校如有违犯便仰收捉押送所属州县勘断讞枷项示衆半月满日疏放如斫伐数多情理难恕即仰收禁奏候指挥当行决配如是逐寺观祠宇之外无有供烧柴山不是古迹之内久来存留树木即仰本县官吏与寺观等主者同共指定界止竖立标记方得采取若是已有斫伐延烧到树行稀疏处亦仰随处州县勒定数目去处常依时栽种补填务要别无空阙即不得辄便搔扰仍将此宣命指挥於寺观门首及往来要路镌石晓示知悉大中祥符二年奉勅如右】

绦岩山一名赭山在句容县西南三十里周回二十四里高一百六十五丈上有龙坑祠坛【

旧志】

事迹地志云汉丹阳县北有赭山其山丹赤故因以名郡 寰宇记云本名赤山唐天宝中改为赭岩一名赭山一名丹山丹阳之义出此山极险峻临平湖山之巔颇坦夷惟只路可通旧传五季之乱居民避难於上往往获免後廝山者常於其地获铜锭劔器之属建炎兵火乡民又依之以免祸者甚衆

姜石山在句容县西北二十五里有梁南康简王墓射鸟山在句容县西北五十里周回一十五里高一十七丈

五墓山在句容县北五十里周回二十里高二十五丈铜山在句容县北六十里周回二十里高八十七丈以旧出铜故名

戍山在句容县北六十里周回一十一里高一十五丈北临大江俗传沈庆之屯兵於此因以戍名

竹里山在句容县北六十里按方輿记云行者以其途倾嶮号曰翻车岘鲍昭有行翻车岘诗

事迹元和郡国志云山间有长涧高下深阻旧说似洛阳金谷隆安二年王恭举兵於京口仗刘牢之为爪牙使帐下督顔延为前锋牢之至竹里斩延以降还袭恭宋武帝起义自京口至江乘破桓玄将吴甫之於竹里移檄京师

华山在句容县界按方輿记云梁武帝輿驾东行至此山因问华山何如蒋山高薛对云华山高九里似与蒋山等泉水倍多

花礫山在句容县北五十里周回一十七里高二十六丈旧有矾坑

秦山在句容县南三里有明月湾通秦淮父老相传谓谢安月夜乘舟垂钓於此今钓基尚存

郁罡山在小茅峰之东北草木郁茂故以为名俗呼为大横山学道者多居於此山下有泉昔有人就此合神丹而升玄洲山之东有古越翳王塚

龙尾山在大茅峰之东隐然而高状若龙尾焉案茅山记云从大茅一岭直至山东接延陵界如龙状大茅山为头垄如龙尾故以龙尾为名

东方山在句容县东南四十里周回一十五里高四十二丈东连僊几山

周山在句容县南三十五里周回一十里高一十丈伏龙山在柳汧之间柳汧即柳谷泉与中茅峰相近状如龙其上产金昔人采之

雷平山在伏龙山之东周时有雷氏养龙来往此山与许长史所营之宅相对其山北有柳汧水或名曰田公泉昔田公尝居此

方隅山在雷平山之东北以三小山相隅故也昔有人合九鼎丹於此山下亦有洞室名曰方源馆

丁公山乃积金峰之西麓也今崇禧观以为主峰僊韭山在崇禧观西独小山也真诰云姜叔茂种五辛菜常卖此以市丹砂今山多大韭即其种也

仑山在句容县东北五十里周回一十五里高一十七丈东连驹骊山四十二福地也唐肃宗时谒者伍达灵在此山得道丹成之後记於石壁在絶顶尚存髣髴可辨山下又有伍达灵潭

驹骊山在句容县东北六十里周回二十五里高三十九丈

僊姑山在句容县东四十里茅山之侧周回五里高一十丈

僊几山在句容县东南四十里茅山侧周回三里一百步高八丈东连僊姑山

丫头山在句容县东南三十五里周回一十五里高四十二丈东连僊几山

浮山在句容县南三十五里周回一十里高一十二丈西接周山

胄山在句容县北三十五里周回一十二里高一十六丈

亭山在句容县北三十里周回一十五里高二十丈青山在句容县北六十里郁罡山西乾元观北周回一十里高一十三丈北临大江又观东一山名东青山西一山名西青山东青山在茅司徒庙东

土石山在句容县东三十里

虎耳山在句容县东三十里

冈山石名此山为福地记云冈山之间有伏龙之乡可以避病

鼈足山在僊韭山之西

竹山今藏真观前一山上多筱者是也陶隐居云自大茅山南後韭山竹山吴山方山从此叠嶂达乎吴兴天目诸山至乎罗浮穷乎南海也

右在句容县界

中山在溧水县东南一十五里高一十丈周回五里图经云宣州中山又名洎山溧水县东一十里不与羣山连接古老相传中有白兔世称为笔最精元和郡国志云中山出兔毫为笔精妙山前有水源号曰洎水輿地志云宣州溧水县有洎山有洎水流演不息即此也【旧志艺苑雌黄云比观张文潜明道杂志首载白乐天紫毫笔诗云宣城石上有老兔食竹饮泉生紫毫子】

【尝问宣州笔工云毫用何处答曰皆陈毫宿州客所贩宣自有兔毫不堪用盖兔居原则毫全以出入无伤也宣兔居山出入为荆棘树石所伤毫例短秃则白诗非也白公宣州发解进士宜知偶不问尔按北户录说兔毫处云宣州岁贡青毫六两紫毫三两後又云玉羲之叹江东下湿兔毫不及中山由是而言则宣城亦有兔毫不及北方劲健为可用也然则毛穎传李太白诗所言中山非溧水之中山明矣】

东破山在溧水县东南五十五里高二十三丈周回一十七里梁大同二年采铜於此

东庐山在溧水县东南一十五里高六十八丈周回二十里有水源三一源自山西流入秦淮一源出山东北流入马沉港一源自山东南吴漕流入丹阳湖山谦之丹阳记云县东有庐山与丹阳分界十道四蕃志太平寰宇记皆云俗传严子陵结庐於此或云形似庐舍因此为名

马占山在溧水县东南三十五里高一十八丈周回一十三里梁大同二年采铜於此

?船山一名感泉山在溧水县南一十二里高二十一丈周回一十八里山陰有青丝洞泉脉泓澄四时不竭南有张沈二士书堂并臼遗址不知何时人也

杜城山在溧水县南一十二里高六十丈周回五十五里隋大业末杜伏威尝屯军於此因号杜城山旧有庙及战场

竹涧山在溧水县东南一十八里高一十二丈周回八里

石城山在溧水县东南二十五里周回二十四里高六十丈上旧有石城院冷水亭基

小茅山在溧水县西南五里高一十七丈周回四里荆塘山在溧水县南一十里高三十七丈周回二十里稟丘山在溧水县西三十里高三十七丈周回二十里上有井泉及稟丘山寺基唐太和中寺废有石龕方丈存

凤栖山在溧水县西南七十里高一十六丈周回八里西并石臼湖父老云昔有凤凰栖其上因得名曰鳳栖此山属仪凤乡迤北有凤贤圩今作黄西非也

腊山在溧水县西南六十里高一十四丈周回一十五里西并石臼湖

雀垒山军山?子山马头山并在溧水县西南七十五里石臼湖内

澳洞山在溧水县西南二十五里高三十一丈周回一十八里内有祈雨潭祷之多应

游子山在溧水县南八十二里高二十丈周回一十里上有石坛旧经云昔孔子适楚尝经此山

芦塘山在溧水县东南二十三里高一十五丈周回二十二里梁大同二年尝采铜锡於此

琛山在溧水县西一十五里高一十一丈周回一十五里旧经云山尝产玉因此得名

回峰山在溧水县东南四十里高三十七丈周回一十七里上有龙池下有龙泉东有水注平陆

石羊山在溧水县西南三十七里高七十丈周回四十里

土山在溧水县南五十里高一十丈周回六里

三山在溧水县东南一十里高九丈周回一十里官塘山在溧水县东南二十五里高一十一丈周回一十五里下有大塘

芝山在溧水县东南七十里高三十九丈周回四十里上有李子洞燕洞相去三百步昔宣州田頔举兵邑人携老幼於此避难可容数千人李洞有泉沸涌燕洞有石燕遇雨则飞晴则还落为石

铜山在溧水县西四十里高二十四丈周回一十三里旧经云昔尝采铜於此今炉冶旧址犹存

玉泉山在溧水县南一百一十里高三十二丈周回一十八里

卧龙山在溧水县北二十三里高一十四丈周回一十里

赤虎山在溧水县北三十三里高一十丈周回十里白石山在溧水县北二十里高一十丈周回十一里荆山在溧水县东南七十里高四十二丈周回二十里旧志云即卞和获玉之地误也【卞和泣玉荆山之下其山乃在荆州不在扬州】峒岷山在溧水县东二十里高一十丈周回八里李墅山在溧水县东三十里高二十丈周回一十六里与句容县茅山相接

鹿子山在溧水县东一十五里高一十丈周回九里东接峒岷山

浮山在溧水县东三十七里高三十丈周回二十里与句容县茅山相接

僊杏山在溧水县东南四十三里高三十丈周回一十三里旧经云絶顶有杏林及僊人足迹因以名之又有僊坛三所及丹井一名僊坛山下有清泉流入丹阳湖【元佑中知县周邦彦有僊杏山诗云僊人药光明夜烛种杏碧山如种玉春风裂石凤收花赤颗离离照山谷卿云承日作陰润猛虎守山防采斲高眞筐篚入时贡望拜通明荐新熟珠旒颌首一破顔气压蟠桃羞若木自从移植近星榆山水无光灵鬼哭长松枯倒流液尽疎索藤多朴 我思百年访灵异羽褐虽存言语各本非民上宰官身欲断人间烟火谷行寻幽洞覓丹砂恍见臞僊骑白鹿便应执箒洗僊坛不用纖纖扫尘竹】

爱景山在溧水县东北二十五里高一十三丈周回一十里与乌山相接

乌山在溧水县北二十里高二十八丈周回十五里鷄笼山在溧水县北三十里高一十七丈周回一十二里与爱景乌山相接

方山在溧水县东南六十五里高一十二丈周回九里南有青龙洞与芝山相接

赭山在溧水县东南五十里高一十九丈周回二十一里

灵岳山在溧水县东南六十里高二十一丈周回一十五里

南鷄笼山在溧水县东南一百二十里高三十二丈周回二十里

遮军山在溧水县南八十五里高五十五丈周回二十三里山北有水下入固城湖

太山在溧水县南七十六里高三十四丈周回二十五里

秀山在溧水县南九十五里高二十三丈八尺周回九里一百步西南有水下注平陆旧名秃山近因秦氏居之遂易今名

禅林山在溧水县南八十里高四十一丈周回一十八里上有寺

黄山在溧水县东南一十里高九丈周回一十里溧阳山在溧水县东南一十二里高二十五丈周回七里一百步俗号马鞍山取其形似也

浊山在溧水县东南一十里高一十丈周回五里山北浊水出焉輿地志云溧水县有浊山下有浊水即秦淮之源也

右溧水县界

岩山在溧阳县西十一里周回五里高二十丈晋咸和中李闳追及张健之所

桂林山在溧阳县西南三十里周回十五里高五十丈汪内翰藻记挹秀堂云南则翠陰晴岚与人应接者桂林诸山也

龙潭山在溧阳县南四十五里周回十五里高二十七丈上有龙潭清澈见底潭侧有龙王祠
禱之有应虎山在溧阳县西南五十里周回五里高二十丈青山在溧阳县南六十里高十七丈周回十里

神山在溧阳县南四十里高五十丈周回二十里朝山在溧阳县西南二十里高十五丈周回五十里盘白山一名高遂山在溧阳县西南四十里高五十六丈周回十里今太虚观在其下故俗名观山第二峰石上有僊人迹观有碑载晋盘白真人事迹

伍牙山一名护牙山在溧阳县西南六十里高一百七十丈周回四十里【旧志】

事迹輿地广记云子胥伐楚还吴经此山故名伍牙建康志云俗传伍子胥美齿牙避楚至此恐为人所识以石击毁其牙山神为震护之不毁因名护牙二说未知孰是山下有子胥庙

荆山在溧阳县西南四十里高六十丈周回二十里山下有泉岁旱?以溉稻

独山在溧阳县西南六十五里高二十九丈周回一十里

?冶山一名?岷山在溧阳县西南七十里高一百八十丈周回二十里山谦之丹阳记云永世县南?岷山出?今扬州鼓铸之輿地志云前代铸钱处

三王山一名三首山在溧阳县西南五十里高二十丈周回一百余步旧志云相传楚王与眉间尺并一客三首葬此因为名

银方山在溧阳县南五十三里高三十六丈周回十五里

结都山在溧阳县南五十里高五十八丈周回一十八里

鷄笼山在溧阳县南十二里高十七丈周回三里屏风山在溧阳县南十五里高九丈周回五里一百二十四步山形如屏风

泉山在溧阳县南二十里

石屋山在溧阳县南六十里高三丈周回一百步山西有铸劔坑旧志云吴王使欧冶子铸劔於此

□山在溧阳县南二十五里高十八丈周回五里□字土人音沟字书未见

悬鼓山在溧阳县南五十里高六十丈周回二十二里远望若垂鼓然故以名

氲里山在溧阳县南五十里高四十六丈周回一十五里

金山在溧阳县南五十里高五十丈周回三十里松山在溧阳县南七十里

铁山在溧阳县东南五十里高六十丈周回二十八里古尝出铁今坑冶遗迹犹存唐书地里志溧阳有铁此即其地

新妇山在溧阳县东南五十里高三十五丈周回一十八里

三鹤山一名僊山在溧阳县东南六十里高八十丈周回十五里昔有潘氏兄弟得道化鹤

铜官山在溧阳县东南五十八里高十八丈周回十六里昔尝出铜故名唐书地里志溧阳有铜此其地也今土中荧然有铜如赭状然堇堇取之不足以偿费云泉山一名下山一名夏山在溧阳县东南三十五里高二十二丈周回十里上有泉云气出焉山上有淨土院

金鷄山在溧阳县东十里高十二丈周回五里

山在溧阳县东北二十五里洮湖之上周回十里高十一丈周处风土记云昔有 姓姥於此得道按广韵 乌后切山名在溧阳集韵云山名在阳羨寰宇记云常润等州分界於此山之巔

大岨山一名大巫山一名浮山在溧阳县东北四十五里洮湖中周回三百五十步高八丈与宜兴金坛二县接界山形孤秀颀颀居水中望之若浮周处风土记云洮湖中有大岨山唐地里志云溧阳有湖山皆指此也唐史巖撰史宪神道碑云坏山右转洮水前临坏字乃为岨今从之坏岨二字土人皆音浮字书未见陶隐居寻山志云石孤耸以独絶岸垂天而似浮谓此山也小岨山一名小巫山在溧阳县东北二十五里洮湖中周回四里高五丈輿地志云延陵永世二县界中有小岨山山下有石堂堂内有虎迹水涸即见

张?山在溧阳县东北二十五里周回三里高七丈大蕩山在溧阳县北四十五里洮湖东周回四里高一十丈

小蕩山在溧阳县北四十里洮湖东周回二里高六丈雷公山一名雷山在溧阳县北三十七

里周回五里高十二丈岩石奇怪泉流洁清旧志云俗传有雷公铸劔於此因以为名今法兴寺在其下

落霞山一名霞山在溧阳县北四十里周回三里高九丈圣塔院在其下故又名圣塔山

平陵山在溧阳县西北三十里周回三里高三丈旧经云晋成帝咸和四年李闳执苏逸於此

土山在溧阳县北三十五里周回三里高十二丈黄金山在溧阳县北七十里周回二里高十三丈雨後土色如金

瓦屋山在溧阳县西北八十里周回二十里高一百六十七丈形连亘两崖稍隆起宛如屋状李白尝游溧阳望瓦屋山怀古赋诗

丫头山一名丫僊山一名丫山在溧阳县西北八十里周回三十里高一百八十五丈其山两峯峩然齐高如髻耸秀可观

分界山在溧阳县西北八十里溧水溧阳二县分界此山之巔

曹山一名曹姥山在溧阳县西北八十五里周回二十里高八十四丈旧志云昔曹姥独居此山死于石室葬山下後人为置圣姥祠祈祷多应

秀山在溧阳县西七里周回一里高十一丈

菱山在溧阳县西十里周回四里高十七丈山有龙潭祷之有验

姥山在溧阳县西十里周回六里高十二丈

大石山在溧阳县西十五里周回七里高二十二丈旧志云上有龙穴祷雨有应

黄山在溧阳县西四十二里周回三里高五丈旧志云黄鹤僊人於此得道因以名今有观

谷山在溧阳县西四十里周回二里高十二丈

渔父山在溧阳县西十五里

燕山在溧阳县西九里周回五里高二十一丈

投龙山在溧阳县西十一里周回六里高十二丈石门山在溧阳县西十三里周回四里高十丈

吕长山在溧阳县西二十里周回四十里高七丈芝山在溧阳县西八十里周回二十五里高四十五丈旧志云山中尝出芝草因以为名故老相传梅福尝游隐於此

花山在溧阳县西四十五里周回六里高十五丈冈岭【壠岷坡墩墅】

白土冈北连蒋山其土色白周回一十里高十丈南至秦淮贺若弼进军锺山鲁广达於白土冈与若弼旗鼓相对隋军退走

黄龙冈在上元县锺山乡去县十里旧传有黄龙见於此故名

武帐冈按宫苑记古宣武城其地本宋文帝閱武帐今谓之武帐冈南史元嘉二十二年建宇於冈上

落星冈一名落星墩在城西北九里周回二十六里高一十二丈又江宁县西五十里临江亦有落星冈事迹梁王僧辩於石头城连营立栅至落星墩以拒侯景景大恐即此也陈显达举兵以数千人登落星岗新亭诸军闻之奔还宫城大骇抱朴子曰落星冈吴时星落李白尝於落星石以紫绮裘换酒饮为欢皆此地也

孙陵冈详见商飏馆九日台

段石冈在城南二十里长十二里高二十二丈丹阳记云岩山东有大碣石长二丈折为三段因以名冈详见三段石

石子冈一名石子墩在城南一十五里长二十里高一十八丈吴志云诸葛恪为孙峻所害投之於此冈先是童謡云诸葛恪何弱弱芦单衣箴鉤络於何相求成子阁成子阁反语石子冈也輿地志宋大明中起迎风观於其上旧经云俗说此冈多细花石故名石子冈塘冈石迈古迹编云石头城之东有巨石俗呼为塘冈事迹晋大兴五年王氏收周顗戴若思杀於石头东塘颓石上百姓冤之至今纪其处

金陵冈在府城之西龙湾路上耆老言乃秦灭东南王气铸金人埋於此昔有一碣刊其文曰不在山前不在山後不在山南不在山北有人获得富了一国後因砌靖安路失之详见金陵辨

梅岭冈在城南九里长六里高二丈旧经云东豫章太守梅颐家于冈下因名之上有亭为士庶游春所【黄度诗梅冈丘垄已难寻堪恨吴儿太忍心闻道土山漂擘处原头丛薄不成陰】

朱年壠案金陵故事在江宁县南六十七里鼓吹山前年生齐末兵乱中母亡庐墓终身负薪有白兔紫芝生于壠至今名其居为孝感

千佛岭在摄山栖霞寺之侧齐文惠太子豫章文献王竟陵文宣始安王及宋江夏王霍姬齐田奂等琢石建像梁临川靖惠王复加莹饰岭之中道石壁有沈传师徐铉张稚圭题名

桂岭在锺山南明庆寺後上有桂树因以为名【杨虞部诗步步高如月里攀拂云枝叶伴云间开花结子清香远应似淮南一小山 马野亭诗桂花千树占岑岩絶胜淮南一小山萧籁有时吹木末天香无限满人间悬知彼处有金粟为见如今闻麝兰蹊磴缘崖期采摘分明如向月中攀】

栽松岷舆地志云锺山本多石少树宋时诏刺史郡太守罢官者种松各有差【杨虞部诗耸壑凌霄色共苍森然万树约千行刘郎大厦寻颠覆应是其间少栋梁 马野亭诗锺山山上亦僮僮吏课何妨使种松还似农桑分殿最亦如榆柳计功庸初时出土平如荠後日横空矫似龙每见路旁多合抱不知手植是谁依】

驻马坡在清凉寺後山上旧传诸葛亮尝驻马於此以望形势【罗北谷诗一登伟观渺山河下有将军驻马坡不是胸中兵十万长江天险误人多 叶辉诗将军气势溢山河跃马曾来驻此坡坡下石头城最险屯兵正自不消多】

谢公墩在半山寺里俗相传谢安所尝登也其事殊无所据李白王荆公皆有谢公墩诗白诗云冶城访遗迹犹有谢公墩乃今大庆观冶城山昔谢安与王羲之登冶城悠然遐思有高世之志即此荆公虽有我屋公墩之句而又有诗云问樵樵不知问牧牧不言亦自疑之耳江左谢氏衣冠最盛谓之谢公岂独安也今半山寺所在旧名康乐坊按晋书谢玄封康乐公至孙灵运犹袭封今以坊及墩名观之恐是玄及其子孙所居後人因名之耳

景定建康志卷十七

卷十八

钦定四库全书

景定建康志卷十八 宋 周应合 撰

山川志二

江湖【淮附】

大江隶建康府界者一百二十里西至和州乌江县四十里以鳊鰼洲中流为界东北至真州杨子县七十里以下蜀镇中流为界北至真州六合县界四十里以瓜步戍中流为界隶沿江制置司所部者一千七十一里西至马当东至镇江南北两岸皆隶焉详见江防

事迹史记地理志三江北江从会稽毗陵县北东入海中江从丹阳芜湖县东北至会稽阳羨县东入海南江从会稽吴县南东入海 水经及荆州记云江出岷山至浔阳分为九道东会于彭泽经芜湖名中江东北至南徐州名为北江而入海长江有别名则有京江在南徐州禹贡所谓北江也瓜步江今扬州六合县对润州江宁县即魏太武所临处乌江即项羽死处今和州乌江县亦对江宁县 吴聿靖安河记畧曰江出岷山自湖口合流而下奔放荡潏吞吐日月山或矶之则其势悍怒触舞大扁兀若转梗至其广处旷数百里断岸相望仅指一髮而舳舻上下中流遇风则四顾茫然无所隐避自金陵抵白沙其尤者为乐官山李家漾至急流浊港口凡十有八处称号老风波而玩险阻者至是鲜不袖手 吴书魏文帝有渡江之志望江水盛长弥漫数百里便引退自叹曰魏虽有武骑千羣无所用也

江南野史周世宗问孙忌江南虚实忌曰长江千里险过汤池可敌十万之师 晋中兴书曰郭璞以中兴王宅江外乃着江赋见文选【李白金陵望江诗汉江回万里比作九龙盘横溃豁中国崔巍飞迅湍六帝沦亡後三吴不定观我君混区宇垂拱衆流安今日任公子沧浪罢钓竿

曾极涉金陵大江诗雄兵岁岁涉江干将帅诛求盍少寛未得三军如挟纊凭谁数处卧风寒仙岩章公权长江问对篇问长江以汝卫南邦北人遥想心已降方今大势全倚汝不知汝亦许不许周人皆悠悠我心良独忧长城已坦道黄河已安流淮边日夜风飏飏汝今孤矣非昔比问汝若何真可倚长江对壮尔南邦以吾在今来古往只东流人世兴亡自更改句践临齐晋刘裕入长安项王北渡黄河西破关北方或可取吾不为君阻赤壁中流曾丧兵广陵望见波涛惊瓜步欲渡说虚声南方长可守吾独为君有吾之势何但抵长城长城今已平吾之力可以当百万百万者尝散吾能限南北不能输事力吾能鼓风涛不能用英豪君不见吴之末陈之季岂必斯时吾独异朝无政事国无人乌有长江专可倚辱君有问答君知止恐知之亦忽之烦君奉此献之国索裘勿俟大寒时】

中江旧迳溧阳县界古三江之一也今永阳江一名九阳江一名潁阳江在县西北三十五里即其遗迹案禹贡扬州三江既入震泽底定岷山导江东迤北会为汇东为中江入于海前汉地理志桑钦水经皆云中江由芜湖县西南东至阳羡入海盖自芜湖迳溧阳至宜兴入震泽以下海也唐开元十七年蒋日用作本县城隍记云此县南压中江风波不借舟楫无施县宰乔翔创浮梁以便行旅中江桥梁之设昉於此景福三年杨行密将台蒙作五堰拖轻舸馈粮【五堰遗迹在今溧水县界银林双河东坝之地】是时中江置堰江流亦既狭矣东坡奏议云溧阳县之西有五堰者古所以节宣歙金陵九阳江之衆水直趋太平川芜湖後之商人贩卖簰木东入二浙以五堰为阻因给官中废去五堰既废则宣歙金陵九阳江之水或遇暴涨皆入宜兴之荆溪由荆溪而入震泽时元佑六年也是时中江尚通其後东?既成中江遂不复东惟永阳江水入荆溪漫着其详以见溧阳亦禹迹之所历云

秦淮旧传秦始皇时望气者言五百年後金陵有天子气於是东游以厌当之乃凿方山断长垄为渎入於江故曰秦淮案实录准本名龙藏浦其上有二源一发自华山经句容西南流一发自东庐山经溧水西北流入江宁界二源合自方山埭西注大江分派屈曲不类人功疑非秦皇所开或曰方山西渎直属土山三十里是秦开又凿石碓山西而疏决此浦因名秦淮盖未详也【旧志】

事迹祥符江宁图经曰淮水去县一里其源从宣州东南溧水县乌刹桥西一百五十里丹阳记云建康有淮源出华山入江輿地志云淮水发源於华山在丹阳湖姑孰之界西北流经建康秣陵二县之间萦紆京邑之内至於石头入江悬流三百许里又云秦始皇巡会稽凿断山阜此淮即所凿也亦名秦淮孙盛晋阳秋云是秦所凿王导令郭璞筮即此淮也又称未至方山有直渎行三十许里以地形论之淮发源诘屈不类人功则始皇所掘疑此渎也徐爰释问云淮水西北贯都吴时夹淮立栅宋

元嘉中浚淮起湖熟废田千余顷梁作缘淮塘北岸起石头迄东冶南岸起後渚篱门迄三桥以防淮水泛溢大抵六朝都邑以秦淮为固有事则沿淮拒守今淮水贯城中东西由上下水门以达於江盖水之故道也【杜牧诗烟笼寒水月笼沙夜泊秦淮近酒家商女不知亡国恨隔江犹唱後庭花

朱存诗一气东南王斗牛祖龙潛为子孙忧金陵地脉何曾断不觉真人已姓刘
曾极诗凿断山根役万人祖龙痴絶更东巡石城几度更新主赢得淮流尚系秦野亭马之纯
诗城中那有大川行惟有秦淮入帝城十里牙樯并锦缆万家碧瓦与朱甍船多直使水无路
人關不容波作声流到石头方好去望中渺渺与云平
北谷罗叠诗秦淮横贯帝王州万瓦鳞鳞枕碧流系艇莫愁何处去緑杨深巷有青楼
叶輝诗人言王气在鄣州嬴政因来凿此流地脉何曾真断得几多天子御宸楼
山居刘元高横凿南山贯北津安知丰沛有真人六朝不得中原土犹使英雄欲过秦】

玄武湖亦名蒋陵湖秣陵湖後湖在城北二里周回四十里东西有沟流入秦淮深七尺灌田一百顷【旧志】事迹案建康实录吴宝鼎二年开城北渠引後湖水流入新宫巡遶殿堂丹阳记吴孙皓宝鼎年间丹阳县宣骞之母年八十浴於後湖化为鼃後湖又名练湖

徐爰释问曰本桑泊晋元帝创为此湖以肄舟师

大兴三年始创北湖筑长堤以壅北山之水东自覆舟山西至宣武城六里余

宋元嘉中有黑龙见因改玄武湖立三神山於湖中春秋祠之

石迈古迹编曰元嘉二十三年筑北堤立真武湖於乐游苑之北湖中亭台四所 孝武大明中大閱水军於湖因号昆明池而俗亦呼为饮马塘又於湖侧作大窰通水入华林园天渊池引殿内诸沟经太极殿由东西掖门下注城南堑故台中诸沟水常滢洳不息 建平王景素举兵萧道成出屯玄武湖梁徐嗣徽等引齐兵至玄武湖侯景举兵引玄武湖水以灌台城 郑文宝南唐近事云金陵北有湖周围数十里幕府鸡笼二山环其西鍾阜蒋山诸峰耸其左名山大川掩映如画六朝旧迹多出其间每岁菱藕网罟之利不下数十百千一日诸阁老待漏朝堂语及林泉之事坐间冯谧举元宗赐贺监三百里镜湖信为盛事又曰余非敢望此但赐得後湖亦畅平生也徐铉怡声而对曰主上尊贤下士常若不及岂惜一後湖所乏者知章尔冯大有惭色 国朝天禧四年改曰放生池其後稍废为田开十字河立四斗门以泄湖水跨河为桥以通往来岁久堙塞今城北十三里惟有一池而他皆废为田龙川陈亮所谓建邺带後湖为险者今不可以言险矣为形势虑者盍图之【熙宁八年十一月十一日王安石奏臣蒙恩特判江宁军府於去年十一月十一日到任管当职事当时集官吏军民宣布圣化啓迪皇风终成一载所幸四郊无垠天下同文然臣窃见金陵山广地窄人烟繁茂为富者田连阡陌为贫者无置锥之地其北关外有湖二百余顷古迹号为玄武之名前代以为游玩之地今则空贮波涛守之无用臣欲於内权开丁字河源泄去余水决沥微渡使贫困饥人尽得螺蚌鱼虾之饶此目下之利水退之後济贫民假以官牛官种又明年之计也贫民得以春耕夏种穀登之日欲乞明勅所司无以侵渔聚斂只随其田土色高低岁收水面钱以供公使库之用无令豪强大作侵占车驾巡狩复为湖面则公私两便矣伏望明降隆章绥怀贫腐奉勅依案此奏状废湖为田盖始於王安石也增收後湖田租则始於赵善湖田出穀麦所利者小湖关形势所利者大故着废湖之因以待复湖之人云 宋元嘉十年顔延年从文帝乐游苑中观北湖收田勤苦应诏诗曰周御穷辙迹夏载历山川蓄軫岂明懋善游皆圣仙帝晖膺顺动清蹕巡广?楼观眺丰颖金驾映松山飞奔互流缀缇轂代回环神行埒浮景争光溢中天开冬眷徂物残悴盈化先阳陆团精气陰谷曳寒烟攢素既森藹积翠亦葱芊息飧报嘉岁通急戒无年温渥浹輿隶和惠属後筵观风久有作陈诗愧未妍疲弱谢凌遽取累非纏索 张九龄诗南国更数世北湖方十洲天清华林苑日晏景阳楼幕下回仙骑峯傍驻彩旂鳬鹭喧风管荷芰鬪龙舟七子陪诗赋千人和棹讴应言在镐乐不让横汾秋风俗因紆慢江山成易由驹王信不武孙叔是无谋佳气日将歇霸功谁与修桑田东海变麋鹿姑苏游否运争三国康时劣九州山虽幕府在饮岂豫章留水淀还相閱菱歌亦故遒雄图不足问唯想是风流 李白诗空余後湖月波上对瀛洲唐李义山诗玄武湖中玉漏催鸡鸣埭口綉繡回谁言琼树朝朝见不及金莲步步来 野亭马之纯】

【诗万顷冥茫水拍堤当时於此习舟师长江天险虽堪恃鬪舰人谋可勿施莫使黑龙离旧窟且教玄武入新词如何又作蓬瀛景时节来游看水嬉

曾极诗当日湖光彻镜心龙旗风吹此登临而今铁马回旋地斜点黄尘一尺深 朱存诗雷轰叠鼓火翻旗三异翩翩试水师惊起黑龙眠此下原缺十八行】云归片帆起之句

绦岩湖一名赤山湖在句容县西南三十里去府六十里源出绦岩山周回二十里下通秦淮
【旧志】

事迹石迈古迹编曰赤山湖在上元句容两县之间溉田二十四埤南去百步有盘石以为水
疏闭之节南史沈瑀传明帝复使筑赤山塘所费减材官所

量数十万即此湖塘也唐麟德中令杨延嘉因梁故堤置後废大历十三年令王昕复置周百
里为塘立二斗门以节旱暵开田万顷元和郡国志句容赤山湖在县南三十五里茅山记太
元真人内传曰江水之东金陵之地左右间有小泽泽东有句曲之山陶隐居曰小泽即谓今
赤山湖也从江东来直对望山

今此湖半属句容半属上元旧收岁课钱二百二十贯咸平三年正月奉勅除放

湖条江宁府上元句容两县临泉通德湖熟崇德丹阳临淮福祚甘棠旧额八乡今并入丹阳
临泉福祚甘棠四乡百姓自来共贮水绦崑湖浇灌田苗下有百堰堰捺水其湖上接九源山
其堰下通秦淮江自吴赤乌二年到今已七百余年其湖东至数堰西至雨坛南至赤岸北至
青城旧日春夏贮水深七尺秋冬贮水深四尺先是麟德二年前县令杨延嘉并建两斗门立
碑碣具言周回仅百里州司寻差十将丁筹计生徐藏巡湖打量得一百二十二里九十六步
卢尚书判置湖贮水本为溉田若许侵耕难防灾旱取定四尺水则使其浇九乡田苗【九乡
跨句容上元二县】若过令深广又虑浸毁若逢旷旱之年须稍更增加今且定取五尺水则
其不及处且任耕垦种植如有人於五尺水则内盗耕一亩一角推勘得实其犯条人断遣令
衆十日放本管湖长不觉察亦并施行又据十将丁筹状芦发亭北边去岸约有二百来步有
一盘石东西濶四尺七寸南北濶三尺五寸石面中心去水面一尺六寸五分即是五尺之则
并有察柱仰下县便於石上磨刮更刻字记其湖仍每季一申不得卤莽戴经新塘有丰等三
湖围埤内田多是私函取水浇灌田苗准旧例放绦岩湖水下秦淮三日取指挥给放不得专
擅开函取水其湖先有传食田五十亩句容县弓量二十亩三十步上元县弓量二十亩三十
步百堰堰与绦岩湖同置绦岩湖贮水百堰堰捺水保大中曾别差官亲到赤山湖所建斗门
三所通放湖水出入常令湖中积水五尺其斗门或遇山水拥下高於湖内水面即须全开三
所斗门放水入湖候外溪水退却放水出溪下秦注入江专须酌量湖水不得失於元则右前
件湖堰承旧浇灌九乡田苗共一千余顷亩伏奉省符帖命指挥修作贮水逐乡差承润户管
当先有条流岁久去失续於晋天福年中再兴工役修作经今六十余年伏遇明朝重兴添修
建造贮捺百里溪汊山源賑恤耕民备供王赋累奉勅恩给赐料物及借助日食等差两县官
员置造斗门三所计用一万七千六百八十工及添修湖埂并百堰堰共计三万三千六百八
十工衆议重置条流严加束辖谨连符条如前伏乞员外尊慈特赐判印指挥永为证建隆查
员外乾德伍侍御开宝王司空阎侍御魏司空卢司直林员外并判执条常加束辖庆历三年
二月十八日叶龙图知建康府日於古来旧湫处置立大石柱一条将湖心盘石水则刻於柱
上永为定则

樊珣记句容西南三十三里曰赤山天宝中改为绦岩山以文变质也山外周流厥有湖塘旧
址考於前志则曰吴人创之梁人通之矣洎金火有变积为习坎灌莽之所我唐麟德岁邑宰

杨嘉延亦纂前服利农为名虽迹於传闻而事斯茫昧杨氏之後又余百年实滋菰蒲莫植粳稻剥极则责俟能而伸大历十二祀县大夫兼大理司直太原王公听能苏罢劳【一作人】且易弊俗临湖而叹以欲从人吟使臣之清风酌良牧之高课将图永逸匪顾暂劳因察其地形访以輿诵谋始作则定徒撰工月在休农云其荷锄周匝百顷【一作里】蓄为湖塘置两斗门用以为节旱暵则决而全注霖潦则潴而不流收功济时道甚明远开田万顷贍户九乡洎成奥区颇无凶岁鱼稻之盛公实为之昔叔敖芍陂能张楚国史起漳水竟富魏邦秦称郑白汉歌邵杜皆谓是也每商羊罢舞龙见而雩比屋有忧於销铄连阡莫覩于耘耨兹则黛波瀾沦白鸟飞灭下洞庭之鳬雁泳中流之鱣鮪横塘之右构为新亭芬其芰荷树以杞柳杨楚江岭憧憧是途行李实获于廕麻咏歌或借于观览懿乎哉君子之用心也孰愈崇其岛榭侈以林堂此而莫文翰墨奚述大历十二年十月三日记右丹阳绦岩二湖虽在外县以其利民者广故先志之尤加详焉

迎担湖在城西北石头城後五里今为田【旧志】

事迹晋元帝南渡衣冠席卷过江客主相迎负担於此湖侧至今名迎担湖
实録云费县西北有迎担湖溉田三十顷 袁粲败刘彦节走迎担湖
陈轩金陵集有李建勲朱存迎担湖诗

苏峻湖在城西北一十五里周回十里灌田一十二顷案南徐州记迎担湖西北有苏峻湖本名白石陂【旧志】事迹晋咸和二年苏峻举兵於石头陶侃温峤庾亮阵於白石使将军杨谦攻於石头峻轻骑出战谦诈奔白石垒峻逼之才交锋峻坠马侃督护李阳临阵斩峻于白石陂岸至今呼此陂为苏峻湖

张阵湖在石头城後旧传苏峻与晋军尝战于此至今湖侧高墩上有苏大将祠案晋书峻起兵石头北湖距石头才八里今属金陵乡去城十三里

夏驾湖在城东南五十里属上元县丹阳乡今为田【旧志】事迹曹宪扬州记云晋惠帝永宁二年有石浮来建邺自秦淮夏驾湖登岸二百余步百姓咸曰石来石来至明年石冰果入扬州 沈约宋书晋惠帝太安元年丹阳湖熟县夏驾湖有大石浮二百步而登岸民惊噪曰石来于宝曰寻有石水入建邺今丹阳乡范墟渡旧有石浮数尺形如碌礪父老云即古夏驾湖浮来石也

半阳湖一名半汤湖在城东北四十里周回十五里水同一壑而冷热相半【旧志】

事迹輿地志及南徐州记云江乘县南有半阳泉半冷半热热处可烂物冷处如水热处鱼入冷处即死冷处鱼入热处亦死民种稻则溉热水一年再熟今下蜀镇有温汤唐丞相韩滉小女有疾浴温汤即愈此在上元县境 酉阳杂俎云句容县吴瀆塘其水半冷半热可以淪鸡子此又一湖也【马之纯诗一半寒泉一半汤同为此水异炎凉汤泉是处虽多有锤阜斯池特广长谁说吹?如口鼻或云底下有流黄好寻旧迹重开凿地宝无容久瘞藏

朱存诗江南龙节水为乡水不纯陰又半阳一片湖光共深浅两般泉脉异温凉】

摄湖在城东北五十里周回二十里江乘县记云湖在摄山之侧因以为名

三冈湖在城东六十四里周回一十里溉田八十顷地有三冈俯临湖侧因以为名

乌意湖在城东八十里周回三里溉田一十顷

鷺雀湖在城东三里周回二里流入青溪古老相传今斜桥即走马桥桥之东有水平澗是也或云今惟政乡白荡湖即其地【旧志】

事迹輿地志云走马桥侧有鷺雀湖穷神秘苑曰梁昭明太子在东宫有一琉璃盃紫玉杯皆武帝所赐也既薨诏置梓宫後更葬开坟为阍人携入大航乃有鷺雀数万击之因为有司所缚乃获二宝器帝闻而惊异诏以赐太孙封坟之际复有燕雀数万衔土以增其上坟侧今有湖後人因名燕雀湖【杨备诗平湖岸侧见高坟万土衔来燕雀羣监面无波天一色此中文藻似储君 马之纯诗在昔曾为舜帝坟象来耕凿鸟来芸今兹封土麒麟冢乃有衔泥燕雀羣玉海冲融侔至性锦江灿烂擬高文区区羽物犹依恋想见人俦望白云】

娄湖在城东南一十五里周回一十里灌田二十顷水流入觥澳輿地志云娄湖苑吴时张昭所创有湖以溉田宋时筑为苑张昭封娄侯故谓之娄湖

高亭湖在城东南三十里周回二十里溉田三十五顷丹阳记云王仲祖墓东南一十六里有高亭湖

葛塘湖在城东南七十二里周回七里溉田四十顷旧经云昔葛仙翁於此炼丹故以名之

刘阳湖在城东南六十里周回三十里溉田三十顷白社湖在城东南二十五里周回十里溉田一十顷银湖在城南七十里周回一十三里溉田二十顷石埭湖在城南五十三里周回二十二里溉田四十顷白都湖在城南七十里周回八里溉田二十五顷西连白都山

笪湖在城南六十里周回五里溉田一十五顷

梁墟湖在城南二十五里周回十余里溉田二十顷河湖在城西南七十里周回八里溉田一十顷

三城湖在城西南七十三里周回一十五里中有三小城故名

江城湖在句容县西北六十里计一百八十亩深六尺二寸灌溉田八百亩属琅邪乡二十八都

固城湖在溧水县西南九十里周回一百里深三丈南北三十里东西二十五里环楚王故城有水四派湖中流与太平州接界与丹阳湖石臼湖号曰三湖东经五堰自常州宜兴县界流入太湖此道今已堙塞

石臼湖在溧水县西南四十里纵五十里衡四十里西连丹阳湖湖中有军山塔子马头雀垒四山其水旧有二派入龙潭梅梁港经汤家步通浊水此道今堙塞长塘湖在溧阳县北五十三里周回一百五十里接金坛宜兴县界旧名洮湖【旧志】

事迹周处韦昭?道元皆以此湖为五湖之一中有浮山其水东连震泽春夏深秋冬浅 虞翻曰太湖有五湖故谓之五湖洮湖射湖贵湖及太湖为五湖并太湖之小支俱连太湖故太湖兼得五湖之名注云洮湖一名长塘湖在义兴

张勃吴录云五湖者太湖之别名以其周行五百余里故以五湖为名

国语吴越战於五湖直在笄泽一湖中耳范蠡游五湖即此是

郭璞江赋云彭蠡青草具区洮洮以为五湖洮音姚广韵洮余昭切五湖名

南徐州记云延陵县东南长塘湖又名洮湖

輿地志云临津西有长塘湖属延陵永世二县西受溧水通溧阳县界

周处风土记云洮湖别名长塘湖 晋咸和四年韩晃南走将军王允之追蹙於长塘湖大破之王恭於京口起兵诛执政事败走至长塘湖即此

是也

咸和四年苏逸以万余人自延陵湖将入吴兴将军王允之及逸战於溧阳获之亦此处也 按湖即古延陵尉所居其水东连震泽入松江至宋以庾业代义兴太守刘延熙业至长塘湖即与延熙合制遣沈怀明等东讨卒破业於湖夹岸筑垒即此湖也春夏水深五尺余秋冬差浅受大溪南流三十里至大坯山 张籍长塘湖诗一斛水中半斛鱼言湖中多鱼如此

祥符图经云周回一百二十里

朱湖在溧阳县今不详所在郭景纯江赋云其旁则有具区洮洮朱漭丹淝酈道元水经注云朱湖在溧阳今溧阳湖泊为多或谓之淞名称更易古迹之可见者鲜矣或谓朱湖即丹阳湖之异名未详

千里湖在溧阳县东南十五里晋书陆机云千里蓴羹未下盐?南史沈文季云千里蓴羹岂关鲁卫皆指此地也至今产美蓴俗呼千里淞与故县淞相连或说千当作芊末当作秣千末皆省文也秣下即秣陵太氏县境产蓴多且肥美藏蓄可以致远

昇平湖在溧阳县西七十里外自溧水县五堰东流入湖即古中江所经之地又有溪水南自建平县梅渚镇来会

三塔湖一名梁城湖在溧阳县西七十里周十八里西南与昇平湖相接张孝祥有诗

黄山湖在溧阳县西南三十七里黄山下周回五里下湖在溧阳县南一十里周回五里流经白云迳东入太湖

西子湖在城东五十里周回五里溉田五十顷长乐崑仑墩之西有村曰西子其侧有湖因以为名

慈湖在江宁县界接太平州湖滨有巡检寨

事迹石季龙寇历阳赵嗣屯慈湖苏峻败司马流於慈湖

白米湖在上元县东与句容下塘村相接地产白米

溪涧

青溪吴大帝赤乌四年凿东渠名青溪通城北堑潮沟濶五丈深八尺以泄玄武湖水发源鍾山而南流经京岷今青溪闸口接於秦淮及杨溥城金陵青溪始分为二在城外者自城壕合於淮今城东竹桥西北接後湖者青溪遗迹固在但在城内者悉皆堙塞惟上元县治南迤邐而西循府治东南出至府学墙下皆青溪之旧曲水通秦淮而鍾山水源久絶矣【旧志】

事迹輿地志云青溪发源鍾山入於淮连绵十余里溪口有埭埭侧有神祠曰青溪姑今县东有渠北接覆舟山以近後湖里俗相传此青溪也其水迤邐西出至今上水闸相近皆名青溪溪旧有七桥晋郗僧施尝泛舟青溪每溪一曲作诗一首谢益壽闻之曰青溪中曲复何穷尽盖谓此也陶季直京都记云京师鼎族在青溪埭尚书孙瑒尚书令江总宅当时并列溪北晋王含帅王敦余党自竹格渚济沈充自青溪会之至宣阳门苏峻等出南塘横击大破之桓彝别传曰明帝世彝与当世英彦名德庾亮温峤羊曼等共集青溪之上郭璞与焉乃援笔属诗以白四贤并以自序世说云周顗罢临川还都泊青溪时夏暴雨船舫狭小而漏殆无坐处丞相王导曰胡威之清何以过此齐高帝先有宅在青溪生武帝及即位以宅为青溪旧宫永明元年望气者言新林茭湖有王者气帝廼筑青溪旧宫作新茭湖苑以厌之卞彬尝於东府谒齐高帝时高帝为齐王彬曰殿下即宫东府则以青溪为鸿沟鸿沟以东为齐以西为宋仍诵诗云谁谓宋远跂予望之遂大忤旨隋炀帝平陈斩张丽华孔贵嫔二人於青溪柵下【虞部杨公备诗倾城倾国两妃嫔此地闻名不见人潜想旧时红粉面落花风里步香尘阙名诗竟烦擒虎到青溪此夜应无璧月词迎刃春风殢尤物岸花随雨泪胭脂任斯庵诗蛾眉流落碧流中走马来时事已空此日不能留姐已他年谁敢忆高公又青溪不见丽华留遗憾空余故国羞璧月只应明结绮春风吹不上迷楼又开门忽忆东风面步向青溪遶碧湾淡白深红了无迹綠杨烟外一鍾山】今建元寺东南角度溪有桥名募士桥吴大帝募勇士处其桥西南角过沟有埭名鸡鸣埭齐武帝早游鍾山射雉至此鸡始鸣因名焉其沟是吴郗俭所开在苑城後晋修苑城为建康宫即城北塹也【王维诗言入黄花川每逐青溪水随山将万转趣途无百里声喧乱石中色静深松里漾漾沈菱苕澄澄映葭苇我心素已闲清朋淡如此请留盘石上垂钓将已矣张颠诗旅人倚征棹薄暮起劳歌笑揽青溪月清辉不厌多节使

吴公琚游青溪有词呈野亭马公岸柳可藏鸦路转溪斜忘机鸥鹭满汀沙咫尺锺山迷望眼一片云遮临水整乌纱须影苍华酒阑却念在天涯几日不来春便晚开尽桃花野亭跋其後云秦淮海之词独擅一时字未闻米宝晋善诗然终不及字若公可兼之矣辛酉季春承议郎充江南东路转运司主管文字马之纯谨书野亭诗云人道青溪有九曲如今一曲仅能存江家宅畔成花圃东府门前作菜园登阁尚堪观叠障泛舟犹可醉芳樽料应当日皆无恙苔雪潇湘不足言又人日泛青溪青溪曲易迷船回波下上帘卷日东西景物行行见壶觞处处携浮舫闲得醉极目水云低】龙川陈亮论建业形势拥秦淮青溪以为阻今青溪九曲仅存其一马公光祖浚而深广之建先贤祠及诸亭馆於其上筑堤飞桥以便往来游人泛舟其间自早至暮乐而忘归详见先贤祠及亭馆下

白云溪一名白云迳在溧阳县东十里清澈可翫东流入荆溪

鎖石溪在上元县东南四十八里源发白石岩经摄湖六十余里入大江其源上通数里山涧曲屈随下奔注不类人功开凿

长溪在上元县东南六十里濶五丈丹阳记云湖熟前有长溪东承句容县赤山湖水入於秦淮

白李溪在句容县小茅峰北昔高辛时展上公居於溪上手植白李而食之道成仙去

上容溪在句容县水源出中茅过芦江桥经赤山湖入秦淮

谷溪在溧阳县南二十里源出青山曲折流一百十里下合於濑水

浚溪在溧阳县西六十里源出谷山东北流入长塘湖高友溪在溧阳县南二十里源出广德诸山至此聚而为溪下经黄墟荡合於白云迳

举善溪在溧阳县南三十里源出广德诸山至此聚而为溪合於高友溪

楚王东西二涧在茅山

事迹楚王来游顿兵於此因名旧记云崇禧观东二涧是也并华阳洞天三水合流直至崇禧观门前

落马涧一名南涧在江宁县南五里东北流入城濠事迹宋孝武讨元凶元凶军败人马倾满涧中时人呼为落马涧陈亡涸竭

靡芜涧在上元县城东三十里青龙山前路出檀桥事迹金陵故事齐处士刘璫居此璫为儒林之宗年至四十未婚其友为娶王氏乃诣涧折靡芜而去因名靡芜涧

玉涧今蒋帝庙侧缘山涧是【徐铉诗云锺山祠畔宿烟晴玉涧桥边碧树春李湜诗云迸石如散琛穿云似流玉】

东涧在锺山宝公塔之西宋熙寺基之东

事迹石迈古迹编云梁处士刘许彦度隐居之所许尤精释典尝聽讲锺山诸寺因卜筑宋熙寺东涧有终焉之志

鹤台涧在茅山大茅峰之东北尝有鹤羣往来於此涧後有道士张元之筑台以居焉

宜东涧在大茅山西二里昔有仙人展上公於此种碧柰货丹砂故名今杨尚书山居是也

上湖?在溧阳县西六十里源在广德军东北流入县界合於白云溪

冷水涧在句容县玉晨观北

流杯涧在句容县雷平山西大路下

景定建康志卷十八

卷十九

钦定四库全书

景定建康志卷十九 宋 周应合 撰

山川志三

河港

古漕河一名靖安河自靖安镇下缺口取道入仪真新河八十余里

事迹吴聿靖安河记畧曰江出岷山道峡与荆湘沅澧至洞庭积为巨浸合沔水经浔阳东邀彭泽别为九道会为中江东北至南徐州为北江入于海惟中江自湖口合流而下奔放荡潏吐吞日月山或砥之则其势悍怒触舞大艗兀若转梗至其广处旷数百里断岸相望仅指一髮而舳舻上下中流遇风则四顾茫然无所隐避自金陵抵白沙其尤者为乐官山李家漾至急流浊港口凡十有八处称号老风波而玩险阻者至是鲜不袖手东南漕计岁失於此者什一二宣和六年发运使卢公访其利病得古漕河于靖安镇之下缺口谓其取径道於青沙之夹趋北岸穿埤月港繇港尾越北小江入仪真新河以抵新城下往来之人高秋安流八十余里以易大江百有五十里之险实为万世之利役之始兴杨子六合上元分治其所临之地

新河在白鹭洲西南流通大江二十余里

事迹韩忠武王世忠碑云建炎四年金人入境车驾幸四明王闻之亟以舟师赴难乌珠闻王在京口遽勒三十万骑北逐王遂提兵截大江以邀之相持黄天荡四十八日乌珠势危自知力惫粮竭或生他变而王舟师中流鼓柁飘忽若神凡治津渡又皆八面控扼生路垂絶一夕潜凿小河自建康城外属之江以通漕渠幸风波少休窃载而逃
内翰汪公藻建炎间奏议云敌于锺山雨花台各劄大寨抱城开两河以护之

芦门河在上元县长宁乡去县六十里一名蕃人河事迹石迈古迹编云芦门河在芦门漾之侧建炎间始开以通真州亦名蕃人河合黄天荡南王谏议芦场内是其处按此河以蕃名而不述其所以名意汪内翰所谓敌开两河则此河与新河皆敌所开者否则无因以蕃名也

珍珠河在宋行宫後

事迹乃昔陈後主泛舟游乐之河忽遇雨浮沔生宫人指浮沔曰满河珍珠因而名焉此河通护龙河至太平桥西分两派一派出栅寨门一派出秦淮至嘉定闲李尚书珣开後以泄霖涨

见水底有大梁板乃止

小新河在东门外土桥之东

事迹嘉定八年西山真公为江东运副适遇旱蝗细民阻饥欲因役以饱之为养种园前一带河道浅狭乃拨钱米发下蒋山寺令主首继心差本寺僧行部役募五县人夫自土桥东开河欲至蒋山开至半山寺後桥亭石不可掘乃止

新林港又曰新林浦在城西南二十里濶三丈深一丈长一十二里

事迹国朝开宝八年王师收复江南曹彬等破南唐兵於新林港即此地 李白新林浦阻风寄友人诗有云明发新林浦空吟谢朓诗送友人游梅湖云暂行新林浦定醉金陵月又韩翃送客游江东诗云君到新林江口泊吟诗应赏谢元晖盖元晖有新林向板桥诗也

下蜀港在城东北一百里句容县北六十里

事迹唐世置盐铁转运使在扬州本朝都大发运使真州皆於江南岸置仓转般今下蜀镇北有仓城基并盐仓遗址尚存後有河入大江里俗呼曰官港即古漕河也 绍兴七年二月己巳车驾未入建康尝次下蜀即此地也 韩子苍尝居下蜀【集中有与曾宏甫同行下蜀诗下蜀追随日欢言一散愁篮舆随阪路小楫渡潮沟】

竹筱港西至靖安东至石步南连直渚北临大江属上元县金陵长宁两乡由靖安港口至城二十里由石步港口至城四十里在唐世已曰竹筱港迹时於靖安港口得伪吴所铸錠石云吴顺义元年都城铸

石步港在上元县长宁乡去县四十里

事迹石迈古迹编云摄山西花林市之东有曰石步港西连竹筱河北出大江 徐铉临石步港赋诗有云吹浪游鳞小黏苔碎石圆

沟渚

潮沟吴大帝所开以引江潮接青溪抵秦淮西通运渚北连後湖其旧迹在天宝寺後【天宝寺故基在今城东北角外更西一里长壽寺前】

事迹实录云潮沟东发青溪西行经古承明广莫大夏等三门外西极都城墙对今归善寺西南角南出归善寺故基在今城北鸡笼山东经闾阖西明二门接运渚在西州之东今笕桥西南流入秦淮乾道南北桥河是也其北又开一渚经栖元寺门【栖元寺在覆舟山西南鸡笼山东北】至後湖以引湖水至今俗亦呼为运渚其实古城西南行者是运渚自归善寺门前

东出至青溪者名曰潮沟其沟东头已堙塞才有处所西头则见通运渎
京都记京师鼎族在潮沟北 石迈古迹编曰按建康实录所载皆唐事距今数百年其沟日以
堙塞未详所在今城东门外西抵城濠东出曲折当报宁寺之前亦名潮沟此今世所开非古
潮沟也案徐铉有和锺大监泛舟诗云潮沟横去北山阿

张忠定公亦有诗云潮沟一曲已生蒲则是南唐及宋初潮沟古迹犹在也 东南利便书曰古
城向北秦淮既远其漕运必资舟楫而濠堑必须水灌注故孙权时引秦淮名运渎以入仓城
开潮沟以引江水又开渎以引後湖又凿东渠名青溪皆入城中由城北堑而入後湖此其大
畧也自杨溥夹淮立城其城之东堑皆通淮水其西南边江以为险然春夏积雨淮水泛滥城
中皆被其害及盛冬水涸河流往往乾浅【朱存诗云流水东西傍帝台六朝重为两朝开曾
看鷁首知高下莫问渔舟识去来 野亭马之纯诗云潮沟沟外尽深泥泥上潮生沟却低直向
北行连运渎折从东去入青溪空中不断檣乌过岸上相望瓦翼齐好是画桥深曲处荷花盈
荡柳垂堤】

御沟在古御道两旁岁久堙塞

事迹南史桂阳王休范举兵杜黑驪乘胜渡淮黄门侍郎王蕴伤重踣於御沟之侧 实录朱雀
门北对宣阳门相去六里名为御道夹开御沟岁久湮塞今宫城以南御街两边俱有沟在居
民屋下者乃南唐所开非六朝之旧迹【吴融诗云一水终南下何年????作沟穿城初北注过
苑却东流遶岸清波溢连宫瑞气浮去应涵凤沼来必渗龙湫激石珠争碎紫堤练不收照花
长乐曙泛叶建章秋影炫金茎表光摇绮陌头旁沾画眉府斜入教箫楼有雨难澄镜无萍易
掷鉤鼓宜尧女瑟荡必蔡姬舟臯看通鸣鹤津应接斗牛回风还潏潏和月更悠悠浅忆觞堪
泛深思杖可投祇怀泾合虑不带陇分愁自有朝宗乐曾无遗穴忧不劳夸大汉清渭贯神州
王半山诗云渺渺金河涨欲平数支分渌报清明常萦輶路漂花去更饮流杯送酒行静见金
舆穿树影清含玉漏过墙声衰颜一照自多感回首江南春水生】

霹雳沟在城东五里王半山有诗云霹雳沟西路柴荆四五家

百丈沟一名百步沟在溧阳县南三里源出燕山相传云此处田多高印开沟以灌溉东流合
於白云迳下入太湖

铁冶沟在鍾山乡马鞍山之下有地三亩余皆铁近水垠通小港耆老皆呼为铁冶沟

事迹梁时作三埧埧淮水以灌壽州一於壽州一於荆山一於盱眙久不能成聚江南之铁融
液载往堆筑之上种榆柳一夕崩坏声闻数里弃所聚之余铁於此至淳佑七年赵都督葬於
其旁置炉鞴十数以铸铁炮匠人烹凿其地坚不可入乃已

直渎在城北隶上元县鍾山乡去城三十五里濶五丈深二丈西至?埧东北接竹筱港流入大
江旁有直渎山直渎洞吴後主所开渎道直故名曰直渎【旧志】事迹輿地志云白下城西

南有蟹浦蟹浦西北有直渚

伏滔北征记吴将甘宁墓在此或言墓有王气孙皓恶之乃凿其後为直渚

晋苏峻举兵温峤帅师救京师遣王愨期等为前锋次直渚即此地 杨修诗注云渚在幕府山东北长十四里濶五丈深二丈初开之时书穿夜复自塞经年不就伤足役夫卧其侧其夜见鬼物来顷因嗟曰何不以布囊盛土弃之江中使吾徒免殫力於此伤者异之晓白有司如其言渚乃成【朱存诗云昼役人功夜鬼功阳开陰闔几时终不闻掷土江中语争得盈流一水通 野亭马之纯诗云直渚如何计得工长江虽远欲相通比尝开凿不胜苦已复淤填还似空闻鬼夜中皆有语弃泥江里解成功有司号令才依此滚滚波流渐向东】

运渚在上元县西北一里半吴大帝赤乌三年使左台侍御史郗俭监凿城西南自秦淮北抵仓城通运於苑仓今所凿在城西门近南其水东行过小新桥而南经斗门桥流入秦淮又东北过西虹桥循宋行宫城西迤 向北乃其故道其自闪驾桥经天津桥而东者合於青溪【旧志】

事迹案建康宫城即吴苑城城内之仓曰苑仓故开此渚通运仓所时人亦呼为仓城晋咸和中修苑城为宫惟仓不毁是名太仓在西华门内道北【朱存诗舳舻街尾日无虚更凿都城引漕渠何事馁来贪雀谷不知留得几年储】

破冈渚在句容县东南二十五里

事迹实録云吴赤乌八年使校尉陈勲作屯田发屯兵三万凿句容中道至云阳西城以通吴会船舰号破冈渚上下十四埭上七埭入延陵界下七埭入江宁界晋宋齐因之梁改为破墩渚遂废而开上容渚陈高祖即位又堙上容渚而修破冈至隋平陈乃废後宋少帝於华林园开渚聚土以象破冈埭与左右引船唱呼以为欢乐

义沟渚在城东二十里源出东青村下入秦淮长七里溉田一百余顷

径渚在溧阳县北三十里水自金坛县界来入长塘湖镇江志谓晋宋旧有此渚隋大业初县令达奚明又加疏决

池塘

放生池案旧图经唐乾元中诏於江宁秦淮太平桥临江带郭上下五里置放生池八十一所有碑昇州刺史顔真卿文旧以府治东东接青溪北通运渚者为之【旧志】今秦园之侧府学之东即古放生池也淳熙间史待制正志移放生池于青溪建阁其上遇祝圣立班阁下府学遂因旧放生池为醵水其流亦通青溪王尚书埜以其池乃祝圣之地立板榜于舞雩亭门禁渔捕池近行路水深而堤不固时有溺死者马公光祖闻而悯之池名放生岂容有溺死者乃命能仁寺僧筑堤甃街立大木为栏槛自是无溺者矣又修辟青溪阁前为飞梁缭以朱栏深迴汪洋尘迹莫能到也天基节放生其间真足以浚皇仁而遂物性详见青溪阁下

天泉池宋元嘉二十三年凿一名天渊池【旧志】

事迹龚颖运历图云晋孝武太元十年大旱井渫皆竭太官供饘皆资天泉池自晋已有此池矣 沈约宋书云明帝泰始二年天泉池白鱼跃入御舟 梁书陆荣公传云天泉池中新制舟形狭而短惟引太常刘之遴国子祭酒到溉右卫朱异中书黄门郎陆倕同载 江总华林园天渊池铭云晓川漾璧似日驭之在河宿夜景流金疑月轮之驰水府今宫城後法宝寺西南菜园中荒池尚余一亩即此池也

善泉池一名九曲池在台城东东宫城内周回四百余步

事迹金陵故事梁昭明太子所凿中有亭榭洲岛曲尽幽深之趣太子泛舟池中尝曰何必丝与竹山水可忘情【野亭诗十顷青瑶浸碧流更添景趣极深幽旁为九洲十八岛上有五城十二楼苔雪荷花风度晓潇湘芦竹雨生秋昭明心想知何似好聽骑鲸汗漫游 杨虞部诗影浸龙楼彻凤城昭明有意在澄清穿时深欲状溟渤乐府当歌重润声 鲍谨由夷白堂小集云甲午春与李之仪端叔叶棫薪之高秀实茂华同过景阳台九曲池辱井三品石慨然成诗有云平池九曲在春水萦弯碣】

饮马池宋大明中立于玄武湖北上林苑中

洗鉢池在蒋山宝公塔西二里法云寺基方池是也覆盃池今城北三里西池是也

事迹晋元帝中兴颇以酒废政丞相王导奏谏帝因覆盃于池中以为诫【马野亭诗当初一马过江来幕府山头刈草莱无数流离未安集几多政事合图回只应早起观庭燎安得时常近酒盃江左中兴仗谁力一池春水泛新醅 杨虞部诗金盃覆处旧池枯此後还会一醉无东晋中兴股肱力元皇亦学管夷吾】

西池案宫苑记在太初宫西门外吴之西苑今惠日寺後池也【旧志】 互见太子湖

事迹吴宣明太子孙登所创谓之西苑 世说晋明帝为太子时欲作池台元帝不许太子养武士一夕中作比晓便成即今谓之太子西池

丹阳记曰西池孙登所创吴史所谓西池明帝重修之耳

记室新书云西苑内有太子池孙权子和所筑

实録注云其宫城西南角本有池名清游池通城中乐贤堂并肃宗为太子时所作 晋中兴书云温峤拜中庶子在东宫甚见宠嘉僚属莫与为京数规谏讽议甚有补助太子时起西池楼观颇多劳费峤口疏谏太子纳焉 建康实录云晋太元十年苻坚为姚萇慕容冲所攻遣使求援诏谢安率衆救之帝自行西池宴羣臣钱安赋诗者五十八人其地当在今宫城之西北 晋书云刘毅征卢循败归帝大宴于西池有诏赋诗毅诗云六国多雄士正始出风流毅自以武功不竞故示文雅有余也【刘叔源诗悟彼蟋蟀唱信此劳者歌有来岂不疾良游常蹉跎逍遥越城肆愿言屡经过回阡被陵阙高台眺飞霞惠风荡繁囿白云屯层阿景旻鸣禽集水木

湛清华褰裳顺兰沚徙倚引芳柯美人愆岁月迟暮独如何无为牵所思南荣诫其多】

蒙汜池在台城内【旧志】

事迹梁陈龙舟嬉游之所杨虞部尝赋诗【春条拂岸柳如金一监澄空照底深傍见龙舟赭袍影分明红日在池心】

栅塘在秦淮上通古运渎不详其始【旧志】

事迹实录注吴时夹淮立栅号栅塘王隐晋书云王敦反以兄子应为嗣沈充自吴率众万余人至与王含合充司马顾扬说充曰今日举大事而天子已扼其喉情离众沮持疑犹豫必致祸败今若决破栅塘因湖水灌京邑肆舟舰之势极水军之用此所谓不战而屈人兵上策也充不用其言王敦教诛郭璞璞谓伍伯曰吾年十三时于栅塘脱袍与汝吾命应在汝手中伍伯感昔念惠衔涕行法梁天监九年新作缘淮塘北岸起石头迄东冶南岸起後渚篱门达于三桥作两重栅皆施行马至南唐时置栅如旧【马野亭诗六朝何处立都城十里秦淮城外行上设浮航如道路外施行马似屯营关防直可防津渡缓急徒能御寇兵非是後來谋改筑如何今日作陪京】其後置闸泄城内水入于江俗呼为栅寨门乾道五年史公正志重修後废景定元年马公光祖重建详见城阙志

横塘案实录注在淮水南近陶家渚缘江筑长堤谓之横塘淮在北接栅塘【旧志】

事迹宫苑记吴大帝时自江口沿淮筑堤谓之横塘北接栅塘在今秦淮迳口吴时夹淮立栅自石头南上十里至查浦查浦上十里至新亭新亭南上十里至孙林孙林南上十里至板桥板桥上三十里至烈洲吴都赋曰横塘查下邑屋隆夸楼台之盛天下莫比【杨虞部诗早潮才过晚潮来一一轩窗照水开监面无尘风不动分明倒影见楼台马野亭诗如今何处是横塘在府城南淮两旁魏蜀两都皆不似蓬莱三岛足相方乌衣巷口排金屋朱雀桥边立粉墙有底繁华难说似何妨把作画图张】

倪塘在城东南二十五里

事迹晋书王敦自湖陰使王含钱凤等以兵五万逼京师帝亲率大军次南塘夜募勇士陈嵩等领甲卒千人渡水掩其未备大破含军于越城含军既败乃率余党自倪塘西置五城如却月势即此处也南史刘毅初当之荆州表求东道还建邺辞墓去都数十里不过拜阕宋武帝出倪塘会毅胡藩请杀之帝曰吾与毅俱有剋复功其过未彰不可自相图其後北讨谓藩曰若从卿倪塘之谋无今举也

梁书陈霸先既破侯景时齐兵自秣陵东跨淮立桥引兵渡自方山进及倪塘互见五城

临贺塘在城东三十里屈曲一十里灌田二十顷梁临贺王萧正德理田于此因以为名

铜塘在城东四十里屈曲一十五里溉田二十顷长塘在城东南六十里屈曲五十里溉田一百顷王塘在城东四十里屈曲一十五里溉田三十顷开善塘在城东三十里屈曲一十五里溉田二十顷蠡湖塘在城北二十里屈曲一十三里溉田一十顷刘塘在城北三十里屈曲二十里溉田一十顷

水门塘在城东三十五里屈曲二十里溉田一十七顷郭于塘在长隐山东其塘五亩深五尺一寸灌田六十余亩其近村亦以郭于名水常满乡人涸之必有震电属茅山乡十三都石头堰

上铃塘在句容县南一十三里计四十一亩一角四十二步深五尺三寸灌田一百一十三亩

下铃塘计六十六亩二角三步深五尺三寸灌田二百单二亩

郭西塘在句容县西一里计一百八十亩一角五十步深七尺三寸灌田五百七亩

南黄塘在句容县东北十里赤堰约八亩深五尺灌田二百顷

西黄塘在句容县东北十里涧西大小十三所广一十五亩灌田一百五十顷

井泉

景阳井一名胭脂井又名辱井在台城内陈末後主与张丽华孔贵嫔投其中以避隋兵其井有石栏多题字旧传云栏有石脉以帛拭之作胭脂?或云石脉色类胭脂案曾南丰集辱井铭曰辱井有篆文云辱井在斯可不戒乎井下文共十八字在井石槛上不知谁为文又有景阳楼辱井铭又有陈後主叔宝辱井记云江宁县兴严寺并石槛铭莫知谁作也今皆磨灭唯辱井铭数字仿佛可辨【旧志】

事迹案南史隋克台城陈後主与张丽华孔贵嫔俱入井隋军出之

韵语阳秋曰金陵之法宝寺井有石栏红?若胭脂相传云後主与张孔泪所染 皇朝苏易简尝作陈宫井记今石刻在行宫学士院内【记云陈宫井阁遗址仅存傍有石甃石栏周以?篆年禊寢远辞旨残缺其可观者有戒哉戒哉数字询诸耆艾即陈之季主避兵之井也诘其篆刻即後之名士垂训之文也敢复明其志而言曰呜呼惟天匪亲君为司牧司牧之畏有若厉也有无为也苟非厥道虽降志辱身未足补过苟底厥绩则凭几高视可以致理是故为人君者可不戒哉叔宝之盗南国也悖民心慢天鉴忘吞日之业休投籤之范淫?之失一至於此且城下之盟床下之巽前圣尚或耻之矧於沈井哉夫唐虞之惧与陈主之惧一也文武之乐与陈主之乐一也唐尧统天文思安安御彼黄屋如临深渊此避兵之井也虞舜君临德音悃悃睦彼二女乐而不淫此又同绳之妃也灵台灵囿其文王之结绮乎公旦公奭其武王之狎客乎四圣克念勃然而昌後主反是湑然而亡为乐之理孰否孰臧余因公暇游斯地覩斯井吊往愤懣故穷理尽性砉其石而文之 南丰曾公巩辱井铭辱井有篆文云辱井在斯可不戒乎

并下文共十八字在井石檻上不知谁为文又有景阳楼下井铭又有陈後主辱井记云江宁县兴严寺并石檻铭莫知谁作也历序隋文帝命晋王广伐陈後主自投井中令人取之惊其太重及出乃与张贵妃孔贵嫔三人同束而上其末云唐开元二十二年三月十七日前单父县令左转此县丞太原王以下阙 王荆公诗结绮临春草一坵尚残宫井戒千秋奢淫自是前王耻不到龙沈亦可羞杨虞部诗擒虎戈矛满後宫春花无树不秋风苍惶益见多情处同穴甘心赴井中 阙名诗结绮春休玉树残陈王犹自惜姝颜石床空染胭脂恨不比双妃楚竹斑曾极诗寒泉玉甃没春芜石染胭脂润不枯杏怨桃羞娇欲堕犹将红淚洒黄奴 马野亭诗应说兵来且莫降急寻宫井共深藏侧身待作淩波步仰首还成半面粧已分葬埋依古甃可怜牵挽出银床至今汲水人皆说犹带胭脂旧日香

阙名诗罗绮香中狎客吟望仙楼阁半天心谁云龙虎滩头水不及庭前眎井深

阙名诗复道连廷亘碧空庭花无日不春风天翻地覆江山在赢得声名眎井中】

龙天王井在台城前旧传梁武帝为郗后立龙祠井上号龙天王井梁陈皆祀之【旧志】

事迹六朝记云梁武帝郗后性妬忌武帝初立未册命因忿怵乃投殿庭井中衆赴井救之已化毒龙烟焰冲天人莫敢近帝悲叹久之乃册为龙天王使井上立祠自梁历陈享祀不絶陈灭乃迁其祠於京城道德寺大业初又置祠於旧处

义井在城南天禧寺侧天圣五年丞相李公迪所凿事迹义井记畧曰相国陇西公赴镇江宁思福黎庶志在康济常虑一物不得其所有塔主大律师可政者乃谓城之南隅康衢四达憧憧往来朝及其夕请官之隙地特建义井俾历炎酷以济其衆公跃闻斯美笔允其请遂募其积善者唐文遇出家帑以备其事畚鍤星聚穿凿聿成固砌翠珉广覆华宇冽冽其泉纵铄金焦石其源靡息轮蹄絶虑鱼樵无患老幼承惠矣天圣纪号五载孟春月一十有六日记银青光禄大夫行尚书刑部侍郎【碑字阙】内堤堰桥道提举江南东路兵甲巡检公事上柱国李迪

三义井在石头城後清凉寺庄及石子冈七里舖共三井

事迹南唐保大三年置井栏上有僧广慧刻字以记岁月

又案金陵故事有三井在瓦棺寺後汲一井则二井俱沸因名其地为三井冈

应潮井在蒋山头陀寺山顶第一峰佛殿後【旧志】事迹蒋山塔记云梁大同元年後舍人石兴造山峯佛殿殿後有一井其泉与江潮盈缩增减相应段成式酉阳杂俎云蒋山有应潮井在半山之间俗传云与江潮相应尝有破船朽板自井中出贞观中有牧儿汲水得杉板长尺余上有朱漆字曰吴赤乌二年豫章王子骏之船 石迈古迹编曰应潮井蒋山之顶古头陀寺之後其井与江潮相通盈缩往来常应之时于井间得芦根断帆之属【杨虞部诗碧甃时时减复增山头海面密相应古来泉脉谁穿凿潮落潮生不暂澄马野亭诗俯看沧海仰看山相去分明霄壤间有井无冬亦无夏与潮俱往又俱还想应透彻深无底怪得浮沈转似环不用浙江亭上望请君来此一凭栏】

藏水井案宫苑记在城东北十里覆舟山北【旧志】事迹宋孝武大明中凿以藏水齐梁陈皆因之【杨虞部诗尤喜凌人职未隳闲藏出纳示箴规战兢国步艰难者常似临深履薄时马野亭诗向日周家有凌人後來此事特相因冬时室内收藏早夏日宫中给赐新但得满盘堆水玉不须对面着风轮看来深濶能多少调得陰阳冷处均】

沸井在句容县东三十五里

事迹丹阳记曰句容县有沸井亦曰沸潭又曰句容县东三十五里有龙冈冈顶有沸潭周回十二丈闻人声便沸不闻不涌也 异苑曰句容县有延陵季子庙庙前井及渎常自涌沸于今犹然图经云在县东三十里虎耳山

响井在江宁县陶吴镇西北二百余步

事迹响井栏上存元佑五年四字或以纱帛蒙其上以物击之则作鼓声或以瓦石投其中则作钟磬声今属陈主簿家园中

许长史井在茅山玉晨观内今有碑碣存【旧志】

事迹陶隐居云旧在许长史宅岁久堙没後得井于观中其泉色白而甘 有井铭乃徐铉所作【长史含道栖神九天人非邑改丹井存焉射兹谷鲋冽彼寒泉分甘玉液流润芝田我来自西寻真紫阳若爱召树如升鲁堂敬刊翠琰永识银床噫嗟後学挹此余光】

陶隐居井在茅山华阳宫前桥东【旧志】

事迹陶贞白七次丹成皆中等神人告以定分止合得此中丹于是服之遁景而去 井岁久堙没政和初道士庄慎修索而得之初去三尺许得瓦井栏虽破合之尚全环刻大字【先生丹阳陶仕齐奉朝请壬申岁来山栖身高静自号隐居同来弟子吴郡陆敬游其次杨玉吴戴陈许诸生供奉阶宇湖熟潘还及远近宗稟不可具记悠悠历代讎勿识焉梁天监三年八月十五日钱塘陈宣懋书】及见磚甃又穿数丈获一圆石砚径九寸许列十一趾涤之朱色粲然又得铜鑪有柄若今所谓手炉者仍于砂石间有丹一粒大如芡实光彩射人亟取之遂堕井中水极甘冷虽大旱不竭炉砚藏宫中

乐官井在溧阳旧县寨东百余步

事迹南唐时东以太湖与钱氏分界溧阳屯兵间遣诸子巡视有憇于驿者乐工忤意沈之井滯魄为祟托宿必魘或死无敢入者後有达官欲寓宿驿吏以事告不信其夜果见服绯綠者数辈自井出叱问具陈冤状祈葬遗骸於高原达官许之复投于井明日为出其骸以葬其怪遂絕今犹呼乐官井即当时驿舍所在云

汤泉在城东六十里上元县神泉乡汤山其处有圣汤延祥院旧凡十所今存者六

事迹吴郡録曰江宁县有汤山出温泉二所可以治疾 张勃吴録曰丹阳江宁县有汤山出温泉三所宋刘义恭汤泉铭云秦都壮温谷汉京丽汤泉炎

德资远液暄波起斯源 石迈古迹编云鴈门山北有汤泉去都七十里用以洗浴治疮饮之已肠胃冷疾齐时有老沙门语彼村人云此镬汤之冲也【寺中前後留题甚衆惟元佑间周公沔诗最为警拔鴈门泉水热於汤清淨还从古道场应笑骊山山下水至今犹带粉脂香刻石见存】

忠孝泉近忠孝亭

事迹武举状元周虎有记【马军行司公宇在建业西门之里东距冶城伊迹前人规橰殊未易及惟西北一隅独无瀦水之地郁攸之戒每用惴焉暇日因续西园四望亭之北为轩三楹即檐之沥凿池方十有六丈以受衆溜以备不测穴地不四五尺偪於地心得泉津津从而深之则泓纤随溢清冷而甘香以之瀹茗涤烦颇胜他水亦可异也思有以名之而不得一日引睇冶城之颠有屋孤起瞰之则晋将军卞壶望之墓傍之舍所谓忠孝亭者是已嗟乎忠孝之於人与生俱生夫人固有之卞氏一门顾得擅此名於天地间耶方典午不竞官爵自尊品流自高纷如也至俯首一意惟国之忧惟君之徇死生祸福不复吾计如望之者凡几人父死国难子死父难盖六朝以来旷未之闻则谓父忠臣谓子孝子可无愧裴母之言矣路有贪泉行道之人耻而不饮虎也何幸虽得官台麓而食息起处乃隣英灵於千载之上且新泉之出与忠孝一亭下上适相近可不挹望之之高风仰望之之遗烈托忠孝之美名复皇皇乎他求哉於是乎遂名其泉曰忠孝庶後之饮此水者不怀行道之疑而望之之流芳汲之则在云嘉定岁庚午冬十月临淮周虎叔子记并书】

玉兔泉在府学东廊前

事迹秦丞相桧未仕时宿学夜见白兔入地使人掘之一丈许得泉桧既入仕设井栏镌石篆书玉兔泉三字

一人泉在蒋山北高峯絶顶古定林寺後仅容一勺挹之不竭自山下至泉五里【章望之诗云一人泉在此山颠万人可饮闻旧言顾我无人试此水盛夏独饮南风前】

道光泉在蒋山之西梁灵曜寺之前

事迹熙宁八年僧道光披榛莽得泉深五尺穴竹引注寺中由岭至寺凡三百步王荆公手植二松于其傍其後道光又得二泉合为一派主寺者作屋覆於其上名曰蒙亭以此泉得之道光故名道光泉【王荆公诗箴龙带雨绕山行注远投深静有声云漏滴槽朝自暖虹垂斋镬午还晴铜瓶各满幽人意玉甃因高正士名神力可嗟妨智巧桔槔零落任苔生】

宋熙泉在蒋山宝公塔之西有宋熙寺基基之左有泉因名宋熙泉今蒋山兴国寺日用皆此泉也

喜客泉在茅山栖真观南客至则涌沸而起【旧志】事迹句曲三茅山记喜客泉在大茅北垂方数尺客至即沸故以为名【漫塘刘莘诗物我本忘情无情惟止水底事山中泉客来如有喜悠然镜面平倏尔鱼眼生少焉开笑靥似与客逢迎客喜泉岂知泉笑客何有邂逅深山中聊结忘情友深居韦去非次韵白云在空山丹光照屋水仙人迹如扫客至泉辄喜世路多不平个中太清生政以静自怡亦与凡将迎风波处处息坎离人人有要使到此踪尽作蓬瀛友】

抚掌泉在茅山崇壽观前虽旱不涸旧记云在鸿禧院东闻击掌之声涌出如沸其味甚佳冬时常暖亦呼为冬温泉

白骑泉在城北十五里石迈古迹编曰吴大帝时蒋帝乘白马执白羽扇见形于此马跑地成泉因以名之其泉在骑亭山之侧属上元县慈仁乡

白乳泉在摄山栖霞寺千佛岭下昔因人伐木始见石壁上刻隶书六大字曰白乳泉试茶亭不知得名於何人

陈隆泉石迈古迹编曰隶上元县丹阳乡绛岩山之北父老相传昔有陈隆道人尝结茅其侧其泉清澈甘冷绕山十余泉皆所不及建炎中居民避难山中取给此泉泉之东有屋基平坦无石莫知所因

田公泉在茅山玉晨观东南一里亦呼柳谷泉【旧志】事迹真诰定録言华阳雷平山有田公泉饮之除腹中三虫与隐泉水同味云是玉沙之流津也用以浣衣不用灰以此为异

玉液泉旧记云在茅山崇壽观後山罡上路西畔仙人捧石北泉若乳色甘而香能去腹中诸疾

海眼泉旧记云在杨尚书山房常时泉涌能应海潮在积金中茅之西今元符宫西园是也

诸水

鍾山水

事迹李卫公浮槎山水记云李侯以镇东留後出守庐州因游金陵蒋山饮其水既又登浮槎至其上有石池涓涓可爱盖陆羽所谓乳泉漫流者饮之甘则鍾山水与浮槎之水其味同也

石头城下水

事迹中朝故事云李德裕博达居廊庙日有亲知奉使于京口李曰还日金山下杨子江中零泉水与取一壶来其人举棹日醉而忘之泛舟至石头下方忆乃汲一瓶于江中归京献之李公饮後讶叹非常曰江表水味异于顷岁矣此颇似建邺石城下水其人谢过不隐也

八功德水在蒋山悟真庵後因梁天监得名

事迹天圣记云【鍾山之阳有泉曰八功德梁天监中有胡僧昙隐飞錫寓止修行有一龕眉叟相谓曰予山龙也知师渴饮功德池措之无难矣人与口灭一沼沸成深仅盈寻广可倍丈浪井不凿醴泉无源水旱若初澄挠一色厥後西僧继至云本域八池一已智矣此味大较相类岂非竭彼盈此乎一清二冷三香四柔五甘六净七不餽八蠲痼又其效也夫姜诗孝闻获渊开而鲤跃貳师诚至因剑刺以流飞义有激而相求物何远而不应向非兼济则为怪力是泉也方外净因寰中美利矧其灵者安可忽诸世故流离滋液长在惜其风雨不庇荆芜四侵寂寥山阿孰为起废史馆学士兰陵萧公贯以已俸作亭甃版石八自南康购至楹柱四下东府所成凿崖以审曲积土以端术奢不至侈岿然独存仍练僧结庐於前以掌之庶几便民汲息客游非有徵於妄福也承奉郎守大理寺丞知上元县事梅摯记】嘉定记云【八功德水鍾山之胜也亭久弗葺编修鍾公建台之明年元正之三日率僚属为国祈年於宝公味灵源之甘冽慨栋宇之湫陋图厥而新之鳩工度材斲岩拓基增庌为高不扰於民不侈厥费轮奐翼然所以护神渊而绵美泽也自有此山即有此水梁天监中始得名我宋天圣中史館萧公始亭其上迨今百一十有七年复宏旧观闡幽发奇修前有待则嗣而葺之以沾溉後人滋福于无疆是山龙沸出之祥鍾公重建之美意也公名将之字仲山长沙人自枢属三持节为此来今着籍元土是役也俾其属浚都赵师縉董之因识其岁月嘉定改元上巳日记并书】题咏【杨虞部诗翠壁如屏旱不枯一泓甘滑饮醍醐高僧到此闻丝竹还有金鳞对跃无注云高僧昙隐游行于此忽闻金石丝竹之音俄见清泉一泓莹澈甘?有积年疾者饮之皆愈王半山诗寒云静如痴寒日惨如戚解鞍寒山中共坐寒泉侧新甘出短绠一酌烦可涤仰攀青青柳木醴何所直念方与子违儻恍夜不眠起视明星高整驾出东阡聊为山水游以写我心悵知子不餽糟相与酌云泉

曾极诗数斛供厨替八珍穿松漱石莹心神中涵百衲烟霞色不染齐梁歌舞尘 马野亭诗鍾山有岭号屏风碧石青林一径通聽得山腰鸣陆续看来海眼净冲瀾初尝但得烦心解再饮能令百虑空软美轻清无限好经中所说正相同】

曲水晋海西公於鍾山立流杯曲水延百僚

事迹水经注曰旧乐游苑宋元嘉十一年以其地为曲水武帝引流转酌赋诗裴子野宋畧曰文帝元嘉十一年三月丙申禊饮於乐游苑且祖道江夏王义恭衡阳王义季有诏赋诗【顏延年应诏譙曲水诗道隐未形治彰既乱帝迹悬衡皇流共贯惟主创物永锡洪算仁固开周义高登汉祚融世哲业光列圣太上正位天临海镜制以化裁树之形性惠浸萌生信及翔泳崇虚非徵积实莫尚岂伊人和实灵所贐日完其朔月不掩望航琛越水輦賁踰嶂帝体丽明仪辰作貳君彼东朝金昭玉粹德自润身礼不愆器柔中渊映芳猷兰秘昔在文昭今惟武穆於赫王宰方旦居叔有晬睿蕃爰履奠牧宁极和钧屏京维服朏魄双交月气参变开荣洒泽

舒虹烁电化际无间皇情爰眷伊思镐饮每惟洛宴郊饯有坛君举有礼幙惟兰甸画流高陞分庭荐乐析波浮醴豫同夏谚事兼出济仰闕丰施降惟微物三妨储隶五尘朝黻途泰命屯恩充报屈有悔可悛滯瑕难拂 萧颖士蓬池禊饮序曰晋氏中朝始参燕胥之乐江左宋齐又间以文咏风流遂远蔚为盛集萧子范家园三日赋有云聊洁新而濯故式东流之前轨右瞻则青溪千仞北顾则龙盘秀出】

溧水一名瀨水在溧阳西北四十里

事迹前汉地里志云溧水出南湖 祥符图经瀨水西承丹阳湖东入长塘湖盖丹阳湖即南湖也尝考其详固城春秋时吴濊渚县【案胜公庙记】汉溧阳县治在焉【隋开皇十一年割溧阳之西置溧水县固城在今溧阳县之西溧水县界绍兴中得後汉溧阳校官碑於固城湖之傍故知其为汉县治】丹阳湖在其南故曰南湖溧水出南湖而东县在水之北北曰阳故名溧阳自东坝既成於是丹阳湖水不复通本县界然古溧水之出於丹阳湖明矣今县西北有水源出曹山迳溧水县界东流入本县界合于永阳江六朝事迹编及乾道建康志皆指曹山之水为溧源非也 元和郡县志溧水在溧阳县南六里盖唐溧阳县治即今之旧县也溧水东流为永阳江江上有渚曰濊渚即伍子胥

乞食投金处故又曰投金濊自濊渚东流为濊溪【乡民讹为烂溪】入长塘湖一派东流为吴王漕【吴王漕者杨行密时漕运所行也或以为春秋时之吴王】 真诰云夫至贞者万乘不能激其名投金溧女是也陶隐居注云金溧女是子胥所逢浣纱於溧水之阳者後既投金以报之故谓之金溧详见李白所作濊女碑

吴漕水源出溧水县东庐山东南流入吴漕过白马桥马沈二港港下入丹阳湖

太山水源出溧水县南流入固城湖经五堰东入溧阳县三塔港

亭水源在句容县北三十里亭山南遶县城东与未山湖水合流下百堰堰入秦淮

汝南湾在城东八里当秦淮曲折处【旧志】

事迹晋汝南王渡江因家於此遂名汝南湾齐陆慧晓刘瓛宅并在湾前又有东冶亭在湾之东南乃晋太元中饯送之所 齐陆慧晓清介自立张绪目为江东裴乐家於湾前张融自称天地逸民牵船住岸卜以隣居刘瓛弟璡字子敬二人并居其间水有异味时酌饮之至今取此水酿酒极佳事见览古诗注【杨虞部诗汝南王昔过江东此地名将汝海同玉觥酌来人易醉有时人面照花红 马野亭诗当时只号江南湾後有三人住此间自谓逸民须隐约并称贤士想高闲祇缘水味都殊异且欲隣居数往还好是有时相就饮不妨铛脚对青山】

桐林湾在秦淮南南逼府城北临淮水岸旧植桐甚繁故以名东北有浮航即长乐桥也

明月湾在句容县西南一里通淮谢安石曾月夜泛舟垂钓今钓基尚存

乌龙潭在城北鍾山乡永庆寺之前水旱祈祷屡应按輿地志云宋元嘉末有黑龙见于玄武湖侧今潭近湖所疑即当时龙见之处

菖蒲潭在句容县仙人坊许长史居此学道又顾著作山房多产菖蒲一寸九节

投金濑在溧阳县西北四十里源出曹姥山经溧水县界南流为颍阳江江上有渚曰濑渚

事迹吴越春秋云伍子胥奔吴至溧阳溧阳女子击漂濑水乏上子胥跪而乞餐女子簞食壶浆而饮之子胥餐而去谓女子曰掩子壶浆勿令其露女子曰行矣子胥行五步还顾女子已自投於濑中後子胥伐楚师还过溧阳濑上长叹曰吾尝饥於此乞食而杀一妇人欲报之百金而不知其家乃投金水中而去後有姬行哭而来曰吾女年三十不嫁击漂于此遇穷人餽之恐事泄投水而死故号此水投金濑史记云子胥未至吴而疾止中道乞食张勃曰子胥乞食处在丹阳溧阳县唐书音训曰投金濑今颍阳江上伍子胥尝乞食遇妇人餽之後欲报恩求之不获乃投百金於此濑上有正义女庙李白游溧阳北湖望瓦屋山怀古诗云闻有正义女振穷溧水湾

投书渚今在城西

事迹晋史殷羡建元中为豫章太守去郡人多附书一百余封行至江边石头渚以书掷水中祝曰沈者自沈浮者自浮殷洪乔非致书邮

舰澳在南城长千里水出娄湖下入秦淮深丈余冬春不涸【旧志】

事迹輿地志云梁武帝所开在光宅寺东二百五十步其寺武帝旧宅帝从城归宅仪仗舟车骈戟塞路开以藏船

岩洞

天开岩在摄山栖霞寺之後去寺三里石多特立中有石□相向其直如截殆非人力所至故以天开名其岩岩之左有张稚圭祖无择诸公题字

道卿岩在八功德水之後半岭间可容数人庆历中知府叶公清臣尝领客来游公字道卿故名

石城洞一名龙洞在城西一里二百步石头西岭下临大江当崭絶之处有洞户真诰云此小有洞天之南门也俗呼为龙洞口【曾极诗江流远引背烟岚平陆何年重举帆断岸插天危欲坠六朝龙去祇空岩】

华阳洞在茅山侧三茅二许俱得道於此洞其洞门五三门显二门隐

事迹茅山记云华阳西南有二洞其西在崇壽观後其南在元符宫东国朝每投金龙玉简於此六朝记云十大洞天之第八名中有金坛长百丈复有玉碣皆载神仙秘事三茅二许俱得道於此灵异至多尽见於陶贞白华阳颂真诰曰金陵句容之句曲洞为第八洞天又曰句曲地肥土良水清谓之华阳洞天可以度世种民是处五灾不干【游九言词河汉彻碧霄晴九华仙子到凡尘凉夜山头吹玉笛织云卷尽月分明清露湿草晶荧起看大地粲瑶琼下界千门人寂寂空山夜静海波声仙子去渺云程天风杳杳佩环清回望九州烟雾白千山月落影交横林通叟诗华阳山雨拂轻尘独步烟霞访隐真笑傲太平云外客安闲清世梦中身金章名重人称贵布褐才高道不贫吟罢洞天风正淡自知凡骨定逢人】

茅洞在大茅峰南

事迹茅山记云洞在大茅山前从玉液泉为正路洞前亦有石坛洞内有石钟磬直下可行七八里能容千二百人其内流水不絶色若染蓝石涧潺湲可爱路通无穷但险峻难涉耳又云外有古坛内有石钟磬旌节人物皆石人者非人必见异物

越翳王洞在句容县乾元观南

事迹翳於勾践四世孙葬句容大横山下

金牛洞在句容崇壽观东

事迹秦时采金获金牛为女子所触遂掷而出迹着於石

洲浦【矾汀夹沙并附】

白鹭洲在城之西与城相望周回一十五里【旧志】事迹酈道元水经注江宁之新林浦西对白鹭洲丹阳记曰白鹭洲在县西三里洲在大江中多聚白鹭因以名之
国朝开宝七年王师问罪江南曹彬等破南唐兵五千於白鹭洲即此地建炎末敌骑侵軼江南回至江口闻王师将以海舟中流邀其归路遂用牛犁等於白鹭洲一夜凿一小河乘轻舠而走详见新河【李太白诗云三山半落青天外二水中分白鹭洲又宿白鹭洲送杨江宁诗云朝别朱雀门暮宿白鹭洲送殷叔云白鹭洲前月天明送客回
徐铉有题白鹭洲江鸥诗云白鹭洲边江路斜轻鸥接翼满平沙
曾极诗江水悠悠绿染衣淮山渺渺翠成围南朝鹭序归何处惟见沧洲白鸟飞
杨备诗春信风生晚汛潮印沙羣鹭立还翘凭高一片遮人眼芦叶丛边雪未销刘遇诗一声雷鼓挟风威顷刻冲波没钓矶行客惊看银汉落阳侯擎起玉山飞蛟龙便尔争先化鸥鹭茫然失所依安得长竿入吾手翩然东海钓鳌归余见白鹭亭下】

马昂洲在城西北周回一十五里【旧志】

事迹寰宇记云马昂洲在县北二十三里

南徐州记临沂县北有马昂洲晋元帝渡江牧马於此因以名之 梁书南兖州刺史南康王会理前青冀二州刺史湘潭侯退西昌世子或率兵三万至马昂洲即此处【陈轩金陵集王祖道诗云石头虎踞海洲岸马昂槽】

新洲一名薛家洲去城北四十里今幕府山相对有上新洲下新洲

事迹吴志太平元年朱据欲讨孙綝遣孙宪等以舟兵逆据江都获据於新洲

晋隆安五年海贼孙恩向京师闻谯王尚之在建康复闻刘牢之已还至新洲不敢进而去 南史宋武帝微时贫陋过甚自往新洲伐荻有衲布衣袄等皆敬皇后手自作既贵以付会稽公主曰後世有骄奢不节者可以此衣示之 刘宋武帝伐荻新洲时见大蛇长数丈射之伤明日复至洲里闻有杵臼声往覩之童子数人皆新衣於洲中捣药问其故答曰王为刘寄奴所射合药敷之帝曰王神何不杀之答曰寄奴王者不可杀帝叱之皆散收药而反 祥符图经云隋末始涨故名新洲

舟子洲在城南隅周回七里旧志

事迹梁天监十二年以朱雀门东北淮水纡曲数有水患又舟行旋冲太庙湾乃凿通中央为舟子洲诸郡秀才上计憩止于此

概洲在城东北七十五里周回三十八里南徐州记云石壠山北江中有洲今百姓於洲上概种所收倍於平陆

茄子洲在城西南十三里周回一十二里【旧志】

事迹温峤陶侃赴援讨苏峻侃泊茄子洲郗鉴自广陵来会於此

寰宇记云茄子洲夏日堪泊船冬月浅涸永昌之初其洲忽一日崩陷数里其形曲折作九湾

烈洲在城西南七十里吴旧津所也内有小河可泊船商客多停此以避烈风故以为名【旧志】

事迹伏滔北征赋亦谓之栗洲上有小山其形似栗因名之

晋永昌元年王敦举兵至栗洲戴若思刘隗等六军败绩

寰宇记云王濬伐吴尝宿於此简文为相亦会桓玄於此 世说云桓宣武在南州与会稽王会於溧洲于时漾舟江侧谢公亦在坐狂风忽起波浪鼓涌非人力所制桓公有惧色会稽亦微异惟谢公怡然自若顷间风止桓问谢曰向那得不惧谢徐笑答曰何有三才同尽理 安帝隆安六年桓玄举兵东下司马元显大惧以刘牢之为前锋军溧洲参军刘裕请击之牢之不许

与元交通【旧志载宋武帝义师讨逆刘牢之屯此洲者误也刘牢之屯此洲时宋武帝为牢之参军元兴三年方举义兵於京口讨桓作旧志者殆未考耳】太元九年桓冲为荊州刺史文武祖道谢安自送至溧洲并此处也

鸡距洲在城西南三十五里周回三十里

乌沙洲在城西南三十五里周回二十里

杨林洲在城西南二十五里周回一十一里

木瓜洲在城西南二十八里周回二十里

浮洲在城西南八十里周回二十五里

龙潭洲在城西南九十五里周回一十五里

合兴洲在城西南九十五里周回一十二里

鳊鰲洲在城西南七十里周回三十五里西对和州乌江县以水多鳊鰲因为名

董云洲在城西南一十五里西有小江名曰澧江故一名澧江场其上有田五百顷

丁翁洲在城西南二十五里周回一十五里昔有隐士晦其名惟称丁翁居洲上故为名

簪枪洲在城西南三十五里周回一十七里南唐保大中治宫室取材於上江成巨筏至此时会潮退为浮沙所没涨成洲渚至国朝景德三年南岸溃出大枋木二十余条

落星洲在城西南三十里周回一十里上有小阜高数丈旧图经云星陨所化也

鱼袋洲在城西南八十里周回五里形如佩鱼因以为名

乌江洲在城西南六十里周回一十五里接乌江县西界

迷子洲在城西南四十里周回三十里【王荆公次韵叶致远诗云迷子山前涨一洲宋人图志失编收】

张公洲在城西南五里周回三里【旧志】

事迹梁太清二年豫州刺史裴之高等舟师二万次张公洲陈霸先击破侯子鉴师于张公洲

梁书王僧辩陈霸先之破侯景也耀军於张公洲高旗巨舰过江蔽日乘潮顺流景登石头城而覩之不悦曰彼军有如是不易敌也

蔡洲今名蔡家沙在城西南一十二里周回五十五里【旧志】

事迹按晋史王敦在石头欲禁私伐蔡洲荻以问羣下时王师新败士气震惧莫敢异议温峤独曰中原有菽庶人采之百姓不足君孰与足若禁人樵伐未知其可 成帝时陶侃讨苏峻与温峤庾亮等率舟师四万旗鼓百里次於蔡洲六日诸军尽会石头城西北 卢循作乱战士十余万舟舰数百里连旗而下刘裕登石头以望循军曰贼自新亭直上且将避之若回泊蔡洲此成擒 时徐道覆请於新亭焚舟而战循曰不然不如披甲蔡洲以待之初刘裕望见船向新亭有惧色及见回泊蔡洲喜曰贼落吾手也遂率兵进战缚以大筏因风逼之大破循军於江中循遁走 侯景次台城裴之高援兵至後渚结阵於蔡洲景分屯南岸 大宝三年陈霸先讨侯景二月大军进姑孰先锋次蔡洲即此也

长命洲梁武帝放生之所也在石头城前【旧志】

事迹梁武帝市鹅鸭鸡豚之属放此洲名为长命洲置户十家常以粟谷餵饲岁合千数而为狐狸所食及掌户窃而烹者各半 輿地志云魏使李恕来聘帝时於此放生问恕曰北主颇知此事乎对曰魏国不杀亦不放帝无以应之【杨虞部诗梁武慈悲不鼎烹蒙恩豢养亦虚名狐狸口腹应潜饱就死多於日放生 马野亭诗如何长命作洲名梁武当时此放生鹅鸭成羣如市肆鸡豚无数似屯营岂知半被狸奴食宁免私为鹤户烹不杀自然能不放却将实裨博虚名】

江乘浦在城西北一十七里【旧志】

事迹秦始皇东游於此渡江 南徐州记江乘县西二里有大浦发源於石城山东入大江因县为名吴徐盛作疑城自石头至江乘 晋蔡谟自土山至江乘镇守八所城垒凡十一处

蟹浦在城西北一十六里【旧志】

事迹輿地志云白下城西南有蟹浦源出锺山北流九里入大江 齐崔慧景军散走单骑至蟹浦投渔人大叔荣之荣之故为慧景门人时为蟹浦戍谓之曰吾以乐赐汝汝为吾覓酒既而为荣之所斩以头内篮中送都

鄱阳浦在石城西上通秦淮下入马昂洲九里达於江乘旧经云梁鄱阳王尝於此置屯田因以为名

牧马浦在城东南三十九里案丹阳记牧马亭东南一里有牧马浦晋永和中所置流入秦淮浦上旧有桥谓之牧马桥南朝放牧多在此

慈蚕浦在城东十里濶五十步深一丈下通大江京江浦在城东北五十一里濶五丈深一丈下入大江大同浦在城东北五十二里濶五丈深九尺下入大江小同浦在城东北六十七里濶五丈深一丈下入大江泉水浦在城西北二十五里濶五丈深九尺源出白下山南流一十二里入秦淮

鍾浦在城东一十五里濶四丈深八尺源出鍾山南流七里入於秦淮考之金陵图其地有鍾浦桥

同夏浦在城东一十五里濶五丈深七尺南入秦淮浦在废同夏县南因以为名

罗落浦在城东北六十里濶四丈深八尺合於摄湖流十二里入大江宋武帝进至罗落桥即此地也

白社浦在城东北二十五里案金陵故事云发源鍾山西注秦淮

查浦在石头南上十里【旧志】

事迹建康实録晋陶侃屯查浦李阳与苏逸战於查浦卢循犯建业宋武帝栅石头断查浦以拒之皆此地也

新林浦在城西南二十里濶三丈深一丈长一十二里【旧经云三十里】源出牛头山西七里入大江秋夏胜五十石舟春冬涸【旧志】

事迹酈道元水经注江宁之新林浦西对白鹭洲梁武帝置江漳苑自新亭凿渠以通新林浦又起义兵擒新亭城主大军遂次新林侯景围台城柳仲礼韦粲合军屯新林皆此地也互见新亭

龙藏浦在舟子洲岸西南古曲秦淮是也互见秦淮板桥浦在城西南三十里濶三丈五尺深九尺下入大江【旧志】

事迹李白有秋夜板桥浦独酌怀谢眺诗【天上何所有迢迢白玉绳斜低建章阙耿耿对金陵】

江宁浦在城南七十五里源出太平州当涂县界长三十里濶七尺深一丈二尺溉田一百二十顷夏秋胜三百石舟春冬胜一百石【旧志】

事迹梁末徐嗣徵任约领齐兵万人还据石头陈高祖遣兵往江宁据要险以断贼路贼水步不敢进顿江宁浦口遣侯安都领水军袭破之【王荆公有江宁夹口诗五首茅屋沧洲一酒旗午烟孤起隔林炊江清日暖芦花转恰似春风柳絮时

月墮浮雲水卷空
滄洲夜泝五更風
北山草木何由見
夢盡春燈展轉中
鍾山咫尺被雲埋
何況南樓與北齋
昨夜月明江上夢
遙隨潮水到秦淮
日西江口落征帆
却望城樓淚滿衫
從此夢歸無別路
破頭山北北山南
落帆江口月黃昏
小店無燈欲閉門
半出岸沙楓欲死
系船猶有去年?

秣陵浦在城南五十里濶一十丈長一十里深一丈一尺溉田四十頃輿地志云浦以舊縣為名源出龍山北流一十里入葛塘湖又一十里入長溪合秦淮秋夏勝三百石舟春冬勝一百五十石

三山礪在城西南七十五里【舊志】

事迹翰府名談曰陳公尧咨泊舟三山有老叟曰來日午時有大風舟行必覆宜避之來日天晴同行舟皆離岸公托以事日午黑雲起天末大風暴至折木飛砂怒濤若山行舟皆溺公惊叹又見前叟曰某江之游奕將也公他日當位宰相固當奉告公曰何以報德叟曰吾本不求報貴人所至龍神理當衛護願得金光明經一部乘其力薄得遷職公許之至京以金光明經三部遣人至三山礪投之夢前叟曰本止祈一部公賜以三今連陞數職再拜而去

蚵蜆礪在城西【舊志】

事迹南唐書云汪台符上書陳民間利病十余條烈祖善之而宋齊丘疾其才因使親信誘台符痛飲推沈石城蚵蜆礪下

栳家礪在城西北二十五里上元縣金陵鄉長慶村之西

事迹國朝實錄熙寧五年詔賜江東路轉運使韓絳新提點刑獄張稚圭詔書獎諭仍賜銀絹以提舉開江寧府張公凸上栳家礪馬鞍山河道也

九里汀在城東南五十里東下入秦淮溉田五百二十頃【舊志】

事迹建康實錄吳寶鼎元年後主在武昌冬十月永安山賊施坦等反劫後主弟永安侯謙為主出烏程取故太子和陵上鼓吹曲蓋北入建業万余人丁固諸葛靚等逆討於九里河即此處也

砂夾在城西南七十里

事迹張文潛有砂夾阻風詩云【大江春風浪如屋客舟迎】

景定建康志卷十九

卷二十

<史部,地理类,都会郡县之属,景定建康志>

钦定四库全书

景定建康志卷二十 宋 周应合 撰

城阙志一

建邦啓土既勤垣墉设险守国深沟高垒惟典神天祇肃庙社相協厥居若作室家宣其湮郁台池共乐皆宜有志金陵城郭肇於越楚广于六朝至我宋而大且久往古来今不相沿袭有一居而数更所者矣有一所而数更名者矣新名立而旧者没後迹迁而前者譌志有弗详曷信而证如昆明凿而镐都为池隋城立而汉京为苑固不可以古而为今唐已为晋而诗存唐?已为卫而诗存?亦奚可以今而忘古哉乃参古今作城阙志

古城郭

古固城春秋时吴所筑也在今溧阳县之西溧水县界周回七里余其故址尚存亦名平陵城

考证案胜公庙记云固城吴时濂渚县也楚灵王与吴战吴军不利遂陷此城吴乃移濂渚於溧阳南十里改为陵平县平王立使苏廼为将战于吴吴军败收吴陵平县改为平陵县自平王聽费无极佞言伍员奔吴阖闾用为将举军破楚固城宫殿逾月烟焰不灭其城遂废笠泽丛书云溧阳昔为平陵县县南有故平陵城即吴固城所改也 李贺记为儿时在溧阳闻白头书佐言孟东野贞元中为溧阳尉溧阳昔为平陵县县之南五里则有投金灘灘之南八里则有故平陵城周千余步基址才高三四尺而草木甚盛率多大栎丛筱蒙翳如鸿如洞其地洼下积水沮洳深处可活鱼鳖幽邃可喜东野得之忘归绍兴中得後汉校官碑於溧阳固城之旁知其为汉县治案此城最古在越城楚邑之先不书于表以其在县境耳志城郭之首以存古

古越城一名范蠡城案宫苑记周元王四年越相范蠡所筑在今瓦棺寺东南国门桥西北图经云城周回二里八十步在秣陵县长千里今江宁县尉廨後遗址犹存俗呼为越台【旧志】

考证金陵故事云周元王四年范蠡佐越灭吴欲图伯中国立城於金陵以强威势 郡国志云在县南六里东甌越王所立吴王濞败保此城後走丹徒晋王敦王含以水陆五万逼淮温峤燒朱雀航以挫其锋遂潜师渡水大破含军于越城

南史卢循犯建康刘裕恐其侵轶用虞丘进计伐木栅石头城修治越城
齐崔慧景寇建业萧懿入援自采石济岸遁越城 梁武义师次新林遣王茂据越即此地嘉佑
实录注云越王筑城江上镇今淮水南一里半废越城是也案越絶书其城越范蠡所筑城东
南角近固城望国门桥西北即吴牙门将军陆机宅故机入晋作怀旧赋西望东城之纡余即
此城在三井冈东南一里今瓦棺寺阁在冈东偏也 事迹云今南门外有越台与天禧寺相对
见作军寨处是也近时诗人指越台为越女取越土筑台者非也

楚金陵邑城威王灭越私吴越之富擅江海之利置金陵邑於石头及怀王为秦所灭至汉高
帝时封韩信于楚鄣郡属焉六年废【旧志】

考证周显王三十六年越为楚所灭乃因山立号置金陵邑今石头城是也楚威王後一百一
十余年当秦始皇二十四年秦灭楚兼诸侯分天下作三十六郡以金陵为鄣郡楚亡後一十
三年当始皇三十七年乃改金陵邑为秣陵县详见郡县及地名释

吴石头城已载山阜门石城山下

丹阳郡城案宫苑记在长乐桥东一里南临大路城周一顷开东南北门汉元封二年置丹阳
郡至晋太康中始筑城宋齐梁陈因之不改【旧志】

考证汉志置丹阳郡先治宛陵建安十三年孙权分为新都郡二十六年权始置丹阳郡自宛
陵治建业永安中分置故鄣郡丹阳所领惟溧阳以北六县晋太康元年改建业复为秣陵置
江宁县唐初废为州天宝元年复置至德二载析置江宁郡
元和郡国志丹阳郡故城在今江宁县东南
蔡宗旦金陵赋注云古图长乐桥东一里今桐林湾军寨处

古都城案宫苑记吴大帝所筑周回二十里一十九步在淮水北五里黄龙元年自武昌徙都
晋元帝初过江不改其旧宋齐梁陈皆都之宋世宫门外六门城设竹篱至齐高帝建元元年
有发白虎樽言白门三重门竹篱穿不全上感其言改立都墙本纪建元二年立六门都墙是
也其後增立为十二门云【旧志】

考证案宫室记吴大帝迁都建邺有曰太初宫者即长沙王故府徙武昌宫室材瓦所缮也有
曰台城盖宫省之所寓也有曰东府盖宰相之所居也有曰西州盖诸王之所宅也有曰仓城
盖储蓄之所在也皆不出都城之内舆地志曰晋琅邪王渡江镇建邺因吴旧都修而居之宋
齐而下宫室有因有革而都城不改 东南利便书曰孙权虽居石头以扼江险然其都邑则在
建邺历代所谓都城也东晋及齐梁因之虽时有改筑而其经画皆吴之旧
隋既平陈此城皆毁今之都城非旧也

台城一曰苑城本吴後苑城晋成帝咸和中新宫成名建康宫即今所谓台城也在上元县东
北五里周八里濠濶五丈深七尺今胭脂井南至高阳楼基二里即古台城之地尽为军营及

居民蔬圃【旧志】

考证实录注苑城即建康宫城吴之後苑地一名建平园又云台城南正中司马门南对宣阳门相去二里宣阳即苑城则台城在苑城内明矣

宫苑记云古台城即建康宫城本吴後苑城晋咸和中修缮为宫 輿地志云都城南正中宣阳门对苑城门其南直朱雀门正北面宫城无别门乃知苑城即宫城在都城内近北明矣台城南面开四门北面二门东西面各一门宫城内有两重宫墙周回五百七十八丈南面开二门北面二门东西面各一门第三重宫墙南面一门东西面各一门又云同泰寺与台城隔路今法宝寺及圆寂寺即古同泰寺基故法宝亦名台城院以此考之法宝圆寂寺之南盖古台城也晋书成帝时苏峻作乱焚烧宫室温峤以下咸议迁都惟王导固争不许咸和五年作新宫始缮苑城六年迁於新宫即此城也

此城唐末尚存唐史张雄传云使别将赵晖据上元晖负其才欲治台城为府者是也

梅挚访台城遗址诗云寺僧日扣粧钟起园客时翻犂路耕

蔡宗旦金陵赋云登高阳之危楼想苑城之旧规

东府城晋安帝义熙十年冬城东府在青溪桥东南临淮水周三里九十步去台四里简文为王时旧第後为会稽王道子宅道子録尚书事以为治所时人呼为东府其子元显亦録尚书事时谓道子为东录元显为西录西府车骑填凑东第门下可设雀罗东第即今东府城也【旧志】

考证会稽王传嬖人赵牙为道子开东第筑山穿池列树竹木工用钜万帝尝幸其宅谓道子曰府内有山因得游瞩甚善也然修饰太过非示天下以俭道子谓牙曰上若知山是版筑所作尔死矣牙曰公在牙何敢死其城东北角有土山曰灵秀即牙所筑也宋武帝领扬州日筑东府城以居彭城王义康文

帝元嘉中义康更开拓北墉浚西塹自後常为宰相府第景和中尝改为未央宫 明帝时建安王休仁镇东府讹言东城出天子帝惧杀休仁而常闭东府不居桂阳王休范反车骑典籤茅恬开东府纳贼齐高帝封齐王以东府为齐宫

梁太清三年侯景举兵毁板女墙以甃壁为之绍泰末尽罹焚毁

陈天嘉中更徙治今城东三里齐安寺西临淮水陈亡废

西州城即古扬州城汉扬州治曲阿晋永嘉中迁於建康王敦始为建康翔立州城即此城也案建康实录城所置西则冶城东则运渚今天庆观之东西州桥是也一说石冰之乱焚烧府舍陈敏营孙氏故宫居之元帝初渡江即敏府创今城【旧志】

考证晋孝武太元末会稽王道子领扬州居东府故号此城为西州大明中以东府为诸王邸西州为丹阳尹治所谢安为时人所爱重及镇新城尽室而行造泛海之装欲须经畧稍定自江道还东雅志未就遂遇疾笃上疏请旋旆诏遣还都闻当輿入西州门自以本志不遂深自慨失及薨後安所知羊昙者辍乐弥年行不由西州路尝因石头人醉扶路唱乐不觉至州门

左右曰此西州门县悲感不已因恸哭而去

宋徐羨之住西州高祖尝思之即步出西掖门往见焉 寰宇记云西州学者多未晓江宁府有东府城城中扬州廨而扬州在府西故时人号为东府西州东府城之西门谓之西州门世说王丞相治州廨按行而言曰我为何次道治此尔充少为王公所知是以发此叹今西州也丹阳记曰扬州廨王氏所居诸葛恪则治建业晋自周浚至王仍吴旧王复领州牧及桓温桓玄悉治王府王茂洪以及桓谦则在建康永嘉六年顾荣诛陈敏扬州刺史刘机治建康王氏代机元帝渡江居城府王便立州廨於此宋殷景仁既拜扬州羸疾遂笃上敕西州道上不得有车声孝武时荧惑守南斗上尽废西州旧馆使西阳王子尚移居东府城以厌之扬州别驾沈怀明曰天道示变宜应之以德今虽废西州恐无补也上不从西州竟废

冶城金陵有古冶城本吴冶铸之地世说叙录云丹阳冶城去宫三里今天庆观即其地【旧志】

考证晋元帝太兴初以王导疾久方士戴洋云君本命在申而申地有冶金火相烁不利遂移治于石头城东以其地为西园 晋成帝幸司徒府游观西园徐广谓之冶城园是也

孝武帝太元十五年於城中立寺以冶城为名 安帝元兴三年以寺为苑广起楼榭飞阁复道延属宫城谢安每与王羲之登之悠然遐想有高世志

金陵故事导疾迁治於县东七里六朝有东西冶每遇警急出二冶囚徒 又有东冶亭晋太元七年立在县东八里为士大夫饯别之所疑导疾时以古冶迁东西为二故王荆公诗云欲望锺山岑因知冶城路此谓东冶城也金陵故事又有南冶六所少府一司徒二扬州二镇军一晋史庾公权重足倾王公庾公在石头王公在冶城坐大风扬尘王公以扇拂尘曰元规尘污人 梁绍泰元年陈霸先使合州刺史徐度立栅於冶城

齐徐嗣徽等攻冶城栅霸先将精甲自西明门出击之嗣徽大败

琅邪城在江乘县界晋元帝以琅邪王过江国人随而居之因城焉在县东北六十三里今句容县琅邪乡即其地也【旧志】

考证齐武帝永明元年移琅邪郡於白下大起楼观讲武於此南徐州记云江乘南岸蒲洲津有琅邪然则琅邪城与白下相迕今句容县有琅邪乡盖与江乘县界相接是蒲州津与白下皆有琅邪城也一在上元县金陵乡西北去县十四里乃白下之城或者直以蒲州津城为白下非也 王隐晋书江乘南岸有琅邪城立琅邪内史以治之

齐永明六年於琅邪城讲武习水步观者倾都

王融从琅邪城讲武应诏诗云白日映丹羽頽霞文翠旃凌山炫组甲带水被戈船

谢朓有江孝嗣戍琅邪城诗

南史齐王融传云世祖欲北伐使毛惠秀画汉武图置琅邪城射堂上每游幸必观视焉

金城在城东二十五里吴筑今上元县金陵乡地名金城戍即其地【旧志】

考证吴後主宝鼎二年以灵輿法驾迎神於明陵使丞相陆凯奉三牲祭於近郊後主於金城

门外露宿明陵乃後主父故太子和陵也蔡宗旦金陵赋云游金城以怆然问种柳之何在笑吴王之信巫乃露宿於门外 晋太兴中王氏举兵及将军刘隗军於金城 初咸康中桓温出镇江东之金城後温北伐经金城见为琅邪时所种柳皆十围因叹曰木犹如此人何以堪因攀枝执条泫然流涕杨修金城诗亦引此为据晋中宗於金城置琅邪郡桓温尝为琅邪内史至咸康七年出镇金城今上元县金陵乡地名金城戍即其地

秣陵城在宫城南八里一百步小长干巷内梁宋北齐皆为秣陵故城跨淮立桥栅当是其地隋并入江宁建邺城晋太康三年分秣陵淮水北为建邺旧城在吴冶城东详见县下

蒋州城杜佑通典隋平陈於石城置蒋州寰宇记辅公祐据江东用为扬州唐赵郡王孝恭平公祐又於其城置扬州大都督後徙扬州於广陵此城遂废

五城有二其一在府城东南二十五里东晋时所筑其一在石头城唐德宗时所筑

考证晋王敦败王含钱凤乃率余党自栅塘西置五城造营唐景云中县令陆彦恭於城侧造桥渡淮水今五城渡是 唐德宗狩梁州韩滉观察江东西乃筑石头五城自京口至土山修坞壁起建邺抵京楼雉相望详见石头城

檀城本谢玄之别墅太傅谢安与玄奕碁计胜处至宋属檀道济故名檀城图经云在县东八里今案建康实录在墅城东八里非去县八里也地图谓之城子墅今清风乡有城子沽在黄城桥之西即其地去府城四十里

白下城案图经及寰宇记引舆地志云本江乘之白石垒也齐武帝以其地带江山移琅邪居之唐武德元年罢金陵县筑城於此因其旧名曰白下贞观七年复旧治此地遂废【旧志】

考证唐地理志云武德三年更江宁曰归化八年更归化曰金陵九年更金陵曰白下隶润州贞观九年复更白下曰江宁前说兴废本末与此不同宜以唐史为正 又案南史齐武帝欲修白下城难於动役刘系宗启谪役在东随?为逆者上从之後武帝讲武白下履行其城曰系宗为国家得此一城 图经云在城西北十四里今靖安镇北有白下城故基父老传云即此地也属金陵乡去府城十八里

开化城在县南九十里环地三里六十步高五尺东宫城案宫苑记宋元嘉十五年修永安宫为东宫城四周土墙堑两重在台城东门外南东西开三门金陵府城案宫苑记隋大业六年置玄风观南园是临沂怀德同夏诸城并见废县

湖熟城湖熟古县名汉属丹阳郡宋元嘉中徙越城流人於此城元和郡国志云在旧江宁县东南七十里今在上元县丹阳乡去县五十里淮水北古城犹在详见废县

白马城在江宁县北三十里吴时烽火之所【旧志】考证金陵故事云吴时沿江烽火台二

所一在石城左一在白马城今不详其所

竹里城在句容县北一十里东阳镇东二十五里【旧志】考证齐永元二年崔慧景叛向建康遣骁骑将军张佛护直阁将军徐元称等六将据竹里为数城以拒之

竹城在溧水县东南七十里环地二里高五尺有庙未详

杜城在溧水县南一十二里环地四百余步隋大业末杜伏威屯军於此

皇姥城在溧水县南一百一十里大山南高五尺有庙未详

永世城在溧阳县南十五里周三百步遗址高一二尺汉元封中置永平县寻废吴分溧阳复置其後改曰永安晋武帝太康元年更名永世属丹阳郡元帝又分永世为平陵皆属义兴郡宋元嘉九年省永世入溧阳今俗称故县内有唐隆寺旧基乡民犹能言古狴犴之所晋伏滔陆晔皆尝除永世令

赵城在溧阳县东五里周二百步

梁城在溧阳县西五十里周一百步

党城在溧阳县东十五里周一百五十步

新亭垒宋孝武入讨元凶柳元景至新亭依山筑垒东西据险察贼衰竭乃开垒鼓噪以奔之贼衆大溃亭今在城西南十二里垒不存【旧志】

考证元徽二年桂阳王休范举兵浚阳萧道成屯兵新亭以当其锋筑新亭城垒未毕贼前军已至道成登西垣使陈显达等与贼水战大破之江淹有新亭垒诗

侯景故垒今桐林湾处即古大航城在其南【旧志】考证梁绍泰元年北齐兵至建康陈霸先问计於韦载载曰齐人若分兵?三吴之路畧地东境则斯事去矣今可於淮南因侯景故垒筑城以通转输乃遣载於大航筑侯景故垒使杜棱守之

贺若弼垒在上元县北二十里【旧志】

考证隋平陈贺若弼过江於蒋山龙尾筑垒

韩擒虎垒在上元县西四里今在石头城西【旧志】考证元和郡国志隋平陈树碑其文薛道衡之词武德七年赵郡王孝恭平辅公祏纪功碑与此相对本李百药之词

仁威垒在句容县【旧志】

考证南史洪逊梁承圣初为国子祭酒二年为仁威将军城句容以居之命曰仁威垒 又故老相传达奚将军屯兵於此或云弃甲因名甲城邑旧有祠在武烈庙侧土人感梦移庙甲城内东南

药园垒晋义熙中卢循反刘裕筑此垒以拒之在北郊之西宋元嘉二十一年七月甘露降乐游苑輿地志云上元县东北八里晋时为药圃卢循反筑药园垒即此处也

今城郭

宫城在府城中已録首卷

建康府城周二十五里四十四步上濶二丈五尺下濶三丈五尺高二丈五尺内卧羊城濶四丈一尺皆伪吴顺义中所筑也六朝旧城在北去秦淮五里故淮上皆列浮航缓急则彻航为备吴沿淮立栅前史所谓栅塘是也至杨溥时徐温改筑稍迁近南夹淮带江以尽地利城西隅据石头冈阜之脊其南接长干山势又有伏龟楼在城上东南隅自开宝克复昇州城郭皆因其旧绍兴初略加修固乾道五年留守史正志因城坏复加修筑增立女墙景定元年大使马光祖以开濠之土培厚城身创硬楼四所一百七十八间又於栅寨门创甕城及硬楼七间闪门六扇皆裹以铁圈门一座址以石武台二座铁水窗二扇遶城浚濠四千七百六十五丈有奇以深丈五濶三十丈为率城之外濠之里皆筑羊马墙其长如濠之数

门阙

古都城门案建康实录晋成帝咸和五年作新宫始缮苑城修六门注云六门都城门也晋初但有陵阳门後改为广阳门内有古尚方世谓尚方门次正中曰宣阳门本吴所开对苑城门世谓之曰门晋为宣阳门门三道上起重楼悬楣上刻木为龙虎相对皆绣栴藻井南对朱雀门相去五里余次最东曰开阳门宋元嘉二十五年改开阳曰津阳东面最南曰清明门门三道对今湘宫巷门东出青溪桥巷尚书下舍在此门内正东曰建春门後改为建阳门门三道正西曰西明门门三道东对建春门即宫城大司马门前横街也正北面即宫城无别门又案宫苑记凡十有二门南面最西曰陵阳门後改为广阳门正门曰宣阳门次东曰开阳门後改为建阳门门三道直北对端门最东曰清明门直北对延熹门当二宫中大路东面最南曰来阳门直青溪桥巷即今湘宫寺门路最北曰建春门陈改为建阳门西对西明门即台城前横街北面最东曰延熹门南直对清明门当二宫中大路次西曰广莫门门三道陈改名北捷门北直对乐游苑南门次西曰玄武门门三道齐改名宣平门北直趋玄武湖大路最西曰大夏门南直对广阳门北对归善寺门西面最北曰西门门直对建阳门即大司马门前横街是最南曰阊阖门西直对东阳门考宫苑记陵阳宣阳开阳三门与实录所向皆同惟清明门在南面最东而实录乃在东面最南今以宫苑记北对延熹门证之即实录误矣又实录云正东曰建春正西曰西明宫苑记乃在东西面之最北其最南又有东阳阊阖二门盖实录都城上六

门而宫苑记之门乃十有二宋纪独载元嘉二十五年新作闾阖广莫二门其余延熹玄武大夏东阳四门不见建立之始建康实录元嘉二十五年四月新作闾阖广莫等门改先广莫曰承明然则此六门同时作史略之尔然东西二门相对实录宫苑记皆云大司马门前横街则知东西旧止二门各正所向後又增立二门故以南北别之也又案宋元凶劭作乱闭守六门於门内凿堑立栅齐建元中始立六门都墙梁侯景济江韦黯屯六门皆止言六门而元凶劭传又云同逆先屯闾阖门外臧质从广莫门入乃知六门为正门後又立六门皆便门也故史不载闾阖广莫等门作於元嘉二十五年元凶劭之乱乃三十年云晋咸康元年以王导都督诸军事御石季龙帝观兵於广阳门令诸将分戍又宋明帝时闻有人谓宣阳门为白门以为不祥甚讳之右丞江谧误犯帝变色曰白汝家门又陈大建十一年幸大壮观大閱武步骑十万阵於真武湖上登真武门观宴羣臣因幸乐游苑再幸此门观振旅而还

古建康宫门晋成帝咸和七年新宫成名曰建康宫开五门南面二门东西北各一门又宋文帝元嘉二年於台城东西开万春千秋二门又陈宣帝大建二年改作云龙神武二门案建康实录注南面二门正中曰大司马门世所谓章门拜章者伏於此门待报南对宣阳门相去二里夹道开御沟植槐柳世或名为阙门近东曰闾阖门後改为南掖门门三道世谓之天门南直兰宫西大路出都城开阳门其北面平昌门门上有爵络世谓之冠爵门南对南掖门宋永初中改宫城北平昌门为广莫门至元嘉二十五年改先广莫门曰承明门又云南面端门夹门两大鼓在两塾之南并三丈八尺围用开闭城门日中晡时及晚并击以为节夜又击之以持更宫苑记南掖门宋改闾阖门陈改端门东西二门考之实录已不可知见者唯南面二门与北面一门而已又案宫苑记晋成帝修新宫南面开四门最西曰西掖门门三道上重楼正中曰大司马门门三道起三重楼直对宣阳门次东曰南掖门宋改闾阖门陈改端门南直对津阳门北对应门最东曰东掖门门三道南直对兰宫路东面正中曰东华门门三道晋本名东掖门宋改万春门梁改东华门北面最东曰承明门门三重本晋平昌门南直对东掖门最西曰大通门上重楼西面正中曰西华门晋本名西掖门宋改千秋门梁改西华门凡八门比建康实录所载多五门梁天监十年初作宫城门三重楼及开二道又案宫苑记建康宫城内有两重宫墙南面开二门西曰衙门隐不见南西掖门东曰应门晋改名正车门南直对端门即晋南掖门也东面正中曰云龙门北面正中曰凤粧门近西曰鸾掖门西面正中曰神武门凡六门第三重宫墙东直对墙南面正门曰太阳晋本名端门宋改为南中华门东面正中曰万春门直东对云龙门西对千秋门西面正中曰千秋门西对神武门东对万春门凡三门建康实录皆不载以宫殿证之云龙门是第一重宫墙东面门对第二重宫墙万春门神武门是第二重宫墙西面门对第三重宫墙千秋门东西相望案图可考足以想见台城门阙之盛然晋成帝时已有云龙门苏峻作乱羊曼为前将军率文武守此门是也

古朱雀门案宫苑记吴立初名大航门南临淮水北直宣阳门去台城可七里又案地图去宣阳门六里名为御道夹开御沟植柳南渡淮出国门去园门五里晋成帝咸康二年更作朱雀门对朱雀浮航南渡淮水宋大明五年立驰道自闾阖门至於朱雀门六年又新作大航门至孝武太元三年又起朱雀门重楼皆绣栢藻井门开三道上重曰朱雀观观下门上有两铜雀悬楣上刻木为龙虎对立左右宋大明五年改为右臯门梁大同三年复改为朱雀门以金陵图考之当在今镇淮桥北左南厢

古东宫门案宫苑记南面正中曰承华门直南出路东有太傅府次东左詹事府又次东左率府路西有少傅府次西右詹事府又次西右率府东面正中曰安阳门东直对东阳门西对温德门西面正中曰则天门西直对台城东华门东率更寺西家令寺次西太仆寺更西有典客省

古篱门案宫苑记旧京邑南北两岸篱门五十六所盖京邑之郊门也江左初立并用篱为之故曰篱门又云东篱门本名肇建篱门在古肇建市东西篱门在石头城东南篱门在国门之西北篱门在覆舟山东玄武湖东南角有亭名篱门又有三桥篱门在光宅寺侧白杨篱门古井篱门在护军府西篱门外路北齐东昏时陈显达举兵官军败之於西州斩於篱门侧又崔慧景与江夏王宝元举兵东昏遣将军左兴盛率台内三万人拒慧景於北篱门始安王遥光据东府反复使左兴盛屯东篱门梁高祖建议命陈伯之进据篱门天监八年新作缘淮塘南岸起後渚篱门达於三桥

古宣阳门洛京旧名都城正中门也南直朱雀门相去五里门三道上起重楼悬楣上刻木为龙虎相对皆绣栴藻井南史宋明帝时有人谓宣阳门为白门以为不祥甚讳之通典孝武时侍中何偃南郊陪乘鸾辂过白门阉偃将郗帝反手接之曰朕反陪卿也今宫城门疑是其处

古大司马门在宣阳门内三国典略侯景攻台城烧大司马门後阁舍人高善宝以私金十两赏其战士直阁将军宗思领将士数人踰城出外灌水久之火灭景又遣持长柯斧入门下斧门将开羊侃凿扇为孔以槩刺倒二人斫者乃退

古建春门台城正东面门後改为建阳门谢希逸宋孝武宣贵妃诔曰经建春而右转循闾阖而迈度

古东掖门晋成帝修宫城南面开四门最东曰东掖门门三道南直兰台宫最西曰西掖门其地在今宫城东北

古南掖门宫城南面近东门案实录南面次东曰闾阖门後改为南掖门世谓之天门南直兰台宫西大路升平五年南掖门马足陷地得铜钟一有二凹字注南掖门是建康宫南面东门陈朝改为端门南出都城开阳门即宣阳东门也南掖门疑即东掖门杨公则自越石移屯领军府垒北楼与南掖门相对

古云龙门第三重宫墙东面门对第二重宫墙万春门宋刘湛初入朝委任甚重善论政道并前代故事听者忘疲每旦入云龙门御者便解驾左右羽仪分散不夕不出梁诏以肱为侍中司徒尚书令谢肱辞足疾不堪拜谒乃角巾自舆诣云龙门谢

古神虎门一曰神武门第二重宫墙西面门对第三重宫墙千秋门宋书傅亮永初四年为中书令直中书省专典诏命以亮任总国权听於省见客神虎门外每旦车常数百两齐陶弘景为高帝诸王侍读奉朝请既而脱朝服挂神武门上表辞禄诏许之

古西明门台城正西面门也实录云宋徐羨之住西州高祖尝思羨之便步出西掖门羽仪络绎追之已出西明门矣

古平昌门宫城北面近东门南对南掖门其地在今城东宋刘延孙为尚书左仆射疾病不任拜起上使乘舟自青溪至平昌门入尚书下舍

古广莫门洛京旧名都城北面次西门也北直乐游苑南门其地在今城东北【宋元嘉二十五年夏四月新作闾阖广莫二门南史王昙首传元嘉四年车驾出北堂使三更竟开广莫门南台云应须白兽幡银字檠不肯开尚书左丞羊元保奏免御史中丞传隆以下王昙首曰既无异敕又阙幡檠惟称上旨不异单刺元嘉元年虽有再开门例此乃前事之违今之守旧未为非礼其不请白兽幡银字檠致开门不时由尚书相承之失未合纠正上特无问更立科条】

古国门梁天监七年作国门於越城南在今高座寺东南涧桥北越城东偏

古望国门南史梁侯景犯建康令羊侃率千骑顿望国门其地在越城东南

古光德门古迹编云在东门外趋蒋山路东北曲折处旧传如此未详创建之因

石阙南朝宫苑记曰晋元帝於宫前立阙衆议未定王导指牛头山为天阙不别立阙宋孝武大明七年於博望梁山立双阙梁置石阙在端门外陆倕为铭【序曰象阙之制其来已远或以听穷省冤或以布治县法或表正王居或光崇帝里晋氏浸弱宋历透迟乃假双阙於牛头托远图於博望有欺耳目无补宪章治此石阙在端门外夹道而置之其上隐起奇兽异禽之状】

白下门见白下亭

秦淮栅即栅塘也案实录注吴时夹淮立栅又梁天监中作两重栅皆施竹马至南唐时置栅如旧

青溪栅在城东苏峻之乱因风纵火进烧此栅官军再败卞壺父子死之隋平陈斩张丽华孔贵妃於此栅下今府城八门由尊贤坊东出曰东门由镇淮桥南出曰南门由武卫桥西出曰西门由清化市而北曰北门由武定桥泝秦淮而东曰上水门由饮虹桥沿秦淮而西出折柳亭前曰下水门由斗门桥西出曰龙光门由崇道桥西出曰栅寨门【栅寨乾道元年正月十四日敷文阁待制知建康府张孝祥言秦淮之水流入府城别为两派正河自镇淮新桥直注大江其一为青溪自天津桥出栅寨门亦入於江缘栅寨门地近为有力者所得遂筑断青溪水口刱为花圃以为游人宴赏之地因循至今每水源暴至则泛滥漫荡城内居民尤所被害若访古而求使青溪直通大江则建康永无水患矣诏汪澈指定以闻其後澈言欲於四围依曩时河道开浚使水通栅门入江从之时孝祥已罢澈帅建康 栅寨门岁久弗葺景定元年马

公光祖创硬楼七间每间濶六丈入深一丈三尺通濶四十二丈其下前壁闪门子六扇两屋山武台各一座屋下车轴车颊一座绞棒一十二条车窗麻索四条圈门一座高一丈五尺横濶一丈四尺入深三丈四尺前後城面包砌四丈二尺其下石脚石面并铁水窗二扇前後填石栏草桩木两边雁翅各高六尺五寸长三丈南北两慢道各长五丈五尺前近濠岸木栅一路护险墙一路长四丈五尺兜帮前後旧城身长一十五丈】

制使姚公希得任内重修诸城门税亭备屋廊宇等自景定三年二月十一日兴工至九月十六日毕逐处修整费钱二万三千一百余缗米五十七石六斗有奇

景定建康志卷二十

卷二十一

钦定四库全书

景定建康志卷二十一 宋 周应合 撰

城阙志二

古宫殿

吴太初宫建康实录吴大帝迁都建邺徙武昌宫室材瓦缮太初宫即长沙王孙策故府也赤乌十年作十一年宫成周回五百丈正殿曰神龙南面开五门正中曰公车门次东曰昇贤门更东曰左掖门次西曰明阳门更西曰右掖门东面正中曰苍龙门西面正中曰白虎门北面正中曰玄武门北直对台城西掖门前路东即古御街又起临海等殿晋元帝渡江因吴旧都即太初宫为府舍及即位称为建康宫

考证江表传载权诏曰建康宫乃朕从京来所作将军府寺耳材柱率细小今未复西可徙武昌宫材瓦更缮治之有司奏言武昌宫已二十八岁恐不堪用宜下所在更伐木治权曰大禹以卑宫为美今军事未已所在多赋损农武昌材自可用也左太冲吴都赋曰作离宫於建业闾阖闾之所营采夫差之遗法抗神龙之华殿施荣楯而捷猎崇临海之崔嵬饰赤乌之晔晔东西胶葛南北峥嵘房栊对横连阁相经闾阖谲诡异出奇名左称弯碣右号临碭雕栾镂榭青琐丹楹图以云气画以仙灵虽兹宅之夸丽曾未足以少宁注云神龙临海赤乌皆吴大帝所作建业太初宫殿名也弯碣临碭宫门名也晋史石冰之乱太初宫尽焚陈敏平石冰因太初故基创造府舍元帝所居即敏所造帝领江左十年始即位常在旧府明帝亦不改作至成帝始缮苑城详见晋建康宫下

吴昭明宫始谓之新宫周五百丈与太初宫相望榜曰昭明後主移居之晋避讳改曰显明宫【旧志】

考证吴志後主甘露二年六月起新宫於太初之东制度尤广二千石已下皆自入山督掇伐木又攘诸营地大开苑囿起土山作楼观加饰珠玉制以奇石又开城北渠引後湖水流入宫内巡遊堂殿穷极伎巧功费万倍

吴南宫吴太子宫在南大帝赤乌二年适南宫宋置欣丝宫於其地今在旧江宁县北二里半

晋建康宫亦名新宫【非吴新宫】晋成帝咸和七年新宫成名曰建康宫亦名显阳宫在法宝寺之南今在府北五里【旧志】

考证实录云新宫即台城也在江宁县北五里周八里有墙两重晋成帝时苏峻作乱尽焚台城宫室温峤以下咸议迁都唯王导固争不许咸和六年使卞彬营治七年新宫成开五门南面二门东西北各一门十二月帝迁居之明年正月朝万国於新宫 孝武太元三年谢安以宫室朽坏啓作新宫仰模元象合体辰极王彪之曰中兴即位东府诚为俭陋元明二朝亦不改制苏峻之乱成帝止兰台都坐不蔽寒暑是以更营修筑殆合奢俭之中今自可随宜增修强寇未殄不可大兴力役安曰宫室不壮後世谓人无能彪之曰任天下事当保固国家朝政惟允岂以修屋为能耶 诏曰昔大贼纵暴宫室焚荡元恶虽除未暇营筑有司屡陈朝会逼狭遂作新宫子来之歌不日而成新宫内外殿宇大小凡三千五百间

晋永安宫即吴东宫在台城东南【旧志】

考证輿地志吴东宫在城之南晋初东宫在城之西南其後移於宫城之东南宋齐梁陈又在宫城之东北 宫苑记永安宫在台城东华门外孝武太元二十一年新作东宫本东海王第安帝立以何皇后居之桓玄拆其材木移入西宫以其地为习射宫至宋元嘉十五年筑为东宫陈太建九年移皇太子居之

宋亲蚕宫在上元县鍾山乡闍婆寺前纱市中【旧志】考证南史宋大明三年立皇后蚕宫於西郊四年三月庚申皇后亲蚕西郊 輿地志孝武初立为苑後为西蚕所 隋志江左至宋大明始於台城西白石埵为西蚕设兆域置大殿七间又立蚕观其礼皆循晋氏 蔡宗旦金陵赋注亲桑蚕室侧有蠶观今北庄前平地是其处

齐世子宫在石头城【旧志】

考证南史齐武帝为世子日以石头城为宫

梁金华宫在青溪东去台三里【旧志】

考证輿地志梁大同中所筑昭明太子蔡妃所居陆襄传云大通三年昭明太子薨官属罢妃蔡氏别居金华宫以襄为中散大夫步兵校尉金华宫家令知金华宫事

陈安德宫案宫苑记在宣阳门外直西即都城西南角外陈宣帝为文皇后所筑隋平陈移江宁县於此明年罢之有古池存人呼为安德宫池【今池犹存在精銳军寨内】

青溪宫在城东二里【旧志】

考证南史齐武帝元嘉二十七年生於建康之青溪宫後为芳林苑

未央宫长乐宫建章宫长杨宫南史宋前废帝景和元年以东府城为未央宫以石头城为长乐宫以北邸为建章宫南第为长杨宫东府城在古青溪桥东

梧园宫在句容县吴王别馆有梧楸成林今不详其所【旧志】

考证任昉述异记古乐府云梧宫秋吴王愁

南唐宫即皇朝旧府治中兴修为行宫【详见留都录】

考证五代史清泰元年吴徐知诰治私第於金陵乙未迁居於私第虚舍以待吴王吴王诏知诰还府舍甲申金陵大火乙酉又火知诰疑有变勒兵自卫己丑复入府舍天福二年徐知诰建太庙社稷名城曰宫城厅堂曰殿南唐书云先王建号即金陵府为宫惟加鸱尾栏槛而已终不改作

江南野录云初台殿阁各有鸱吻自乾德之後天王使至则去之还则复用至是遂除通监长编曰庆历八年正月壬午江宁府火初李璟在江南大建宫室府寺其制皆拟帝京时营兵谋乱事觉伏诛既而火知府事李宥惧有变阖门不救延烧几尽惟存一便厅乃旧玉烛殿也

吴赤乌殿在县东北五里吴昭明宫内【旧志】

考证吴时赤乌见遂起殿名赤乌 吴都赋云饰赤乌之晔晔注云太初宫殿名也记室新书云殿闭赤乌空留往事

吴神龙殿太初宫有神龙殿去县三里【旧志】

考证吴都赋云抗神龙之华殿注云神龙乃太初宫中殿名

太极殿建康宫内正殿也晋初造以十二间象十二月至梁武帝改制十三间象闰焉高八丈长二十七丈广十丈内外并以锦石为砌次东有太极东堂七间次西有太极西堂七间亦以锦石为砌更有东西二上阁在堂殿之间方庭濶六十亩【旧志】

考证山谦之丹阳记曰太极殿周制路寝也秦汉曰前殿今称太极东西堂亦魏制於周小寝也案史记秦始皇改命宫为庙以拟太极魏号正殿为太极盖采其义晋成帝咸康中庾阐议改太为泰谬矣徐广晋记曰孝武宁康二年尚书令王彪之等改作新宫太元三年二月内外军六千人始营筑七月而成谢安作新宫造太极殿欠一梁忽有梅木流至石头城下因取为梁殿乃成画梅花於其上以表嘉瑞实录云太元中起太极殿谢安欲使王献之题榜而难言之因说魏韦仲将悬虚橙书凌云台额以讽之揣知其旨乃正色曰仲将魏之大臣宁有此事使其若此有以知魏德之不长也安遂不之逼

晋中兴书云孝武造太极殿郭璞卜筮云二百一十年此殿为奴所坏後梁武毁之舍身为奴文昌杂录云东晋太极殿东西阁天子间以听政阁之名起於此

宫苑记又云太极殿前东西有两大钟宋武帝平洛所获并汉魏旧器殿前有相风乌南史张永晓音律太极殿前钟嘶孝武尝以问永永答钟有铜滓乃扣钟求其处凿而去之声遂清越陈高祖永定二年新作太极殿欠一柱忽有樟木大十围长四丈五尺自流泊刘家後渚监车

郢子庆以闻诏以造殿

陈史沈衆兼起部尚书监起太极殿常服布袍芒履以麻?为带又囊麦饼以噉

徐陵太极殿铭云千栌赫奕万栱棱嶒

沈炯太极殿铭云周曰路寝汉称前殿名号虽殊其实一也 国朝张洎撰定新仪奏曰今之崇德即唐之紫宸也在周为内朝在汉为宣室在唐曰上阁即只日常朝之殿也东晋太极殿有东西阁唐制紫宸上阁法此制也

晋消暑殿在台城内晋孝武帝造殿前重楼复道通华林园爽垲奇丽天下无比虽暑月常有清风故以为名【旧志】

考证晋书太元二十一年正月起消暑殿於华林园何尚之华林园消暑殿赋云却倚危石前临濬谷

涌泉灌於阶庠远风生於楹曲 孝武华林园消暑殿赋云密盼林梁侧眺池籩又云转流环堂浮清浹室辟西楫而鉴斜月高东轩而望初日 宋书晋太元中立内殿名消暑少时而崩时人曰消暑反言楚声也果有哀楚之声?云代晋者楚其在兹乎及桓玄篡逆自号曰楚

宋嘉禾殿宋孝武大明五年消暑殿西薨鸱瓦中生嘉禾一株五茎改消暑为嘉禾殿【旧志】

宋含章殿宋孝武帝女壽阳公主人日卧於含章殿檐下梅花落公主额上成五出花拂之不去皇后留之看得几时经三日洗之乃落他女奇其异竞效之今梅花粧是也【旧志】

宋玉烛殿宋孝武帝所造在宫中【旧志】

考证孝武坏武帝所居治室於其处起玉烛殿与从臣观之牀头有土障壁上挂葛灯笼麻绳拂侍中袁顗称武帝俭素之德帝不答独言曰田舍翁得此已过矣 案南史晋诸帝多处内房朝晏所临东西二堂而孝武末年消暑方建永初受命无所改作所居惟称西殿不制嘉名文帝因之亦有合殿之称孝武承统制度滋长犬马余菽粟土木被绋绣追陋前规更造正光玉烛紫极诸殿雕栾绮节珠窻网户

宋紫极殿宋明帝所作珠帘绮柱江左所未有【旧志】 考证齐高帝欲以其材起宣阳门王俭褚渊王僧?连名表谏手诏酬纳

齐昭阳殿齐有显阳昭阳二殿太后皇后所居也【旧志】 考证永明中无太后皇后羊贵嫔居昭阳殿西范贵嫔居昭阳殿东宠姬荀昭华居凤庄殿宫内御所居壽昌尽殿南合置白鹭鼓吹二部乾光殿东西头置钟磬两厢皆宴乐处也上数游幸诸苑囿载宫人从後车宫内深隐不闻端门鼓漏声置钟於景阳楼上宫人闻钟声悉起粧束自後此钟惟应三鼓及五鼓也武帝永明十一年诏曰内殿凤华壽昌灵曜三处此吾所改制夫贵有天下富兼四海宴处寝

息不容太陋谓此为奢俭之中慎勿坏去 梁陶宏景诗云夷甫任散诞平子坐谈空岂悟昭阳殿化作单于宫时天下之士尚西晋之俗竞谈玄理故宏景云尔及侯景倾陷篡位果在昭阳殿 景阳基犹存在精锐中军寨内

齐芳乐殿在台城内【旧志】

考证齐史云东昏侯大起芳乐玉寿诸殿以麝香涂壁刻画粧饰穷极绮丽役者自夜达晓犹不副速後宫服御极选珍奇府库旧物不复周用民间金宝价皆数倍建康酒租皆使输金犹不能足凿金为莲花以帖地令潘妃行其上曰步步生莲花

齐灵和殿在台城内【旧志】

考证齐武帝时益州刺史刘浚献蜀柳帝命植於灵和殿下三年柳成枝条柔弱状如丝缕帝与公卿宴赏叹曰此柳风流可爱似张绪少年时

梁重云殿梁武帝造在华林园【旧志】

考证隋志云殿前置铜浑仪是伪刘曜光初六年南阳孔挺所造何承天以为张衡所造 陈书云高祖三年戊辰重云殿东鸱吻有紫烟出属天

梁五明殿在台城内【旧志】

考证梁大通中皇帝谦恭待士时忽有四人来貌可七十鹑衣蹑履入丹阳郡建康里行已经年无人知者帝召入仪贤堂给汤沐解御服衣之合朝无识之者惟昭明太子识之四人喜揖昭明如其旧交目为四公子帝移四公子入五明殿更重之後大同末魏使崔敏来聘敏博瞻儒释知天文医术帝选十人於此殿推论三教百家六籍五运九十余日崔敏忘精丧神伤心呕血归未及境而卒

披香殿在台城内後宫【旧志】

考证庾子山诗宜春苑中春已归披香殿里作春衣盖指此也

林光殿在县东北十里潮沟村覆舟山前晋为药园光严殿在县东北六里景阳山东岭南

考证梁於台城中立层城观历代修理更起重阁上名重云殿下名光严殿

风光殿在县东北七里一百步旧台城内

光华殿在台城梁武帝大通中施与草堂寺取珠货直百万以其地起重阁七间

宝云殿在台城梁武帝以施佛事

惠轮殿亦供养佛事宋於台城立正福清曜等殿又台城温德门内有永正温文文思壽安等殿又陈永定中於台城起昭德嘉德壽安乾明有觉等殿又台城温德门内起三善长春胜辩等殿又有嘉禾崇政承香柏梁延昌神?永壽七贤璿明延务龙光至敬璇玑光昭大政柏香诸殿【自林光殿以下皆建康宫阙簿所载】

陈求贤殿在台城内後主皇后沈氏居之后字务华沈君理之女端情好学孔贵嫔有盛宠沈氏并无怨妬之色衣无绮绣长寻佛经名画典籍诗赋而已陈亡随後主西迁後主薨后自作哀册文其辞甚酸楚朝贤痛之六朝宫殿具志於前规模制度固不尽同其兴也以朴其衰也以侈则未尝不同也鉴之哉

楼阁

景阳楼今法宝寺西南精銳中军寨内遗址尚存里俗称为景阳台

考证輿地志宋元嘉二十二年修广华林园筑景阳山始造景阳楼
孝武大明元年紫云出景阳楼状如烟回薄久之诏改为庆云楼【宫苑记云景云楼】
齐武帝时置钟景阳楼上应宫中宫人闻钟声并起粧饰

青漆楼在上元县北五里台城内

考证齐书云世祖兴光楼上施青漆时人谓之青漆楼东昏侯曰武帝不巧何不纯用瑠璃

朝日夕月二楼在华林园内

考证梁武帝所起阶道遶楼九转 宫苑记云景阳山次东岭起通天观观前又起重楼上重曰重云殿下重曰光严殿殿前当堦起二楼左曰朝日楼右曰夕月楼巧丽无匹

入汉楼在石头城

考证实录晋义熙八年於石头城南起高楼加累入於云霄连堞带於积水名曰入汉楼

观稼楼在城东二十五里梁武帝造

望远楼在江宁县西南八里

考证輿地志云新亭堦上有望远楼宋元嘉中改名临沧观今名劳劳亭是也

落星楼在上元县东北临沂县前

考证吴大帝时山置三层楼楼高故为此名 吴都赋云飨戎旅乎落星之楼是也今石步相去一里半有落星墩里俗相传即当时建楼处今去城四十里

烽火楼在石头城西南最高处吴时举烽火处也考证宋元嘉中魏太武至瓜步声言欲渡江始议北侵朝士多有不同至是文帝登烽火楼极望不悦谓江湛曰北伐之计同议者少今日始大夫之忧在予过矣又齐武帝登烽火楼诏羣臣赋诗 苏峻之乱陶侃温峤入讨舟师直指石头峻登烽火楼望见士衆之盛有惧色谓左右曰吾本知温峤能得衆也【详见烽燧】

李白酒楼在城西

考证李白翫月城西孙楚酒楼达晓歌吹日晚乘醉着紫绮裘乌纱巾与酒客数人棹歌秦淮往石头访崔四侍御 白有诗朝沽金陵酒歌吹孙楚楼又金陵西楼月下吟云金陵夜寂南风发独上高楼望吴越又猛虎行云溧阳酒楼三月春杨花茫茫愁杀人此楼又在溧阳县 陈轩金陵集载杨文公忆江南诗云江南堤柳拂人头李白题诗徧酒楼

冶城楼在天庆观西偏吴冶城旧基卞将军墓侧考证晋谢安王羲之同登冶城楼悠然遐想有高世之志 苏峻之乱卞壺巷战而死二子亦死皆葬冶城 嘉定四年黄公度重建楼於忠孝堂上详见冶城及卞壺墓【任希夷诗翠輿西驻石头城只手扶危义夺情富贵浮云俱歇灭死生大节独分明衣冠埋玉千年恨简册留香万古声莫笑元规能误晋误元规者是虚名又诗翛然独上冶城楼楼外江山只旧游谢傅不生支遁在懒能骑马过西州 黄度诗果然当国擅功名着屐闲来上冶城久欲乘风还海道江山佳处尚关情又春秋将絶书刘子汉史虽终述武侯旧国不知遗烈在我来偶作冶城楼 曾极诗裊裊疎林集晚鸦钟山云气入檐牙何人乘月吹长笛夜看云陵百万家 刘克庄诗断镞遗枪不可求西风占竟满原头孙刘数子如春梦王谢千年有旧游高塔不知何代作暮笳似说昔人愁神州只在阑干北度度来时怕上楼 刘元高诗俯仰明知尽可悲西风还此立多时偶然唤醒东山客便有淮淝一局碁】

百尺楼南唐宫中有百尺楼绮霞阁

考证类说云唐主於宫中作高楼召羣臣观之衆皆叹美萧俨曰恨楼下无井耳唐主问其故对曰恨不及景阳楼耳唐主怒贬於舒州

忠勤楼在府治锦绣堂淳佑十年吴大资渊建宸翰赐今名详见锦绣堂

锺山楼在府治东北镇青堂吴大资渊重建楼北正对锺山故名【阙 相公亲建锺山阁轮奂丹青相间错碧流堂下水湾湾红绽栏边葵灼灼面对皇居帝阙开平分佳气何雄哉时时羣饮神仙辈一片笙歌天外来金陵陪都景佳丽边陲帖息无他事运筹奇佐苏黄贤行乐传盃

朝暮醉何如改作筹边楼 寛君北顾分君忧何如改作太平楼 乐民西成销民愁 风光平远帘
高卷月台掩映君王殿 倚空猎猎翠幙飞清爽自无尘一点青惜遥遥何处峯登临凝盼景无
穷只应诗句能模写不信人间有画工 水桥曲曲危华表密叶深深?芳沼半垂含箨竹萧疎合
抱护堦草横遶何如改作戲彩堂祝君之母壽无疆何如改作清白堂愿君之子学余芳 泽润
生民多恩德 嘯却残寇不战力也应铭石纪勲劳请面鍾山阁前立 松洲阙 题鍾山楼词麦场
桑陇道都是六代宫城遗迹梦里江山经几觉还似堠旁征驿燕去燕来花开花谢那个成端
的人烟牢落晚风何处羌笛 堪叹挥泪新亭筹兴亡莫补万分之一到我凭阑休更向酒畔是
今非昔击楫誓清闻鸡起舞毕竟英雄得伤心残照塔尖遥露秋碧】

东南佳丽楼在银行街旧为赏心楼基楼久废景定元年马大使光祖建规模宏壮增倍旧楼
改立今名【李衢记畧云资政殿大学士裕斋先生马公再镇金陵之明年被旨兼董西饷公
对敷休命布宣上恩弊梳蠹剔害除利兴不严而治不令而行於时边氛扫荡江淮肃清雨阳
时若百谷用成貔貅均挟纩之温鸿鴈同春台之登公於是凭高怀古慨然谓客曰自六飞驻
蹕东南兹地实为陪京三国之英雄虽远六朝之形势犹存顾未能选奇占胜以发山川之美
非阙欵饷台故有赏心楼适据一郡之中壤地偏小屋老弗支公命撤而新之培高辟广度材
鸠工因作杰阁三层而名之曰东南佳丽经始於仲秋落成於孟冬不三月而大备巨栋横空
重檐插云於市?闐闐之中而覩此突兀杰特之胜过其下者皆翘首企足窃窃焉如隔弱水而
望蓬莱登其上者皆洞心骇目飘飘焉欲餐沆瀣而拍洪崖云云北望中原一目万里得无兴
禾黍高低之叹者乎俯视长江一碧万顷得无怀击楫誓清之志者乎云云衢被命将指西淮
道由建业谒公於玉麟堂因获一登斯楼以快赏心目公不鄙其固陋俾为文以记颠末云云
斯役也縻指五十万米一千五百斛皆有奇职其事者公之客朱君幼学赵君与鑒吴君畴是
岁景定改元仲冬既望门生朝请郎直宝章阁淮南西路转运判官兼提举淮南西路常平义
仓茶盐公事李衢记 朱幼学上梁文金陵帝王州有锦绣两坊之胜朱楼霄汉道现绮罗万井
之间高百尺而摘星辰虚四檐而纳风月神仙地位城郭画图窃惟青天白鹭擅山水之奇紫
盖黄旗应东南之运六朝盛事千古流风金汤会府之崇严景物陪都之佳丽英雄萃聚骚墨
淋漓或指凤台而咏秋空万丈之诗或望赤壁而赋雪浪千堆之句石城鍾阜乌巷雨华方輿
皆可览之秀奇眼力有无穷之疆界欲其适兴必也凭高虽十二勾一半帘如插在青冥之表
然千门灯九街月宜莫如闐闐之中旧有层栏惜居委巷板檻腐烂而半成毁折地步狭隘而
不足改为谁驱花下之车来曳云端之履我大制使抚使判府留守总领大资相公万间厦广
方寸地存官鼎鼐无楼台处身甚约已分事即宇宙用世尤厯顾以书殿之尊兼领饷台之职
天下之重其自任公家之事无不为兴念是邦实重阨驻兵之地可无絶景为筹边料敌之谋
乃求要区乃求巨木灵鳌驾海气横牛斗之秋翹凤飞空天立翠微之壁朱阑缥缈彩雾飞凌
栋梁撑住於乾坤窻牖照临於世界衣冠碧落盃酌银潢合三军万姓以同懽与诸道九流而
共赏翠眉环坐醉扶花影之阑干十指弹丝香透春风之帷幙於是乐甚岂不快哉相国之政
如饮醇所以见经纶之妙醉翁之意不在酒聊舒展拓之怀欲举修梁敬陈鄙?抛梁东仙盘出
海驾金龙遥望咸池金涌跃满天瑞彩照帘栊抛梁南明堂八柱与天参若把长干来比并长
干应作小阑干抛梁西楼阁三层天下希赏心白鹭相辉映渌水中间栋宇飞抛梁北鍾山倚
坐如盘石松柏庭前老更恭虬枝直干三千尺抛梁上弦管半天分队仗楼高得似政声高四
海苍生齐仰望抛梁下御前车马纷如也银髮貂蝉脸晕红宣麻道是相司马伏愿上梁之後

玉垣天耸金钥地严满不溢高不危着工夫於柱石閤其中肆其外公指视於道涂朝廷好而
门館无私风云会而君臣际遇庶社稷等山河之长久而勲名与楼阁以峥嵘】

伏龟楼在府城上东南隅景定元年马大使光祖增创硬楼八十八间【杨万里诗周遭故国
是山围对景方知此句奇偶上伏龟楼上望一环碧玉缺城西 阙
菰蒲深处拓重城城上立楼龟唤名应卜南唐不多岁何妨俯首纳天兵】

层楼在府城右南厢中界花行街楼跨街东西乐府有独自上层楼之句即此是也

南楼在府城右南厢中界寬征坊与旧佳丽楼相对旧佳丽楼在旧米市西曹家巷口

安远楼在府城右北厢太平桥西南

有年楼在樵货务巷口总领吴潛建并书扁

丰裕楼在南门外西街

和熙楼在府城右北厢太平桥西南

嘉会楼在府城右南厢北界大木头街

嘉瑞楼在镇淮桥北本名镇淮楼宝佑六年毀重建楼改今名

临春结绮望仙三阁陈後主至德二年起

考证宫苑记在华林园天泉池东光昭殿前高数十丈并数十间其牕牖户壁栏檻之类皆以
沈檀为之又饰以金玉间以珠翠外施珠帘内设宝帐其服玩瑰丽近古所未有其下积石为
山引水为池植以奇树杂以花药後主自居临春阁张丽华居结绮阁龚孔二贵妃居望仙阁
并复道交相往来使女学士与狎客赋诗采其尤艷丽者以为词被以新声其曲有玉树後庭
花临春乐等丽华聪慧有神采尝於阁上靓粧临轩檻宫中遥望飘若神仙 陈轩金陵集载王
涣惆悵吟云陈宫兴废事难期三阁空余綠草基【刘禹錫诗贵人三阁上日晏未梳头不应
有恨事娇盛却成愁又珠箔曲琼鈎子细见扬州北兵那得渡浪语声悠悠又沈香帖阁柱金
缕画门楣回首綵幡下已见黍离离又三人出胷井一身登檻车朱门谩临水不得见鲈鱼】

昇元阁旧在昇元寺即瓦棺寺也在城西南隅

考证京师寺记瓦棺寺有瓦棺阁乃梁朝所建高二百四十尺
李白横江词云人言横江好我道横江恶一风三日吹倒山白浪高於瓦棺阁
龚穎运历图云开元九年江宁县瓦棺寺阁西南久倾因风自正

伪吴顺义中改寺为吴兴寺阁为吴兴阁南唐昇元初改寺为昇元寺阁为昇元阁 江南野史唐仁杰为溧阳主簿羣公休沐宴昇元阁仁杰即席和登阁诗有云散便凝千里望日斜常占半城陰之句座客皆惊 南唐书云昇元阁因山为基高可十丈平坦阁影半江 开宝中王师收复士大夫暨豪民富商之家美女少妇避难於其上迨数千人越兵举火焚之哭声动天一旦而烬 今崇胜戒坛院近昇元阁故基建卢舍那佛阁亦高七丈里俗犹呼为昇元阁【李白诗晨登瓦棺阁极眺金陵城鍾山对北户淮水入南荣漫漫雨花落嘈嘈天乐鸣两廊振法鼓四角吹风筝杳出霄汉上仰攀日月行山空霸气灭地古寒陰生寥廓云海晚苍茫宫观平门余闾阖字楼识凤凰名雷作百山动神扶万拱倾灵光何足贵长此镇吴京 罗隐诗下盘云迹上云浮偶逐僧行步步愁暂憩已知须用意渐来争忍不回头烟鍾树老重江晚林铎风轻四境秋懒指台城更东望鹄飞龙鬪尽荒丘 李丞相诗登高始觉太虚寬白雪须知唱和难云度琐窗金榜湿月笼珠箔水晶寒九天星宿帘前见六代城池直下观惟有上层人未到金乌展翅拂阑干

曾极题昇元阁铎石柱摩挲石柱薛?斑七国如鸿去不还无复切云三百尺祇传风铎在人间刘过诗脚力倦矣盍少休侵晨更上昇元游眼中已不见二百四十尺之高楼但见炊烟万竈宿貔貅上有啼鸦噪鹄如泣诉下有老树根据枝相纠缠想其结缔初匠石巧与造物侔桷榑枅拱不知几大木一木牵挽回万牛山川退听左右受约束日月乌兔早暮东西流阿房之旗矗立矮如戟临春结绮望仙三阁俱下头太行孟门培塿而已矣蹄涔洞庭芥为舟挂撑霄汉弹压大千界下历梁唐晋汉周一朝世故有反覆祸结祝融回禄与鬱攸灰飞障天烟焰炽一火二月烂不收遂使觚棱化草莽丹雘成墟丘吾闻至人侈俭初何心有茅一把盖头便可留何必穷极土木事妖怪腴削赤子膏血歛以裒是故子刘子不仙不佛亦不侯视鸞台凤阁为蓬庐百万贺宅亦梦幻泡影沕江西岂无家白沙翠竹泉石幽茅檐曝日搔背痒篱缺墙破手葺修争如以天地为室庐日月行住坐卧得自由不为朱门走不作白屋羞有时千里骑鲸游汗漫有时蛤蜊踞食龟殼秋彼昇元阁者亟成而复坏腸亦不能为之断心亦不能为之忧造物何足云此身自贅疣誉尧毁桀未必公是非丘跖两害蚁与蝼日斜请公急下山我有斗酒归去来兮相与劝醺】

青溪阁在府治东北青溪上本梁江总故宅至国朝为段约之宅有亭曰割青取荆公诗割我鍾山一半青之句乾道五年秋因移放生池於青溪之曲即割青故基建阁焉【张椿记云天下山川胜处古今相承往往随人废兴得其人者虽云烟草木皆有凭恃德名高自标致亘万古而不可泯没之也如其不然亦复憔悴凄怆风悲雨暝过者为之黯然而山川因人而兴者亦不多有孟城北垞本宋延清之别业香山履道之坊盖杨虚受之故宅王白二公乃发其名而传後世使其地灵气英而无人杰以当之亦将碌碌蒙昧不复传矣金陵古帝都也青谿数曲近在城中晋则为郗僧施之所领览陈则为江总持之所据依二人者虽号为声名震耀胷次坵壑一时游从见於歌咏然擘牋赋诗之时君臣狎昵沈酣昏蔽竟不能免艷妃桥上之戮至今使人羞之则青溪殆为江令所污而不可洗也异时段氏结庐其上王半山诗之而割青之名遂振兵火後走鼪鼯埋荆棘独取给於渔师老圃之用鍾山之秀无复照映此溪之上今大帅史公繇甘泉法从宅牧留京政修户庭而人自得於一路十州之外凡地之胜与景之殊者悉表出之六朝以来人物事迹搜访具备觉山川益奇登览益多而闻见益广至是青溪数曲之地足历而心营之回柳堤之旧筑层阁之新忽若飘浮上临云气环城之山毕出轩露朝

漪夕岚烟顔雨态尽得於指顾之内公听讼之余风清月白兰桡画舫时往来其间无红旗穿市之劳有延緑混碧之观龟鱼禽鸟攸荣飞跃鸣声上下而自喜得所遇焉是可为青谿贺也一日公顾谓客曰夫岂以游乐故而为此哉予之意殆非也尝迹建康志顔平原为昇州日据石壁窠大书奇字以纪乾元放生池者盖自江宁秦淮连太平桥并江带郭皆禁网捕所以宣皇明而广慈爱也今青溪之地延袤数里蒲莲葭苇映蔓葱蒨潜深伏奥依戲藻荇不知其几千万亿皆欲使之遂性咸若圉圉洋洋游泳恩波以祈两宫万年之壽此予之理是溪创层阁而以时往来其间者述平原之志举乾元之实而效蕃臣之精恳者也客闻而叹乃酌而请曰以公修名雅望特橐偃藩深为圣天子器重四方之士知公推轂後进桃李满门愿一见公者日有其人而公寓意幽讨寄兴沧洲岷山南楼比迹羊庾又能展拓是溪涵濡品类使鳬鹭休哺鸕狎不惊而尽所以乡慕古人尊君爱上之意则是溪之遇宁有既乎谿之遇公固得其所公方且以宏远之摹经畧中原勒功彝鼎公则有时而去也公去而位愈尊而谿之名愈大矣可不记欤椿於公为门下士乃摭其实而书之公名正志字志道南徐人乾道己丑中秋日右朝奉郎权发遣和州军州主管学士兼营内劝农营田屯甲事借紫龙舒张椿记 徐照诗叶脱林梢处处秋壮怀易感更登楼日斜鍾阜烟凝碧霜落秦淮水慢流人似仲宣思故国诗如杜老到夔州十年前作金陵梦重抚阑干说旧游 刘过诗琼树枝新梅藻进与君携手清溪问旧时狎客歌舞場何似诗人风雪迢谿边杰阁高峻 左右华屋连飞甍依稀王谢鸣珂里髣髴秦筝云母屏古来繁华各衰歇只有不磨惟岁月小船何处载愁来哀怨一声吹笛裂 黄度诗江家旧宅枕溪头谁向溪湾着小楼无奈当年亡国恨潮生潮落几时休】

涵虚阁南唐後湖东宫园内见徐鉉集

堂馆

清心堂在府治设厅後即经武堂旧基绍兴十二年叶公梦得建

玉麟堂在府治绍兴十五年晁公谦之建钱塘吴说书扁

锦绣堂在府治忠勤楼下淳佑十年吴公渊建皇帝御书堂名渊自为记【文见二十三卷】

忠实不欺之堂即府治中堂宝佑五年马公光祖建皇帝御书堂名陆景思为记【文见二十二卷】

静得堂即府宅後堂宝佑五年马公光祖建自书扁镇青堂在府治东北隅鍾山楼下淳佑十年吴公渊建弟潜书扁

芙蓉堂在安抚司金厅之後绍兴十一年叶公梦得建景定元年马公光祖重修

筹胜堂在制置司金厅之中景定元年马公光祖建【详见金厅记】

君子堂在筹胜堂东南临水景定元年马公光祖建清如堂在青溪淥波桥北马公光祖建取宸奎中一清如水之语以名之梁椅为记【上改元开庆之二月进京湖制置大使马公资政殿学士再镇秣陵到之日其父老相携持以慰其乡邻其部伍激昂以愿致其身呕喻翔佯如儿夺乳而忽复襁於其母也公为一切镇以宽静人用和肃幕府事益省乃作堂于青溪之泚扁曰清如盖公之在京湖也出私财募善战士奉命城黄平人迹不到处转输絙属秋毫不以累县官北去少府当具橐中装公悉郤不齎一钱上闻亲御翰墨以赐有曰卿一清如水公将同民之乐而荣上之?也遂取以名堂岁八月溃成四面尼涵万象一镜向之荒烟野草重昔贤踌躇凄怆之慨者今使人融怡自得泳游忘归焉梁椅适自维扬来省公公命舟觞椅堂上酒三行椅离席再拜执爵言曰水本清泥滓之性本清欲蔽之先生无耳目玩好之娱无口体甘逸之奉传舍其家而家国事虚舟其身而身民隐先生岂有他哉人污其清我清其清而已耳虽然椅也窃尝闻之道满天地间而最可见道者莫如水源泉混混不舍昼夜君子以自强不息焉水先万物而以养万物水流而不舍是以物生而不穷先生忧勤王室俛焉日孳方寸之天无顷刻不运也故其流行为长江大河润泽为时雨甘露社稷生灵实嘉赖之此则先生之清而圣上所为褒表也若止於濯吾纓以洁其身而已矣不几於伯夷之隘乎故曰伯夷之清清而隘裕翁之清清而裕公笑曰嘻是吾志也釺子爵遂退而次第其语为堂记门生宣教郎前淮东安抚使司参议官梁椅撰门生朝奉郎新除宗正寺簿陈淳祖书门生文林郎滁州军事推官兼沿江制置大使司干办公事章应雷篆盖】

思政堂在通判西厅乾道六年潘恕建好谿章谦为记【天下之理不有废何以兴不有毁何以成水之涸也适为汹涌澎湃资也木之落也适为条畅硕茂基也斯轩之建其殆是欤岁在着雍摄提格夏六月晦西倅厅事之旁忽有回禄之灾帅守临视人皆効力旋即扑灭而贰车燕处之室已为煨烬於是鳩工聚财戒期以鼎新一毫之用悉出公帑不以厉民工兴于中元节而毕於闋鼓之辰越翼日设觴豆集僚友以落成仆实与焉酒酣贰车属仆为记且谓斯轩旧名治中思有以易之仆固辞不获因念贰车左右郡政精力於职今建斯轩端为坐卧思索之地必不专事宴乐也闻诸子产曰政如农功日夜思之朝夕而行之行无越思如农之有畔其过鲜矣继自今贰车处游此或为南郭之隐几或为茅容之危坐终夜不寝师仲尼之训坐以待旦以周公为法则郡政庶其尽善古所谓同流王化不为虚语矣请以思政名庶来者知营建之意云贰车潘其姓恕其名端行其字九江人也好谿章谦记】

筹思堂在转运司圃内本筹思亭之旧王荆公范忠宣公皆有诗【王荆公诗昔人何计亦何思许国忧民适此时寓兴中园为远趣托名华榜有新诗数株碧柳苍苔地一丈红蕖淥水池坐听楚謠知岁美想衔盃酒问花期 范忠宣公诗亭为筹思设公将称此名致诚通造化审虑敌权衡境寂居无倦心虚照自明诂同游宴事休戚系羣生】绍兴十七年郑公侨年即亭基建堂边惇德为记【绍兴丁卯秋华原郑公以浙东仓司移总外计於大江之左行且纷更留司以应办军需无扰而济闻于上爰下纶言俾仍旧服於是军民官吏欢呼而乐公之留及是年之冬以暇日步於公圃视西北隅得隙地焉欲经度之询之属吏咸曰漕台旧尝有筹思亭者兵火之後其废日久独大丞相王文公范忠宣公所咏二诗刊石尚存公叹曰岂可使前人之迹埋没而不举二公之雅什殆为虚设乎乃度余材成之赋功属役不扰於民用财不取於诸邑閱月而就得丰俭之中而少加壮焉易之为堂而名仍其旧乃立王范诗碣于堂中匪为

观游特以继前人之志也惇德谓天下之事戒在乐因循而惮改作苟临事例若此视陋不支忽倾不持毛举缕数岁月之间浸浸而废者不知几条良可悯笑也盖常人用心每以玩时愒日为事故较论短长将有所兴作必曰此有利于已乎有利于吾子孙乎力非不足势非不便畏首畏尾将发复已率皆滞常而难合惟公之志乃大不然视事虽久一日必葺一如其始至於是弊者必新蛊者以飭军储充盈民不告病故能以余财余力求前人之志而成之其用心固自不同矣闻之郑子产曰政如农功日夜以思之思其始而图其终行无越思如农之有畔其过鲜矣方吏退无事时优游此堂坐而思之若何而可以享上若何而可以足食民之利思所以兴民之瘼思所以去则筹思之设殆非苟然者在我後之人凡到公之堂能求公之用心而复思公之所为则天下之事何患于骖骮而不振也哉故书此以序事之始末云绍兴二十年岁次庚午三月十一日记左从事郎新充秀州州学教授王谊书石儒林郎新监通州监仓边惇德撰】

忠宣堂在转运司西厅本双槐堂之旧真文忠公改建刘漫堂宰为记【建安真侯将漕江东之明年夷考前人名氏曰惟忠宣范公实获我心乃为堂以祠复更命故双槐堂曰忠宣朝夕游焉以致其思谓大司成袁公其文宏雅宜为祠记以光昭忠宣之令德谓漫堂叟刘宰少戇宜述堂之所以名以砭吾私叟不佞窃惟国家仿右部刺史置转运使江东以地大赋殷委寄特重异时驾四牡而来多巨公有显迹而忠宣无可书之事後忠宣百五十余年其间绩用之湮晦何可胜计而忠宣之名与日月悬岂忠宣之所存与真侯之所思固不可蹟寻欤夫好善恶恶人心公理一失其平则是非易位故爱君子必知其善之所不及则君子勉而进于善疾小人必原其恶之所不至则小人不狃于为恶君子进於善而小人服小人不狃於为恶而君子安斯民也三代所以直道而行而家而国所用平康也而季世君子不然其爱同已太深而疾小人已甚爱同已太深则以一人而信其类以甚得于彼意其必不失於此言出而和不矫其非事举而随不要其弊幸其中而不倚止而非激也则可否则激而偏尝试而误而君子之道始屈疾小人已甚则屏之去恐不速丽之法恐不重抉摘其隐微不俟其着掇拾其既往不问其新幸其恶之稔辞之屈也则可否则有疑而甚之者矣疑之则是否莫辨甚之则曲直有归而君子之祸激矣忠宣公其知之方其在江东赋筹思堂诗有曰审虑敌权衡又曰心虚照自明夫虚则无我平则称物其後日规橰率肇乎此故在当时曰欧曰韩曰富曰司马世所谓君子公所藉以进者而意向稍愆公皆指其非曰章曰蔡曰邓世所谓小人公所坐以退者而文致稍深公皆以为过其持平此心真不愧于权衡而其识虑之远则非浅鲜者可及故後之论者谓使公之言行於熙丰必无元佑之纷更使公之言尽信於元佑必无绍圣之反覆叟亦谓使公之生先於汉唐之季必无朋党之祸使公之死後於建中靖国则崇观儉人亦无所容喙矣人之云亡邦国殄瘁尚忍言之真侯以道事君以义正国盖庶乎忠宣之为者其升堂而思夫岂徒哉其名字不书盖儿童走卒知而诵之老夫以忠宣所以事韩富司马诸公者事侯他日将有人焉仆老矣嘉定丙子腊日记丁丑十月望朝散大夫直宝谟阁权江南东路计度转运副使俞建书并立石】

戏彩堂在转运司正堂後嘉定八年真文忠公将母出使葺而名之马公光祖王公堃皆公门下士宝佑初适同持节於此新其堂而大其扁且刻石识之【嘉定八年春西山先生真文忠公繇右螭持江东漕节时公方盛年将母出使退食之暇日以娱亲为乐即官廨之後堂葺而

扁之曰戲彩今四十年矣公忠于君孝于亲仁于民盛名钜德四海仰之不特江东父老也然公之德政实自江东始故思公者久而不忘既绘公像与忠宣范公并祠矣登斯堂者又慨想其承顏养志之孝而兴起焉埜事先生甚久而马公光祖受先生之学亦深皆门下士也适以台閤同寅于此马公命埜作戲彩堂三大字而更扁之於以见尊慕先贤之心而传示来世之意且述其梗槩刻诸壁宝佑二年孟秋朔门人王埜谨识】

使华堂在总领所圃内绍定三年戴公桷建自为记【记云余於景萧之南敞政足园矣厅事西偏旧有圃焉一水萦环若檐之鈎若佩之璜古柳参天夹峙着行余欣然乐焉挟书过之亭老而欹地窄而硤灌莽蒙茸水失其性无以发余天趣之灵也沿水为堤编木护之彻壅而通去滓而清而水之性复矣於水之陰辟地一区移分鍾堂於上易名使华左植修竹亭曰碧鲜右植寒梅亭曰春信循堂之後复締三亭曰种花以牡丹名曰金粟界以丹桂名曰云锦乡以桃花名此水北之佳趣也使华之南隔水着亭曰芳洲曰映波曰柳风柳风而东飞梁通之曰玉水曰静观曰蔗境映波而西复跨飞梁极水置亭名曰水云此又水南之嘉趣也方其霁影初开天光相磨璧月当空金波动摇其或风止澜息一尘不生草木轩窗如镜中观余游於斯吟於斯见宾於斯而不能去也客或请曰水哉水哉何取於水也余应之曰夫散於两间者五具道体之妙立一性之真者惟水焉耳而四者不豫焉今夫水生於天一根固有也含蓄羣象该万善也润泽百物惻隐仁也不舍昼夜纯不已也盈科後进毋自欺也入纖芥之隙巽也干鰲极之运健也余因之以翫此性之理岂独恣心目之娛哉且古者卿士奉命而出竣事则旋故谓之奉使未有列职於外而使名者也若观察节度转运之类唐以来失之矣独今饒师必王人为之故名园曰使华而又扁诸堂也然金谷縈之尘埃蒙焉比诸使为冗且剧矣必疏濬此心若水之清讲切利病若水之明称物赋予若水之平始足以称礼乐之选尽谏诤之责不然予於水有愧焉耳奚光华云哉子今与予临是水也不独监形於以监心不独观物以之观性反稽中省久焉有得则异日游是园也波光水色无一非性矣客诧曰异哉吾问水得知性绍定三年端午日记朝请郎守太府少卿总理淮西江东军马钱粮专一报发御前军马文字兼提领措置屯田戴桷撰承议郎监建康府榷货务都茶场何处信书从事郎辟差充总领淮南江东军马钱粮所準備差遣李自牧篆额】堂後为桥跨溪榜曰寻春桥之北为看窗榜曰书舫皆马公光祖所作

仁本堂在总领所东厅马公光祖建自题其柱云斯堂经始於宝佑甲寅仲秋朔旦落成於良月既望扁曰仁本取君子治财以仁为本之义

誓清堂在府治东亲兵教场内绍熙元年留守章公森建淳佑七年都督赵公葵改建指授堂

有美堂旧在府治今堂基在行宫内

考证梅尧臣宛陵集载金陵有美堂诗【李白爱山如洛阳三盃为歌白日长废基台殿不可识玉燕旧栖王谢堂公来碧瓦起栋宇罗列图书牙作牀池头古月城下江照见万里冰雪光江流不尽月不死寒浪素影东西翔愿公乐此殊未央慎勿区区思故乡】

仪贤堂一名听讼堂今废

考证吴建中堂在都城宣阳门内路西每岁策孝廉秀士考学士学业岁暮习元会议於此梁改曰仪贤梁武帝谦恭待士大通中有四人来年七十余鶚

衣蹶履行丐经年无人知者帝召入仪贤堂给汤沐解御衣赐之帝问三教九流及汉旧事了如目前帝心异之四人与昭明太子如旧交【杨备诗云两两鶚衣鹤髮翁讲筵谈柄坐生风向缘太子欢相得应与商山四皓同 马野亭诗鹤髮龐眉四老人鶚衣蹶履一何贫堂中论事君心喜寺里谭经衆说新 杰仇口皆古字用黄园绮定前身胡为朝士无人识惟有昭明极见亲】

乐贤堂旧在台城内晋肃宗为太子时所作苏峻之乱宫室皆焚惟此堂独存【旧志】

考证宫城西南角外有清游池通城中乐贤堂 晋咸和七年彭城王紘上言乐贤堂有先帝手画佛像屡经寇难而此堂独存宜敕作颂帝下其议蔡謨曰佛者夷狄之俗非经典之制先帝量同天地多才多艺聊因临时而画此像至於雅好佛道此未闻也於是遂寝

武帐堂元嘉中建於武帐冈上故名在城北三十里幕府山南今废

考证宋文帝元嘉二十一年宴於武帐堂将行敕诸子且勿食至会所赐饌曰盱食不至有饥色上曰汝曹少长丰逸不见百姓艰难今使汝曹识有饥苦知以节俭用物

郑介公读书堂在清凉寺

考证郑侠字介夫其先光州固始人四世祖偕唐末随王氏入闽遂为福清人侠既冠遭妣黄氏忧念家贫亲老弟妹衆多慨然自誓当访学以成名治平二年初举下第随父翬赴江宁府监税得清凉寺一小间闭户读书唯冬至元日归省时王荆公以中书舍人持服寓江宁声迹相闻公未尝往见有杨骥者鄱阳人来就学於荆公公语之曰郑监税一子在清凉读书闻其人好学可与相就骥如其言岁正月忽一夕大雪寒甚通直以酒食饷公公读书至夜艾呼骥共饮酒酣登寺之瑞像阁题诗曰浓雪暴寒斋寒斋岂怕哉漏随书卷尽春逐酒瓶开一酌招孔孟再斟留赐回醺酣入诗句同上玉楼台已而杨君雪後为荆公诵此诗公叹赏不已屡讽其漏随书卷尽春逐酒瓶开之句曰真好学也是岁公还乡应举通直敕公以舍人累相问须一往见乃携所业谒公公益称獎期以高第明年治平四年擢进士甲科荆公得榜喜甚公时年二十四调光州司法以归荆公服除起知江宁相见愈厚及公赴浮光荆公入参大政公数具书谏荆公极言新法之为民害不听後公监在京安上门数上书言新法被谪【详见一拂祠下】

韩熙载读书堂在溧水无想寺中

考证熙载集有赠寺僧诗【无想景幽远山屏四面开凭师领鹤去待我挂冠来药为依时采松宜绕舍栽林泉自多兴不是效刘雷元佑间邑尉周沔尝题诗有萤火不知人已去夜深犹傍竹牕明之句】

蚕堂旧在县北七里耆闾寺前沙市中六朝皇后亲蚕之所也【杨虞部诗摘茧抽丝女在机茅檐苇箔旧堂扉年年桑柘如云绿翻织谁家锦地衣 马野亭诗桑林倒影媚晴川中有蚕堂半爍寒翟茀先期移过此鞠衣拂晓定来看未眠曲簿心方急已洗缲盆事始宽瞻彼北宫犹若此田家妇子可偷安】

四老堂在转运司韩元吉为记【乾道二年秋予自公府掾得请补外上不忍其穷而犹以为可用也俾漕於江东予平生喜交游其在中朝所与游多天下知名士遇退食之隙及日之休暇则亦持酒赋诗细绎文史讲论古今以为乐既骤膺使者之寄矣宾客之至者动以礼法相拘縶猝猝不得欸虽强之亦往往不肯尽其语辄去而漕之治颇有轩亭之敞花竹之茂职事稍闲可以周游闲放而无前日交游之盛与共此者予方以为恨也岁十二月予兄子云自京口罢官始得奉太夫人以就养弟兄晤语颇已自适而友人龐佑父乃自吴中来过得之益欢明年春鄱阳章冠之复从仪真来馆于一室四人者昼夜语不休间以吟讽论难而谈辩锋起笑呼之声闻於外向来索居之叹若醉而醒病而愈也盖留连累月其为欢且甚矣於是尽取所谓轩亭之名相与易之不易更书之而二友之所舍因名之曰四老堂吾四人者实以自况也夫古之君子少而学壮而倦老而传皆礼之常也年未七十不可谓之老又老者非人子所宜称今吾兄弟之有亲也而与佑父年仅五十冠之复少於予十余岁皆不得谓之老而遽以老自名者盖皆生於羈旅而长於贫贱容貌藁然以衰鬢髮苍然以华虽未老而老态已具故辞其名而不可得耳又四人者志尚之侔而臭味之相似不特相从於此盖将相期老於山林之下此堂之所以识也然佑父牵於文章仕而未达冠之以诗自鸣不肯用以求仕而予与子云乃侥幸为郎以蒙上之任使子云既投劾以归予之庸且懦每惧其不获免也使吾四人者幸而至於老既老而果得自逸於山林回视今日所以名吾堂而为之先者岂不信而无所愧哉则斯堂虽陋或以吾党之故而传後之来者固贤於予亦足以知老之可慕而人生会合之可乐也夫二月己卯颍川韩元吉记】

尚友堂在青溪先贤祠後马公光祖建

飞泳堂在江东运管厅绍定四年建陆德舆书扁嘉定九年重建杨蓬为记

来燕堂在乌衣园王公桱书扁

存心堂在上元县廨西偏景定三年知县事临邛杨应善剏建取程纯公语为扁帅垣姚公希得为记漕使陆公景思书丹朔斋刘公震孙铁庵杨公应已斛峰李公伯玉皆为铭之【记云令古子男国宅生百里位虽未公卿心苟存焉譬之水流斯为川恶知其不泽物耶上元为建业赤县近市不嚣治所西偏旧有堂扁曰存爱盖取纯公程子存心爱物之语岁久屋老凜焉将压景定三年临邛杨君应善蒞事未朞月栉纷滌垢撤故以新易名存心其义一也广庭辟

其前方沼疏其後生香乐意可玩可适斋心燕兴与神明对景前修之法言俨函丈其如立昔纯公主是簿且撮是邑均田塞堤脯龙折竿载诸传记皆仁者之为异时尝於令宰坐处书视民如伤四字其言爱物济人谓一命之士皆当以此存心溥哉仁言乎杨君希贤志可尚已堂成属记於予予曰虚灵之府万善皆具寂然不动之时与天地万物为一苟能扩而充之其仁不可胜用仁人心也心主是则仁不主是则欲去仁存欲富贵所充诎也嗜好所啖啜也夜气不梏亡者几何圣贤论存与不存惟于多欲寡欲上秤定分数盖欲寡则虚虚则明明则油然而生者皆仁矣今夫百里之官夫岂念不及民而常苦于簿书期会之不给由是状邑曰滩畏邑曰债敝精神竭智力济斯斯已矣偿斯斯已矣终更而去之无虑皆褻城驿厥或告之曰民胞物与也徒有蹙然而已呜虓圣门仕学每於令宰乎观千室之邑民社之寄蒲之三善武城之学爱随试辄效壹是心法县虽剧顾所存之何若纯公圣贤者流岂欺我哉後之登斯堂者所贵乎体公名言充我实践其母曰力不足也通议大夫试刑部尚书沿江制置使知建康府江东安抚使行宫留守兼权淮西总领姚希得撰朝议大夫集英殿修撰江南东路计度转运副使陆景思书丹并题盖通直郎特差知建康府上元县主管劝农营田公事兼弓手寨兵军正赐绯鱼袋杨应善立石 铭云士自一命以上苟存心爱物於人必有所济此明道先生程纯公语也先生尝以上元簿正撮令後人因摘存爱二字以名堂岁久颓圯临邛杨君应善来为邑始撤而新之小易其名为存心属刘震孙书之且述先生之旨以为铭铭曰孰为人心心兮即仁其端则爱其德曰生圣人以此守位君子以此长人士自一命皆可及民惟今之职於民尤亲苟存心于爱物知分殊而理均疾痛痒疴举切吾身赋歛必薄徭役必轻刑罚必省出枉必伸蠹贼必去困穷必矜皆此念之流布贯四时而常春一息间断私欲外乘已与物隔如越视秦野有饿殍里有呻吟覩之不见听之不闻作於其政毒流害深剥牀至肤戕叶至根虎豹不为猛蝮虺不足惊彼同胞且弗恤而况於洿池之罔罟山林之斧斤此仁与不仁之异而存与不存之分今登斯堂其绎嘉名纯公在前毋贰尔心 又铭云泰禧间论者谓令宰受地百里古公侯之国今受辱於郡若部不得与判司小吏比凡郡若部之府史胥徒皆得辱县令宰士大夫百方巧计争避於令宰国家百方立法迫必为令宰有不为令宰或为之而逋其岁月大吏得反劾之必使为令宰乃已盖数十年前已如此今眊之殆无以异而加难焉吾弟应善志元以大帅尚书姚公之辟出宰上元公聪明惠爱视郡邑如家待僚属如子弟凡令宰所难不以为病县治旧有堂曰存爱实用程纯公语岁久颓圯撤而新之更扁存心公为之记予语志元是心所以能存不存者抑有繇也为之铭曰方寸之运虚明公溥六合可弥操之而存举斯加彼善推所为古之从仕志於行已位无崇卑吾心所及吾力未逮惟勿忘之有惻於中尔病予恫禹稷溺饥须臾不存痒痛莫关杞鲁瘠肥彼夸毗子夷言蹻行谓心可欺而狼疾人自谓勿能则亦勿思河南夫子乐顔之乐自任则伊与物为春视民如伤内恕所推仁义之言式谷多士为百世师季也学制肇新斯堂景行前规嗟惟宰邑展布之难莫甚今时星符羽檄茧丝保障心劳力疲簿书眯目敲榜犯虑所存几希不遇其长弗获乎上民不可治堂堂橘翁威风大体忠信惠慈季也何幸只若教条二人我私翁非尔私絜矩之学百辟表仪季吾语汝勿替此心朝斯夕斯燕兴一堂无愧此顏是答已知 又铭云邑令杨应善摘纯公语名斯堂番人李伯玉为之铭体天地塞其名曰人性天地帅其心曰仁心体本仁其端惻隐能扩而充可放而准庶人失之禽兽几希安得君子终食无违格言夫训繄孟程子先後发明异辞同旨君子以仁是举其全命士爱济则有後先民胞物与理一分异由仁而爱匪爱曷济思昔先生撮令上元见之政事先行其言画法均税贮粟给卒视民如伤推以及物杨君作宰慨想仪刑有揭其

扁式新斯亭是心苟存举斯加彼有踰斯言其顙有泚】

德星馆在西门外七里倪总领屋建

通江馆在赏心亭东即月亭旧基後为回易库马公光祖改立通江馆以待四方之宾客【马公光祖自书壁记云懋迁有无商贾事也官自为之则其害着矣盖商贾之术逶迤万状身履目击旁通曲遂左右望而罔焉始得倍称之息今掌之以吏制之以县官之令其情逆其分格势已难矣就使综理得人出纳以道而利未一二害且百千矧耳目之弗周而弊端之纷错乎金陵中兴驻蹕之地为古东西都其井邑当殷阜人民当富殖物货当辐辏今皆不然市无藏贾民以窶告盖其俗多游惰习末作耻苦心力业务本一值连雨闐闐萧条往往菜色狼顾长民者率多大吏养威望不屑细微有隐弗达民已病矣旦视暮抚犹惧弗饒顾乃聚狙僧竞刀锥通衢焉以为之垄断取之于素贫争之于无赢刮龟之毛割鹭之股是民已病而又益之疾也予所至恶言利开庆己未春自荆间被旨复还旧镇下车见吏民有为言回易库之害者无智愚贵贱蹙额不忍道始而行之不过贸易以逐什一之利裨经费所不及未为甚害然日引月长不特守长未尝预闻僚佐亦未尝经目其与百姓商贾相尔汝量较者皆狞卒悍胥犹出桺之虎兕当道之蝮蛇也既欲自肥而家又欲藉是迎合徼寇恨不掩其目搯其吭而豪夺之有司方幸其术之售余不暇问於是商贾方望望而去之逮岁久物蠹官视元佑大半责羨又画策尽邀之列肆复于其中高下其手而官又不暇问市井贩夫无不束手失业此金陵之民不能自声之痛也郡本无土物仅产红花自库之兴而种艺者反受害焉予两守是邦愧无以及人知其害为甚深决意罢之以其庐为通江馆不独欲舍过客盖又欲泯其迹云】

横江馆在水西门内赏心亭侧马公光祖鼎创以待四方之宾客【名取山谷诗出门一笑大江横之句】

高斋旧在江宁府治今在行宫内康定中叶公清臣建胡公宿作记【南中江山类多记赏之美金陵故都绪余六代华人夏士盛栖此土虽一坵一壑之细皆经高贤名辈尝所留连茅许世外之风王谢江表之德山林皋壤号为名胜于城东北趋鍾山为近南唐李氏尝因城作台台上望月人相呼为月台下临濬濠正面覆舟南对长干西望冶城榛烟渔火泉华谷气川禽山鸟翔嬉其间林木嘘噏之声云霞起灭之状须臾眺听万态逖出此名胜之内特又名胜者也台倾地荒介在人外一境之秀未有盼者康定辛巳之夏龙阁南阳公自三司拜符安辑江介政尚凝简日多休暇寄意琴酒之适留好风泉之赏他日因行後圃遂登故城适废台留壤址踳踳四眄爱叹形胜指言佳丽之观此最妙处日衰材瓦之美调兵干之使蹇芜秽养华薄开迳自下立斋其上环植百柱通敞四轩高侔谯楼广容宴豆檐宇飞竦势将干云旁瞩郊垧俯见庐井句曲之地肺华阳之洞墟三峯参差仿佛在目虽进深之士?迫之人暫游其藩一践兹境其心翛然犹以谓已登崑仑涉阊风澹乎忘归有脱离昏俗之意又况真粹之流平日隐几反照正性保御太和人境相得其乐如何哉公既用钟鼓落其成复须金石记其始比辱来教见命纪事曰我作是斋姑欲榜之佳名而絶境难摹了不可得今采谢宣城宴坐之意直题曰高斋夫斋戒洁之称休舍之所君子根本於道德极摯於性命利用於安身有余于治人不役志以营已常虚心以待物其有为也精义致用以经世务之韞及其无事也恬智相养以济

天地之和故道用不勤而气守自若庖丁之奏刀老扁之斲轮顔生之坐忘伊公之强德神机之王繇此物也公抱道混成栖神高映初总机剧未尝荣华比辞禁奥亦亡欣戚方舍山水之所以穆仁智之性高情远尚焉可跂耶人之登是斋者当领会公意不止邀乐壶觞取悦林岫而已足使軋者忘其名夸者辞其权长留清风以遗永年庆历二年四月十九日记王荆公和王微之登高斋二首寒云沈屯白日埋河汉荡坼天如筵衡门兼旬限泥潦卧听窾木鸣相挨萧晨忽扫纖翳尽北岭初出青崔嵬微之新诗动我目烂若火齐金盘堆想携诸彦眺平野高论历诋秦以来舳舻淋浪始快意忽忆归去胡为哉念君少壮辍游衍发挥春秋名玉杯书成不得断国论但此空语传八垓登临兴罢因感触更欲远引追宗雷君知富贵亦何有谄誉未足偿讥排风豪雨横费调燮坐使髮背为黄台留宾往往夜参半虽有樽俎无由开江南佳丽非一日况乃故国名池台能招过客饮文字山水又足供欢哈剩留官屋贮酒母取醉不竭当如淮干戈六代战血埋双阙尚指山崔嵬当时君臣但儿戯把酒空劝长星盃临春美女闭黄壤玉枝白蘂繁如堆後庭新声叹樵牧兴废倏忽何其哀咸阳龙移九州坼遗种变化呼风雷萧条中原殒无水崛强又欲凭江淮广陵衣冠扫地去穿筑陇亩为池台吴侬倾家助经始尺土不借秦人篋珠犀磊落万艘入金壁照耀千门开建隆天飞跨两海南发交广东温台中间罍罍地无几欲久割据诚难哉灵旗指麾尽貔虎谈笑力可南山排楼船蔽川莫敢动扶伏但有谋臣来百年沧洲自潮汐事往不与波争迴黄云荒城失苑路白草废时空坛垓使君新篇韵险絶登眺感悼随嘲哈嗟予愁气已竭对垒每欲相鬪挨挥毫更想能一战数窘乃见诗人才】

学斋在今府治玉麟堂侧【详见府治】

昭文斋在鍾山定林庵王安石尝读书於此米芾榜曰昭文李伯时画安石像於壁【王荆公诗我自山中客何缘有此名当缘琴不鼓人不见亏成又定林斋後鸣禽散只有提壶遶屋檐苦劝道人沽美酒不应无意引陶潜】

式敬斋在左司理厅邢庚立傅公行简铭【邢君典狱金陵扁其斋曰式敬求铭於予予观古人论刑狱之道曰明刑曰祥刑曰哀矜庶狱曰庶狱庶慎虽不止於一端而所以本之者敬也盖敬则心体常存动合于理推是心以典狱岂惟匹休苏公殆将迈德皋陶矣因叙用式敬尔由狱韵作之铭曰敬以直内刑属五极我思古人苏公是式大祭大宾心罔不敬何敬非刑咸中有庆惟敬惟一纯一不已斯须或忘薄乎云尔片言折狱其惟仲由由何敢望匪敬奚求明慎哀矜敬无不足皋陶垂休亦惟典狱开禧改元仲夏旦日四明传行简钦父铭金华邢庚应辰立河阳李大节德操书】

紬书斋在府治东北鍾山楼下绍兴初叶公梦得尝於府治建书阁榜曰紬书後毁於火阁不复建景定二年马公光祖命周应合修纂建康图志乃置书局於鍾山楼下聚书数万卷以备讨证故取叶公书阁之旧名以名此斋公自书扁

制使姚公希得任内重建江宁馆本府旧有是馆岁久弗葺将就颓圯景定五年二月七日兴工至四月初七日毕重建厅堂廊宇门楼小大咸具总费钱一十三万六千余缗米三百一十

二石有奇

大使马公光祖任内创建誓清館即客亭旧址在龙湾江浒凡舟之泝岷江达淮海上下去来者经焉北对滁山中原可拱挹也故宇卑陋名存实亡咸淳丁卯三月始尽撤其旧创屋五十二间治事有厅燕息有堂幕属有舍庖湔有次高明轩敞快人心目大夫士之馆於斯者宁不动中流击楫之思更名誓清盖取此意糜钱二万二千有奇

大使马公光祖任内创仪宾馆前志旧名也今废咸淳丁卯因没入之屋改为之门庑皆新创堂奥庖湔尚仍旧以为车马小驻之地

大使马公光祖任内创需館咸淳二年即没入之屋为之在小木头街

吴别馆在句容县

考证述异记云吴王夫差立春宵宫爲长夜之饮造千石酒鍾又作天池池中造青龙舟日与西施为水嬉又有别館在句容楸梧成林古乐府云梧宫秋吴王愁是也

吴客馆在城南十三里

考证丹阳记曰吴时客館在蔡洲上以舍远使晋陶侃尝屯兵於此

宋儒学馆在今覆舟山北鍾山乡去城五里

考证南史宋文帝元嘉十五年立儒学馆於北郊命雷次宗居之

宋招隐馆今草堂隆报寺是其旧址

考证宋雷次宗传召诣京邑为筑室於鍾山西岩谓之招隐馆

宋四方馆今不详其所

考证宋初置南北客館主四方宾客後为四方馆

宋商飏馆在蒋庙西南即九日台是

考证齐武帝永明五年四月立商飏馆於孙陵冈世呼为九日台沈约郊居赋云望商飏而永叹【详见九日台下】

齐梁士林馆

考证齐竟陵王子良开西邸延才俊以为士林館【西邸在鸡笼山】
梁大同六年於台城西立士林馆延集学者

梁集雅館天监六年置今不详其所

陈别馆亦名婚第

考证陈书云六门之外有别馆以为诸王冠婚之所名为婚第

凉馆在旧江宁府治元符中吕公升卿建今在行宫内【修凉馆记金陆开府因李氏故都舍馆之雄为江左第一而东园閱武亭規制宏伟尤金陵之最历载既久芜秽不治将就倾败直秘阁吕公自河东漕移镇於此公初下车以民事为不可缓先设教约十余条以令於民民大化服至不敢犯曾不浹旬境内无事姑与宾客僚佐宴游園中顾瞻斯亭惜其将隳乃命营葺目其故材授以新矩未几而功就大厦既成规摹增壮弗华弗质厥度惟中面辟广庭架松为廡背开虚室以来清风回环疏明无有蔽障虽三伏蕴隆而暑气不到至者豁然烦襟顿释故公更以凉館名之昭其寔也呜呼兹亭之废久矣上漏下湿柱折栋挠鸟鼠栖伏风雨不除游者畏厌蹶蹶而去今革故之陋轮奐一新宜侈其名以矜于後而公意独不然贵寔不贵华取其便事者以名之而已观公为政斥去边幅崇尚诚信事悉躬决而庭无留讼老奸滑吏拱手禁默不能为奸盜贼踰境器顽革面市无忿争内外嘉靖故报政之速易如反掌兹非贵寔之効欤初公以问学政事被遇神考历位华显元佑之际解组自高一旦起闲左奉使诸路丰功美利及物多矣其间民之被泽尤深者如二折之越京东之郛河朔之瀛公以使者皆扰其府事施設先後如出一律民吏驯畏相戒不挠法皆席未及煖而囹圄虚休誉洋溢流布四方今金陵之政复卓越显着如此且将去而大用于朝矣则斯館之存殆为甘棠之遗思耶元符二年闰月旦武林元时敏记】

景定建康志卷二十一

卷二十二

<史部,地理类,都会郡县之属,景定建康志>

钦定四库全书

景定建康志卷二十二 宋 周应合 撰

城阙志三

亭轩

忠孝亭在天庆观西昔为冶城晋卞壺与二子同死苏峻之难其墓在焉南唐於此建忠贞亭穿地得断碑徐锴为之识国朝庆历三年叶公清臣取其父为忠臣子为孝子之言始改曰忠孝元佑八年会公肇即亭为堂绘壺像其中列诸祀典而为之记建炎间堂废绍兴十五年晁公谦之复为亭乾道四年史公正志与转运判官韩公元吉益新之取曾公所为记重刻之石立於亭左嘉定四年留守黄公度改建堂上为冶城楼【天台周泊子及诗云晋鼎艱危奸人窥孰谋国者如儿戏陷穽弗设延虎貔虓阚抟噬婴者摧羣公奔溃不敢谁卞公力疾起督师谓事迫矣奚生为以肉餒虎吁可悲公则死矣二子随伟哉忠孝萃一时维公忠义天所资向来谋国如蓍龟不用吾言至于斯为社稷死则死之冶城之麓江之湄荒塚突兀余丰碑半生读史长欷拜公之坟涕沾颐死者可作吾谁归嗟哉江左固多士往往所欠惟一死元规儿辈何足罪王公偪仄石头里气息奄奄有如泉下鬼苏武之节不如是视公胡不頼有泚男子之死一言耳死而不亡公父子】

赏心亭在下水门之城上下临秦淮尽观览之胜丁晋公谓建【旧志】景定元年亭毁马公光祖重建

考证李学士家谈曰扬州有赏心亭此其始也 湘山野録及苕溪渔隐及金陵事迹皆云丁晋公镇金陵重建赏心亭其家藏卧雪图张於屏乃唐周昉笔经十四太守虽极爱不敢辄取後为一太守以凡笔画芦雁易之 祝穆编方輿胜覧引续志云丁始典金陵陛辞之日真宗出八幅袁安卧雪图付丁谓曰卿到金陵可选一絶景处张此图谓遂张於赏心亭按乾道旧志及湘山野録苕溪集金陵记王密学诗序皆言赏心亭卧雪图出于丁公家藏不言及御赐惟晋公图画见闻志中以此图为真宗所赐和父盖本此耳考之宋朝史传会要记闻等书皆无赐图之事而仅见於晋公所作图画志中或谓晋公既张此图虑为好事者取去故设为御赐之说以保之而卒不能保胜覧殆为图画志所误也未详孰是姑两存之景定庚申四月二十一日龙王庙灾风盛焰炽其东正接大军广济诸仓积贮之所也而风焰向之马公光祖至仓所叩头祈天风反而西仓廩得全旧赏心亭在龙王庙西正当风及之处不免煨烬公曰仓毁则

食难足亭毁易建也亟命工度材重建斯亭选幕属朱幼学董其事不日而成视旧观雄伟过之为金陵第一胜槩【密学王公琪诗云千里秦淮在玉壶江山清丽壮吴都昔人已化辽天鹤旧画难寻卧雪图冉冉流年去京国萧萧华髮老江湖残蝉不会登临意又噪西风入座隅王荆公安石诗檻折檐倾野水旁台城佳气已消亡难披草莽寻千古独倚青冥望八荒坐觉尘沙昏远眼忽看风雨破骄阳扁舟此日东南兴欲望江流万里长又霸气消磨不复存旧朝台殿只空村孤城倚薄青天近细雨侵寻白日昏稍觉野云成晚霁却疑山月是朝暾此时江海无穷兴醒客无言醉客喧侍读张公瓌诗洲围淮口江形狭亭上城头月色多王岐公珪诗六朝遗迹此空存城压沧波到海门万里江山来醉眼九秋天地入吟魂于今玉树悲歌起当日黄旗王气昏人事不同风物在怅然犹得对芳樽周益公必大赏心亭醪会古风晋人夸新亭暇日辄高会中间伯仁辈未免楚囚对江山犹古昔人物已暧昧东郊今保厘翠华记行在佳丽压淮楚迢游盛冠盖兹楼贯城雉于迈无小大令威虽不归灵光故无碍烟云互明?川郭相映带当年乌衣游此日思胜?从容值休沐登临多慷慨幽怀忽轩豁细故絶芥叶已寻诗社盟更订饮朋戒佳宾满座上好语来天外舟移白鹭远目送飞鸟快方种渊明秫粗免监河贷一醉倘可期与君时倒载高公九万登赏心亭诗江亭如倚钓鱼矶石上云檐势欲飞西望江洲依白鹭东连巷陌接乌衣六朝更代何人守千古兴亡事总非客子独怜风景好倚栏长是欲忘归曹元宠诗白鹭洲边芦叶黄石头城下水茫茫江山不管事兴废今古坐令人感伤六代豪华空处所千秋城阙委荒凉空余眼外无穷景助我凭栏到夕阳米公芾诗晴新山色黛风纵芦花雪尽日倚栏杆寒宵低细月姜光彦诗楼外青山刮眼明轩窗当署更风清地分南北开天险江泛东西几客程四者难并同醴笋一之已甚厌戈兵最怜夜夜秦淮月相伴依然似友生北谷罗必元诗胜地分明可赏心江山满目饱登临洛阳黯淡烟云远多少英雄泪染襟潜斋王公楚诗物华尽入锦囊收留与江山做话头桃叶数声风力晚芦花万顷月波秋休寻鹤相当年画谁记坡仙旧日游回首兴亡多少事渔舟独不挂闲愁後村刘公克庄梦赏心亭诗梦与诸贤会赏心恍然佳日共登临酒边多说乌衣事曲里空残玉树音江水淮山明历历吴陵晋庙冷沉沉晓钟呼觉俱忘却独记千门柳色深阙见说斯亭胜同爲此日游赏心那复有愁绪不胜稠江水鸣如恨淮山惨似秋鬓毛将白尽爲问若爲酬洪丞相迈云杭汉汝陰之西湖洪蜀永之西山嘉之峨嵋巴陵岳阳之楼黄之临臯金陵之赏心白鹭扬之平山吴之苏台茂苑荆楚之云梦滁之琅邪九江之庾楼皆延庚揖辛宾夕阳而导初月校奇品胜于登临爲宜大山萧山则记赏心亭佳丽地文瓌观可赏已如先正言此北望中原愤惕不敢暇逸处可赏则古今】

【游宦几何人目以玩赏口以吟赏而真赏以心者几希人心天地之托也爲天地立心之心也虚用之虚高实用之实高虚母胜实虚而胜抚慨千数百年之消息兴怀四十余帝之盛衰烟芜凝愁风涛砥撼宫雉相望客心悲未央其心耳事迹东流伤心长春草其心耳骚人赏自高如虚何实而胜莫若王谢高宴饮新亭赏也戮力王室克复神州实之放情丘壑赏也棋墅指授破贼淮淝实之旷不弛劳清不妨要以虚豁心之壅滞以实发心之精明两公实高之赏欤虚高者荒实高者强用实心办实事今大制使资政裕斋马公之心王谢心也无赏心也何以亭于新一酒不欢甘苦其同一钱不妄调度其供何以亭于费读开宝二年二月诏官受代历书?增毁以定殿最见亭毁于毁而无动心有慊心日敌人透度江上危甚公启元戎行蒙公先驱祀姑後张循视大江严险棘之防进驻上流雄犄角之势神龙掣渊威虎凭林英俊挫其

遐冲洪基屹其磐石驰骛再岁姑桺刃而韜强此一功殊大新此亭赏秦淮洗兵也赏岂虚赏者屏卧雪图赏之浮独倚青冥赏之游公之心何心实也凤凰去已久正当今日回有思治心去恶如去草养苑如养贤有賛治心想虞雍公督舟采石而捷闻则义心激爱张魏公劳军沙上而敌奔则壮心生充是心之实何赏乎以调玉烛之明为时和赏以补金瓯之缺爲国寿赏以铁劒利而倡优拙爲外御内修赏非赏之赏此之谓大赏高哉凡役属其属朱幼学凡费不书惟一非三是牵联书亭前爲张丽华墓一赏赖有一戒存万代之永监而前守夷之非是东即张忠定公所创折柳亭谨送迎也西即苏文忠公尝题柱白鹭亭尚典刑也又西横江館取李太白人言横江好之句以名宾如归也三并新之是亭事毕出余力筑舒州二十三载文复隍之城以舒隶昇阕故远且城之而况于近亭皆一实所成观之坎有孚维心亨刚中也中画一阳盖象心心刚则实往乃有功公当习坎之出以刚为实心亨有道矣赏大矣跻亭覽景弄笔而赏以诗公心愤惕未暇也有大父野亭先生百咏在景定二年二月朔大山萧山则记并书雪坡姚勉书盖】

白鹭亭接赏心亭之西下瞰白鹭洲柱间有东坡留题【旧志】景定元年马公光祖重建详见赏心亭下

考证李白凤凰台诗有二水中分白鹭洲之句亭对此洲故名 苏文忠公轼尝题其柱王胜之龙图守金陵一日而移南郡东坡居士作长短句以赠之千古龙蟠并虎踞从公一吊兴亡处渺渺斜风吹细雨芳草渡江南父老留公住公驾飞车凌彩雾红鸾参乘青鸾驭却讶此洲名白鹭非吾侣翩然欲下还飞去【王荆公安石诗柱上题名客姓苏江山清絶冠吴都六花飞舞凭栏处一本天生卧雪图

斯庵任希夷诗江水悠悠淮水流台城寂寂石城留凄凉白鹭洲头月曾照前朝玉树秋 王公琪诗白鹭敞西轩栋宇穷爽垲干峯若联环翠已不可解是时天宇旷六幕无纖霭金斗熨秋江素練横衣带乾坤清且敛气象朝昏改芦花作雪风飞舞来沧海九霄汀鹤起万里樯乌快月上三山头鸟没横塘外苍茫洲渚寒银错星斗大开樽屏丝竹披襟向萧籁余生本江湖偃蹇欣所会清兴虽自发苦嗜亦吾累鱼龙凭夜涛四面忽滂湃安得犀灯然煌煌发水怪 黄尚书度诗白鹭亭前白鹭飞定知公子未忘机我来犹识难驯意江际翩翩趁落晖 马公之纯诗白鹭亭前白鹭飞山如屏障水如围水中独立鸾窥镜沙上羣行雪满矶白日不来争碧树有时同往送斜晖江山得此方成画撩得游人不忆归 又和人韵一见斯亭喜可知风来拂拂暑清微青山坐处天开画白鹭飞时雪满矶何必搜奇效康乐正应得句似元晖最怜别浦潮生後须有征帆万点归 龙洲刘过诗何人将我此来游白鹭那知客有愁如子矜持山立玉似予迂濶水盘洲尘襟抖擞风云入石刻摩挲岁月流惆怅谪仙鸾驭远离离别恨黯难收 罗公愚诗千古城头白鹭亭鹭飞长是满江汀如何览德辉台上只有台存凤不灵 叶辉次韵白鹭洲边敞此亭淮山江水瞰芦汀鹭飞点点无顔色那作公山鹤有灵】

二水亭在下水门城上下临秦淮西面大江北与赏心亭相对岁月寢久旧址仅存乾道五年秋留守史公正志因修筑城壁重建自爲记【旧志】

考证李白凤凰台诗二水中分白鹭洲亭名取此也【记云秦淮源出句容涑水两山自方山

合流至建业贯城中而西以达于江有洲横截其间李太白所谓二水中分白鹭洲是也望秦淮两城隅对峙北爲赏心亭其南阙焉登城而望坐抱牛首可凭藉如案淮山一带沙洲烟屿皆不遗毫髮意古必有亭其上者一旦父老谓予曰此承平时二水亭也考于图志不载呜呼六朝以来迨今九百余年其废兴成败可胜言哉今之爲城盖自徐温之改筑亭以二水又不知爲何时岂岁月久远故不传邪城下二水混混东流古今固自若也昔羊叔子登岷山顾其客邹湛曰自有宇宙便有此山胜士登此远望如我与卿者多矣皆湮灭无闻使人悲伤湛曰公名与此山俱传若湛辈当如公言耳嗟夫有志之士慨其名之不与山传也如此顷者城壁缺坏才辨瓦砾是亭之名失其传久矣况于一时登临之人哉碑石果可托于岷山爲不朽乎盖笑叔子之志真区区也予方修筑城隅复建是亭揭以旧名而爲之记後有来者览江山之胜而读予之文因悟夫城之与亭废兴成败相寻于无穷而人事得丧倏往而忽来思所以托名于後世者可不慨然有感而爲之赋邪乾道五年十月望日左朝散郎充敷文阁待制知建康军府事提举学事兼管内劝农营田使充江南东路安抚使马步军都总管兼行宫留守司公事史正志记左朝奉郎新权通判楚州军州主管学事赐绯鱼袋杜易书并题额】

冶亭在冶城

考证宋义熙十一年刘锺领石头戍事屯冶亭今即冶城楼所在之处

东冶亭旧志云在城东八里续志云在城东二里汝南湾西临淮水今此亭在半山旁有瑞麦知稼二亭考证晋太元中三吴士大夫于汝南湾东南置亭为饯送之所西临淮水即当时冶处 谢安爲扬州袁宏爲东阳郡祖道于冶亭羣贤毕集

南史王裕之元嘉六年迁尚书令固辞表求东还改授侍中及东归车驾幸东冶饯送 乾道五年留守史公正志于半山寺前重建【记云留尹史公治效之明年作亭东郊并鍾山之南前临大逵距城五里所谓僚属曰厥今驿湊居所使命宾客毕出于是当六朝时名门甲第瑰壮秀丽之观山川之形胜占是爲多使夫往来者休焉有以寓登临观覽俯仰古今感慨愉悦之适斯亦一奇也如将奚名或曰晋东冶有亭在县东汝南湾桃花园之间三吴冠盖送饯于此夫亭近是盍以东冶名公命宗山爲之记辞弗聽则进而言曰夫亭整暇爲之也故爲之者劳而享者易之且国家建置行都迄今数十年自城雉廩庾取土之宫齐民之居室因仍故常或缺弗治而公之承之犹自若也独如亭何惟其悉缮悉营无一不备而後及此则後推公之治能整且暇焉者夫亭所以识也虽然是岂殫公志哉盖立馆于国以待万国之诸侯列邸于郊以待四夷之客使俾朔南万里拱极面向以尊京师是以公之志云耳而殫于是哉宗闻之也结鼇者志在纠纷运甓者心存乎忧劳君子作于小所以寓大尝试从公夫亭之上东抱方山西眺石城以望大江南瞻牛首之迢嶢北顾鍾山之大且高商形制之谓何论险塞之所如?方来之可爲悼已往之弗图而寓诸游观之娱斯亦庶几公之志乎公曰唯遂记之乾道五年春三月左文林郎观察推官丘宗山记左朝奉郎通判军府事严焕书 马之纯诗旧时只说东西冶今日转爲长短亭无奈梅花临水白可堪柳色向人青十分潏灩苦难把三叠凄凉谁忍听不道离愁堆满屋往来车马放教停 杨虞部备诗忍泪相看酒共持一生心事几人知年年折尽东亭柳此别绵绵无尽期】刘给事珙以四面皆田作亭于旁以知稼名胡公槻爲书榜并题二诗【诗云周公说稼成王师樊迟说稼夫子嗤区区农圃乌用学艰难之事惟当知江淮

制帅周公似取以名亭意如此遥知袖有无逸篇準拟归时献天子】岁久扁拆棖夷景定辛酉马公光祖新之既复东冶知稼旧扁又增一亭扁曰瑞麦与知稼对峙是年上元县惟政乡麦秀两岐知县鍾蜚英上其瑞闻于朝上有宣谕曰芝封来上麦穗呈祥良由善政之致和式表丰年之嘉兆宜宣德意仰答天休亭所以名也

览辉亭在今保宁寺後凤凰台旧基侧寺有览辉亭碑刊缺不可读莫详其人唯岁月可考盖熙寧三年夏四月也详见凤凰台

翠微亭在城西五里清凉寺山顶南唐时建国朝乾道间亭已不存【旧志不载续志云废】绍熙中复建隶淮西总领所景大亭小淳佑已酉总领陈公绮新而大之石城登临最佳处也【林和靖逋诗亭在江干寺清凉更翠微又送方大师归金陵云长千古寺游行子爲到清凉看翠微 丹阳胡缉诗帆穿万里江心过云傍六峯山顶来 潜斋王公桢诗虚亭北眺大江临江外晴岚出寸岑景与齐山俱絶唱量如沧海且频斟地高宇宙双眸豁人老风霜两鬓侵感慨石城勲业旧侃居夏口峤居深 建亭记六朝以石头为重戍府库甲兵萃焉至南唐始为离宫此天所以开混一也然而翠微之景实甲于天下林和靖隐居西湖得得来游见之赋咏则其称絶可知矣中兴以来剡总领所亭隶之岂以金谷之冗琐易生烦厌非江山之清絶不足陶写耶又不然则中间必有文人骚客名辈清流以是人而居是官故能为皇官而有是景邪淳佑已酉春余自当涂来故人少司农大台陈绮伯奇实护饷事尝因暇日相与徜徉其上余举酒属伯奇曰是亭之址居山之颠无所障碍故无非景物夫其南为方山则秦皇之所以凿而为渎以厌东南天子气者也其北为环滁则欧阳公之所以与客遨游作亭其上而名为醉翁者也其西为三山则元晖之所登以望京邑太白之所眺以怀长安者也其东为鍾阜为鸡笼则雷次宗周顒阮孝绪韦渠年辈之所以隐居求志遯世无闷者也乃若长江自西亘北银涛雪澜汹涌湍疾烟帆风席杳霭灭没朝宗于海昼夜不息与夫遥岑近岫危峰断?如列画图如植屏障或云霭之出入或烟霞之明晦或晴霁而日月朗或风雨而雷电暝朝暮四时千变万态不可名状者无非此亭之景也然景大而亭小不可以纵目而骋怀景四面而亭一面不可以总观而并览坡翁有曰登临不得要万象觉偃蹇子盍图之伯奇曰诺会其以忧于职而病又以最于职而召夫忧于职而病则所亟者药囊最于职而召则所趣者行装其于游眺之所必不暇过而问是不惟人意之虽余亦意之也居无何忽折柬告曰亭已成矣昔亭一面而今亭四面矣余惊喜冗未能造亟命工绘图取而观则自西自东自南自北凡景之所在亭皆延之亭之所在景皆赴之余之所以举酒而属者无一不酬而土木之牡丹艘之工营缮之巧则又其次也夫金陵六朝旧都故其形势周遭回环其江山雄伟壮丽非偏州小垒可望万分一前人登览之地如赏心如凤凰如雨华如青溪皆最佳处不独翠微而已也而大景物每无大栋宇以弹压之不惟无大栋宇而其小小者亦皆将仆焉余虽有志于此而力未暇及今伯奇当财赋正赤病疾未瘳命召将行之际而能鼎新之使三百年之景物一旦轩豁呈露无余则其丘壑之襟楚楚不凡鞭箠之才绰绰有余盖非余子之所能及而尤余之所甚愧焉者也夫翠微之为景一絶也伯奇之为亭二絶也又以鹤山魏公了翁旧扁而揭之人与斯亭斯景俱称三絶也故书亭为屋二十四楹落成于庚戌之十一月旦资政殿学士太中大夫沿江制置使充江南东路安抚使马步军都总管兼营田使兼知建康军府事兼管内劝农使兼行宫留守节制和州无为军安庆府兼三郡屯田使金陵郡开国侯食邑一千三百户食实封一百户

吴淞记】

新亭亦曰中兴亭去城西南十五里近江渚

考证丹阳记曰京师三亭吴旧立先基既坏隆安中丹阳尹司马恢徙创今地世说过江诸人每至暇日辄相邀出新亭藉卉饮宴周侯顗在坐叹曰风景不殊举目有江河之异皆相视流泪惟丞相导愀然变色曰当共戮力王室尅复神州何至作楚囚相对泣耶【洛阳四山围伊洛瀍涧在中建康亦四山围秦淮直渚在中故云风景不殊举目有江河之异李白云山似洛阳多许浑云只有青山似洛中谓此也蔡薏作天津桥亦以此】孝武宁康元年桓温来朝顿兵新亭召王坦之谢安安发其壁後置人温爲却兵笑语移日

隆安刘牢之自栗洲应桓玄进败王师於此 杨佺期至石头闻刘牢之领北府兵在新亭贼皆失色乃回师屯于蔡洲崔惠景兵至新亭石头白下兵皆溃 徐道覆劝卢循焚舟自新亭步上宋孝武入讨至新亭修建营垒因即位王僧达始改爲中兴亭 元徽二年桂阳王休范举兵朝廷集议或欲依旧遣兵据梁山萧道成以谓新亭正是贼冲昔上流谋逆皆因淹缓以败休范惩之必轻兵急下乘我无备请顿兵新亭以当其锋乃出新亭治城垒未毕贼遽至道成登西垣使陈显达等与贼水战大破之贼将丁文豪设伏破皂荚桥军直至大航复陷东府或传新亭亦陷道成遣周盘龙等从石头济淮间道自承明门入卫宫阙道成仍守新亭卒破休范 宋讨晋安王子勋所向克捷事平明帝大会新亭劳诸军主擣蒲官赌

梁武帝起义兵进屯江宁东昏使李居士率兵屯新亭梁击破之遂次新林 乾道五年留守史公正志即故基重建亭自爲记【记云西南去城十二里有冈突然起于丘墟壠堑中其势回环险阻意古之爲壁垒者或曰此六朝所谓新亭是也予考之地志信然方六朝时上流奔冲用兵战争无不扼此相拒先据者胜亭之名始见于东晋至宋王僧达更爲中兴亭其後干戈相寻鞠爲榛莽不知几年矣予因送客过之徘徊顾盼怆然有感乃即其地稍南爲亭榜以旧名其制崇高广袤虽未必及于旧而山川形势登覽之胜焕然如新则世之相後累数百岁未尝有改也初元帝过江人士暇日相邀出新亭周顗中坐兴叹谓风景不殊举目有江河之异因相与流涕独王导变色以楚囚对泣责之且有戮力王室尅复神州之言导可谓有其志矣当一马化龙之後导首任相柄非不立志恢复而元戎屡动不出江圻经畧区区仅全吴楚以至中更敦峻之叛下陵上辱纪纲不振导于是时浮沉俯仰终其身自开学校一事畧不能有所建立平居暇日惟清谈自命则有短辕犊车长柄麈尾之讥验以前日之言徒虚语耳所谓江左夷吾功烈如是其卑乎盖人之情多銳于新而怠于久自古规模之作于新者不苟则勲业之传于久者必大天下万物无不始于新也新新以爲用则精神运动之妙鼓舞天下虽百世作兴而不穷不能者日就因循苟且而不知所以振起故自其新者观之则物无不故自其善用者观之则物无有故而皆可以曰新矣中原者东晋故物也南渡之初庶事草创故以江左爲新造而亭之名亦因以爲新导不能日用其新以酬其素志宴安有以败之也然则今日新亭之复岂将爲将迎游燕之地凭高远眺动游子之悲而发北客之叹也哉尝试与客登亭四望其西定山一带清旷龙洞绵亘数百里实与长江爲唇齿之势其东牛首方山缘延周匝意斗牛间王气宛然自若也其南则新林板桥按扼屯守之所历历可考其北幕府诸山连接石头蹲踞如虎想孙权城筑之气尚凛凛如生也南北复隔中原如故要当哭泣于欢笑之际药石于强壮之时不敢怠于新以图其故功名之士患无志耳苟有其志又患无其才今天下

豪杰辈出安敢厚诬以爲无人异时击楫渡江扫清中原以日新之志收日新之功使王导一
时空言乃验于百世之下者庶几是亭有以发之乾道五年阙月望日左朝散郎充敷文阁待
制知建康军府事提举学事兼管内劝农营田使充江南东路安抚使马步军都总管兼行宫
留守司公事史正志记左朝奉郎权通判楚州军州主管学事赐绯鱼袋杜易书并题额
曾极诗青山四合遶天津风景依然似洛滨江左于今成乐土新亭垂泪亦无人 南轩张公弼
诗风景自今古新亭今是非絶怜江水去还有故山围得失同千虑成亏共一机所思惟谢傅
不但胜淮淝 月明淮水空陈迹山绕新亭有故墟暇日更须频访古将来为道我何如 诚斋杨
公万里诗六朝岂是乏勲贤爲底京师不晏然栢壁置人添一笑楚囚对泣後千年锺山唤客
长南望江水留人?北旋强弱兴亡谈不尽枉教吟杀夕阳蝉

杨虞部备诗满目江山异洛阳北人怀土泪千行不如亡国中书令归老新亭是故乡 留守史
公正志诗龙盘虎踞阻江流割据由来起仲谋从此但夸佳丽地不知西北有神州又忽枉王
人六轡驰新亭有酒便同持坐中不作南冠叹江左夷吾是素期 野亭马公诗相对何庸作楚
囚一时凛凛气横秋定知决意谁能止何事空言竟亦休敢谓扶持非尔力要须恢复有奇谋
壶浆满路无人至空使遗民叹白头 新亭见说在山头日见江河滚滚流何事後人轻变改不
教遗址且存留怜他一代称贤相说此诸人似楚囚君便有人来访旧一番人见一番羞 又忆
昔诸贤扶晋室冠盖多于此云集坐中翻作儿女悲世换人非但陈迹我来正值三月春花落
鸟啼春寂寂江河虽异事畧同风景不殊今视昔磨灭英雄得丧多山重水复无终极安能鬱
鬱老江左尅复神州当戮力未论重见管夷吾祇今谁爲楚囚泣徙倚令人三叹息徙倚令人
泪横臆敌国相残春又春时乎时乎难再得 周师成诗昔日新亭今则旧百年名义只如新高
谈坐上无安石洒泪尊前有伯仁对面飞来帆影少传音吹过羽书频青天重唤当时月放下
清光照坐人

北谷罗必元诗五马来时集宴游江山风景勿关愁合思戮力中原语对泣何须作楚囚 刘後
村诗此是晋人游乐处当时风景与今同不干铁鑠楼船力似是蒲葵塵柄功几簇旌旗秋色
里百年宫阙泪?中兴亡毕竟缘何事专罪清谈恐未公 阙

眼前风景异中州莫笑新亭一段愁得似祖生真有志也曾击楫到中流 阙
新亭遗迹已榛芜风景于今尚不殊三百余年分王始江东自有管夷吾】

金山亭在旧府治今在行宫内

考证苏魏公颂集中有金陵府舍重建金山亭诗【地出城隅辟故台斩茅删竹受良材春塘
梦草成诗後画栋飞云试燕开一境山形天际望四时风物坐中来府公经构民偕乐鱼鸟犹
知喜跃回 故时台榭对池心空有名传拟穴金髯理茅茨修竹茂经营轩檻緑杨深桥横断岸
虹流彩花满芳园鸟啭音盛府多欢频命席每容踈外得窥临】王荆公安石怀府园诗亦云
常忆小金山下路緑荷深处见游鯈此亦府园有金山之证

练光亭在保宁寺今废

考证苏魏公颂有游保宁寺练光亭诗【阙临吴建业何人结虚亭胜槩压危堞】黄鲁直尝
题云练光亭极是登临胜处然高寒不可久处若於亭北穿土石作一幽房置茶鑪设明窗瓦

堆殊胜不尔师方丈北挟有屋两楹其一开轩其一作虚窗奥室余爲名轩曰物外主人喜作诗也名室曰疑香密而清明於事称也

折柳亭在赏心亭下张忠定公咏建爲祖饯之所久废景定元年马公光祖重建

风亭在折柳东叶公清臣建苏州从事张伯玉爲记佳丽亭与风亭相近马公亮建

此君亭在华藏寺

考证王荆公尝题华藏寺此君亭诗【谁怜直节生来瘦自许高才老更刚】元佑间亦有歌诗【信安毛渐歌曰玉堂视草儒林翁暂凭熊轼来江东政成暇日开燕席选胜共诣金仙宫幽亭虚敞竹森耸低徊映日清陰重静坐爱此君乃知雅尚人情同屏山叠石色苍翠我疑巨灵掣断岷峨峯?霜摧枯木飞叶穿疏栊芳迳列时果璀璨间青红羊肋细软蟹螯丰兵厨酒美琥珀浓褰带就坐约烦礼幅巾相向聊从容晤言与心契至乐匪丝桐高怀讵比晋七子徒以散诞相夸雄饮余寓意对碁局万事不足萦心胸人生天地间宁异浮萍相值江湖中偶然会合复离散东西南北随飘风须知此会不易得爲公更酹黄金鍾武阳黄履次韵邂逅相遇三诗翁适我愿兮江之东每乘高兴即同赋矧值修竹华严宫追穷收弃势相远交我以淡情何重古来金石论贤达应求本自声气同清晨登此亭亭前罗层峰浮云开白日金影升珠栊高标不逐四时变翠色可夺千葩红一日无此君子猷啸咏已不浓清风飒然至渊明喜动义人容化龙况是葛陂杖待凤幸列朝阳桐伶伦裁嶰谷律吕因雌雄太和尚可格天地烦想岂特疏心胸下逮汉蔡邕取橡制筠柯亭中与夫皮爲冠兮叶爲酒皆自荆扬之贡东南之美兮冒霜停雪拂景云而荣惠风吾曹对此但欲商清乐不学渭川之人兮资千亩以敌万鍾 福唐王祖道君不见太白之精在人间兮昔人号尔谪仙翁君不见不爲苍生起兮谢安攜妓山之东玉堂主人绣衣客邀我载酒金莲宫小亭环立千竿竹参天百尺?陰重岸巾敛髮对此坐一日无君谁我同夜来霜压北枝重剩见鍾山数尺峰玉实幽香仪彩凤日华转影筛金栊孤干未甘春雪折青陰不逐秋风红长随桧柏老刚劲不羨桃李争鲜浓我爱此君有直节肯学蟠木求先容我爱此君岁寒志长笑霜井落青桐大夫老松邀我侣三品顽石徒夸雄不作湘江儿女泣苍梧云散愁盈胸夜深明月满亭户此君入我怀?中故人来兮七贤至开门满坐生清风此君此君聽我语藏器于身兮终奏太庙歌黄鍾 合肥马昭八座镇俗光文翁政闲鸣珂晚丁东邀宾寻胜遇郊郭最爱檀栾森梵宫虚檐新敞小亭峻幽径静掩闲门重修枝应待丹凤集劲节只许青松同根蟠南借秦淮润影踈北露鍾山峰乃知景淡有真趣何必花艷罗雕栊放怀喜遂开口笑传盃不觉酡顏红谈围浩浩真意得棋战纷纷嘉兴浓人生倏忽犹逆旅少壮易失今衰容得丧何须论塞马用舍宁复惊?桐逍遥齐物慕蒙叟澹泊无生师大雄英游幸陪诸公後倾盖夙已披怀胸芝兰亦既序蒙益切磋愿使協于中佳草每出连战胜格调绰有先贤风顾予酬和不量力嗟哉寸莛撞巨鍾】

水亭有二一在台城寺即今法宝寺一在齐南苑中是陆机故宅乃王处士水亭也今凤台山南傍秦淮是其处【李白题金陵王处士水亭诗王子耽玄言贤豪多在门好鷺寻道士爱竹啸名园树色秀荒苑池光荡华轩北堂见明月更忆陆平原扫拭青玉簪为余置金樽醉後欲

归去花枝宿鸟喧向时复来此更得洗嚣烦 林逋诗金井前朝事林僧问不知緑苔欺破阁白鸟占闲池清楚曾经晋荒凉直到隋南廊一声磬斜照独凝思 杜荀鹤金陵水亭诗云江亭当废国秋景倍萧骚夕照明残垒寒潮涨古壕就田看鹤大隔水见僧高无限前朝事醒吟易觉劳】

木牛亭在移忠禅院路西亭废名存图经不载不详所立之始【旧志】地属江宁县七十里处真乡旧传有香木浮而上土人迎之以爲亭又号木龙亭

五马亭地属金陵乡去城西二十五里幕府山之侧亭今废

考证晋元帝与彭城王玄西阳王兼南顿王宗汝南王宏南渡之所当时?云五马浮渡江一马化爲龙谓此亭

征虏亭在石头坞东晋太元中创

考证世说注丹阳记曰太元中征虏将军谢安止此亭因以爲名 南史宋何尚之传迁吏部郎告休定省送别于冶渚及至郡父叔度谓曰闻汝此来倾朝相送此是送吏部郎非关何彦德也昔殷浩亦尝作豫章送别者甚衆及废徙东阳船泊征虏亭积日乃去亲旧无复相窥者 徐铉集送谢仲宣员外使北蕃序云征虏亭下南朝送别之场

白下亭驿亭也旧在城东门外【旧志】

考证李白献从叔当涂宰阳冰诗云小子别金陵来时白下亭又留别金陵诸公诗云五月金陵西祖余白下亭又云驿亭三阳树正当白下门按此亭在府西 王荆公旧宅在今报宁寺诗有门前秋水可扬舠有意西寻白下亭之句又有东门白下亭摧壁蔓寒葩之句按此亭在府东盖新旧亭各在一处旧志所指特其新者尔【任斯庵诗金銮殿上脱靴去白下门东索酒尝一自青山冥冥後何人来道柳花香 马野亭诗云白下非今白下亭府城西北旧曾城石山四面若环合江水一条如带横庾亮凭高临贼骑安都问道走齐兵地形峻极真如此全胜当时却月营】

劳劳亭在城南十五里古送别之所

考证吴置亭在劳劳山上今顾家寨大路东即其所舆地志新亭陇上有望远亭宋元嘉中改名临沧

观又改名劳劳亭【李白歌云金陵劳劳送客堂蔓草离离生道傍古情不尽东流水此日悲风愁白杨我乘素舸同康乐朗咏清川飞夜霜昔闻牛渚吟五章今来何谢袁家郎苦竹寒声动秋月独宿空帘归梦长又诗云天下伤心处劳劳送客亭春风知别苦不遣柳条青 杨虞部诗柳风飞絮扑征袍望远楼中望眼高几许江南名利客灰尘满面日劳劳 马野亭诗

谁把劳劳目此亭从来于此送人行三杯别酒倾桑落一曲离歌唱渭城比到伊边还几日不知何日是归程分携更复?高望满目青山万叠横】

客亭在龙湾五里临大江迎送之所也【杜工部甫诗秋窗犹曙色落木更高风日出寒山外江流宿雾中圣朝无弃物老病已成翁多少残生事飘零似转蓬】

清水亭去府城三十里

考证建炎四年四月二十五日岳飞败敌於此

二李亭在溧水县尉?舍後

考证李常师字公择同兄野夫侍其父东作尉于此尝读书是亭宣和七年乌江县丞朱慮摄尉修亭作记今亭废而记存移在县治【记云二李亭者识其人也初尚书李公择与兄野夫随其亲尉溧水而读书于尉厅之後圃後人榜其堂曰二李盖以识其人也慮少时登是堂有故老能道其事者慮不能记其详也宣和七年承乏尉事求所谓二李堂者不复见矣有亭岿然出榛莽间旁无牕檻惟四壁立意者堂之坏爲亭亭坏而爲更宿之所问诸吏果然慮以是感之欲新一堂以代者至而不果姑辟牕牖加丹堊榜其上而已窃以谓伐聽讼之棠不如勿伐以存其思去告朔之羊不若勿去以爱其礼一亭之废兴于两公无加损也而遗迹在焉其可以轻废之乎尚书公旧尝读书于庐山既去而藏书九千卷以遗後之学者山中至今指以为李氏山房藏书之所然则是亭也登之者挟策读书亦足以想见两公之风采师道德而论世尚友也若慮者何足以识之是年二月朔从事和州乌江县丞权县尉朱慮谨记】

甘露亭在上元县北鍾山乡去城五里

考证陈太建七年秋闰九月甘露三降乐游苑诏于苑内覆舟山上立甘露亭 又按輿地志宋元嘉中移晋北郊坛出外以其地爲北苑遂更兴造楼观于覆舟山上大设亭馆侯景之乱悉焚毁至陈天嘉中年更加修葺于山上立甘露亭陈亡并废

朝阳亭在通判东厅张维建

考证于湖张公孝祥留题云隆兴甲申八月当涂阙守檄建康府通判事张君仲钦维摄焉十有九日安国置酒饯别且言曰所领州饥民十万死生之命悬于仲钦之手仲钦勉之哉安集流亡左餐右粥以无负圣天子哀矜之意仲钦勉之哉梁温其郑光祖翁子功同会 张维书留守舍人闻维筑亭为题其榜曰朝阳既去而亭成复爲赋诗【于湖诗便合朝阳作凤鸣江亭聊此驻修程南瞻御路临双阙东望仙家接五城日上白门兵气静春归淮浦早潮平遥怜幕府文书少时下沧浪自濯缨 维次韵日边清切以文鸣立对朝阳欲问程笔落生春变寒谷诗来将喜破愁城檐前水到乘槎便天际山横与檻平准拟公归道过此小留觴咏集簪缨】

罗江亭

考证古今诗话云李煜作罗江亭四面栽红梅作艷曲歌之韩熙载和云桃李不须夸烂漫已输了春风一半时淮南已归国

望湖亭在鸡笼山上或云南唐立今遗址见存

不受暑亭在今清凉寺後景定二年马公光祖重建考证清凉广惠禪寺南唐爲避暑宫有亭名不受暑【马野亭诗驱车曾向暑中来望见尘襟已豁开裊裊羊肠知几折亭亭凤翅与俱摧渭川沮洳何如此佛国清凉亦快哉久坐不禁清雾湿却须酒力唤春回】

郡圃十亭并见府治後

青溪诸亭东自百花洲而入临水小亭曰放船入门有四望亭曰天开图画环以四亭曰玲珑池曰玻瓈顷曰金碧堆曰锦绣段其东有桥曰镜中由此而东为青溪庄与清如堂相望南自万柳堤而入爲小亭三曰【阙】曰【阙】曰【阙】桥之南旧万柳亭改曰溪光山色自桥而北亭临水曰撑绿其迳前曰添竹後曰香远尚友堂之西曰香世界先贤祠之东曰花神仙清如堂之南淥波桥之西曰衆芳曰爱青其东曰割青青溪阁之南清风关之北有桥曰望花随柳其中曰心乐其前曰一川烟月惟割青爲旧余皆马公光祖所作也

风亭在折柳东叶公清臣建苏州从事张伯玉爲记咸淳乙丑马公光祖有指其故基以告者乃叠石爲?创堂三间前後轩如之厨舍备屋挟翼其旁繚以花竹亦舫舟胜处云

四城门接官亭旧有亭卑陋弗称咸淳改元之春马公光祖撤而大之名其东曰迎晖西曰致爽南曰来薰北曰拱极丹雘烂然过者瞩目各有文以记始末

迎晖亭门拱行都直趣南徐岐入淮淞郡登茅鍾二名山咸此乎出旧名建阳踰数步即白下有白下亭负城立规褊制陋无以容车马今并门度地在外城之中为亭三间深各二丈二尺濶倍之前为泊水挟屋七间翼其左关吏舍五间丽其右檐楹敞焕入门者有观焉

致爽亭出门数里为龙湾长江驾顺而东蜀汉荆广所毕湊古石头城在焉旧宜有驿亭叩父老无知者盖废久矣咸淳元年三月一日并门鼎创三间深各二丈濶半之前为泊水三间视亭之深減六尺而濶与之称左为关吏舍右为二神祠

来薰亭门直溧水溧阳西指当涂上荆蜀古长干道在焉前是有两亭岁久仆其一今复鼎创与所存亭偪自南来者咸适所憩

拱极亭门对幕府山踰山絶江琅琊诸峯隐约在目极目则中原可气挹也旧无驿亭今创置三间深各二丈濶倍之敞为前楹邃为後序安神有祠休吏宿兵有舍共为屋十五间

大使马公光祖重修南轩祠在南门外长干寺之东依山爲祠由寺而入盖宣公旧读书所也杜公果爲尹时尝拨田百亩属於学奉祠祀且设前漕使西山真文忠公像于旁春秋仲丁校官率诸生行舍菜礼亭其上曰仰宣示不忘也然岁仅两至平时足迹所不到栋桄檐頽求像设于烟煤蛛网之中甚非所以崇教化而励风俗也咸淳丁卯夏五月鼎新修缮视旧有加大使又念儒先明道之地不可与緇流之室相混淆乃翦荆榛辟正路作高门俾学士大夫之出入是涂者知所宗向仍属两校官朔望一谒祠下置阁人以司啓闭再拨田四十亩有奇俾葺治无坏而不负仰宣之意云

南轩旧传在保宁寺方丈今皆指天禧寺方丈旁小室是南轩张宣公读书处

考证祝穆编方輿胜覽谓张魏公开督府时其子读书于保寧寺方丈小室号南轩 西山真公德秀建南轩先生祠堂于天禧寺方丈後盖以此爲张宣公读书南轩之旧址王潜斋桷又设西山像侑食祠中作亭其旁扁曰仰宣【罗北谷诗万松盘岭势回环才抱清溪浸碧山莫道南轩专一壑古今天下共曾顔】

川泳轩旧在江东抚干?舍

考证丞相益国周文忠公记云唐以节度使镇诸道其属皆得辟置双旌出都门不待设礼案洗剗印固已譔书辞具马币而走处士之庐幕下多贤豪易耳本朝谋帅间许辟士今皆命诸朝幸而贤也信可乐也否则相忘于江湖者有矣尚何乐之云故君子以爲难绍兴二十六年春内出玉麟符以吏部尚书鄱阳侯张公居守金陵且安抚大江之东一年政平二年教行三年而謡颂兴雪溪沈君世德实奉诏从事于幕府力学而多闻和其外而方其中公前席焉他日谓世德曰负水筑室者非子之?耶是宜辟轩尽临观之美于是披檐以爲宇梁空以爲阁俯秦淮之支流面苍龙之华阙右带天津东望公堂质而不陋洁而不奢启扉而夏凉塞向而冬温春风之朝秋月之夕不必登高骖远而临观之美尽矣既落成或取韩退之徐泗濠掌书记厅石记之语而榜曰川泳所以志宾主皆贤而後可以乐此也暇日世德与客饮于斯咏于斯已而叹曰美哉是轩也公之赐而我则居得无愧乎客曰不然昔羊叔子镇襄汉造岷山者数矣必与从事邹湛语故此山名着编简武昌南楼殷浩之徒朝夕登焉向非庾元规一有不浅之兴则斯楼殆且泯泯也宾主相资何世无之今公敛经纶之才惠此一道回视羊庾盖雁行也而世德隼才懿行顾湛浩辈亦岂溟滓然大同哉吾知今日之川泳後世之南楼岷首也而何愧虽然二府尚有虚席者公且归矣世德亦将爲东阁奇士矣後之人开轩而望临水而歌儵鱼出游从容或未知此乐也故吾因名轩之意而道古今难易以告之庶几循其本乎二十八年十二月朔东里周必大记并书儒林郎充江南东路安抚司干办公事沈作式立

存爱轩在知録厅

考证周师成有记【顔伯奇父爲録事参军于建康不有其餐钱营小轩聽事之後以爲便坐摘取明道子程子之话言榜之曰存爱而谓予记之予于伯奇父同官而交又厚乃不辞而言曰一轩方丈而羸名之侈矣焉用记然其名轩之意与义有足记者君子之欲仕非谓其位之

足以荣其身也亦曰有位则可以济乎人而已耳位有高卑斋有广狭济可必也济之广狭吾安能必之哉盖有爱物之心斯有爱物之事不必高位而後可也苟有是心则随其力之所及而民受其赐使仕者人人皆存是心则天下之大将无一夫不受其赐矣惟其不然故民之得其所者不能什一而冤失职者什九也夫爱物之心一存一否之间而效之相絕如此则爱其可暂忘耶夫爱者仁之发也善之端也有人焉体仁而尽此善则其仕也自已而物皆天理之流行爱自存也非存之也降此而心能存于爱物则其仕也优而庶乎仁之功矣虽然特未易也利害辐辏志气交驰爱物之念其存者几苟不兢兢于此则始终舛戾何可胜算轩之名且记者用此今夫一命之士多矣岂皆泊然无爱于心爱有公私势无两大彼私其爱者知有已而已而物我之爱卒两失之于已之私爱云者非吾所谓爱也伯奇父既异於彼矣因轩之名味名之义于爱物之心既存之又存之一念一虑存之此伯奇所用力而欲然不自足者他日流风所感後來者坐于此而惕然有省怡然有得则伯奇父之美不孤矣不然则此轩乃胚胎厉民之所也其何爱之存伯奇父姑苏人名椅伯奇父字也遥师考亭于学禁方张时守其训甚于亲炙之者与人简易而守义不可夺如藺相如之璧不雕饰揣摩以楼人官之知其所长也嘉定七年正月中澣日雉山周师成记汴人赵师夏书】

箴龙轩在城内西北铁塔寺王荆公尝读书处

偃秀轩在蒋山道中松间【李忠定公纲诗青葱秀色一轩中俯瞰梁朝万木松顶蹙风云疑偃盖枝蟠雨露若蟠龙四时鬱鬱宁雕叶千载亭亭不改容却笑宗人主岱岳秦时先得大夫封】

台观

凤凰台在保宁寺後宝佑元年倪总领屋重建

考证宋元嘉十六年秣陵王顗见三异鸟数集于山状如孔雀文彩五色音声谐和衆鸟附翼而羣集时谓之凤乃置凤凰里起台於山因以爲名又按宫苑记凤凰楼在凤台山上宋元嘉中筑有凤凰集以爲名李白宋齐丘皆有诗【李白诗置酒延落景金陵凤凰台长波写万古心与云俱开昔时有凤凰凤凰爲谁来凤凰去已久正当今日回明君越羲轩天老坐三台豪士无所用弹琴醉金罍东风吹山花安可不尽杯六帝没幽草深宫冥緑苔置酒勿复道歌鍾但相催又诗凤凰台上凤凰游凤去台空江自流吴宫花草埋幽径晋代衣冠成古丘三山半落青天外二水中分白鹭洲总爲浮云能蔽日长安不见使人愁 宋齐丘诗嵯峨压洪泉窄?撑碧落宜哉秦始皇不驱亦不凿上有布政台八顾皆城郭山蹙龙虎健水黑螭蜃作白虹欲吞人赤骥相搏烁画栋泥金碧石路盘堦堦倒挂哭月猿危立思天鹤凿池养蛟龙栽桐栖鸞鷟梁间鷟教雏石罅蛇悬殻养花如养贤去草如去恶日晚严城鼓风来萧寺铎扫地驱尘埃剪蒿除鸟雀金桃带叶摘緑李和衣嚼贞竹无盛衰媚柳先摇落尘飞景阳井草合临春阁芙蓉如佳人回首似调谑当轩有直道无人肯驻脚夜半鼠勃窣天陰鬼敲?松孤不易立石丑难安着自怜啄木鸟去蠹终不错晚风吹梧桐树头鸣曝曝钱钱江令石青苔何淡薄不话兴亡事举首思眇漠吁哉未到此褊劣同尺蠖笼鹤美鳬毛猛虎爱蜗角一日贤太守与我观橐龠

往往独自语天帝相唯诺风云偶不来寰宇销一畧我欲烹长鲸四海爲鼎鑊我欲取大鹏天地爲殳缴安得生羽翰雄飞上寥廓】建炎中金张太师尝赋诗【建炎中金人犯建康以其张太师爲守一日登凤凰台赋诗云六代兴亡地千年一瞬间无情是江水终日对鍾山烽火连吴越旌旗耀海蛮凤兮今不至百尺古台关後敌退人多传之】淳熙中留守范公成大重建更榜曰凤凰台开庆元年倪总领屋重建马大使光祖作记【尚书户部员外郎倪公以总领淮西军马钱粮兼漕江东金陵郡其治所也治以简静赋平人和故得休其暇日考卜惟胜作凤凰台台旧在郡西南隅保宁寺侧余尝剥藓寻碑访古订实而老禪宿衲无能道者虽图经载宋元嘉中因神爵至而台得名然寺之淳熙壁记迺谓晋升平已有台元嘉时王顓复南台缔楼我朝祥符间又尝着亭于斯斯楼斯亭咸以凤字星移境换凤去台空于是芜没于屯烟戍火之场矣今台盖唐布政台也後世因以存名焉然而风隳雨毁漫漶不鲜栋挠椽夷荒秽弗治骚人胜士顾瞻旁徨率不得以极其游覽之娱尽登临之美後观得毋废乎公迺凌氛埃登亢爽腐折斯革破缺用完碧栏螭飞万瓦鳞次然後出想逸发神游飘萧烟云徐来风雨在下遥青远白刻露清高沙鹭水鳬游浣飞泳龙腰鹤膝俯伏後先而夕阳衰草之悲夜月寒沙之恨亦纷纷落研席间矣公于是举酒觴客抚飞轩而浩歌白也之诗声连林木吴宫花草亦不觉爲之生色也客有属而和者曰台峩峩兮山之阳招桂穆兮芳菲弥章日五色兮云飞扬嘻凤凰兮胡不来翔台巍巍兮山之扉膏吾车兮天风吹衣鹭在笱兮乌潜飞噫凤凰兮胡不来仪公闻之曰梧桐生矣子姑醉公钱塘人名屋字泰定开庆元年四月资政殿学士通奉大夫沿江制置大使知建康府事兼管内劝农营田使江南东路安抚使马步军都总管行宫留守节制和州无爲军安庆府三郡屯田使金华郡开国侯食邑一千户食实封二百户马光祖记并书朝奉郎守军器监总领淮西江东军马钱粮专一发报御前军马文字兼提领措置屯田兼江南东路转运判官兼提领江淮茶盐所借紫印应雷篆盖】登临之胜题咏爲多【曾文昭公箫声无复到层台画栋空余燕雀来我是凤凰池上客等闲汀鹭莫相猜李丞相阼台上西风急来游悟昨非依然龙虎踞不见凤凰飞树密遮残霭江寒浸落晖中原在何处目断雁来稀给事刘渠诗凤台何亭亭迴与雨花对凭高一登眺秋事渺无际鹭洲赏心前牛首秦淮外万叠云稼横百缆风檣会睠言簿书隙载酒邀华旆翰林诗百篇生公法三昧皮肤虽不似妙趣总相类怀古睇平芜可但高李辈忆昔耿与韩造膝陈大计高光课厥成一语不相戾江淮今清晏河洛尚腥秽蛇豕相噬吞天已厌戎裔箕敛民弗堪恶稔将自毙愤激闻鸡舞慷慨中流誓尺捶仗皇灵喋血答其背燕然彼有石深刻诏来世兵强在食足万竈余廩膾叶奏鄼侯功接武文石陞

周邦彦诗危台飘尽碧梧花胜地凄凉属梵家凤入紫云招不得木鱼堂殿下饥鸦

朱存诗竹影桐陰满旧山凤凰多载不飞还登台客有吹箫者争得和鸣随世间

任斯庵诗只爲羊车恋靚粧仓皇合殿烛无光宫中不解嫁鹦鹉台上安能来凤凰

黄尚书度诗江淮表里拱神州底事干戈不肯休试上凤凰台上望定山尽处是瓜洲杨诚斋

万里诗千年百尺凤凰台送尽潮回凤不回白鹭北头江草合乌衣西面杏花开龙蟠虎踞山川在古往今来鼓角哀只有谪仙留句处春风掌管拂蛛煤戴石屏式之诗登临舒老眼吊古得凄凉故国自龙虎高台无凤凰浮云多改变乔木见兴亡往事浑休问鍾山又夕阳马野亭诗凤凰不见只空台底事台存凤不来应到猴山还且住定从阿阁不能回江山未改当时旧宾客何妨尽日陪待作箫声勾唤处有时飞舞下云堆刘改之诗公子飘然俊有才此台翻觉在尘埃江淮浩渺洲渚没凤鸟寂寥鸿雁来时事不言惟挂笏书生无用且衔盃生平自厌胸

中俗万里霜天一日开 罗北谷必元诗振衣快上凤台游极目中原泪欲流慨叹兴亡思太白
永言眇邈忆齐丘乌衣已往人千古白鹭依然月一洲君子坐朝今在治重恢关洛不须愁 阙
周师成诗元嘉王子宅李白重登临鸣凤元非昔蟠龙直到今凄凉微子事寂寞茂洪心望断
长安日悬知属意深 退庵吴公渊诗暂因休暇得遨游感慨樽前岁月流长向此时忧徼塞不
知何日乐林丘凤凰寂寂空留寺鸿雁瞿瞿尚满洲畴昔谪仙愁絶处我来登眺更多愁六朝
旧迹作新游王谢千年风尚流但使时能开晋宋只缘道不本轲丘昏昏赤县神州地渺渺白
苹】

【红蓼洲谁道天分南北限人分南北至今愁 阙吕午诗古台曾说少年游弹指惊嗟岁月流
山似三神浮碧海城如一虎卧崇丘凤凰去後遗陈迹白鹭来时认旧洲但得风寒无罅隙江
河举目不须愁淙居冯去非诗许大乾坤里那无一凤鸣台欹红日晚梧拂翠云生琐琐六朝
梦悠悠千古情寒潮如有恨时打石头城

雁山刘汝春诗高台寂寞晚云深故国山河万里心若使当年真凤见不教春燕亦巢林 总领
倪公屋诗凤凰凤凰几千载凤凰已去台空在应多燕雀语画梁瞥见蛟龙起沧海二十年前
曾来游野田白鹭涵清秋今夕何夕领宾客饭盂百万思貔貅六朝故国金陵道柳外闲愁复
谁扫掀髯一笑问西风未必江山知我老 洞春徐械翁诗只合台前种桐万柯摇碧护春风
纵无丹凤重来此且障长安落日中又台前烟草接青徐台後风花满殿庀千里暮涛空寂寞
醉人春色正西湖 金渊吴景伯赋沁园春词再上高台访谪仙兮仙何所之但石坊西踞潮平
白鹭浮图南峙云淡乌衣凤鸟不来长安何处惟有碧梧三数株兴亡事对江山休说谁是谁
非庭花飘尽胭脂筭结绮?华能几时问何人重向新亭挥泪何人重到别墅围碁笑拍栏干功
名未了宁肯绿蓑寻钓矶深深饮任玉山醉倒明月扶归 郭功父诗高台不见凤凰游浩浩长
江入海流舞罢青娥同去国战残白骨尚盈丘风摇落日催行棹潮拥新沙换故洲结绮临春
无处覓年年芳草向人愁 王渭乡诗江山还似六朝时老尽梧桐凤不知保大空存前殿佛元
嘉已没旧廊碑几年何德之衰也曷日覽辉而下之不见长安豪杰恨诸公忍读谪仙诗 鹤山
韩公浣谿沙词潇洒梧桐几度秋凤凰飞去旧山幽风景不殊人物换恨悠悠衰草远从烟际
合夕阳空趣水西流恰好凭楼便回首怕生愁南翁绍康诗不见凤凰在似曾麋鹿游六朝春
梦里千古大江流地属闲僧管天知远客愁抚栏空感慨白鹭起沧洲】

越台旧基在城南江寧尉廨後

考证越范蠡筑城长千里此即古越城内所筑台也详见越城及诸辨
齐崔慧景寇建业萧懿入援屯越城举火台上鼓噪相庆

周处台亦名子隐台今城东南有故基在鹿苑寺後考证晋书周处字子隐仕吴爲东观左丞
有台于此国朝嘉佑中太守梅公摯尝爲记【府?东南有故台基曰周处图】

【志亡之都人称之登而四望江山表里与陈迹槩见豁如也按西晋史处字子隐义兴阳美
人弱冠时好驰骋不修细行州曲患之自知爲衆所恶慨然有改励之志里人以三害切讽于
是射虎斩蛟往见陆云具以诚告云曰古人学道贵朝闻夕死君前途尚可第患志之不立何

忧名之不彰遂退而向学有文言必信行必谨如是朞年州府交辟仕吴为东观左丞吴平入洛累迁郡太守率有善状拜御史中丞凡所纠劾不避权贵卒树功名没世远耀噫天地至大根一气陶万化未始无过陰阳寒暑小有缪盪则从而改之卒归大顺而况於人乎古圣贤本天地之性以修其性亦未尝讳过後之人不独讳之而已抑又从而文之自底悔吝良可嗟惜维子隐少而不逞长乃自悟一旦翻然去恶即善遂为名世忠贤可不重乎然则中人所稟因物染迁爲时絀误德有小眚言有小疵未甚子隐大害于而乡又何惮改爲哉予因表是台新是堂非止示高明之居包游覽之胜而与民同乐亦将有激时世云嘉佑阨年三月十五日上石周师成诗孝侯远矣使人怀安得从之上此台几回一舸荆溪上苦被风帆浪桨催又克已工夫鲜矣能孔堂今继仲由登试从台上看台下狂圣中间隔几层
罗北谷必元诗周处豪雄亦可人勇于迁善罕前闻区区未说除蛟虎一念中间舜跖分】

九日台今在蒋庙西南俗呼爲松陵冈去城十五里考证齐武帝永明五年四月立商飈馆於孙陵冈世呼爲九日台 十道四蕃志云武帝九月九日宴羣臣孙陵冈即吴大帝蒋庙
齐书云高祖以九月九日登商飈馆在孙陵冈南县北三里一百步
览古诗注云县北三里九月九日以宴羣臣讲武习射应金风之节 建康宫阙簿云商飈馆在县北十三里篱门亭後堆上【沈约郊居赋云望商飈而永叹每乐愴于斯观】

雨花台在城南三里据冈阜最高处俯瞰城闔

考证旧传梁武帝时有云光法师讲经於此感天雨赐花故名【郭祥正诗云云公说法时诸天赐名花王荆公诗盘互长干有絶径并包佳丽入江亭新霜浦淑绵绵静薄晚林杳往往青南上欲穷牛渚怪北寻难忘草堂灵簏輿却走垂杨陌已戴寒云一两星 杨无爲诗空书来震旦康乐造渊微贝叶深山译曼花半夜飞香清虽透笔藻散不沾衣旧社白莲老远公应望归】山谦之丹阳记云江南登览之地三曰甘露曰雨华曰陵? 建炎之後台址仅存後人乃请均庆院旧额即此基建寺又坏于火隆兴元年留守陈公之茂重筑此台剏一堂名总秀而徙均庆院于台之下【绍兴中侍郎刘公岑新修高座永宁寺记云今号雨华台则故侯卢给事名襄字赞元者所命也 蔡宗旦金陵赋云上玛瑙之絶径雨花翼其飞薨石子冈上石似玛瑙亦名爲玛瑙冈周益公雪中约胡推官登雨花台诗岁晚相逢古帝乡长松百尺傲冰霜青鞋踏遍江南岸更赋名花似漫郎又传道诗仙折筒来破寒雪屋为君开要将好句夸张籍故放歌謡吏部才又天女来参彼上人逆知君动雨花心故令六出缤纷下免使荒台更重临马野亭诗居士室中天女现生公台上雨华悬只因妙语倾人聽非有真花墮我前却似文章称锦丽亦如咳唾说珠圆不知谁向痴人道令望空虚眼欲穿】淳佑中吴公渊重修宝佑初王公桱又加修饰自书其扁【苕溪张汤诗不谈仁义只谈空一着参差在个中台上缤纷花正雨城边一阵已西风君王自有君王业何事区区翻贝叶雨花名台非识奇要使後人知覆辙
罗北谷必元诗萧帝倾心向佛家漫言天女坠天花芦僧一叶横江去回首梁园日脚斜 後村刘克庄诗昔日讲师何处在高台犹以雨华名有时宝向泥寻得一片山无草敢生落日磬残邻寺闭晴天牛上废陵耕登临不用深怀古君看锺山几个争 退庵吴公渊雨花台再用弟履斋乌衣园满江红韵秋後锺山苍翠色可供餐食登临处怨桃旧曲催梅新笛江近苹风堕汐落峯高松露和云滴叹头童齿豁已成翁犹爲客老怀抱非畴昔欢意思须寻覓人间饶百岁

苦无多日已没风云豪志气祇思烟水闲踪蹟问何时老眼转溪滨渔钩掷履斋吴公潜再用前韵玛瑙冈头右酹酒左持螯食怀旧处磨东冶劒弄青溪笛望里尚嫌山是障醉中要卷江无滴这一堆心事总成灰沧波客叹俯仰成今昔愁易搅欢难覓正平芜远树落霞残日自笑频招猿鹤怨相期早混渔樵迹把是非得失与荣枯虚空掷南徐张桀诗莫说南朝胜槩只今近郭已江村台荒浪纪曼花坠事往空余古意存瓠缺正缘轻纳景鼎分谁谓不如孙滔滔千载兴亡恨尽付凭栏对月樽菊斋刘端之诗六朝宫苑帝王州何事兴衰若置邮可是战争收拾後却将歌舞破除休千门静锁梧桐雨万堞深笼薜荔秋试陟雨华台上望夕阳烟水替人愁卢寿老诗輶车行晓快新游更上雨花台上头看不厌人浑是景清无极处奈何秋地完龙虎堂堂立江泊鲸鲵滚滚流一带黄山是淮土依然望弗见神州天台王淮用二吴韵踏遍江南予岂爲解衣推食谩赢得烟波短棹月楼长笛看剑功名心已死积薪涕泪今谁滴想中原一望一伤情英雄客形势地还如昔谈笑里封侯覓岂有于前代无于今日龙豹莫藏韬畧手虎狼快扫纵横迹看诸公事业卜臬卢何劳掷王云焕题沁园春词四十君王三百载间兴亡一家叹幕府峯高生涯社燕胭脂井暗富贵飞花山骨呈羞江声带恨磨尽英雄岁月賒君知否是枋头灞上着数全差倚空长劒吁嗟柰争战年来似乱麻但苍陵古冢白杨啼鵙庄园废沼青草鸣蛙旗盖东南风涛天堑江北兴王隙地再休凝竚望长安路杳夕照愁鸦】咸淳元年五月马公光祖既新乌衣园或谓台与园相颉颃亦不可以不治乃并撤而新之高广视旧加倍缭以修垣旁建掖屋又累石数百级以便登陟作门通衢以严启闭江山观覽之胜爲金陵第一矣【台记云雨花台胜甲江南事详郡乘余公余一往则台其崇万象环集山川城郭江淮吞吐如拱如赴而顾瞻吾台藩拔级夷反若欲然有不足赏者乃度材更缮不两月告成既成率宾佐落之余抚栏作而言曰嗟乎地以山川胜山川以人胜而人之所以胜者何哉今吾与二三子登斯台也仰而观行阙矣如赵元镇张德远之所建请犹凜有生气俯而观长江渺如韩蕲国虞雍公战胜之迹尚可一二数也子即是而观之其亦有慨于心否欤向皆如晋元奕辈把酒清谈脱落世事则虽茂弘新亭士行石城遗迹爲丘墟久矣而况所谓雨华台者然则吾与若从容无事相与游于此也而可不知其所自耶知其所自则当监其所爲矣吾老矣何能爲惟闻诵北山移文说东庐山故事则跃然有所契金盆石室凉不终寒我盟然前所谓元镇诸贤之事其幸付之登临一慨而已乎诗曰高山仰止景行行止又曰以似以续续古之人吾敢以是爲二三子勉二三子有不勉者耶乃相与离席而谢曰敢不勉因笔以爲之记皆咸淳改元八月望日观文殿学士金紫光禄大夫沿江制置大使兼知建康军府事兼管内劝农营田使兼江南东路安抚大使马步军都总营兼行宫留守节制和州无爲军安庆府三郡屯田使兼权淮西总领金华郡开国公食邑四千一百户食实封八百户马光祖记并书朝请郎集英殿修撰汪文信篆盖】

蔡伯喈读书台在溧阳县太虚观东北【旧志】

考证吴顾雍传云邕以内宠恶之虑卒不免乃亡命江海远迹吴会积十二年在吴抱朴子云蔡伯喈到江东得论衡中国诸儒觉其论更进嫌得异书求其帙中果得之则伯喈读书於此理或有是

郭文举书台今天庆观太一殿即此台基也

考证金陵故事郭文字文举王导筑台于冶城以处之文举尝手探虎鯁导问之文举曰情由想生不想即无人无杀兽之心兽无害人之意

梁昭明书台在蒋山定林寺後山北高峯上

考证梁昭明太子尝着书於此今遗基尚存

董永读书堂在溧阳县西四十里林木茂翳

考证永尝自鬻以养其亲事见孝子传

望耕台在今白上村

考证宋文帝尝登此台以观公卿亲推之礼宫苑记云在籍田坛东

日观台一名司天台在台城内

考证宫苑记台城直鸾饰门西有日观台 祥符图经云宋司天台也

烽火台在城西石头城

考证覽古诗注石头城山最高处吴时举烽火於此自建康至西陵五千七里有警急半日而达【杨备诗云一带东流当复关筑台相望水云间丽华应不如褒姒几许狼烟得破颜 马野亭诗此到西陵路五千烽台列置若星连欲知万骑还千骑只看三烟与两烟不用赤囊来塞下何须羽檄报军前如何旬日缘褒姒无事蓬蓬火又燃】

景阳台见景阳楼下

?郊台见郊庙下

独足台在古宫城今不详其所

考证覽古诗注云陈将亡有一鸟独足上宫城台上以觜画地书云独足上高台茂草化爲灰欲知我家处朱门傍水开及国乱迁洛阳赐第於洛水傍【马野亭诗无端独足上高台以觜纵横作字来茂草无灰犹可解朱门傍水直难猜宫城後向烟中尽府第还当洛口开洪范五行刘向传莫言其说尽迂回 杨虞部诗鸟迹分明在帝台管弦声里辄书来回头一觉风流梦犹得朱门傍水开】

通天台有二

考证宋书孝武大明七年鍾山通天台新成飞倒散落山涧
建康宫阙簿云通天台在县北一百步旧台城内

玄武观在玄武湖上

考证南史蔡景历拜度支尚书旧式拜官在日午後景历拜日适逢輿驾幸玄武观在位皆侍宴帝恐景历不预特令早拜其见重如此又曰玄武馆宋书文帝本纪云帝临玄武馆閱武即此观也

通天观旧在华林园内宋元嘉中与景阳楼同造【旧志】考证金陵故事晋孝武帝讲孝经於通天观仆射谢安侍座尚书陆纳侍讲黄门侍郎谢石吏部侍郎袁宏執经丹阳尹王琨读句论者荣之则此观晋所有也非创于宋旧志殆未考耳

临沧观今城南顾家寨大路东即其所

考证輿地志丹阳郡秣陵新亭陇上有望远楼又名劳劳亭宋改爲临沧观行人送别之所李白劳劳亭诗序在县南十五里古送别之所一名临沧观诗云金陵劳劳送客堂蔓草离离生道傍留别金陵崔四侍御诗云初发临沧观醉栖征虏亭南史宋元徽元年桂阳王休范举兵白服乘輿自登城南临沧观

齐云观在古台城内陈建後废

考证陈後主令采木湘州拟造正寝至牛渚矶尽没既而渔人见棧于海上复起齐云观国人歌曰齐云观寇来无际畔【杨虞部诗上界笙歌下界闻缕金罗袖鬱金裙倚栏红粉如花面不见巫山空暮云 马野亭诗高高真是与云齐直到青霄不用梯三阁连延须在下层城突兀亦居低俯看落雨自天半平视流星从屋西好是嫫媿游翠輦却如僊子驾青霓】

层城观亦名穿针楼旧在华林园景云楼东宋元嘉中造後废

考证輿地志云齐武帝七月七日使宫人集层城观穿针乞巧因号穿针楼【杨虞部诗秋星如弹月如梳宫妓香添乞巧炉万缕千针同一意眼穿肠断得知无 马野亭诗人世佳期惟七夕星躔至巧是天孙直从楼上将身乞所欠云间着手扞闻得鹊声云报喜看来蛛网似传言工夫只是凭心手此外冥茫不足论】

园苑

古华林园在台城内本吴旧宫苑也世说晋简文帝在华林园谓左右曰会心处不必在远翛然林泉便有濠濮间趣觉鸟兽禽鱼自来相亲建康宫阙簿云宋元嘉中筑蔬圃二十二年更修广之筑天泉池造景阳楼大壮观花光殿设射棚又立风光殿醴泉堂【宋书何尚之传曰

时又造华林园并盛暑役人尚之谏宜加休息上不许曰小人当自暴背此不足为劳 龚颖运历图曰齐高帝建元一年幸华林园褚彦回弹琵琶王僧虔弹琴沈文季子夜吟王俭诵封禅书帝曰此盛德事吾何以堪之 武帝子巴东王子响既诛久之上游华林园见一猿跳掷悲鸣问左右曰猿子前日坠崖死上思子响呜咽流涕

梁裴子野华林园赋曰正殿则光华宏敞重台则景阳秀出 蔡宗旦金陵赋云其後则华林之园别宫在焉仙华醴泉连玉芳香灵曜景阳日观风光玉霁披香清暑茅堂楼有穿针钟有趣粧一柱层城之台工巧妙而莫窥朝日明月之楼曲九转而欲迷筑以壮武之山凿以天渊之池中立祓禊之堂遶以流盃之规夸青楼与紫阁恨不纯乎瑠璃侈神仙之彩雕香杂麝而涂之起临春与结绮竦神仙之巍巍斲户牖以沉檀饰珠翠为薄帷并是华林园殿阁台榭等名 曾极诗羽葆来临鼓吹停华林畅饮倒长瓶万年天子瞢腾眼错认长星作酒星 马野亭诗当时园】

【上想欢娱不见当时见画图缥缈神仙来绦阙分明人世有蓬壶庭花唱断风生砌莲荡归来月满湖万点华灯星似缀明朝簪珥得青芜】

古乐游苑案寰宇记其地在覆舟山南輿地志云在晋爲药圃义熙中卢循反刘裕筑药园垒以拒循即此处也宋元嘉中以其地爲北苑更造楼观于覆舟山後改曰乐游苑十一年三月禊饮于乐游苑会者赋诗顔延之爲序孝武大明中造正阳林光殿于内侯景之乱焚毁略尽

【范蔚宗应诏诗崇盛归朝阙虚寂在川岑山梁協孔性黄屋非尧心轩驾时未肃文囿降照临流云起行盖晨风引銮音原薄信平蔚台涧备曾深兰池清夏气修帐含秋陰遵渚攀蒙密随山上岨嶽睇目有极览游情无近寻闻道虽已积年力互颓侵探已谢丹黻感事怀长林丘希范侍宴应诏诗诘旦闾阖开驰道闻凤吹轻萸承玉辇细草藉龙骑风迟山尚响雨息云犹积巢空初鸟飞荇乱新鱼戲实惟北门重匪亲孰为寄参差别念举肃穆恩波被小臣信多幸投生岂酬义 沈休文应诏诗丹浦非乐战负重切君临我皇秉至德忘已用尧心愍兹区宇内鱼鸟失飞沉推轂二嶠咀扬旆九河陰超乘尽三属选士皆百金戎车出细柳饯席樽上林命师诛後服授律缓前禽函輶方解带薨武稍披襟伐罪芒山曲吊民伊水浚将陪告成礼待此未抽簪】

古上林苑案宫苑记云鸡笼山东归善寺後又实録宋大明三年初筑上林苑于玄武湖北宫苑记云孝武立名西苑梁改名上林今其地有古池俗呼爲饮马塘亦曰饮马池其西又有望宫台【杨虞部诗奉甸荒凉汉苑深当时白虎毙千金江南地窄分茅少也学中原有上林】

古博望苑在城东七里齐文惠太子所立辅公祐城是也沈约郊居赋云睇东巘以流目心凄怆而不怡昔储皇之旧苑实博望之余基谢玄晖游东田诗云鱼戏新荷动鸟散余花落即此地也今城北七里鍾山下古娄湖苑齐武帝永明元年望气者言娄湖有天子气帝乃筑青溪旧宫作娄湖苑以厌之陈朝更加宏壮後其地爲光宅寺

古江潭苑其地在新林路西去城二十里梁大同初立按輿地志武帝从新亭凿渠通新林浦又爲池开大道立殿宇亦名王游苑未成而侯景乱蔡宗旦金陵赋云访江潭之大苑惟萧沟

之名存注今有沟名萧家沟即此也

别苑一名西园晋安帝元兴三年春桓玄筑别苑于冶城案輿地志其城本吴冶铸之处因名焉王导疾作因徙移冶出石头城西以地名爲西园故晋书成帝幸司徒府游观西园即此处也太元十五年武帝为江陵沙门法新于中立寺以冶城爲名至是桓玄尽移僧出居太后寺以寺爲苑在今县城西

古芳林苑案寰宇记一名桃花园齐高帝旧宅在古湘宫寺前巷近青溪中桥帝即位修旧宅爲青溪宫一名芳林园後改爲芳林苑永明五年楔饮于芳林王融曲水诗序云载怀平浦乃睠芳林盖谓此也梁天监初赐南康元襄王爲第益加穿筑箫范爲记言藩邸之盛莫过於此【马野亭诗昔日曾爲府署来谁人都把插桃栽不闻华屋笙箫响但见芳林锦绣堆几度刘郎来观里半年远客住天台如今此地知何在桑柘成陰拨不开】

古建兴苑梁天监四年立建兴苑于秣陵里侯景之乱裴之高迎致柳仲礼韦粲等俱会青塘立营据建兴苑其地在今府治西南秦淮南岸

古元圃齐文惠太子性颇奢丽宫内多雕饰精绮过於王宫开拓元圃与台城北堑等其楼观塔宇多聚奇石妙极山水虑上望见乃傍列修竹内施高障造游墙数百间【輿地志云丹阳郡建康县台城齐文惠太子治元圃有明月观宛转桥徘徊廊内作净明精舍又梁书云昭明太子性爱山水于元圃穿筑更立亭馆与朝士名素者游其中尝泛舟後池番禺侯轨盛称此中宜奏女乐太子不答诵左思招隐诗何必丝与竹山水有清音轨慙而止其地在今府城东北隅】

古南苑在瓦官寺东北宋明帝末年张永乞借南苑帝云且给三百年期满更请後帝葬於此梁改名建兴苑在秣陵建兴里侯景举兵攻台城司州刺史等皆来赴援裴之高营于南苑即此也【杨虞部诗张永移家入洞天緑篁红藕旧林泉人间满百人应少明帝恩深三百年马野亭诗当时南苑最新奇胜似其他东复西多少园亭行不到纵横石径动成迷香风十里荷花荡翠影千行柳树堤伊被何人曾借住端如误入武陵溪】

古桂林苑陶季真京都记曰建康县北汉朝爲桂林苑南朝宫苑记曰桂林苑在落星山之阳吴郡赋云数军实于桂林之苑即此也属上元县慈仁乡

南唐北苑徐铉汤悦徐锴有北苑侍宴赋咏序云望蒋峤之嶽岑祝爲圣寿泛潮沟之清浅流作恩波其地在城北

乌衣园在城南二里乌衣巷之东王谢故居一堂扁曰来燕岁久倾圯咸淳元年五月马公光祖撤而新之堂後植桂亭曰緑玉香中梅花弥望堂曰百花头上其余亭馆曰更履曰穎立曰长春曰望岑曰挹华曰更好左右前後位置森列佳花美木芳?蔽亏非复曩时寒烟衰草之陋矣【北谷罗必元诗乌衣池馆一时新晋宋齐梁旧主人无处可寻王谢宅落花啼鸟秣陵春

履齐吴公潜满江红词柳带榆钱又还是清明寒食天一笑满园罗绮满城箫笛花树得晴红欲染远山过雨青如滴问江南池馆有谁来江南客乌衣巷今犹昔乌衣事今难覓但年年燕子晚烟斜日抖擞一春尘土债凄凉万古英雄迹且芳樽随分趁芳时休虚掷退庵吴公渊和投老未归太官粟尚教蚕食家山梦秋江渔唱晚峯牛笛别墅流风慚莫继新亭老泪空成滴笑当年君作主人翁今为客紫燕语犹如昔青鬓改难重覓记携手同游此处恍如前日且更开怀穷乐事可怜过眼成陈迹把忧边忧国许多愁权抛掷履齐又和唤出山来把鸥鹭盟言轻食依旧是江涛如许雨帆烟笛歌断莫愁檀板缓盃倾白堕琼酥滴但惊心十六载重来征尘客秋风鬓应非昔夜雨约聊相覓叹主恩未报无多来日故国千年龙虎势神州万里鼙鼓迹笑谢儿出手便呼卢樗蒲掷叶润莺啼序离骚困噍梦醒时台城旧路问流水东入沧溟还解流转西不乌衣梦浪传故国晴】

【烟萋萋宫墙树念吟?凄断待随燕子来去回首十年烂锦花场趁吟云赋雨可曾对宝瑟知音高轩为谁轻驻借东风愁长笑短水云深春江日暮伴羈怀惟有征衫贮寒半缕高情谩赋蕙带兰襟蛾眉古来相妬英雄到江南易老後來谁更风景伤心泪沾樽俎登山宴水横江酹酒倾将慷慨酬形势付兴亡一笑翻歌舞独醒难继山公上马旌旗动又还惊起鸥鹭危亭恨极落尽寒香怕道断肠句有多少行星翠点春浅寒深孕粉藏香蝶清蜂瘦目孤采笔芳牋拟待倩取游丝系却离绪旋工试写入鸣弦柱曲高调古美人何在谁能和此幽素 樗岩张林词柳稍青燕垒花深鹭汀云淡客梦江皋日日言归淮山笑我尘鎖征袍几回把酒凭高阑干外魂飞暮涛只有南园一番风雨过了樱桃】

古东园在城东东冶亭侧面东有堂曰鍾山以其尽得鍾山之胜名之近东有两亭相对南曰见墩取其见谢安旧墩之意北曰草移取北山移文之意乾道五年与东冶亭并创【沈休文宿东园诗陈王鬪鸡道安石采樵路东郊岂异昔聊可闲余步野径既盘纡荒阡亦交互槿篱疎复密荆扉新且故树顶鸣风飈草根积霜露惊麋去不息征鸟时相顾茅栋啸愁鸱平冈走寒兔夕陰带层阜长烟引轻素飞光忽我遯宁止岁云暮若蒙西山药颓龄傥能度】

沈约郊园在鍾山下约憩郊园和约法师诗云郭外三十亩欲以贸朝饘?蔬既绮布密果亦星悬谢朓有和沈祭酒行园诗【旧志】

半山园在今报寧禅院是其地王荆公营居半山园有诗示蔡天启备述其事所谓今年鍾山南随分作园圃者是也又有次吴氏女子诗注云南朝九日台在孙陵曲街傍去吾园只数百步【旧志】

绣春园在府社坛东隶运司端平二年高公定子作记云【予昔经行得绣春堂于酒名謁来将漕访其堂无有也问遗址亦未知何所客为予言绣春焉所取名予谓之曰绣衣春当霄汉立彩服日向庭闈趋乃杜少陵入秦行之句此嘉名也吾欲堂而顏诸司存造船场有余地隣亦愿益以废圃乃扩之拓而新之非事游观其以示兴废之一端平二年九月临邛高定子瞻叔识】

景定建康志卷二十二

卷二十三

<史部,地理类,都会郡县之属,景定建康志>

钦定四库全书

景定建康志卷二十三 宋 周应合 撰

城阙志四

诸仓

广济仓有东西仓又有新仓西仓在大军仓後崇道桥南东仓在武雄营侧新仓在广济西仓北乾道四年留守史公正志以亲军寨及作院地增拓旧基西偏建为新仓转运副使赵公彦端为记

仓记【上临御之六年中都之仓廩实乃始建丰储仓着粟百万然议者犹谓宜仿古实边之意藏之外便时天官贰卿史公正志躬献纳而彦端掾公府皆与闻之未几公出镇建康彦端亦将漕江东踵至焉会秋上熟其槩二十几以病农公乃推前议大出库钱敛而藏之以均本末成先备而廩人病委积之无所也以告盖昔之为仓者三曰广济曰常平曰大军绵亘错峙凡百有条楹自他郡抵之可谓壮矣惟帝之别都天下劲兵良马在焉岁之经入无虑数十万斛漕江而下者舳舻数千里方其流衍坌集虽佛庐宾馆为之充仞而阜棧之供有至于露积者然古帝王之居也其廩廥之制宜雄盛闳博後世可考而图记独称吴苑仓在苑城内于晋为太仓余无闻焉苑城今都城也以当时运渎推之于广济为近皆距城之西偏外薄于江中则秦淮注焉转漕之利古今盖同之于是因广济之北彻故官治又告于大将从旁军营得地凡百有一十丈为屋八十有四楹度受粟五十万斛高明旷夷深厚固严输者不劳守者易力然储材于素市工以直农不去野商不辟涂斧斤齐和丹垩绚烂故新相临迥出其表中设有沉筏举于江莫之主名取而用之既巨且良民怀不扰益以叹异始于乾道四年秋九月戊辰冬十有二月甲寅乃告成焉公伟人也其在朝廷尝为上陈天下大计上命坐反复酬听率漏下十数刻其辍公之来固不专於奉法令剴烦剧然适疆场无事而狱讼簿书之属又廓廓无定着故得以其余力为一方长久之图自城池邑屋细大毕举兹其一也公平生慷慨不治财及在官则澹然如他人之私方天子以恭俭先天下乃者郡国以潦闻者衆既优其复除又从而赈廩之而太仓之富自若也公之境人食三鬴亦蠲其入十三盖君臣之间以俭登济者如此夫道上德意而采方国之风者使人职也故并记之以昭示来者俾知富国之道自俭始五年春三月辛未左朝请郎直显谟阁权发遣江南东路计度转运副使公事赵彦端记左朝奉郎新差权通判楚州军州主管学事赐绯鱼袋杜易书并题额】

平止仓在广济仓之左嘉定中留守余公嵘建

省割沿江制置使兼知建康府余嵘申嵘叨守陪都因去夏水灾之後备知此邦虽名为?庶而民生最艰素无盖藏日食所须仰给商贩米舟一日不至米价即倍腾踊才若高余便至流莩万一上江岁歉邻邦遏余则狼狽尤甚欲尽济则事力有限欲平糴则蓄积无余以是数十万之生齿常寄命於泛泛之舟楫而米价低昂之权又倒持於牙侏之手遇灾仓皇坐视太息窃嵘到任以来节约妄费财计粗裕即以十五万缗转糴他郡随余随糴相续不絶以故商贩通民食粗给於是规创一仓名曰平止画以十五万缗永充此仓余本其钱米并委常平仓库官主掌如有侵移证常平条法施行其仓廩木石坚好造作精致下砌以砖复铺以板外缭以墙复包以砖风雨不侵蒸湿不入委堪耐久其余糴条目具载须知谨具申朝廷并以须知册申缴伏乞指挥割下建康府遵守条约证应常平条法不得妄有侵移仍於支承项目帐内登载以防岁久漏落窠名实为邦民之幸伏候指挥右割付建康府从所申事理施行准此嘉定十七年十二月日押【平止仓须知本府户口繁庶日食米二千余石民无盖藏全仰客贩客舟稀少价即踊贵抑之则米不来聽之则民艰食常平才数千斛府廩又无余积官既无以持平其权尽出牙侏向来虽屡行招诱之法而势或有所格虽略有先备之蓄而数以申朝廷伸缩既不自由缓急实无以济是数十万之民命常凛凛而无所恃近日水灾诸证备见职思其忧盍爲之计今将当职到任以来撙节到钱一十五万贯拨充循环余本更不申作朝廷之数贱则余贵则糴随糴随余循环无穷权既在我米价自平实爲永久之利今具须知项下一令创造新仓五廩以平止爲名取李愷所谓使民适足贾平则止之义一平止仓不许本府及诸司暂借以开异时无穷之害事当谋始不可不谨一遇未平则余余价视时高下或置场於本府或收余於隣郡或於客舟辐辏之时一遇米贵即糴糴价止视元余之数所有元行收余船脚般担之费明行加上不得过数一余米钱收付常平库本库官掌之一余米糴米须择廉能诚实官吏庶所余无侵欺湿恶所糴无夹杂减尅之弊一仓官不专属厅分但随时于职曹官以下选委廉能诚实之人提督出纳或广济仓官可委即就委兼管一平止仓合干人已用广济仓人兼充一城内五厢城外二厢已造鱼鳞图以银米土米墨字三色標題其委系下户日余之家了然在目恐民居迁移增减不常宜每岁春首编排一次计口出给历头大人日一升小儿半升既糴即於各户历头内戳一某日余讠印子一每遇糴米於广济仓诸廊置场厢官弹压般脚之费用省出纳之弊易防一五县并已如式创造鱼鳞图或遇诸县余价踊贵亦当发米賑糴所有船脚钱不可于元余价上再加一措置招诱客米先从制司给公据付客人及牒沿江诸郡勿与遏余仍割沿江税务不得轻收米船力胜钱及苛留等弊其米船将带到税物除将本府从来收税则例旧例饶减三分外更与减饶一分客米官米两相资助贵余之患可以常免一如遇客米稀少市价踊贵凭民户赴府陈状出糴愿永行之谁忍废此窃观古今之事玩视而不爲暂作而辄废艰难创始於前容易隳坏於後此无他人之心不同所见或异不原其作事之初意不念其用心之良苦不以国事爲一体遂尔自分町畦始摭一二事明之淞右湖田几年议除中间尝遣使决去矣未几复兴反过其旧屯田之议自中兴後上下讲明不知其几淮西漕臣亦既经营成绪卒挠废于寓公其他庶事不可槩举未尝不抚事叹息自顾投老世味日澹岂复有立事取名之心只缘今夏梅霖过多长江上流同时水灾故江之下流腾涨尤甚秦淮之河又贯城中江潮大信适助其澜外水既高内水莫泄遂致公私军民之居滨于河者悉遭巨浸踰旬不退一时倾帑钱倒廩粟分遣官吏奔走家至以賑之而客贩不通牙

俟乘时邀利贫民下户几至饿殍遂又出常平米减价赈巢甫及旬余仓吏以匭告亟议遣官吏就永丰圩籴米二万余斛又仓猝不能遽至是以苦心劳思创立此仓然自领郡以来秋苗斛面尽行蠲除诸邑二税以十年所催之数取其酌中年分爲準商税之额重加裁减收税则例至减三分在城回税永与除放微至税务补亏等钱亦与除去今此籴本钱十五万缗皆由克己自律撙节浮费所积非有生财之术区区述此诚有望于後來体国爱民之君子监某此心有以维持增广之实阖郡生灵之幸】

转般仓淳熙六年置在上水门外淮水北岸置监官一员

大军仓在下水门内北接广济仓监官一员

平籴仓隶转运司嘉定八年眞公德秀创之民赖其惠虽歉岁市无贵籴不六七年籴本化爲乌有旧籍无复存者嘉定十四年岳珂复置未久亦废淳佑十二年舒滋复置

嘉定省割【承议郎权发遣江南东路转运判官岳珂申照得本司所管九郡建康留都民物?庶絶在下流因船脚道路之遥平时米价最高于它郡次则徽州岨嵒山多田少与广德小埭俱在水次不通之地太平宁国山圩田相半高下既殊或旱或涝难得全熟池州南康虽通水次素少积贮惟饶信旧来产米却缘溪港夏涨则贩鬻贪价多输泄于下流岁事或稍不登则秋冬水涸纵使有米接济亦无逆水可致之理故非於闲暇时爲之图度则民食之虑必轸顾忧珂自祇服驰驱滥书下考适缘商总领到任?办军储顿段并发淮上纲运并蒙朝廷指挥对拨米斛一年之间已及四十一万八千余石比之去年以前虽是军兴年分每岁不过五万石几及十倍以此倍费雇发漕计颇费支吾第珂谨守公勤极力裁节浮冗见今库管钱物比珂到任交承之外幸已有增无亏今珂愿以本任内?积到钱先于本路八州军拨籴本桩籴米四万石内建康系会府势须桩积稍多方可接济既在珂置司去处容珂一面躬亲续行措置增数桩籴别具申闻外八郡各籴五千石趣此秋熟委本司主管钱物官逐州通判监籴于本处另敖收贮专一充平籴支用见令责领官钱归各州目下起籴仍委各官每一员催促两郡往来机察米价催籴限在日近籴足以後年分每岁九月趣米出起籴于一两月内籴足至次年二月以後农务东作日米价长二麦未收之际止照元本价值量搭官吏糜费每石不许过二百文出巢委本司钱物官拘收元本次岁收籴如初如此则垄断之民每岁乘时开籴要利者必可警戢而青黄不接之际各郡有五千石之米在市米价自不能长其上件籴米本钱并系珂以本任所积自认包籴候每一郡籴足逐郡具所籴钱米实数供申朝廷将来替满即不敢侵动元交割前政漕计钱数并行包认登足亦不敢分毫侵动朝廷桩管本司钱米之数伏望钧慈详珂所陈事理特与先次割下本司从申施行仍乞并赐割下从本司徧牒逐州军通判照应遵守桩管出纳如州郡辄缘它用妄有侵移许本司将当职官具名奏劾乞比擅用朝廷桩管法坐罪公吏仍从决配贵得民间永久均被实惠又申照得珂自申请以後即行分委宁国府南陵县丞承奉郎张琮徽州歙县丞从政郎王槐饶州判官承直郎丘叶宁国府监税从事郎汪教中等官賫发籴本前去逐州军收籴各五千石节次承诸郡申到别廩安顿已将及数又续次委本司干办公事承直郎李知孝于建康府广济仓招籴到米一万石系一顿先行籴定已行开具供申但照得上件米虽系珂任内?积籴到一司财计本皆朝廷之物却恐诸州

于春夏之间爲见系已入朝廷帐内须欲申审不敢擅行支棗及至冬间粒米狼戾又不敢再以元钱趁时收籴上下牵掣横生顾虑非惟发敛不时豪民垄断增价自若民不被惠有失平籴之意兼新陈不易积蠹久之必有耗折遂成无用深切可惜乞免附朝廷桩管文用从本司令项拘榷不拘籴籴月日责在逐州知通常要本钱存在于春夏之间出棗接济细民冬间仍旧收籴桩积它时缓急亦可备朝廷科拨支遣不致有失指准实九郡民生莫大之幸伏候指挥右割付江东转运司从所申事理将今来所籴米五万石免行收附帐内桩管仍径自行下所部州郡照应常切遵守施行準此】

淳佑省割【朝请郎试司农少卿提领江淮茶塩所兼江东路转运判官兼尚书省提领分司财用臣舒滋状奏照对臣猥以非才误恩将漕尝手庄诵国史咸平二年诏诸路转运司申淳化惠民之制岁丰熟则增价以籴饥歉则减直以棗懿范昭然以平籴惠民爲先而奉行朝廷仁政者实漕臣之责窃照参政真德秀将漕江东尝于建康创平籴仓事久寻废自後尚书岳珂拨米一万石桩留爲建康平籴之备未几亦废近岁尚书陈瓘寓治当涂就剡平籴而建康司存之地则犹阙焉且建康爲留都会府兵民庶岁事小歉米价易翔即有待哺罄罄之窘若非官司预爲储蓄则何以爲水旱之备臣廉朴自将不敢妄费除交割钱数有增无亏外粗有剩并屡次积下米斛因前岁水涝赈棗价钱今就建康府复置转运司平籴仓拨籴到米一十万石般运水脚仓廩等费约计五百余万贯十七界官会内七万石桩顿建康府广济仓三万石桩顿寄纳仓候起置仓廩日另项拘桩所积米斛照本司见行体例每岁春冬两次赈济或遇歉岁籴价增长则减直赈棗却将价钱于秋成措置收籴桩管接续惠民如所部州县或以歉告则可以推广赈恤庶几江左一路之民俱被朝廷之实惠所有起盖仓廩及合行事件从本司一面措置施行奏闻事照得平籴仓近年以来在在有之始意未尝不欲惠民多因官吏非人弊幸百出或移易他用或妄称折欠监平人补纳反爲民害今舒运使能以剩钱籴米置仓此意亦可嘉尚必须後人相与扶持毋致侵移作弊专责都吏掌管遇歉岁则发棗秋成则补还立爲经久规模可也仍月具数目置册具申朝廷凡遇新旧交承皆分明登载簿书同交割帐状申上庶可拘确免堕前弊会议行下右割付江东转运司照所申及点对内事理疾速措置施行申尚书省准此】咸淳元年七月马公光祖判云当使三来开阡畛人爱余余亦爱畛人公帑所储毫分不敢妄费思欲爲此邦建一久远利益事无如平籴呈拨米价钱差人籴足十万石并令创仓廩盛贮续踏逐到旧稻子仓基址鼎新创造屋四十六间廩一十二座以玉衡正泰阶平陰阳和风雨时十二字爲记专一椿顿上件米十万石今开具条画如后

【一照文思院斛造一石斛五斗斛各一十只斗及连柄升各二十只当官较制雕记并造三色筹共一千五百根发下遇收支毕拘收本仓不许移用】

【一于本府三通判中选委一员充提督官凡仓中管钥一应事务任责提督所有合差机察仓官一员专任出纳之责请提督官于本府职曹官中选差能事者充之以才不以序仍专差都吏充统辖拘确收支专一任责补籴每年须管数足】

【一每遇青黄不交市籴骤贵先唤上牙人供具时直实价却于时价中减价二分出棗谓如时价每石二十贯则减作十六贯之类若时价顿贵又任临时斟酌痛减】

【一出糶必減時價却恐米數因此銷折今別撥十八界會一十萬貫置解庫一所名曰咸淳助糶庫則例并依本府解庫趣到息錢專充補糶管要糶足十萬石之數若歲久息羨則增數收糶】

【一天時不常丰歉難必設遇歲飢當行賑濟本府自有區處不許將本倉米及助糶庫錢作賑濟支移一此米本以濟艱糶才遇價貴便當出糶却不可過慮補糶之難從而稍縮今州縣常平米亦多是官司不肯担负以致陳積腐坏反爲公私之累今既有庫息裨助則補糶不難但有一說若遇丰年發糶不盡未免有陳蠹灰蛀之患合用以新易陳今着爲例如有糶不盡米從本府作軍糧支遣却于輸納秋苗時撥數就倉交納盤量抵還庶几此米常新亦免般担勞費】

【一糶在春夏糶在秋冬糶到本錢須是拘桩有所今仰提督機察官將糶到錢即日拘上寄收常平庫令置簿籍必糶米方支如有分文移易并依常平法】

【一出糶照本府甲牌戶口三日一次每大口五升小口三升凭由交錢給米其有經紀小民於當糶日分湊錢不上或出外他干未曾收糶者許于後次一并補糶不許邀阻】

【一甲牌戶或有迁移或口數增減或貧富升降請提督官行下各廂每季從實抄具結狀保明仍不時核實如有欺弊廂官對移廂吏重斷仍許人陳欣】

【一出糶合分場分以防壅并城內分六場城外分四場各就寺觀廟宇寬閑去處東廊交錢西廊糶米庶免壅并之患】

【一出糶每場委監官一員吏人庫子?子各一名十場分作兩日每日各支點心錢監官一貫轿番等人共二貫吏人庫子?子各六百文十八界】

【一置場糶米掇斛接手等人寧无糜費若官司不与區處則必漁取于客販之人所合照苗倉官拘錢例斟酌裁減除倉官免支外每石計支糜費六十文十八界但苗倉則取之於納戶本倉却不當取之于糶戶今從助糶庫息錢內每年照所糶客米數稟支此只是防其漁取糶戶耳若本府自于諸司回糶却不當支專知一十文攢司貼司共六文斗衆二十文脚夫等一十文門司二文門子一文請匙匣一文】

【一在倉之米以新易陳固无十分耗折但米之蛀腐多在經霉之際却是四月以後糶不盡之米直待新谷登場方可換易此時則不能无些少耗折創立之始若不曲盡其慮却恐向後日積月累耗折必多其流弊必至于入則取贏斛面出則減尅斛面以補不足豈不有失初意今立爲定式凡糶到之米自次年四月以後未曾支糶者每石与豁耗折一升】

【一前項雜支并于解庫趣到息錢支給】

【平余仓落成设醮青词聚粟积仓惧民饥之由已献花酌水冀天聽之鑒衷蠲洁落成屏营望赐伏念臣某久司汉钥稔察昇甿未作成风於服田乎何有穷阎待哺惟艰食之是忧力擢公余创储平余粒粒皆出于辛苦家家期遂于饱温必求輿惠之旁周更赖後人之增广念吏有时而代去孰守成规惟心与帝以相通庶几永保愿鑒老臣之经始曲绥民命以图终亿秭既丰千灯相续崇墉栗栗将百载以常存多黍陈陈无一夫之不获

门牌诗人人饱吃昇州饭世世常存老守心 记云我朝本仁立国置常平仓与义仓并盖以取民者还以予民作法良矣岁久蠹於支移隐谩吏持空钥相授受部使者一诘治之株连不辜而铢粒弗可得易地通患几以养人者害人矣天时不齐丰俭迭异赵清猷富文忠寂寂笑人地下民有遇荒而莫之救以死间有爲平余者视饥由已丰而入歉而出较元直无取赢或可助常平义仓之不及庚寅辛卯余令于越年饥劝分不遗余力仅活疲羸既又谕大家赈助仿平余备先具凡得我心之同然者桴应响集爲斛四千计公家之积与大家所益略相半余尝谗于西山真公公喜爲记巔末会余去弗继而直幸存後一二纪间遇水灾邑人藉以余运宝佑初余守当涂储粟二万亦尽吾心焉耳矣陪京生齿甲江左岁一告侵操瓢乞食恤恤莫之适饒商饕餮簸箕权以乘其急而余价翔不能遏郡大夫瞪视噤莫敢下禁切之令几若负牧刍之寄者余心忧焉载稽往牒名存实歉旧平余所储才三万昇数百万家脱值缓急杯水救輿薪之燎蔓蔓乎何以制其昂而抑其踊也乃缩泛节浮余七万斛通旧积合爲一十万度地建屋以廩以峙扁曰咸淳平余仓又辍芝楮二十万立助余库岁取息以补其价之折閱官吏斗级簿书糜费给各有式然余志不于是画也增益相因至去乃止告成之日揭?吁天愿俾勿坏於戏天地生物之德祖宗立国之仁均是心耳余虽不敏独於昇人有缘余爱其民民亦爱予今承乏三矣老至而耄及之行且乞身去所以爲此邦计者惟是心在天下事莫难于经始亦莫难于继成其嗣今与我同志者庶维持于不坏不?而後可昔复村刘公尝创平余于浦城西山记之曰必秉彝尽亡而後此仓可废噫此心法也惻隐之心人皆有之心心相印得无望于後之人後村书仓门两扉曰且与吾民留饭碗岂无来者续心灯余于是仓亦云咸淳二年正月十五日记观文殿学士金紫光禄大夫沿江制置大使兼知建康军府事兼管内劝农营田使兼江南东路安抚大使马步军都总管兼行宫留守节制和州无爲军安庆府三郡屯田使金华郡开国公食邑四千一百户食实封八百户马光祖撰并书朝奉大夫秘阁修撰江南东路计度转运副使兼本路劝农使借紫赵孟頫篆盖 王积翁赋稷思堂颂皇帝即位之明年改元咸淳上诏藩侯以下爲朕培植根本大使同知马公治昇尤于根本注意筑廩储粟揭之曰咸淳平余仓扬休命也扁给事之厅曰稷思堂示不忘民也公三握麟符怀忧秉忠臧感恶服自昧爽至中昃涖事无懈容公之思深矣夫思者天理之所存民胞物与之体验也稷思天下之饥犹已饥之稷何爲汲汲哉解於其思天理流行有不吝不然者公慨思陪都生齿益蕃忽岁祲即艰余廼缩浮费得米十万石作室廩峙练吉告成青红湿新攀星纳月公之思其少遂矣乎汝别驾治其凡汝郡功曹司其出纳以才不以序约法斂散侵移有罚公之思其周悉矣乎日者春颁秋斂有旅师焉恤民艱厄有遗人焉办谷待用有廩人焉藏余待颁有仓人焉周公之制度可谓详矣孟子曰周公思兼三王其有不合者仰而思之其入周公之思久矣南轩谓惟孟子此篇能发明周公之心然则后稷奏艰食稷之思也周公制委积周公之思也公之置平余公之思也嗟夫稷以民饥而思民公以思民而思稷所思以名斯堂不亦宜乎门生王积翁采诸民风爲之颂曰厥初生民维汝后稷思天下饥教民播穡其思伊何心起经纶阻饥由已痒痾切身农事开国周重斂散迄用康年鱼丽晏粢平余蕃魏曰惟尔惺寿昌之规汉

人便之我宋义仓徧於天下平準之法創於淳化熙丰柄臣过思变更元佑及思苍生以宁雀鼠遯肥尘沙积厉岂不尔思公私交累陪京故国翠华大都聚庠实孰怀永图北平钜公三尹东土瓠脱既清绸缪牖户乃积乃仓立粟埋梁不负尔腹以永盖藏堂曰稷思维公初意我思民饥心焉不置心心相续如佛传灯剗弊益匮以莫不增后稷云远万年胥契今之视稷後犹今视嘉佑广惠朱子社仓前思魏公後思紫阳公将告归帝曰未老天相耆後过中书考惟仁必寿惟德永年昇人歌之作此颂焉】後记云【余之三至金陵也欲为邦人创平糴一仓积米十万斛夏糴冬糴以济乏食自咸淳乙丑秋七月至丙寅春正月共得七万石事力仅仅弗克继则以前帅王公埜所蓄三万斛足成之且识之曰倘未即去不以是画今自二月以迄八月再糴三万合爲十万而王公旧积不与焉盖其初已申朝廷桩管不欲混此数也夫出糴之价微损固足以见惠养之心收糴之价不常则不可无变通之法此助糴库所由设也库始爲本芝楮二十万今陆续增至八十五万虽然犹未也积累充广岁衍月益俾所入常有加于今日则此库不爲无助母已则糴价但可畧减不可用今日之例减之太骤以致後日难补若夫辍有余以助不足使十万斛之数永永无坠不无望于後之人是岁重阳日马光祖谨书】三记云【平糴仓之设自咸淳乙丑七月至丙寅正月得米七万石又自二月至八月再得三万石合爲十万石余尝记其畧矣丁卯冬糴二万衍而爲十二万戊辰春再糴三万总而爲十五万如鸡哺雏勺积龠累所以及此数者偶值岁稔司造实嘉相之然爲是仓深长之虑有二焉其一余米不可久顿当以新易陈庶米色常新而民被实惠其二糴之价常损糴之价常多恐异时措置糴本之艰有折閱合额之患于是先创助糴一库爲本百万收息补糴又惧其所入之微也则再创西库以佐之合两库爲本二百万然余志犹未愜也辍郡帑之有余助两库之不足俾是仓是库相爲无穷则余虽去犹不去也咸淳戊辰夏五上澣光祖书】

制置司仓附本府广济仓内又有小仓三所曰东仓曰西仓曰中仓并在南门里沙窝一带

古苑仓吴大帝赤乌三年使御史?俭凿城西南自秦淮北抵仓城名运渚【按实录宫城即吴苑城城内有仓名曰苑仓故开此渚通运于仓所时人亦呼曰苑仓渚】咸和中修苑城惟仓不毁故名太仓在西华门内道全宫城之西北

古太仓晋咸和中苏峻反王师连败绩时太仓惟有烧余米数石以供御膳太仓在苑城内亦曰苑仓【乾道中赵公彥端广济新仓记云图记独称吴苑仓在苑城内於晋为太仓余无闻焉此盖未考也】

古龙首仓按隋食货志京都有龙首仓即石头津仓也台城内仓常平仓东宫仓所贮不过五千万

古东仓唐六典云东晋有东仓石头仓

古石头仓在石头城内吴置晋曰常平仓南朝因之唐武后徙县仓以实石头神龙二年移仓于冶城【晋史庾翼传云往年偷石头仓米一百万石皆是豪将辈而直打杀仓督监以塞责咸和二年苏峻逼迁天子于石头以仓屋为宫梁侯景破台城食石头常平仓既尽便掠居人

尔後米一石七八万钱人相食通典云晋曰常平仓自後无闻梁亦曰常平仓不杂糴陈因之古迹编云唐武后光宅中徐敬业举兵使其徒崔洪渡江修石头城以拒守敬业平置为镇仍徙县仓以实之神龙二年废镇即移仓于冶城何逊石头城诗曰万雉极衿带亿庾兼量出盖谓此也】

制使姚公希得任内增创转般仓转般置仓昉于淳熙爲屋不多岁久损敝景定壬戌制司及本府共创修三十座廩屋

制司修一十五座止是因旧修整用工不多其廩眼以寒来暑往秋收冬藏闰余成岁金生丽水号应副盛贮朝廷所拨米斛自景定三年六月十六日兴工至当年八月二十八日毕工共费钱四万五千三百三十五贯有奇

本府创修一十五座其鼎新创盖一十一座廩眼以天地元黄宇宙洪荒日月盈昃爲号增修旧来四座廩眼以辰宿列张爲号自景定三年十月十六日兴工至次年五月十三日毕除朝廷科降一十五万贯米三百石外本府实增用三十九万九千五百余缗米九百一十石有奇

重修府仓景定四年鼎新修创八月初四日兴工至五年正月初八日毕廩屋计二十四座以天地元黄宇宙洪荒日月盈昃劒号巨阙珠称夜光果珍李柰爲号总费钱一十五万七千四百七十余缗米一百一十二石有奇

大使马公光祖咸淳二年四月内重修建康府城下仓更名广储廩钱十八界四万四千有奇米二百六十石有奇

创制司仓制司米旧附广储仓咸淳元年四月内即广储仓侧隙地令盖制司仓爲廩四前後屋共三十一间廩钱三万九千九百余贯十八界

诸库

圣节从物库在府治西廊

节仪库在玉麟堂东廊

桩积库凡四所一在府治一在府治之南刘公珙建一在府治东陈公俊卿建一在府治东南钱公良臣建都钱库在府金厅之北常平库军资库节制库修造库节用库经总制库公使库皆附焉

礼尚库在府治西厅马公光祖立家之巽为记【开庆元年夏四月建康府创礼尚库何以书始也初府号陪京地大物多诸司错立守臣以制置使掌留钥冠冕诸阍岁时庆劳宾饯讲信修睦相望于道报施视仪公出私入以故说者谓天下礼馈之盛首蜀次金陵笔之私史夸以

为异宝佑乙卯裕斋先生金华马公以户部尚书来镇至之日首斥供帐器币以赐战士诸饷遗率递易以报纖毫弗入私帑又四年复以资政殿学士自京湖再镇规置视前有加一日叹曰互饷当禁人谓吾矫柰何乃即治寺西偏辟屋数楹裒他司所致籍入而吏掌之若缗钱若帑帛百物悉辇以输暨报也即取于是摭戴记礼尚往来之语扁曰礼尚库成谓门人眉山家之巽曰尔为我识之之巽自惟生晚笔弱何足以知公盛德钜美尝怅世降道微廉耻不立盖有流俗非义之事而士大夫习熟见闻以为当然恬莫之怪往往依托事理覆盖其迹迹是心非名正实则悖区区之饷诿曰人情之常恶可以已弗思我施彼报曾不旋踵交手畀付如取诸寄其与攫而怀括而囊者几何无他一自欺之心为之耳非公特立独行一介不取孰能返之正而示之法哉盖公少从西山真公讲道授大学诚意毋自欺之旨平生事君治民修身范物皆得诸此上尝大书忠实不欺之堂六字以赐咸谓称情是库之设盖亦不欺之余事也先是清献崔公文节杨公亦恶礼饷然规模未立美意弗嗣礼尚有库断自公始事虽小于人心世教有关遂拜手以书景定元年十月朔旦门生承事郎特改差充沿江制置大使司干办公事家之巽谨记】

公使酒库在天津桥侧马公光祖重建唐烁为记【开庆改元四月丙子制置大使留守资政马公复建江闽烁以支郡掾赘制幙公闽府政事前二三年修举矣独公使酒库未暇及越六日辛巳乃命烁曰酒百礼之行也公家日用已饬吏任责汝其典司之越十日辛卯特枉牙纛亲莅库所度地下窄视屋欹斜又命烁曰库百物之藏也因仍架陋如欺弊何汝其改作之繇是捐资以辟地聚材以兴工若外若内一撤而新大门公厅皆北向厅之後则酒官便室也门之前则神宇吏舍也周遭于其左则麴米物之廩七 三色棧之库也而又附以碓米之屋绵亘于其右则列竈摊饷之场醕酒供筵棧之库也而又加以涤器浸米之所若井亭若糟池规创具备惟联属于後名醕库者因旧而葺尔为屋凡七十间限以窗户甃以砖石饰以丹雘他如铁冶鑊之铸梁栢醑之造动用器具凡三百余靡不坚固精致经始于四月壬辰考成于七月乙卯工计佣二万一千二百十楮缗十万二千六百米计石五百二十六匠以民价雇而不抑差物以市直收而不科扰方厅事之成也公再蒞库所大书六必二字揭之楣间实取吕令命用六物之义及工役之毕也又至库厅而申命曰库新矣酒今其新乎有门户以严出内有库舍以谨盖藏有器物以足用度继是则酒官之责也夫酒一事耳古人兼用六物必无差贷其精且详如此况有大於酒政者乎然则职斯库惟斯义其必毋懈怠毋苟简毋不屑经意事事勤谨物物精洁庶乎泉香酒冽可以共祭祀可以奉燕飧可以行赐颁斯无负公造库命名之意云岁中秋日门生从事郎太平州军事叛官兼沿江制置大使司金厅唐烁谨记】

醋库三所一在旧米市一在安乐庐侧一在輦子巷杂物库在军器库侧

鞍辔库在节仪库侧

淮土典库在大木头街

封桩甲仗库在大军库东

古石头库【吴都赋云戍东盈于石头注云石头城中置府库贮军储故曰盈于石头】今废

右隶建康府

制司库在府治都钱库内

都受给库在军器库侧

军器库在经武桥东宝佑五年马公光祖修旧增新申严约束【勘层军器库前此蠹弊百出漫不可考本司委官将在库器甲衣装等逐一分别好怯作三等排垛内天字号系创造新修地字号系堪中支遣人字号系略损当修童新置籍各关防出纳申严火禁创置防虞约束监攢之类刊镂版榜钉挂库厅务令经久可守今开划下项一出纳军器前此俱有情弊谓如以堪好者关出而以损弊者交入又有支受之时必要需索堆积廷下兼旬累月得钱即交不得钱则百般作难军人贫寒何所从出本司今既一新规模必要痛戢此弊已榜晓示门外许被扰人指实陈告定追究犯人重作施行诸军交纳军器若非元物即是情弊其虽有损污去处而本是元物者合即交受添修不许邀阻一前此军器走失皆自提点官不曾躬亲下库出纳及荡无门禁之故合于库前新创提点官廨宇一所既便于监临又置门司一员贴门一人专一检视出入庶几可以革弊已榜晓示库门其有辄盗一物一件者并从军法一遇出戍回戍教閱收支多者委制幕一员同共监视自余委提点官一防虞器具十石缸三十只提水桶五十只扯水桶一十只麻搭二十个料杓二十个鈎刀一十把大长梯四连大索二条铁猫儿二个大斧四具大锯二连以上并排列库厅一防虞官兵三十人系就教场防虞人内差拨专一在库逐夜分铺知更提铃循逻外又差合千人一名充部辖一每夜于发更前请提点官将本库职掌库子防虞等人先次点名毕然後开下门锁如有不到之人即仰具申重作施行其本库合千人虽隶提点官却不许使供私役本司亦不测差人撞点一在库一应合千等人并不许带火入门遇夜亦不许点照灯烛责在守宿监官常切点检如违一例坐罪一库内烘焙弓弩并请提点官早晚监视入炉开列火力炭数如后春秋两季火力七分四十炉每一炉日支炭一斤四两炭?六个夏季火力十分四十炉每一炉日支炭二斤炭?八个冬季火力五分四十炉每一炉日支炭一斤炭?四个一弓弩库眼既有火烙与他库眼不同每夜须责库子入库守宿照管所有钥匙令作一匣盛贮亲行当宿监官取掌以防缓急次早仍纳提点厅一库子旧例每名日支钱三贯文饭食系各人自造本司既严火禁遂自四月初一日为始行下火队照作院工匠例每名日支盐菜钱一百三十文米二升做造饭食支散一各库置库口簿一扇将已排点衣甲军装等逐一抄上遇有收支每五日一次结转请提督官金押一月一次转止总簿赴使厅呈押一增创暑往字号库屋共六间计用工物钱三万二千三百五十二贯文一新创提点官廨宇一座创造门楼厅堂屋宇共一十七间并在下装修床榻等及遇回墙围木植塼瓦计用工物钱一万六百四十贯九百一十五文】

回易库在斗门桥西

抵当两库一在御街锦绣坊之南一在寬征坊

惠军典库在十三丈街

右隶沿江置制司

军需库系安抚司库在军资库之侧【防江靖安两酒库元隶安抚司钱入军需库乾道八年将建康府酒库并拨归提领户部酒库所包认本司两库酒息钱每月以乾道七年息钱数为额成年计五万七千三百七十一贯五百九十五文分十二个月取拨入本司军需库收附支遣续承提领所牒报趣辨不敷于本司息钱元额权减四分之一每月拨到三千八百八十九贯一百八十四文 本司元有抵当库将钱本举借应副猪羊牙户从便打发猪羊客人收息解发续於乾道八年六月内建康府置库用本并从本府猪羊打发务依旧拘收息钱每日分隶解纳本司军需库交纳每月共收三千一百余贯文昨自前政吴大资任内于淳佑十年正月一日省废所有上项课利钱本府却以收到外三县酒税钱内照淳佑九年收趣钱数拨解本司成年共收八千三百一十三贯五百文十八界会分作四季拨入本司军需库收附支遣 本司亲兵雪窖二所坐落城北门外遇冬月差拨官兵收藏冰雪至夏日变卖收钱入军需库若二窖十分平满除公用支遣外自余约卖钱三千贯文十八界添贴支遣 本司近于实佑六年十月内蒙前政赵观文以本司财赋匱乏支遣不敷遂于沿江大制司常平酒坊内分隶奉桥新昌徐庄钱村四坊拨付本司每月共得息钱七百二十贯文十八界续于开庆元年五月内蒙安抚马大资再拨新城吴材两坊息钱二百二十四贯文十八界其钱制司径自催理只将乾息钱拨入本司军需库支遣官属月给此安抚司财计之大略也】

右隶江东安抚司

大军库在总领所东

都钱库在大军库西廊

激犒库在大军库东廊

桩备库在都钱库之侧

抵当二库一在旧米市一在鸡行街

公使库在总领所西厅之西

见钱库在饮虹桥下保宁坊之西

右隶淮西总领所

钱物库在转运司东与花园相对

杂物库在大厅西廊

公使库在杂物库侧

典库在转运司衙之东

右隶江东转运司

凤台酒库在天津桥之南

镇淮酒库在御街建业坊相对

嘉会酒库在大木头街

丰裕酒库在南门外西街

龙湾酒库在龙湾市

防江酒库在北门外

东酒库在上元县之西

北酒库在太平桥之南

右隶户部提领酒库所

务场

榷货务旧在总领衙西今改为总所属官廨宇

杂买务旧在总领衙东南今废

市易务旧在新桥南今废

平準务旧在御街东今废

秤斗务旧在壽宁寺西今改为属官廨宇

都税务在寬征坊姜河下

夏税物实场在府治设厅侧

受给修造场在颁春亭侧

杂卖场二所一在东南佳丽楼东隶制置司一在东南佳丽楼西隶总领所马公光祖立

都船场在龙湾

柴场三所一在城隍庙侧一在龙光门外一在朝宗坊之西

菱草场在东门外转般仓侧

竹木场在府社坛东

王沙税务在靖安镇

抽分场在靖安镇

药局

安抚司惠民局在府治西淳佑十一年十月马公光祖创拨药本收药材委官提督监视修制置四铺发药应济军民收本钱不取息【一在天津桥南一在银行街一在镇淮桥侧一在靖安镇】总领所惠民局在正厅东廊置五铺发卖【一在本所卫门东南一在太平桥南一在银行街一在凤台坊口一在御卫长乐坊】

都统司惠民局在都统衙内桥亭东置二铺发卖【一在天津桥南一在太平桥南】

雪窖

行宫雪窖在城东门外

安抚司雪窖在城北门外

防江军雪窖在鸡笼山之侧

都统司雪窖在城北门外

犴狱

左司理院在府治大门里之右通叛西厅之後

右司理院在府治大门里之右知录厅之後

直司在府治都金厅门里

总厢在府门外西南

兵马司在効一营内

土牢在马军营内

上元县狱在县治西偏

江宁县狱在县治西偏

营寨

侍卫马军凡六军四军屯城南一军屯城东一军屯府治西北与都统司诸军参错如古南北军之制乾道七年移屯每军有统制统领出三衙马帅以领之号行司选锋军在城西门崇道桥

前军在城南门外虎头山

右军在城南门外黄家塘北

中军在城南门外黄家塘南

左军在城南门外陰山之东

後军在城东门外蒋山南

驻劄御前诸军凡六军列於城之内外绍兴十二年移屯每军有统制统领官置都统制副都统制以领之游奕军在北新街清化坊

前军在桐树湾以北

右军在高阳楼及城东门外

中军在保宁寺街

左军在北门里大街东

後军在上元县西景阳台南

厢禁军营旧皆茅庐绍熙中章公森尽易为瓦屋数千间号曰新营其隶册籍者始不与居民杂比有诏獎谕禁军

武雄第一指挥在广济新仓东

威果第十三指挥在行宫北证圣院西

威果第十四指挥在证圣院东

威果第十五指挥附威果第十四营

全捷第六指挥附威果第十四营

忠节第十一指挥附威果第十三营

威果第四十四指挥在转运衙西

全捷第十一指挥在太平桥北

有马雄略第十一指挥在清化市南下街西横江水军三指挥一军附威果四十四营

附有马雄略营一军附全捷十一营

忠义指挥在总领衙後

厢军

効勇第一指挥

効勇第二指挥

牢城第一指挥

牢城第二指挥

剩员指挥一营以上并坐落在城内西北隅

沿江制置司诸军寨

游击军寨五所宝佑四年马大使光祖建

前军在武定桥南

右军在北门内

中军在桃源洞

左军在武定桥西北

後军在桃源洞

寨记【宝佑柔兆执徐正岁之三日制置使尚书马公受命募兵赏明令修远迩悦来越三月得嫖姚之士三千三百人辟诸营以舍之薪楚盐酪床榻釜甑不旬而有亦既协厥居矣公犹以为人不根着怛然未有嚙志乃周爰相度得故营地于武定桥之东而胥宇焉谓通川崔君泰亨缜密而庄谓新安汪君洵之明达以敏皆机士使耦往彼洩其事实墉实屋百工皆作木章竹个苇把钉枝当其直而取秋毫不以符移赋诸下酒肉淋漓旬犒月饮士夫豫附竟役不施一箠虹见而作驷见而毕凡斥币百四十万缗规地六百三十丈结屋三千二百楹而皆有畸南北其檐巷以集于中道衡从其道门以达于四逵鞠旅有亭习射有圃祠兵有宫将军偏裨各以资序授室井乎如田之洫屹乎如山之阿江以南营垒将无与雁行者嗟夫仁者之迹熄固有俟曲体于高明风雨其人而莫之隐者仁隐之勇不能赴之则或閤于艱勇赴之智不能周之则或愆于素君子谓是役也居约而施溥时拙而举赢工坚而事速建一营三物成矣是月既望公载酒肴召僚佐相与落之或执简请记成事公曰吾恶夫诩者未之记也有谥而对曰公经营是以整比予士非以为诩也其亦使士于此焉居则肄戎经出则敌王忾入则効首虏岂其即安而弛劳委公赐于草莽耶庸劝之以斯文俾勿情而非以为诩也乃记门生朝奉郎特差充沿江制置使司参议官胡居仁撰门生从政郎差充沿江制置使司干办公事梁椅书门生通直郎添差沿江制置使司主管机宜文字汪洵之篆盖】

游击军新寨在马帅衙之东开庆元年马大使光祖招填增刺新军日多遂复建此寨以处之倍直买民地拓基周广五百二十亩有奇选委本司主管机宜文字徐道隆干办公事林子譙董其事制帐总统王雄提举官张胜佐之是年五月经始明年三月告成宏旷高爽甲于诸营下至床榻釜甑莫不毕备寨屋三千间制领将佐衙共一十一座计一百三十二间点亭庙宇寨门共四十一间甃井二十五所并造井亭一十二间

防江军寨在城北门外耆闾山下

効用军寨三所一在府直街能仁寺後一在武定桥南又小寨在罗帛市

破敌军寨在大西门里

精统军寨在都统衙後

亲兵左右部在鹿苑寺侧

策胜军寨中军在城里东北角右军在北门城内制効军寨二所一在城南门外虎头山一在城里杏花村

龙湾游击水军寨在靖安镇

靖安唐湾水军寨在古龙湾茆草冈

义士军在游击中左後三军屯泊

雄武军在北门游击军屯泊景定二年分屯宜城

江东安抚司亲兵寨

乾道五年史公正志建在府治东後废淳熙初刘公珙复建为两寨一在宫城东一在官城北庆元初张公杓重建

寨记【江东安抚使司置亲兵千人本乾道五年侍郎史公奏建康留钥之地控制淮甸虽宿重师而帅阃弗容弛备乞通选本路禁兵至建康期一更戍遂建寨北门外九年有旨发还独选建康兵足之淳熙二年枢密刘公复奏即城中为二寨用便閱习虽千夫之聚其招与辑皆先以闻团朝军旅其重如此庆元乙卯春宝文阁学士尚书广汉张公自襄阳移镇下车布宣教令盗贼衰息蠲逋赈荒田里舒泰民事既举乃修军政初刘公徙北门之营因旧缀补岁久腐坏风雨之夜栋橑伊轧卧者皆惧夏大雨屋十楹一旦仆地尚书命九言督视撤旧图新统领崔彦使臣李荣率将校李保刘喜蔡俊分掌役事使臣徐升率军典王承吏魏辅掌受给材植百物军典李琼尉辛管金谷吏罗演宋继先司案籍为军房甲?库合千二百八十七楹又建亭为主将号令点集之所夫军旅非徒习为分合刺射而已将教之出相须入相逊同队相亲同营相和然後可以事其上昔晋侯观师于有莘曰少长有礼可用也因名东亭曰观礼西曰教忠俾士卒识所趋向亦以告驭军者知训齐本末之叙云十月承直郎干办公事游九言记】

淮西江东总领所总効军寨四所

一在江宁县北真圣庙南

一在兴严寺北

一在马司选锋营东

一在报恩观东北

庖院

齐六疾馆济文惠太子与竟陵王子良立六疾馆以收养穷民

梁孤独园梁武帝普通二年於建康置孤独园以养穷民

养济院在宋兴寺嘉定五年黄公度创今为居养院省劄【知建康府兼江淮制置使黄度奏臣伏见中兴会要绍兴七年高宗皇帝驻蹕金陵闰十月诏以天气寒凜贫民乞丐令建康府疾速踏逐舍屋于户部支拨钱米依临安府例支散候就绪日申取朝廷指挥收养窃惟不废困穷列圣家法嘉佑熙宁次第增广上自京师外及州县或给户絶官田或出常平钱粟载在史官前後可考而高宗皇帝于多事倥偬日不暇给之时闵民三穷亦捐大农钱米以贍之其所以续天地生生之德者与祖宗同一心也臣猥以非才滥司留钥适当旱蝗饥馑之後流离饿殍充徧城邑几不忍视赖朝廷德泽赐缗转粟拯其羸厄阖境生灵免填沟壑莫不衔戴上恩歌咏鼓舞惟是流移贫民养于僧庖者凡三千四百余人去岁麦稔择其稍壮者与之裹粮散遣归业而孤寡老疾之人存者尚衆臣遵奉高宗贍孙之长谋推广仁主发施之德政府城旧有养济院前守臣钱良臣始为规抚未广收养不多臣遂于城南北创两养济院为屋舍百间每院各度一僧掌之所养贫民以五百人为额春夏则稍汰去每岁用米一千五百斛其千斛取办于常平五百斛从府仓耗米挪拨费钱二千缗则取诸安抚司惠民药局息钱出纳稽核选僚吏以董之又得废寺曰宋兴择僧住持总督其事取民产之没於官者为田五百九十亩山地等五百十有九亩以供亿僧徒又捐千缗就寺置质库计其所赢每三岁买祠牒度营干有劳行者一人为僧嗣掌两院事务凡穷民寒则为之衣病则予之药歿则为之葬埋条画区处粗为周悉留都繁会之地四方失所流徙之民往往多聚於此皆无作业每过隆冬凜冽之时米价稍贵则号寒啼饥暴露枯瘁所在成羣非都邑气象自今以往皆得安居饱食不复宛转于市井捐瘠于道途惧其时改岁迁来者不继则所拨钱米或遂中辍所置屋庖渐至颓毁是用不避屑瀆冒昧以闻敢望圣慈特降睿旨行下建康府及江东安抚常平司常切遵守所给钱米每岁照数取拨毋得辄废庶几德泽深长与国同久干冒宸旒臣无任恐惧之至伏候敕旨贴黄常平米系每岁给养孤老米内分拨药息钱系药局收到即非解发官司等处钱柴芦于建康府公使库岁时柴内支取并无侵公私去处伏乞睿照三月六日奉圣旨依右劄付建康府準此黄度跋云度守留都之二年岁比有秋疮痍浸复思广上施爰及今人共惟祖

宗至仁同符三代在郡国实有养济之政高宗驻蹕诏旨如丹乃斥币余营室庐而养食之董以緇流区画纖悉拜疏上闻蒙恩诏可圣主视民如伤光昭租武呜呼休哉事适权輿条理未密丰凶岁异所养不齐则緝熙上恩敷锡无告异时牧守必同此心敬以德意载之于石嘉定五年岁在壬申七月既望宝谟阁直学士朝议大夫知建康军府事充江南东路安抚使兼行官留守司公事兼江淮制置使黄度谨题管辖僧智壽立石】宝佑五年马公光祖增葺居养院备其器用优其衣食广其收养【榜云照得居养院创制有年些小租入旱涝相继虽有疲癯残疾之人无以为养廨分不与申收大失始意今接续支拨钱米下院给造衣食行下各厢根刷申解一项院内见养穷民冬寒添置布袄袴絮被荐蓆内袄袴添支新绵作纯绵胎做造袄袴结散一项诸厢孤贫老弱残疾行丐之人自入冬以来行下各厢节次根刷到三百余人并送院养贍仍接续根刷申解】

安乐庐二所皆马公光祖所立一在北门高阳楼侧宝佑四年所创也一在御街西醋库後开庆元年所迁也【创庐规式照对本府系军民杂处商旅往来之冲间有病于道途者既无家可归客店又不停着无医无药倾于非命极为可念当使昨守当涂日尝遵参政真文忠公帅潭口规式创安乐庐收养病人凡行旅在途及传递过军罪囚等应有疾病并许经提督官自陈书时收入差医命药全活甚衆本府今仿上项规式于城北门里创置到安乐庐一所择僧看守命医诊视钱粮成料给之仓库汤药随证取之官局床榻器具一一齐备庖湍沐浴各有其所高明整洁务使至者如归今开具规式如後一军民在路过疾往往客店户恶其扰人又虑传染多是不肯安着本府已告示城内外客店户并军巡地方遇有经过人病患仰即时具状经提督官随即押下差医人诊视给药医治一诸司及隣郡传送到过军等应有不测病患仰防押人即时具状经提督厅押下医治仍仰元押人同共看视监管一两狱或有罪囚不测病患亦仰推狱具申本府取判押下医治仍责本牢狱子同共看视监管一病人入庐即时差当月医官诊视脉息证候其合用药饵经提督厅点对批历赴安抚司药局支请责付医人并看守僧如法煎煮服饵一病人入庐合用粥米已置历成料关请每病人一名日支白米一升柴炭钱三百按日支給若病重不食者仰分明报闻其病愈能食之人请提督官契勘量添半升勿令失饱伤饱仄致成疾其专典等人减克作弊全在提督官觉察钱米料尽接续申关病愈之人无力可归者计其远近量给钱米津送出庐一病人入庐应有随身行李什物仰专典即时对衆上簿收寄令病人押字候痊可出庐日照数给还取领一病民有疾势危笃及病证奇异非见丸散可以治疗者仰医人审细立方别收买药材修合其当月医人不能办者提督官申来或唤上全行或请各医同共诊视一病人在庐仰看守僧加意监督火头煎药煮粥本府不测差人点撞如不留意并加责罚一病人或有瘫癱疮瘍恶疾臭秽不堪亲近之人却】

【不许入东西两厢合移入别房医治一安乐庐在城北门内高阳楼街坐落东南路自五龙真圣庙街入西北路自笪桥一直取高阳楼街入一安乐庐屋共用过钱六万一千一百三十一贯一百九十五文米三十一石七斗二升五合 增立新庐安乐庐所以休养病于道路无所于归者也始创于宝佑丙辰地在北门高阳楼侧督以官守以僧诊视以职医汤药取之公局钱米给之帑库床榻器具无不毕备庖湍沐浴各有其所事目已见前志第僻处一隅非惟官府耳目不及而病者至庐亦以困殆开庆己未十二月遂改建御路北醋库後其屋视旧庐增三之二又创置器物一千余件督守医给之制皆如故若夫更革之颠末终成之岁月于记见

之官厅三间僧行职医煎煮房六间佛堂神祠二间庖房七十二间内楼一间庖司门子房二间厨房浴室六间前後过廊并後门五间工物支费数目见于记其旧庖亦自两存盖欲各随其便也 庖记景定元年春二月甲子建康府新作安乐庖成太守资政殿大学士制置大使马公命元演记其事元演谢不能公色喻之曰庖之基子所访庖之役子所相将焉辞乃弗敢替命初宝佑丁巳秋元演以富阳尉满来长干谒公于玉麟公寘之幕习闻阃府事求所以兴民利修军容者次第观焉尊所闻也安乐庖在北门高阳楼侧创于丙辰之冬见其规画详品式备守者佣者与隣而居者手额相告睹兹庖才两年行道疾病之人全活者不胜计由是作而叹曰仁矣哉公之政欤公闻之曰未也城北去关市远甚庖以休病而趋者顾以远病之我将改诸寻易镇荆未果明年夏四月公再领昇印元演复从公游一日谓元演曰子不记此庖改作之言乎以时考之可矣子仪图之会得废寨址于城闉广袤二十丈距郡治百步而近公曰宜哉乃以十二月丙寅兴役为屋凡百楹僧室医房神栖佛宇煎饪之所溷沐之地衾箠器用视北庖加详备焉公又书安乐坊三大字表之通達至是竣事糜金钱百二十万米千斛有奇昇有郡以来庖之创自公始而周思曲虑弗便弗止可不谓仁乎盖自周官遗人之职废所谓设庖宿候馆以待羈旅以恤难厄者影响不存士一命以上媮与惰锢其心腐其力有民人而饿死于我土地者往往而是尚能为四方疲癯残疾者计邪惟我朝真文忠公始作安乐庖于壽沙志士仁人必来取法公文忠门人也学其学而政其政固宜虽然公将上佐天子相天下煦寒濯痍苏醒雕瘵使大宇之内无一民一物不安且乐者此公全体大用之仁也庖岂得以顓斯名哉夏五中澣门生文林郎特差充江南东路安抚使司準備差遣马元演记并书】

慈幼庄在皋桥隶江东转运司真文忠公德秀创置马公光祖增添月给【嘉定十年二月省割江东真运使申切见建康府自去年饥歉之後民食日艰生子之家多是无力养育因以遗弃道路或致转死沟壑殊可矜悯照得在国法诸灾伤遗弃小儿官司给钱雇人乳养以卖户絶田宅钱充而措置一事合隶常平今江东提举司与建康隔远奉行难于徧及申请待报必是稽违恐失朝廷幼幼之意德秀今量度事宜将本司拘到诸州县没官田产措置召人租佃立为一庄专以慈幼为名计其岁入委官掌管月支钱米雇人乳养凡有遗弃小儿即时责隣保勘会见得遗弃分明再行委官审实附籍给历头与收养之家每月支钱壹贯文米陆斗至五岁止其无人收养者所属官司召募有乳妇人寄养月给一同至七岁止其欲以为己子或有人转覓者听从其便仍从官司给据其抱养之初襁褓未备则以钱两贯文给之其病患者听自陈给与药费死亡者支钱二十贯文即时除籍或丰年遗弃稀少支用有余则储蓄以备荒岁赈给今已差委官吏措置租佃开立条约关防伪冒颇为详密深恐日後官吏或移为他用有失今来创立慈幼庄本意实为可惜今将本司见管没官田产开具下项上元县管下僧智彬田地计六百九十六亩三角二十六步伍用贤朱五四田坟二十六亩三十五步半溧阳县管下僧德懃田地二百五十五亩一角二十七步郎学谕田地三百五十亩二十步伏乞割下本司照会容勒碑纪载永永遵守其于推广朝廷幼幼之仁不为无补伏候指挥右割付江东转运司从所申事理施行準此一在城及上元江宁二县管下应有遗弃小儿如有人欲收养者即仰赴厢官尉司陈词行下勘会是实将所收小儿发赴提督官厅验实给历照例月支钱米其地里远者许令每季一顿支请仍量给纏费一遗弃小儿每人月支钱五百贯米三斗如愿为已子者及转覓者皆听其便于提督官厅置簿一扇就立小名以千字文为号每名给历请至五岁止如无人收养者仰所属官司召募有乳妇人寄养支请钱米至七岁止其支散

日系提督官厅告报各人賫本司历同抱小儿赴厅审验批历支散一若有遗弃小儿所属官司憚于往复申闻及隣保隐蔽不肯以实告者当坐以罪一所养小儿如有病患仰经提督官厅自陈量给药费如不幸死亡支埋殓钱一贯文即时除籍一所支钱米系于本司慈幼庄历内每料关钱五十贯米三十石候月终提督官具收支之数赴本司呈豁一提督官月支茶汤钱五贯文一慈幼庄手分月支給扎钱二贯文一慈幼庄管庄人系蒋山保宁清凉天禧四寺每岁轮差僧一人行者二人专一管干庄务收支并给散粮种每月共支米五石香油钱十贯文一本庄屋宇及耕具遇有损坏听申提督官厅备申差人审实支钱修葺一置簿二扇凡本庄有什物农具耕牛等并籍于簿以时稽考一置簿一扇在庄每月收支钱米等赴本司呈押一置砧基簿一扇将本司拨到本庄田产并开具坐落乡村土名四至亩步内一扇寄收本司钱物库一扇本庄收管一本庄合纳夏秋二税但于官物并不管属县分勒乡攢细具合纳数目赴本司具呈发下一慈幼庄坐落系在上元县长乐乡地名皋桥于嘉定七年拘没到僧智彬诡名置到庄地一十亩庄屋一所共计八间各计五架又四厦内有仓三眼板全前後板门九扇板壁二扇内有房三眼木窗五扇床二张厨屋一间一厦接连屋三间二厦及门楼一溜板门全牛屋一所计三间各计小五架又土瓦屋三间各计五架在下安罗磨一副并罗厨一副客屋三项瓦屋三间二厦内华屋半间各计五架并黑□牛一头见系丁亮居住瓦屋二间半计五架并黄犍牛一头并小牛儿一头黄?牛一头见系陈念乙居住瓦屋二间计五架并黄犍牛一头见系王千乙居住黄?牛一头黄牯牛一头黄牯□牛一头并看庄黄狗儿一只见系黄王二看养一本庄田地立为上中下三等收租田上等每亩夏收小麦五斗四升军斗秋纳米七斗二升军斗地上等夏纳小麦五斗四升军斗秋纳豆五斗四升军斗田中等每亩夏纳小麦三斗七合军斗秋纳米五斗四升军斗地中等每亩夏纳小麦二斗七升军斗秋纳豆二斗七升军斗田下等每亩夏纳小麦三斗三升四合军斗秋纳米三斗七升军斗地下等每亩夏纳小麦二斗六升六合军斗秋纳豆二斗一升六合军斗已上各系租户自出耕具种粮净纳租数立为定额每年责令管庄僧行照夏秋两耕拘催送纳如有顽户拖欠仰申提督官厅立限催促或遇灾伤木庄具申本司委官核实检放】

实济院隶转运司宝佑六年二月创【省割大中大夫新除户部侍郎总领淮西江东军马钱粮专一报发御前军马文字兼提领措置屯田兼江南东路计度转运副使余晦状照对本司恭準省割给降黄榜备奉御笔俾监司守臣軫念军民创置养济慈幼药局等事晦误将漕指务广圣恩远在部内既因牒诉以达民情近在目前可无惠利以苏民瘼窃念建康为今陪都生齿繁阜前参知政事臣真德秀将漕日曾置慈幼一局凡婴孩之遗弃於道有能收养者月给钱米至七岁乃止踰四十年相仍不废然鰥寡废疾之无所养者未暇虑及正图所以为赈瞻之策明命一颁敢不只奉德意遂於本府右北厢欽化桥一带踏逐到总所旧北酒库後闲地一段鼎新建造门廊房屋适六十余间窗牖庖湍床榻衾帐色色具备采取黄榜中语名曰实济院收养无告之民以一百名为额每名月支米六斗盐菜钱一十五贯文柴钱五贯文按旬给散且委通直郎本司主管文字洪糠专提其纲受给抱关皆分兵吏职之一岁通计米七百五十石钱二万五千贯文十七界窃照本司自端平年间置脉惠解库一所以一十万贯文十七界为本桩收利钱以备预余济民困楮价折閱本钱失陷获息无几自晦到任借拨官钱四十万贯令量收解息数月之间得利倍之若满一岁绰有余用晦今将收到当得之钱拨填元借窠名行下赈惠库正作五十万贯大附簿永充典本截自晦离任日尚有利钱二万九千

余贯尽可了今年实济院月支之费本司芜湖县寄纳仓岁有耗剩米裨助经常今于本任内将收到米令桩一千石留供本院岁给自此每岁桩拨为例且于漕计初无亏损见今伐石登载规式以示传远倘继者更能推广上恩缉续善意使天民之穷免至夭札与德秀之慈幼局经久并行其于九重怀保惠鲜之政不为无助除已具录奏闻外欲望朝廷更赐敷奏割下本司照应施行二月二十三日奉御宝批知外右割付江东转运司从所申事理将上项库本钱令项具入交承帐内具收到息钱专充养济院支散不许妄行移用具遵稟申尚书省準此院记圣天子新美百度纯亦不已乃宝佑五年冬十有一月壬戌四领御笔风厉台郡修明举幼赡穷药疾建院设局之实政忧民恤下尧舜之用心也丁丑制书驰传下于江东爰飭漕臣总核一道九郡孚浹羣听职也建业为今陪都生齿蕃夥先是参预文忠真公深惟治所思有以广上德意不使婴孩弃而不举为支泉粟以鞠抚之满七岁乃止人乐收养免于夭札于兹四十载四明余公晦来将使指喟然曰幼而生生有攸赖矣鰥寡孤独天民之穷者而未有尝食非缺欵将营图之会奉明诏乃度地钦化桥下明年春正月辛酉工徒并作而屋庐之房室有列翼以门庑计六十间而赢摭黄榜语号曰实济院额以百人人予之米有常予之薪若蔬準以泉有常典之以官若吏有常岁会之粟以斛计七石有五十泉以楮计二万有五千取粟于芜湖之庾余而正其名取泉于赈惠之藏息而益其本可以均而无浮可以久而无匮今而居斯宇廩斯养昼处而夜息支赢而起疲咸得其所以近续天地生生之大德所谓无告者不待告而知免矣矧司存剂药剗伪售真始至既一新之朝家遴布福星任之漕台于此可以观矣或曰一人惠育元元必先其大者此特其细窃谓不然揆诸周官以慈幼养老振穷恤孤寛疾之政佐天子保安万民大司徒职焉而可细视之欵上指仁厚俪美有周将顺惟其人是可书已戊午实佑六年春二月既望朝奉郎庐山南冯去非记】

制使姚公希得任内重修养济院院创于嘉定其来已久事关矜恤当加之意景定五年二月十三日兴工重新整葺总费一万一千二百余缗米八十二石三斗有奇

及幼局咸淳元年正月马公光祖钧判参政真公创慈幼局当使将漕时尝增月给而本府前此乃欠举行街市间有遗弃小儿合立规模收养仍委官提督今具条式如后

【一本府城内外诸厢贫民遗弃小儿或愿收养者具四隣保明状申提督官厅差人审实出给历头照实粘五年大使已行例先支抱养钱十八界四贯米五斗月支十八界贯米三斗至七岁住支】

【一遗弃之时恐未便有人收养遂先雇乳你四名每名月支十八界六贯米五斗】

【一婴孩寄养在乳你家万一无人收抱亦合区处今自一岁後照抱养人例月支十八界两贯米三斗就令你家权行抚育如有愿就乳你之家接续抱养者听月给照之】

【一每月一申民间抱养数并寄养乳你家数申提督官厅支请钱米仍仰各携抱当官点名以防伪冒其有病患者仰不移时经提督厅给药或有事故即时具申销籍所有本府钱米作四季成料拨付所委官厅收管月申总总销豁钱一料以十八界五百贯米以百石酒三百瓶

為準】

【一行下诸厢及两县尉司严督地方巡逻诸处如有抛弃小儿仰即时申解提督厅每收一人与支犒酒一瓶如卤莽失收觉察到官厢官阁俸地方等人等第究断仍关缉捕房专一觉察】

【一收到小儿恐无衣着本府随时支拨绢布并支无用衣服发下改造责令你子付小儿装着】

景定建康志卷二十三

卷二十四

钦定四库全书

景定建康志卷二十四 宋 周应合 撰

官守志一

书曰建邦设都树后王君公承以大夫师长不惟逸豫惟以乱民由古以来官制不同扬州有牧有刺史有大都督丹阳有尹有太守昇州有刺史有知州事江宁有尹有知府事建康有知府事有节度使既具于表前代东府西州行台列省既附於城阙志维今阃府所定台治所分参佐宾僚之居甲兵钱谷之所彙分序列宜有考焉作官守志

府治

圣宋开宝八年十二月二十七日江南平以李煜故府为昇州治天禧二年二月戊辰诏改为江宁府置建康军节度建炎三年五月丙辰诏改为建康府节镇旧号如故绍兴三年以府治建为行宫以转运衙改为府治在行宫之东南隅秦淮水之北【详见府廨图】凡留守知府事制置使安抚使宣抚使兵马都督皆治于此

设厅居中左右修廊

戒石亭在设厅之前

仪门在戒石亭之南

府门在仪门之南

鼓角楼在府门之旁

清心堂在设厅之後

忠实不欺之堂在清心堂之後堂名乃宸翰所赐前有斋左曰云瑞右曰日思

右史陆公鼐记云堂制使尚书马公妥皇帝御扁作也初乙卯冬鼐解节濡须道金陵入谒公肃于玉麟揭忠实不欺之堂六大字鼐拜而请曰伊上之赐昭公之心将易而名诸公曰否余起疏逖际熙明猗无他技蚤暮检省惟忠惟实惟不欺慊未能也顷俟罪神臯登侍清燕自天

有實是訓是彝實朝夕企瞻罔敢替明日讌正堂六大字复临乎上公之意可识矣稍环顾厥屋传聽事後面偏腋侵袤不能十丈老而将压齷輒启公曷若斥大其制以奉壁奎之躔使邦之人近光而自劝治名而胥效哉公未许也越三载夏孟辛卯侂图及书来谕政丰理裕百废具飭堂撤而新矣扁揭而奠矣以子知顛末尚爲我记之壑竦而作曰非忠实不欺然邪昔之君子聽政修令辨仪定志亦既疏户廷截阼阨至其酬酢余隙以涵以滋又必有从容偃息之舍延寿之阁韦郎之宴寢是也矧陪都地鉅物夥表拓里鎮有临护之大有湊犇之衆胸湫则烦神壅则涸所以赓续其无倦权度其泛应不在斯乎而百二十年来非乏名卿相寒厅宿圃更騰迭壑独斯未暇者堂所安也纖致于所安嫌也呜呼尽心之谓忠心所不便不容矫循事之谓实事所当革不容缓公寧躬改作之厪而必遗後人以安身崇德之抵寧舍撝避之谦而必畀斯人以存我厚生之福非其中有不能顷刻居者必不忍自欺邪不自欺则不欺君矣退食之暇补旦昼而栖太虚质天日而葆方寸愈委蛇愈俨恪愈淳深愈通溥堂也者其德之奥欤虽然公人中龙也可以雷域中可以雨天下北门鎖钥非準不付一衣帶水果限南北邪或曰一堂之营无述焉可也其不敢不述者公所命也堂爲间七後是者五焉各翼以步庑临以輪軒中爲航齋公成画也添差通判汪洵之治其凡添差总管郑良臣课其悉叶劬廼司五牖竣事公遴委也公名光祖字华父金华人师事母自欺齋西山眞公有本固如是今以宝章阁学士制置沿江兼留守行宫云宝佑五年闰月既望朝奉大夫行尚书礼部员外郎兼国史院编修官实録院检讨官时暂兼权侍立修注官兼崇政殿说书陆齷谨记朝奉大夫集英殿修撰知太平州军州事兼管内劝农营田使节制本州屯戍军马胡大昌书并篆盖

静得堂在忠实不欺之堂後

玉麟堂在忠实不欺之堂之左後瞰青溪前临芙蓉池喜雨轩在前恕斋在後有竹轩在旁静斋在右学斋在左杜公杲记学斋云人不可以不知学也五常之性未尝不均涵养日加然後光大人不知学愚者日以昏不肖者日以悖天之予我者亡矣是犹责履于跛责视于眇不足以有行不足以有见也百工技艺罔不由学士大夫求善于吾身有用于斯世反不知学而甘心于昏且悖岂不谬哉余以非才荐更任使踰七望八分阨金陵军民事夥坐废读书闲得少休凝神默坐温故知新不敢以老而怠府治便坐率高堂敞楹以侈燕饮以合优乐非藏修肄习之处东偏有室三楹介于内外颇为安便止留北窗余悉窒塞殊失良背之义暨久地润非昏?重着之所宜于是辟南以得明棧地以离湿其南正面堵墙一物无所见寸步不可行子曰人而不为周南召南其犹正墙面而立周官曰不学墙面遂名曰学斋读书于此延客于此间亦治事于此仰而思之夜以继日求其所当学者庶几于理明达视有所见行无所碍则是墙也爲吾之铭盘爲吾之丹书不然闭而不覩其何以行之哉

锦绣堂在玉麟堂之左上爲忠勤楼堂名楼名皆宸翰所赐庭中左右植金华二石屋之其前爲木犀台又其前爲碑亭有堂在左曰水乡

退庵吴公渊记臣至愚极陋老又及之陛下未忍弃捐使待罪江阨臣虽职思其忧不敢食焉怠事然课功会绩自视阙然廼五月丙寅御笔焕颁以臣粗着忠勤除臣资政殿学士职任如故臣得宠惊惶?恩感泣大惧无以对扬圣天子显休命会郡楼新成乃拜手稽首有请乞宸翰

揭其上庶几举头仰瞻鞠躬佩服威顏咫尺罔敢有越厥志天穹聽卑朝奏夕賚虬騰龙翔之势銀鈎鉄画之体自光尧以来擅书圣者弗能及石头鍾阜秦淮青溪水涯山巔若草木若泉石莫不衣被天光膏沐圣泽榮耀无比而况於邦之人况於邦之守乎臣既已肅冠裳訊龟筮昭扁榜勒金石用詔无极又拜手稽首言曰昔我高皇尝以风云庆会賜臣沂中逮我孝庙亦以明良亨会賜臣浩然皆私第非公宇太宗虽爲臣易簡书玉堂之庠然在禁密之地非外藩服今臣蒙恩賚实出创見天下郡国盖鮮有此岂非希濶之遇千載之一逢与夫霍去病之志灭匈奴祖逖之誓清中原此疆场之臣之所谓忠诸葛亮之经事综物陶侃之运甓惜陰此疆场之臣之所谓勤臣不敢不策朽磨钝图报陛下万分一臣淵惶惧頓首頓首淳佑十年十二月下浣资政殿学士大中大夫沿江制置使充江南东路安抚使马步军都总管兼营田使兼知建康军府事兼管内劝农使兼行宫留守节制和州无爲军安庆府兼三郡屯田使金陵郡侯食邑一千三百户食实封一百户臣吳淵拜手稽首謹言

【闕】在忠实不欺之堂之右

安抚司金厅在西厅之西【详见安抚司】

制置司金厅在仪门之东【详见制置司】

府都金厅在仪门之西

鎮青堂在府廡之东北其上爲鍾山楼其後爲青溪道院木犀亭曰小山菊亭曰晚香牡丹亭曰锦堆芍药亭曰驻春皆在堂之左叠石成山上爲亭曰一丘一壑下爲金魚池亭曰眞愛其南爲曲水池亭曰觴咏又其西爲杏花村桃李蹊亭曰种春竹亭曰深净梅亭曰雪香海棠亭曰嫁梅皆在堂之右青溪一曲环其前左有桥通水乡名小垂虹右有桥通锦绣堂榜曰藕花多处皆郡圃也其堂之奥榜曰紬书景定修志其中故名堂之东便门通青溪道中

西花园在安抚司金厅右马公光祖改爲惠民药局看窗二所其一在西花园之东南临御街榜曰近民马公光祖改爲军装局其一在嫁梅亭後临东虹桥

通判厅

国朝会要置诸州通判各一员西京南京天雄成德等州各二员江宁府初置一员嘉佑中审官院言西京北京荆南江宁府等并是京府及安抚使都钤辖分领州镇其通判今後并以知州资序人差充其後视西京等例增置一员分东西二厅其後又添差一员以朝士充是为南厅今东厅在府子城内之左西厅在子城内之右南厅在子城外之西南各有题名

东厅壁记官有丞辅尚矣于事大从其长小则专达所以别长貳正名体也秦初置郡则有丞汉以来治中别驾隋唐司马长史郡赞治名官殊所以佐守一也粤我艺祖懲藩鎮弊置通判以分州权事无所不预至得按察所部意若使之权任与均器能相用设施同虑休戚一体非

复余长贰比事久而殊意寢非初因均齐之力立嫌偏之势佐其长而不能使其迹不疑于长于是有不敢任事者则以丞负余为解惟金陵不然居守率重臣鉅人无偏与嫌疑竞不生上佐帅郡从事日至签事厅鉅细归程督视他州第以香矾茶盐经总制为事所于兵民赋役听断占位书惟谨而不预知其故者絶不同初盖独员继乃增置故东西对峙为倅两厅其曰东厅者初置员也建炎绍兴初师兴应百须此官号繁剧後虽屯重戍而王人振粮道东倅职兼审计军稍而已无他调度事尝少省矣自北鄙绎骚兵既休而岁洊饥淮民流至府下以万计课廩给条赈揅策弭盗是不一端开封郑公镇以秘阁来适丁斯时鸡初鸣明烛坐公所笔不及停虑不敢暇佐治之劳几与关决大邑比而公以四姓之英天分高薰蒸不凡动有典刑处之常裕如暇日阅厅壁旧记虑侵梓易漫刻着于石不以志行位下且不在能言之流俾书其端夫人惟力闲暇而後心和平心和平而後设施有绪公于倥偬不暇之际而能去苟且为悠久非材有余能尔耶昔志行大父南渡初倅是邦凡四寒暑供军尝殫劳旧记顾軼其名岂岁月在追纪以前故耶兹不敢求附于书独叙陪都贰车体异于他郡而事夥于今日者如此且见公能以易处之使来者有考焉嘉定二?长至从政郎总领淮西江东军马钱粮所准备差遣蒋志行记

秦规【右朝散郎绍兴八年二月到任十年三月内任满】

邓邦宁【左朝散郎绍兴十年三月到任十二年阙月任满】

蔡佑【右宣教郎绍兴十二年四月五日到任十四年四月初五日任满】

张敏功【右朝奉大夫绍兴十四年四月初六日到任十六年四月初六日任满】张颀【左朝奉大夫绍兴十六年四月初十日到任十八年四月初十日任满】

葛与时【右朝散郎绍兴十八年四月十二日到任十九年五月内召】

黄兑【右朝奉大夫绍兴十九年七月到任二十一年八月二十五日任满】

徐璞【右奉议郎绍兴二十一年八月二十六日到任二十二年十月十四日任满】王宾【左奉议郎绍兴二十三年十月十五日到任】

杨云【左承议郎绍兴二十五年五月十四日到任二十七年六月初七日任满】

周淙【右奉议郎绍兴二十七年六月六日到任二十九年八月二十三日任满】

苏师德【右朝奉大夫绍兴二十九年八月二十二日到任三十一年改除阙平茶盐公事】

葛祺【右通真郎绍兴三十一年七月二十三日到任隆兴二年正月一日任满】

吕正己【右朝奉郎隆兴二年正月一日到任当年六月二十五日改差知无为军】张维【左朝奉郎元系添差隆兴二年六月二十五日填吕正己阙乾道元年三月十五满】李大亨【右朝奉郎乾道元年三月十五日到任三年四月十三日任满】

严焕【左承议郎乾道三年六月十八日到任五年六月二十五日任满】

任元恺【右承议郎乾道五年七月初十日到任六年四月初十日改差主管合州崇道观】秦渊【左朝散郎乾道六年四月三十日到任八年四月三十日任满】

季璧【右朝请郎乾道八年六月十二日到任淳熙二年二月初三日任满】

钱徽之【朝请大夫淳熙二年二月初三日到任淳熙四年三月初八日任满】

王复【朝散郎淳熙四年三月初八日到任淳熙五年八月初八日致仕】

陆静之【朝散大夫淳熙五年十二月十四日到任淳熙八年闰三月初一日任满】范栋【承议郎淳熙八年闰三月初一日到任十年四月初五日任满】

洪遂【承议郎淳熙十年四月初六日到任十一年十月转朝奉郎十二年八月二十五日满】詹承宗【朝奉郎淳熙十二年八月二十五日到任淳熙十四年八月初十日转朝散郎】李谊【承议郎淳熙十四年十二月十五日到任】

高特【朝散郎淳熙十六年十月十四日到任绍熙二年十月阙日任满】

毕芾文【朝散郎绍熙二年十一月二十一日到任三年二月十一日转朝请郎绍熙四年十二月二十七日满】

范成绩【朝奉大夫绍熙四年十二月二十八日到任】

朱赞【奉直大夫庆元元年八月二十七日到任】

连逢辰【朝奉大夫庆元二年十二月二十二日到任庆元五年正月二十二日任满知英德府】郑师尹【朝奉郎庆元五年正月二十三日到任嘉泰元年正月三十日任满】

邹补之【朝奉郎嘉泰五年二月初一日到任当年九月二十五日致仕】

傅公邵【朝奉郎嘉泰二年二月十四日到任嘉泰四年三月初三日任满】

高得全【朝散郎嘉泰四年三月初三日到任五月转朝请郎开禧二年四月任满知黄州】
赵善镗【朝请大夫开禧二年四月二十日到任次年正月十六日致仕】

尤棐【朝奉郎开禧三年五月十八日到任嘉定二年五月十八日任满知衡州】

郑镇【承议郎直秘阁嘉定二年五月二十一日到任至四年五月二十一日任满】施诚一
【嘉定四年六月十七日到任嘉定五年十二月二十一日终】

张宗泌【朝散郎嘉定六年四月十一日到任至嘉定八年十二月二十七日任满】吴钢【
承议郎直宝谟阁嘉定八年十二月到任嘉定九年五月初九日改除太社令】潘燠【奉议
郎嘉定九年十二月到任至嘉定十一年八月特改差通判临安府】

林叔诚【奉议郎嘉定十一年十月十四日到任十三年十二月二十八日任满】沈杲【宣
教郎嘉定十三年十二月二十八日到任十四年四月十四日致仕】

尤燠【通直郎嘉定十四年十一月十四日到任至嘉定十六年十二月初六日任满】王澹
【朝散大夫嘉定十六年十二月初七日到任至宝庆二年二月初九日任满】赵崇慤【朝
请郎宝庆二年二月初十日到任至绍定元年四月十三日任满】

钱显祖【朝奉大夫绍定元年四月十四日到任至当年十二月二十四日致仕】吴焯【朝
奉大夫绍定二年四月到任三年二月特差兼沿江制机四年四月就任差知高邮军】楼樾
【朝请郎绍定四年七月到任五年闰九月转朝奉大夫六年九月初十日任满】卫湜【朝
奉郎于绍定六年九月初十日到端平元年五月二十四日改差知全州】赵希珣【朝散郎
端平元年十月到任二年七月转朝请郎八月差监行在左藏东库】吕好问【奉议郎端平
二年十月到任三年二月因赏转承议郎四月转朝奉郎嘉熙元年十

月除籍田令兼沿江制置使司参议官嘉熙元年十一月初六日替】

周棗【朝散郎嘉熙元年十二月初六日到任嘉熙二年闰四月二十二日致仕】

薛坦【朝散郎行太社令嘉熙二年五月到十月除军器监簿仍旧通判三年八月转朝请郎
三

年六月除军器监丞兼都督军马行府主管机宜文字】

赵希畚【朝散郎嘉熙四年正月到任淳佑元年八月二十一日罢任】

费伯英【宣教郎淳佑元年十一月到任二年六月内坐奉赃吏论祠】

娄体仁【奉议郎淳佑二年八月到任三年三月转承议郎四年】秦九韶【通直郎淳佑四年八月到任十一月丁母忧解任】

赵希淦【朝奉郎淳佑五年三月到任因赏转朝散郎七年四月满】

陈梦龙【淳佑七年四月到任九年四月得官交替】

江华【淳佑九年四月到任十年六月差充江东帅参】

沈璧【淳佑十年十一月到任十一年十月转朝散郎十二年二月阙日随司解任】范庆家【朝奉郎淳佑十二年三月到任十一月阙日差知循州】

韩燮【通直郎淳佑十二年十二月到任宝佑改元三月兼分差审计司二年九月转奉议郎十

二月任满辟充江东添差帅参】

陈□【朝请郎宝佑三年三月到任五年二月转朝奉大夫四月十五日满】

杨珪【朝散郎宝佑五年四月到任开庆元年四月制割差权安庆府六月初三日满】李逢魁【朝散郎开庆元年六月初三日到任】

张士逊

西厅壁记厅壁有记古也建康为今留都地重事夥倅贰治所在戟门之外西东对峙余承乏于兹首问旧政而西独未之闻维昔建一官而分是职前英後杰固不乏人绍兴戊午李公宏被荐入台代之者宗子赵公略见于东厅之记自时厥後无从稽考岂旧有碑而偶不存耶抑因循而未克建立也于是询访耆老得前政姓名自戊辰沈公大有而下凡二十有九人其到满岁月屡加搜求无能知者因念史之阙文自古而有春秋夏五郭公之书是矣敢以史笔之法书其可知者见于左方庶几後來者有所考云庆元戊午孟夏望日江陰何武仲记

沈大有【承议郎绍兴十九年在任】

史俟【朝奉郎】

梁审礼【阙大夫】

史琮【中阙大夫】

李衡老【朝郎】 奉

邢孝肃【承议郎直秘阁】

张郯【宣教郎】

刘子昂【朝请大夫】

方璫【承议郎】

路申中【承议郎】

梁季珩【宣教郎】

何几先【奉议郎】

周枢【朝请大夫】

潘恕【朝散郎乾道六年在任】

郑复【朝请大夫】

冯田【承议郎】

程行敏【朝奉郎】

张埏【承议郎】

姜凯【承议郎】

陈骥【朝奉郎】

高昱【宣教郎淳熙八年十月到任】

薛琛【朝奉郎淳熙十年十月二十二日到任】

汪憺【朝奉郎淳熙十一年八月二十六日到任】

蔡理【朝请大夫淳熙十三年十月初三日到任】

朱致民【承议郎淳熙十五年十一月初三日到任】

廖俟【朝请郎绍熙元年十一月十五日到任】

林光祖【朝奉郎绍熙三年十二月二十四日到任】

王万枢【朝散大夫绍熙四年七月二十八日到任】

林致【承议郎庆元元年八月初七日到任】

何武仲【朝奉大夫庆元二年十二月二十二日到任】

陆相【朝奉郎庆元四年十一月二十七日到任】

汪穢【朝请郎嘉泰元年三月初四日到任】

何洪【承议郎嘉泰三年三月二十一日到任】

翟□【承议郎嘉泰三年六月二十八日到任开禧元年七月十七日任满得替】

李柁【朝奉大夫开禧元年七月到任三年八月因赏转朝散大夫三年九月初一日任满】

张维【承议郎开禧三年九月到任嘉定二年十月阙 满替】

莫秘【朝请大夫嘉定二年十月初八日到任嘉定四年十一月初六日满】

陈章【承议郎嘉定四年十一月初六日到六年?九月勅差提辖行在权货务都茶场建康府置司】

李涣【朝奉郎嘉定六年十二月到任八年十二月转朝散郎二十一日满】

曾耆年【嘉定八年十二月到任九年六月转朝散郎十年十二月任满】

孙仁荣【嘉定十年十二月到任十二年十二月任满】

赵汝玺【嘉定十二年十二月到任】

彭耕【嘉定十四年三月二十八日到任】

赵汝靓【嘉定十六年三月二十四日到任】

汪绎【宝庆元年四月到九月转朝请郎三年四月任满绩差知兴国军】

沈柔孙【宝庆三年四月二十七日到任绍定二年四月三十日任满】

汪阐中【绍定二年四月三十日到任】

汪文举【奉直大夫绍定四年六月到任十二月割差权和州绍定五年九月初七日回任】

卫价【朝散郎绍定六年六月十一日到任端平二年二月初二日满任】

唐璘【朝奉郎端平二年二月到任至三年十月初一日除监察御史】

楼扶【宣教郎端平三年十一月到任十二月转通直郎兼沿江制机嘉熙元年九月丐祠离任】林宜孙【承议郎嘉熙二年四月十七日到任十月十二日丁父忧去】

丰云昭【通直郎嘉熙二年十二月到任嘉熙三年三月改添差通判临安府】

朱嵘【承议郎嘉熙三年四月初七日到任至淳佑元年阙月阙日满替】

盛文昭【通直郎淳佑元年六月到任七月初三日离任】

史弥厚【朝请郎淳佑元年十一月到任二年七月初十日满】

陈允坚【奉议郎淳佑三年十一月与祠】

赵时鏞【承奉郎淳佑五年三月到任四月差监镇江府分司粮料院】

高衡孙【承议郎淳佑七年四月到任八年七月差干办行在诸司审计司】

虞?【通直郎淳佑八年八月到任十月转奉议郎九年四月权直州分司检阅官】王同祖【奉议郎淳佑九年十一月到任次年改添差沿江制司机宜文字】

叶隆礼【承奉郎淳佑十年十月到任至十一年二月改除国子监簿离任】

宋宗【宣教郎淳佑十二年八月到任至宝佑二年十月满】

何处任【承议郎宝佑二年三月到任五年闰四月初八日满替】

辛应中【朝散郎宝佑五年?四月到任阙七字 避亲离任】

叶溥【承议郎宝佑六年二月到任开庆元年四月转朝奉郎】

王起晦【通直郎景定元年正月十一日到任二年正月改差沿江制置大使司参议官行在
诸司审计司】

薛季弼【朝奉郎景定二年五月二十八日到任】

南厅壁记国家驻蹕钱塘而金陵为留都地望雄重东南会府莫先焉以旄钺出镇者率宰执大臣故别驾之选特重盖古河南少尹职也他郡别驾一人或二人此独视行在所又有员外置为三例以处廷绅补外者职清事简府公不尽吏之号方外司马人以为荣顾其创置岁月且深前人氏名漫不可考非阙欤宝佑戊午梁侯椅由太史氏为之锐欲考订砬石以俟会召还不果代者廖侯邦杰方摺摭故实俄迁他官去迨潘侯梦奇来乃踵成之求诸故府自嘉熙戊戌後得其氏名者仅十有四人悉疏岁月下方刻之坚珉阙典始备潘侯谕余俾识颠末余复之曰题名不可阙也抑名之不朽岂颢在是江州司马之职非厅壁一记则不传然其传也以乐天不以记否则唐之为司马者何独乐天千载而下磨灭谁纪士大夫自为不朽计可也潘侯曰善因并识之以告来者侯京口人大资政马公光祖镇金陵以其尝为尚书省检阅文字选辟云景定改元岁在庚申孟秋朔日文林郎宜差充沿江制置大使司干办公事吴季子记迪功郎建康府司户参军兼金厅袁充书朝散郎沿江制置大使司参议官孙吴会篆盖奉议郎宜特改差通判建康军府兼管内劝农营田事仍借绯兼沿江制置大使司主管机宜文字潘梦奇立戴宗昭【奉议郎嘉熙三年十二月十九日到任】

陈有成【奉议郎淳佑元年正月二十四日到任】

黄约天【朝奉郎淳佑二年九月初一日到任淳佑四年九月初一日再任】

费伯隆【通直郎淳佑八年三月十八日到任】

高斯复【奉议郎淳佑十年八月二十日到任至淳佑十二年二月改差池州通判】章墀【朝请郎淳佑十二年八月二十日到任】

潘骥【朝散郎宝佑二年九月二十七日到任至四年阙 月阙 日改辟添差江东帅参】何宗姚【承议郎宝佑四年八月初六日到任十二月准省劄与沿江制机汪洵之两易其任】汪洵之【通直郎宝佑五年八月二十一日到任至当年十月内除官告院】

汪立信【宣教郎宝佑五年十月十九日到任】

梁椅【宣教郎宝佑八年六月到任开庆元年三月除宗正寺簿】

廖邦杰【承议郎开庆元年二月改差仍兼淮西饷管三月除告院仍旧十二月改辟江东帅参】

潘梦奇【奉议郎景定元年正月二十七日到任十月转承议郎二年五月转朝奉郎】职官厅

职官三员一曰签书建康军节度判官厅公事廨舍在府门内之左通判东厅之南二曰节度推官廨舍在府门内之右通判西厅之南三曰观察推官廨舍在府门内之左签判廨舍之南各有题名

签判题名签幕号郡寮之长陪京大府又非他郡比其选任亦不轻矣若昔誉髦秀隽接踵而居是职不知凡几顾瞻四壁莫有纪其名氏使后来者漫然亡所考究兹非甚阙典欤余以嘉定甲申之秋充员于兹旁搜故牒推迹累政思欲辑为厅记力犹未给一日上元赵令尹时侨语余曰吾县有题名之碣镌勒遍矣将伐石以续丐君为之文堂并采其石以为君赠可乎余曰诺厥既得兹石于是命工以刻之然繇之者不可得而详近自三十年来有替上始末之可考者仅得大魁傅公而下凡十人遂列于石虽不能尽述乎既往抑将有开於方来云宝庆初元岁在乙酉立秋日朝奉郎签书建康军节度判官厅公事赐绯鱼袋劔津邓文举仲文谨识

傅行简【承事郎嘉泰三年十二月内到任至开禧三年五月二十一日召赴行在】楼枏【通直郎开禧元年七月十一日到任至开禧三年九月二十三日满替】

蔡震【承议郎开禧三年九月二十四日到任至嘉定三年二月十一日满替】

朱元龟【承议郎嘉定三年二月十二日到任至本年五月初七日致仕】

赵与慤【承务郎嘉定四年闰二月十七日到任至五年十月内丁父忧】

王师闵【承事郎嘉定七年二月初十日到任至九年正月初四日致仕】

袁甫【承事郎嘉定九年三月十三日到任至十年五月二十六日召赴行在】

何叔智【承议郎嘉定十年十二月二十六日到任至十三年二月二十一日满替】叶畴【朝散郎嘉定十三年二月二十二日到任至十五年六月初三日满替】

石孝睦【承议郎嘉定十五年六月初四日到任至十七年七月二十五日满替】邓文举【承议郎嘉定十七年七月二十六日到任】

王修【通直郎宝庆二年八月十二日到任至绍定元年九月初五日满替当月初七日准省割

差充六部提领酒库祈主管文字】

余元虞【承议郎绍定元年九月初五日到任】

毛汝大【奉议郎绍定三年十月十二日到任至绍定五年十二月二十一日满替】吴当可【朝请郎绍定五年十二月二十二日到任六年九月二十七日准省割差充沿江制

置使司主管机宜文字】

潘晋孙

叶之瑞【通直郎端平元年十二月初二日到任至嘉熙元年阙月阙日满替】李尚【朝奉郎嘉熙元年四月二十六日到任次年九月二十五日致仕】

贺赅【嘉熙二年十二月十四日到任淳佑元年四月初六日离任赴班】

沈时中【淳佑元年四月初七日到任至淳佑三年四月二十八日满替】

赵汝玖【朝散郎淳佑三年四月二十八日到任】

陆祀【承议郎淳佑五年八月二十二日到任】

黎九德【宣教郎淳佑八年四月初五日到任】

施沂【承宣郎淳佑九年四月十五日到任】

曹之格【承事郎淳佑十年九月初六日到任至十二年十月十三日改知上元县事】赵与濂【奉议郎淳佑十二年十月初八日到任至宝佑二年十月二十六日准省割差通判

建康军府事赐绯鱼袋】

高纯嘏【承务郎宝佑二年十二月初八日到任至宝佑四年七月十二日致仕】于庭兰【承事郎宝佑四年十一月十三日到任】

王文子【宣议郎开庆元年二月二十一日到任】

刘曾【奉议郎景定元年十二月二十六日到任】

节推题名官无崇卑职有更代所以识名氏纪岁月使後之视今犹今之视昔示不忘也金陵帝王州节镇系焉南渡以来佩麟符而宅司牧者非宰辅则法从势隆位尊非他守比地广民夥非他郡比昌黎所谓元戎总齐三军之事统理所部之眈盖节度推官实得以赞裨焉信乎非閎辨通敏兼人之材莫宜居淳熙间赵公彦橐尝繇是官阶通显自时厥後类不乏贤而纪载之文独阙不着沆以庸虚承乏于此藐焉暇日因访耆吏得赵公而下凡十有一人会前官程君德臣复来司酒政以乙酉班通籍而行盛事也故乐与之综辑次第而鐫诸石若夫廨宇之将圯工役之未至则实以无他事力故不得以究一日必葺之意後之来者能以沆前之所叙者为功名勉以沆後之所歉者为交缔好则是记也不特为识名氏纪岁月而已也嘉定甲申中秋日儒林郎建康军节度推官程沆记

赵彦橐

宋览

赵善章

赵善象

赵善璉

李尉

蒋肃【开禧元年七月二日到任】

赵希闔【嘉定元年八月十六日到任】

钱莘【嘉定四年十月五日到任】

程德臣【嘉定八年十一月二十日到任】

王遵度【嘉定十二年正月十八日到任】

程沆【嘉定十六年二月二十四日到任】

虞允荣【宝庆二年三月十一日到任】

赵涿夫【绍定元年三月十七日到任】

强琪【绍定四年四月十四日到任】

赵汝静【绍定六年四月十四日到任】

罗叔韶【端平二年六月二十九日到任】

赵希臣【端平三年三月二十三日到任】

赵希□【嘉熙三年七月初五日到任】

汤通【淳佑二年四月初三日到任】

袁徽【淳佑六年七月十九日到任】

赵汝末【淳佑八年八月十二日到任】

杨继祖【淳佑十年十月初八日到任】

赵汝訓【宝佑元年十月十九日到任】

魏瑑【宝佑四年十一月初十日到任】

陈开先【宝佑六年十二月初一日到任景定元年十二月初一日赴班】

叶起翁【承直郎景定二年四月阙 到任】

察推题名建康古为王者之宅六朝南唐遗蹟具存高宗南巡驻蹕钱塘以是为陪都尝因视师临幸麟符留钥谋帅重于他镇非当代名位俱隆者不在兹选寮案亦不以轻授故每号为得士焉余乡人刘宗直叔向由庆元五年乙科为观察推官善于其职贻书求为壁记余闻是邦衣冠走集之地商贾辐辏军民杂揉宜乎官府日不暇给而幕讼最稀庭无留事幕府省文书几若道院然虽流风余俗其来有自非宾主多贤积而致此耶自绍兴七年赵君不藺而下得二十余人阅其名氏如丞相蒋公以文章着侍御萧公以风节显贰卿丘公入则为朝廷羽仪出则为郡国标表进用固未艾也去此而登臚仕者又不一此官之不轻如此宗直勉旃其益摠婉画以佐而长以昌贤业以继诸名公之轨躅岂惟所居之官大抑乡党与有荣焉嘉泰三年冬至日显谟阁直学士通议大夫提举江州太平兴国宫奉化县开国子食邑五百户四明楼钥记赵不藺【绍兴七年到任十一年任满】

马昇之【绍兴十一年到任十四年任满】

张滋【绍兴十四年到任十七年改官】

陈与善【绍兴十七年到任十九年十月致仕】

赵公衡【绍兴十九年到任二十三年任满】

张舜由【绍兴二十三年到任二十五年任满】

蒋芾【绍兴二十五年二月到任二十七年六月丁忧】

萧之敏【绍兴二十七年九月到任三十年满】

曾宗镇【绍兴三十年五月到任隆兴元年任满】

赵伯衍【隆兴元年三月到任乾道二年四月任满】

丘密【乾道二年四月到任五年四月任满】

褚意【乾道五年四月到任八年任满】

王以宁【乾道八年十一月到任淳熙三年满任】

郭继道【淳熙三年三月到任六年任满】

刘慤士【淳熙六年四月到任九年任满】

白仲举【淳熙九年五月到任十二年任满】

赵善纪【淳熙十二年六月到任绍熙元年任满】

赵崇礼【绍熙元年闰五月到任二年致仕】

李埴【绍熙二年九月到任绍熙四年致仕】

赵善惠【绍熙四年十二月到任庆元元年九月丁忧去】

赵彦泉【庆元二年三月到任庆元五年七月任满】

陈公庆【庆元五年七月到任嘉泰元年十一月丁忧去】

刘叔向【嘉泰二年三月到任开禧元年四月三日任满】

赵黔夫【开禧元年四月三日到任】

俞道一【嘉定元年四月初六日到任】

袁肃【嘉定二年五月二十八日到任嘉定五年七月初三日任满】

马壬仲【嘉定五年七月初三日到任嘉定六年五月阙 日任满】

赵师净【嘉定八年九月到任】

赵彦楠【嘉定十年四月二十三日到任嘉定十三年五月四日任满】

鲍克正【嘉定十三年五月四日到任】

赵汝然【嘉定十六年三月十一日到任】

吕樗年【宝庆二年九月十一日到任】

江魁祖【宝庆三年十二月十九日到任绍定四年五月二十二日任满】

赵汝□【绍定四年五月二十二日到任端平元年七月阙 日任满】

张槩【端平元年七月二十八日到任嘉熙元年七月二十八日任满】

赵善比【嘉熙元年八月十七日到任】

张应星【迪功郎嘉熙四年四月二十四日到任】

林溥【从事郎淳佑三年十二月二十一日到任淳佑五年正月十三日陈乞避亲离任】王
肖翁【承直郎淳佑五年六月初六日到任】

叶春【从政郎淳佑五年十二月十五日到任至淳佑八年二月初五日任满】

赵与进【从事郎淳佑八年二月初六日到任至淳佑十一年五月初二日任满】

制使姚公希得任内创置府幕官廨宇一所本府职官阙廨舍景定四年五月二十五日买内西夹道民庐一区为屋一十四间永充官宇厥直一万三千五百贯今添差节推居焉

景定建康志卷二十四

卷二十五

钦定四库全书

景定建康志卷二十五 宋 周应合 撰

官守志二

诸司寓治

古今牧守更代已具年表皇朝诸司置使或兼守或以守兼领或不兼守而寓治于府或非寓治而府遥隶之以某年置以某年省以某年复官制沿革皆宜有考图之左方如指诸掌各司大要志于图後

<史部,地理类,都会郡县之属,景定建康志,卷二十五>

<史部,地理类,都会郡县之属,景定建康志,卷二十五>

都督府 【同都督 督视】

唐武德二年以江宁府为扬州东南道行台置尚书省七年改行台为大都督府领上元金陵句容丹阳溧水溧阳六县襄邑王神符检校扬州大都督九年徙江北治江都

国朝绍兴二年四月二十七日制以吕颐浩特进尚书左仆射同中书门下平章事兼知枢密院事都督江淮等路诸军事参谋官二员参议官二员主管机宜文字二员书写机宜文字一员干办公事官十员准备差使文臣十员准备差使大小使臣各二十员准备将领使唤十员参谋官差户部尚书李弥大秘书少监傅崧卿参议官差直显谟阁李承造左宣教郎刘宁止随军转运使差左司郎中姚舜明崧卿除徽猷阁待制舜明宁止除秘阁修撰承造除直龙图阁 闰四月四日上谕吕颐浩曰卿耆艾有劳今总都督之任方以大事委卿不当复亲细务昔诸葛孔明罚二十以上皆亲之司马宣王以为必不能久唐太宗谕房杜闻公听受词讼日不暇给安能助朕求贤乎卿自今凡事系大体者裁决其余细务阔略可也 八月吕颐浩言逐路如有溃散军兵无归百姓散走藏匿乞令招收使唤遂旋具数申奏仍乞降庚牌旗榜二十副付颐浩招收使用从之 七月二十四日徽猷阁待制都督府参谋官权主管本军事傅崧卿言奉诏吕颐浩赴行在奏事职事令崧卿权行主管颐浩见任宰相领都督之职元降指挥於今来事体有窒碍合行申禀行移文字除三省枢密院自合依旧用状六曹用独衔申状除兵将官及属部官司仍用劄子外余并用公牒其牒以主管府事爲名一逐路应统兵大小将帅并许听节制一欲乞内江东安抚大使司一路事务崧卿自可与李光会议商量参决余两大使

司并余路分并乞且从逐路大帅依已得便宜指挥一面施行其都督府元留丁诸头项人马未有降下聽崧卿节制明文一元降指挥许从便宜施行乞具奏今来权行主管府事即难以行用乞从申奏或申都督

乞详酌施【阙五字】下人马权令传崧卿节制余并从之 九月二十八日吕颐浩等言都督府申请画一指挥见遵依施行外今来同都督诸军事官一员见欲总兵起发前去建康府措置缘画一指挥内止许辟差参议官二员干办官十五员准备差遣文臣十员今来防秋是时全籍官属分头協力委是数少除同都督官许差本宗有服书写机宜文字官一员干办官五员准备差遣文臣十员其辟差请给理任等并依已得指挥从之 三年正月八日诏差户部侍郎姚舜明前去建康府将应干都督府承朝廷支降并诸官司起发到及本府应干取拨钱物粮斛并仰姚舜明专一总领仍于都督府选差有风力谙晓钱谷属官四员充粮料审计司监官其应干都督府管下官兵帮勘请给等并经由户部粮审院依条批勘支给其江东路转运司合应副都督府钱粮事务并就近聽户部措置施行时以都督府请依旧例差户部长贰一二员前来专一总领大军钱粮故有是诏 四月七日三省言已降指挥刘光世建康府置司所有都督府合移於镇江府照应两军机务诏都督府移司镇江府 五年二月十二日制以左通奉大夫知枢密院事张浚特授左宣奉大夫守尚书右仆射同中书门下平章事兼知枢密院事都督江淮诸军事六年十一月二十日诏都督行府江上措置边事一行官吏军兵诸色人等备见勤劳可令张浚等第保明以闻 隆兴元年六月十四日诏少傅枢密使都督江淮军马张浚特降授特进依前枢密使江淮东西路宣抚使 七月四日诏江淮都督府官属并改充江淮东西路宣抚使司【初浚以符离之役降特进上曰罢枢密使宰臣陈康伯奏曰如此却是罢政上曰可改都督府爲宣抚使至是参赞诸军事陈俊卿奏降官示罚古法也亦其自请改都督府爲宣抚司恐人情观望号令不行上曰此未可也及殿中侍御史周操论官爵者人臣一己之私有罪随即贬削乃分之宜若都督之名实国家用人之权柄岂得亦行通减上曰此论甚善可与复都督府康伯等奏已有指挥诏浚之子枋候到日降指挥上曰善继又曰不必候枋来】八月八日宰执进呈降授特进枢密使张浚见措置江淮军马理宜增重事权诏可复都督江淮军马 九月二十一日特进尚书左仆射同中书门下平章事兼枢密使汤思退特授都督江淮东西路建康镇江府江陰军江池州屯驻军马余如故二十三日太傅寧远军节度使杨存中可除同都督江淮东西路建康镇江府江陰军江池州屯驻军马 二十七日汤思退杨存中劄子言臣等蒙恩除都督已降指挥以江淮都督府爲名臣等同意如同在置司去处只合用都督府印其奏状榜示同行劄书或分在两处亦合以江淮都督府爲名合用印通行繫銜仍於阶下声说【行在或出使】庶得事权归一从之 二十八日汤思退杨存中劄子又奏臣等契勘昨孟庾韩世忠充宣抚使副日两员共差置官属三十员张浚独员都督差过官属二十二员使臣监当官在外今来臣等系两员今参酌裁减差置下项参赞军事元差二员系从官已行除授参谋官乞不差置今乞差参议官主管机宜文字主管书写机宜文字各二员干办公事四员准备差使六员点检主管书写文字共三十人分拨一半先次随逐存中前去从之 十月一日诏中书门下省检正诸房文字兼权户部侍郎王佐充都督府参谋官从汤思退之请也 二十三日汤思退言臣备位宰相被命督师惟敌人虽已议和而奉使尚未过界屯边之兵数十百万当此霜严不无暴露之叹臣欲择日同属官起发至淮上宣布德意抚劳师徒从之 二十七日汤思退劄子奏臣契勘先请降到犒赏金银五十万贯已附杨存中先

次将带前去乞更支降五十万贯乞於左藏南库支降见桩杂本银内支一十二万两并见在金内支三千两从之十一月六日诏朕屈已遣使欲安军民而敌情变诈遽尔称兵所有魏杞等将带礼物金银正帛可令都督府拘收及於左藏南库支拨见钱三十万贯令都督江淮军马汤思退将带前去并充犒军支用七月诏王之望可除同都督江淮军马汤思退依旧带都督可只在朝差王之望充督视限两日起发既而王之望辞免从之同日汤思退言恭奉圣旨令臣依旧带都督在朝窃缘臣备数宰相既预军国之任今来不去淮上不应复领都督职事欲望圣慈特令解罢其一行官吏军兵等日下放散各归元来去处

九日诏同都督江淮东西路军马杨存中可特授都督江淮东西路军马十四日诏昨汤思退请降到激赏金银官告等并拨赴杨存中充激赏支用令枢密院差使臣二员管押前去乾道元年二月六日都督江淮军马杨存中言边境绥靖臣依奉圣旨赴阙奏事所有江淮都督府伏望特降睿旨立限结局应诸军功赏疾速保明闻奏淳佑七年四月十八日制以通奉大夫知枢密院事兼参知政事长沙郡开国公赵葵可特授枢密使兼参知政事督视江淮京西湖北军马依前通奉大夫长沙郡开国公加食邑一千户食实封四百户续奉御笔兼知建康军府事行宫留守江南东路安抚使五月二十六日就镇江府交割职事

八年二月招泗获捷五月奉圣旨转三官葵奏曰边头事势紧急督府之建不容不权一时之宜事势稍缓便当结局盖将士有支犒之费官吏有廩给之用况其他费用又倍寻常臣自被命开府以来仰体国用匱乏凡朝廷科降银绢钱米一毫不敢妄费而支用已觉瑟缩又以支犒泗城及断桥功赏一项爲数计三百余万金银牌器不预焉若不早行结局其何以支况今诸郡城壁坚固将士勇悍敌人又经摧败之余度无缘尚如前日怀轻视之心以制臣任固圉之责朝廷又每事应接尽足以屏蔽藩翰所有督府乞行结局欲望圣慈宣谕大臣检会臣累次奏请早赐施行如此则不惟朝廷无度外之费且使诸边阍臣得以一意任责其於国事实非小补诏答曰朕烛知边情念不可不先事而备乃授督钺总师于卿位冠枢臣身膺隆委营度上下流不以暑寒辍日讨军实而申儆之表淮里江气势联合固已得胜算矣彼犹袭前迹而动负恃其衆辄大入闯我泗城睨我盱楚边吏以遽告赖指授孔夙诸将士争奋勇鏖击敌震骇不能支既又螳聚南北堦梯桥筑甬欲爲久驻计我师急攻竟使失势溃以去连年寇犯边未尝一大治无所惩今敌人败衄徙靡庶其知憚我国乎卿之功甚伟覽疏洵致解严且请以兵费爲虑义不辞难忠于体国此卿素所蓄积者歌出车劳还岂非朕所欲然狡谋叵测武备当益谨及此时筹思永图若稽田厥既蓄勉终其亩幸爲朕少留意以成卿勲名顾不美欤葵又奏自寇退之後屡具奏关乞早颁结局之命今天準回降臣亦以专委督机朱申前去泗上核实功赏放犒将士未见支遣钱物实数不敢叠冒天聽今月初一日朱申已回幕府一一出豁了当兼据朱申体探事情敌人自败衄之余多已北遁目今天气向热春水日生所谓挠耕践麦之谋未必再举督府结局兹惟其时臣区区愚虑此去秋风已无多日正不可因寇退而忘後图若督府结局则边阍必能专任其责不然则彼此含糊徒费时日其於边备尤关利害欲望圣慈检照臣累次奏请特降结局指挥容臣退归田里少休神观他日或有?难任使谨不敢避五月初六日宸翰赐葵令带职入奏十二月二十八日葵奏曰去岁敌骑深入两淮绎骚由春涉夏愈无忌憚误蒙圣断俾臣视师臣受命以来亟考军政外而城守之疎略内而舟防之简陋悉力措置大略就绪而敌之重兵已聚淮泗仰凭国威随就剿却事定之後累十数疏告陛下乞还田里温诏勉谕至于再三御笔许以来春臣时以诸事尚欠绵密亦恐前劳俱废所以更不固辞一年之间凡关备御知无不爲事粗靠实自念忝备大臣不敢纖悉而言今

幸三边俱无动息且新春在目?纵有哨骑所在足可支吾臣自揆何人叨窃已过但期粗了国事自来不解身谋庙堂乌可以久居衰病委难于入奏兼臣两年督府除元科降之外并不曾再科一钱一粟勉强撑拄至今若不结局委成徒费除已见行攢类结局文字才候春哨不入便当拜疏乞祠并督府印缴奏 九年正月癸奏曰督府两年支费浩瀚屡欲陈乞科降而不敢若结局稍迟则用度愈多立见匮乏乞速降结局指挥 二月又奏今来春序过半边声帖然虽据谍者所报如三汉口如蕲县如蔡州皆有些小寇马往来不过张耀虚声防吾攻掠况自二月以来风雪雷雨淮水骤涨茫洋如海水面至有阔二三十里者据诸处报水势逐日增长敌虽有武骑千羣无所用之目前决可保其无他况行府一应文书钱物军马器械之类悉已攢类具成帐册除合寄留建康府外所有元来科降银绢官告度牒并不曾支动分毫及有用不尽官会见已差从事郎新除武学谕兼督视行府准备差遣胡大昌武功大夫合门宣赞舍人特添差江南西路马步军副总管江州驻劄仍厘务督视行府计议官兼都总辖许国定管押装船起发解还朝廷作院已行住工军马已行区处外别无不了事件兼以诸司明知督府结局行移往来已多解体见行劄下令制司及沿边诸郡各自任责措置备御若结局指挥尚复悠缓则人情事体愈见涣散关系甚重谨再具奏闻欲望圣慈特降睿旨日下结局容臣归老田里实拜隆天厚地之赐所有建康府合行遴选守帅并乞宣谕宰臣速赐施行其督府一行官属昨具奏关乞与在外合入差遣欲望圣慈速赐处分 闰二月制授癸金紫光禄大夫右丞相兼枢密使长沙郡开国公加食邑一千户食实封四百户第七次辞免乞畀祠官制除观文殿大学士醴泉观使兼侍读仍奉朝请

宣抚使

皇朝置宣抚使始于咸平宣抚置司建康则始於绍兴绍兴元年五月一日诏宜令江南东路安抚大使吕

颐浩兼充寿春府滁庐和州无爲军宣抚使 五月十六日被旨宣抚司合行事件并依吕颐浩昨住江东安抚大使日所得画一指挥施行每岁拨钱四十万贯米二十万石 七月十六日江南东路安抚大使兼知建康府充寿春府滁濠庐和州无爲军宣抚使李光言合辟参议官二员已辟宗颖外更乞差左中大夫盛旦从之

九月二十四日诏太尉武成感德军节度使韩世忠充江南东西路宣抚使 三年三月二十七日诏太尉武成感德军节度使神武左军都统制充江南东西路宣抚使韩世忠可特授开府仪同三司充镇江建康府淮南东路宣抚使 四年三月二十四日宣抚使韩世忠言昨来申所属官乞依旧例其参谋官系与转运使副叙官参议官与知州军朝请大夫已上叙官机宜干办公事并依发运司主管文字叙官准备差遣与签判叙官今准朝旨宣抚司参谋参议官与提举茶盐官叙官机宜干办与通判叙官窃虑属官叙位不应降等兼绍兴令发运司主管文字干办公事在所部通判之上今来宣抚使司机宜干办公事却与通判叙官显见宣抚使在发运使之下诏参谋官系知州资序人与提刑叙官参议官系知州资序人与转运判官叙官机宜干办公事并依发运司主管文字叙官 六月一日镇江建康府淮南东路宣抚使韩世忠言乞依昨任江南东西路宣抚使日已得画一指挥行移除安抚大使外并用劄子从之 七月三十日诏镇江建康府淮南东路宣抚使司行移本路帅司用公牒所部县并用劄子十一月

二十日江南东路淮南路宣抚使司言本司

官属内干办公事三员准备将领五员准备差遣准备差使各五员缘今来事宜之际军事冗全要官属办集即今见有官属数少委是干当不前乞依韩世忠例添差逐色官属庶几易爲集事从之 五年正月十八日诏武成感德军节度使开府仪同三司充镇江建康府淮南东路宣抚使韩世忠除少保依前武成感德军节度使充淮南东路宣抚使镇江府置司 三月六日三省言刘光世韩世忠见充淮南西路宣抚使缘逐军见在镇江府太平州屯驻诏刘光世兼太平州宣抚使韩世忠兼镇江府宣抚使 三月十三日定江昭应军节度使开府仪同三司江南东路宣抚使张俊言本司参议官左中奉大夫直秘阁史愿见系添差通判严州欲望特赐改差平江府添差通判候交割了日乞令带行见任依旧权本司参议官将来事平日罢本司职事前去供职从之 六年十一月十四日诸路军事都督行府言朝廷今欲恢复中原所赖者正在诸大帅幕府尤要得人自兵兴已来士大夫一入军中便窃议而鄙笑之指爲浊流皆缘朝廷未加审择一聽其辟差故所用之人或坐罪废或报私恩或因应副或出干求贪利覓官略无去就之节有更十年而不退者如朝廷稍择贤才以重其选乞应军中属官悉以二年成资替罢立爲永格诏应宣抚司属官许本司奏辟或朝廷差除选人依旧三年外余并以二年爲任如愿留再任者聽本司申取朝廷指挥 十一年四月二十七日诏韩世忠张俊已除枢密使副其旧领宣抚等司合罢遇出师临时取旨逐司见今所管统制统领官将副已下并改充御前统制统领官将副等隶枢密院仍各带御前字入衙

四月二十八日诏韩世忠张俊宣抚官属并优与陞等差遣 绍兴三十二年七月八日【孝宗已即位未改元】张浚除少傅依前观文殿大学士充江淮东西路宣抚使建康府置司进封魏国公 十月二十九日江淮东西路宣抚使司言本司属官欲依四川宣抚司主管机宜文字与监司干办公事与知州序官从之 隆兴元年六月十四日诏张浚特降授特进依前枢密使江淮东西路宣抚使节制建康镇江府江陰军江池州屯驻军马试尚书礼部侍郎陈俊卿降授左朝散大夫充敷文阁待制参赞军事唐文若降授左承议郎尚书户部员外郎冯方降授左承事郎直秘阁查翥差充江淮宣抚使司参议官都督府官属并改充江淮东西路宣抚使司七月七日诏昨都督府进讨特许便宜行事今都督

府已罢应宣抚司军事并合闻奏取旨其前降便宜指挥更不施行

八月八日诏宣抚使张浚依旧都督江淮军马详见都督 十二月二十八日张浚言昨承恩降节制两淮後來改除宣抚都督江淮军马二年防秋偶免旷阙除臣与近上官属自不当陈乞所有臣随行官吏军兵并应办军前实有劳効之人欲望从臣保明比附前後宣抚司督视府等处月日体例特赐推恩施行从之

制置司

制置使自建炎始置初以安抚制置合爲一後析爲二或以制置兼安抚或以安抚兼制置或省制置并其事于安抚司近年专以制置司爲重而安抚司之事则甚简矣江淮制置或合爲一或分爲二又或以沿江制置兼淮西制置近年惟沿江制置仍旧常兼节制和州无爲军安庆府三郡屯田使其初有使有副使有大使後省副使侍从以下充使尚书以上充大使其兼

知建康府者已详于表今以制置司沿革大概志于左

建炎元年六月二十六日诏右司员外郎刘寧止除直龙图阁同提领水军沿江制置副使 闰八月一日诏奉议郎徽猷阁待制淮南西路制置使胡舜陟除沿江都制置使知建康府兼江南东路安抚使王义叔沿江制置副使 二年二月吕颐浩扈从至秀州除资政殿学士同签书枢密院事江淮两浙制置使引羸兵千余人守扬子江乃沿路召募溃散之兵得四五千人就鎮江府之北枕江下砦与金人对岸相持仅一月颐浩被甲乘轻舟时于江中往来督责军将官以舟济渡江北被敌逃归官员士庶军兵家小及选募敢死之士过江遇夜烧劫敌砦又分遣兵将官沿江上下招集溃兵金人北去朝廷命颐浩领江寧军府事 绍兴元年九月二十六日诏江东西湖南路上供钱粮久失措置夏秋二税上户拖欠不催下户受弊逐路盗贼尚衆至今招收未尽可差户部尚书孟庾带见任充江东路宣抚制置使其应于财赋拘催蠲放依条照赦施行务要寬恤民力其上供钱粮催促依限起发应贼盗当招收或掩击者并委相度措置条具闻奏 三年八月二十三日上宣谕宰执曰史正志条具舟师利害其间有可行者魏杞奏曰见史正志之论甚有理上曰欲早行措置蒋芾奏曰陛下将来要差大臣出使不若先遣史正志他时可爲参赞上曰便差知建康仍兼沿江制置使自建康至鄂渚舟师并令总之八月二十九日新除集英殿修撰知建康府兼沿江制置使史正志言契勘今沿江制置司除专一措置水军海船要爲久远利便之计所有合用印记今乞於礼部关借奉使印前去专充制置司使用所有剋差金厅一司官吏窃虑耗费财用今只就用安抚司金厅官吏兼制置司职事却乞复置省罢阙请给依安抚司属官例属官所带銜位称江东安抚司沿江水军制置司所有库务更不别置凡有修造船只教阅支费就用安抚司钱物并从之 四年三月十四日史正志言乞将到任後节省到钱内支拨见钱十万贯收系制置司水军赤历於出产木植州军收买板木就建康自置船场增造一车十二桨四百料战船相兼使用从之 六年以後省制置司至开禧二年六月复置以朝请大夫宝谟阁待制知建康军府充江南东路安抚使叶适兼沿江制置使三年二月十六日除宝文阁待制兼江淮制置使专一措置屯田 三年九月十四日以朝散大夫宝文阁待制知建康军府事江南东路安抚使徐谊兼江淮制置使 嘉定元年正月五日以资政殿学士通奉大夫知建康军府事江南东路安抚使丘密改除江淮制置大使兼知建康府 八月十四日以观文殿学士金紫光禄大夫知建康军府事江东安抚使何澹兼江淮制置大使其後龙图阁学士杨辅及龙图阁待制黄度宝文阁待制刘榘相继皆以知府安抚兼江淮制置使 嘉定十年省江淮制置使 十二年九月复置沿江制置使以中奉大夫宝文阁待制李大东爲之兼知建康府江东安抚使後因之绍定三年十一月十八日改沿江制置使爲江淮制

置大使赵善湘爲之四年十二月又改江淮安抚制置大使 六年七月以後复改爲沿江制置使李寿朋陈韓别之杰杜杲董槐赵以夫相继爲之惟韓加大使淳佑七年六月赵葵开督视府省制置司 淳佑九年正月督府结局复沿江制置司吴渊以端明殿学士充使兼知建康府江东安抚使其後王埜丘岳马光祖赵与?继爲之惟与?加大使 开庆元年三月资政殿学士马光祖自京湖制置大使改除沿江制置大使兼知府事江东安抚使 四月【阙】日準尚书省劄子备文思院申准尚书礼部符备準尚书省劄子铸造沿江制置大使司印一颗事本院除已遵禀指挥勒令人匠如法铸造一切了毕当官逐一点对得篆文并无差错所合由解赴

尚书省缴纳给降施行随状见到伏乞照会事右并封圆铜印一颗割送沿江制置大使司照
应交收讫申尚书省準此大使马光祖率参议官以下於五月初十日望阙遥谢祇受行用 九
月蒙古呼必赉领重兵偷渡浒黄州诏光祖进司江黄应援汉鄂景定元年三月寇遁江面肃
清光祖回司有诏獎谕赐金币寻进资政殿大学士职任依旧【详见年表】

制置司签厅记金陵古都会行阙在焉自昔国於江南而有志中原者未尝不以此爲根本我
朝南渡以来每遣重臣居留鎮守凡使命之出往往即是而开幕府意者地居江淮之咽恢拓
有几则可以暫驻銮辂指撝关河承平无事则可以谨护风寒蕃屏帝室固今天下之重镇也
粤自督眡宣威次第省并而沿江制置之名始建于开禧二年之七月待制叶公适首膺是选
越明年春易沿江爲江淮迨嘉定初元宣使赵公淳实爲制使而又以资政丘公密爲大使其
年夏并召还未阅月复以总饷李公洪区处制司事务又两月观文何公澹以知府行大使事
是後更代不絕嘉定十二年朝有分制之议阁学李公大东荐来帅守始复爲沿江制置使沿
江之名于是乎定然逆数剏司至於今无虑二十余载而宾寮无金议之舍文书无?藏之所宝
庆三年春二月先生自京口易镇开藩问俗之余首询诸司幕府所在畚之者曰某所爲帅某
所爲府制司则前是所无节制司则附庸制司虽官吏亦未尝有也先生喟然叹曰安有名爲
专阃而下行一郡江防之事职任兵机而曾无婉画奠居之地耶手疏其事亟闻于朝别爲节
制一司专官兼金议之职庙谟可之一日见败屋数十楹介于设厅之东偏问之则曰公使酒
库也因集寮属而命之曰糟丘靡密之务何得遂居于此盍爲我徙之丽譙之外以其地爲制
司议舍俾节制司附焉咸曰诺于是空其鉶礧一撤而新之东序西向大门宏启旁接府治所
以便谘询也东直南向危楼中峙名曰议事所以谐金谋也楼之下屋基博础户庭四辟拾级
而升者制幕之厅事也厅之陰朱门垺壁明窗而曲檻者制幕之燕坐也厅之左循除而下檐
牙高啄杰出乎修廊之上者节幕之厅事也深入十余步上爲复屋辟室如厅事之数东面而
虚旷者节幕之燕坐也极目连薨之表有亭翼翼奇葩怪石参错乎前修竹拂墙清流闯户者
两幕之圃也回廊曲屋区别牖分周环於左右前後者两司之吏舍也东廊之外列屋二十余
穹瓦层楼鳞次而角出者诸司之架阁库也以至皂隶候伺之所庖湍猥微之地洪纖小大莫
不各适其宜而咸备其次焉眡帅司若府凡金舍之素具者大有迳庭矣合而计之爲屋一百
四十楹作兴於宝庆丁亥十月二十八日竣事於绍定戊子三月初二日工以庸计凡二万四
千钱以缗计凡一万一千米以斛计凡九百五十无非撙节公费而爲之未尝请于朝也盖先
生天性冲澹雅意简编凡而宴游之事交馈之礼一切拒却而不疑冗蠹既蠲帑积日裕用能
费出于公而民不知有役役必计庸而人不知有劳真所谓不扰而办者既落成好问因率同
列请记其事先生曰务名之举余之所羞也故所至公宇之建未尝揭姓名于上栋间而况敢
爲文乎好问复固请曰一司厅之修废夫岂足爲先生重轻特弗可无以识岁月使来者知所
自始耳先生曰谗如是子盍自为之而吾无须也好问退而绎之夫运筹帷幄之中然後可以
决胜千里之外兵机固贵於密也而宾幕之无定所乌在其能密哉然则先生此举非徒美观
瞻而已也壮威重而已也处其中者必思有以副先生之望而後可用是历叙颠末姑以俟他
日大手笔之采择焉先生讳善湘字清臣濮园五世孙登丙辰进士第由淮西制置移京口六
年除理卿兼刑侍未几以待制宝章阁来分阃云门生儒林郎差充沿江制置司干办公事吕
好问撰门生承直郎辟差充建康军节度推官兼制置司签厅赵彖夫书门生宣义郎差充沿
江制置司准备差遣叶来篆额门生文林郎差充沿江制置司准备差遣孙立定石 景定重建

筮厅记自王茂洪以幕府名山金陵幕为天下重其来远矣我国家中兴置陪都犹古京洛也襟带江淮关键东南缓急常先四方每开制置府圣天子必选重臣蒞之其一时宾佐多元戎所自辟常为天下选宝佑乙卯秋资政殿大学士裕斋马公自京尹来为留守领使事越二年易镇京湖策应夔府上以金陵之思公也明年复归之镇公先尝总西饷至是命复兼焉凡所领四司事三军之号令黜陟征调餽给与夫统理所部之氓故亦繁矣公率戌夜起拊纸束卷运笔飒飒然立剖神决析去根株铢两不忒阃事办则府吏鹜行进矣昼漏未下饷事亦如之退与宾客四邻交奏记表请耳受口誨一一詹举出视议舍井井无一敢懈者公之再镇也淳祖尝以新安二郡辱置幕下一日公会僚佐曰秋风动矣我辈当惜分陰顾事无一不当豫者公署下窄弗称画诺其议改筑既而淳祖以公辟守康庐谍报蒙古由武沙闯江南犯鄂矣公遂提师至江黄雨雪载涂往来池口间数四下流恃以为固丞相汎清江汉中外底宁公亦旋军治所及淳祖被召过而谢焉间行?邸则见民熟其仁军闲其律吏遵其法凡先贤风烈之可纪足以为崇化厉俗之方者靡一不举青溪白鹭之上斧藻其德如跂斯翼入游幕所则堂除牖列粲然华好矣诸宾佐请于公命淳祖记之淳祖不敢辞也尝从诸从事後窃闻之惟公足以一衆惟廉足以厉俗惟勤足以集事惟敏足以有功公以一身兼之气刚志正自其知行所至旦昼不能忘寒暑不能变壮老不能易也夫事会无涯精神有限以清虚玩岁月以谈笑资功名忧国者所讳也公之作新斯宇岂不为相与任事者地与鸾凤集林必将为治世之鸣杞梓在囿必聚为大厦之器公之爱士以为国也固将取材焉诸君子其毋忘公志皆曰敢不敬旦夜以毋忘公之志役始於【阙】月乙亥成於十月乙未门生朝散郎新除秘书郎陈淳祖记淳佑题名记嘉熙改元十有二月制使大学尚书别先生自姑孰分阃金陵是时首被罗致者参议官则嘉禾李曾伯机宜文字则东嘉黄汉章干办公事则古霄吴堦准备差遣则番阳王应辰入幕之初读重修议舍记规橰一新知其昉于绍定改元之春实大资赵公分阃之日也继询题名石刻则前未之有官寺题名所在皆然沿江大幕府乃因循未立非阙典欤因呼老吏叩曩昔幕属姓氏其历年之多者往往不能省记今自绍定改元以後裒次而登诸石庶来者有考焉夫题名特一事耳自堦滥巾幕下凡三见改岁至是始克立其亦有时乎淳佑改元上巳日堦谨书宝佑续题名记国朝之制凡州县吏一命以上非堂授则铨注不可以自选也可自选而辟召者惟二三阃寄此大幕府所以号小朝廷也然命於上者其贤不肖人不一不能尽满人意诿曰非我致也选於下者必气类之相感才德之相若苟非其人则将诿诸谁乎韩子所谓知其客可以知其主知其主可以知其客顾不甚重邪淳佑十有二年春今叨恩分阃金陵望轻责重凜然惧不克济东僚罗士皇皇如不及盖不徒取其虚名必求其实用不徒取其婉画必资其忠规不徒取其苟同必尽其异见阅岁再期罗而致者浸广智足以造谋材足以立吏忠足以勤上惠足以存下而又侈之以诗书六艺之学其眡湖南之宾客殆无愧焉故虽才品或殊职守有异而相观为善者莫不粹然一出於正是亦一时之盛也幕府旧有题名间亦断续偶得正石乃断自余始至第其姓氏大书刻之後之来者随考而繫其下诸君求余言余谥之曰人才之在天下用而後见久而後知知於今者必有以验於後观其始者必有以要其终余之与诸君从游於此也岂特为一府之用哉盖将聚天下之才为天下之用诸君益养其器业之成勿畔其所守而志其远者大者繇是而流声实于天朝人曰此沿江之宾客也则岂惟诸君之荣抑亦予之荣懋之哉遂刻其语于石云时宝佑二年六月既望金华王埜记

<史部,地理类,都会郡县之属,景定建康志,卷二十五>

<史部,地理类,都会郡县之属,景定建康志,卷二十五>

<史部,地理类,都会郡县之属,景定建康志,卷二十五>

安抚司

大中祥符三年八月为将祀汾陰属江淮不稔令诸路各带安抚使乃命知昇州张咏兼江南东路安抚使本州驻泊都监李重睿阁门只候蔚信并为都监仍出手劄谕咏等辖下州军虽不是灾伤处亦当安抚无令惰农扇摇逃移官员有贪浊深刻昧於绥抚者速具事状姓名以闻应州县蠲纳司见收欠负及依省司定限校科无可陪填及该赦敕除放省司未明指挥者并权住区分开坐闻奏四年六月诏曰朕以寡德临兹庶方靡忘宵旰之勤冀洽阜康之治眷言江介迄彼淮瀆水旱相仍田畴几废缅念黎庶予怀惻然宜令起居舍人直史馆李迪为江淮南安抚使合门只候张利用为都监存问里闾察访官吏讯详狂狱宽节财征务使适宜用图安集宣和三年五月六日诏江寧府守臣兼安抚使兼江南东路兵马钤辖【臣僚言睦贼猖獗大兵奉行天讨已见平靖虑班师之後余孽尚在理宜措置窃闻太宗皇帝尝以蜀寇虽平尚有残孽因命赵昌言爲安抚招讨之神宗皇帝亦命刘瑾知州兼江西安抚兵马钤辖今乞以杭越知州并兼本路安抚使镇抚一方】国史职官志经畧安抚使司经畧使安抚使各一人以直秘阁以上充所领州之寄任而爲之官各掌一路兵民之事皆帅其属而聽其狱讼放其禁令定其赏罚稽其钱谷甲械出纳之名籍而行以法若事难专决则具可否稟奏即干机速边防及士卒抵罪则聽以便宜裁断旧制凡诸路安抚之名并以逐州知州充掌抚绥良民而察其奸宄肃清一道江南东路以江寧府知府充继而江南东路安抚钤辖司言被旨于沿江置帅府要郡本路帅府文臣一员充都总管武臣一员充副都总管今来新制江寧府知府见带一路安抚使合与不合便以马步军都总管繫衔诏令带马步军都总管繫衔建炎二年三月八日诏诸路虽各建帅府然于一路见任官吏初无节制指挥致玩习常态缓急难以集事宜令诸路安抚使便宜节制施行三年五月三十日尚书省言今相度欲将江池饶信州爲江州路知州带本路安抚使建康府太平宣徽州广德军爲建康府路知府带本路安抚使使其节制江东路军马及江州知州带江东湖广四字入衔并除去所贵名正事成号令归一任责稍专从之四年五月二十七日三省言沿江一带道里阔远若只于建康江州两路置帅或恐照管不尽缓急有失机会今欲将江南东西路州军分置三帅总辖内建康府路安抚使于池州置帅拨建康府池饶宣徽太平州广德军爲所隶契勘建康府本系置帅去处缘本府至镇江府不满二百里相去太近而往江州计一千四百里远近不伦独池州正在镇江江州之间若置帅于池州则沿江四帅相去道里甚均实爲利便从之

绍兴元年正月十日诏吕颐浩充江东安抚大使兼知池州余依已降指挥九月一日中书门下省言江南东西路旧以建康府洪州爲帅府置两路安抚大使令东路大使兼知池州西路兼知江州二州地势僻隘非建康府洪州比有失祖宗分道置帅增壮国势之意诏江南东路安抚大使兼知建康府西路兼知洪州池州守臣今後选差武臣其绍兴元降正月十日安抚大使兼知江池州指挥更不施行二年四月十二日诏江南东路安抚大使司准备差遣以辟

文臣不得过十五员准备差使以辟武臣不得过十五员爲定额其见差下人限指挥到并令依条减罢三年十二月中书门下省言昨除沿江三大使所辟官属缘当时金人尚未北去兼李成马进贼马在近所以增置员额数多今来边报寧静别无羣寇其属官理宜裁损诏沿江三大使司许置参谋参议官主管机宜文字各一员干办公事三员文臣准备差遣武臣准备差使准备将领各以五员爲额其溢额人并依省罢法施行二十三日尚书省言诸帅司所置属官多寡不同除差即非祖宗旧制当别行立定差格诏江东安抚大使许置参谋参议主管机宜文字各一员干办公事五员安抚使许置参议主管机宜文字各一员干办公事四员仍并令举辟参谋参议通判以上资序机宜差第二任知县资序人余并令録以上资序人余依已降指挥

江东安抚使始于大中祥符其後省复不常至于建炎江南东路安抚制置合为一使自吕颐浩始後省制置惟安抚使仍旧绍兴初置江南东路安抚大使自叶梦得始後省大字止除安抚使至绍兴八年又以安抚制置合为一加大使叶梦得复为之其後孟忠厚张守皆因之十五年以後并省制置及大字止除安抚使至乾道三年以安抚使兼沿江水军制置使史正志为之後不兼制置至开禧二年又兼沿江制置寻改兼江淮制置自叶适始徐谊丘密何澹杨辅黄度刘榘李大东皆因之嘉定十五年复兼沿江制置绍定四年以江淮安抚制置合为一使仍加大字六年仍以江东安抚使兼沿江制置使余并省後皆因之或兼制置或以制置兼或充使或充大使并兼知建康军府事具载年表兹不重述自参议以下题名如左

安抚司签厅壁记绍熙甲寅九年来本司充员干办同舍公事有间因相顾曰建康在六朝为都邑北枕长淮东南引吴会江山横鹜城阙蔼然自祖宗时已多用重人国家南渡尝驻警蹕既幸临安留钥之寄尤藉形胜以寬北顾之忧与往昔又不同非鉅公名卿罕命幕府宾客亦随以重然时无外虞疆吏弗警帅司既稀任民事职甚清简晨起入金厅漏未尽三四刻即可归休胥徒相忘庭宇萧然金陵多废迹或出而登望吊古固多余暇虽有长才伟智欲奋励自见亦何所施若一旦天子赫然震耀威武将与仇讎从事则主人多受旨督视诸将膺宣抚之任为参佐者当临戎授师中权赞画羽书纷委动中机会其责岂轻是时虽有长才伟智恐犹弗给况其下乎而吾人终日袖手燕坐能不少思哉机宜孙公起曰天下事岂应预料吾徒才智虽未必过人亦何足预忧姑置勿问金厅壁记未立前後幕府或居承平或当倥偬一时至人成大功兴大利亦必有画诺之助名氏不着後何所考余终更去矣欲搜扬载籍次其岁月而列之顾九言子其秉笔记余初意辞曰长者在何敢狂斐既退自念孙公吾先君子长沙僚案也何敢辞他无可道说独记一时慨叹之语如此今取机宜干办列左方参议秩虽尊亦同入幕并载其首庆元丙辰季夏建州游九言书

续题名记金陵陪京护江控淮为东南第一都会藩与府两大幕之官僚备焉建炎间命兼制置使罗致参佐体统同而司存异甲兵钱谷制幕主之簿书狱讼府幕掌之抚帅一司文书遂繇是简省日始旦冉冉趋府已漏刻下退食自公未有职思其忧者淳佑丁未夏枢密使赵公被上旨视师建大都督府朝之名卿才大夫综文韬武画帋筹边鏗錡炳耀皆能垂勋名于竹帛而帅幕僚属亦于是时亹亹思奋咸以职业自见盛矣哉余闻岷山多嫩玉武库多犀器张公殿徐韩愈辈出乌公镇河阳温生石生盍归乎来声应而气求云飞而川泳必有内鸣玉外

建旌挺挺为世名臣如乡从魏公幕中来者不识其姓名可乎衆曰宜壁旧有记閱岁久尘昏木蚀属余易鑱诸石骏之私窃自喜尝陪幕议焉敢辞以陋淳佑八年六月朔朝奉郎添差充参议官三山陈骏之记迪功郎添差充干办公事东莱吕祖异书

制使姚公希得任内创修抚司金厅景定四年四月

<史部,地理类,都会郡县之属,景定建康志,卷二十五>

<史部,地理类,都会郡县之属,景定建康志,卷二十五>

<史部,地理类,都会郡县之属,景定建康志,卷二十五>

<史部,地理类,都会郡县之属,景定建康志,卷二十五>

<史部,地理类,都会郡县之属,景定建康志,卷二十五>

制使姚公希得任内创修建康府都金厅记【留都幕府之重尚矣国朝盛时西洛僚佐多贤称於天下倅曰谢希深推官曰欧阳永叔有若尹师鲁有若梅圣俞咸在其选盖陪京巨镇非他幕府比治中别驾日诣其所参决可否号都金厅凡所以镇邦国施教化统理所部之县者悉於是咨画诺焉金陵夙号帝王州自六飞南渡管钥不轻畀而简僚惟谨景定二年冬余承乏居守幸当边尘晏清食焉而怠则余岂敢乃搜民瘼乃计军实越二载百废粗举学校既修社庙既葺因念是邦临护之大而议舍湫底庳仄非所以重宾筵敬民事也于是节浮费之不经者省冗役之不亟者因故地撤而新之厅为间五堂为间七航斋设其中宾序环其列吏舍翼其旁总百有四楹堂榜曰此奇取坡公贤哉江东守收此幕中奇之句也高其閤敞其轩棂周阿峻严列楹齐同墍涂墁丹内外华好可以俯仰可以谈笑斯谓高明游息之道具焉者也视以无壅气以不烦政之大小议於是讼之枉直剖於是物来而名事至而应将无所处而不得其当矣然则斯宇之作岂无补哉抑吾闻之明道程子之掾镇寧也筦库细务无不尽心事小未安必与守办张子韶大书镇东金厅之壁曰此身苟一日之闲百姓罹无涯之苦先儒奉厥职若是其忠且敬也居是幕者能以二公之心为心岂独为守者嘉赖将见惠政被江左声实流天朝诸君自此升矣谢欧尹梅独何人哉会予有召还之命用伐石为记俾来者知作之所始而敬其事云】为费二十一万七千旧楮米八百二十五石

景定癸亥重建制司金厅自四月至於八月落成通费官会二十五万余缗米八百石记金陵自六飞南渡视昔睢洛异时出近臣开督采石之功至今幕府有休称嘉定合江淮建阊後虽析置其选犹以是望他阊旧有宇介府东偏前阊观文马公以庳陋弗称撤而改作榜沿江大幕府规櫺度越旧制矣惟门迫吏舍萦折旁出客间多合外附庑下属公召未遑尚书姚公继之越明年威畅惠流境以无事一日觴客筹胜顾而言曰嘻是将以遗我也酒既属其事于议曹赵湜逾月告成葺筹胜虚以治事增辟堂二移其额揭中堂後扁集思堂翼以阁阁东繚以庑横贯依缘而南出于君子堂堂与亭皆因旧而加涂墁循堂右转中为便厅左庑右门公书

沿江幕府榜其上门外達广三丈许前为大门以旧榜揭之既成幕下士相与叹曰公忠忱体国知无不为事关於军如舟师为政除器补卒关於民如学校社稷均赋简役次第举行而公退食燕凝老屋数椽安而弗葺尝试言之人情莫不欲安公朝夕于政凡可以安遗人者是究是图以及於僚吏至其身则安於简陋推公之心使进而坐庙堂天地中间一物不获其所皆我之责固将以安一方者安四海富贵於公何有哉既相与叹咏公德则又相与勉曰吾侪安於斯借箸之筹磨盾之革无几谈笑竟日雁?行进伸纸和墨书字不满百午漏未下会且归矣风景不殊山川如昨雍公之芳躅可继而江沱之宴安不可怀也衆曰敢不夙夜箴规以无忘公之德公名希得字逢原潼川人时以刑部尚书制置沿江云景定四年十二月门生朝散郎差充沿江制置使司参谋官赵时橐记门生朝奉郎差充沿江制置使司参议官黄蛻书门生承议郎差充沿江制置使司参议官杨同祖篆盖

景定建康志卷二十五

卷二十六

<史部,地理类,都会郡县之属,景定建康志>

钦定四库全书

景定建康志卷二十六 宋 周应合 撰

官守志三【诸司寓泊】

總領所【在行宫西南都酒务北绍兴十二年建】

国朝会要初命朝臣總領都督府宣抚司财赋其後收诸帅之兵以为御前军屯驻诸处皆置總領亦以朝臣为之仍带专一报发御前军马文字盖又使之与闻军政不独职饷馈而已其序位在转运副使之上内建康池州诸军钱粮淮西總領掌之其官属有干办公事准备差遣【续有主管文字】有分差粮料院审计司【审计以通判兼】榷货务都茶场御前封桩甲仗库大军仓大军库赡军酒库市易抵当库惠民药局

绍兴三年正月八日诏差户部侍郎姚舜明前往建康府专一總領应用都督府钱物粮斛仍於都督府选差有风力谙晓钱谷四员充粮料院审计司监官都督府管下官兵等帮勘请给等并经由户部粮审院依条批勘支給建康府榷货务都茶场亦仰姚舜明提领十一年五月四日诏以吴彦璋为太府少卿總領淮西江东军马钱粮专一报发御前军马文字诸军不听节制十三年九月二十一日诏總領淮西江东军马钱粮

所属官今後许户部长贰太府司农卿少通行荐举二十七年七月二十四日總領淮西江东军马钱粮方师尹言比年州县循习不以军饷为念钱物桩发有累月而方起者粮斛转漕有经岁而始至者监司坐视略不经意乞择监司郡守尤违慢者按劾以闻重赐黜责从之八月九日诏今後總領司互举改官之人并依宪漕等司举官磨勘从左司諫凌哲请也三十一年三月一日總領淮西江东军马钱粮言江东所屯岁费缗钱近七百万米以石计者近七十万科拨虽有名期限虽有日官吏侵兑稽违监司守贰恬不加意乞将监司守贰以下弛慢尤甚者按劾重赐黜责其承行人吏郎依无心力断罢事理稍重者亦依条施行从之三十二年四月二十七日诏诸路大军每遇招收到人并先具姓名报總領所每旬委總領官及都统制就本所或教场同共当官填刺军号其効用等不刺手面之人亦令对衆审问投名月日诣实应於合得衣物之类一面从總領所画目当日并与按旬月日两季径行帮勘支給具数申省部照会出豁科降乾道二年二月枢密院言已降指挥三衙招收军兵効用本军申解枢密院令承旨司用等杖审验人才刺填军额在外屯驻军委本路總領官依此其在外诸军并不解赴總領所止行关报姓名审验预作到军月日放行请给无以关防诏總領所照应三衙招

効用军兵拍试格法指挥一体施行 二十八日淮西江东總領楊倓等言乞將江東安撫司建康府都統司酒庫并撥付淮西總領使所五年三月六日淮西江东總領叶衡言準指揮差屬官前去廬州應副郭振修城官兵錢糧照得虽有干辦公事二員內分一員專在池州軍前給納金廳委是闕官深慮誤事欲乞依鄂州例更置干辦公事準備差遣各一員詔許辟差準備差遣一員 六年四月一日詔淮東總領所并歸淮西總領所令沈夏通領存留屬官一員鑄錢司可減罷并歸發運司存留干辦公事一員亦歸發運司閏五月五日中書門下省言勘會淮東總領所廢并司名合行并入詔以總領兩淮浙西江東財賦軍馬錢糧所為名十七日戶部言總領兩淮浙西江東財賦軍馬錢糧所為名合用印記今欲以總領兩淮軍馬錢糧所印十字為文將兩所元印繳納庶几歸一從之 六月十七日戶部言淮西總領沈夏奏淮東總領所事務至繁正要稽考出入及檢察糧餉院批放緣淮西相去隔遠難以革弊兼照得淮東金廳從來不曾與務場倉庫干涉今欲依仿池州例委自屬官管干給納本部勘當欲依所乞以戶部給納所為名并令總領所往來提督施行從之 七年十月二十四日詔令建康府於朝廷樁管會子內借撥五十萬貫應副淮西總領所支遣却於元料馬軍司未到綱錢內拘收撥還依旧樁管仍開具起發綱運最稽遲數多去處當職官職位姓名申三省樞密院 八年四月十六日權尚書戶部侍郎沈夏言今後遇總領所官赴行在奏事淮東委守臣兼權淮西委漕臣兼權 景定二年詔制總合為一以沿江制置大使馬光祖兼淮西總領詳見題名題名記乾道庚寅冬銓備數起部亞卿識錢唐單公于民曹郎淳熙改元之春銓偶至秣陵公適摠餉於此又獲過從越明年秋九月公謂銓題名有記古也而總領所獨闕其敬以請既辭不獲則敬對曰諾謹案唐史劉晏能摠大体又領鹽鐵度支等使則總領云者其來尚矣於文總或為驥義同字異書皆作總而詩多作驥春秋左氏與詩同周官戴記及諸史與書同然人總布則讀為鼓儻之儻而漢宣紀總乃作綜許侍中說亦然又不可一槩論矣大要摠之為義如總權綱柄不下移如總名實官無妄授如總方略必一統類如總憲度必植風聲如總嘏然靚謐無譁如總干然執持不撓此蓋命官之本意國朝自紹興癸丑始設是官以藏諸路軍實庚申夏又加專一撥發御前軍馬文字其任益重尋有旨淮西江东依旧置司秣陵惟是重兵留戍倍於臨淄庚癸浩穰過於首山自非瓌傑出羣之才莫勝其任公下車之初視簿書焚如絲視繁冠髻如云積弊搶攘一旦洗削更革用人各因其材馭吏嚴而不苛曾不逾時食足財阜政以辦聞而不扰雖管氏輕重李愷平糴弘羊均輸壽昌常平士安低昂未能遠過无几何玺書自天賜三品服赫然驚人復除大農恩寵有加焉仰惟聖上勵精責實名器不假嚴於獻狀公之遷也公論浩然稱允或問銓食貨必本於八政丰財必本於七德何也曰孟子不云乎无政事則財用不足是食貨以政為本班固論易何以聚人曰財必原於天地之大德是丰財以德為本今焉貫朽粟盡有若元光之間可以觀政矣士飽而歌馬騰于槽有若退之之咏可以觀德矣向來諸公袞袞登要津盖由此涂出吾知公去是而儀天朝也有日矣噫晉城濮之師至盛也食闕而館楚軍之穀霍驃騎漢良將也余肉而士有菜色史氏犹稱其能矧茲軍實之贏足以根本關中富甲河內以濟大業而不刻之堅珉是大闕典遂書以識又閱籍得為是職者二十有一人且并刻焉時閏九月丁卯龍圖閣學士承議郎提舉江州太平興國宮胡銓記宣教郎充樞密院編修官袁說友書

姚【闕名】 張成宪

宋棐 掌均

莫将

吴彦璋【右朝散郎太府少卿绍兴十一年五月五日到任十三年闰四月八日与淮东总领吕希常两易】

吕希常【右朝散郎司农少卿绍兴十三年闰四月十五日到任十四年六月二十一日磨勘转朝请郎十八年七月二十六日磨勘转朝奉大夫二十二年八月内转朝散大夫二十四年十月内致仕】

宋颢【敷文阁直学士右宣奉大夫知建康府绍兴二十四年十一月内兼权二十五年十一月

二十日移知平江罢权】

徐林【左朝散郎太府少卿绍兴二十六年三月一日到任二十七年四月十九日归班】赵子瀟【左朝散大夫尚书户部郎中绍兴二十七年五月十六日到任八月内除直秘阁两

浙路转运副使】

方师尹【左奉议郎尚书金部员外郎绍兴二十七年八月十一日到任二十八年五月二日

磨勘转承议郎二十九年二月内除太府少卿三月内除尚书左司郎中】

都絜【左朝散大夫尚书户部郎中绍兴三十年三月二十二日到任三十一年十月二十四日除司农少卿十一月十六日磨勘转朝请大夫三十二年正月二十七日归班】

李若川【右朝散大夫尚书户部员外郎绍兴三十二年二月一日到任是月七日磨勘转朝请大夫三月二十九日陞郎中隆兴二年五月七日改除尚书右司郎中又除司农少卿】

杨倓【左朝请大夫司农少卿隆兴二年六月九日到任乾道元年二月六日除司农卿十月十一日因职事修举转朝议大夫二年七月一日磨勘转中奉大夫二十五日除敷文阁待制自陈依亲八月五日提举佑神观】

司马汲【右朝散郎尚书户部员外郎乾道二年八月二十五日到任十月十五日丁忧】叶衡【左朝奉郎太府寺丞乾道二年十一月二十五日到任二十七日因前任知常州军器赏特转朝散郎三年正月四日磨勘转朝请郎七月七日除尚书户部员外郎五年三月十四日

除太府少卿六年正月十六日除权尚书户部侍郎】

沈夏【左朝请郎太府少卿乾道六年二月十四日到任四月一日通领淮东总领二十二日兼发运副使闰五月二十五日因前任玉牒成书特转朝奉大夫八月二十四日改除湖广总领】

张松【右中奉大夫直显谟阁江东转运副使乾道六年九月一日兼权两淮总领十一月十二日除太府少卿两淮总领兼发运副使十二月三十日复置淮东总领罢通领七年四月四日除落所带发运副使六月除直显谟阁提举台州崇道观】

查龠【左朝散郎太府少卿乾道七年六月九日到任七月十八日改知镇江】

周闳【右朝散郎尚书户部员外郎乾道七年八月二十三日到任八年二月二十九日陞郎中

五月十一日归班】

滕?【右朝请郎尚书户部员外郎乾道八年五月二十四日到任七月二十一日改除直阁湖北转运副使】

单夔【右奉议郎尚书户部员外郎乾道八年八月十四日到任九年七月六日除司农少卿淳熙元年正月三日磨勘转承议郎二年正月十八日赐紫章服三月十二日除司农卿三年正月一日被旨奏事十五日除权尚书户部侍郎】

盖经【奉议郎司农寺丞兼权户部郎官淳熙三年二月七日到任当年十月二十六日因日历所进书准告转承议郎行丞四年五月十二日因实录院进书转朝奉郎十月三日除户部郎官六年三月十三日除太府少卿四月二十六日因日历所进书转朝散郎六月七日因提领酒库转朝请郎八月二日除权尚书户部侍郎】

叶宏【朝奉郎守太府少卿淳熙六年八月二十二日到任当年十二月二日磨勘转朝散郎九年七月十四日罢】

年七月十四日罢】

韩彦质【朝请大夫太府少卿淳熙九年八月初一日到任当年十二月十八日磨勘转奉直大夫十年五月二十九日被旨奏事除太府卿兼知临安府】

蔡戡【朝奉郎守太府少卿淳熙十年七月十八日到任準指挥与湖广总领赵汝谊两易】
赵汝谊【朝请大夫太府少卿淳熙十年十一月二十五日到任十二年九月二日準告为措置淮西屯田灭裂降授朝散大夫十三年二月二十八日准告叙复朝请大夫当年六月一日准告磨勘转朝议大夫当年闰七月十一日准告特授试太府卿依前淮西总领至淳熙十五年八月初八日致仕】

张抑【朝奉郎太府少卿淳熙十五年九月初六日到任十六年四月十四日覃恩转朝散郎五

月二十八日磨勘转朝请郎绍熙元年六月二十二日丁忧去】

钱端忠【朝议大夫尚书金部郎中绍熙元年八月初一日到任十二月十九日磨勘转中散大夫二年五月二十七日除司农少卿三年正月十三日改除江南西路转运副使】

刘颢【朝请大夫司农少卿绍熙三年正月二十三日到任六月十八日丁母忧】

郑湜【朝散郎尚书仓部员外郎绍熙三年九月十五日到任三年十一月二十六日磨勘转朝

请郎五年三月十七日归班】

赵师【朝请大夫太府少卿绍熙五年三月十五日到任九月十五日覃恩转朝议大夫九月十九日明堂赦恩加封祥符县开国男食邑三百户闰十月十七日磨勘转中奉大夫行太府少卿庆元元年五月初七日罢】

胡瑒【朝奉大夫试司农卿庆元元年六月二十三日到任三年三月十九日奉圣旨令赴行在

奏事】

万鍾【中大夫守司农卿以江南东路转运副使除庆元二年七月十五日到任三年三月十三

日奉圣旨除秘阁修撰知镇江府】

杨文晷【朝散大夫行尚书户部员外郎庆元三年四月二十七日到任四年五月十七日准告特授太府少卿当年六月十八日准告磨勘转朝请大夫当月二十三日致仕】

曾炎【朝散大夫尚书户部郎中庆元四年七月二十三日到任五年六月十四日磨勘转朝

请

大夫当年八月二十七日除直敷文阁福建路转运副使】

曾?【朝奉郎守尚书户部郎中庆元五年八月二十八日到任六年闰二月十六日除守太府少卿依旧淮西总领当年六月一日磨勘转朝散郎当年七月十三日因修庆元宽恤诏令转朝请郎十二月初七日改除福建转运副使】

韩亚卿【朝请大夫尚书户部郎中庆元六年十二月二十一日到任续为系恭淑皇后亲属特授朝议大夫及磨勘转中奉大夫嘉泰二年正月初九日除太府少卿九月二十日赴行在奏事】

王补之【朝请大夫试太府卿嘉泰二年九月二十一日到任嘉泰三年十二月十一日赴行在奏事】

叶籀【朝请郎守尚书户部郎中嘉泰四年四月一日到任开禧元年正月十九日召赴行在奏

事】

商飞卿【朝议大夫试司农卿开禧元年正月二十日到任二年四月十一日除权户部侍郎依旧总领三年三月十三日除户部侍郎依旧总领四月十三日致仕】

徐邦宪【奉议郎守尚书户部员外郎开禧三年五月十七日到任嘉定元年三月十三日召赴行在奏事】

李洪【朝议大夫太府少卿嘉定元年三月十四日到任嘉定二年二月二十六日依亲乞宫观】赵不□【朝请大夫司农少卿嘉定二年五月初四日到任嘉定三年六月十三日准告授试

司农卿依旧淮西总领嘉定五年十月八日令赴行在奏事】

胡榘【朝奉大夫尚书户部郎中嘉定五年十一月二十二日到任六年十月十七日除司农少卿八年二月十八日磨勘转朝散大夫当年五月二十一日除试司农卿九年闰七月五日转朝请大夫当年十二月二十八日特转奉直大夫十一年八月二十六日磨勘转朝议大夫十二年七月十六日准省劄除职与州郡差遣】

商碩【宣义郎太府寺丞兼权户部郎官嘉定十二年八月二十一日到任十四年四月初三日告授户部员外郎五月十三日磨勘转宣教郎六月二十五日告以前任淮南运判转饷有劳特转奉议郎六月二十四日告陞郎中】

陈宗仁【朝奉郎江南东路转运判官嘉定十五年六月十三日兼权至十六年三月二十六日交割】

李骏【朝散郎尚书户部员外郎嘉定十六年三月二十六日到任十二月初四日磨勘转朝请郎十七年十月初十日覃恩转朝奉大夫当月十五日陞郎中宝庆元年九月二十五日除司农少卿十二月八日转朝散大夫二年九月二十一日转朝请大夫宝庆二年十月宫观】

戴桷【承议郎尚书户部员外郎宝庆二年十月初十日到任三年闰五月初三日磨勘转朝奉郎绍定二年四月初四日除太府少卿当年六月十四日磨勘转朝散郎三年四月初四日特转朝请郎十一月内丐祠二十三日除直焕章阁主管绍兴府千秋鸿禧观】

杨绍云【朝散大夫权尚书户部侍郎绍定四年二月初九日到任当年五月二十二日因庆寿恩转朝请大夫当年九月初十日封乌程县开国男食邑三百户五年四月初四日以酬赏转朝议大夫六月十三日磨勘转中奉大夫当年九月内准勅差提举安庆府真源万寿宫】

吴潜【朝散大夫太府少卿绍定五年九月十九日到任供交割权江东转运司职事六年十二月五日准省劄召赴行在未起行间当月十七日准省劄时暂兼权沿江制置使兼知建康府十八日准省劄除太府卿依旧总领端平元年四月二十七日准省劄除秘阁修撰枢密都承旨五月六日去任】

蔡范

何元寿【中奉大夫秘阁修撰知太平州除行太府少卿淮西总领兼知本州嘉熙二年闰四月十三日就州交割职事六月十二日归司嘉熙三年八月二十一日准告守太府卿依旧总领十一月六日替罢】

李曾伯【朝散大夫行尚书户部员外郎嘉熙三年十一月初六日到任嘉熙四年十月十五日准告以磨勘转朝请大夫至当年十一月二十五日奉圣旨令赴行在奏事续於十一月二十九日除右司郎官得替离任】

尤焞【朝奉大夫司农少卿兼淮西总领嘉熙四年十二月二十六日交割职事淳佑二年正月八日准省劄时暂权管沿江淮西制置留司建康府江东安抚司行宫留守司职事七月十八日赴行在奏事去任】

池圣夫

王燾【朝请郎尚书户部员外郎淳佑五年五月十二日到任七月十七日准告磨勘转朝奉大

夫六年闰四月初八日准省割除左司郎官五月十八日得替离任】

郑霖

韩补【朝奉郎尚书户部员外郎淳佑七年二月十七日交割职事五月准告磨勘转朝散郎并准省割兼督视行府参议官八年正月一日准省割除将作监三月初六日准省割令赴行在奏事】

陈绮【朝请郎尚书户部员外郎淳佑八年四月二十九日交割八月磨勘转朝奉大夫当月被旨兼督视行府参议官九年五月除将作监十二月磨勘转朝散大夫十年五月除司农少卿八月令赴行在奏事】

徐?【中散大夫行太府寺丞兼权户部郎官淳佑十年十一月初三日交割职事十一年五月

八日除户部郎中淮东总领兼知镇江府五月二十四日离任】

吕好问【中奉大夫依旧将作监淮西总领淳佑十一年十月二十日交割职事淳佑十二年二月八日准省割时暂兼权江东路转运判官当年五月十一日准省割除司农少卿依旧淮西总领时暂兼权江东运判】

马光祖【中奉大夫守司农卿淮西总领宝佑元年八月二十二日交割职事当年九月阙日省割暂权江东转运司职事至宝佑二年二月二十八日准省割奉圣旨暂权江东转运使司事当年十一月十三日准十一月九日省割备奉御笔除权户部侍郎兼知临安府浙西安抚使目下前来供职】

赵与□【朝请郎司农卿淮西总领兼江东路运判宝佑二年十二月初二日交割职事至三年正月二十八日以前任删修勅令该赏转朝奉大夫试司农卿仍旧当年七月十三日准省割时暂权建康府留钥职事九月十五日以磨勘转朝散大夫四年四月二十二日奉御笔除权户部侍郎依旧淮西总领兼江东计度转运副使五年正月一日奉圣旨除右文殿修撰两浙转运副使目下前来供职十七日续奉圣旨除集英殿修撰职任依旧】

余晦【中奉大夫依旧权户部侍郎改除淮西总领兼江东运副鄞县开国男食邑三百户赐紫金鱼袋宝佑五年四月十一日交领职事至当年五月二十六日准告命授中大夫差遣封如故当年七月二十一日准告命授太中大夫差遣封如故当年十二月二十日告命进封鄞

县开国子加食邑二百户当年十二月二十一日三省同奉御笔除户部侍郎职任依旧至宝佑六年二月二日准省劄奉圣旨除宝章阁待制知潭州湖南安抚使至当年二月五日奉御笔改知平江府兼淮浙发运使】

郑羽【奉直大夫尚书户部左曹郎中淮西总领兼江东运判宝佑六年二月十八日交割职事

至七月二十三日去任】

倪垕【朝散大夫干办行在诸军审计司於宝佑六年七月二十三日到任权管兼江东运判当日奉圣旨除太府寺丞仍旧职八月二十一日准告磨勘转朝请大夫十一月二十一日准省劄奉圣旨除户部郎官淮西总领兼江东运判十二月二十一日准告行尚书户部员外郎仍旧职开庆元年正月二十二日准省劄以左曹郎中系衔正月二十六日准省劄时暂兼权建康府管干沿江大使司留司事务二月二十七日准二月空日省劄兼权提领江淮茶盐所五月二十八日准五月二十二日省劄正兼茶盐所六月九日准告特转朝议大夫九月二十八日准省劄兼建康府制置留司职事当年十月七日离任】

印应雷【朝奉郎守军器监淮西总领兼江东运判开庆元年十二月十三日到任景定元年二月初二日准省劄兼提领江淮茶盐所当年三月三日以磨勘准告转朝散郎至当年四月二十九日省劄备奉圣旨除直焕章阁枢密院副都承旨】

马光祖【景定元年五月以资政殿大学士通奉大夫沿江制置大使知建康府江东安抚使行宫留守暂兼】

转运司【在行宫西绍兴八年建】

国史志有使副使判官并以朝官以上充掌均调一道租税以待邦国支费分巡所部以察官吏能否旧制有计度转运使副判官两省五品以上任者为都运使建炎以来逐路都转运使除授不常惟使副判官常置江南东路江南西路转运使太平兴国初分江南东

西路後并为一路置使副二员天禧四年复分为两路各置使一员太平兴国六年分遣朝臣为江南转运副使寻废副使後为转运使礼部郎中张去华为之嘉佑五年八月诏运使之任所以寄耳目治财赋也江南东西去京师数千里而皆一转运使领之处则无与参虑出则无与同力设有缓急之警调输之烦机会一失民受其弊甚非豫虑先几之策也其各选置转运判官一员建炎三年十二月十八日江南东路转运司言靖康元年勅贍学钱粮物帛田产皆系转运司窠名拘收续準发运司拘收充转般杂本未蒙拨还诏令转运司拘收四年五月二十七日三省言江南东西路既分置三帅其两路转运司难以仍旧分路差官欲并为一司江南路都转运司为名今後差漕臣三员内一员为都转运使并通管应办漕计有阙误一等任

责从之

绍兴元年正月十日诏江南路依旧分东西路各置转运司见任漕臣依旧分路管干职事

题名记转运之置虽昉於唐然第掌水陆之输其黜陟按察犹别命使至国朝始得刺举一道吏之能否民之戚休狱讼钱谷无所不当问庆历中欧阳文忠公为河北都转运使则又请与闻边事以调军储察将帅仁宗因是然之後则重矣今江东亦边也地总九郡而治建业天子南巡狩建业新行幸之宫宿重师以控江淮馈饷繁而道里舒故所谓转运者视他路为剧元吉之滥官於此既踰年矣欲求前人名氏以质其居职久近而碑志坏灭莫可踪迹盖问诸故府开宝八年江南舆地始上於职方以杨克让知昇州实兼转运事太平兴国初遂以使樊若水六年张齐贤张去华相继为副旋又充使时踵唐开元旧制分江南为东西路未几复合天禧四年始定为东西兴国之三年也诸路置转运判官未几复省嘉佑五年又置之其间名卿贤大夫不能尽见建炎以来所尽见者则亦有其名氏而亡其官称或存其官称而逸其到罢惧益远而不可考故自建炎次第録之得四十有八人夫以朝廷置使之重一道将输廉按之剧寢失其传由吾不肖者而复焉则贤者之来其忍遽废而不举也乾道三年九月戊子颍川韩元吉记李尚行【左朝散郎副使】

王琮【左中奉大夫直显谟阁副使】陈敏识【右朝散郎运判】

黄子游【右朝散郎运判】

刘景真【右宣义郎运判】张汇【右朝散郎运判】

向子諲【右朝请大夫直龙图阁转运使】张汇【右朝请郎直秘阁副使】

朱异【左朝奉郎运判】

曾纁【右中奉大夫直宝文阁副使】郭康伯【右奉直大夫运判】

俞俟【右朝请大夫运判】

马承家【右中奉大夫副使】

唐闳【右朝请大夫运判绍兴八年八月一日到任九年二月七日满罢】

沈昭远【左朝散郎直秘阁副使绍兴八年八月二十八日到任十年八月二十八日满罢】

韩珉【右朝请大夫运判绍兴九年七月八日到任十年三月三日致仕】

张果【左朝请大夫运判绍兴十年四月十四日到任十一年五月二十九日满罢】陈敏识【右朝请大夫副使绍兴十年九月一日到任十一年十月六日罢】

王?【右中奉大夫秘阁修撰副使绍兴十一年七月二十四日到任十二年九月七日罢】章芑【右朝议大夫运判绍兴十一年十一月六日到任十四年正月十二日满罢】黄敦书【右中奉大夫直徽猷阁副使绍兴十二年十一月十六日到任十四年十月十六日满罢】赵

伯牛【左朝奉大夫直秘阁副使绍兴十四年到任】

王禔【右朝请大夫运判绍兴十四年十月二十三日到任十七年八月七日满罢】赵不弃
【右中奉大夫运判绍兴十五年三月二十八日到任】

林大声【左朝请大夫直秘阁副使绍兴十六年四月二日到任】

郑桥年【右朝请大夫直秘阁运判绍兴十七年八月二十八日到任】

赵士?【左朝请大夫运判绍兴十八年六月十六日到任】

王铸【右朝请郎运判绍兴二十一年九月二十七日到任】

周石【右朝请大夫直秘阁副使绍兴二十五年八月十七日到任】

赵公智【右朝奉郎运判绍兴二十五年十二月十四日到任】

黄仁荣【右朝请大夫运判绍兴二十六年正月二十日到任】

叶义问【左朝请郎直秘阁运判绍兴二十六年三月四日到任】

周绾【左朝议大夫副使绍兴二十六年五月二十九日到任】

邓根【左朝请大夫运判绍兴二十七年十月十五日到任】

徐度【左朝请郎运判绍兴二十八年三月四日到任】

李植【右朝请大夫运判绍兴二十九年三月二十三日到任】

吴?【右朝请大夫运判绍兴二十九年四月二十三日到任】

孟处义【左朝请大夫运判绍兴三十年正月十三日到任】

魏安行【左朝散大夫直敷文阁副使绍兴三十年七月三日到任】

李若川【右朝散大夫运判绍兴三十一年四月八日到任】

吕稽中【右朝请大夫运判绍兴三十一年十月十一日到任】

柳大节【右朝奉郎运判绍兴三十一年十一月十八日到任】

陈良弼【右朝请大夫运判绍兴三十二年二月二日到任】

向子恣【右奉直大夫副使绍兴三十二年九月二十三日到任】

薛良朋【左朝奉大夫副使隆兴元年八月二十二日到任】

沈黄瑀【左朝散郎副使隆兴二年五月四日到任】

沈枢【朝散郎直显谟阁副使隆兴二年五月十七日到任】

叶仁【右奉直大夫运判隆兴二年十月十八日到任】

韩元吉【右朝奉郎直秘阁判官乾道元年八月一日到任】

陈汉【右中奉大夫直敷文阁副使乾道二年十二月六日到任】

赵彦端【左朝散郎直显谟阁副使乾道三年十一月一日到任】

王柎【右通直郎直宝文阁副使乾道四年十月初四日到任】

黄石【左朝散郎直显谟阁副使乾道五年十二月十八日到任】

唐瑑【右朝请大夫充秘阁修撰副使乾道六年二月十九日到任】

张松【右中奉大夫直显谟阁副使乾道六年闰五月十七日到任】

沈度【右朝散大夫直龙图阁副使乾道六年十二月十五日到任】

张维【左朝奉大夫直徽猷阁副使乾道七年六月二十六日到任】

程大昌【左朝请郎直龙图阁副使乾道七年八月二十六日到任】

程叔达【左朝散大夫敷文阁副使乾道八年十一月十三日到任】

吕正己【降授右朝散郎直敷文阁副使乾道九年七月初一日到任】

杨师中【中奉大夫直秘阁运判乾道九年十二月二十八日到任】

韩元龙【朝奉大夫直宝文阁副使淳熙元年十一月二十五日到任】

胡坚常【朝请大夫直秘阁副使淳熙二年十二月二十九日到任】

徐本中【朝奉大夫充集英殿修撰副使淳熙三年五月二十三日到任】

顔度【朝奉郎直宝文阁副使淳熙四年十二月十三日到任】

赵师夔【奉议郎直龙图阁运判淳熙五年五月一日到任】

王师愈【朝请郎运判淳熙五年十二月初十日到任】

陈损【朝请大夫直宝文阁副使淳熙六年十一月十九日到任】

徐本中【朝散郎充集英殿修撰副使淳熙七年十月二十八日到任】

曾逢【朝请大夫权副使淳熙七年十一月二十三日到任】

赵师夔【朝奉郎直龙图阁副使淳熙九年六月十五日到任】

苏诤【朝散大夫秘阁修撰副使淳熙九年七月初五日到任】

赵师揆【宣教郎直徽猷阁副使淳熙十一年四月初四日到任】

顔度【朝奉大夫充秘阁修撰副使淳熙十一年九月二十七日到任十二年四月宫观】朱安国【朝散郎运判淳熙十二年十二月二十九日到任十四年改差知广州】沈揆【中大夫秘阁修撰运副淳熙十四年八月十七日到任十五年七月宫观】

钱象祖【朝奉大夫运判淳熙十五年八月二十四日到任十六年八月改差知婺州】薛叔似【承议郎运判淳熙十六年五月二十八日到任七月罢】

林枬【朝请大夫直焕章阁运副绍熙元年正月初三日到任十二月内改知明州】杨万里【中奉大夫直龙图阁运副绍熙元年十二月二十六日到任三年八月改差】傅伯寿【朝请大夫运副绍熙三年十月二十六日到任五年九月改除浙西提刑】彭椿年【朝请大夫直龙图阁运副绍熙五年十一月初八日到任次年十二月宫观】万锺【中大夫直龙图阁副使庆元二年正月十一日到任七月改除司农卿淮西摠领】耿延年【朝议大夫直显谟阁运判庆元二年七月二十三日到任三年十二月改知绍兴】钱端忠【中大夫运副庆元四年正月二十八日到任十二月改差知平江府】

韩亚卿【朝请大夫直华文阁运判庆元五年四月二十一日到任六年改除淮西总领】耿延年【中奉大夫充秘阁修撰副使庆元六年十一月二十一日到任嘉泰二年致仕】郑?【朝议大夫直宝文阁运副嘉泰二年六月二十一日到任十二月致仕】

赵公豫【中大夫充秘阁修撰运副嘉泰三年正月十二日到任十月宫观】

鲁□【朝议大夫直宝谟阁运判嘉泰三年十一月一日到任四年五月别与差遣】王闻礼【朝奉大夫运判嘉泰四年六月九日到任开禧二年五月宫观】

卓洵【朝奉大夫运判开禧二年六月二十六日到任三年三月解任】

徐邦宪【奉议郎运判开禧三年三月二十二日到任五月改除户部郎官淮西总领】锺将之【朝请大夫运判开禧三年七月二十六日到任嘉定元年七月改除江西提刑】俞亨宗【朝请郎运判嘉定元年八月二十九日到任二年十月改除福建提刑】庄夏【朝散郎运判嘉定二年十一月十二日到任四年正月除尚右郎官】

胡澥【奉直大夫运判嘉定四年三月十二日到任五年二月改淮南漕三月致仕】孟猷【朝请大夫直龙图阁运副嘉定五年七月二十三日到任六年四月宫观】

章良肱【承议郎运判嘉定六年六月十五日到任七年五月除金部郎官】

真德秀【朝请郎秘阁修撰运副嘉定八年二月一日到任十二月除知泉州】

俞建【朝奉大夫直宝谟阁运副嘉定十年六月五日到任十二年七月除金部郎中】岳珂【奉议郎运判嘉定十二年八月五日到任十四年八月除军器监淮东总领】陈宗仁【承议郎运判嘉定十四年闰十二月二十七日到任十七年五月令赴行在奏事】丘寿迈【朝请大夫直焕章阁运副嘉定十七年六月十二日到任绍定元年四月赴召】江湛【朝散大夫运判绍定五年十月初十日到任端平元年三月放罢】

高定子【中奉大夫直宝谟阁江东运判端平元年四月到任嘉熙元年正月赴召】唐璘【朝散郎直秘阁运判嘉熙元年四月十三日到任二年七月直华文阁知广州】李曾伯【起复朝散郎尚书兵部员外郎运判嘉熙三年四月到任兼督视行府参议官】徐鹿卿【朝奉郎运判嘉熙四年十月二十一日到任五年七月五日除浙东提刑】孟点【朝请大夫直秘阁运判淳佑元年八月十三日到任续准省劄兼权太平州江东淮东茶

盐所三年二月二十日令赴行在奏事】

邓泳【太中大夫宝章阁待制知太平州兼江东运副提领江淮茶盐所淳佑三年二月二十八

日到任同提领安边所四年三月除华文阁待制沿江副使知江州】

何元寿【淳佑四年四月七日以中大夫右文殿修撰知太平州兼提领江淮茶盐所兼江东副使同提领安边所五年二月罢】

丘岳【淳佑五年五月初一日以中奉大夫直显谟阁知太平州兼提领江淮茶盐所兼江东运

判同提领安边所八月改知江州沿江制置副使江西安抚使】

陈埜【淳佑五年十月初九日以太中大夫集英殿修撰知太平州兼江东运副兼提领江东淮

东茶盐所同提领安边所七年五月除户部侍郎提领茶盐所知太平州】

赵希?【以朝议大夫试礼部尚书督视行府参赞军事兼江东运使淳佑七年六月九日到任九年闰二月除端明殿学士知建宁府】

舒滋【以宣教郎直秘阁江东运判兼提领江淮茶盐所尚书省财用所参议官淳佑九年三月

二十八日到任十一年十二月除直宝章阁知温州】

吕好问【中奉大夫依旧将作监淮西摠领淳佑十一年十月到任十二年二月兼江东运判五月十一日除司农少卿依旧淮西摠领兼江东运判】

马光祖【中奉大夫守司农卿淮西摠领宝佑元年九月暂权江东运司事二年十一月除权户部侍郎兼知临安府浙西安抚使目下前来供职】

赵与□【朝请郎司农卿淮西摠领兼江东路运判宝佑二年十二月初二日到任三年七月十三日时暂权建康府留钥职事五年正月七日右文殿修撰两浙运副】

余晦【中奉大夫依旧权户部侍郎改除淮西摠领兼江东运副宝佑五年四月十一日到任六

年除宝章阁待制知平江府兼发运使】

郑羽【奉直大夫尚书户部左曹郎中淮西摠领江东运判宝佑六年二月十八日到任】倪
垕【朝散大夫干办行在诸军审计司於宝佑六年七月二十三日到任权管淮西摠领江东
运判当日奉圣旨除太府寺丞开庆元年正月省劄左曹郎中繫衔时暂兼权建康府管干沿
江制置大使司留司事务二月二十七日时暂兼权提领江淮茶盐所当年七月三日离任】

印应雷【朝奉郎守军器监淮西摠领兼江东运判开庆元年十二月十三日到任景定元年

正月二日兼提领江淮茶盐所景定元年四月除直焕章阁枢密副承旨】

陈绮【朝议大夫直徽猷阁江东转运副使兼提领江淮茶盐所景定元年六月到任二年二
月

兼江东提举三月进宝文阁八月除直龙图阁枢密副都承旨】

侍卫马军司【在城西门内天庆观右】

题名记汉京师有南北军卫尉掌宫门屯卫兵中垒校尉掌北军营垒之事後又增置八校及
羽林期门之属徼巡藩护兵威隐然为後世立军不易之制国家并列三衙虽曰沿袭五代然
实本西都遗意侍卫马军司盖创於後梁至後唐为侍卫亲军後周改为龙捷左右军本朝复
更铁骑曰捧日龙骑曰龙卫各十指挥所领骑兵之额盖三十有五端拱元年冬十月甲子特
置马步军龙卫神卫四厢都指挥使捧日天武於焉并建与殿前侍卫马步军都副指挥使及
都虞候凡八员通号管军其选顾不重欵中兴之初禁旅亲卫名籍仅存迨绍兴收诸将麾下
作三衙御前诸大军国威益震然基峙星布拱扈严翼率在内畿孝宗皇帝明谟雄断锐意外
御迺乾道七年三月始命分骑司屯金陵特捐缗钱凡六十万以劳戍役以壮龙蟠虎踞之势
诚命将帅卫中国之远虑今三十年於此矣倪不武曩者被命俾董骑士自念累世涵濡国恩
沦浹肌髓无以报塞顾复叨备管军之列夙夜勉励职业所当为者罔敢怠忽军务之暇因思
殿步二司皆有题名而诸军都统制亦各书之唯谨独马司因循未举是诚阙文迺考订国初
以至于今得百十有七人自建隆累朝名将则略纪其除罢岁月而中兴以来则并稽其迁改
之所自序列姓氏刻之坚珉不惟垂示方来庶几推绎功绪跃然起慕藎之意以坚报国之心
以无忘先世之勲业是倪所以建题名之本意非直为观美也庆元五年十月【阙】日武略
大夫荣州刺史侍卫马军都虞候郭倪记张光翰【建隆元年正月除都指挥使八月罢】

韩重贇【建隆元年八月除都指挥使二年七月改差】

刘匡义【建隆二年七月除都指挥使开宝六年九月罢】

张廷翰【乾德五年正月除都虞候开宝二年二月致仕】

李进卿【开宝二年八月除都虞候九月改差】

党进【开宝六年九月除都指挥使太平兴国二年十一月罢】

李汉琼【开宝六年九月除都虞候太平兴国二年十一月罢】

白进超【太平兴国二年十一月除都指挥使三年四月改差】

米信【太平兴国三年四月除都虞候六年八月迁都指挥使雍熙三年七月罢】

刘延翰【太平兴国五年十月权都指挥使六年七月罢】

李继隆【雍熙三年七月除都虞候端拱元年二月迁都指挥使至道三年五月罢】王汉忠
【端拱二年三月除都虞候五年六月改差】

王荣【淳化五年阙】

范廷召【至道三年七月除都指挥使咸平三年二月改差】

康保裔【至道三年七月除都虞候咸平三年正月死节河朔】

王汉忠【咸平三年二月除副都指挥使四年二月改差】

葛霸【咸平四年三月除都指挥使景德二年十二月罢】

高琼【咸平六年五月权阙】

刘谦【咸平六年五月权景德元年八月除都虞候二年十二月改差】

曹璨【景德二年十二月除副都指挥使大中祥符元年十二月迁都指挥使二年九月罢】

张旻【景德二年十一月除都虞候大中祥符元年改差】

郑诚【大中祥符元年四月权十二月除都虞候二年九月改差】

张旻【大中祥符二年九月除副都指挥使六年正月除枢密副使】

高翰【大中祥符三年九月到任七年十月改差】

王守贇【大中祥符七年十月除都虞候九年正月改差】

蔚昭敏【大中祥符九年正月除副都指挥使天禧二年七月改差】

靳忠【大中祥符九年正月除都虞候天禧三年六月改差】

王守贇【天禧三年七月除副都指挥使天圣三年三月改差】

刘美【天禧三年七月除都虞候五年八月致仕】

杨崇勳【天禧四年二月除都虞候乾兴元年正月改差】

夏守贇【乾兴元年二月除都虞候天圣二年二月改差】

杨崇勳【天圣二年三月除都指挥使三年十月迁殿前副都指挥使】

郝荣【天圣二年三月阙】

康继英【天圣二年三月除都虞候十月改差】

彭睿【天圣三年十月除副都指挥使六年正月致仕】

张遵【天圣三年十月除都虞候五年九月改差】

高继勳【天圣五年九月除都虞候六年正月改差】

石斌【天圣六年正月除都虞候七月改差】

王德用【天圣六年七月阙】

郑守忠【明道元年八月阙】

高继勳【明道元年八月除都指挥使景佑二年三月罢】

张昭远【明道元年八月除都虞候二年六月罢】

张守遵【明道二年六月除都虞候景佑元年十一月改差】

张潜【景佑元年十二月除都虞候二年五月改差】

郑守忠【景佑二年五月除副都指挥使四年闰四月改差】

许怀信【景佑二年五月阙】

刘平【景佑二年八月除都虞候四年闰四月改差】

高化【景佑四年闰四月除副都指挥使康定元年十二月改差】

石元孙【景佑四年十一月除都虞候康定元年正月改差】

孙廉【康定元年二月除都虞候四月改差】

方荣【康定元年四月除都虞候十一月改差】

李用和【康定元年十一月除副都指挥使庆历二年三月改差】

任福【康定元年十二月除都虞候庆历四年八月改差】

曹琮【庆历二年三月除副都指挥使五年五月致仕】

王元【庆历四年八月除都虞候五年闰五月改差】

许怀德【庆历五年闰五月除副都指挥使八年四月改差】

王信【庆历五年闰五月除都虞候八年四月改差】

郭承佑【庆历八年四月除副都指挥使八月改差】

周美【庆历八年四月除都虞候八月改差】

张茂寔【庆历八年阙】

狄青【庆历八年八月除副都指挥使皇佑三年六月罢】

范全【庆历八年八月除都虞候皇佑三年六月改差】

王凯【皇佑三年六月除都虞候四年九月迁殿前都虞候】

周美【皇佑三年六月除副都指挥使四年九月致仕】

张茂寔【皇佑四年九月除副都指挥使嘉佑六年五月罢】

王达【皇佑四年九月除都虞候十一月致仕】

纪质【皇佑五年二月除都虞候至和元年正月改差】

王从政【至和元年二月除都虞候五月改差】

范恪【至和元年五月除副都指挥使嘉佑四年改差】

王兴【至和元年五月除都虞候嘉佑三年九月改差】

孟元【嘉佑三年九月除都虞候十一月致仕】

郝质【嘉佑四年十二月除都虞候六年五月改差】

马怀德【嘉佑六年五月除都虞候九月改差】

李璋【嘉佑六年九月除副都指挥使十一月改差】

贾逵【嘉佑六年九月除都虞候十二月改差】

郝质【嘉佑六年十二月除都指挥使治平元年八月改差】

宋守约【嘉佑六年十二月除都虞候八年五月改差】

郭达【嘉佑八年五月除都虞候治平元年八月改差】

窦舜卿【治平元年八月除都虞候三年二月改差】

贾逵【治平元年八月除副都指挥使元丰元年六月改差】

杨遂【治平三年五月除都虞候熙宁五年十一月改差】

卢政【熙宁五年十一月除都虞候八年二月迁殿前都虞候】

张玉【熙宁八年二月除都虞候三月致仕】

杨遂【元丰元年六月除副都指挥使二年正月改差】

刘永年【元丰元年六月除都虞候二年正月改差】

卢政【元丰二年正月除副都指挥使三年十二月改差】

燕达【元丰二年正月除都虞候三年十二月除副都指挥使四年八月改差】

苗授【元丰三年十二月除都虞候四年十二月改差】

林广【元丰五年四月除都虞候七月致仕】

刘昌祚【元佑元年三月除都虞候二年十一月改差】

刘舜卿【元佑二年十月除都虞候三年七月改差】

李浩【元佑三年七月除都虞候五年十二月改差】

吕真【元佑五年十二月除都虞候绍圣元年正月改差】

姚麟【绍圣元年正月除副都指挥使二年九月改差】

王崇拯【绍圣二年六月权元符三年除都虞候八月改差】

王恩【元符元年二月除都虞候八月改差】

张整【元符元年二月权八月致仕】

贾岩【元符元年九月权十二月致仕】

曹诵【建中靖国元年八月除都指挥使崇宁元年四月宫观】

徐和【崇宁元年闰六月除都虞候大观二年四月除副都指挥使三年七月罢】

王恩【崇宁元年八月权四年三月改差】

曹评【崇宁四年二月除副都指挥使大观二年正月宫观】

刘德【崇宁四年二月除都虞候大观二年正月改差】

刘法【大观二年二月除都虞候三年十月罢】

高球【政和元年四月除副都指挥使八月迁殿前副都指挥使】

刘法【政和元年四月除都虞候八月改差】

杜大忠【政和元年八月除都虞候】

郭仲【政和元年八月除副都指挥使】

何灌【宣和七年十二月除都虞候】

王元【宣和年除副都指挥使】

曹蒙【宣和年殿前都虞候忠州团练使权主管侍卫马军司公事】

李邀【靖康元年中卫大夫果州团练使权主管侍卫马军司公事】

郭仲荀【靖康元年侍卫亲军马军都指挥使武安军承宣使主管本司公事改差主管殿前司公事】

薛安【靖康元年七月龙神卫四厢都指挥使黔州观察使权侍卫亲军公事】

杨惟忠【建炎二年检校少保建武军节度使龙神卫四厢都指挥使主管侍卫马军司公事】左言【建炎年侍卫亲军步军都虞候常德军承宣使权主管侍卫马军司公事】

李质【建炎年中侍大夫明州观察使权主管侍卫马军司公事】

刘锡【龙神卫四厢都指挥使明州观察使权主管侍卫马军司公事】

赵哲【建炎年左武大夫明州观察使枢密都承旨权主管侍卫马军司公事】

边顺【建炎三年九月龙神卫四厢都指挥使莱州防御使权主管侍卫马军司公事绍兴二年

九月改差】

辛永宗【绍兴元年十一月中卫大夫达州观察使神武中军统制权主管侍卫马军司公事续改差江西总管】

闾勅【龙神卫四厢都指挥使明州团练使权主管侍卫马军司公事】

兰整【绍兴二年平海军承宣使权主管侍卫马军司公事四年八月授龙神卫四厢都指挥使

五年闰二月改差浙东总管】

韦渊【绍兴四年昭庆军节度使开府仪同三司权主管侍卫马军司公事】

王燮【绍兴五年闰二月龙神卫四厢都指挥使建武军承宣使除主管侍卫马军司公事改宫

观】

边顺【绍兴五年闰二月步军司权马军司公事】

解潜【绍兴五年十一月協忠大夫华州观察使权主管侍卫马军司公事十二月权三司职事

六年九月扈从车驾幸平江七年正月宫观】

刘公权【右武大夫和州防御使知合门事权主管马军司公事】

兰整【绍兴六年九月浙东总管权主管侍卫马军司公事七年六月罢军职宫观】刘錡【绍兴七年正月右武大夫开州团练使带御器械权主管侍卫马军司公事兼三司职事

十一月罢】

边顺【绍兴七年六月步军司兼权马军司公事七月致仕】

解潜【绍兴七年十一月協忠大夫华州观察使权主管步军司八年四月权马军司公事九年

正月改差福建总管】

刘錡【绍兴九年三月自淮西军回供职十年二月改差】

刘光烈【绍兴十年三月中卫大夫庆远军承宣使权主管马军司公事十三年三月内改差】赵密【绍兴十三年龙神卫四厢都指挥使宣州观察使步军司权马军司公事八月免兼】田晟【绍兴十三年八月龙神卫四厢都指挥使镇西军承宣使除主管马军司公事十九年六

月改差】

刘宝【绍兴十九年六月殿前司选锋军统制除天武四厢都指挥使武泰军承宣使主管马军

司公事八月改差】

成闵【绍兴十九年八月宣州观察使权主管马军司公事二十二年三月除主管殿前司】

李显忠【绍兴三十二年六月宁国军节度使龙神卫四厢都指挥使建康府驻劄御前诸军

都统制除太尉主管马军司公事隆兴元年六月罢】

张守忠【隆兴元年六月制州观察使步军司後军统制除主管马军司公事乾道元年二月

致仕】

李舜举【乾道元年三月左武大夫忠州刺史马司选锋军统制除主管马军司公事六年十

月改差】

李显忠【乾道六年十月复威武军节度使左金吾卫上将军除主管马军司公事七年三月

奉圣旨移屯建康府行司六月复太尉九年正月宫观】

王权【乾道九年闰正月复武康军承宣使除主管马军司公事致仕】

赵撙【乾道九年闰正月昭化军承宣使除主管马司公事四月除马军司都指挥使淳熙二

年八月致仕】

李川【淳熙二年八月武功大夫文州刺史除侍卫马军司都虞候九月改除】

王明【淳熙二年九月武功大夫惠州刺史除马军司都虞候三年十月宫观】

吴拱【淳熙三年十月武康军节度使右金吾卫上将军除马军司都指挥使五年十二月致

仕】马定远【淳熙六年正月武德郎左领军卫郎将除侍卫马军司都虞候七年九月改差】

雷世贤【淳熙七年十月武翼大夫右骁卫将军除马军司都虞候十二年十二月除副都

指

挥使绍熙元年十月改除】

张师顔【绍熙元年十月武德郎左领军卫郎将除马军司都虞候庆元四年三月主管台州崇道观】

郭倪【庆元四年三月十六日以武义大夫除主管马军司公事五年六月八日除马军司都虞

候嘉泰元年八月二日改除】

李珪【嘉奉元年八月除主管马军司职事三年七月除都虞候开禧元年六月赴召】李汝翼【开禧元年十月除主管马军司职事开禧二年四月去司】

王瑛【开禧二年六月以右武大夫江南东路马步军副总管除主管马军司职事当年八月赴

召】

戚拱【开禧二年八月以武德郎镇江府诸军副都统制知楚州管内安抚除主管马军司职事

三年十二月赴召】

周虎【嘉定元年八月以文州刺史知和州兼管内安抚提举江南西路兵甲公事除主管马军

行司公事四年闰二月除马军司都虞候五年五月二日改除】

许俊【嘉定五年五月二日以武功大夫池州诸军副都统制主管马军司公事嘉定六年十月

十一日改除】

冯榭【嘉定六年十月十一日以武功大夫开州刺史左领军卫将军除主管马军司公事嘉定

七年十月九日改除】

刘瑋【嘉定七年十月十三日以武经郎江州诸军副都统制改除主管马军司公事嘉定十年

七月二十三日改除镇江都统制】

李庆宗【嘉定十年八月二十八日以训武郎平江府许浦水军副都统制改除主管马军司公事十二年十月三日赴召】

扈再兴【宝庆二年三月五日以左武大夫忠州团练使充鄂州江陵府驻劄御前诸军都统制兼知康阳军改除蕲州防御使侍卫马军司都虞候三年二月致仕】

许俊【宝庆三年九月十六日以左武大夫潭州观察使除主管侍卫马军司公事兼权建康诸

军都统制司职事绍定四年七月除马军司副都指挥使】

孟珙【端平元年四月二十三日以训武郎江陵府诸军副都统制除建康诸军副都统制兼权马军司职事五月十一日除主管马军司事十一月二十九日除带御器械日下供职十二月二十四日准告因除主管马军司公事特转武功郎二年正月十九日依旧职时暂黄州驻劄十一月七日兼权知黄州嘉熙元年三月二十四日改除】

王监【嘉熙元年四月十二日以拱卫大夫福州观察使江东马步军副总管兼权马军司职事九月十四日除主管马军司公事时暂兼知黄州二年六月二十八日除马军司都虞候三年三月除武康军承宣使马军副都指挥使四年九月兼知濠州淳佑三年正月改除】

吕文德【淳佑三年正月除福州观察使马军副都指挥使兼知黄州四年五月除保康军承宣使六月除淮西招抚使兼知濠州五年四月十九日除枢密副都承旨七年五月二十六日除左领军卫上将军】

御前诸军都统制司【在行宫北绍兴十二年建】

题名记高宗既成中兴大业驻蹕钱塘归马牧牛鞭囊弓矢尽收兵柄掌之枢庭选将列帅分屯要区以金汤屏蔽矧兹建业为时陪京控扼长江襟带淮右尤为重镇始绍兴丁巳以张公循王俊驻劄于此由丁巳至辛亥实五十有五载由张公至今更十有三人或十有七年或十有四年或四三年或一二年而去其贤智勲业固有国史与天下之公论不可泯灭然未有以纪去来之月日与夫相代之前後者是亦一司之阙典济既备数之明年始克稽诸故籍次其後先礲石而识之为之说曰天下有事将在乘机以立功天下无事将在解严而养士若夫缮

武库之械器精士卒之艺能丰有司之财帛有事无事皆不可一日惰也承君之宠而受君之任者其可安安而居哉能知後之视今亦犹今之视昔则必务自勉而求无愧如是则题名之设岂特纪姓氏书岁月记後先而已耶绍熙二年四月十一日武功大夫荣州刺史充建康府驻劄御前诸军都统制赵济记

续记题名有记旧矣圣朝人物将于是乎观而况将帅者三军司命爪牙王室关系非小去来除代讵可听之湮没而无传哉金陵为大都会粤自警蹕南渡增屯重兵屏蔽畿甸累圣相承选命尤谨中兴名将磊砢相望閎黜硕画彪炳汗青类由兹出友谅误恩此来始至之日 举戎务倥偬靡暇越三月军事稍稍就绪因询前哲或曰厅之左有题名在焉鈎画翠珉鸾停鹄峙摩挲熟视表表虎臣姓名先後品秩崇庠往来岁月昭然可考而刊载鳞次溢于颠尾迩年帅贰镌题无所顾瞻徘徊良切慨叹因念日月駸寻名迹易泯苟惮续为是孤前志载砉坚石用寘厅壁之侧以纪後來异时斯刻既漫与我同志嗣而广之是亦今日之事也绍定辛卯仲冬上澣合肥夏友谅续记

张俊【少师镇北崇信奉宁军节度使淮南西路宣抚使兼河南北诸路招讨使兼营田大使齐国公随车驾驻蹕临安府於绍兴四年三月内将带所部神武右军人马前来建康府驻劄绍兴五年十二月三日改充行营中军於绍兴六年八月内起发前去泗州绍兴七年三月内复回建康府至绍兴十一年四月二十七日被除枢密使其所部军马奉圣旨改充御前军】

王德【侍卫亲军马军都虞候清远军节度使御前统制绍兴十二年十一月二十一日赴召差充建康府驻劄御前诸军都统制绍兴十二年十二月十四日到任至绍兴十五年九月七日改差两浙东路马步军副都总管明州驻劄】

王权【龙神卫四厢都指挥使宁州观察使殿前司忠勇马军统制除武康军承宣使差充建康府驻劄御前诸军都统制绍兴十五年九月十二日到任任内除清远军节度使至绍兴二十一年十一月七日赴行在奏事】

李显忠【宁国军节度使龙神卫四厢都指挥使池州驻劄御前诸军都统制差充建康府驻劄御前诸军都统制御营先锋都统制绍兴三十一年十一月九日到任任内兼淮南西路制置使京畿河北西路淮北寿亳州招讨使至绍兴三十二年五月二十七日除太尉主管侍卫马军司公事】

郭振【武节郎殿前司左军统制兼知寿春府主管管内安抚司公事除蕲州防御使权主管建康府驻劄御前诸军都统制职事绍兴三十二年六月十六日到任至当年七月二十一日改差两浙西路马步军副总管秀州驻劄】

邵宏渊【亲卫大夫常德军承宣使兼合门宣赞舍人池州驻劄御前诸军都统制差主管建康府驻劄御前诸军都统制职事绍兴三十二年八月九日到任任内除广州观察使又除武安军承宣使检校少保安远军节度使兼淮南京西京东河北路招讨副使於隆兴元年六月

十四日降授武功大夫至隆兴二年四月二日复成州团练使改差江南西路马步军总管隆兴府驻劄】

王彦【保平军节度使龙神卫四厢都指挥使知襄阳府充京西南路安抚使差充建康府驻劄御前诸军都统制兼淮南西路招抚使节制本路军马隆兴二年四月七日到任至乾道元年三月二十四日差提举江州太平兴国宫】

刘源【武功郎合门宣赞舍人侍卫马军司中军统制特转武略大夫忠州团练使差主管建康府驻劄御前诸军都统制职事乾道元年四月五日到任任内转武显大夫高州防御使至乾道三年八月十四日差充荆湖南路马步军总管潭州驻劄】

张荣【武功大夫建康府驻劄御前左军统制差充建康府驻劄御前诸军副都统乾道三年闰七月二十七日到任任内转右武大夫至淳熙元年二月十一日改差荆鄂驻劄御前诸军副都统制】

郭振【侍卫亲军步军都指挥使奉国军承宣使主管侍卫步军司公事差充建康府驻劄御前诸军都统制乾道三年九月二十六日到任任内兼知庐州充淮南西路安抚使马步军都总管转侍卫亲军马军都指挥使除武泰军节度使至乾道六年十月六日守本官致仕】

李舜举【荣州刺史主管侍卫马军司公事差充建康府驻劄御前诸军都统制乾道六年十月二十八日到任至乾道七年十二月四日放罢】

郭刚【左武大夫达州刺史池州驻劄御前诸军都统制差充建康府驻劄御前诸军都统制乾道七年十二月四日到任任内转蕲州防御使又转拱卫大夫明州观察使兼知和州主管管内安抚司公事又转亲卫大夫宁远军承宣使又除福州观察使至淳熙十一年三月十八日守本官致仕】

翟琼【武显大夫侍卫马军行司中军统制权管侍卫马军司职事差充建康府驻劄御前诸军副都统制淳熙元年三月十日到任至当年十二月十九日添差江南东路马步军副总管太平州驻劄】

张荣【右武大夫左千牛卫大将军再差充建康府驻劄御前诸军副都统制淳熙二年正月四日到任至淳熙三年正月十七日添差江南东路马步军副总管建康驻劄】

刘沂【武节大夫带御器械差充建康府驻劄御前诸军副都统制兼知和州淳熙三年二月十

四日到任至当年八月十六日罢】

王世雄【武显大夫权知郢州差充建康府驻劄御前诸军副都统制兼知和州淳熙三年十月二十六日到任至淳熙六年正月二十六日赴行在奏事除右千牛卫将军】

李彦孚【武经大夫殿前司护圣步军统制差充建康府驻劄御前诸军副都统制兼知和州淳熙六年四月十八日到任当年七月内罢知和州至当年十月六日改差平江府许浦镇驻劄御前水军副都统制】

刘光祖【武节大夫英州刺史江州驻劄御前诸军副都统制改差充建康府驻劄御前诸军副都统制淳熙十年十月二十二日到任至淳熙十一年五月十七日罢】

郭钧【武功大夫楚州团练使右骁卫将军兼领侍卫马步军司职事差充建康府驻劄御前诸军都统制於淳熙十一年五月五日到任任内转右武大夫蕲州防御使至淳熙十五年六月二十一日赴行在奏事除殿前副都指挥使】

梁师雄【武经郎步军司中军统制差充建康府驻劄御前诸军副都统制淳熙十一年六月九日到任至当年七月九日召赴行在除左领军卫中郎将兼权侍卫步军司职事】

阎仲【保义郎殿前司选锋军统制特授修武郎差充建康府驻劄御前诸军副都统制淳熙十二年三月五日到任任内转训武郎於淳熙十五年七月二十七日就任差充都统制任内转武翼郎武经郎至绍熙元年四月二十四日赴行在奏事转一官差主管华州云台观】

冯湛【降武翼大夫兼合门宣赞舍人镇江府驻劄御前诸军副都统制改差充建康府驻劄御前诸军副都统制淳熙十五年十二月十八日到任任内转武经大夫武节大夫武德大夫至绍熙五年二月十二日改差江陵府副都统制】

赵济【武功大夫荣州刺史权主管侍卫步军司公事兼权侍卫马军司职事绍熙元年四月二十九日差充建康府驻劄御前诸军都统制五月十六日到任至绍熙四年六月初九日致仕】

皇甫斌【武德郎权发遣楚州军州事绍熙五年二月十二日改除建康府驻劄御前诸军副都统制二月二十八日到任任内转武翼大夫武经大夫闰十月七日差充都统制至庆元元年二月二十四日罢】

王知新【武功郎左武卫中郎将绍熙五年闰十月七日改差充建康府驻劄御前诸军副都统制十一月三日到任任内转武经大夫至庆元元年三月七日差兼知庐州三年带忠州刺史再任於庆元四年六月十五日就任除知合门事】

吴曦【起复濠州团练使知庐州军州事主管淮南西路安抚司公事庆元元年二月九日除

建康府驻劄御前诸军都统制四月一日到任任内转蕲州防御使至庆元三年五月二十四日除殿前司都指挥使】

赵【阙武功大夫吉州刺史充池州驻劄御前诸军都统制庆元三年五月二十四日改差充建康府驻劄御前诸军都统制六月十五日到任任内转濠州团练使至嘉泰三年二月二十日致仕】

董世雄【武德郎侍卫步军都虞候兼权侍卫马军司职事嘉泰三年三月二十四日改差充建康府驻劄御前诸军都统制於四月十五日到任至嘉泰四年三月二十四日赴行在奏事至四月初二日罢】

李爽【武德 镇江府驻劄御前诸军都统制嘉泰四年 月二十二日赴行在奏事改差建康府驻劄御前诸军都统制当年四月十三日到任至开禧元年八月内差兼知庐州开禧二年六月十四日罢】

郭倬【武翼郎左骁卫中郎将嘉泰四年四月十九日差充建康府驻劄御前诸军副都统制五月十六日到任任内转武经郎又转武节郎开禧二年三月十二日改差池州驻劄御前诸军都统制】

田琳【武翼郎建康府驻劄御前水军统制开禧二年四月二十四日除建康府驻劄御前诸军副都统制四月二十九日到任六月二十一日除都统制七月十二日差兼知庐州任内转武翼大夫果州团练使又转武节大夫依前果州团练使又转达州刺史开禧三年十月十六日致仕】

李郁【忠州团练使左领军卫大将军开禧三年九月七日除建康府驻劄御前诸军都统制兼知庐州节制淮西军马十月十九日到任任内转郢州防御使至嘉定元年七月十六日差提举建宁府武夷山冲佑观】

何汝霖【武功大夫殿前司选锋军统制兼知盱眙军嘉定元年二月十二日差充建康府驻劄御前诸军副都统制三月初一日到任於嘉定元年七月十六日被奉圣旨前去庐州屯驻节制淮西出戍军马嘉定四年四月二十四日赴行在奏事六月二十六日除环卫官】

庄松【武功大夫忠州刺史楚州驻劄御前武锋军副都统制兼知楚州嘉定元年七月十六日改差充建康府驻劄御前诸军都统制九月初六日到任任内转忠州团练使嘉定六年十月三日被奉圣旨与宫观至十月十四日罢】

许俊【武功大夫吉州刺史主管侍卫马军司公事嘉定六年十月十一日被奉圣旨除建康府驻劄御前诸军都统制十月十四日到任任内因提兵前去安丰军究心经画保护边圉训练士卒筑濬城濠制办军器打造战舰比他司实为整备奉圣旨特转两官於嘉定十一年十

一月二十五日准告转右武大夫忠州团练使左骁卫将军嘉定十四年五月二十九日差提举绍兴府千秋鸿禧观七月一日离任】

许国【武功大夫吉州刺史右屯卫将军充鄂州江陵府驻劄御前诸军都统制兼知随州兼京西湖北沿边都巡检使提督随枣信阳三城节制屯戍军马嘉定十四年五月三十日被奉圣旨除建康府驻劄御前诸军都统制八月二十四日到任於当年十月十一日被奉圣旨兼权知庐州主管淮南西路安抚司公事马步军都总管节制本路屯戍军马至嘉定十五年十一月内差提举建康府崇禧观十二月一日离任】

翟朝宗【武德大夫高州刺史镇江府驻劄御前诸军副都统制楚州置司同节制屯戍军马嘉定十五年十一月二十五日被奉圣旨除建康府驻劄御前诸军都统制兼权知庐州军州兼管内劝农营田事淮南西路安抚副使马步军副都总管兼提领措置屯田专一措置提督修城节制本路屯戍军马十二月十七日到任任内转武功大夫忠州团练使宝庆元年六月十九日被命特转一官令时暂归司至宝庆元年十月二十六日除知合门事兼客省四方馆事提点制造御前军器所十一月十七日离任】

夏友闻【武节郎右武卫郎将宝庆元年十一月二十日被奉圣旨时暂兼权建康府驻劄御前诸军副都统制职事管干军马十二月十六日到任任内陞左骁卫中郎将转武德郎绍定三年四月十九日致仕赠武略大夫宣州刺史】

许俊【左武大夫潭州观察使主管侍卫马军行司公事绍定三年十月初八日准省劄时暂兼权建康府驻劄御前诸军都统制司职事十月初十日交割管干任内特授潭州观察使绍定四年九月初三日离任】

夏友谅【武略大夫忠州刺史池州驻劄御前诸军副都统制绍定四年八月十六日准枢密院劄子被奉圣旨江西讨捕获捷立功特除建康府驻劄御前诸军都统制九月初三日到任任内该遇庆寿赦恩特转武显大夫又曾提领人马总统诸项节制调遣剋取盱泗全复城壁其功优异奉圣旨特转四官未準告下绍定六年九月二十日致仕特赠武功大夫和州防御使】

李虎【武略大夫達州刺史池州驻劄御前诸军都统制改除建康府驻劄御前诸军都统制绍定六年十一月十四日到任至端平元年六月十七日兼知光州任内转右武大夫端平二年五月十九日回司依旧建康都统制改兼知泗州当年七月十五日改除镇江府驻劄御前诸军都统制】

王监【右武大夫和州防御使带御器械兼权主管侍卫步军司公事兼侍卫马军司职事兼权建康府驻劄御前诸军都统制总统淮西一路军马端平二年十一月二十八日到任任内转拱卫大夫福州观察使霍丘县开国男食邑三百户端平三年五月初三日免兼离任】

王忠【保义郎特差权发遣江南东路马步军副总管时暂兼权建康都统司职事嘉熙元年三月十五日到任嘉熙二年五月二十九日兼权建康府驻劄御前诸军副都统制嘉熙三年三月二十七日带行环卫官除建康府驻劄御前诸军都统制任内带行左卫将军文州刺史节次转武节郎淳佑二年正月十一日召赴枢密院稟议】

王福【利州观察使左武卫上将军知安丰军兼管内劝农营田屯田使沿边都巡检使节制本军屯戍军马淳佑二年正月十二日除建康府驻劄御前诸军都统制兼知安丰军任内带行带御器械合肥县开国男食邑三百户特除安远军承宣使淳佑四年五月二十七日奉圣旨依旧带御器械建康都统制时暂赴枢密院稟议当年六月十五日解离安丰军职事续准枢密院劄子奉圣旨时暂於扬州驻劄同共措置扞御淳佑四年十一月初八日改除主管侍卫步军司公事仍兼侍卫马军司旧司职事】

鄮进【武功大夫遥郡刺史合门宣赞舍人淮南西路马步军副总管兼侍卫马军行司中军统制淳佑四年六月空日枢密院劄子六月十四日奉圣旨兼权建康府驻劄御前诸军副都统制职事於当年七月十八日到任任内准告授吉州刺史淳佑七年五月空日枢密院劄子五月十九日奉御笔除江州驻劄御前诸军都统制六月初五日离任】

刘全【拱卫大夫福州观察使左屯卫大将军京西南路安抚使马步军都总管知襄阳军府事兼管内劝农营田屯田使充鄂州江陵府驻劄御前诸军副都统制随县开国男食邑三百户淳佑五年三月十一日枢密院劄子奉圣旨召赴枢密院稟议续准枢密院劄子四月十八日奉圣旨除建康府驻劄御前诸军都统制於六月初六日到任至七月二十六日准尚书省劄子三省同奉圣旨兼权知真州节制本州屯戍军马至淳佑六年闰四月十六日离任回司任内准告转授亲卫大夫加封随县开国子食邑五百户淳佑七年五月空日枢密院劄子五月十九日奉圣旨除环卫官六月初四日离任】

张仲宣【拱卫大夫扬州观察使左武卫大将军镇江府驻劄御前诸军都统制沈丘县开国子食邑五百户淳佑七年五月空日枢密院劄子五月十九日奉御笔除建康府驻劄御前诸军都统制於当年六月十六日到任任内该遇明堂大礼赦恩告进封沈丘县开国伯加食邑二百户淳佑九年八月初六日致仕】

王忠【武节郎文州刺史左武卫大将军荆湖南路马步军副总管带行环卫官左武卫大将军潭州驻劄仍厘务兼潭州飞虎亲兵忠义诸军都统制後來知院陈大使改除其行府一行官属结局随司解职淳佑九年八月空日枢密院劄子八月十四日奉御笔除建康府驻劄御前诸军都统制於当年十月二十二日到任任内节次准告转充武经大夫淳佑十一年八月空日枢密院劄子八月十三日奉圣旨王忠赴枢密院稟议】

马汝海【武功大夫合门宣赞舍人江南东路马步军副总管和州宁淮军统制淳佑八年六月空日枢密院劄子六月十一日奉圣旨除建康府驻劄御前诸军副都统制於当年六月二十一日到任淳佑九年五月空日枢密院劄子五月六日奉御笔除池州驻劄诸军副都统制

离任讫】

孙琦【武功大夫左卫将军平江府驻劄御前许浦水军副都统制淳佑九年五月空日枢密院劄子五月六日奉圣旨除建康府驻劄御前诸军副都统制於当年五月十九日到任淳佑十年三月空日枢密院劄子三月二日奉圣旨带行右骁卫将军续准淳佑十年五月空日枢密院劄子五月十五日奉圣旨差知招信军】

汤孝信【左武大夫福州观察使左屯卫大将军两浙东路马步军副总管淳佑十年六月空日枢密院劄子五月二十七日奉御笔除建康府驻劄御前诸军副都统制於当年六月十五日到任续准枢密院劄子兼摠制镇江府殿前司策应军马时暂镇江府驻劄淳佑十一年八月空日枢密院劄子八月二十六日奉圣旨着与宫观】

张文彬【修武郎统制真州军马淳佑十一年八月空日枢密院劄子八月十日奉御笔除建康府驻劄御前诸军副都统制续准枢密院劄子八月十八日奉圣旨特与带行左骁卫郎将令听两淮制置大使司调遣於当年九月十一日到任任内节次转充武翼郎淳佑十二年四月二十八日离任】

王德【武功大夫左屯卫将军特差淮东制置大使司计议官淳佑十二年五月空日枢密院劄子枢密院奏右五月二十一日奉圣旨特与叙复元官时暂兼权建康府驻劄御前诸军副都统制职事於当年六月八日到任淳佑十二年十一月六日奉御笔除建康副都统制宝佑二年正月十九日致仕】

陈玺【训武郎江南东路马步军副总管淳佑十一年八月空日枢密院劄子八月十三日奉圣旨王忠今赴枢密院稟议所有建康都统制职事交割与江东总管陈玺兼权於当年八月二十八日到任淳佑十一年十二月空日枢密院劄子十二月八日奉圣旨除建康府驻劄御前诸军都统制任内昨因部兵前去涡河剿贼立功特转三官转充武节郎】

汤孝信【左武大夫福州观察使左屯卫大将军除建康府驻劄御前诸军都统制於宝佑二年六月二十八日到任至宝佑二年九月十四日离任】

陈奕【武功大夫合门宣赞舍人除建康府驻劄御前诸军副都统制於宝佑二年七月二十五

日到任至宝佑五年闰四月十九日离任】

王监【武康军承宣使沿江制置使司谏议官除建康府驻劄御前诸军都统制於宝佑三年九月十五日到任续改差京湖宣抚大使司谏议官宝佑五年七月初十日离任】

智春【武德大夫合门宣赞舍人除建康府驻劄御前诸军副都统制於宝佑五年闰四月二十日到任至宝佑六年十二月十四日离任改知通州】

朱广用【武功大夫右骁卫将军沿江制置使司谏议官池州驻劄御前诸军都统制次改除建康府驻劄御前诸军都统制於宝佑五年七月十一日到任至景定元年九月初十日离任】

孙虎臣【武德郎合门宣赞舍人除建康府驻劄御前诸军副都统制於宝佑六年十二月十五日到任至开庆元年三月十六日离任】

锺寔【武德大夫合门宣赞舍人淮西马步军副总管除建康府驻劄御前诸军副都统制於开

庆元年三月十七日到任至当年十二月二十四日致仕】

赵国英【武略大夫两淮制府帐前都统制除建康府驻劄御前诸军副都统制於景定元年二月二十八日到任至景定元年八月初五日离任】

苏才【武功大夫带行环卫官建康府驻劄御前诸军都统制兼沿江制置大使司计议总建

康太平州两郡江面兵船於景定元年六月十八日到任】

李海【武功大夫合门宣赞舍人建康府驻劄御前诸军副都统制於景定元年八月初六日到

任】

提领江淮茶盐所

嘉熙四年八月创制置茶盐使以户部尚书岳珂为之御笔赐珂曰朕以边事未息国计告匱思为变通之策遂稽先朝故寔畀卿以制置茶盐使意欲絶私贩以收利权通浮盐以丰邦课去苛征以惠商贾卿其竭心体国毋弛法毋徇情使用足於上而扰不及民以副委任责成之意则予汝嘉此司存之所由始也淳佑元年五月珂被召省制置茶盐使置提领以江东麾节兼徐公鹿卿孟公点邓公泳何公元寿丘公岳陈公垵舒公滋皆以太平守臣江东转运兼吴公渊以太平守臣兼淳佑宝佑凡再至马公光祖淳佑间以江东转运淮西总领兼宝佑中复以沿江制置使兼其後倪公屋印公应雷皆以转运总领兼陈公绮则以转运副使兼由珂而

後凡以太平守臣兼领者则置司本州不为太平守臣者置司皆在建康淳佑四年四月给奉使印始正提领江淮茶盐所之名此司存之所由定也其初客贩正盐浮盐每一袋收钱二十贯六百文真州卖盐不理资次者每袋收钱一十贯三百文皆名曰助军钱客贩茶每一长引收钱十二贯三百六十文每一短引收钱一十贯三百文皆名曰审验钱内有分隶曰吏禄钱凡所收钱并用三分十八界会七分十七界会又置秤盘局于采石盐以三百二十斤为一袋草茶以百二十斤为一长引百斤为一短引末茶百二十斤为一长引九十斤为一短引剩数拘没坐罪此则岳尚书制置之时也其後因之又添置邓步梅渚二局拘浙盐助军钱则孟运判之时也罢采石秤盘加收盐袋助军钱省邓步梅渚二局则何运副之时也印给出山由子鴈添局拘榷则吴尚书之时也淳佑中兼领财用分司遂拨镇江榷货务并归本所又创采石分司复秤盘局又创池口局及常州丹阳上下局拘徽严处等州草茶之过淮者皆使纳钱又创宜兴溧阳二局拘浙盐搭买香引又创江州分司凡上江茶每一长引收钱二百贯以三十贯入分司百七十贯入本所每一短引收钱百七十贯以二十贯归分司百五十贯归本所皆名曰贴纳钱江东草茶审验钱如旧仍不问长短引每引并收贴纳钱一百贯於是茶盐所岁入倍於常时财用所之入亦与本所等此则舒运判之时也此後申请六事一曰禁止权掇【照对前政任内率以乡曲新故分任诸局月日应副人情甚者白占借补纵横其间既不以荣进自期又非以职业自见朝营暮度惟务攫拏如蚁慕羶如蝇见血入於公者不一二而入於私者已什百局务既不可为而商旅亦重困矣今自光祖到官为始诸局并差见任文武官虽未能尽必其廉谨无玷然按察之所及谪罚之所加其有尽瘁急公洗手奉职为官办事者当行剡荐或有违戾定当按劾所有以前权掇之弊并行止絶】二曰省并诸局【照对上江之茶下江之盐紧要纂节去处诚不可不置立局分前此所创子局星罗棋布不分紧慢月益日增被差之官下逮吏卒欲饱溪壑必不徒行抉剔搜罗无所不至而商旅始有罹其患者矣今就中逐项斟酌除采石秤制盐袋芜湖贴纳搭引香斤检视批发不可废外其建康池州池口镇江府丹阳常州并无锡江阴诸局并就委各处州县佐官拘榷本所更不差官置局外有宜兴溧阳原系秤盘浙盐搭卖茶引乳香去处今浙盐既未打发上件局权且停止却候续作区处其镇江一局止是检察下江草茶在官既无所收亦合省并】三曰订正权衡【照对本所秤盘客人袋盐正要轻重适平公私两便前此局官不能洁已奉公贪风相扇每遇客船到岸先行打话以贿赂之多少为斤两之低昂秤子等人全用手法秤盘之际暗号多端或摸颌扞巾或摇头瞬目但知逐鹿不见泰山传笑迺遐貽害商旅今光祖躬亲前去采石唤上客人对面是正权衡刻定印押将前来所用私秤当官劈毁务在公私两不相亏金曰公平已雕板榜为照】四曰禁戢苛取【照对各局事例本是贍给官吏并一行人所以防其苛取前政任内已尝具申朝省自有成例近年以来又於此外创立名色层见迭出有所谓到岸钱有所谓住卖钱又有所谓过局钱甚至批引以号有钱客买铺买有钱判状请印之类亦皆有钱其他诛求未易枚举茶以引计盐以袋计积而言之不知其几自光祖领事以来已戒飭官吏将前件弊窠一切蠲革如有违戾官员按劾吏卒决配已出榜在局张挂约束去讫】五曰住给茶由【照得江西产茶州郡客人起茶既有太府寺所给茶引又有分司入山公据及筒袋印纸关防已为严密昨因审验窠名又给出山由子委是重叠徒资通判厅官吏邀阻乞觅扰人之弊今朝廷新降指挥已并审验而为贴纳所有上件由子并行住给已施行去讫】六曰约束牙侩【照得茶船到岸例系牙人保税牙侩无状兜收腾倒以客人之财本为私家之营运将新压旧挪後换前动涉岁时不还客本又有揽下客人纳官之钱归已侵用却待卖出客货逐旋

补纳公私两受其害光祖自到官即帖局官唤上系籍官牙责立罪状不许循习旧弊如违定作施行】此则马总领之时也罢采石分司并归本所则陈运副之时也其规模之因革如此主管文字一员或二员以院辖差充或从本所於已作县人选辟干办公事一员准备差遣二员芜湖采石属官三员或选辟或堂差其官职之建置如此课入有殿最有劝赏着于令

提领建康府户部贍军酒库所

中兴以来创酒库于建康府者行宫一库本府三库江东安抚司二库淮西总领所四库侍卫马军司一库御前诸军都统制司十八库总二十九库乾道中周总领关申朝廷置户部贍军酒库所将二十九库并入本所於是城内置东南西北中五库及嘉会镇淮凤台三库城外置丰裕龙湾两库共为十库至嘉定年间又於石井韩桥湖孰增置三库淳佑二年池总领圣夫又将在城八库并作三库凤台镇淮为一库东西北及嘉会为一库南中为一库淳佑十二年吕总领好问省东南西北中五库城内只作嘉会凤台镇淮三库其城外二库仍旧绍定中赵大使善湘又於城外创置防江一库淳佑初吴制使渊又创置激赏?五库此六库皆隶沿江制置司淳佑十一年吕总领好问申朝廷将制置司六库并入本所包认岁额改防江为城北库激赏为城南库城西门为城西库靖安为龙湾新库天禧为南子库宝佑二年将城南西子库并入丰裕库龙湾新库并入旧库今一岁之入解纳御前酒库所者七十五万贯【十七界官会下同】分隶沿江制置司者七十六万贯分隶江东安抚司者二十三万三千三百五十一贯四十文分隶建康府者一十五万四千四百五十五贯【月有小尽则计日除之】分隶侍卫马军司者二万二千二百七贯七百八十文分隶御前诸军都统制司者三十七万八千二百三十七贯三百九十六文余皆入于淮西总领所充饷军等用此酒所因革之大略也提领以总领兼

主管文字一员

嘉定年间置或堂除或从本所选辟并以已作县京朝官充二年满转一官

干办公事或准备差遣一员

嘉定年间置京选通差并从本所选辟三年满转一官零月日计日理赏减磨勘

酒库监官

乾道七年各库置两员开禧初省一员增使臣五员嘉定以後嘉会镇淮凤台丰裕龙湾五库并系本所选辟其东西南北中五库系吏部注差淳佑十年省东西南北中五库官余五库官仍从选辟任满照条格推赏

杂场监官

嘉定年间置两员以司采买淳佑十年省一员或部注或选辟任满照条格推赏

都钱库监官

嘉定年间置一员以司出纳吏部注差任满照条格推赏

景定建康志卷二十六

卷二十七

<史部,地理类,都会郡县之属,景定建康志>

钦定四库全书

景定建康志卷二十七 宋 周应合 撰

官守志四

诸县令

上元县厅壁记秣陵治上元江宁两县明道先生尝主上元簿摄行令事均税听讼挈其民於敬让视事真令等风行瞬息欠申间播流至今於是地灵光焰旁左莫与京吾里曹君之格随牒赋邑适得此百里地引领想像如先生复出率职廸谊捐身相民曩吏揽为市廛欺赋租类足为民病銳意一切洞究根原缓民急吏经界法不行诡蔽寄挟釀诈万端昧旦坐听事揆赋輿所当输簿正以差户税一境颂平两竞在庭不下席亟决亡何险健退听事寢省狴圉屡空则以余暇定倾换蝨若亭若堂错络近远门皇吏舍悉趋坚良合亡虑屋百楹县无他羨飭材度费皆已出向以铜章刊为县阙典前阅令长置莫问岁亦云屡亟上之府从朝廷更铸下之县事复有小於印章者君无不疏理安植之念且终更践遣信重趼来请记盖环百里为县聚民万室欣戚恬愉我手繫岂徒以执灋制商功利趣了朝暮哉今之健有决者徒曰县负我以力胜民惟恐不至顾有详考而深思以今准昔如君行县事以休吾民者不自意迺获见只君立扁识壁跂而竦俛而悟想虽一草一木直欲护惜如存先生固谓县之政可達於天下则揭之政達以名吾堂先生固谓存心爱物利未有不及人则揭之存爱以名吾亭先生之道之化吾周夫子之道之化也则又惟夫子爱莲有说而揭之同爱以名吾傍池之澹之亭正使扁折攘夷道固在也惕若有怀因其尝仕此而表厉尊显之抑以明尚贤治俗之本首云尔此不足书若何而书宝佑乙卯日南至朝议大夫集英殿修撰提举建宁府武夷山冲佑观江万里记县有令所以行君之令致之民也君有令焉自朝廷至於部刺史部刺史以尺纸付州州易尺纸严期会付县县穷矣盘错倥偬为庶事责成之地故其任为难建康东南一都会管钥所繫视他邦为重而所隶邑五上元在城邑也府攸事于下而吾邑先焉故视他邑为尤难绍兴辛巳赞皇李辟之来宰是邑闔明强敏游刃有余理未几敌?淮瞰江朝廷大为守备已而黄屋劳军公庠于江壩董民兵察营砦所宜植严烽燧谨粮饌而又经理千乘万骑百司庶府之所须峙帑饩廩薪金之属无一不备首以办理闻圣天子召而见焉奏章愷切深中时病於是皆颂公非特长於材而達於事宜不如此也一日谓邨曰前未尝刻石纪令名氏追而求之盖十数岁以往则亡之矣自绍兴以来得十二人将书其到罢岁月使来者有考焉子其为我记之邨负丞是邑久与公周旋辞不获乃刻于兹石绍兴三十二年四月初八日右承事郎知建康府上元县丞主管学事葛邨记 宝庆续题名记建业今之别都厘为属邑者五邑居帅守治所者

二其最大而且壮者上元是已夫麟符重寄例畀近臣位貌穹崇弗与列郡等以墨绶吏晨夕从事乎其前曾弗获肆志展布而所治之地又壮而大焉信乎其胜任之难矣前後莅兹邑者往往皆自度其材而後授是以居焉而多可纪去焉而多见思旧有丰碑具载名氏自绍兴以迄嘉定班班可考今令尹赵公时侨向留守大帅观文彦逾之孙也观文之去是邦垂三十载民怀其德如一日然眷眷召棠弗忍翦伐况覩其象贤乎惟公挺有祖风律已以廉临民以公不严而威令行不扰而催科办抚字之暇百废具饬治事有厅向者圯而今更创焉退食有堂向者陋而今增敞焉且又辟後圃营新亭自非邑事整裕何以及此再考云迹瓜代有期顾瞻题名之碣镌勒已遍命工更造载续前记廼属文举为之文既忝寮案亲目善政其敢以芜陋辞噫嘻当新天子龙飞之初元而刻诸坚珉以亲贤标的孝居其首焕乎黻哉然公之意非欲以是自耀也周而复始适惟其时继自今弦歌于兹者皆得以揭名乎其上是亦有补于将来云尔要之毁誉之公久而後见异时邑中耆老覩其名思其人感遗爱於无穷播休声于不泯必如是则大书特书可无愧矣来者其鑒诸宝庆元年立春日朝奉郎签书建康军节度判官厅公事赐绯鱼袋剑津邓文举谨记

徐端辅【右朝奉郎绍兴二年七月内到任】

蒋阁祖【右宣义郎绍兴四年四月内到任】

赵丕化【右朝奉郎绍兴五年三月内到任】

曾恢【右宣义郎绍兴六年五月内到任】

吴枢【右朝奉郎绍兴十年二月内到任】

吴芑【右宣义郎绍兴十三年三月初三日到任】

许颂【右承议郎绍兴十三年十一月初二日到任至十六年十二月十六日任满】胡廷直【右通直郎绍兴十六年十二月十六日到任至二十年二月初七日任满】冯和叔【右承事郎绍兴二十年二月初七日到任至二十三年五月初四日任满】黄霖【右通直郎绍兴二十三年五月初四日到任至二十六年五月初十日任满】许宦【右承事郎绍兴二十六年五月初十日到任至二十七年二月四日改差监潭州南岳庙】滕谨【右奉议郎绍兴二十七年十月二十日到任至三十一年三月十七日任满】李辟之【右通直郎绍兴三十一年三月十七日到任至隆兴二年四月十六日任满】李允升【右从政郎隆兴二年四月十六日到任至乾道二年四月二十七日罢】魏楫【右宣教郎乾道二年九月初一日到任至五年九月十九日被旨都堂审察】方廷瑞【右承议郎乾道五年十月三十日到任乾道九年四月二十八日任满】苏圉【通直郎乾道九年四月二十八日到任淳熙二年三月八日任满】

赵公崇【通直郎淳熙二年三月初九日到任至淳熙四年四月十九日任满】

薛襄【通直郎淳熙四年四月十九日到任六年五月二十七日任满】

赵伯晟【奉议郎淳熙六年五月二十七日到任至九年六月二十七日任满】

冷世修【宣教郎淳熙九年六月二十七日到任至十二年七月初九日任满】

郑若容【奉议郎淳熙十二年七月初十日到任至十五年八月一日任满】

王允蹈【宣教郎淳熙十五年八月初二日到任至绍熙二年八月十九日任满】姜楷【奉议郎绍熙二年八月二十日到任至五年八月二十七日任满】

程阜【奉议郎绍熙五年八月二十八日到任至庆元元年十一月初九日请急难假离任】
方楷【景佑初释褐历三任以考课迁卫尉寺丞知江宁府上元县尝亲获羣盗不干赏曰吾县令为天子举职尔功何有哉欧阳文忠公有送方希则序期待甚厚盖赠公也其後乾道丙戌公之曾孙讳滋以敷文阁待制居守金陵又三十年五世孙叔恭复四试邑而题名偶失记载到罢月日当在庆历皇佑间姑摭大略附于左方】

方叔恭【奉议郎庆元二年三月二十五日到任至五年四月十二日任满】

莫柯【奉议郎庆元五年四月十三日到任】

郑缉【宣教郎嘉泰二年五月初三日到任】

扈卞【奉议郎开禧元年五月二十日到任】

赵希苍【通直郎开禧元年闰八月初九日到任至二年十一月二十三改差制机】史复祖【宣教郎开禧三年三月二十七日到任至嘉定二年五月初四日任满】戴槃【承议郎嘉定二年五月初四日到任】

柳说【宣教郎嘉定四年二月二十五日到任至七年六月初九日任满】

洪圭【奉议郎嘉定七年六月初九日到任至十年八月初三日任满】

司马述【宣教郎嘉定十年八月初三日到任至十二年八月二十七日改宁海军签判】叶宰【宣教郎嘉定十二年十月二十一日到任至十五年十一月初九日任满】

赵时侨【嘉定十五年十一月初九日到任至宝庆元年十一月十八日任满】

赵崇健【宣教郎宝庆元年十一月十八日到任至三年十一月二十四日任满】奚抚【通

直郎宝庆三年十一月二十四日到任至绍定三年十二月二十日任满】钱逢【通直郎绍定三年十二月二十一日到任至六年十二月二十日任满】

楼淮【奉议郎端平元年二月初六日到任至嘉熙元年四月十三日任满】

丰云昭【通直郎嘉熙元年四月十三日以句容两易到任至二年十二月十四日改通判建康府】

戴宗昭【奉议郎嘉熙二年十二月十四日到任至三年十二月十九日改通判建康府】蒋孝参【奉议郎嘉熙四年二月初二日到任】

谭谷【宣教郎嘉熙四年六月十六日到任淳佑二年四月十五日沿江制司劄随司解任】陈梦高【奉议郎淳佑二年四月二十八日到任至五年七月二十四日任满】

赵若琬【宣教郎淳佑五年七月二十四日到任】

王旦【通直郎淳佑七年十月十五日到任至十年十月二十日任满】

陶梦桂【淳佑十年十月二十四日到任】

曹之格【承事郎淳佑十二年十月初八日到任宝佑元年二月转宣义郎二年闰六月转宣教郎三年五月内申省部给下新铸印一颗以上元县印为文当年十二月差通判无为军】

陈寅【宣教郎宝佑三年十一月初八日到任至六年十二月望日任满】

许钥【通直郎宝佑六年十二月望日到任至景定元年五月改添差通判临安军府事】锺蜚英【奉议郎景定元年八月到任】

江宁县苏魏公颂作题名记云县令题名旧无其传颂始到职以非便民先急之务而未遑经营也一日乡民有讼田者辞逮数室咸造于庭纷辨交争初莫能决讯其剂约则曰亡之矣讯其移受之始曰不能记矣所能言者某令时接某事至某之邻乡实某祖受田立籍之岁也县有版籍盖载之矣因求其令在事之年而邑之胥吏皆无能言者乃为之捃摭数十年簿书始见其令之官氏閱其籍果得讼田者之祖名具载某地数而侵冒者乃诘颂於是叹曰昔之居官者去而留名氏纪岁月於府寺岂特好事者为之哉是亦有谓尔斯狱也以令之官氏乃得致讼之岁月因版籍而後知民之情伪版籍虽具而民不能言其岁月县令虽去而民犹能言其为治之迹是令去而题名於後不为无益於治理也於是条次前令官称姓名起开宝李氏去国郡邑归职方始命王官迄兹庆历六年凡七十载历三十八令而拙者继焉因命砬石纪其交承之次第龔於听事之壁间非唯记乎岁月而已又念夫居事职者坐广居享丰禄假天

子威刑案籍以莅政事其不能厘体以督簿书之务平心以待生齿之讼殆非朝廷所以建官分职之意也矧在是邑密负大府号为望县其地之广袤百里有畸编户逾二万而开年逋逃未复者且千齿倍户有半而隶名于力役胥徒者几三十之一其赋徭之重轻资货之移用兼并之强弱纷争之是非盖日有焉一繫乎长人者之决之也苟失其当民实受弊任治者得不为之用心哉故予因纪年而又论政又书其命事之由于左方将以告于民官庶几悉意民务毋俾其人曰某令者治某事而非是我将何告焉姑待来者听治之非唯警于来者抑将以自警焉则日升斯堂而受诉牒举而视之曰前日某事其人称某令之不治则予之弊事是必将审覆其词而求索其情亦冀臻夫理而少纾其责也 淳熙壁记古者记事繫日月此官治壁记之所由设欤诎非古耶自记则媚已代作则媚人或谓春秋之旨於是委地固也其欲述治道别贤不肖以训于後则谁宜为亦必诏兴废列姓氏而止耳江宁名县肇晋太康辛丑历宋齐梁陈隋唐五季六百四十有五?为我朝天禧二年廼用此名建府中间县名之废易不一中兴以来行殿所居物衆事剧为令滋不轻历阳张君伯子实来既三载得令姓名岁月日断自乐君迄于今二十二人刻石?置官治之壁记事之意於是乎在噫设官以为民通于上下於民尤近其孰易令今江宁有令閱岁逾七百其人几何居此有纪进此有由而姓氏有传寥寥也仰俯之际谁其无志於斯苟志於斯民且得职而令不与焉则吾不知而其传与否又不系夫壁记之有无也然雕屏铭几殆弗章乎君属叙其顔敬为之书伯子名孝伯淳熙甲辰日南至同郡龚敦颐记 绍定壁记江宁厅事旧有壁记创於淳熙之甲辰既久镌题殆遍宝庆三年夏建安刘君来越岁政成遂刻石以续于左金陵帝王州江宁为赤邑按前记行殿所居物衆事剧为令滋不轻时沿江未置司也自制府宏开应臚调遣於是滋繁则为令者毋乃尤不轻於前日乎责愈重任此责愈难今廼阙而不续则前乎此其间有贤且材者或不得以着其名氏而後乎此将以观其人之贤且材而无所证则壁记果可以阙而不续乎是记也非徒记岁月云尔某人以某年某月至而某年某月之邑事理欤民无扰欤则人必曰某人果贤且材矣天下有公是非人心有公好恶继是为令者将莫不奋焉以贤且材者自期而使後之视今犹今之视前也然则江宁之民不其愈多幸欤此君之所甚望也此壁记之所以续也君名屋尚书文简公之子其为政岂弟慈祥不扰而事办制府以其贤闻诸朝俾兼幕府云绍定己丑九月既望宣教郎行国子正董洪记

乐【阙 朝请郎绍兴元年到任】

朱举直【修职郎绍兴三年到任】

盛瑞【宣教郎绍兴六年到任】

张昌【奉议郎绍兴九年到任】

臧梓【宣教郎绍兴十一年到任】

苟绅【奉议郎绍兴十二年到任】

叶义问【宣教郎】

曾諲【朝奉郎】

姚劭【宣教郎】

窦安国【右承事郎绍兴二十年九月到任至二十三年九月二十四日任满】

曾浩【右朝奉郎绍兴二十三年九月二十五日到任至二十六年十月初九日任满】洪□
【左承议郎绍兴二十六年十月初十日到任至二十九年十月二十七日任满】陈希平【
右宣教郎绍兴二十九年十月二十八日到任至三十二年正月致仕】喻仲远【左宣教郎
绍兴三十二年四月十三日到任六月四日致仕】

张椿【右从事郎绍兴三十二年九月二十九日到任隆兴元年十月改差四川制司干官】
赵彦恂【左宣教郎隆兴二年三月十七日到任乾道二年八月十五日成资】

陈昂【右宣教郎乾道二年十二月二十四日到任至四年七月内罢】

何作善【右宣教郎乾道四年十月十七日到任至八年四月十九日任满】

葛郛【右奉议郎乾道八年四月二十日到任至淳熙元年七月十八日任满】

赵伯涣【宣教郎淳熙元年七月十九日到任至三年七月二十日任满】

章騊【通直郎淳熙三年七月二十一日到任至五年十月初三日任满】

赵善兴【奉议郎淳熙五年十月初四日到任至九年正月十九日任满】

张孝伯【奉议郎淳熙九年正月二十日到任至十二年二月初四日任满】

曾炎【通直郎淳熙十二年二月初五日到任至十五年二月二十三日任满】

虞汝翼【承议郎淳熙十五年二月二十四日到任至十二月初八日丁忧】

裘扬祖【宣教郎淳熙十六年四月二十三日到任至绍熙三年五月三日任满】陆峻【承
议郎绍熙三年五月四日到任至庆元元年十月十二日任满】

刘履忠【奉议郎庆元元年十月十三日到任至四年十月二十三日任满】

于倬【通直郎庆元四年十月二十四日到任至嘉泰元年十一月二十七日任满】杨九鼎【通直郎嘉泰元年十一月二十八日到任至四年七月二十四日丁忧】何中寔【嘉泰四年十一月初七日到任至开禧二年七月宣劄权庐州通判】

冯必大【开禧三年五月初一日到任至嘉定元年五月二十五日致仕】

潘燠【宣教郎嘉定元年九月二十七日到任至二年九月初八日丁忧】

徐龟年【宣教郎嘉定三年正月初一日到任至六年正月改监建康府权货务都茶场】胡林卿【宣教郎嘉定六年二月十九日到任至九年四月十六日任满】

莫光朝【宣教郎嘉定九年四月十七日到任至十年十一月十七日致仕】

王大临【宣教郎嘉定十一年四月初五日到任至十四年四月初十日任满】

季端谊【宣教郎嘉定十四年四月十一日到任至十七年四月二十一日任满】潘子高【宣教郎嘉定十七年五月初十日到任至宝庆三年五月初九任满】

刘垕【奉议郎宝庆三年五月初十日到任至绍定三年六月初八日任满】

陆衍【朝奉郎绍定三年六月九日到任至六年六月十日任满】

周大昌【通直郎绍定六年六月十一日到任至端平三年七月二十八日任满】惠孔时【宣教郎端平三年十月十七日到任至嘉熙二年八月任满】

王圭【通直郎嘉熙二年八月初六日到任至淳佑元年九月二十七日任满】

赵与稀【奉议郎淳佑元年九月二十八日到任至四年十一月十六日任满】

钱谦孙【通直郎淳佑四年十一月十六日到任至七年十二月初三日辟滁州通判】赵崇鏐【宣教郎淳佑七年十二月初三日到任至八年六月十六日丁忧】

孙梓【宣教郎淳佑八年八月初一日到任至十年八月初二日致仕】

曹庭褒【奉议郎淳佑十年八月初三日到任至宝佑元年八月七日任满】

赵崇端【奉议郎宝佑元年八月初十日到任至三年十二月十日致仕】

叶信厚【宣教郎宝佑三年十二月二十四日到任至四年十月六日避亲离任】赵希隲【

宣教郎宝佑五年正月初五日到任至六年十一月丁父忧】

林晖【宣教郎开庆元年四月二十七日到任】

王镗【宣教郎景定元年三月二十七日到任】

句容县壁记句容为邑甚古自汉以来令长不知几何人江左号近畿三品佳邑选用尤重而姓名传者盖寡间有着之史册见于碑版仅可以一二数当世钜人长德亦岂无尝宰是邑而不为赫赫名者传记所略泯然无闻然则题名盖不可阙已国朝建炎之後旧记不存隆兴初岑君人宏乃为立石得晋以下六人元丰中一人建炎以後十有三人未几其石断而弃之敏德至邑再葺始得其托本因重加搜访而无载籍可考始求之石章谘之故老又得前代五人太平兴国至宣和八人自岑君以降又七人而至于敏德於是砉石刻之听事继自今其有考矣若其遗阙犹有望於後之君子淳熙十五年正月二日承议郎知县事姑苏黄敏德记

刘超【晋人】 孙谦【宋人】

顔继祖【宋人】 买希镜【齐人】

周洽【齐人】 杨延嘉【唐人】

岑植【唐人】 王昕【唐人】

李哲【唐人】 吕倕【唐人】

邵金迈【伪吴人】 韩继闾【南唐人】

查文直【南唐人】 王玄【南唐人】

宋籍【太平兴国三年以下并本朝】 马庄【将仕郎守大理评事】

曹从寿【咸平四年】 祖岳【咸平四年】

方峻【朝奉郎太常博士皇佑元年】 丘濬【景德中卫尉寺丞知县补筑占星台】 袁穀【熙宁十年】 叶表【将仕郎秘书丞元丰二年四月】 真元弼【宣德郎元丰五年】 游冠卿【承议郎元佑二年】

杜绍【承奉郎武骑尉兼崇禧观绍圣中】 滕及【通直郎崇宁元年】

李琳【奉议郎宣和五年】 董萃

马仲宣【朝奉郎尚书员外郎政和中】 黄唐傅【政和八年】

刘子侑【右承议郎绍兴三年】 孙时升

刘识 范振【绍兴七年】

邹惟叙【右承议郎绍兴十年】 宗夔【右承事郎绍兴十三年】

汤遐年【右承奉郎 绍兴十七年】

陈孝逸【右宣教郎绍兴二十年】 龚涛【绍兴二十四年】

赵不怯【绍兴二十六年】 胡维【绍兴二十八年】

施兴祖【绍兴三十年】 范直【左奉议郎 绍兴三十二年】

岑义宏【右奉议郎隆兴元年】

葛郇【通直郎 乾道四年】 慕容邦用【乾道七年】 陈文琥【右宣教郎乾道八年】

朱光弼【淳熙元年】

赵善言【承议郎 淳熙三年】 俞洞【宣教郎淳熙七年】

向溉【奉议郎 淳熙十年】 黄敏德【承议郎淳熙十四年】 孟益【淳熙十六年】

张斗南【承议郎绍熙元年】

叶谦之【绍熙三年】 钱师元【奉议郎忧元元年】

赵时侃【承务郎 庆元四年】 齐砺【朝奉郎嘉泰元年】

江公亮【通直郎 嘉泰四年】 朱拱臣【奉议开禧年】

孙乾曜【承议郎 嘉定四年】 魏熹【通直郎嘉定七年】

赵希爽【承奉郎 嘉定十年】 施沆【通直郎嘉定十三年】

王通【奉议郎 嘉定十六年】 张侃【通直郎宝庆二年】

丁宗魏【绍定二年六月十八日到任】

吴淇【绍定三年四月初十日到任六年六月二十六日满】

赵熙【绍定六年六月二十七日到任端平三年十月初十日满】

丰云昭【端平三年十月十一日到任嘉熙元年四月十三日两易上元知县】

王之经【嘉熙元年四月十四日到任】

蔡誉【嘉熙三年九月二十二日到任淳佑二年正月初八日满】

丁埴【淳佑二年正月初九日到任】

张槩【淳佑五年三月初二日到任】

赵汝挛【淳佑八年二月十二日到任十一年三月初八日任满】

吴衍【淳佑十年三月初九日到任】

惠昌【宝佑元年六月十一日到任】

赵孟铤【宝佑二年四月二十八日到任三年正月初三日除大理评事】

奚李虎【宝佑三年四月十七日到任】

赵汝档【宣教郎宝佑六年六月十五日到任】

史十之【通直郎开庆元年四月初九日到任】

朱穎達【迪功郎景定二年四月十五日到任】

溧水县厅壁记秣陵号江左重镇中山为秣陵壮邑置自隋开皇中閤令多矣国朝绍兴己卯荆南唐公永夫始追纪前人名氏肇自皇佑壬辰凡四十一人刻石龕壁褫昔貽後吴兴刘公季高为文记之嘉定庚辰岁杪余来领邑生晚才劣蚤夜飭厉媿未能彷彿其前万一顾瞻壁记衡广从直嗣永夫者裁二十四人而登载班班几遍思之是虽欲因陋不可也迺访石他山命工重刻植于便厅左偏既广既密以俟来者绰有余地噫永夫刻石时距余领邑岁倏指恰一甲子其更易岂有数乎季高为永夫记有曰前人作此非徒然也欲知其是非贤否去取之耳余虽不敏请事斯语且録之以勉来者云越二载壬午四月既望苕川史改之记

李叔轲【皇佑四年四月到任】

史良【至和二年四月到任】

詹彦光【嘉佑二年四月到任】

皇甫辽【嘉佑四年四月到任】

张维【嘉佑六年四月到任】

刘处约【治平元年三月到任】

毕仲達【治平二年四月到任】

关杞【熙宁二年四月到任三年正月除广西常平】

孙汲【熙宁三年四月到任】

张绶【熙宁六年四月到任八年四月改差】

傅传正【熙宁八年八月到任】

张諲【元丰元年十一月到任】

周邠【元丰四年四月到任】

张常【元丰六年九月到任】

葛讽【元佑元年九月到任】

孙廷臣【元佑五年十一月到任】

周邦彦【元佑八年二月到任】

何愈【绍圣三年三月到任】

曹裕【元符二年七月到任】

李燾【崇宁元年十一月到任】

刘昱【崇宁二年十一月到任】

江公明【崇宁三年十二月到任】

纪霖【大观元年十二月到任】

张华【大观四年九月到任】

蒋巘【政和三年八月到任】

高举【政和六年九月到任】

邹雱【宣和元年十一月到任】

刘摭【宣和五年四月到任】

林彭年【宣和六年二月到任】

张知刚【靖康元年十一月到任】

高尧明【绍兴元年十二月到任】

汤克忱【绍兴四年二月到任】

徐端辅【绍兴六年九月到任】

李朝正【绍兴七年十一月到任十年四月被召】

章藉【绍兴十年十二月到任十二年正月改差】

胡慤【绍兴十二年二月到任】

姚耆宗【绍兴十五年二月到任】

朱抟【绍兴十八年十月到任】

薛衮【绍兴二十一年十二月到任】

李文开【绍兴二十四年十二月到任】

苏楷【绍兴二十六年五月到任】

唐锡【绍兴二十九年二月到任】

刘授之【绍兴三十年八月到任】

李衡【隆兴元年十月到任乾道二年十月再任乾道三年九月被召】

陈嘉善【乾道四年三月到任七年三月满替】

梁公永【乾道七年四月到任】

程闻一【乾道九年正月到任】

庄璋【淳熙二年正月到任】

司马僖【淳熙三年六月到任】

强焕【淳熙五年七月到任】

王衍【淳熙七年九月到任十年十一月任满】

方仲忽【淳熙十年十一月到任十四年二月任满】

李泳【淳熙十四年三月初六日到任】

张黻【淳熙十五年四月十六日到任】

吴友闻【淳熙十六年七月四日到任绍熙三年七月九日任满】

赵善誉【绍熙三年七月九日到任庆元元年七月任满】

陈楠【庆元元年七月到任三年九月任满】

赵希琦【庆元三年九月到任】

张攀【嘉泰元年二月初二日到任嘉泰四年二月初一日任满】

蔡康【嘉泰四年六月初二日到任】

张详【开禧三年二月二十三日到任嘉定三年十月十五日任满】

汤诜【嘉定三年十月十六日到任六年六月十二日任满】

俞迁【嘉定六年六月十三日到任九年十二月十七日任满】

刘允武【嘉定九年十二月十八日到任】

李知新【嘉定十年十二月二十四日到任十三年十二月二十七日任满】

史改之【嘉定十三年十二月二十八日到任十五年十月十七日准省劄除评事】汪仁荣
【嘉定十六年三月初九日到任】

陈洽【嘉定十七年四月二十八日到任宝庆元年十一月二十六日通理满】

向立【宝庆元年十二月初七日到任】

黄普【宝庆三年三月二十四日到任绍定元年七月初二日通理满】

史弥巩【绍定元年十月到任四年十二月满替】

卫社【绍定四年十二月二十七日到任续缘两通判皆亲族准部符成资解任】

顔俨【端平元年四月十八日到任二年四月九日磨勘转承议郎三年四月十七日二考成
资

避亲解任续准省劄改差淮东制机】

辛延【端平三年七月内到任至嘉熙元年十月内准省劄改差安边所干办公事】王俦【
嘉熙元年十二月十三日到任三年七月内磨勘转奉议郎四年闰十二月初八日准省

劄改差主管临安府城南左厢公事】

李以申【淳佑元年正月十八日到任】

张梗【淳佑三年七月二十日到任】

赵崇乘【淳佑四年六月初四日到任淳佑五年二月磨勘转奉议郎淳佑七年六月二十七
日任满】

刘棻【淳佑七年六月二十七日到任八年八月因磨勘转奉议郎九年七月初十日改赐绯
鱼

袋十年六月二十三日满替】

赵希岗【淳佑十年八月二十四日到任十一年六月磨勘转承议郎宝佑元年九月二十三日满替】

乔进孙【宝佑元年九月二十四日到任当年十月磨勘转通直郎四年十月二十五日满替十月二十六日准省劄特差通判无为军填见阙】

汤卿月【宝佑四年十月二十八日到任六年十二月内因磨勘转奉议郎开庆元年十月二十九日满替】

朱南杰【开庆元年十一月初一日到任景定元年六月就任改辟清流知县】

潘岢之【景定元年六月十八日到任】

溧阳县题名溧阳本秦置县计版溢二万户提封跨三百里久隶建康邑去所隶越数舍而遥僻处孤绝四介湖山有狡悍之旧俗号称难治宋德神灵化南渐江表民陶沐之久又得端良继为之尹摩之以道柔之以正今俗乃恂恂而厚家有令子弟起趋学序庭讼益稀田莱日辟秀髦之乐善者有矣非前後勤教驯变之由然耶于能藐无术业烛理多昧涖官且将再葺遂享安简之名逃旷谪之咎则庇前良之德隆矣想见其人视已成事思章章厥名以昭示後呼访旧吏第而牒之得自开宝李氏归朝以後距于今为邑者盖二十八焉题名于右若曰政之仁鄙操之清浊质诸吾民不诬也夫暇置议哉庆历五年五月日大理评事杜于能序平陵隶建康为鉅邑疆里之广僻版籍之繁庶风化之厚薄吏民之淑慝则前序述之详矣岁在癸卯宫舍周侯宰政之二年治成闲暇几及瓜代因语僚佐以谓杜公始议题名书而揭之第恐久而漫灭无以传示于後遂命勒於贞珉置之厅庑以告来者继而刻之噫吾民之心去而思者有之矣思而不得见想慕遗迹犹有存者其思可得而忘耶是亦长民传永之深意者欤嘉佑八年九月日将仕郎试秘书省校书郎守县尉杨照後序朝散郎守太子中舍知县事赐绯鱼袋周景纯立石题名之设所以记往传後是邑有焉创于杜令而周令继之然旧石岁久且坏今邑宰按图考迹得二十年来旧政爵里姓名别勒之石以续二公初志云绍兴戊寅七月望右从事郎主簿黄湛记右通直郎知县事吕文中重立石溧阳之为邑其建立因革则具于图籍其土俗政理则见于旧记此不复述子通窃怪邑令之阙揭于尚书左选者动经年岁莫之顾咸曰彼浙之阳兴号为最难且繁矣然规制尚在小施敏手则可立治故人之憚之也轻若斯邑之难故当出天下剧邑上而又弊凋匱竭纲纪尽弛是恶可复为子通不度德量力慨然自奋曰天下宁有不可为之邑于是甘心取人之所弃扁舟独先俛首就职亲党莫不笑骂之至之日如败舸坏屋了不可支於是尝历险阻含忍羞辱持守坚决具足顽顿閱岁有半始能除害去奸而百度渐以植立于是始有意于续题名之刻自李抚州而下得四人焉皆有功于是邑者乃叙其岁月而刻之子通诚妄庸获赘名其後夫天下之最不材宁更有甚子通者乎子通且能措其力如此使才而贤者临之又当力省而功倍则溧阳之俗固醇厚而邑亦非难

治矣释天下之疑澡此邑之谤请自子遹始嘉定十有三年十月甲子承事郎知建康府溧阳县主管劝农公事山阴陆子遹记并书

潘乾【後汉光和中】 王舒【东晋初】

阮裕【东晋时】 阮崇【东晋末】

褚球【齐时】 萧某【梁元帝时南史云萧溧阳马虽老犹骏】 乔翔【唐开元十七年】
郑晏【李白时人】

王时樛【大历六年见太虚观锺刻】 柳均【见旧县断碑】

季操【贞元中与孟郊同时】 李寂【朝议郎开成二年】

史寔【银青光禄大夫天佑三年】
郭延沼【南唐昇元三年银青光禄大夫】 王真规【朝议郎保大十四年】
李运【开宝中为令时李氏归朝之初】 张宗敏【在任四年】 董龟正【秘书丞】

姜公绰【大理评事在任三年】 王保衡【在任四年】

夏侯戡【淳化五年登仕郎在任三年】 李濬【秘书丞在任三年】

李拱【太常博士在任三年】 成悦【著作佐郎在任三年】

董术【秘书丞在任三年】 宋武【试校书郎在任三年】

萧楚材【殿中丞在任三年】 李昭素【职方员外郎在任三年】 孔昭亮【秘书丞在任二年】 李昌震【在任二年】

郑南【登仕郎试秘书省校书郎天圣二年】 王简【太常博士在任二年】

宋正已【苏州观察支使在任六月】 查咏之【大理寺丞在任二年】

苏叟【在任三年】 孟造【卫尉寺丞在任五月】

王梦臣【大理寺丞在任一年半】 窦简【大理寺丞在任三年】

章资【大理寺丞在任二年】

蒲延熙【大理寺丞康定二年四月到任庆历二年五月得替】

冯旦【卫尉寺丞庆历二年十月到任四年九月得替】

蒋秘【着作佐郎庆历四年九月到任五年五月得替】

杜于能【大理评事庆历五年十月到任八年四月得替】

孙薰【卫尉寺丞庆历八年四月到任皇佑二年二月得替】

查宗闵【太子中舍皇佑二年四月到任四年十二月得替】

章怜【秘书丞皇佑四年十二月到任至和二年十二月得替】

真昺【朝奉郎守太子中舍至和二年十二月到任嘉佑三年八月得替】

丰有孚【太子中舍嘉佑三年十月到任六年十一月得替】

周景纯【太子中舍嘉佑六年十一月到任八年十月得替】

吴君平【秘书丞】 锺离景圭【太子中舍】 方仲谋【大理寺丞】 雷豫【大理寺丞】

高初【着作佐郎】 罗彦辅【秘书丞】

周伯玉【着作佐郎】 葛萃【宣德郎】

郭瑑【奉议郎】 项瞻【宣德郎】

何康直【右宣德郎元佑二年三月到任】

吴勉【右通直郎元佑五年四月到任八年十二月得替】

张康孙【元佑八年十二月到任】

黄长彦【奉议郎绍圣四年三月到任元符三年四月得替】

刘淮夫【奉议郎元符三年四月到任】

李车【通直郎崇宁三年四月到任】

龚弁【宣教郎】

万阐【通直郎大观三年十月到任政和二年十月得替】

郑骧【承议郎政和二年十月到任六年十月得替】

袁黻【通直郎在任一年五个月】

曾谔【通直郎宣和元年四月到任五年七月得替】

胡似之【通直郎宣和五年七月到任靖康元年八月得替】

王棠【左奉议郎靖康元年八月到任十一月丁母忧】

杨邦乂【左奉议郎靖康元年十一月到任建炎三年八月差通判建康府】

沈棠【右宣义郎建炎三年九月到任绍兴二年五月得替】

赵公白【左奉议郎绍兴二年五月到任四年七月得替】

许嘉谋【右承事郎绍兴四年七月到任】

吴洵武【右宣义郎绍兴六年二月到任十一月改监潭州南岳庙】

孙汝翼【左宣教郎绍兴七年五月到任八年正月改主管台州崇道观】

何几先【右修职郎绍兴八年三月到任十年九月得替】

李孝恭【右朝散大夫绍兴十年九月到任十三年十月得替】

王昇【右承议郎绍兴十三年十月到任十四年十月避亲罢任】

韦能定【右承议郎绍兴十五年四月到任九月避亲罢任】

施佑【右承事郎绍兴十五年十一月到任十九年三月得替】

冯廸德【右承议郎绍兴十九年三月到任八月罢任】

周淙【右通直郎绍兴二十年十月到任二十二年六月改差江东抚干】

章鐸【右宣教郎绍兴二十二年九月到任二十三年八月通理罢任】

黄绎【左朝奉郎绍兴二十三年十二月到任二十七年三月得替】

吕文中【右通直郎绍兴二十七年三月到任】

蒋晔【右通直郎绍兴二十九年九月到任三十一年十一月差提辖行在杂买务杂赏场】
翁翊臣【左奉议郎绍兴三十二年三月到任隆兴元年四月差主管台州崇道观】李鼐【右宣教郎隆兴元年九月到任乾道元年八月罢任】

陈苍舒【右通直郎乾道元年十一月到任五年四月满替】

喻仲迁【右通直郎乾道五年四月到任八年正月丁母忧】

赵利【右通直郎乾道八年四月到任淳熙元年八月满替】

刘珪【通直郎淳熙元年八月到任三年八月得替】

周世修【通直郎淳熙三年八月到任五年九月满替】

高时【奉议郎淳熙五年九月到任八年十一月得替】

沈纶【宣教郎淳熙八年十一月到任十一年十一月满替】

邓埏【通直郎淳熙十一年十一月到任十三年七月罢任】

周熒【承议郎淳熙十三年八月到任十六年八月满替】

陈楠【宣教郎淳熙十六年八月到任绍熙二年四月得替】

魏冲【承议郎绍熙二年四月到任五年四月满替】

李卞【朝散郎绍熙五年四月到任庆元三年四月得替】

苏石【奉议郎庆元三年四月到任四年六月罢任】

方桷【通直郎庆元四年九月到任嘉泰元年十二月得替】

赵赞夫【奉议郎嘉泰元年十二月到任四年得替】

陈仲達【承议郎嘉泰四年十一月到任嘉定元年正月得替】

钱重【奉议郎嘉定元年正月到任】

李大原【宣教郎嘉定二年五月到任五年七月满替】

王棠【通直郎嘉定五年七月到任八年七月满替】

施尧【通直郎嘉定八年七月到任十年四月离任】

褚孝锡【奉议郎嘉定十年五月到任是年冬奉祠】

陆子遹【承奉郎嘉定十一年正月到任十四年四月满替】

林演【宣教郎嘉定十四年四月到任十六年八月差主管临安府城北右厢公事】徐子石
【宣教郎嘉定十七年三月到任宝庆三年六月满替】

袁乔【宣教郎宝庆三年六月到任绍定元年七月避亲离任】

章铸【奉议郎绍定元年九月到任三年十月离任】

徐耜【宣教郎绍定四年三月到任端平元年五月满替】

徐谓礼【通直郎端平元年五月三日到任三年十月丁母忧】

姚仍【奉议郎端平三年十月初十日到任嘉熙三年五月在任不禄】

章诜伯【宣义郎嘉熙三年七月十六日到任四年九月离任】

赵希准【通直郎嘉熙四年十二月十八日到任淳佑二年六月祠禄】

李仲鰲【通直郎淳佑二年九月十五日到任三年五月差通判淮安州】

施枢【从事郎淳佑三年六月九日到任六年三月离任】

王湘【宣教郎淳佑六年闰四月到任九年四月满替】

汪之纯【承事郎淳佑九年五月二十二日到任十一年告假】

刘次春【宣教郎淳佑十一年二月朔日到任宝佑二年二月二十二日满替】

赵希羔

王涛

景定建康志卷二十七

卷二十八

<史部,地理类,都会郡县之属,景定建康志>

钦定四库全书

景定建康志卷二十八 宋 周应合 撰

儒学志一

儒以道得民人不学不知道天地所以位万物所以育皆儒学之功用也六朝岂无学搃明有观集雅有馆北郊崇儒西邸授经鹿苑书台士林文室然皆无救於时何也学未得其本也我宋龙兴聚奎发祥真儒辈出正学大明河南程子得濂溪周子之传上续孔孟之绪则尝仕于此南轩张子传道五峯者也则尝侍亲于此西山真氏学宗濂洛者也则尝持节于此先後儒宗寿脉斯文剖符持节奕奕相望所过者化遗风可挹横经授业率多名胜故其士不止汲汲于科举尤孳孳于讲学固宜治教休明习俗淳厚一洗六朝之陋今庙学聿崇精舍偕辟兴所教也学掾并设山长特命重所职也经籍富储博所考也帑庾益增盛所养也先哲列祠起所慕也科目得人验所用也故特书之作儒学志【诸郡乘学校无特志唯判録有学志今仿之必儒学自为一志表所重也】

前代学校兴废

晋建武元年十一月征南军司戴邈上疏曰丧乱以来庠序隳废世道久丧礼俗日弊今王业肇建万物权舆谓宜笃道崇儒以劝风化元帝从之始立太学 江东大饥诏百官各上封事益州刺史应詹上疏曰元康以来贱经尚道以玄虚宏放为夷達以儒术清俭为鄙俗宜崇獎儒官以新治化 太兴三年皇太子释奠于太学 咸康三年国子祭酒袁瓌太常冯怀以江左寢安请兴学校帝从之立太学于秦淮水南废丹阳郡城东南徵集生徒而士夫习尚老庄儒术终不振 太元十年尚书令谢石请复兴国学于太庙之南 宋元嘉十五年立儒学于北郊命雷次宗居之明年又命丹阳尹何尚之立玄学著作郎何承天立史学司徒参军谢玄立文学 宫苑记儒学在鍾山之麓时人呼为北学今草堂是也玄学在鸡笼山东今栖玄寺侧史学文学并在耆闍寺侧 二十年三月皇太子劭释奠于国学顔延年作释奠诗【见诗类】

二十七年罢国子学而其地犹名故学

齐竟陵王子良开西邸延才俊遂命为士林館【西邸在鸡笼山】 梁大同六年于台城西立士林館延集学者武帝初好儒术其後尊信佛法讲译内典而士林轻矣 南唐书跨有江淮鳩集典坟特置学官滨秦淮开国子监今镇淮桥北御街东旧比较务即其地里俗呼为国子监巷

本朝兴崇府学

雍熙中有文宣王庙在府西北三里冶城故基天圣七年丞相张公士逊出为太守奏徙庙于浮桥东北建府学给田十顷赐书一监景佑中陈公执中又徙于府治之东南即今学基建炎兵毁绍兴九年叶公梦得更造学援西京例奏增置教官一员淳熙四年刘公拱重修庆元二年张公构建阁以奉御书阁下为议道堂稍重释奠礼仪储典籍增既廩文风大振淳佑初年别公之杰增修学宇六年赵公以夫即命教堂更名明德增造两廊以安从祀十年吴公渊列祠先贤增学廩创义庄宝佑中马公光祖兴学校举孝廉筑周汉以来名贤祠而赞之士气兴焉

叶梦得作府学记先王以武定天下必以文终之江汉宣王南征之诗也言甲兵车马之盛备矣未乃曰矢其文德治此四国治道岂不有本乎卫灵公问陈子曰俎豆之事则尝闻之矣军旅之事未之学也子岂以军旅为不足学哉以为知所以为俎豆则军旅无不可为虽曰我战则克可也汉高帝悉定楚地独鲁不下引天下兵欲屠之鲁中诸儒尚讲诵习礼弦歌之音不辍遂不敢加而待其服大道之行固有不期然而然者孰谓鲁诸儒而能折高帝推而上之舜舞干羽而有苗格谓之诞敷文德盖理义之在人心莫不皆有苟未至於绝灭不幸丧失虽至於犯上作乱徐返其本亦必悔而知变善为治者可待之以变而得所向不可期之以绝灭而终不返则文德其可一日废於天下乎学校固理义之所从出而斯文之所先也建康领江左八州之地於东南为大都会异时文献甲于他方旧有学在州之巽隅更罹兵火城郭鞠为丘墟独学宫岿然仅存颓垣败壁毁圯相藉生徒奔散博士倚席不讲绍兴二年某始以安抚大使分镇时自淮以北裂为盗区蜂屯豕突鼙鼓相闻盖欲葺而未暇後七年大驾还钱塘诏以建康为留都蒙恩复畀居守视事之明年辑宁荒残流亡稍复民益安业於是喟然曰可以有事於学矣乃命其属因旧址尽撤而新之起己未孟冬迄庚申仲春凡五月为屋百二十有五间南向以面秦淮增斥讲肄列置齐庖高明爽垲固有加於前不侈不陋下及庖圃罔不毕具既又作小学於大门之东复命有司諏典礼簿正祭器作新冕黼皆中程式核其田之在属邑募民耕者千九百十五亩岁入其赋为米若豆与麦五百四十斛有奇坊之得自酤者三区岁入其课为钱百八十万有奇地之占府城得佃而居者八十有五所岁入其租为钱六百七十五万有奇各为图籍以时输之凡廩给之费无有欺匿乃以上丁释奠於先圣前期率郡执事斋於两序诸生无不从视涤省牲惟谨夙兴笾豆在列史告时至以次就位正笏垂绅佩玉铿鏘降登伏兴卒事无违礼成受厘躋爵于阼观者数百人无不叹息感动退而揖所与祭者而告曰子衿之作郑人所耻是不知在郑何公然传载然明欲毁乡校子产不可则当子产时乡校盖复存是郑之学未尝终废有子产则能兴之焉四方用兵踰十年学校之列于郡国者其亡与存我不敢知惟天子以仁孝勤俭治天下克复大业愿与中外休息还之承平者盖终食不忘也上帝监观亦既归我河南之地兵革渐息惟宣王之德于兹将兴吾邦号陪都视定鼎郊廓实为宗周是亦风化之首其复有学自今始肉食者其可不推子产之为郑以求先圣眷眷俎豆之意相与先後辅成吾君之志布衣韦带亦必有宏達英伟之士拔于草莱接踵继起由此而出以共济一世者子大夫尚勉之皆曰唯遂为记刻之石後来者其有考焉

大成殿在棣星门北戟门内从祀位在两廊旧礼器漆绘竹木为之宝佑二年王公埜置新礼

器尊罍勺爵簠簋坩豆皆造以锡定陈器实饌仪为二图春秋上丁释奠则舒于殿前以示执事

御书阁在明德堂後

默斋游公九言记有国有家者崇设学校将以教民兴行也民之生也分则君臣亲则父子兄弟配则夫妇责善则朋友是乃人心同然日用之常者而圣人严之城池之守甲兵禁令之防非可少缓而圣人弗恃何哉学校之事固不若威强制御可以旦暮见效然三纲明则奸宄知畏五教修则良心日生诗书之泽蒙被生民而不知试使六经之言一日坠地名义废而不存天下事可胜言乎帝王之治始於徽五典谨庠序民兴行而朝廷尊秦燔六艺隳大伦而国随之汉唐以降向道虽不及古若仁义起兵绵蕝制礼与夫投戈讲艺锐情经典厥祚亦昌末世贱学虽不至秦然名存实亡格言弗用士气伤而风节坏兆乱皆一辙耳学校重轻用以卜人之国真蓍蔡也欤我宋肇基务先文教庆历初遂诏州县皆建学而列圣训告尤备绍兴中又以石经嘉惠士子三代之後未有也建康学宫旧在西北隅景佑初元陈公执中徙今地建炎蕩於兵戎绍兴九年资政殿学士叶公梦得复新之规模略备独累朝御书緘藏夫子殿中严奉犹阙庆元乙卯宝文阁学士尚书广汉张公来镇扶善翦奸礼延多士教授王益祥陈与行因有请焉大旨谓学校风化之源尊君人伦之首不有所表为政者得无阙典建康江淮都会曾弗如偏障支垒犹能宝储列圣奎画愿有所尊以明示州人俾知国家崇儒也诸生洪□裴叔度朱舜庸朱梦龙郭致一等从其後尚书悚然改容顾岁饥方讲荒政明年遂命安抚司干办公事游九言協两教授经始其事充其司者使臣李荣董役徒陈钦核金谷吏罗演宋继先俞友仁行文书魏辅李监録出纳计工程者军典王永讥门者严惠卒九人典用物冯亮尉辛韩郑耿三旺也分役事薛进雷兴斌旺二李也匠五等魏安正?墨精巧規制合度观者赞焉朱义副之栋梁既具梯云行空运机牙而屋之者戴义也瓦甍邵立也织苇折竹汪德也刻栏雕栴制木之小者王士宁也起七月丙午毕季冬望阁左右旧挟洿池虑其久而淫润颓吾址焉最後斋谕严康时请躬视役夫运甍覆簣以实之用人之力积二万八千有奇訖事不鞭一人盖揭通衢示其直以招之非下诸邑逮追也用缗钱八千硕米七百皆有奇焉阁高六丈三尺纵广五丈四尺横广视阁高之数加其三奇其尺如之下为议道堂以待师生间燕游泳而讲谕也役无半募费弗盈万择人而使之小大協心也教官复告於府黉舍久且弊益祥与行之来也撙节濫浮得芦场美钱八百缗米七十硕愿附建阁葺之易命教堂腐挠四之一门庑之易者十二公厨撤而更造阁东隅创较艺誊録舍九楹复可支岁月矣役甫罢尚书移镇南昌欲求当世大官纪述又明年九言益祥与行俱迫代去诸生谓记文未立来者无考先生其书之王广文以九言终始蒞役属笔焉九言曰较期会稽用度职也对扬上赐所弗敢及俟记言之尝观孟子论无恒产而有恒心者士也夫学也者虽以明人伦而伦之所以明实自人心始国家设置师儒弗以吏道相临异时士子充贡论官又非止养其身荣其家也学者亦知所以养其心乎人之心清明纯粹初本至善无纖毫之私也若养于厥初安有过失惟其稍长而交於事物则诱而杂之爱欲之招忿戾之摇利害之夺心始不得其正焉心萌而事随其害岂胜既耶是以明友之义參於五者之伦正欲闲其邪以存其心日用致察而知己私之所从起此心既正达而行之则本忠孝崇事业以光明于时居而未出则雍容令德履蹈规矩以表励于乡党国人岂非士君子之学欤是知士君子者实为四民风俗之倡而学校者又为一郡士子

风俗之倡诸君久被教育必自知之九言贱且细足迹几徧江南每爱金陵土风质厚尚气前年摄行倅事日受诉牒不过百余较剧郡才十一尔故为吏为兵者颇知自爱少健狡之风工商负贩亦罕闻巧伪二年三被州牒走村墟赈饥省旱涝视城郭加朴鲁焉若教化素明岂不易治慨念老矣行归山林因是役也相与周旋数月能无拳拳敢并书於後当使金陵质厚之俗得所视倣以无负国家崇儒之意是九言有望于此邦学士大夫之心也三年丁巳季秋承直郎建安游九言题记

讲堂即明德堂虚斋赵公以夫所更也

议道堂在御书阁下

正録位在明德堂之左

直学位在东廊之首

诸职事位在明德堂之右

斋舍东序三斋曰守中曰进德曰说礼西序三斋曰常德曰育材曰兴贤又一斋曰由义在职事位之後直舍二所在议道堂

新祭器库在大成殿前东廊之南

旧祭器库在御书阁之东偏

客位在西侧门里

公厨在东序後

学廩在西序後

义庄仓在议道堂後西偏

射圃在义庄仓之西有亭名绎志

修学记化民成俗之由学古矣而王制之兴学乃在於无旷土游民食节事时乐事劝功尊君亲上之後岂庶富而教三代之制度施置大略然耶人伦之不明圣人不能一日以为治则学岂缓事也哉凡王制之云云者皆所以为教必如是而後学可兴教可成不得以陵节而施之也建康学故在府之西北隅景佑元年天章阁待制陈公执中重建兹地中厄兵烬绍兴九年左丞叶公梦得实新之距今裁四十年而椽栋陞挠瓦飘壁摧殆无以尊圣祀宏教基者淳熙

二年今观文殿学士建安刘公珙来镇兹土谒奠之始视学圯陋心拳拳焉时适以旱告公视饥由已惟荒政是力既民被实惠若更生则凡所以教民者次第修举以春秋释奠所以事先圣先师者率不终敬公已事益必视彻乃退以明道先生实传孔孟之统而仁民爱物之政着於为上元簿时乃祠之学宫以示尊尚民有与犹子讼至庭者公占辞自责剖晰天理民至感以泣争心两絶由是家传户诵闾阎兴辑睦之风公一日诣学顾谓文学掾汝楫黼曰学宇之弊若此葺其时乎乃捐公帑三百万命知上元县薛襄董其役学亦倾积岁所储得钱百三十余万以佐费僦工市材易壁之圯腐而峻整之饰象之晦而采章之堂庑斋庐廩庖湢弊者修坏者创计以坚久不为苟美寝处所须凡用严具以淳熙五年二月戊寅始事四月晦日讫工公临观延见诸生因讲明为学之要而诲之以义利之说莫不感厉怀来弦诵相属乃卜日之吉躬率寮掾行释菜礼且肃乡老而燕飧焉耆艾叹嗟睹礼知古请伐石以纪不朽汝楫等曰公为政三年于此而始修学岂讳劳惜费而後始为之哉是公不在修学修其教也土木之工易坏而金石之寿有纪国家敦崇学校过於汉唐所以寿斯文之脉者养士力也上不得不以科第取士士不当止以科第自期自士之溺意於进取而道学废自进取不在郡学而乡校衰凡公之所以留意於此邦拳拳焉而教之而新之而告之者既闻耳矣修其身以善於其乡修於乡以善其国人则其传也视土木之工金石之寿宁有既耶若夫重违耆艾操笔纪事则汝楫等职也敢辞淳熙五年六月甲子廸功郎充建康府府学教授黄黼承议郎充建康府府学教授章汝楫记从事郎监建康府户部大军库门许及之书

重修府学景定四年制使姚公希得差总管曹臻董其事将本学殿堂斋舍学门棂星门仓屋等处并两教官廨舍并行修葺一新兼置动用等物总费钱四万二千一百八十余缗米六十四石九斗有奇

置教授

天圣建学置教授一员绍兴九年因左丞叶公奏照西京例增置一员分东西厅东厅在学之左西厅在学之右其初东西题名合为一後析为二

东西厅总题名记学以明伦而建官以传道而设厥任岂轻也哉建业巨丽视上都多秀民异时冠伦魁秉钧枢者皆由是乎出分教于兹亦一时选旧止独员至绍兴初石林叶公居守才建议增置列廨於学之东西其西惟旧莫详所始其东则自叶创而以盛光祖始焉厅故无记前政沈元肖与同僚孙才弱实讲求之得三十有二人未暇刻而沈代汝楫乃後之与才翁一见而契喜二厅可跬步日相从不虚有讲习乐不知官之冷也於是欲刻之石才翁老於文学宜记乃以属汝楫辞不可遂书庶继今相与尽心於斯道俾学者有所兴起以追美於前闻人他日明秀隽伟出而为名公卿则将推其教之所自顾岂不预有荣耀是记岂特列名氏而已哉淳熙四年二月二十二日宣城章汝楫记晋陵孙熹书开封赵善珪题

刘亘 钱寿朋 孙适

黄唐杰 叶萃 汪乔年

陶去泰 盛光祖 丁娄明

蒋汝功 郑次云 李木

胡靖 蔡琨 王宾

祝公達 李木 谢芷【以上岁月皆不可考】周必大【修职郎绍兴二十八年二月初二日到任三十年二月十四日除太学録】戴達先

唐仲友【从事郎绍兴三十一年十月十三日到任隆兴二年正月初七日任满】王信【迪功郎隆兴二年四月二十八日到任】

黄石【从事郎绍兴二十九年四月初六日到任三十二年二月十四日任满】

曹密【承议郎绍兴三十二年三月二十九日到任隆兴二年四月二十七日任满】徐扬【承议郎隆兴二年四月二十八日到任乾道二年四月二十七日任满】

何作哲【承议郎乾道二年四月二十八日到任四年六月初二日任满】

梅瑛【迪功郎乾道四年六月初三日到任】

莫澄【从事郎乾道五年十月二十二日到任】

朱侑【修职郎乾道六年十二月二十一日到任淳熙元年正月初二日任满】

孙鼐【迪功郎淳熙元年正月初三日到任四年三月初二日就任关陞从事郎】

王椿【文林郎淳熙十五年七月初三日到任绍熙元年四月遇覃恩循儒林郎二年八月二十

九日任满】

陈震之【从政郎绍熙二年八月二十九日到任】

王益祥【修职郎绍熙五年十月二十日到任庆元三年十一月三十日满】

余禹畴【从政郎庆元三年十一月三十日到任嘉泰元年正月二十八日满】

陈懔【从政郎嘉泰元年正月二十八日到任嘉泰四年四月二十六日满】

程秘【从政郎嘉泰四年四月二十六日到任】

黄云翼【迪功郎嘉定元年三月初九日到任於次年六月二十五日关陞从政郎至嘉定四年四月初一日任满】

苏汉【迪功郎嘉定四年四月初二日到任】

黄肤卿【迪功郎庆元三年十月十三日到任庆元六年十二月二十日满】

范择能【从事郎庆元六年十二月二十日到任嘉泰三年十二月二十一日满】田晓【从事郎嘉泰三年十二月二十一日到任开禧三年四月二十日年满离任】黄匀【开禧三年四月二十日到任】

冯特卿【从事郎嘉定三年七月十四日到任六年七月十六日书满】

黄民望【迪功郎嘉定六年十一月初十日到任七年三月十四日除太社令】

朱方大【文林郎嘉定七年十月十六日到任至十年十月十八日年满离任】

缪师臯【迪功郎嘉定七年五月初四日到任至当年八月十四日离任】

杨迈【从政郎嘉定七年十二月十二日到任至十年二月初十日离任】

戴【阙从政郎嘉定十一年二月十二日到任至嘉定十四年二月十四日任满】

陈珏【修职郎嘉定十四年正月四日到任十七年正月四日满】

徐庭圭【宣义郎乾道二年二月初十日到任】

李廷直【迪功郎乾道三年十一月二十日到任六年十二月任满】

薛珪【从事郎乾道六年十二月二十六日到任九年八月初十日任满】

沈宗说【从政郎乾道九年八月十一日到任淳熙三年十一月初十日就任改宣教郎】章汝楫【承议郎淳熙三年十一月十日到任五年十二月二十三日任满】

胡弦【迪功郎淳熙五年十二月二十四日到任六年十月八日关陞从事郎八年四月二日用

出疆赏循文林郎】

徐嘉言【从事郎淳熙九年二月十二日到任十二年二月二十二日任满】

林思聪【迪功郎淳熙十二年四月初五日到任十五年七月初二日任满】

黄黼【迪功郎淳熙四年四月初一日到任七年四月二十三日任满】

王诚之【从政郎淳熙七年四月二十四日到任】

鲍义叔【从事郎淳熙七年十二月十三日到任】

王莱【从事郎淳熙八年十月初三日到任十一年十一月十六日满】

鲍士良【迪功郎淳熙十一年十一月十六日到任十五年二月二十五日任满】朱士挺【从政郎淳熙十五年二月二十六日到任绍熙二年二月二十六日离任】陈大应【从政郎绍熙二年五月二十四日到任】

陈与行【迪功郎绍熙五年七月二十六日到任庆元三年十月十三日满】

欧阳伟【从政郎嘉定十年十二月二十一日到任至十三年十二月二十三日任满】

东厅续题名记金陵号留都之府学宫设两教之员自我高宗六飞南渡则已然矣题名有碑具纪其实东西二厅合为一记由绍兴初迄今未及百年而累政之书充塞盈溢不容附丽於是得坚珉二分东西而两之各为之记以续前志曩自盛光祖而下至欧阳伟凡属於东者一十有八人今新碑之创始於嘉定之癸未而珉也适当其次辄首书以纪岁月自为而自书之虽陋不辞嗣是列衔而累书则以待于後之人若夫締创之有端纪述之有人则已备见於前志无庸赘叙时嘉定十有七年正月既望修职郎充建康府府学教授三山陈珉记

陈珉【修职郎以嘉定十四年正月四日到任十七年正月四日满】

蒋褒然【承直郎嘉定十七年二月十六日到任宝庆三年二月满】

潘忠恕【迪功郎宝庆三年五月十日到任至绍定二年正月十二日解罢】

刘泳【从政郎绍定二年八月十三日到任五年八月十三日满】

欧阳方【承直郎绍定六年十月初三日到任端平三年五月三十日离任】

孔圣义【承直郎端平三年十二月二十日到任嘉熙三年五月三十日外改知铜陵县】沈
輝【嘉熙三年九月初九日到任】

方逢辰【淳佑二年四月二十八日到任淳佑五年四月二十八日满】

吴必達【淳佑五年七月二十九日到任】

蒋熊【淳佑七年十一月二十八日到任淳佑十年十一月二十八日满】

李杞【淳佑十年十一月二十九日到任宝佑元年十月初八日丁母忧】

叶维华【承直郎宝佑二年正月初一日到任宝佑五年二月十八日任满】

陈焕武【宝佑五年二月到任】

赵与种【开庆元年十一月十五日到任】

西厅续题名记六经不作史法代兴世谓汉辞类经唐辞类史然辞学之盛莫盛有唐考之当代人自为家类皆容严密雄眎千古继是而降世教寢舛口耳授受日谈虚空以言语之録而为经以课试之辞而为史沉流没溺莫能自脱往往理乱不闻临事失据不止肠枯思涸笔膏不流而已也抑尝观诸铨筦尤有感焉县令者百里之宅生也狱掾者千里之司命也博士者一郡之统学也胜任与否懵不熟问一吏倡呼如格即注今日以是取士他日以是教人由前而论则学者之敝由後而言则教者之责教明於上则人兴於下故曰古之为师者由下而宗之後之为师者自上而择之宗者以道择者以官然守官则亦守道矣顾择官易乎哉金陵陪京也典教重任也景温由庙朝推择而来研精教事缝掖归心其为教也求之经以浚其源贯之史以沃其膏则胸中汪洋浑灏用世有余奚有於辞章乎变秦淮之地为邹鲁之乡可必也顾予羈也尝怀虚席之愧今亦一洗矣独此邦之幸哉且登名之石已满复更植之使来者有考焉是又大易教思无穷之义也景温范氏名光鄞江人其元嘉定其岁壬午月无射日甲子中奉大夫权尚书吏部侍郎兼同修国史兼实录院同修撰兼权中书舍人程秘记

范光【迪功郎嘉定十四年二月十六日到任至十七年二月十六日满】

王汉章【从政郎嘉定十七年四月二十八日到任宝庆三年五月满替】

许巨川【文林郎宝庆四年十二月初九日到任绍定四年正月十一日满】

顏俨【承直郎绍定四年正月到任】

计明龟【儒林郎绍定五年十月到任端平二年正月赴班】

陶焜【文林郎端平二年三月二十一日到任嘉熙二年三月十二日满】

莫子文【从事郎嘉熙二年三月到任淳佑改元四月赴班】

赵若炳【从事郎淳佑元年七月二十四日到任淳佑四年八月初四日满替】

胡太初【迪功郎淳佑四年八月初六日到任六年十月二十三日离任】

薛峤【迪功郎淳佑六年十二月初六日到任九年十二月初六日满替】

宋自强【从政郎淳佑九年十二月初六日到任宝佑元年三月十七日满替赴班】赵熄夫【修职郎宝佑元年三月二十七日到任宝佑四年四月二十七日满替】陈懋钦【迪功郎宝佑四年四月到任】

刘应子【儒林郎宝佑六年六月初六日到任】

置经籍

天圣中赐监书绍兴初赐石经今不复全近时师儒收拾经子史集亦多未为大备闾府方求国子监书以惠多士云

增学计

天圣七年始建学朝廷给田十顷其後续有增拨至靖康间增至三十八顷五十七畹房廊七十一间及酒坊三处岁收钱一千八百二十四贯有奇至绍兴二十八年以秦申王所送钱一万贯续置到田一千八百九十亩其後本府又有增拨至於景定田地之所隶者具九千三百八十亩一角六十步坊场之所隶者三岁入钱二万四千余贯【铜井坊在江宁县银林坊鍾山坊皆在溧水县】芦场之所隶者二岁入钱四千三百余贯【白鹭洲一所计一十五顷三十八亩有奇水瓜洲一所计六百亩有奇】通而计之岁入米三千八百八十余石菽麦四百石钱四万一千余贯柴薪丝麻之入不与焉会计有籍记载有碑皆掌於学提督钱粮则通判东厅之职也

立义庄

义庄创於淳佑辛亥退庵吴公守建康时也是年四月府有牒报学其略曰当使昨见四明府学有义庄一所每年收到租课凡簪纓之後及见在学行供破食职事生员遇有吉凶於内支給贍助心甚慕之建康府士子贫窶者多或遇吉凶多阙支用尤可悯念今用钱五十万贯回买到制司後湖田七千二百七十八亩三角二十八步岁收四千三百余石市斗米麦相半发下本学置簿椿管如委的簪纓之後及见在学行供职事生员或有吉凶请具状经学保明申

上给米八石麦七石米每石折钱三十六贯麦每石折钱二十五贯本年发柴田上旧租米麦解到价钱一十二万余贯发下提督府学钱粮厅照应拘收自五月为始照规支給仍将後湖庄田地亩步分明入籍自本年夏料为始径自拘催将所催租课於广济仓寄放椿顿本学养士钱米不相干涉牒学照应施行仍示士子知悉府学回申八项一欲就本学空闲地段置仓收桩米麦一欲就学库旁令夹截一库收桩钱会一欲专及土着不及游学之人一欲将到殿入学赴任人委系贫窶者照吉事例并与周给一欲立凶礼支助之例惟祖父母父母自身亲兄弟妻子事故者当给不许以疎为亲以无为有妄陈苟得一欲请教授同正録直学五员亲到仓库同收同支授又亲书交领置簿登载岁终有会一欲置租课总簿催销季终有会一欲将田亩籍册及义庄始末并刻於石以垂永久五月二十二日府牒并从申行至次年二月又牒勘会本府昨置立义庄如委系簪纓之後及见在学士着行供职事生员贫窶者或有吉凶从府学保明申府给米八石麦七石米每石折钱三十六贯麦每石折钱二十五贯则例虽已立定规模尚未为广自今月二十六日为始如是他处游学士人见在本学行供或在本府寓居虽非土着如有吉凶并与一例支給兼照得人人申府亦恐烦渎今专委西厅通判提督如遇有陈乞之人即请本学契勘诣实保明具申提督厅支給牒学遵照施行

义庄记昔文正范公自为西帅迄登二府慨以禄赐所入置负郭膏腴千亩名曰义田以贍族党钱君公辅高其义而为之记尝阅至此喟然叹曰夫义者充一念而万年可继周一方而四海具贍若济以乘輿给以釜粟君子不谓义也世之卿大夫士躋华途美饮食日与族人相娱乐可也而光景自肥本枝皇恤鲜有不屯其膏者念或到此则又力多乏絶况乡里乎至若位极鼎轴归荣锦昼日与乡人接殷勤宜也而霄汉自尊胡越下视鲜有克贯其脉者粉阴梓里欲一望羽仪且不可况天下乎惟留帅资相吴公则不然公金陵人也以忠勤行六经以忠勤治天下建牙未几鼎新乡校丰廩粟增膳钱可谓急先务矣若犹未也每对僚属必于四明义庄口之弗置廼命攸司亟其经营以钱五十万缗得後湖庄田地七千二百七十八亩有奇米麦岁为斛四千三百余硕归之学宫度其地得议道堂左辟屋三十楹目曰义庄凡乡邦簪纓之胄韦布者流嫁娶婚葬皆有给处而学若籍贤关第太常者出而仕若驱行李抵戍瓜者莫不与焉其关世教不轻矣属文学掾泊前廊严其考核而时其出入岁终则会之吉与凶例予以米若麦厥硕一十有五惠至渥也州人士謏然歌曰燕窳恤孤西门賑贫昔耳其名今身而亲近举而远存有以饱我公一念之仁与而麦舟瘞而枯骨昔凶而家今幽而宅薄费而厚得有以衔我公至仁之德是仁者义之推义者德之着也噫以范公好施止於亲之贫疎之贤者犹未暇他及今秦淮鍾阜大江南北四通八達在在皆春比范公昔年义规益茂长而增之天下之蒙福未央也郡人若诸生踊跃批岩愿有纪告来者自强濫巾璜泮职固宜矣服公厚义遂涉笔以书时淳佑十一年十一月既望从政郎差充建康府府学教授宋自强撰迪功郎差充建康府府学教授李杞书朝议大夫前主管成都府玉局观沈先庚篆盖

卷二十九

钦定四库全书卷

景定建康志卷二十九 宋 周应合 撰

儒学志二

建明道书院

明道先生程子【事见程子书及先贤传】师濂溪先生周子慨然有求道之志穷性命之理率性会道体道成德自孟子没圣人之学不传先生生千四百年之後得不传之学於遗经志将以斯道觉人天不憖遗哲人早世尝为上元主簿且摄县事政教在人至今思之因人心之所思而明先生之教此书院所由建也先是淳熙初忠肃刘公珙祠程子於学宫朱文公为之记绍熙间主簿赵君师秀来居其官即听事西偏绘像祠之嘉定乙亥主簿危君和复请於太守刘公榘乃於簿廨之东得铃辖旧廨之地改筑新祠部使者西山真公捐金三十万粟二千斛以助之未几李公珣来继刘公咸相其役前护重门中俨祠像扁其堂曰春风上为楼旁二塾曰主敬曰行恕名其泉曰泽物表其坊曰尊贤既成率郡博士及诸生行舍菜礼自是春秋中丁率为彝典置堂长及职事员延致好修之士西山尝记其事刻诸石崇重未几忽就隳废堂宇虽存讲肄阙如遂为军储宾寓之所淳佑己酉二月天大雷电书阁忽灾退庵吴公因更创之阁视旧益伟下为春风堂聘名儒以为长招志士以共学广斋序增廩稍仿白鹿洞规以程讲课士趋者衆圣天子闻而嘉之亲洒明道书院四大字赐为额与四书院等宝佑丙辰裕斋马公得西山断碑於瓦砾中重刻之跋其後开庆己未马公再建大阍视事之始与部使者率僚属会讲於春风堂听讲之士数百乃属山长修程子书刻梓以授诸生给田以增廩而教养之事备焉续善意保成规寿斯文之脉则有望於後之君子云祠堂居中三间广四丈深三丈中设塑像榜曰河南伯程纯公之祠东西两廊各一十五间

御书阁在春风堂之上五间广八丈深四丈上严奉宸翰环列经籍

春风堂在祠堂之後七间广十丈深五丈盖会讲之所也昔朱公掞见明道先生於汝归谓人曰春风中坐了一月堂名盖取此也中设讲座四围设听讲位临堦垂帘前筑一台植以四柱

主敬堂在春风堂之北三间广三丈八尺深二丈三尺盖会食会茶之所也庭中荷池前植三槐

燕居堂在主敬堂之後山长张显设先圣及十四先贤神位於堂中

山长位在主敬堂之左

堂长位在主敬堂之右

堂録位春风堂上之左

讲书位在春风堂後之右

职事位二所一在春风堂上之右一在春风堂後尚志斋三间在主敬堂前东序之南

明善斋三间在主敬堂前西序之南

敏行斋三间在主敬堂前东序之北

成德斋三间在主敬堂前西序之北

省身斋在春风堂前之左系统添

养心斋在春风堂前之右系统添

公厨在主敬堂前东序之後

米敖在主敬堂前东序之南

钱库在主敬堂前西序之南

直房在公厨之侧

蔬园在书院之右

后土祠居大门内之左

中门屋三间广四丈深二丈五尺揭御书明道书院四字於楣左为幕次右为吏舍

大门屋三间广四丈四尺深一丈八尺左右设栊繚以垣墙

具廩稍帅府累政拨到田产四千九百八亩三角三十步【上元县徐提举等三户佃田七十三亩又三十八亩地三十一亩一角江宁县邵仁等一十户佃田七十七亩三十八步句容县戴日德等四十一户佃田三百八十六亩二角四十三步地一十二亩一角二十五步杂产二

十六亩二角二十步溧水县平登仕等一十四户佃田三千五百四十二亩四十七步溧阳县杨省四等一十八户佃田产四百九十二亩三十八步】岁入米一千二百六十九石有奇稻三千六百六十二斤菽麦一百一十余石折租钱一百一十贯七百文又有白地房廊钱【常州宜兴县管下房赁岁收见钱八十一贯九百文月王监场献到白地房廊三项右上元丫头巷北街白地赁钱官减外日收一贯一百四十文足崇道桥南马司寨前白地赁钱官减外日收四百二十五文省系七十陌鸡行街鱼市街篦行口房廊屋赁钱官减外日收二百六十文省】本府每月拨下贍士支遣钱五千贯十七界官会并芦柴四十束【淳佑十二年二月初二日府牒每年于张庄变粟二麦价钱内拨十七界一十万贯发下书院充贍士支遣王尚书桢到任每月只支五千贯】钱粮官掌其出纳所支供奉有差岁终有会【月俸山长一百贯钱粮官二十贯堂长一百贯米三石堂录六十贯米一石五斗讲书五十贯米一石五斗堂宾二十六贯米一石二斗直学二十四贯米一石二斗讲宾一十七贯米一石二斗司计一十五贯米一石二斗掌书一十五贯米一石二斗堂祠一十四贯米一石二斗斋长一十贯米一石正供生员每名五贯医谕米七斗日供职事生员米二升五合造食钱三百文山堂长贴食钱七百文堂录讲书贴食钱五百文堂宾至斋长贴食钱二百文各照亲书食簿支送不行供者不支宿斋职事生员每夜支油钱二百文堂长堂录讲书每夜支油二两各照亲书宿斋簿支送不宿斋者不支寒月送炭山长入堂日支五斤堂长日五斤堂录讲书日各三斤衆职事生员日各二斤自十月初一日为始至正月终任支行食宿斋者全支不宿斋者半支凡支钱并用十八界官会凡支米并用文思斛斗】立规程一春秋释菜朔望谒祠礼仪皆仿白鹿书院一士之有志於学者不拘远近诣山长入状帘引疑义一篇文理通明者请入书院以杜其泛一每旬山长入堂会集职事生员授讲籤讲覆讲如规三八讲经一六讲史并书於讲簿一每月三课上旬经疑中旬史疑下旬举业【以孟仲季月分本经论策三场】文理优者传斋书德业簿一诸生德业修否置簿书之掌於直学三考黜陟一职事生员出入并用深衣一请假有簿出不书簿者罚一应书院士友不许出外请谒投献违者议罚有讼在官者给假事毕日参一请假逾三月者职事差替生员不复再参一凡谒祠听讲供课若无故而不至者书于簿及三罢职住供一凡职事生员犯规矩而出者不许再参记序默斋游公记天下学者同尊夫子同习六经语孟其援引而藉以为说又多同也然自孟子歿皆谓微言坠地不得圣人之心若赵有荀卿氏汉有扬雄氏唐有韩愈氏咸自着书将脗合圣人而後世以为未尽明乎大道之要自是而下大人先生阔希不作学者无所矜式各是其私务济所欲则倡言宗孔孟足矣何必他求呜呼由汉以来诸儒继起曷尝不宗孔孟而功业卑陋终莫能复帝王之盛烈甚则诤谈释老而心实慕信耻从管商而事实施行流於术数借于儉回无世无之儒者岂容尽追其责哉圣人之道虽曰极深研几参天地之蕴奥穷事物之精微乃近不离乎人心之所同然而亲切乎忠信孝悌日用之间流风益衰师道既已弗立学者察於日用而求诸同然者皆废是以依俚莫知所归论说徒多践履益薄终日谈六经未必不疑六经也宋兴钜儒辈出若明道先生程氏早闻道於濂溪周先生日益光大自吾心验之必见夫天之所受本体昭然无纖毫之妄然後尽性至命穷神知化亦无纖毫之疑由之独善其身则立乎斯世行天下之大道不愧忤於俯仰之间以之措於天下则尧舜三王至仁之政绥来动和之效粲然明备其本实起於此六经具存莫究厥旨有能识孔孟之心犁然当於人心者吾斯从之嗟乎亿兆之衆虽不人人闻道而此心至神弗可厚诬百世之下其有知先生之风者矣上元县主簿赵君师秀谓九言曰师秀实践先生昔日所居之官也今建康府既有祠以风励士子顾所临旧地尚为

阙典敢即听事西偏绘粹容俎豆之赵君蚤由进士登甲科不汲汲乎近功速效而尊信在此知所务矣求记于九言窃惟先生抱职佐贰施虽不遐然风行一邑已非小补见诸当时记述者数家兹不复载敢存其大者以着赵君建祠之意学者傥能即先生绪言而验诸吾心则其所以诚身择善而达于孔孟之道者当自知之庆元丙辰季冬建安游九言记西山真公记圣人之道布在方册昭然示人至矣尧之授舜曰中而已舜之授禹加三言焉其曰人心者人欲之谓也其曰道心者天理之谓也择之精守之一而後中可执中也者天理当然之则而一毫人欲之私无所与乎其间者也大学论语孟子指言义利之分皆同此意未尝以天理言独见于乐记曰不能反躬天理灭矣又曰物至而人化物也人化物也者灭天理而穷人欲者也世谓礼记之书类出於汉儒之言传者多矣有及於是者乎自时厥後道日晦冥更千余年以及我朝治教休明风气醴厚於是始有濂溪周子出焉独得不传之妙明道先生程公见而知之阐幽发微益明益章今观遗书所载论学必以达天德为本论治必以行王道为宗有天德而後可语王道天人内外一以贯之无殊辙也故先生尝语学者曰吾学虽有所受然天理二字自吾体验而表出之呜呼至哉此所以上继尧舜孔孟之统绪而下开万世学者之准的也坎夫维天之命於穆不已品物流形而理亦赋焉仁义礼智之性惻隐羞恶辞让是非之情耳目鼻口四肢百骸之为用君臣父子兄弟夫妇之为伦何莫而非天也人知人之人而不知人之天物欲肆行义理汨丧於禽兽奚择焉知人之天而後知性善知性善然後能穷理能穷理然後能诚意正心以修其身推之治国平天下无非顺帝之则也先生之生锺乎元气之会学之所至纯乎天理故其生色也盎然而阳春之温其吐辞也泛然若醴酒之酣同设教於家而士之愿从者衆同争新法於朝而天子亮其忠用事者感其忱一时忤意者皆贬而先生独畀宪节力辞不就去之久而犹见思及其歿也士大夫知与不知皆为流涕以为使时见用必将有绥斯来动斯和之效而重哀生人之不遇不得与于先生佑兴王道之泽也非夫先生之心学纯乎天理其孰能与於斯乎先生之仕也尝主江宁之上元簿考其设施若均田赋兴水利息邪说正人心等事皆天理之流行着见者也中更变故乡之人士罕有能言之者乾道中资政殿大学士刘公拱辰知府事始祠先生於学宫而侍讲文公先生实为之记则既较然昭着而足以风励学者矣其後主簿赵君师秀复即廨舍之前为屋数楹以寓尊事之意而庠隘弗称嘉定甲戌临川危君和嗣居其职始请於帅守莆田刘公榘增而大之德秀时将漕焉捐金三十万粟二千斛以助之未几豫章李公珏继至咸相其役为堂三间中严像设而扁之曰春风其上为楼高明洁清内为斋二东曰主敬西曰行恕後为小屋焉曰读易外为斋一曰近思斋之侧为亭曰静观又为两庑翼之而刻表墓与河南雅言于其壁危君之于斯役勤矣而刘公之经始也尝属德秀为之记危君又重以为请再三返而不置德秀以固陋力辞而不可得也顾自惟念少知诵习先生之书初盖茫然不知所向而粗若有见者窃谓自有载籍而天理之云仅见于乐记先生首发挥之其说大明学者得以用其力焉所以开千古之秘觉万世之迷其有功於斯道可谓盛矣而其所以进乎此则又有二言焉毋不敬以操存於未发之先思无邪以戒谨於将发之际涵养省察动静交饬知天事天二者兼尽及其至也中一外融显微无间则虽人也而实浩浩其天矣若是者其於先生之道有合乎否也过不自料次第其说以授之危君幸以为然则刻置堂上以示来游于斯者使知先生之道虽高而用力有要万有一可为兴起之助云尔嘉定丙子正月吉日真德秀记裕斋马公跋盈宇宙间一天理而已明道先生体验而表出以传孔孟之传先生天人也书堂乃遗教之地西山真先生记之首述精一之传直以道心为天理之谓教学者知天事天而天其人西山之旨即先生之教以先生之传望学

者传之也其以人心为人欲之谓或者疑之盍知夫心之未发本无理与欲之分则无道与人之别其发于理而为道心固无不善矣其发于欲而为人心虽不能皆善亦曷尝皆不善哉精之则理制欲而不相杂一之则欲从理而不相离动静语默无适不善则无适非天地帝王之心传也学者果能操存於未发之先戒谨於将发之际而于此心之天有自得之趣则可以洞然无疑矣宝佑戊午仲春上澣日门人通奉大夫守刑部尚书沿江制置使知建康军府事兼管内劝农使江南东路安抚使马步军都总管兼节制和州无为军安庆府三郡屯田使兼行宫留守兼提领江淮茶盐所武义县开国子食邑六百户马光祖谨跋 替斋王公记御书臣桱恭惟皇帝陛下躬践圣域心探道原式崇先民以厉後学乃睠建业实惟儒臣程颢簿正之邦道德流风迄未澌泯有严祠宇日就堙芜前制臣吴渊访旧图新用昭文明之化拜手稽首请宸翰揭巨扁而宠绥之星汉昭回鸾凤飞舞猗欤盛哉臣桱承乏分阃猥被末光於是谄四方之士而诲之曰河南之学粹矣如坐春风如会元气运行亭毒见者盎然曰鄠曰洛曰澶曰汝皆历仕之邦也繫此陪都遗轍独存赫赫斯文孰主张是盖尝仰窥圣朝以仁立国言仁之盛莫如昭陵龙潜旧藩肇启兹土至仁一脉山培川衍厥有儒宗来嚙来游出其绪余载之行事昔臣朱熹尝曰均田塞堤及民之政为多脯龙折竿教民之意亦备其此仁之发達乎夫以黄旗紫盖之区叶云龙风虎之应气类感召千载一时延洪之休有自来矣厥今圣主抚世仁之运明行仁之政及是时新美多士景行先哲俾山立典型复见于今日是岂但敷文教而已奕奕鍾阜由昔镐京丰芑之仁万世永赖臣桱敬为明时诵之宝佑元年正月旦日宝章阁直学士通议大夫沿江制置使兼知建康军府事兼管内劝农使充江南东路安抚使马步军都总管兼营田使兼行宫留守节制和州无为军安庆府兼三郡屯田使金华县开国子食邑五百户臣王桱拜手稽首谨言裕斋马公作程子序孔孟之道至程子而大明程子之道至淳佑表章而益尊大哉王言比之顔曾所以示学者求道之标的也明道书院之在金陵实因仁国而烝尝之程子之徒位之以师友而讲学其间以为尊闻行知之地然登程子之堂则必读程子之书读其书然後能明其道而存于心履于身推之国家天下则天地万物皆于我乎赖然斯堂为程子设而未有程子之书非阙欤余每有志于斯会易阃未果已未重来尝以语客周君应合乃萃二程先生之言之行辑为一书以大学八条定其篇目表以程子无何文君及翁来相与参订而书遂成虽然昔二程子之学於师也尝令寻仲尼顔子所乐何事程子十五六时脱然欲学圣人今之读其书者当寻程子所以学圣人者何事则此书不徒辑矣先儒论明道之学皆谓孟子之後一人而已今程子之书非续孟子者乎韩退之尝曰观圣道自孟子始余亦曰孟子之後观圣道自程子始开庆己未秋八月中澣後学金华马光祖序

程子书成山长周应合以不受月俸五千贯充刻梓费首尾百六十七版藏於书阁司书掌之

置提举官开庆元年从山长之请仿东湖书院例置提举官以制干文及翁兼充寻省

重修明道书院景定四年姚公希得任内重修门楼厅廊墙壁粲然一新总费一万一千一百二十余缗米三十硕

橘洲姚公再为明道先生立後先是往岁朝廷曾劄池州选择伊川五世孙曰偃孙者为之後前政马观文以是邦明道书堂在焉迎就教育并其母曾馆之官宇月给有差未及两载而偃孙亡曾母无依先贤弗嗣委为可念景定三年据学官申遂再行下池州访问别无本宗嫡???

可以昭穆遂牒郡庠及书院择同姓而可教者保明申续据申选到程掌仪必贵兄程子材男庆老年方十岁生质厚重家世诗书可为明道之後于是择日行释菜之礼告於纯公之祠立为偃孙之子命名幼学俾职掌祠就学于其叔父程掌仪旬有课程讲学不废其祖母曾就同奉养使不失祖孙相依之义倘天佑斯文教养至于成立先贤无或废祀庶有补於世教云一行礼币费用及每月教养廩给具于下方

祖母曾氏送五百贯十七界为衣被之用

掌祠程幼学送五百贯十七界置衣服

生父程子材送一千贯土绢四疋

建康府月支三百贯十七界米二石一半付程掌仪取支为曾母逐日供给之用一半桩之书堂为曾母衣服等用

明道书堂每日行供折钱月支四十五贯十七界米七斗五升拨过程掌仪家为幼学日食之用

程掌仪必贵任教导之责书院月馈束脯五十贯十七界米五斗

开堂讲大学【大学之道在明明德在亲民在止於至善学何如其为大也易之乾坤天地之性情也乾之象曰天行健君子以自强不息所以效天也坤之象曰地势坤君子以厚德载物所以法地也学聚问辨曷言於乾敬内直外曷言於坤人学天地也百川学海而至於海人学天地而至於与天地相似然後为学之大尧舜禹汤文武汲汲仲尼皇皇者此学也曾顔思孟切切惓惓者此学也天子之元子衆子公侯卿大夫士之适子与国之俊选孜孜讲习者此学也学始於效法天地之象终至於天地由此而位始於穷尽万物之理终至於万物由此而育始於格物致知诚意正心修身终至於家由此而齐国由此而治天下由此而平学之大信乎其为大也大学正经目有八纲有三纲者目之大焉者也在明明德在新民在止於至善三在者大学之大纲也何谓明明德心之本体惟虚故灵惟灵故明朱子谓虚灵不昧者指心而言也具衆理者指性而言也应万事者指情而言也合而言之心统性情也心得於天故曰德属於火故极明试一猛省圆明方寸照耀八紘太阳正中魑魅潜伏其或黯无晶光者物欲渍之也刮磨澡雪还其本然之明常使清明在躬志气如神嗜欲将至有开必先至诚之道可以前知见乎蓍龟动乎四体不愧屋漏不欺暗室尘去而监空波停而水止浮云斂而日月明此之谓明明德何谓新民我明矣不可听他人之昏旧染汙俗咸与维新後觉後知资我知觉必使康衢顺则比屋可封黎民於变时雍百姓徧为尔德中林武夫皆可干城汉上游女无思犯礼民乐其有灵德人皆有士君子之行此之谓新民何谓止至善非明德新民之外别有至善已德无一毫之不明即是明明德之至善民俗无一处之不新即是新民之至善明德新民彻头彻尾到十分尽善处是谓止至善此大学之大纲也论其目则修身以上四条即明明德之事修身以下三条即新民之事纲举而目自张也经言古之明明德於天下于以见明德必推而

新民传言作新民而先以盘铭日新于以见新民必本於明德彼有扬眉瞬目而直指此心葆光袭明而务私诸已此释老之所谓明德而不能推之於新民者也其有舞智数而涂世之耳目假仁义而鼓民之驩虞此管晏之所谓新民而不知本於明德者也兹其所以为异端为曲学卒不可与入大学之道金陵重镇名世者多江左六朝姑置勿论我朝大儒程纯公仕於此邦者也熙宁宰相王荆公寓於此邦者也诸君来游来歌过上元县之甘棠望镇山寺之雪栢亦尝知程氏之学与王氏之学同乎异乎愚也窃闻程夫子教人先之以大学遗言往训布在方策可举而行贯百王而不易历万世而无弊王氏之学恃强明而出新意作聪明而乱旧章以新经蛊坏士心以新法刼制天下以新进少年播弃元老不务自明其德一切取办於新政欲图新民之功学术一差天地分裂昔人谓神州陆沉百年丘墟王夷甫诸人不得不任其责愚亦谓中原板荡今百余年兽蹄鸟迹麦秀黍离王介甫诸人不得不执其咎使介甫而早用程子顺人心之言作顺人心之事不畜聚斂之臣不殖悖入之货不专任长国家而务财用之小人以首犯大学之明戒又安有异日不可胜言之祸学者知王氏之学为非然後知程子之学为是入春风坐千载如生出半山亭万古遗恨学者亦审其是而已矣知乎此则庶几不畔程子之教而可与入大学之道】又讲中庸【天命之谓性率性之谓道修道之谓教中庸何为其名篇也子思子明尧舜禹汤文武周公仲尼之道总不外乎中庸也中者何不偏不倚无过不及之谓也太极此中也皇极此中也天地此中也圣贤此中也事物此中也尧舜禹三圣相授允执其中汤建中文王顺帝之则武王惟皇作极周公制礼之中仲尼时中之中皆中也庸常也惟中故常惟常故中自常情观之尧舜不传子而传贤禹不传贤而传子汤放桀文事殷武伐纣周公诛管蔡仲尼欲从中牟佛肸之召而又不从媚奥媚竈之说不取晨门荷蓂之徒而又有取乎饭蔬饮水之乐疑若不常也然不知此正所以为中正所以为常何以言之使尧舜之子丹朱商均而克肖则尧舜亦必传之子使禹之子启而不肖则禹亦必传之贤使夏桀商纣天命未改人心未离则汤武亦必如文王之遵养时晦使管蔡不流言不挟武庚禄父以叛则斧不必破斨不必缺鸛鵩之诗不必作而常棣之燕乐自如也使仲尼果用则有时乎不俟驾而往如不用则有时乎不税冕而行可仕可止可久可速毋意毋必毋固毋我兹中也乃所以为常也此尧舜禹汤文武周公仲尼之中庸也此子思子中庸名篇之大旨也天命之谓性何也自然而然者天也犹今之令者命也与生俱生者性也自天之赋予而言曰命自人之稟受而言曰性天命即性性即天命故曰天命之谓性率性之谓道何也性即理也理即仁义礼智也率即循也率性之仁则父子有亲矣率性之义则君臣有敬矣率性之礼则长幼有序矣率性之智则是非有别矣故曰率性之谓道修道之谓教何也以天之赋予而言曰命曰性曰道固人之所同以人之气稟而言或厚或薄或清或浊不能无不异惟圣人能全天地不全之功尽君师当尽之职即是道而品节之为法於天下可传於後世是之谓教然其为教亦不出乎三纲五常而已因其所有而不强其所无故曰修道之谓教然则性也道也教也名虽三而实则一以其同出於天也尝因是而参考圣经贤传立言之要如出一口帝典曰人心惟危道心惟微惟精惟一允执厥中道心即天命之性精一即率性之道执中即修道之教汤诰曰惟皇上帝降衷于下民若有恒性克绥厥猷惟后帝降之衷即天命之性若有恒性即率性之道克绥厥猷即修道之教泰誓曰惟天地万物父母惟人万物之灵亶聪明作元后元后作民父母天地万物父母即天命之性人为万物之灵即率性之道元后作民父母即修道之教周诗曰天生蒸民有物有则即天命之性民之秉彝好是懿德即率性之道修道之教刘子曰人受天地之中以生即天命之性是以有礼义威仪之则以定命即率性之道修道之教孟子

之道性善得於子思之中庸者也荀子之所谓性恶扬子之所谓善恶混韩子之所谓性三品昧乎子思之中庸者也善乎程子之言曰论性不论气不备论气不论性不明二之则不是自孟子以後发明性理有功於人心有补於世教者程子一人而已其论中庸曰此篇乃孔门传授心法又曰善读中庸者得此一卷书终身用不尽惟诸友精思而力践之以入乎中庸之道】

置山长一员教养之事皆隶焉自建书院以来闾府于诸幕官中选请兼充景定元年以後从吏部注差吴坚【淳佑十二年二月以江东抚干兼充】

开堂讲义【子曰吾十有五而志于学三十而立四十而不惑五十而知天命六十而耳顺七十而从心所欲不踰矩此圣人自谦之词而教人以为学之工程也学之大要无他在不失其本心而已志学所以求其本心此学之始事从心不踰矩则本心在我矣此学之极功明道先生曰圣贤千言万语不过欲人将已放之心约之使反复入身来自能寻向上去大哉斯言其深得此章之要旨者乎约之使反即志学之事寻向上去则自立而不惑以至于从心不踰矩皆在其中矣尝试推之天之生民莫不予之以是道之全体而所谓道之全体者实浑然具於一心惟外物攻之者衆此心或与之迁则不得为之主此所以必志于学者将明善以复其初焉耳夫子圣人也知则生知行则安行若无待乎学其自称以志学云者盖为学者立法使之知所趋向先立其在我者盈科而後进成章而後達者也且夫子之所谓学者果何学哉朱子曰此所谓学指大学而言其纲则明明德而新民而止於至善其目则格物致知诚意正心修身而達於国家天下体全而用大非学不足以充之志者何心之所之之谓也精神凝定念虑专一其於大学之道如射者之求中如行者之赴家声色货利不足移其守富贵利達不足以易其操必如是而後可谓志学由志学而立则知已明而行之进也由立而不惑知天命则行已力而知之进也耳顺则知之极致不思而得者也从心不踰矩则行之极致不勉而中者也志学即从心不踰矩之始条理从心不踰矩即志学之终条理始终条理一以贯之亦惟不失其本心而已古者八岁入小学而教之以洒扫应对进退之事礼乐射御书数之文已足以收其放心养其德性而为大学之根本十五入大学而教之以穷理正心修身治人之道又所以使之开发聪明进德修业以收小学之成功是以圣人设为工程使学者及时而学循序而进即其积累之功致其体验之实率以十年之期课夫日新又新之效必志学而後能立必立而後能不惑以至於耳顺不踰矩具有次第不可躐等而升也苟志於学矣由是而往节节省察不至於极不止又岂有中道而画者哉人之一身有血气之累少而不学则血气未定而本心易蔽壮而不学则血气方刚而本心易汨老而不学则血气既衰而本心易泯学问与血气相为消长惟不志学故血气用事少未定壮而刚老而衰皆足为本心之害能志学则志气为之主而血气听命焉自学而立自立而不惑以至於知天命耳顺不踰矩皆志气之不衰者为之学至於不踰矩则寂然不动感而遂通本心莹然与道为一随其所欲莫非至理盖心即道之体从心所欲即道之用声为律身为度天下之矩皆自我出尚何踰矩之有明道先生自十五六岁时即有志学为圣人此固是其天资之高然即其约放心一语而观之则知其为学有程而圣学之始终条理所以修己教人者举不外是明道学夫子者也今诸朋友登明道之堂岂可不以明道学夫子之心为心学者玩此志学一章一则要知圣人不自圣其圣二则要知圣人体道不息如此三则要知圣人年愈高而道愈盛而体验之实行着习察自有不容掩者今

之学者视圣人远甚岂可玩愒岁时而不知所以自勉盖缘进学工夫全在立志立得志定则自三十以至七十一节紧一节自立以至从心所欲一步峻一步知行并进愈进愈极此圣人之所以为圣也开堂之初讲学发端正在今日诸君盍先立厥志】

胡崇【淳佑十一年六月以江东抚干兼充】

开堂讲义【大学之道在明明德在亲民在止於至善大学者圣道之门庭此三者大学之纲领至善一语又明德新民之标的程子曰大学孔氏之遗书而初学入德之门也又曰初学入德之门无如大学其次莫如语孟此所以为圣道之门庭也朱子曰大学一篇之旨摠而言之不出於八事而八事之要摠而言之不出乎此三者此所为大学之纲领也程子谓义理精微之极故以至善目之凡欲尽夫明德新民之实者必求止於是而不容少有过不及之差焉此所以为明德新民之标的也盖古之学者方其幼也则入小学及其长也则入大学小学则明夫洒扫应对进退之节习夫礼乐射御书数之文大学则穷夫格物致知诚意正心之本達夫修身齐家治国平天下之用学之小大虽殊其为道则一而已粵自无极之真二五之精妙合而凝化生万物而人之与物同囿形於天地之间得其气之偏且塞者为物得其气之正且通者为人所谓天地之性人为贵所谓人受天地之中以生所谓人者天地之心所谓惟人万物之灵所谓惟人也得其秀而最灵所谓得五行之秀者为人所谓天地之塞吾其体天地之帅吾其性德者得也谓之懿德谓之峻德谓之達德谓之天德皆原於稟赋之初方寸之中虚灵洞彻物物具足在在呈露不虑而知不学而能则知人之所以异於物而可以育乎物囿於天地而可以参乎天地者以其有是明德也然明德稟於天而明之则存乎人明德根於性而明之则由乎学明德虽夫人之所同得而明之则圣贤之所先得是德也纯乎天理者能明而杂以人欲者不能明道以问学者能明而蔽于气质者不能明觉者约其情养其性则能明愚者纵其性牿其情则不能明明德不明则我之所以异于物而可以育乎物囿於天地而可以参乎天地者亦既迷而不能觉矣昏昏而不能昭昭矣然人者虽炽而天者终不泯光明之学虽未加而本明之性有不可得而昧者故大学之教先之以格物致知所以发其明之之端继之以诚意正心修身所以尽其明之之实明德我所自有体认必真而洞然有见于性分之内所以因其本明之德而明之也明德我所素具操存必笃而显然着见于躬行之间所以修其本明之德而明之也此成己之学也学而谓之大则不特成己而已又有所谓成物者焉是德之明我有之人亦有之迷者皆可使之觉也圣贤有之愚不肖亦有之昏昏者皆可使之昭昭也尽己之性以尽人之性明己之德以明人之德杂以人欲者吾开导之蔽于气质者吾启发之纵其情汨其性者吾防闲而保养之使晦斯光窒斯通如醉之醒如梦之觉如迷涂之见日月始于齐家中于治国终于平天下谓之新者澡雪其精神发扬其风采出之阴浊而登之阳明投之否塞而跻之泰通释之卑陋蹇浅之域而处之高明光大之地人皆稟是明德自吾新之而明德始明非昔无而今有也人皆具是明德自吾新之而明德复明非前亏而後益也此成物之学也明德所以成己新民所以成物皆不可以私意小智行乎其间天下之理莫不有定则存焉况明德非自外来而明之新之又非一毫人力所可增损岂无所谓当然之则哉则者何至善是已至善者明德新民之则也君止于仁臣止于敬子止于孝父止于慈与人交止于信此之谓至善此之谓知止凡夫明己之德新民之德必止于是而後天理可纯不杂于人欲矣问学可道不蔽于气质矣性其情而不情其性矣不然未足言成已成物之道也大学之道

惟此一章而道之门庭学之纲领与夫用力之标的具见于四语之中学者舍至善之外其何以精切用力之地虽然学者修己治人之方固莫切于此书国家化民成俗之要亦莫急于此书斯道也太极之所以判二气之所以分五行之所以播两仪之所以立四时之所以行一息不停万世无弊先天地而始後天地而终孰主张是孰纲维是则必有任其责者伏羲神农黄帝尧舜氏开宇宙而肇人极运神化而使民宜时则大学之道泽融于斯世禹汤文武周公继之叙彝伦而建皇极设庠序以申孝弟时则大学之道公行于天下世衰道微吾夫子以大学之序见之言曾子以大学之传发其意孟子之後寢以微灭天开我宋濂溪夫子二程夫子出焉晦庵先生又从而发明之大学之道如天地久郁忽开而清日月久翳忽开而明信可传於万世吾党之士何幸得生于今读大学之书涣然冰释怡然理顺优游而自求饫饩而自得于以真履实践求大学之道晦庵先生又虑读是书者昧所从入且曰敬之一字理学所以成始成终又引程夫子所谓主一无适言之所谓整齐严肃言之然则大学之道凡其自格物致知以至于治国平天下在明德新民惟止于至善者皆不可一日忘乎敬其所以吃紧为後学言之者不甚深切着明矣乎抑又闻之学者之为学求诸书不若求诸已求诸言不若求诸心圣贤着书千言万语不过欲开吾心之明启吾心之新始终为善不为不善而已不求诸已而求诸书不求诸心而求诸言则书自书言自言书言在明德而吾心之不明者自如书言在新民而吾心之不新者自若书言在止善而吾心之不善者犹故则书言何益于我或明而不能常明新而不能常新皆非底于至善游明道之堂读明道之书诵明道之言盍亦反求诸已反求诸心开其明图其新而归于至善之地也哉虽然要在主之以敬】

朱貔孙【宝佑二年阙月以江东抚干充】

开堂讲义【大司徒以乡三物教万民而宾兴之一曰六德知仁圣义忠和二曰六行孝友睦婣任恤三曰六艺礼乐射御书数古人选举之法大率教之于前而取之于後此人才之所以盛也如不教而取是犹不耕而期获不菑而望畬无是理也故尧舜时契教人伦夔典乐教胄子及其格则承之庸之翕受敷施无非九德之人以此教亦以此取历夏而商如出一辙盖至于周而其法遂大备焉大司徒曰以乡三物教万民而宾兴之所谓三物德行艺是也明而不惑谓之知公而不私谓之仁大而化之谓之圣行而合宜谓之义不欺谓之忠中节谓之和是六者为天下之全德自孝而友自友而睦自睦而婣以至任于朋友恤于乡间是曰六行自五礼六乐五射五御以至六书九数是曰六艺虽三物之殊而合则一道也扬子曰道以导之子思子曰修道之谓教吾夫子曰志於道据於德依於仁游於艺无非物也而亦无非道也六德以知仁为首此教法之所先知所以明道仁所以会道教莫先于开夫人之心知而融会夫人之心德由知而仁则圣义忠和四者备矣六德苟全则行艺在其中矣盖六行仁之事六艺又知之事也人必能备六德之全则随其仁之所充可以为孝友为睦婣为任恤而为六行人也随其知之所及可以为礼乐为射御为书数而为六艺人也其教法之详如此而取之法又加详焉始而闾胥则书其敬敏任恤者继而族师则书其孝弟睦婣有学者上而党正则书其德行道艺以岁时莅校比又上而州长则考其德行道艺而兴贤者能者教之之法既详取之之法又详其规模宏大其条目纖悉士生斯时服习其教屡经品题则他日使之出长入治无一事之不尽其职者矣是故以六德举者为至圣大贤周公召公之徒是也以六行举者为善人君子康叔君陈之侑是也以六艺举者则所谓占小善者率以録名一艺者无弗庸如三百六

十属之各专一职之类也至于下而胥徒府史輿台皂隶侍御仆从亦无往而非正人则亦耳濡目染声应气求有不期然而为德行道艺之归先王之教其效岂可量哉先汉举孝廉举茂异虽有得于行艺宾兴之意而三物之教则不复见矣故三代而上人才皆出于道化之所成三代而下人才将随其天资之所就儒术益人之国者也无周之教则西都适以儒术坏名节重人之国者也无周之教而东汉适以名节衰晋无周之教而人才溺于清谈之相高唐无周之教而人才止于词章之相尚非人才之不古盖教法之不古耳呜呼成周虽远所谓三物之教岂以古今为存亡哉士君子入而家庭出而乡党游而学校皆所以服习其教之地也正当以古人自期以先王之教自律奈之何安于卑陋者不能习是教恃其穎异者不复习是教工于进取者不暇习是教三岁大比率以斯人而应斯举其有愧于贤能两字多矣明道先生曰一以道德仁义教养之又专以行实材学升进去其一切无义理之弊不数年间学者靡然不变矣伊川先生曰人皆谓其不教人习举业然举业可以取科第足矣如十日以两日习举业则余日尽可为学明道先生所谓丕变伊川先生所谓为学夫岂外夫六德六行六艺者耶必有取於成周之教必克遵乎明道伊川二先生之训则可以为贤能矣圣天子又将宾兴师帅又能以道化私淑学者谨毋曰操数寸之管书盈尺之纸苟可中有司程度则可以媒利禄必求无愧于吾心求无戾于先王之教求无畔于明道伊川二先生之诲以求自附于德行道艺之人而後可也愿与同志勉之】

赵汝訓【宝佑三年阙月以建康节推充】

开堂讲义【大学经一章共一百六十五字大学之首章也全书之纲领尽在此矣余章皆广义也此书未经先儒考正缘其间先後失序或文脱不全或分裂不合或隔絕太多所以竟未尽其善也今合以首章为纲余章为目首章有三在二知六先之文余章有广三在二知六先之义如在明明德在新民在止于至善与夫知至知本及先诚意先正心先修身先齐家先治国皆有广义散在余章尚可考也如格物致知广义则阙岂非世远而亡逸耶或先圣留待後人心领而意会耶尝考之诸儒之书晦庵朱先生则谓格者至也想其意谓至者事事物物之理皆要见得到极至处平广赵先生则又谓格者以物为对而穷其理犹格敌之谓想其意谓吾身之理与万物之理相对万物之理即吾身之理知吾身之理则知万物之理况天地万物与我同出于一原吾能探索其原则物斯格矣物一格则知至矣知极其至则致其知于不用之地而无知矣无知者非释氏死灰槁木之谓乃文王不识不知孔子无知之谓也致者致其为臣而去之义苟所知未极其至则物理未格物理未格则知杂其中知杂其中则意不诚意不诚意则心不正心不正则身不修身不修则家不齐家不齐则国不治新民事业吾未见其能修举也请试以吾心观之方其冥心静默之时其意未尝不诚也一或吉凶悔吝总纷沓于目前则其患得患失便胶扰于胸中何也见物未透故为物所动也动则有知知则意杂杂则不诚意大矣哉格物致知之学也敢以是说补广二章之义】

潘骥【宝佑四年阙月以江东帅参充】

开堂讲义【复亨出入无疾朋来无咎反复其道七日来复利有攸往彖曰复亨刚反动而以顺行是以出入无疾朋来无咎反复其道七日来复天行也利有攸往刚长也复其见天地之

心乎一阳始生于卦为复观其彖辞足以断一卦之义矣而必赞之曰复其见天地之心何心也天地以生物为心而人之生也又得天地之心以为心盖自太极肇判分阴分阳而合辟动静之端循环而不息剥极必复阳无终尽之理亦无顿长之理也故先儒以动之端为天地之心动之端其眇绵之间兆朕之始坎于月为子于律为黄钟生意之妙有不可名状者雷在地中圣人特取象而言耳先王观复之象则以至日闭关商旅不行所以养阳气也君子斋戒处必掩身亦以是坎即天地之心以验人之心人心之善初无朕迹而此心之发则有所谓惻隐羞恶辞让是非四者之端焉四端之仁即四德之元是心也天地生物之心也六爻之中则又以圣贤孳孳为善之意见天地生生不穷之心初九乃颜子庶几之事不违仁者也以阳刚君子之德为复之最先故曰不远复二能比初之仁而下之亦颜子克己复礼之谓复莫美于斯矣故曰休复吉三之频复虽厉而无咎过在失而不在复故许其频复以求仁不以其频复而为咎也四之中行独复而不言吉凶五之敦复而止于无悔盖四以柔居羣阴之间弱而无援乃欲独复以求济未能复于仁也故不得无咎五以阴居尊贤人在下而无助仅以中顺成其身而已未能普其仁也故不克致亨圣人垂戒之意深矣上六居复之终迷而不复本心既失则何虚灵知觉之有哉此正孟子所谓自暴自弃不仁之甚者也彖以天地之至仁言之故一言而有余爻以君子之求仁言之故於得失之际一美一戒屡致意而不足也自汉以来易学不传而天地之心不可得而见盖千有余载矣明道先生元气之会浑然天成其启发学者必使观天地生物气象且曰满腔子是惻隐之心是不假训诂而复之义已森然于胸中矣上元乃先生旧游自昔有祠诸君肄业于其间亦已久矣岁在丙辰以十一月癸丑日南至越五日而为嘉平之朔潜阳微动生意始回裕斋先生以当世大儒承道学正统特于是日屈审是先生领袖于斯堂之上命後学潘骥讲复之一卦以观天地之心骥衰颓汨没何足以发明夫易之奥旨然窃有闻焉复有二义复者天之道也复之者人之道也一气在天屈伸往来而不已者复也一理在人万古常存而不能无消息盈虚者复之也复者天之所以行健复之者君子所以自强不息然天道未始外于人也诸君当阳复之时益尽人道而求所以复之义则善端日生而德之本在是矣若狃於旧习而无作新之机移于外诱而无务内之实则日复一日岁复一岁终于迷而止耳非生生之义也敢并以晦庵先生赞复之说系于後万物职职其生不穷孰其尸之造化为工阴阖阳开一静一动於穆无疆全体妙用奚独于斯潜阳壮阴而曰昭哉此天地心盖翕无余斯辟之始生意蓊然具此全美其在于人曰性之仁敛藏方寸包括无垠有茁其萌有惻其隐于以充之四海其准曰惟兹今眇绵之间是用斋戒掩身闭关仰止羲图稽经协传敢赞一辞以诏无倦】

周应合【开庆元年四月以江东抚干充】

开堂讲义【子曰学而时习之不亦说乎有朋自远方来不亦乐乎人不知而不愠不亦君子乎圣贤之书要旨每寓于篇首大学之首揭明德新民止至善之要领孟子之首辨仁义与利之界限中庸之首明性道教之一原皆要旨也至若论语一书孔门弟子记诸善言隐然自有次序先儒谓首篇乃入道之门积德之基学者之先务也因其所已言悟其所未言窃以为首篇之要又在首章首章之要又在首句首句之要又在首字论语字字言仁为仁自为学始故学为论语之第一字人之第一事也先认得学字分晓方可与读论语然学之一字固有童能言之而老未知其要者何也学之为言效也效所当效者学之正效非所当效者学之误效虚

无寂灭以相高者为异端之学效记问辞章以相夸者为世俗之学彼皆有所效而自谓之学非吾圣门之所谓学也圣门之学唯在于明善而复其初耳人之初生同得天地之塞以为体同得天地之帅以为性性即理也理无有不善也无圣愚贤不肖之殊也祇缘所禀之气清浊粹驳或有不同故於本然之善或明或蔽明者全其初则上而为圣次而为贤蔽者失其初则流而为愚为不肖是岂其初之固然哉所贵乎学者明其固有之善而复其已失之初省察克治变化气质必以圣贤为标的如曰顔何人哉希之则是如曰志伊尹之志学顔子之学如曰我所愿则学孔子如曰文王我师也如曰舜何人哉有为者亦若是此皆卓然有见而所效之不差也此善未明而其初未复视圣贤殆若霄壤此善既明而其初既复则贤可至而圣亦可至盖天予之初本无不同特人不善学弃其皆可圣贤之初而安于不可圣贤之陋此圣人之所深悯而望之以学也既曰学矣必继之以时习何哉盖学固在于知其理尤在于能其事不知而能固无是理知而不能所学何事故未知未能而求知求能之谓学已知已能而用功不已之谓时习且如知得孝弟之理则必习为孝弟之事无一时而不孝弟则可以学古者孝弟之人知得忠信之理则必习为忠信之事无一时而不忠信则可以学古者忠信之人效之而不习非学也习之而不时不足以成其学也此学而时习之所以为论语之第一句夫未知其理切于求知所知既通乌得不喜未能其事切于求能所能既熟乌得不喜所知日深一日所能日熟一日默识心通知能并进涣然水释怡然理顺自得之趣盖有悦悌于中而不可以语人者集注于此载程子之言有二先言时复思绎浹洽于中故说此言说生于所知也又言学者将以行之时习之则所学在我故说此言说生于所能也不亦说乎所以继于时习之後此首章之第一节也又申以下文之两节圣人岂无深意哉古之学者为己此圣人意也程子所谓浹洽于中而所学在我者即为己之意也为己者务内也为人者务外也然毫芒疑似之间正须明辨盖为己与为我不同为人与及人亦不同为己者以己之所当为而为之非有所诱于外为我者悟于有己之私见我而不见物也及人者推己之善以及人视人无间于己为人者但务求知于人而已之所存皆不实也但知为己而不知及人其弊将流于为我则于异端之学而非圣人之所谓学乐于及人而不乐于人之不知其弊又流于为人则溺于世俗之学亦非圣门之所谓学故圣人之训左澜右截必欲学者为己而无一己之弊及人而无一己之弊此下文两节之意所以互相发明欤首言时习之说而必继之以朋来之乐此欲学者为己而不流于为我也盖性者万物之一原非有己之得私其初同则其善同其善同则其学同独学之喜孰若与人共学之尤喜自为君子之为幸孰若天下皆君子之为大幸学而有朋吾学不孤朋而远来共学益衆时习之说与衆共之则昔者在心之说今发为在外之乐说生于吾心之所自得乐生于衆心之所同得盖人已同此一源而已时习而说工夫精密朋来而乐气象广大此即大学所谓自新新民之事莫非己分之所当为者徒知时习之为说而不知朋来之为乐则是知明明德为己分事而不知新民亦己分事视人与己截然为二其不流于为我者几希矣既言朋来之乐而必继之以人不知而不愠此又恐学者狃于及人之乐遂流于为人之私也盖远来之朋善之所已孚者不知之人善之所未孚者以朋来为乐者非急于人知也乐其善之足以及人而人之善无以异于己也人不知而不愠者非以己而忘人也盖所学在我本无与于人之知不知也愠与乐正相对人不知与朋来正相反乐朋来者公也愠不知者私也此及人与为人之所以不同也苟以朋之远来为乐又以人不知为愠则向之所学皆为求知于人计而所谓自得者实未尝自得矣学有为己为人之异乃君子小人之所由分为己之学至不愠不知而後验亦君子之德至不愠不知而後成集注于此载程子之言曰虽乐

于及人不见是而无闷乃所谓君子两节之意岂非互相发明欤孔门弟子记诸善言而揭此章于首篇之首者盖示人以入道之要也然此章虽有三节其实紧要祇在第一节盖朋来而乐所以充时习之说不知不愠所以验时习之说也第一节两句紧要只在学字习者学之工时者学之常说者学之味也若不先认得学字分晓不知所学之为何事则所习者差所说者亦差乐与愠俱无往而不差皆由所效之未能审也集注中明善复其初一句乃示人所以为学之准的可不审诸其所谓善者何也即仁义礼智之理也分言则四专言则仁实包之故程子曰仁者天下之公善之本也天之所以命于人而人之所以为人者也不失其所以为人者则可以为贤为圣者在此可以参天地赞化育者亦在此世之学者或未识仁之全体大用往往专指爱以为仁不知爱固仁之用而不足以尽仁之体先儒谓仁只是当理而无私心此言实发三代而下儒者之所未识也圣门传道仅许顔曾克己复礼为仁顔子之所以学也仁以为己任曾子之所以学也故论语第一章说一学字第二第三章便说出仁字仁之外无学也其所谓学学此而已其所谓习习此而已其所谓说说此而已朋来而乐此即已欲立而立人已欲達而達人与天地万物为一体之意人不知而不愠此即见无一毫私心为仁由己而由人乎哉之意合而观之皆仁也字字言仁于此益信知圣门之所谓仁则知圣门之所谓学愿与共学之士勉而进之以求无负天之予我者有子曰其为人也孝弟而好犯上者鲜矣不好犯上而好作乱者未之有也君子务本本立而道生孝弟也者其为仁之本与子曰巧言令色鲜矣仁孔门之教何先曰学为先故论语首章先言学为学何要曰仁为要故第二第三章便言仁为仁何所始曰自孝弟始故言仁而必先于孝弟也仁者心之德爱之理孝弟者仁之事也言学而不及仁则学无所据依言仁而不及孝弟则仁无所从入爱固不足以尽仁而爱者仁之用也爱莫大于爱亲故善事父母为孝善事兄长为弟此即是习为仁之始事也自一家言之则父兄为在上之人由父兄之外而观之凡尊于我长于我者皆我在上之人也善事父兄无所干犯孝弟之行于内者也凡在上之人皆无所犯即孝弟之推于外者也不能爱其亲敬其长者固无望其能爱敬于他人安有内能爱亲敬长而外好犯上者乎安有小事不犯上而大事好作乱者乎不好犯上比事父事兄地步又濶多少不好作乱比不好犯上地步又濶多少以其善事父兄之心可以信其不犯上以其不好犯上之心可以信其不好作乱矣孟子首章所谓未有仁而遗其亲未有义而後其君与此一段辞不同而意相似学仁而不先孝弟便是不能习孝弟于内而不能孝弟于外便是能习而不能推若事事习于孝弟则事事无犯上作乱之失人人习于孝弟则人人无犯上作乱之失通天下都是孝弟之人都无犯上作乱者则天下所由平也故曰尧舜之道孝弟而已矣论性则仁为孝弟之本论其事则孝弟乃行仁之本人知得以仁为学又知得习孝弟之事以为仁则事君事长爱民爱物之道都从这上面生出来仁犹谷种也孝弟即初发之禾苗也仁民爱物即是苗上生出许多谷来也有子于此说一为字说一本字又说一生字字字精切学者能味其言当知入道之序矣此章记有子之言方及为仁之本後章记夫子之言便及鲜仁之戒何也此正是孔门弟子记言不苟教人有序两章所以相比正虑人有毫厘之差程子谓孝弟顺德也顺之一字最善名状孝弟者也然顺得其正为孝为弟顺失其正为諂为佞巧言令色盖諂佞之为也以孝弟为顺则不失其本心以諂佞为顺则皆出于私心本心仁也私心非仁也仁与不仁只就真伪上便见如孝弟之人愉色婉容怡声下气此是孝弟之真自然形见处若巧好其言辞令善其顔色致饰于外务以悦人出于有心而为之皆声音笑貌之伪耳若不如此别辨则巧令之伪顺与孝弟之真顺若无以异仁与不仁何从而见之哉故巧令鲜仁之戒所以比记于孝弟为仁之後盖有深意

不可草草看过去仁者心之德爱之理所谓心之德即专言之仁仁之体也所谓爱之理即偏言之仁仁之用也孝弟为仁之仁此是言仁之用主爱之理而言也巧令鲜仁之仁此是言仁之体主心之德而言也此二章皆言仁必参而观之槩可以识仁之体用矣其言外之意引而不发学者须是反覆玩味仔细体认自然有得如此为学决然不差或者谓孝弟就事上言固言其为仁之用矣信其为爱之理矣言色皆发于外者何关于仁之体乎何与于心之德乎殊不思言色固非心之德而足以验其心之德非指言色便为心之德也言色固非仁之体而巧令足以害仁之体非指言色便为仁之体也朱子曰致饰于外务以说人人欲肆而本心之德亡矣愚故谓此仁字主心之德而言程子曰知巧言令色之非仁则知仁矣愚故谓此仁字主仁之体而言心之德常存则爱之理常充仁之体能全则仁之用必大行仁之事固不止于孝弟而孝弟乃其易为者能为其所易则能行其所难自此充矣害仁之事固不止于巧令而巧令乃其易戒者能戒其所易则能禁其所难自此始矣是说也岂惟有得于程朱之发明盖亦有得于孔颜之授受者颜子问仁子曰克己复礼为仁颜子请问其目子曰非礼勿视非礼勿听非礼勿言非礼勿动夫视听言动皆外也四者禁于非礼仁便在此矣论语言仁莫妙于孔颜之授受无非礼之言动即所以为仁肆巧令于言色则知其鲜仁自巧言令色而戒之则可进于四勿进于四勿即可学颜子之学学颜子之学即是得孔门之仁得孔门之仁则不枉读论语矣学者入道之初若只知有孝弟为仁之训不知有巧令鲜仁之戒则识仁之用而不识仁之体所学易得差了愚故以首章之言学此两章相继而言仁乃孔门弟子善于记言提其要以教人隐然有序不可草草看过若谓论语之言只是杂然记述非有次序殆未深玩耳程子曰学者先读论语如尺度权衡相似以此去量度事物自然见得长短轻重直须句句讨分晓字字讨分晓切已省察要下细密工夫裕斋先生重莅江阃偕部使者帅诸僚佐惠临书堂命讲论语敬取篇首章句敷绎其旨就正于宗工求益于诸友云】

张显【开庆元年闰十二月以添差江州教授权充景定二年正月荐除史馆检閱】

开堂讲义【博学之审问之慎思之明辨之笃行之中庸之书其首章乃一篇之体要也始言命性道教之原中言存养省察之要终言圣神功化之极其下三十有二章更互演绎莫非此意可谓至矣妙矣不可以有加矣然泰华之高必由跬步而登沧海之深必由舟航而泛中庸之德岂无所自而入哉愚尝虚心涵泳切已省察而得之其第二十章内曰博学之审问之慎思之明辨之笃行之五者兹所以为圣贤教人之定本学者入德之先务欤必由是而入焉则真积力久心与理融知命性道教之原而尽存养省察之要以致圣神功化之极此学问之极功圣人之能事毕矣世之人往往于首章则高而畏之于五者则卑而忽之畏之谓非可以躡至忽之又不能以勉至道之所以不明而不行者盖为此也且五者之旨字字精切五者之序节节贯通学而曰博问而曰审思而曰慎辨而曰明行而曰笃乃精切之旨至博学而后审问审问而后慎思慎思而后明辨明辨而后笃行乃贯通之序也夫人不可以不学人而学有博焉有约焉自其博而反诸约可也否则寡陋固滞不足以周事物之理何以学为学则必有所疑疑而问问有审焉有畧焉于其审不于其畧可也否则苟简粗疎不足以得是非之实何以问为既能反覆问难由师友以发其端又当研究探讨谨心思以究其极不思固不可或泛思而无益或苦思而有伤皆非思之慎也如之何而弗思之慎既能研究探讨谨心思以究其极又当别白精确明辨论以审其是不辨固不可或辨而差之毫厘或辨而失之近似皆非辨

之明也如之何而弗辨之明大抵晓得所以会说得说得可以验晓得有明白无晦昧有洞達无窒碍而後笃以行之表里之如一始终之不二则夫博学审问慎思明辨具见于真履实践之中而非拘于空言虚文之末盖此五者前之四者正如行程目錄後之一着乃着脚行去道远果何难至之有是宜五者备矣自然可以造中庸之阃奥赞化育参天地举不越乎是焉圣贤之言深切着明如此亦可已矣而复申之以学之弗能弗措问之弗知弗措思之弗得弗措辨之弗明弗措行之弗笃弗措之言极而至于人一已百人十已千虽愚必明虽柔必强之语凡学知利行之仁困知勉行之勇坦然在方策间圣人可学而至意愈详而辞愈切辞有尽而意无穷所谓圣贤没千数百年其心至今犹在视耳提面命之训有以异乎无以异也学者其可不书绅之乎其可不服膺之乎虽然学问思辨即致知也行即力行也知行可以相有不可相无也学问得人之得也思辨得自得之得也人已所以相资而能相成也横看竖看各有条理愈有精神皆不可以不之考也仰惟河南二程子命世大贤实始尊信此书而表章之得有所考以续千载不传之绪尝有曰博学之审问之慎思之明辨之笃行之五者废其一非学也旨哉言乎朱子白鹿洞规亦必揭此五者以为为学之序至哉规乎夫子思程子朱子之言先後一揆千万世学者入道之津梁也抑又闻之中庸章句中谓第二十章内语诚始详所谓诚者此篇之枢纽也盖诚者实而已矣此五者亦不越乎实而已矣大制使资相裕斋先生平日践履惟靠一实身居奎画忠实不欺之堂心传西山中庸实学之印比奉诏旨肃清上流荣还陪京士民胥庆下车之始政教一新俾显濫长明道书堂自揆迂拙何以当之辞避再三不得所请拜祠开讲辄以中庸为学之序五条为诸友演说而归于实之一字焉因思丙辰之夏显尝以实之一说为开讲第一义今复于讲尾申言之者何哉窃窥诸友之进修而不能无所见所以极言之而不容已实也者不可须臾离也可离非实也以实谓信固此实也朋友有信亦此实也其体之所该者虽甚大其用之所繫者则甚切学之博而实即存于博学之中间之审而实即寓于审问之内以至思之慎辨之明行之笃而实莫不行于慎思明辨笃行之际即此是实不必外求若夫学而不博非实也问而不审非实也思而不慎非实也辨而不明非实也行而不笃非实也初不在于谈高说妙而只在于日用常行必也师友切磋以此实心讲此实学务此实德然後无负圣天子表励儒学之实意贤师帅作成人材之实功愧不相勉以实而或相与为欺非惟不敢亦不暇】

胡立本【景定元年准吏部差正任廸功郎充建康府明道书院山长四月初十日到任】开堂讲义【大学之道在明明德在亲民在止於至善学以大名大人之学也盖对小子之学而言三代之隆人生八岁皆入小学及其十有五年则入大学所谓大学者教之以修己治人之道不但洒扫应对进退礼乐射御书数而已也然则大学之书首之曰明明德者非为修己发欵继之曰新民者非为治人发欵天道流行付予万物其所以为造化者阴阳五行而已其所谓阴阳五行者又必有是理而後有是气及其生物则因是气之聚而後有是形故人物之生得是理然後有以为健顺仁义礼智之性得是气然後有以为魂魄五臟百体之身气即人心也理即道心也道心本无时而不明然有资秉之气在焉则明者不常明而明有时乎晦学乎学乎岂有他哉在明其本明之德而已抑已之德固明而人之德未明岂天生圣贤之本心哉以其昭昭使人昭昭以我先觉觉彼後觉则新民之效着矣是知在此则为学不在此则溺志卑污流情物欲非吾之所谓学在此则为学之道不在此则驰心高虚用意放蕩非吾之所谓道在之一字断断乎在此而不在彼欵人而知在明明德也则反而观之吾心之德本自灵明

本自莹彻然或未免为资秉之气所昏于是修己而上不可不笃加此学力焉庶几学力一到则德之本明者至是而益明涣然而释豁然而悟罔然而觉如纖尘既去而古监自莹微沙既澄而渊水自洁明之之功其伟矣乎是明也非外求其明也只不过明其本明者而已此康诰之明德大甲之明命帝典之克明先儒直以为传之首章释明明德欤此先儒所以谓明明德者非有所作为于性分之外坎人而知在新民也则泛而观之人物此德不相假借不相陵夺初无终不可变之气质于是治人而上不可不推行此学力焉庶几学力一到则彼之未明者自是而可新同此一振刷同此一涤濯同此一轩豁如黄钟鼓动而万彙皆森霁月行空而千林俱洁新之之功其溥矣乎是新也非外求其新也只不过新其未明者而已此盘铭之日新康诰之作新诗之维新先儒又以为传之二章释新民欤此先儒所以谓新民者非有所付畀增益之欤然明明德可矣明明德而不止于善善而不止于至非明明德之极功也新民而不止于善善而不止于至非新民之极功也此无他至善者极至而无有不善者也先儒谓其为事理当然之极止于至善者底止而无有不足者也先儒谓其至于是而不迁之意是乃至精至当尽善尽美之域昭昭然为千万世之準的者夫不徒曰善而必曰至善不徒曰至善而必曰止于至善斯其所以为大学欤学之为大尚孰有加于此然自後世大学之道不明乃有不务明其明德而徒以政教法度为足以新民者此则不知有修己之工夫者也又有爱身独善自谓足以明其明德而不屑于新民者此则不知有治人之功用者也又有畧知二者之当务顾乃安于小成狃于近利而不求止于至善之所在者此又修己之工夫不竟而治人之功用终于无成也先儒谓君子不得闻大道之要小人不得蒙致治之泽其于後之学大学者不无遗憾欤虽然此讲明之学也吃紧工夫全在体认所以体认者当於何而用力哉曰只在第一句明明德上盖我之明德具在方寸善恶是非纖悉不昧出一言而不善矣忽焉自觉其非作一事而悖理矣忽焉自悟其过是心何从而生哉皆明德之具于心者发露尔人能自其所发而充广之涵养之致知格物以开其明诚意正心修身以遂其明以至无一日而不明无一息而不明则我之本明者常明由是而推行之则民可新由是而究极之则至善可止而大学之能事毕矣书堂之设将以为学也学岂有他哉学为修己治人之学耳昔先儒有言曰读书之序且着力去看大学妄意赞之曰读大学之序且着力去看篇首之三言读篇首之三言且着力去看明明德之一语】

翁泳【以上元县尉暂权】

开堂讲义【大学之道在明明德在新民在止於至善大学经一章传十章传之十章千五百四十六字固以经一章为一书之体要经之一章二百五字则以此四句十六字为纲领也此言大学之道何所在曰在明明德也在新民也在止於至善也明德者人之所得于天至明之德朱子以虚灵不昧言之虚灵不昧指心而言虚灵言其气不昧言其理也泳在昔从先师受学尝以明珠譬之此珠光辉赫奕若质之宇宙之间自是昭昭灵灵虽寘之泥涂之中一旦涤去其污染仍旧光辉赫奕然人心之明德极其至也如帝尧之明德能光被四表格于上下又岂明珠之所能拟焉独惜夫人汨于气质溺于物欲自不能明之耳明德即是天之明命但明命以天所赋为命言明德以人所受为性言耳明德新民虽曰明德者其体新民者其用然亦只是以已昭昭使人昭昭盖圣贤既有以明其明德又不忍天下之人自昧本原故教天下之人皆明其明德以天生烝民同有此明德故我能明之不欲独善其身必欲兼善天下也此两

句只是一个道理在止於至善者明德须要明到十分新民亦要新到十分不但八分九分未为至善便九分九厘九毫亦未为止於至善也如尧之仁舜之孝方是至善其他四端万行皆仿此推之须要到十分方为至善也大学一书只在此四句四句只是明德新民止於至善而亡者又只是明德新民造其极处若论新民又只是使天下之人皆明其明德而已实只一事而已自昔天佑下民作之君作之师只为此明德新民止於至善而已盖天能以此明德赋之于人而不能使之自明其明德必生一神圣聪明睿智者为亿兆生人之主所谓作之君又以我之明德教斯民皆明其明德所谓作之师我之自明与民作新都要到十分处方是极至此尧之克明峻德必至于黎民於变时雍是天下後世君师之模范否则虽曰能明其明德又能新民只有一毫未止於至善亦非大学之极功也学者当思天之所与我明德赫然罔有内外与羲农尧舜禹汤文武初无少异自生知安行之次必当视听言动常见此理了然于心目之间如夫子所谓立则见其参于前在舆则见其倚於衡如舜之见尧于墙见尧于羹则自终食不违三月不违以至于纯亦不已而後可谓明德止於至善及其新民亦到十分极处而後谓之新民止於至善此大学之极功圣神之能事亦非出于吾性分之外也上焉者合下完具谓之仁且智在中庸则谓之曰性其次当自敬以致其知又力行以终之谓之由智而仁在中庸则谓之教及其成功一也若其节目条理则先师之训又有发于朱子所未言者他日又当与诸君子共讲焉程子所谓天下之公理不有益于彼必有益于此者也诸君子玩味此四句要见天人之付受又要见体用之一原又要见神圣之极功真知力行无一息之间断】

景定建康志卷二十九

卷三十

<史部,地理类,都会郡县之属,景定建康志>

钦定四库全书

景定建康志卷三十 宋 周应合 撰

儒学志三

置县学

上元县学在县治西景定二年鍾知县蜚英建

建学前记上元自程夫子主县簿士廸於训至今恂恂如也邑故未有学裁置弟子员四附於郡学官而廩於县春秋释奠先圣令服其服荐献七十子两庑下外是一无所与之东阳陈侯寅至则慨然曰吾为邑长於斯使为士者无以藏修息游必郡之之焉不大慙欤顾邑赋输皆上於郡微铢寸入盖偃蹇睥睨者三年会负郭有民田入於官为亩凡若干迺请於大尹观文赵公其诺如响计使户部倪公又欣然以废圃衡从各三百尺有畸俾规以为宫於是上元县学一日权舆矣侯方薙芜斩翳木石苴鉄百工咸作亡何当代去恨後未及竟惧来者之弗緝也属椅志所始椅窃惟三代之学莫备於周周公所以经世变立人极六典具矣而建学养士之费独未之闻及考其制则巷有塾里有师朝夕出入有教自二十五家之间等而升之党庠术序以达於国莫不有条约焉然後知井田与学校并行真千万世良法也阡陌开士什九无常产学亦往往无定处长民者将聚而教则必饮食之宫室之而官无公田又必委曲於经常之外故其事视古人为难独慨今之学者月有试旬有课大抵不过务记覽工词章钩取声利而学规云者又特出於一时有位之人类非圣贤旨意夫自洒扫应对进退以至穷理正心修己治人所谓学也今使长民者孳孳焉以就所难而其学乃繆於古岂不甚可惜哉且侯之经兹役也必曰食焉而教基焉而庠盖有为之本者夫学亦若此而已邑之士其尚思侯经始之难视侯所以先立其本之意而程夫子之遗规绪训益致力焉则为无负於侯之所望若夫栋宇器服未溃於成则新令且至必能以陈侯之心为心椅敬执简以俟续书宝佑戊午日南至宣教郎添差通判建康军府兼管内劝农营田事梁椅撰後记观文相裕斋马公再尹建业之三年江涛不惊闾书愍暇命客周应合笔受条教补职方乘之阙文谓皇居留钥不可羣於丽譙以尊君也乃为留都录以冠之又谓教宫礼殿不宜旅於邑屋以隆师也复为儒学志以别之自郡而县有学皆志上元首诸县学未建而石有记应合乃即鍾令蜚英而质焉令曰前令陈君有志於斯会去不果刻石以望於後许君继陈又不果蜚英承乏始至承命府公立学第一事也我仪图之数月将溃於成时闻其语未见其事一日登上元之勤清堂从容覩奥则画宫於堵为殿为学为堂为序为门为庖井如也鳩之於庀锯者左斧者右梁栋榱桷森如也谗

令曰咄嗟集事何其才役具民不知何其仁甫閱月令来言曰学成矣堂一斋四未名敢请应合曰明德新民大学之道堂扁明新可乎予以四教文行忠信以学文修行存忠主信名斋可乎令曰诺又作而曰昔未建学而有记今既建矣可无记敢并请应合固辞请益力则问之曰上元名县肇於唐五百年矣建学昉此何也令曰昇为州江宁建康为府皆治上元郡有学矣县复立学则惧其赘而不敢为县以赋狱为急县附郭又先急所急在彼视学为迂而不暇为其自厉者知立学不可以已材与费又或制於府而不克为今府公以立学命我以宽条裕我於是免於不敢不暇不能为之消蜚英之幸府公之德也应合喟然叹曰县有学寔三代党庠术序之规武城弦歌岂以鲁有頽宫而弗之务浮图老子之居遍郡县素王之宫顾疑其赘乎贾生慨簿书期会为大故俗流失世败坏恬不之怪移风易俗使天下回心乡道类非俗吏之所能学固先务也奚其迂所患者学立而教不立谓迂且赘亦宜哉因考之六朝县未名上元时龙阜鸡山北郊西邸数学并立皆今县境也立学虽多而世道日卑岂学之无益於世盖未知所以教耳大经大法之不究谈理以玄为高谈辞以靡为上自以为学非吾圣人所谓学也盖自孟子没圣人之学不明至於我宋克生真儒若程纯公发天理之秘张宣公精义利之辨真足以揭希圣希贤之正鹄而遗後学之指南车也此邦寔二先生过化之地立学於此其可不皇皇汲汲惓惓切切着明二先生之教以还三代之俗而洗六朝之陋哉令居袁盍思李泰伯之言乎武夫卖降由诗书道废人惟见利而不闻义为臣死忠为子死孝则推本於教道结人心之故夫教道之要在於明天理辨义利而已义心根於天理之正利欲生於形气之私不能以两立也此长则彼消彼轻则此重其为孝为忠为贤为圣至於位天地植人极亘万古而不泯者义心之积也其便已媒身遗亲卖交以至於欺君误国舍义取生沦胥於禽兽者利欲之积也其初毫厘之差其极天壤之判姑即是邦言之自古皆有死何独忠贞卞公忠襄杨公庙食百世虽死犹生何杜充李昉之徒万世切齿犬彘不若无他义与利之分耳易曰天险不可升也地险山川丘陵也王公设险以守其国上元之滨长江滔滔地险可设人皆知之天理固於人心而利害不能移患难不能怵威武盗贼不能夺此天险也教道结人心真设险守国之最大者欤夫如是然後知明天理辨义利之教不可以不明立学以明此教不可以不广忱知所先务矣不是之务学虽多亦奚以为令曰是吾志也府公之所以命也请事斯语寿诸石以诏吾士土木之费未也故不书景定辛酉秋八月承直郎宜差充江南东路安抚使司干办公事周应合记承议郎改添差充江南东路安抚使司参议官兼沿江制置大使司参议官程其屋书观文殿学士光禄大夫沿江制置大使知建康军府事兼管内劝农营田使江南东路安抚使马步军都總管行宫留守节制和州无为军安庆府三郡屯田使暂兼淮西总领金华郡开国公食邑三千户食寔封六百户马光祖篆盖奉议郎特差知建康府上元县主管劝农营田公事兼弓手寨兵军正兼沿江制置大使司干办公事鍾蜚英立石

江寧县学在县治北景定四年王知县镗创建

建学记君子如欲化民成俗其必由学乎三代之学莫备於周周之制自比閭族党以達州乡国都莫不有学学莫不有师凡属民读法乡饮乡射以至於六德六行五礼六乐无非教以人伦使有亲有义有序有别有信各得以尽其分焉民化俗成人人有士君子之行此也世降而秦坏田制燔诗书周家法度历汉唐不能复天开我宋仪式刑三代之典建国君民以教学为先建隆三年诏修学乾兴元年兗州立学皇佑四年藩镇立学庆历四年州县皆立学县有

学寔成周党庠序之遗意江寧金陵附邑也为江左望簪宇尚缺典正朔欵谒春秋奠祀令佐率邑子附拜於郡庠自庆历抵於今二百年矣假宫就师熟视焉而莫之问番阳王君鏜来长是邑簿书期会之外慨然以兴学自任莅官以来凡可以撙节者铢积寸累是经是营及值主学置官有师无学非所以称上旨遂度地於县廨之北鳩工市材夙夜展力士以此感奋不劝而相留守文昌姚公闻而壮之出金谷以潰於成門臯如也殿邃如也明伦堂旷如也廊翼为二斋列为四宿直有庖前庑有位像设礼器靡不备严士於是可以藏修游息矣然则羣居而教不可无养也官无公田不可经久也又得田若干亩归於学以继廩粟王君崇化善俗恳恳焉为学校计者不以代去而少衰继自今游於斯者岂直弄笔以为名位计哉子职当共也臣道当尽也友当取端也夫妇之道当知仪刑也禹汤文武成王周公由此其选也明之斯尽之行之斯至之果能此道尚庶几国家建学立师之意若夫务记览工词章而曰吾之学止於是非王君所望於二三子景定四年月日奉议郎宜差充沿江制置使司主管机宜文字杨巽记承议郎特添差沿江制置使司主管机宜文字杨同祖书朝散郎差充沿江制置使司参议官赵时橐篆盖宣教郎知建康府江寧县主管劝农营田公事王鏜立

句容县学始建於唐开元十一年在县衙之东本朝开宝中修皇佑二年七月太常博士方君峻再建元丰二年叶君表以县南馆驿改造绍兴壬申淳熙己亥重修宝庆丙戌王君通易民地添筑墙垣左右疏池嘉定戊寅祠明道伊川於正礼堂左宝庆丁亥始建濂溪明道伊川三先生祠宇与石刻亭对

重建学记奉议郎古梧吴君淇来宰句容当军事方殷军须旁午之时内事拊摩以不失圣天子爱养元元之心外谨供亿以不违贤方伯绥靖边方之畧既内外两尽上下交孚田里晏然弦歌有裕深惟观民设教王政所先化民成俗令长之事而是邑也厥田惟下厥赋中以下田供中赋故其民勤其用俭惟勤惟俭不见异物而迁焉故其俗最近古易以入德而望是邑者三茅之山峰峦回环竹树深密有泉石之胜而无岩崖谿谷之险隐君子之所宜居相传以为秦之乱茅氏兄弟寔居之若武陵源然其居之安遂往而不反而诞者乘之以为於此昇僊焉使闻者遐想至者企慕庶乎辽东之去有时而归缙山之会有时而复幸旦莫遇之则九醞之觴可得而饮五百岁之桃可得而食驾鹤骖鸾可腾跃而上也而理卒无是则始愧其诞忧其穷窃取屈平九歌司命篇之意以名其山之隐君子以为僊驾虽不可望而死生祸福之在人容有可得而转移者盖惟是山之隐君子在天之灵寔司之使世之贪生而畏死惧祸而徼福者争趋之以庶乎久生而无祸而理复无是则又窘於说之穷愧其诞之觉并缘传记所载吾夫子问礼老聃之事肖土木像二名其倨傲鲜腆者为老聃而以其谦以自牧者为夫子曰老聃吾师孔子吾师之弟子也庶几夫知敬吾夫子者必知敬其师知敬其师者必知信其徒之说不知老聃以清静冲默为道岂诞者所能师夫子既圣不居不耻下问倪以所尝问为师则问官名於郯子问每事於太庙彼小邦之长骏奔走执豆笾之人皆师乎故为前之二说则自诬其山之隐君子为後之说则不惟厚诬吾夫子并与其所自以为师之老聃诬之其诞可胜诛乎虽然为是说者东西南北之人非吾邑之人也彼其以诞承诞以愚诈愚而吾邑之俗近古而易以入德者自若也然则兴学以道之以正人心息邪说闲先圣之道非贤令长事乎君於是撙县费之浮计学廩之美益之以邑人之愿助市材之美谏工之良?日之吉撤旧宇一新之殿陞邃严俨王者之制堂庑广修放侯泮之规宸章有殿先哲有祠而士知所尊校丈有

厅肄业有斋而士知所勉下至庖湍积贮之所?隶之舍各称其宜總之为屋六十而墙之袤丈者百经始於绍定庚寅季秋之朔阅十有六月乃成计米以石厥费凡四百有五十钱以缗凡三千八百有四十二以日凡万有一千二百而公不告匱盖以均节有道私不告劳盖以劳来有方既成属宰记其事宰惟君之此举所关者大不但为子衿城阙而已方绪次颠末君复以书来言古之学者必至大学而後成大学之道在明明德余故以明德名堂而手书以揭之子盍为我申言其义宰惟明德天所均赋惟先明已之有是德而後能明人之德故明德必自致知始夫苟致其知矣则是非明辨而异端可得惑乎知至而后意诚心正则无妄念无邪思而凭虚御风等说可得入乎由是而身修则视聽言动罔不由礼安有自放於礼法之外由是而家齐则家人妇子各尽其道安有自絶於伦类之间又由是而推之以治国平天下则尧舜禹汤文武所以为克明其德反是则周穆秦皇汉武所以为耄荒而不可救药也君曰然此固吾党之士不待告而知者虽然是道也岂吾党所得私哉当刻之石以正诞者之罪为愚者砭云岁壬辰阳复日丹阳刘宰记并书敷原王遂题额

溧水县学唐武德元年建至圣文宣王庙在县东三十步本朝熙宁二年知县关杞迁於通济桥之东南建为学绍兴八年知县李朝正重修大成殿并建?堂斋舍郑公刚中为之记三十年知县唐锡重修隆兴二年知县李衡增员养士淳熙十三年冬知县房仲忽重建?堂十四年夏知县李泳重修两庑绍定二年知县史弥巩增建尊道堂於命教堂之後嘉熙四年知县王俦建小学於戟门之右王公遂为之记淳佑五年知县赵崇乘重修大成殿六年又创鉤鼈亭於尊道堂之後临淮水吴丞相潜书其榜七年三月重建戟门及棂星门东西两庑十二年知县赵希岗建斋舍一十二间宝佑元年重修命教尊道二堂创学廩於西庑县尉胡係改命教堂榜曰明伦四年知县乔进孙重建棂星门加飭垣墙景定元年制干赵介如权知县事重修大成殿及东西两庑作亭於棂星门外取易临卦象传辞榜曰教思前後县大夫皆以兴学为务故溧水文风最盛贡举为多固山川奇秀之所鍾亦守令作成之所致云

重建学记九州之俗非大陋鄙未有不乐教化崇学校者溧水县学建於熙寧巳酉邑宰关杞为政之年至绍兴丁巳邑宰李侯謁庙之日顾所存者仅惟门殿梗莽颓翳萧然煨烬之余侯延长老问之曰邑万户俊秀可儒雅者宜衆其不相与出力飭新兹废者岂薄子弟乎长老愀然进曰披猖而来邑政之废甚於学田桑不植赋取不均餅间糠豆不能饱文书至门征取无则忧苦无聊劳吏为无计今独几得良令求生全他未皇也侯闻之夜不能寝旦起治政事谓隐租匿役邑之大弊置立程度若将廉治者欺吏悍民咸归诚自出邑赋大平於是富者安贫者乐婆娑从容皆於暇日问孝弟忠信争先为之长老又进而言曰公曩谓废而不飭者今兹敢请侯即日为率僚佐诣荒宫经营四顾默有区处则退而市材鳩匠以?墨授梓人俾次第旁屋皆以旧殿为制为堂为庑为栖士之舍寓宾之次器用之库庖湍之所外至小学为屋一百八十楹自经始距绍兴庚申二月丙午凡五十有八日而落成皆廉用积余植仆补坏而为之者士既鼓篋上下释奠升降拜起皆知在儒雅教化中而轮奐鼎新之自初弗知也呜呼家有塾党有庠遂有序古之制也而夫子答问之言则曰既富矣又何加焉曰教之故知学校之兴必在富庶安乐之後苟斯民终岁勤动不得养其父母虽有庠序其得游之此邑长老之意也虽然韦布之士羣居於诗书礼乐之府渐染以仁义忠和之泽他日得时行道与夫朝廷取以备公卿百执事之选者靡不由此以出侯既称长老之意则所以待邑士者今无不至矣邑之

士所以自待所以报侯者犹未能知也侯名朝正字治表登建炎二年进士第绍兴十年冬十月丙戌左奉议郎权尚书礼部侍郎兼详定一司勅令荣阳县开国男食邑三百户赐紫金鱼袋郑刚中记建小学记古者家有塾党有庠术有序国有学盖自五家以上必立之塾迎仕之已者为之师匪直郡邑有养也士能言莫不有教十岁就外傅学书计幼仪诵诗舞象勺十五入大学而教以穷理尽心?已治人之道秩然而不乱灿然而有文匪直成人有德也自秦罢学贱士汉唐之君岂无有志者更我仁祖而郡有学官中兴以後县令亦稍增置然四民杂处非复家习人诵安能比屋而有士君子之行哉幸而学设教修入不知奉亲敬长之道出不闻从师取友之训洒扫必无加帚拘袂之仪应对必无负劔辟咄之容进退必无徐行後长之序居无礼行无乐动无五射五御之文静无六书九数之法父诏其子兄语其弟不过声病得失之习利禄进取之计不但失其学而废其教不但学者无人而师资亦阙气习日陋志虑转薄犹之筑室而无其基濬井而无其功宜乎子夏区别之言子游以为末管氏弟子之职内政而外莫之能行卓然自立特其生质之良而已溧水居昇宣间当王教衰男子不背死於朋友女子不爽信於君臣则天伦之美宜无不尽千载之间风流笃厚人物表表夫岂无之而时王立制以科举取士千室无能应令者岂生材薄於古欤宝玉不琢拱把无养故也史公提刑弥巩为令注意教养久渐废坏今令王公下车兴崇惟谨首辟西庠建为小学旋即学西辟地为宫合於虞庠在西郊之制成童而下聚而教者二十人为率赋诗属对随力所进课试有程教导有师表劝有式弦诵相属先是公廩五百斛不足以贍生徒至是岁辍诸仓月取诸税犹惧不餍会永寧乡新筑之圩租入七十石可以毕小学之供天造地设若有为而然士风兴行人材辈出前之成者後继之今之进者来未已小则蒸蒸而出大则亹亹而升还成周而陋汉唐自兹始矣大书课册俾记其成遂曰小学之於大学为序不同其道则一而已大学者因理以明天下之事小学者即事以观天下之理诚使幼学者用力乎孝悌忠信之行以及乎射御书数之艺及其长也由格物致知以至於诚意而理无不明由正心修身推而至於治国平天下而事无不格自塾庠至於序学而教无不成成人无不化今顾求工於言语对偶之间其去圣贤涂辙益远然赋有物混成而知志不在温饱歌愿秉清忠节而庙堂称贺对鸚鵡能言争似凤而称精神满腹骥堕地而动千里之想木脱穎而有耸壑之标王朝以此得人名贤所不废也苟惟士无学师无教佻達而有在城之讥色笑而无匪怒之教互乡之不保其往阙里之欲得速成童子而有成人之风嬉戏而有襟裾之咏岂惟小子之学根於孩提抑髦期称道其为大人也能知进退存亡而不失其正者鲜矣安保其不欺君卖国以为乡里之羞哉小学成始成终之教一言蔽之曰敬此心既立无往而非明德新民之功岂惟士子所当尽力抑长吏所当尽心也公讳俦北海人寺丞田子为国正中後国正以正学粹行承学赵丞相汝愚寺丞以清节懿行受知黄尚书度则其政也岂簿书期会而已哉遂少与寺丞同师事黄公今幸矣躬耕句曲山下犹及见德化之成故不辞而为之记嘉熙庚子清明日金坛王遂记并书丹阳洪陈哲题额

教思亭记溧水壮哉县治难其人开庆己未冬番易赵君几道繇间幕被选摄邑事羽书正殷民恃无恐明年春武偃文修释奠先圣先师廼作亭宫墙之外以萃冠带以观示衆庶盖地之最胜处也泽上有地在易为临故取象传之辞名以教思方求扁於府公裕斋先生而檄召随幕未遂也又明年邑人思之公命复往大书教思二字授几道刻而揭诸楣正宾兴时也府统县五登名大府者合十有三是岁溧水居其八六经皆推首选士登斯亭动色而胥庆曰赵君

之政之以寧我趙君之教之以淑我馬公任之足以福我去而復來是以怪我吾邑貢士素多未有盛於此時是教思之作足以興我坡老嘗言君子為無窮之教以保無疆之民愿記其事以為無窮几道乃以其士之意移書屬筆於余余於几道有幕府交承之好辭弗獲命乃為之記曰臨之為象乾上兌下厚德載物坤之順也朋友講習兌之說也容保無疆蓋取諸坤教思無窮蓋取諸兌不有所保奚其臨不有所教奚其保故龜山楊氏曰君子之臨人非以力制之也亦教之而已几道其有得於斯乎何哉所謂教者周官鄉大夫之職受教法於司徒以三物教其所治知仁聖義中和謂之六德孝友睦婣任恤謂之六行禮樂射御書數謂之六藝而道在其中本末相須闕一不可教於平日考於三年之大比而興賢者能者帥其衆寡以禮禮賓之賈公彥釋之曰帥其衆寡集於庠序之前皆來觀禮之人也知所觀則知所教矣斯亭也殆為觀禮者設欤教不在亭而有教之思焉此几道名亭之意乎臨不以力而以教教不以迹而以心涵濡游泳意思深長賢能之興於斯為盛可以驗几道之教而府公巨扁為不辱矣或曰六五臨之主知臨大君之宜吉大君臨天下者也今以臨之教恩施於子男之國宜乎否乎曰臨天下者之所以教正有望於臨一國者之推其教也國無大小皆務其教則天下之教成矣今府公臨大江之東思以廣大君之教几道臨子男之國思以廣府公之教賢能之興出長入治即異日之臨民者又當思所以廣邑侯之教所以為無窮也所以為無疆也程子傳曰教導之思至忱無斁容保之心廣大無限几道盍與其士勉之哉景定辛酉歲十月既望承直郎江南東路安撫使司干辦公事周應合記

溧阳县学後汉光和中溧阳长潘乾尝立校官其碑铭尚班班可读绍兴中喻仲远尉溧水得此碑於固城湖之傍【湖在今溧水县界详见於後】其地在当时必县治也唐有县令林均兴学校养生徒其事见於断碑【碑在今之旧县】国初县学未设淳化五年县令夏侯戡建宣圣庙於县西门外【其地即今西门内广惠行祠】皇佑四年知县查宗闵移学於县城东南隅崇宁中知县李亘增广斋舍於学前即高为堂曰挹秀大观三年邑士又於学前建阁曰折桂建炎末溃兵撤屋为营唯余大成殿绍兴十八年知县施佑因旧基兴翔时有寓公尚书郎阎彦昭率里豪醵金助经费粗成而未备二十年知县周淙重加葺治殿後建堂曰德化岁久颓毁庆元三年知县李卞修整嘉泰中知县赵赞夫重修仍建待聘轩於德化堂之後嘉定初知县李大原王棠皆尝整葺王又建濂溪明道伊川龟山四先生祠堂及棖星门有兴能观光尚志丽泽四斋学长学谕直学教谕等位及直舍会食所十三年知县陆子適重修斋庑磬砌堦庭制三献官礼服立杨忠襄公祠堂增置祭器所书籍所及学廩改造庖湍学前临溪翔辟射圃养士之计时有增益【贍学秋料米一千三百五十五石二斗三升六合八勺夏秋租钱四百五十六千三百一十七文】

新修文宣王庙记善乎董仲舒之称人受命於天生五谷以食之桑麻以衣之服牛乘马圉豮檻虎是其得天之灵贵於物也知自贵於物然後知仁义知仁义然後重礼节重礼节然後安处善安处善然後乐循理乐循理然後谓之君子夫能使人为君子者惟吾夫子之道焉今天下郡邑皆得立夫子庙而不能尊修之其何以示教化哉溧阳县夫子庙旧处其县西偏既隘且敝今县宰太子中舍查侯尝议欲迁之邑东南隅重役民而未果居一日邑民相与为请愿献其地合材而迁之查侯曰汝曹无乃劳乎邑民皆曰曷者明府当荐饥劝分粟以饷贫者曰俾筑堤扞水垦陂之田衆赖以活且有欲富斯民之意此何以报之今又议迁夫子庙将教以

善道如是重賜敢不子來於此乎於是翕然興功俟焉畢事殿庑之制聖哲之像咸得其宜足以使邑之人圖冠方領游乎其內奉縣大夫之祭豆侍鄉先生之經席知父子兄弟之道君臣上下之節而安處孝悌樂循中和以興賢能以受爵祿入其境則將見男女之行路者由乎左右少壯之負荷者并其重輕至其鄉則將見訟田者閑漁泉者邈然後溧陽之民知查侯之德不可忘也夫查侯所以當飢歲役民而民忘其勞者由誠心之所及爾使長人者皆能如是則何事之不立何政之不行乎申公所云為治者不在多言顧力行何如者斯之謂矣廟既立查侯以文見托士龍謂茲事可舉以勸遂欣然書之皇佑四年九月七日沈士龍記紹興重修學記溧陽縣學其權輿不可得而知考諸夫子廟記蓋皇佑四年自西城遷今處閱時既久廢葺不常最後建炎末有潰兵至撤庑屋為營壘唯余大成殿厥基自是為墟矣紹興癸亥秋天子大興學校建陽施佑為邑之明年始合大家富室建今學又明年且成寔紹興十八年也具興周侯淙跡施侯為隔政既謁先聖先師徧觀黉舍惜其成而未備二十年春遂因其室廬之顛仆者垣壁之頽圯者戶牖之踈腐者瓦甃之缺折者黝垩丹朱之未設者悉易葺而彰施之輪奐新美文采爛然屹當邑之東南如涌鰲背上物會是歲詔舉多士令先期赴鄉飲酒乃得應侯奉行惟力禮意有加於是邑居自達官而下畢來韋布云集比異時為特盛邑之人獲觀進退揖遜登降之節莫不稱嘆以為侯既能具嚴殿庭以展釋菜禮又能飾堂庑齋序以容士夫周旋乎其間真盛舉也既事休工侯廼命其僚三衢陳聞遠為之記聞遠竊惟國家中興既修鄰好置威武於虛空不用之地首辟賢士開教化原又詔郡邑恢庠序養士類所以尊名教作人才者德至渥矣故雖偏方僻壤弦誦之聲如沸繫守令宣化之力也矧是金陵疆井廣袤民物夥繁云峰秀水平遠可愛其淑靈之氣當不在川陸異必萃之於是宜才士輩出取科第如摘髭而登法從者接武并進它日三事之任尚庶幾見其人決非偶然矣抑知庠序之不可以不修也固邑人之愿也亦侯之職也譬之居室始焉而合不若少焉而全全必臻于美然後為至計侯之功信美矣推是心以往知其能粉飾治具黼藻王猷必矣是用紀其寔云紹興二十年十一月初十日陳聞遠記

慶元重修學記古者諸侯之禮天子命之教然後為學夫以國君之尊欲以化民成俗非有王命則不得專焉魯為周公後承命有素至僖公能修泮宮則詩人頌之抑亦以是為務者或寡欤國朝恢宏聖道崇尚儒雅凡郡縣皆立庠序置生員以闡人文可謂盛矣其於教也宜若易然建康為今大府溧陽為府名邑而校官興廢不常豈不系諸人乎中興歲踰二紀矣具興周侯淙宰邑始克有成自是復四紀矣歷日弥長理葺滋怠漸致頽毀瓦砾草莽几為荒墟今姑蘇李侯來莅邑事乃復整備人士胥悅庀職其間者俨然相率來告曰吾鄉是役成之惟艰幸而得人以能及此不可以不記自隳圯以來前後非不經營而莫得其要財耗於并緣事弛於因循而已今令君乃擇士之公勤者劉康國樂黃中董其事材美工良吏胥唯謹不旋踵而增屋三十余楹輪奐畢備有加於昔向也諸生弦誦无所每禮謁釋菜值雨雪淖泞則凜然顛仆是惧其曷能恭肅今廊庑顯敞齋舍有序執禮肄業足伸嚴敬進道之誠將有擢巍科登顯仕踵前烈者顧不媿欤天下之事唯心之公者足以成務若曰寬猛從所設施令君之心主於惠愛視民如子唯恐傷之而无私意焉不知者病其柔也校官之不修豈累政皆无是心哉困於財計之督責安有余力興滯補弊今令君為政三年无催科之虐而期会不亏又推常額之余显設黉舍焉匪特是也社稷之坛郡邑重事也正义之庙风化所系也皆废不葺挹秀清晖二水门所以固一邑之襟抱亦置不问今皆剏立一新矣孰谓柔寬不足为政哉臯陶叙九德首曰寬而栗柔而立成王告君陈曰寬而有制周官曰以公灭私民其允怀今君之心其公也其栗其立其有制者也其为我记之煇衰迟屏居且文笔非所

嫻习老病益芜塞奚足任此然身为邑民目其荒废闵焉愿其复起者有年矣今既乐李侯之能底於成又喜诸人之言为有理也故直为具述其意以谗来者俾时葺之勿使复壤焉侯名卞字茂卿已丑郑侨榜进士也庆元丁巳夏四月辛亥记

景定建康志卷三十

卷三十一

钦定四库全书

景定建康志卷三十一 宋 周应合 撰

儒学志四

祀先贤

祠堂四所在府学与祀者二十六人

濂溪先生周元公 明道先生程纯公

伊川先生程正公 晦庵先生朱文公

右四先生在大成殿东

丞相范忠宣公 丞相吕文穆公

一拂先生郑介公 通判杨忠襄公

丞相周文忠公 南轩先生张宣公

勉斋先生黄文肃公 壹是先生吴正肃公

西山先生真文忠公

右九位在大成殿西

太师鲁国顔公 丞相李文定公

中书傅献简公 少保马忠肃公

枢密包孝肃公 尚书张忠定公

右六位在明德堂东

丞相赵忠简公 丞相张忠献公

丞相吕忠穆公 丞相陈正献公

尚书黄公 枢密忠肃刘公

枢密丘公

右七位在明德堂西

府学祠堂初惟二所东祠明道先生盖为道学之宗而尝主上元簿也西祠忠襄杨公盖尝为建康倅而死节建炎者也淳佑中增立诸祠若濂溪则明道之师伊川则明道之弟晦庵南轩勉斋一是西山皆学宗程子而泽在斯民者也若丞相忠宣公以下皆尝官於此而政教德泽有不可忘者也今学校月朔参礼春秋中丁释菜皆为彝典惟明道忠襄二祠有记明道先生祠记资政殿大学士建安刘公珙居守建康之明年夏四月始立明道先生之祠於学而以书走新安之婺源抵熹曰吾少读程氏书则已知先生之道学德行寔继孔孟不传之统愿学之虽不能至而心乡往之及来此邦属邑有上元者先生少日宦游处也考之书记均田塞堤及民之政为多脯龙折竿教民之意亦备然问诸故老以稽其寔则兵革变故之余风声气俗盖已无复有传者矣始至慨然即欲奉祠以致吾敬使此邦之为士者有以兴於其学为吏者有以法于其治为民者有以不忘於其德不幸岁适大祲救饥之事方急於今廼克遂其志以吾子之尝诵其诗而读其书也故愿请文以记之既而府学教授孙君熏沈君宗说亦以书来申致公意且具道公始之所以焦劳而未及与今之所以暇豫而得为者其语详焉熹发书喟然仰而叹曰尊贤尚德公之志则美矣既富而教公之政则得矣属笔於我公之意则勤矣虽然先生之学自其大者而言之则其所谓考诸前圣而不谬百世以俟後圣而不惑者盖不待言而喻自其小者而言之则上元之政於先生之远者大者又惧其未足以称扬也吾何言哉於是伏而思之先生之学固高且远矣然其教人之法循循有序而尝病世之学者舍近求远处下窥高所以轻自大而卒无得焉则世之徒悦其大者有所不察也上元之政诚若狭而近矣然其言有曰一命之士苟存心於爱物於人必有所济则其中之所存者又乌得以大小而议之哉区区不敏窃愿以是承公之命庶几於公之志先生之学两有补焉又惟公之忠言大虑既已效於朝廷今虽在外而其所以救灾而弭患者又如此其汲汲也则於先生之所存必有深感而默契於中者矣其祠之也岂独以致其尊贤尚德之意使民不忘而已哉若夫推公之志而以先生之所以教者教其人使之从事於为已爱人之寔而无空言躐等之弊是则孙沈二君之任也与二君勉旃熹於是其有望焉耳矣淳熙三年夏四月丙申新安朱熹记嵩山黄铢书

忠襄杨公祠记予自督师召还凡六上乞骸之请寓建康待命府学教授陶君过余言曰昔者明道先生程纯公以正学为诸儒倡郡国祠事之惟谨是邦先生之常簿正於上元也学故有祠炽也不佞尝闻忠襄杨公通守是州日会金人大入杜充以宰相總诸道兵望风迎降自余或辱或遯惟公自矢一死累与敌抗唾骂不絶口卒遭剖心之酷公朝义之易名忠襄赐庙褒

忠今百余年记於丽牲之碑书於下墉之石赫赫乎其于日星?明也炽也生长大江之东习闻其事今又稽诸志乘则公又尝兴校官宰溧阳有德於民士而学未有祠也不谓阙典欤於是即纯公之祠之右绘杨公以致敬焉子为我识其事或以谄予曰二子匪其伦乎予曰儼人者以其道相似也禹稷顏回曾子子思穷達不相侔也去就不相似也而孟子同之此岂世俗所儼伦者乎夫学何为者也所以志乎仁者也乾道变化各正性命根於理者为仁义礼智之性稟於气者为血肉口体之軀而心焉者理之会而气之帅贯通古今错综人物莫不由之学焉则求以不失其本心使进退在我而富贵不可淫也使死生在我而威武不可屈也自夫学之不讲非囿乎气质之偏则夺於利害之私口欲味目欲色耳欲声鼻欲臭此性也而不知命之有制居则求安矣食则求饱矣是心之体肫肫其仁充寔流贯可以参天地可以为尧舜而安与饱之是求则小人之事未足为丈夫也以之为学则志於苟得安於小成矣以之居官则见得忘义见危幸免矣彼庸夫贱隶不足责也往往犹以一时之勇蹈仁义如康庄学士大夫学为何事顾以口耳之读给取利禄为足所谓成已成物则无与吾事焉斯不甚可耻乎迹二公之所遇虽异而其志於学归於仁能不失其本心则後先一揆此尚可优劣乎俗流世坏边祸方殷余嘉陶君之为是举也足以兴衰立懦不失圣贤为已之意为识岁月公讳邦乂字希稷吉州吉水人以政和上舍生赐第云公之曾孙天麟今为提领建康户部酒库所主管文字执奉常事惟谨公之泽深长矣端平三年十二月癸巳资政殿学士通议大夫提举临安府洞霄宫临邛郡开国侯食邑一千五百户食寔封三百户魏了翁记

先贤堂一所在府学东明道书院之西青溪之上马公光祖建立自周汉而下与祀者四十一人各有赞至德让王吴太伯【初逃句曲山中】

讚曰太伯之远啓吴宇也其周之盛德耶显哉丕谟承哉丕烈维天有成命匪躬之责委而去之川逝河决孔子不云乎可谓至德也已矣虞仲隐居季札守节斯其流芳遗烈欤郡以吴隶礼让维则

越相国范蠡【筑越城在长干里】

讚曰王降而霸霸降而强於越入吴蠡谋用章有屹斯城身退地荒治国往矣治家斯肥三积三散之陶之齐唯殖货是闻猗後人迷晋穀卫赐畴不并驰於嗟乎通材而生不遇时

汉严先生子陵【光结庐溧水县】

讚曰子陵光武帝所共学也可与致四海之永康怀仁辅义臧谓其狂客星去之庶斯言之入於帝心也不忘使朝夕之与居将奴眎之以为常取秦苛而洗之亦畧施行仁义不以勇力高皇帝曰非吾沛里中三老则言而莫予起也至忠血诚共学同里亦有仁义而已矣仁义不施秦所以亡仁义既效汉所以昌後之学为仁义者尚东庐之可望

汉丞相忠武侯诸葛孔明【亮往来说吴同伐曹操又劝孙权定都建业】讚曰戴天履地三纲五常孰闢汉鼎海内披猖草庐定猷天下大义踞虎蟠龙匪吴都是议同力絶操皦皦信誓

髦殲昭敝蜀不少延而已无魏矣盖炎兴咸熙曾不閱岁大星可貫汉贼迄不两立烈哉武侯之志

吴辅吴将军娄文侯张子布【昭宅在长干道北近宅有张侯桥】

讚曰於昭娄侯扬其英风左右孙氏恩激义从身总武文声振北南策曰仲父匪齐斯今侃侃遗直老臣之心忤不物避动不已为塞门焚庐固知其不坐而毙也坚卧固拒固知其不可得而縶也人欲杀而超然浩乎莫闕其际也长干之北淮水之东遗音琅琅张侯之宫

吴将军南郡太守周公瑾【瑜周郎桥在句容县】

讚曰天壤之间何得生此瞞横厌羣?狂挟至尊谋者如雨鬪者如云破荆州下江陵骄心盛气眇一世而莫之京烈焰烧江蛟蜃鲸惊乃不得志而去裂?县而三分曾不识天之絶奸凶而扶命义犹朶颐而迄自焚於戏易於汉鼎难于赤壁公瑾之勲徒手而立人极度秣陵一湖孰汤汤斯流千载芳躅

吴侍中尚书仆射是子羽【仪宅在西明门】

讚曰贤者能变俗俗乌得而变之人之生也直於子羽乎见之奸?用世便儼盈庭清恪贞素矢心而行能使其君信之望大宅而知其不为衆摺发其交徧独长喙之无可施衆畏旤以诬人独刀锯在颈而不移羌一正以自守纷百邪而无疑强为善而已矣未尝谗之於时

晋太保睢陵公王休徵【祥墓在江宁化城寺北】

讚曰甚哉孝之大也巍巍元公望於魏朝晋廷所宗得天年之高级人爵之崇而百世至行乃独家传而人诵之莫潜匪鱼莫飞匪雀胡为乎来哉于水于幕因坚西芒示我有觉维齐朱年维梁阮孝绪维唐张常洧藁芝异兔阙地致侵鹿寤其所洵美此都册无絶史孰移爱敬孰悖德礼树之风声大变模楷

晋平西将军孝侯周子隐【处子隐台在鹿苑寺】

讚曰迁善改过在易之益如雷其迅如风其疾当其未改块砾瓦石及其既迁金锡圭璧烈烈孝侯折节诗书昔燕赵之靡今邹鲁之儒方寸既改羣动皆新虎可搏是故竭力於其亲蛟可戮是故死国而忘其身未见刚者嗟时之人

晋太傅丞相始兴文献公王茂弘【导宅在乌衣巷】

讚曰江左权輿始兴经营无晋而有晋挈三世於嗣兴百尔倥偬镇以一静虽日不暇给而汔可庶定人亦有言今之夷吾九合一匡能志北方之图力足以为器足以施岂不翌宣韞哉惟

时委一世而清谈呜呼恹矣

晋太尉大司马长沙桓公陶士行【侃事见石头城】

讚曰堂堂陶公一代重臣作镇於远赫赫厥声咸和阶厉宸居震惊蠲氛荡凶四海一人孰急而求盟哉太真义戈所指磔梟尸鲸凡此戎公於躬取必孰挥匪塵而百斯璧孰愒匪时而分斯惜迴乎清高国尔何益凡百君子惟忠惟寔

晋侍中骠骑将军忠贞公卞望之【壺忠烈庙在冶城南】讚曰望之岩岩立朝正色独谢闲泰宁鄙吝之执以我断裁纳世轨则见危授命之死靡忒然後可以得此心之正而尽为臣之职矣惟忠惟孝其本则一从者二子遗庙翼翼

晋太傅庠陵文靖公谢安石【安宅在乌衣巷口】

讚曰建元而後事异救湓海内之望孰先安石繫望所在举国倚之其处也不翅伯夷其出也人以茂弘比之是以从容宴衍悉就条理内杜窺竅之奸外挫吞噬之志虽晋室而既卑矣抑亦差强人意雅道崇崇清言娓娓其人甚远其室则迤

晋车骑将军献武公谢幼度【玄別墅在土山下】

讚曰北方之强谁谓莫当南方之强辄曰非所长莫衆百万莫剧一秦震蕩蜚扬气无江濱奕奕芝玉矢旂是承婉婉衣冠豹狼是婴乃一蹴而走之风鹤作气草木为兵维南有人北无勍

晋右将军会稽内史王逸少【羲之事见冶城楼】

讚曰逸少精蘊浮於盛名人曰出处时之重轻虽廊庙非心营综攸叙悉置分表根立執举志付冶城遐想高世世竞高大曰积小以致世尚轻薄曰重厚逊退决誓二尊夔絶羣辟可谓出其类拔其萃矣云游龙惊聿冠古今并为一谈知予心哉

晋中领军光禄大夫吴处默【隐之茅屋故基在城东】

讚曰处默其清矣乎其在晋陵小君行薪其还番禺投芻海滨勺贪泉而不疑或谓余之矫情纺绩以为食而有不给布以为衣而犹不完观细故於平日亦足以验其所安此非自致其心於亲不有其躬於兄者耶至行之重外物之轻茅屋可朽名不可泯

宋徵君雷仲伦【次宗开馆鸡笼山?北学】

讚曰自古有国建学立师虽时之抢攘胡能已之元嘉岌岌鸡山嵒嵒儒馆揭揭学徒业业西岩之下廸我贵游易术华林礼待数优聘币可为国有务式兴於文风可以观德

齐贞简先生刘子珪【巘居檀桥】

讚曰人而无学讫黷蒙学而无师安适从举举下席衿佩同师谁敢名青溪翁青溪至行神明通靡指蜷足萃厥躬屋壁偶坠闺房空去来眡此鴈踪谊以方直彻主聪嘉尔惟孝移惟忠范樵不在言义中如其天道得所宗百世可起邹鲁风

齐诸王侍读陶通明【弘景居茅山】

讚曰人生天地间乃为天地心超然出人羣人纪身所任况陞朱邱僚乡用方駸駸胡然薄神虎勇往投冠簪朝驾违市朝暮影栖山林奈何天所令生意弥冲襟磊落事觚翰洪纖注鱼禽要令举世人不有微疴侵白云自怡悦秉志非幽寻道术喟分裂僊佛纷浸淫徵陶撼句曲佞志倾鍾岑皇皇周孔教万古开黎黔

梁昭明太子萧德施【统书台在定林寺後】

讚曰粤若古初丕昭人文降魏及晋辞华纷纶习尚流传名誉着闻衆作漫漶独擅选伦此其膏馥之余沛然翰墨之勋矣储闈烝哉文士萃止仁孝至性寬惠济美必也师式圣贤根本义理则其能事何止辞林文圃而已哉陟彼北峰高台既平草根木杪诵弦之声

唐太师刑部尚书鲁公顏清臣【真卿昇州刺史】

讚曰呜呼鲁公大节孤忠公不知小人小人寔知公其直諫也决知其不朋我奸其出使也逆知其不生还公则曰人心无路见时事只天知唯义所在自处不疑於时相传不死而僊岂曰茫昧理寔昭然以秋霜烈日之气不为列星固当游行乎人间彼小人者宇宙虽广何所容其身未先朝露已为游尘呜呼公虽不知天则知小人矣

唐翰林供奉李太白【白往来金陵具载本集】

讚曰天地英灵之气旷千载而几人恍天僊之下堕驂云雾而絕风尘以匹夫而动九重乃供奉乎翰林将国论其与闻之奚儿女子之云云盖其抱负霸王之畧或庶几乎少伸手携郭令公足蹋贺季真至於奉珪印以赎之有以信志业之等伦岂为其道骨之可蜕诗思之不羣耶鬱?此山悠悠大川公不来游今五百年

唐山南西道节度参谋孟东野【郊溧阳尉】

讚曰扰扰今人中贞曜心独古披搜三百篇顿挫五七语其中春草心浩蕩报慈母原道接圣传当时一诤愈駉蛰互前後云龙相上下永怀絜其长畴若视所与一尉何荒凉千年仰清苦

南唐司徒致仕李致尧【建勲赐号鍾山公】

讚曰呜呼知时之不可为而不为之者其致尧乎身都显荣年盛望高审时命之固然指鍾山而逍遥营台度榭负杖曳履既信桃花亦订流水岂如它人去而复来汔以自全其君子哉

南唐内史舍人潘【阙佑见江南錄】

讚曰呜呼知时之不可为而犹为之者其荥阳乎斯时何时于理于疆衆假息於沸鼎独忧深而谋长遇主於闇通国若狂同舟覆矣叫号仓皇风雨如晦鸡鸣不已蹈死疾邪允矣君子

枢密使济阳武惠王曹国华【彬开宝昇州行营统帅】讚曰天地之大德曰生圣人之守位曰仁定天下而一之曰不嗜杀人恭惟艺祖肇造区夏整我六师予誓告女鼓我元气入彼蜀都爰处其宇以莫不按堵顒若江南奚独後予同德惟臣不疾其驱衆志允谐我病我苏主穷既俘民诛用逋弢我兵械完其体肤功着不杀庆衍且余设柅列戟駢旄鸿枢珽板櫺具金佗玉鱼子孙孙子盛哉猗欵贪残之家视斯何如

尚书忠定公张复之【咏祥符知昇州再任】

讚曰承平之盛好是正直刚大之气鍾为英特惟乖与崖自讚其德荐扬下逮於乘驿弹击不避於贵弼不汲汲以规进宁皇皇乎外服拔茶植桑崇本务而抑末术化贼为民广道德而息兵革惟奸是鉏爰也威之克如嬰之慕去也留之力江东父老至今诵公之绩也赋人声之唱应问公事之阴阳其得於希夷者深矣彼学侶何能窥其豪芒

中丞恭惠公李幼几【及淳化昇州观察推官】

讚曰谨?度饬簠簋昔人以为常今人以为异忘轩冕礼丘园昔人以为易今人以为难惟公立朝发轫此府惟公姤节不间细故其清修贯表里其谨厚亘终始作之斯兴谁无是心导其所趋何古非今悔官下之买书可以愧贪夫屏輿从於林麓可以厚薄俗

枢密孝肃公包希仁【拯天圣知江寧府】

讚曰孔门四科尤重政事岂其冉季而曰俗吏惟孝肃所至民物吐气直干必栋精钢讎钩磊落平生斯言卒讎蜚英乡耆銳先推贤致养亲闱宁不调官行通乎神明气塞乎天渊朝端憚其严毅邦计仗其幹旋京师伟其弹压牧伯赫其旬宣迅一时之剖决纷万口之流传民到於今姓而爵之今之从政者尚矩矱之

丞相忠宣公范尧夫【纯仁治平江东运判】

讚曰倬哉忠宣炳炳论奏既独异於熙寧不苟同於元佑务审处而缓图庶志成而业就迹其践行乎六经融液乎忠恕谓避好名之嫌则无为善之路虽再相之弗及曾不改於厥度彼巷间之不已又奚掩其终誉憧憧世道悠悠我思肃肃瞻仪匪计臣是私

宗正寺丞纯公程伯淳【颍嘉佑上元主簿】

讚曰天运有开宋德聿隆河洛之传洙泗攸同天理之妙和气之融不言而化盎如春风惟此仕国既兴书堂式开我人叙于烝尝

监安上门郑介夫【侠清凉寺有祠】

讚曰昔神祖之在宥也思跻世乎五三繫时宰之责成陋汉唐而不谈动色於一堂之上曰天下已治安矣猗一个臣不卑抱关流离之子携饥扶寒乃作绘以上之彻隐伏於天顔方附和而壅塞羌独犯其至难皇心为之始悟抑亦少障乎狂澜叶飘风其一身惟忘君之可惭游从之地故在官职之诱何甘彼美人兮呜呼噫嘻

少师龙图学士文靖公杨中立【时尝家溧阳】

讚曰龟山先生德盛道尊一世之望灵光独存立乎本朝士曰展季倡明斯学统则有继衣冠之南公亦溧阳母溧阳君子之乡

参政庄简公李泰发【光绍兴宣抚使】

讚曰帝王所宅东南都会外连江淮内控湖海於焉作京忠愤义忼皇帝若曰畴顺予采光拜稽首见士不怠千乘万骑是能处之百司庶府是能宇之迢窈帝阙秦淮紫之骈阗天邑锺阜承之銮舆来止嘉汝成之相此其都万世之义不此其都权奸之计直前激烈疾视附和亟其投艰无所逃旼能畀之遐荒不能使之心不王室能毒之荷械不能使之口不读易呜呼忠矣

太师丞相魏国忠献公张德远【浚绍兴留守都督】

讚曰思陵幸邳魏公揔戎大勲未集大义已明表着天心扶持人纪人类得别於禽兽中土不陷於沦胥者惟公是恃臣之事君无所逃於天地成败利钝是不足计由今观之地割矣而搏噬不能有兵解矣而跳梁不能久则谗慝之夫徒能畏讎卖国以蛊坏人心使公不得遂其志志则未已凛凛生气

秘阁忠襄公杨希稷【邦父建炎知溧阳县迁通判】

讚曰公长於县敌至则战进貳於郡我心不转小土寡民力犹能兵凶氛压城势则弗胜此赵氏之鬼也敌安得而生之褒忠表祠忠襄易名惟国之恩匪公之荣

太师丞相雍国忠肃公虞彬文【允文绍兴督】

讚曰金石不可入而诚可使之开鬼神不可诘而人可使之泣伟哉雍公显於采石一呼而作

三军一瞬而摧大敌方时谈兵者满朝廷握兵者徧疆场固尝裨庙算献戎捷而江上之师莫适为主画一策发一矢猝无及也幕府非专征书生非健卒来谓斯何战岂其职而乃片言祸福交手爵帛人百其勇齐心并力覆前至之舟扫先登之迹刑马之?徒腥投鞭之望顿失十万之强寇如披渠酋之金甲如挾微此之役安得不踰年而敌就殛也既登象绘既太庙食功载不刊我祀事亡斁

太师徽国文公朱元晦【熹淳熙除江东转运】

讚曰洙泗百年而孟子作濂伊百年而朱子生元气之会应期而兴笔削千古阐明六经精其知闻力其践行玉振金声集於大成在一郡必達在一道必达亦足以发在天下必达在後世必达必来取法

安抚殿撰宣公张敬夫【栻督府机宜文字】

讚曰宗於显道????于仁仲闻道甚早求仁甚勇知行并进义利剖分蛻人欲之蟬融天理之春得尚乎明君不少贷乎小人夙教思於家庭竟賁志於中原圣谟洋洋於今如存

太师正肃公吴胜之【柔胜生於金陵】

讚曰正肃得师達於有政畿幙荆钁廩发饥振朝曰汝擅甿曰生我尸而祝之有永无墮可禁者学不可禁者心天监厥德及物也深何以报之在其後人

太师参政文忠公真希元【德秀嘉定江东运使】

讚曰孔孟之国家书户诗先进风行後进景随远逮於汉班班诸儒岂无他邦犹多鲁邾惟西山公邻夫子墙有闻斯道悔其辞章着书满家黜霸崇王非不逢辰既登四辅利用存身卷怀衆甫簪丝所经衢壅涂塞爱人之政後人之则

右讚各刻於祠位之下【马公之建是祠也议位序者定为四十二人公之大父野亭先生与焉公曰野亭自有祠漕司矣此不必列盖不欲私其祖也今祠位尚虚其一後之君子当有列野亭于此祠以备其缺者矣】

青溪先贤堂记公卿大夫士可祠三道一德一功一金陵帝王州上下数千年间有道有德有功者相望何吴晋之臣此皆有祠而他代阙焉开庆元年秋资政殿学士大制帅马公昉祠先贤青溪最胜处凡生於斯任於斯居且游於斯而道德功可祠於斯者自我朝上溯汉周列位四十有一取於吴晋仅十有一选亦遴矣先是宝佑丁巳公以太常伯任留钥建江闕政通俗阜教民靡不勤章往劝来是祠所繇作属前宗学谕冯君去非定其可祠者而为之讚会上谋荆帅趣公易镇祠事迄未备越一年进视四辅拊甘棠而临之凡前志未毕者是究是图祠乃成八月壬辰舍菜成礼会弁如星列古先民洋洋如在景行行止克广德心客有赋者曰吴潜

青溪千二百年九曲萦纤七桥蜿蜒鸣鸡射雉荒亡流连?昭明之宫銜乐游之苑宣尾庙改青衣祠藏此溪之所以堙而流之尼於远也今揭?妥灵圣贤其居令闻广誉黼黻其书俎豆革管弦之靡声敦浹宴游之娱此溪之所以濬而泽万年之留都也公谓客曰子徒识青溪之改视易聽而不知我朝之度越前代也盍观之是祠乎清莫如子陵而隐之致尧其流也忠莫如清臣而子布子羽其俦也休徵之孝望之之节子隐之勇内史之介逸少之雅仲伦子珪德施太白东野之文皆可以言德而未若大伯之为至明哲则陶朱公整暇则茂弘安石英迈则士行公瑾幼度皆可以言功未若孔明之为盛我宋诸贤功德兼之武惠士行也忠献茂弘也忠襄望之也忠定孝肃清臣也介公荥阳之隣也忠宣其谢安乎正肃其子羽乎恭惠致尧之俦乎庄简忠肃公瑾之亚乎至若河南纯公龟山文靖公南轩宣公紫阳文公西山文忠公皆以道鸣者则汉而下所未有也而皆萃於吾宋孔孟而後道不在兹乎有道者必有德必有功而功之不究或系乎时苟不至德无以为道本也重道德而轻功业人将知体而不知用崇功业而遗道德人将知流而不知源吴祠所重在功而道德之意薄晋祠?功?德道则未闻也古今并祠三者始备大学之道在明德新民止於至善曾子发至善之传曰君子贤其贤亲其亲小人乐其乐利其利所以没世不忘也是祠之作因其不可忘而思其所可学某也道某也德某也功勉而进之三者全则至二则次一亦不失於令名社稷生民终将赖之二三子其有志於斯乎客曰大哉新民之赐抑以得公尚友之志公命记之并刻迎享送神之辞使民歌之其辞曰长江兮淙淙踞虎兮蟠龙秀羣英兮礼乐覽千古兮焉穷蹇谁留兮青溪穆将愉兮壽宫思至德兮肇苍姬避圣嗣兮兴句吴竟长干兮游五湖耀客星兮隐东庐坐很石兮定吴都怀仲父兮秦淮隅燎赤壁兮伟壮图忆尚书兮西明居孝感兮冰鱼鹿苑兮儒书起乌衣兮见夷吾运百璧兮恢宏樞忠孝兮父子将相兮叔侄登冶城兮想高世酌贪泉兮徒四壁兴文兮雷刘着书兮陶萧大节兮霜凜凜谪仙兮风飘飘云龙上下兮东野桃花流水兮致尧肆荥阳兮忠愤相先民兮迢迢天昌宋兮将有曹平江南兮斧不膏德乖崖兮桑本褒美中丞兮蓉幕高神明兮待制忠恕兮肤使春风兮壽元气图绘兮囿天意出师门兮道与南建留都兮垂万世仗征钺兮江无波死封疆兮人知义采石兮功之奇紫阳兮道之继佐乃翁兮南轩开厥後兮壹是泽斯民兮西山俨元凯兮是似庀管钥兮北门思尚友兮古人建芳馨兮堂庑合荃芷兮盈庭嫋秋风兮桂枝繚荷屋兮杜蘅荐菊兮寒泉采藻兮落成浴兰汤兮沐华望美人兮并迎芳菲菲兮满堂灵之来兮如云聊逍遥兮容与集琳琅兮锵鸣吉日兮辰良蕙蒸兮椒浆元勲兮钜德日月兮齐光介民兮景福昭昭兮未央高山兮景行千秋兮难忘诸氏名行事各具本讚不复书公名光祖字寔夫金华人受道西山後学称裕斋先生云承直郎宜差充江南东路安抚使司干办公事兼明道书院山长周应合记文林郎宜差充江南东路安抚使司干办公事赵与勗书从事郎特差充沿江制置大使司主管机宜文字徐道隆篆额

转运司祠堂三所建立岁月各有记

丞相忠宣范公祠

忠宣祠堂记治平之元忠宣范公为江东转运判官赋筹思亭诗有曰致诚通造化审虑敌权衡境寂居忘倦心虚照自明石刻至今犹存嘉定八年春起居舍人建安真侯希元恪共使事慕忠宣之贤且爱其诗之旨趣深长也廼於兹堂之西牖一室绘公像而敬祠之又采诗中语

更所谓激扬亭者曰虚明而堂之名双槐者易之曰忠宣顾瞻之间先贤在目高山仰止之意须臾不忘其深有契於心者耶夫君子之所为当以三代而上人物为的不当以两汉而下人物自安盖三代而上士大夫朝夕所从事者不越於此心毫发有差痛自惩艾学日进德日充中立而不倚全体浑然不可以一善名故繇汉而後虽英才间出未有能入其域者我朝人物之盛几於古矣迨元佑间正人森列而忠宣之德之懿良可仰焉忠宣之论事也慷慨奋发知无不言若濮邸之不当称亲法度之不可变边隙之不可开皆切於时病屡进而屡黜故天下称之曰正人然蔡确之远谪则以为太过章惇邓绾之获辜亦为之救解忠宣固非朋奸者而委曲如是其志念深矣语所谓君子不器中庸所谓焉有所倚迺平昔之规模也当是时人才非不衆多忠鯁敢言者非不可喜然中正无偏求如忠宣者寔鲜此无他忠宣从事於此心心本不偏制行而原於心斯不偏矣尝称孔子之言举直错诸枉能使枉者直以为举用正直邪枉可化而为善何必分辨党人有伤仁化深乎深乎议论持平不为矫亢使其志常伸其言尽用岂有异时讎复之醢哉三复筹思之诗发挥此心至精至切君子以是知忠宣之所存盖以三代而上人物为的也起居正色立朝有德有言名重当世而独於忠宣起敬如此亦足以占其所存矣忠宣之帅环庆也毕力救荒不俟奏报而起居之恤民也亦然屡请於朝施惠甚博亦有不待报者此又爱民皆原於心所以不谋而同也呜呼贤哉嘉定元年五月既望朝散郎试秘书监兼国子祭酒兼国史院编修官兼实录院检讨官兼崇政殿说书袁燮记

参政文忠真公祠【徐公鹿卿始立附于忠宣范公祠马公光祖特建今祠】

文忠祠堂记圣上改元淳佑之岁真公之薨七年矣先是江东大饥死徙相望民之被赐未有加於嘉?乙亥者其德而思之也莫不然鹤山魏公记公行事而江东荒政乃不及录南昌徐公鹿卿推求其故以为阙典方治平间范忠宣公寔典漕事真公辟堂名曰忠宣绘像其中以示景行至是徐公奉之同室共祀以慰其民无穷之思则移书宗学博士黄君自然求君所行以补遗文之阙黄君曰自然於真公为友而知公最详无若王遂且於救荒本末尝与闻之以诏後人宜无不可时徐公移浙东宪以书戒遂曰吾行有日矣子必无辞遂逊谢不敢当然其时为淮西总所干官职事之闲得以窃闻真公与李公道传济人之政真公治金陵而行乎太平广德李公治池而及乎宣徽皆以身当其劳而分之幕府遂之心有以知真公之心用敢不辞而为之记初公涉三馆侍螭螭入玉堂词章炳蔚闻於宫禁论事上前皆本仁义皆关君德治体皆切於君子小人之辨使北不達则益明复讎雪耻之义中外想闻其风采守泉南帅豫章长沙三山惠民平盗皆有善政外夷讐服天下唯恐其不入相更化立朝发明大学得失与盛衰治乱存亡之义上为诏读校文入奏上意懽然接纳将举国而聽之而公薨矣宜乎狭歛一道论述一政母乃忧其末而忘其本举其小而遗其大哉是不然江东始旱公有忧色合本道义仓及转般米数十万斛而厚其积因户部罢夏税之请以蠲其征取郡县官及寓公之贤以核其寔大家勿劝分贫者糴乏者济已甚者輦粟赐之病者载药与之本之以河北救灾之议行之以青州之政栲风沐雨遍走二郡不足则开寄纳仓出官钱籴之吴中又不足则以翰苑橐中金益之不忍留都之不及则发私财以赈贍之乞事民益急则转糴为济广德守臣附会时好劾教官以闻公引咎以白其冤值旱乾祷雨白鹭洲人见其对越岁迄以稔告袁公甫笔其事为録非特此也推本主上之仁一似仁祖而羣臣般乐怠傲不异政宣者十事语意剴切人之所以心服者岂有他哉仁与诚一故也则民之思之也岂偶然乎哉徐公之祀之也亦岂

徒然乎哉文正忠宣有王佐气象识者犹恨其不同周程之学公居迁阳後於文公之没矣居七年尽读考亭诸书发挥天理人心之妙盖有及门而不尽得者诚意寔德岂一日之力哉宜乎公之自托於忠宣也方真公立祠时求记於洁斋袁公又求之漫塘刘公二公之所称若不类元佑气象者由今观之先生大人之所立大矣岂区区拘剪墨之所能及哉徐公在朝列数进危言杖节西江纲纪大振尝请於朝乞缗钱百万以助籴谷援真公以言朝廷为拨祠牒下仓司以备救贍若与真公之政相後先者夫真范相去百有余年徐公之於真公亦越二十有七载非前有所附丽後有所歆美也道未必同而心则一也一者何尽其心即尽其天也子思曰思知人不可以不知天孟子曰存其心养其性所以事天也诗书格言孔孟遗论迁阳之学南昌之教为有本矣後之学者其可不务於斯是岁八月寒露日朝散大夫显谟阁待制知宁国军府事兼管内劝农营田使王遂记并书奉议郎守秘书丞兼权屯田郎官黄自然篆额

宝佑二年马公光祖兼持漕节始至谒范忠宣真文忠二公祠僻隘弗称文忠公寔公所师而忠宣公又文忠公所尝祠也思以揭妥灵瞻前景行乃重建祠於筹思堂之西偏以二公并祠焉视旧宏邃祠庭严肃蒸尝惟时公自为文以告二公告忠宣公文曰【维宝佑二年岁次甲寅十一月庚子朔初三日壬寅中奉大夫守司农卿总领淮西江东军马钱粮专一报发御前军马文字兼提领措置屯田时暂兼权江东转运使司事借紫马光祖敢昭告於大丞相范忠宣公光祖惟世所难得者才才所难得者时治平一代盛时也江左远在南服观风之任必惟其人公以名世领漕事吏化其廉民怀其德凡所以培植相业以开元佑之盛者寔发源于此故节义凛凛至今与龙盘虎踞相为凌厉尸而祝之以风後人宜也而偏隅陋宇适所以彰司存之不敬竭来共职跻公堂目公像所谓堂堂巍巍为砥柱为虚舟如曾文昭公所铭者俨然犹存是不可不起敬起慕于数百载之下也用彻而新之以表前人之心以厉後人之业以昭太平人物之盛敢因告成以写其志惟公其鑒之尚飨】告文忠公文曰【维宝佑二年岁次甲寅十一月庚子朔初三日壬寅门人中奉大夫守司农卿總领淮西江东军马钱粮专一报发御前军马文字兼提领措置屯田时暂兼权江东转运使司事借紫马光祖敢昭告於大参真文忠公先生光祖幼志于道年十四五时诵先生救楮疏已愿执经簪弟子列既冠为新喻簿先生寔帅洪都尝以文字求质正会先生以忧去未暇也及宰余干始获登先生之门心经政经文章正宗夜气箴裕斋诗皆为光祖作先生之望光祖深矣期光祖厚矣今以總摄漕先生棠荫在焉流风善政其隐然於人心者垂五十年如一日尸而祝之以与忠宣范公并祠宜也而頽垣败宇卑陋弗称光祖祇歎之余既求先生之遗迹而遵行之而保守之乃相彼爽垲辟旧而新继自今事君临民行已援物不以先生之心为心者有如大江虽然岂特光祖也哉後之为使者目遗像之俨然其尚知所矜式夫祇奉之初不敢不告尚飨】上梁文【伏以此地百五十年有两福星之临照後天数十万载同一北斗之瞻依可无松桷之新以寓俎豆之荐矧踞虎蟠龙之形胜有伟故都而服牛乘马之转输寔为重寄於皇昭代间生大儒在治平则忠宣范公持簞节而来于嘉?则文忠真公奉板輿而至咨諏一道先後同心倚柳吟诗念念羣黎之休戚发棠賑歉熙熙九郡之歌謡虽异时天下苍生均蒙利泽至今日江东遗老尤慕高风趾其堂则如见其人怀其道不独祠其像奉使總领提领运使大卿礼乐肤使文章正宗一则遐想於范模一则亲传於衣钵每于退食自公之暇辄哦景行行止之诗摩挲壁记之未漫彷彿梧姿之如在苍苔綠水叹偃仄於旧祠青户红窗爰恢张于新址式昭所敬用妥厥灵未须迎送有歌如罗池之祀柳子厚庶几饮食必祝若潮人之事韩昌黎肇举修梁敬陈韵语

东日拥金盘上碧空咫尺憩棠踪迹在如亲霁月与春风西贯索星沉太白低廩廩胷中兵甲在唤回前哲扫鲸鲵南薰风画永度晴岚二老九京如可作杯茶演易到芝函北沙漠茫茫云似墨风云天险界长江千古丹忠思报国上台斗森森罗一望对越苍穹无媿心仰止前贤皆好樣下燕雀争先来贺厦东南学子皆瓣芎如水朝宗长不舍伏愿上梁以后道脉之壽无穷人心之趋益正须知参政宰相元自此而推之个般好樣监司深有望於来者】

太子少师野亭马公祠

野亭祠堂记理在天下惟公平可以服人心惟忠孝可以扬先志历世千百犹一日也盖作善降祥时廼天道而芾棠之思必有感於中者为之夫岂偶然也哉惟我圣朝以仁立国以忠厚待士大夫渗漉涵养愈积愈远一时有位之士知有体国奉法爱民泽物而已一念精白培壽国家之脉源流所逮非止其身宜乎垂芳袞庆代有显人吕王韩范重珪叠舄赫奕焜燿衣冠之盛其来尚矣东阳马公之纯庆元间以承议郎主管江东转运司文字廉平公正克相其长持画婉婉迈惠维多後六十年当宝佑戊午公之孙光祖清才敏德昭名於时天子鉴其忠使华玉麟晋以书殿恩例眎执政皆殊遇也然其临民莅事壹是以祖为法越明年春上以陪京之钥非重臣不可授钺下鍾山草木惠威衣被卓乎忠定之重来都之人士歌舞畴昔桐乡之爱易地皆然爰请运管廨之偏纘公而祠焉碧瓦鳞鳞璿题列楹埠基拓岸事不戒而备中元後二日率属落之起瞻德容丰骨远肱苍髯古?袞衣朱而貂蝉峨也丰仪肃肃可拱而即溯其心君川渟玉韞生发迤邐有衍未艾懿哉因乎乔木之家盛惠之祀而验於感应之理不可诬也公弱冠登隆兴进士第与南轩东莱讲贯精详天文地理制度之学靡不洞究为三山??与上官争是非民之全活者衆有欲荐公中都官辄逊谢之其介陋恬退类此乔文惠公行简葛端献公洪皆横经执弟子礼其在邳时吴居父镇守有几日不来春便晚开尽桃花盖与公唱酬之句石刻尚存公篇章吟咏初不苦思而意已独至金陵百咏殆遗藁耳平生着述如书经中庸大学说周礼随释讲义春秋编年图豫章流芷杂着於家史具载既老世号野亭先生今祠旁扁揭刻岁月於柱志不忘也先生自资政恩累赠太子少师祠之兴工逮讫事凡日周一甲子其熏华供设屏龕俎豆悉仿忠宣西山二公之礼或曰先生昔列属也往?之乎曰明道尝簿正上元矣衢之所在下风北面可也世无孔子而老聃郑子悵悵於祈招此世之所以不古虽然象贤崇德示民知所敬抑观风者之先务云皆开庆元年八月旦日朝议大夫行尚书户部郎中總领淮西江东军马钱粮专一报发御前军马文字兼江南东路转运判官倪垕记马公光祖因是祠之建虑香火洒扫之久而怠也乃捐俸余贸田百亩有奇以岁收之租给其需隶其事於运司主管文字厅岁会其美以俟繕修且刻石祠下

府境诸祠

顏鲁公祠【在句容县】

鲁公祠堂记淳佑二年遂守宛陵爱顏鲁公之为人而无能得其像者朋友刘汝进过虎耳山谒其墓而得之取南丰祠记而读焉意其若临川为堂以祠者亦足以表示一方矣後五年知句容县张君渠以县图经见寄载县东来苏乡後顏村有顏尚书塚石龟具在然後知公虽死

於蔡州而踰年淮蔡削平贈公司徒諡文忠而盧杞既貶李希烈敗喪斬首獻於朝有詔子顏碩護喪歸葬後顏即虎耳山句容為邑終唐之世惟至德戊戌與上元辛丑以屬昇州真人將作析而二之故其碣基猶號潤州句容縣顏尚書塚九坎十八墓歲代流易昭穆雜處惟有石人石柱石版墓地雖存而墓志無在奠克表識是謂闕典矣自陋巷斷絕顏含師古咸以文名杲卿兄弟皆著風節公字畫遒勁其放生記及府學茅山碑皆為世所貴重晉有卞壺台城之難父子一門并著忠孝雖非土人其去之三百年著稱一郡豈偶然者故莫易於慷慨殺身莫難於從容就義觀公之志於死而不輕於死亦足以見其處之有道矣夫死生大節也出處大事也唐之禍始於天寶甚於貞元宋璟張九齡已死李絳裴度未生當是時惟郭子儀陸贄段秀寔李泌陽城為得人而無救於唐之患微李勉鄭叔則等救之於前李臯恻於其後則人心之公理絕矣平原失守恨二十四郡無一忠臣至有不識公之嘆十七郡見推歸事肅代遭李輔國元載盧杞不悅南豐所謂忤於世失所而不自悔者天下一人而已此足以見其為烈而所以處之者未見也初杞聞舌舐先中丞面矍然下拜而怨已深迨李元平奉使無狀而代之行是一死也而但敕子弟奉家廟撫諸孤四將強相推脇公曰吾兄杲卿守節而死希烈計終不為用拘送蔡州自度必死自為之志曰此吾殯所是二死也希烈問朝廷羣臣儀式不對積薪於廷欲焚之公怡然笑曰豈受汝誘脇此三死也偽使稱敕從大梁來公罵曰逆賊耳此四死也自言吾且八十至七十六而縊天下望而稱為魯公朝不必廢帛不必賜其所以立未易言也南豐猶恨其雜出神仙浮圖之說韓愈之外未必可以責人近世名公咎其年高不能勇退此言當為後世發而非所以論公也張君曰此非開人心覺天理為令之職乎所宜表其墓求近居進士高元龜指示其處且忻然協力而立祠於中刻石以補墓上別圖其像作文以侑岁时祭祀云唐有天下兮內政不綱夷狄妖嬈兮藩方陸梁平原不動兮卒滅范陽淮蔡勃奚兮諸鎮喪亡陋巷有孫兮甚賢且良志存王室兮一飯敢忘使行宣慰兮其謀不臧餒之賊手兮肆毒虎狼余生在廷兮余死在床忠肝義胆兮其未可量惟昇有縣兮山高水長虎耳名山兮來蘇其鄉卞壺忠孝兮臣子有光兩縣一州兮百世齊芳從容赴義兮厲以自強畏怯觀望兮敢有伏藏鑱石為龜兮祠之於旁萃繫以荐兮春秋烝嘗遂初讀句容志見其載顏尚書塚在來蘇鄉後顏村及顏運使牒府歸回苗稅重建祠堂深為魯國公痛之及讀本傳新舊史皆不載獨門客因亮行狀言歸葬萬年縣鳳栖原而令狐峒撰公志在萬年縣舊原忠臣義士志無不在而地中原益可痛悼矣明年六月中伏日華文閣直學士中大夫提舉江州太平興國宮德安縣開國伯食邑九百戶賜紫金魚袋王遂記并書

一拂先生鄭介公祠【讀書清涼寺遂擢甲科因詆新法被謫還鄉日所存唯一拂耳】鄭介公諡議宣教郎太常博士劉靖之議曰諡以官品得法之常也諡以節行得法之非常也國家以常者伸義則夫非常者固弗以輕予也三山鄭公死於宣和官止九品紹興追贈秩視七品肆我主上褒崇名節風厲來世於是特旨賜諡奉常其可以常書乎熙寧新法王安石忮忍專欲劫制於上呂惠卿之徒奸險小人締交於下蔽主誤國忽天誣民元老名儒疏擯殆盡鄭公昔師安石思報知己緘書屢進牢不可反忱憤忠圖所目覩述為奏篇使斯民顛連流離憔悴艱厄之狀畢陳於前而當時椎膚剥髓斂掠不仁之政悉聞於上神考惕然動悟夜寢不寐旦即勅罷某事某事之不便於民者凡十有八責躬求言久旱以雨蓋公是時監門一小吏耳越職冒言至於擅發馬蹏甘蹈鼎鑊而不之顧安石由是以去位要君而用事小人環泣上前目公狂夫欲正其罪公復累上書明斥惠卿指為賊本與呂嘉問力辯市易且極論邊兵不已為

大不祥羣党攻之遂罢门局公寻复取魏徵姚崇宋璟及李林甫杨国忠卢杞等传迹在位者所行之事其合於林甫輩而反於姚宋者类而比之画一以进感奋激切言无用隐奏入执政大怒兴狱文致公於是有贞阳之行逮元佑初命为泉州教授元符元年再迁英州崇宁之初既起复停竟不果叙用以没公自少刻励於学书无所不读而贯以一理其序自以为上不谀公卿下不原乡党水火可蹈而议论不可回以四方万里之饱煖为已之饱煖四方万里之欣戚为已之欣戚其志何如哉不幸逢新法鼎沸之时欲以杯水救輿薪之火精诚贯彻能使九重之邃洞见幽僻披图长嘘弊法立变人情驩呼天意感回吁亦伟矣在英十年陶冶风化俗以知学文忠苏公论荐之词有曰侠以小官触犯权要冒死不顾以成直言又曰考其终始出处之大节合於君子杀身成仁难进易退之谊元佑欲用而未达绍兴追恤而未尽历七十有余年乃克议易名之典岂非劝獎忠直寔我祖宗之家法而天则留之以助今日更化之善意乎然则谥孰为称曰谥之美者多矣公居之何慊然与其得夫人之所同者孰若得公所自许者之为贵公名侠介夫其字则介云者公生平之所自许者也冠字死谥其义一也先儒有言古之为谥者取於名取於?取於字况在諡法知死必往曰介执一不迁曰介方公书初上固曰陛下观图行臣之言十日不雨即乞斩臣宣德门外以正欺君慢天之罪如稍有所济亦乞正臣越分言事之刑洎书再上又曰臣言非耶乞斩臣於衆人之前以塞流言汹汹之路此可谓不以利害祸福迁其所守死而必往者矣後之人闻公介然独立不惧之风其忠气义烈千载犹可兴起也请諡曰介承议郎行秘书省着作佐郎兼沂王府小学教授兼权考功郎官李道传覆諡议曰故赠朝奉郎郑公既没九十有六年诏有司特议其諡公名侠字介夫太常博士谓古者有取谥於字之义又谓公平生行事合於知死必往执一不迁之法请谥以介按公本从王丞相安石学熙宁中王丞相以政事毒天下公规之不受丞相诱公以利公不为动顾方以区区抱关小吏上疏极言丞相之失且图所见小民流离困苦之状自城门附马逋达银台通进司为密急事以奏忠诚恳恻上感天听上为行其所言十有八事中外竦动王丞相既罢公连上书论吕惠卿奸状尤切公虽坐此得罪竟坎坷终其身然百岁之後读其书想其人凜然生气如公之在目也呜呼可谓介矣抑尝考公平生所历盖自罢监安上门谪英州十有二年遇哲宗即位赦得還元佑中两苏公先後言於朝始除泉州州学教授秩满 任以忧去免丧授泉州録事参军元符初年再贬英州後虽复以赦还而终老不复用矣夫介然特立於衆小人之中其介犹可及也介然特立於衆君子之中其介不可及也元丰以前元符以後公之不合固宜当元佑时元臣秉钧衆正满朝起於谪籍起於州县起於岩穴者盖不可胜数公之犯顔忘身宜在諫官御史之选而再命分教复为纠曹十数年间不出温陵之境当时任引彙之责者於此不为无憾而公之不肯少屈以求合者至此益可见矣易曰介如石孟子曰柳下惠不以三公易其介公其有焉初台狱既就吕惠卿议当公大辟神宗曰侠所言非为身也忠诚亦可念岂宜深罪神宗圣明万无杀直臣理公每上书辄曰臣言不当乞斩臣首则进言之时公固先以死自处矣非知死必往欤自熙丰至於元佑至於元符至於崇宁宣和时事屡变而公介然如一非执一不迁欤博士议是?谥曰介【详见介公书堂】公未第时尝随父之官江宁得清凉寺法堂西偏一室闭户读书即从学王金陵时也後人名其所为介公读书堂嘉?十四年總領商公碩肖公像建祠於此【上梁文抗疏安上门天下共高其直节读书清凉寺主人首访於遗踪凜生气之犹存慨故家之无几乃即寒斋之旧聿严绘像之祠恭惟西塘先生介公学道欲如孔顔事君必惟尧舜官爵非所望岂法科书局之能招清俭终其身视美食华衣而若浼几叹旁观之好着要因所见以为图留英十年在泉三任虽困死流离之相继独

刚方劲正之不回嘿予龙期曾止朱塘之水宁忧蛇伏自安宝梵之居贯通神明始终真实
贬於元符而复官于崇宁之後追赠于绍兴而赐諡於嘉定之初时自为之屈伸我何有于荣
辱郑公坊里已表门闾瑞像阁前尚余履齿寻书卷酒瓶之地荐寒泉秋菊之盘堂上德容耸
万竹清风之劲橐中奏藁夺列星秋夜之光何妨半山老子之卜邻更许铁冠道人之入梦奉
使總领郎中挺然风韵同此襟期当飞刍挽粟之时岂专足食思立懦廉贪之士示不忘君壮
一拂之清高起百年之文献不特发此邦之秘亦可占斯道之兴爰举修梁载形善颂抛梁东
石头城插翠微中先生万卷高吟处尚忆寒斋雪衮风抛梁西书堂新傍五云低想像当年忠
义气碧霄秋日贯晴蜺抛梁南天外三山翠入檐法眼禅师休说法漏残书卷酒微酣抛梁北
坐挹空江烟水绿高风千古照人寒清凉何用潇潇竹抛梁上旧阁无人思瑞像使星家近郑
公坊独立西风怀卓行抛梁下日照朱栏凝碧瓦只将一拂振颓波定有同心来贺厦伏愿上
梁之後上知所学家有其书抱关勿卑于小官考盘当明於大义秋风凉殿徒怀江山草树之
悲昼日禅关共作亭檻松篁之想】

南轩先生祠【在天禧寺方丈後先生旧读书处也】

重修祠堂记人之生有此心则有此知尧舜之圣此心此知也夫妇之愚无以异於尧舜以天
而不以人则明以人而不以天则昏夫尊贤而贱不肖好善而恶恶此人之本心与生俱生天
理之自然也小人慢君子趋恶而违善此习之而不知人欲之使然也何以言之匹夫信义
行於里闾盖有盗贼斂干戈而过其间者烈妇毅然而不可夺世俗固有立祠宇以奉之者是
孰使之天寔为之人心之良知也降周迄孔至孟氏而道统不传天理几泯人心日晦由汉而
下上下下之间莫有任此责者至於宋尊道重德已见於削平肇造之初人心之善芽蘖此时其
後濂溪二程先生出而发圣贤之秘孟氏始得其传道统於是乎有宗中兴以来文公朱先生
以身任道开明天心南轩先生张氏文公所敬二先生相与发明以续周程之学於是道学之
升如日之升如江海之沛妇人孺子闻先生之名皆知其为贤譬之景星麟凤不以为瑞者妄
人也凡讲习之地皆有祠宇崇尚严洁足以啓人之敬仰百年之间儒风彬彬岂无自而然独
金陵天禧寺之侧有屋六七楹曰南轩寔先生习之地想其朝思夕惟参前倚衡天地之运化
圣贤之传授父子讲求乎尊君救时之策友朋发挥乎垂世立教之序关百圣而不违通万世
而无媿是轩也岂容使之荒芜而不治惜乎岁久希重道之士日就倾圯甚而春时为游宴之
所杲昨赘江淮幕犹扃闭空阁未至若今之狼藉心窃念之告之长而莫我聽近冒闕事欲因
旧而增新之比至殆不可举目於是命工治葺内外整齐绘先生之像於中使承学之士载瞻
祠宇尚想道谊人亡道存如将见之兴起良知有跃然不自已者呜呼间有当式者墓有当拜
者此轩之当新庸非守邦者之责尚冀来者之不忘也系之辞曰孟氏日远吾道日昏道之明
昏儒之疵醇学焉而疵韩董扬荀自时厥後疵亦靡闻我宋立极曰义与仁教风德雨太和蒸
薰笃生钜儒濂溪二程文公宣公道学中兴伊昔宣公诵学斯轩南轩之名与道俱尊胡未百
年栋宇摧倾今我来斯载瞻载饗亟命匠氏斩然一新有隆斯堂锵锵其门像图惟肖奠位妥
神遂使先师不窘暑寒牢體时荐觴豆序陈岂轩之新轩存敬存礧石琢词以告後人淳佑三
年七月丙子後学杜杲记

忠肃刘公祠【在蒋山东庵】

淳熙二年府境大旱留守刘公珙赈济有方民被其惠公去五县令共绘像祠之於蒋山东庵侍御李公处全作记资政殿大学士刘公尹建康之明年政治德洽恩施化行民有父母奠厥攸居江东之人咨嗟感涕谓自我宋混一区夏繇开宝迄今更牧守几人矣若张忠定之明张文懿之静包孝肃之肃傅献简之爱公寔兼之眎两汉循吏有加焉先是旱涝洊至岁弗顺成民将阻饥公夙宵勤劳罔敢自逸且惩近世习俗欺诞之弊乃悉具寔以告於上蠲租劝分賑廩辍漕凡可以惠荒政者咸推行之又虑商贾之或壅也复请诏上流郡县毋蘊年毋重征苟奉行弗得以禁利闻繇是大江而西巨舰连樯辐辏於东谷价以平民乃粒食无有转徙所活盖以百万计惠泽旁浹三邻赖以以免道殣叹息愁恨之声为易欢謡休绩升闻天子叹嘉亟赐褒诏以倡九牧藏在盟府公拜手稽首扬言曰允修政谨备以御水旱加惠于元元俾得事父母育妻子皆陛下之仁之明幸留听臣言故臣得竭其区区效万分一以出斯民於沟壑系天地父母不赀之施臣何力之有焉贪天之功以为己力臣寔恐惧故勒琬琰庸侈上赐庶几激愷吏之不在民者又以周宣王之事见於云汉车攻吉日江汉常武之诗者反复申戒欲使中兴复古之盛见於今日士大夫然後益信服公忧国爱民其心本於至诚非夸世邀名者昔汲黯使河内河内贫人伤水旱万余家或父子相食黯以便宜发仓粟以賑贫民请归节伏矫制罪武帝虽贤之然终以为戇且妄发不果用先正韩国富公弼自政地以谗出藩其在青社河朔大水民流京东韩公劝民出粟得十五万斛益以官廩营公私庐舍十余万区散处其人以便薪水立法简便而周至活五十万人募而为兵又万余人以不善处嫌疑地尤之韩公曰宁以一身易数十万人之命不悔也其後韩公卒相仁宗辅政三世为宋宗臣较之汉武帝所以处汲黯者远矣公以宥密之旧望临一时文能拊衆武能威敌天下所待以致太平於朞月之间拥枢机坐庙堂为天子经营四方复两河归輿地图不动声气措万世於泰山之安公之任也迺今年三月制诏进公观文殿学士上用公之意方隆江东之人惧公之归而不得见也属邑五大夫知上元县赵君公崇知江宁县赵君伯涣知溧水县司马君僖知溧阳县周君世修知句容县朱君光弼因民之愿欲绘公像於蒋山精舍公禁之不可又相率以书抵处全而告以大畧如此且曰公朝夕相天子则无一物不被其泽岂惟江东然吾江东之人德公也深不止其身又及其子孙思欲家至而日见之饮食必祝将不获如都人旦旦望衮衣於衢路也则非留公像不可公虽欲逊善而辞名奈违衆何吾子於公場屋诸生也盍书之处全复於五大夫曰此固公之所甚不欲公诚朝夕且入相布德和令治盛功隆竹帛纪之鼎彝铭之则公之像冠烟阁云台之上矣於此乎何有虽然邦人拳拳爱慕之意则可嘉已其敢辞不名所以褒美政崇大臣褒美政则臣工劝崇大臣则帝室尊有唐故事也抑千百世之下岁月犹有考焉请以书於石五大夫皆曰唯乃系之以诗曰大江之东鍾山石头虎踞龙蟠帝王之州行阙峩峩翠凤鵠鵠其民夥繁事亦浩穰显允刘公文武咸宜帝曰钦哉往抚朕师公自湖湘植纛建牙扬舲东来兵卫无譁公既开藩童耄欢呼剔蠹锄奸恤茆抚孤饥饉适臻公弗遑宁剡章以闻荒政是营谓昔尧汤水旱莫怨民之母馁维备先具既蠲赋租既发贮储舳舻万艘衔尾而俱市有余粟民无菜色洋洋颂声载彼阡陌民昔未饱公弗安寝今含哺嬉公始高枕帝用嘉奖锡公玺书乾文晋如玉音铿如明明在上公避不有於赫丰碑光气冲斗帝御正衙一日万机袞职有阙谁其补之金节煌煌行趣公朝公朝京师四夷寢谋帝曰於戏汝为直儒汝社稷臣其遂相予公居庙廊明堂孔阳曰都曰俞帝垂衣裳清庙崇崇羣后雍雍鼓钟笙簧告时成功一人万年公执魁柄肖貌在堂邦人之庆记成於丁酉之冬而碑石褊小未及刻明年公薨邦人思之益切谓登岷首而堕泪者有碑故也住山祖庆既易兹石俾处全并书之淳熙八

年岁在辛丑四月丙午朔朝奉大夫李处全【阙】

景定建康志卷三十一

卷三十二

<史部,地理类,都会郡县之属,景定建康志>

钦定四库全书

景定建康志卷三十二 宋 周应合 撰

儒学志五

贡士

解额

晋元帝初制扬州岁举二人【先是以兵乱务存慰悦远方孝秀到不策试普皆除署至是帝申明旧制皆令试经有不中举者制刺史太守免官太兴三年孝秀多不敢行到者托疾】宋制丹阳郡岁举二人【凡州秀才郡孝廉至皆策试天子?亲临之及公卿所举皆属於吏部序才铨用凡举得失各有赏罚失者其人直加禁锢年月多少随辜议制武帝为晋相国时尝申明旧制依旧策试】

隋制蒋州岁贡三人

唐制昇州岁贡三人【有才能者无常数】

本朝中兴初建康府解额一十名绍兴二十六年增为一十一名【绍兴通用贡举格建康府解额一十人及準绍兴二十六年二月七日指挥节文西北流寓东南可将二十三年各州土着进士终場人数计若干取一人谓如某州解一千人就试终場一百人解一人之类当年解就试流寓终場人数每多土着人分数即添解一人或零分流寓人少去处依土着人十分为率三分亦解一人谓如土着人每百人解一人其流寓人就试零三十人以上亦解一人之类若以後解秋试人多不得过二十六年所取人数续据乡贡进士李伊等四十二名状乞将流寓土着士人绍兴二十六年二月七日指挥混试本府取放一十一名本府遂申尚书省并礼部乞赐施行回準省割指挥节文寻行下国子监勘当得本府所申既流寓人与土着人混试逐举取放一十一人割付本府照应】端平元年守臣奏以建康行阙之重请比临安府恩例特与增添解额八月十日奉圣旨建康府解额特增两名共以一十三名为额

贡院

建康府贡院在青溪之南秦淮之北即蔡侍郎寬夫宅旧址也乾道四年留守史公正志建熙三年留守余公端礼修而广之嘉定十六年端礼之子嵘为守撤而新之陈公天麟杨公万里尝为记

重修贡院记古者自京师至於乡邑皆有学自秀士至於进士然後官使之考王制之所载士未始不出於学也後世学校科举之法并行以学校养士而以科举取士养之取之各异其所羣试州里拔其尤者与计偕又羣试於春官故自京师至於郡国莫不有取士之所焉士方集有司设案主司而下下堂 拜焚香肃士就位则礼闈之设虽近沿唐制亦所以贵进士之科而不敢苟也於古何戾哉建业多士异材辈出曩有魁羣儒首异科而为名公卿者项背相望也故其後子弟益自勉应三岁之诏者常数千百人兵兴百事卤莽有司不暇治屋庐以待进士始夺浮图黄冠之居而寓焉郡凡几守率置不问或告之则曰此非吾之所急也史侯自天官貳卿出镇之明年诸生以是为请而其故基为间阎营舍者四十年矣侯慨然念之指地而易其居捐金而偿其迁筑之费取羨余之木为屋百有十楹适它郡潦伤民流移江上侯因募之使食其力不足则助以廩卒经始於季夏中休竟事於中元是岁乾道四年也面秦淮接青谿挹方山气象雄秀侯集宾客而落其成揖诸生而告之以进德修业之方荐绅韦布之士作为歌诗以赞其善且曰侯於吾建业之士至矣愿求文以识其功侯因以属予予为之言曰世之为吏非通材不济也欲兴利起废无经画於事之先则缩朒而不敢为不然则不恤财之匮民之勤而惟吾有司之事是集是亦安取於吏也侯通儒也於书无所不读於天下之事无所不悉故是举也国人不及知而办於咄嗟之顷其它拨烦济剧率称是与其核寔而浮名饰外而遗中本末首尾衡决倒植而兴学校益庖廩谓之崇儒证辞於民则曰独奈何厉我勤是不急为者其当戾何如也於戏侯亦贤矣哉自兹取巍科登显仕追迹耆旧皆侯赐也建业之士勉之侯名正志字志道丹阳人十一月旦左朝散郎充敷文阁待制知镇江军府事宣城陈天麟记左承议郎通判建康府事姑苏严焕书左朝请郎直显谟阁权发遣江南东路计度转运副使公事浚仪赵彦端书额

又记金陵六朝之故国也有孙仲谋宋武文之遗烈故其俗毅且英有王茂弘谢安石之余风故其士清以迈有鍾山石城之形胜故其地为古今之盛有长江秦淮之天险故其势扼南北之要冲地大才杰而官府事物独庳且隘顾可谓称矧是泽宫古以择士公卿大夫是之自出而为屋才百其楹岁陁月隕至者千人项背骈臻至纬葭为庐架以苍簣雨风骤至伛僂蔽遮仅全文卷绍熙二年春三衢余公自刑部尚书除焕章阁直学士寔来居守幕府肇啓一新百为劬躬疚怀于夙于夜仁声义贯允洽毗庶文令武竞兵戎载肃靡政不葺靡敝不革孚於九郡水顺雪释一日庠序诸生秦晋等充庭果以为请公即命驾率属往而相攸则见藩拔级夷栋折榱倾廩廩将压顾谓治中廖君侯曰斯邦斯士而延以斯庐不湫隘否不简陋否其宜称否迺彻厥旧迺图斯新意匠是断画堵是度栋桷崇崇柱桷奕奕率眡旧贯盖四之一考官有舍揖士有堂爰廊四庑爰拱二掖可案可几可研可席堂之北墀中闌以南前後仞墙内外有闲自闌之表緘封之司写书之官是正之员左次右局不淆不并会为门关启闭维时职谁何者於此攸宅凡二百一十有二楹自堂徂庭自庭徂门自门徂裔皆璧其地土之集者霁则不埃霖则不淖经始於是岁冬十一月八日明年春二月廿三日落之其费凡为缗钱一万一千为米斛六百木一万一千章竹一万四千个甃瓦六十万三千枚云公属予记其役予谿於诸

生曰公之於諸君不薄矣今茲歲當大比諸君徠試于斯盍亦?長江以為泓操三山以為觚以
寫胷中王謝康濟之長策以答鍾山草堂之英靈毋抗毋諛毋諛毋怵以毋負余公延佇之至
意公名端禮字處恭中奉大夫直龍圖閣權江南東路計度轉運副使廬陵楊萬里記并書

轉運司貢院舊皆寓試僧寺嘉定九年真文忠公德秀始建貢院于青溪之西【是歲習庵陳
壩首冠漕闈明年為禮部進士第一】常平提舉李道傳為記

初建貢院記國朝之制諸路置使按察各有職掌轉運使最先置所掌最多提舉學事既省又
兼掌學校貢舉事間三歲詔諸州各試其士升之禮部士與為吏者親嫌則偕已仕而鎖其廡
者試於轉運司江東地大人衆才雋間出數十年間由轉運司之試擢高科登貴仕者數數有
之顧試院未克立每寓於浮屠者之宮庠隘弗肅有司患焉前使者汲郡孟侯獻始度地於建
康府城之東南隅廬陵胡侯擢以總領財賦兼攝使事稍儲錢以俟費它未皇也嘉?八年秘閣
修撰建安真侯德秀為副使至則曰是不可以不成于是相其陰陽正位南鄉筑而增之其崇
五尺背負鍾山前直長干清溪環流秦淮旁注寬閑爽塏不僻不?於校文論士為宜九年三月
戊寅命工興事二十日而堂成又十日而听事成修廊繩直表里相望外而羣執事之吏各有
役局七月丁卯工告訖事侯謂道傳盍記之道傳竊惟近世取士之制每不如古專尚詞章而
德行道藝之實喪多為文法而廉耻禮遜之節壞世人病之學廢而詞益下俗澆而網益密
雖上之人亦竊病焉捷其徑以誘之於前艱其門以塞之於後使為士者棄鄉井走道路無復
懷寶待賈之意又識者所深病也學古行道之君子思救其弊考古之意酌今之宜使教學興
風俗厚賢才出治功着其規模條目本末先後必有可言者然豈有司所得為哉若夫合圓
冠方屨之士以校其藝曾無定處而反托於異教之廡事益苟名益不正此則有司所得為者
是役也侯蓋為所得為而已學古行道侯之素志所謂考古之意酌今之宜以救歷世之弊者
其必慨然於此矣夫豈特以高科貴仕望江東之士哉侯正色立朝風采聞於四方奉命出使
專以激濁揚清洗冤澤物為已任歲適大飢民賴以全活者不可數計斥燕饋削浮冗獨以余
力克興是役材無強賈庸必厚給田里不知州縣不與是皆足書道傳既承侯命因推古者
取士之意平日所望於侯者備論焉院為屋余百五十楹錢以緡計者萬四千有奇董其役
者主管文字趙與慤嘉定九年七月日朝散郎提舉江南東路常平茶鹽公事李道傳記
寶謨閣直學士中大夫知池州軍州兼管內勸農營田使鄒應龍書端明殿學士正議大夫
簽書樞密院事兼太子賓客曾從龍篆額

府學賑送規約契勘本郡士子率多清貧每當賓興上南宮者以裝齎為苦今學校創置房
楹專充賑送條具如右【賑送數目并月銅錢】

一置到房廊各有赤契及總簿該載

一收到賃錢專委直學一員拘樅別項桩管如遇官放須契勘所放日分等第錢數月終轉
結簿歷取兩教授花押

一賑送鄉舉發解各五十千免解者半監漕國子發解各二十千免解者半武舉發解各二十

千免解者半宗子应举发解宗学发解各二十千锁应十五千取应减半过省各二百千自太学过省及舍法免省者半武举过省各一百千自武举过省及舍法免省者半宗子应举过省宗学过省舍法免省各四十千鎖应三十千取应减半补入太学各一百千入武学者半入宗学者又半

一本学赉送贡士系於使府劝驾後一日就公堂设醴面致赉金庶无减尅之弊

一此项钱专为赉送本府士人唯特恩人不送试入前名赐出身照过省例续送如有时官流寓宗室过往举人并不支送

一已受赉礼人因事不能成行或至中涂而旋者并将元钱回纳如果执留申府拘理或身到行在寔有事故不能入试仰同赴试人保明免行回纳

一置到房廊或有损坏即支本色钱修造明置文历不许虚破

右具如前永宜遵守事力未裕姑立大纲增广前规尤有望於来者

记云金陵大都会六朝风流未远我宋淑人心以道德翕然尽归醇厚中兴南渡天蹕驻临行阙迢嶢龙盘增秀光涵玉井瑞产金莲距今百年人物鼎盛魁杓联耀益大彰明端平初元皇上嘉惠陪京增贡士额登名天府者十三人嘉熙改元诸生请援京师例到省郡复上其事於朝剡奏朝腾俞音夕播士鸢飞鱼跃莫不舒翹扬英奋迅功名之会郡教姑孰陶公炽诱掖後进以明道书堂拨入岁租易金市屋日僦月储为贡士资既而盱江孔公圣义同掌教席相与翼其成与计偕者遣送虽各有差踏梅江岸观国之光皆得以壮行色春风橐龠吹嘘成就者为多是举也真乡邦无穷盛事嘉熙改元十一月朔郡人从政郎宜差充蕪州州学教授吴葢记

本府劝驾於贡院揭名一月後就设厅开鹿鸣宴凡本府新旧文武举及漕司新举人皆预焉津送有差本府正请士人每员送十七界会子三十贯文折緑欄过省见钱一十贯文七十八陌酒四瓶兔毫笔一十枝试卷割纸四十幅点心折十七界会子一十贯酒一瓶特送十七界会子一千贯文

江东漕司正请官员士人除漕司津送外本府每员送十七界会子三十贯折緑欄过省见钱一十贯七十八陌酒四瓶兔毫笔一十枝试卷割纸四十幅点心折十七界会子一十贯酒一瓶

淮郡附试正请士人每员送十七界会子三十贯折緑欄过省见钱一十贯七十八陌酒四瓶兔毫笔一十枝试卷割纸四十幅点心折十七界会子一十贯酒一瓶特送十七界会子二百五十贯文

本府免解士人每员送十七界会子二十贯【府学前廊增十贯】酒二瓶点心折十七界会子一十贯酒一瓶特送十七界会子五百贯文

淮郡免解士人每员送十七界会子二十贯酒二瓶点心折十七界会子一十贯酒一瓶特送十七界会子二百五十贯文

重建建康府贡院大使马公光祖任内建康府贡院在清溪之南创於绍兴初年修於嘉定癸未自後率三岁一葺因陋就简牵补目前试已则借占躡踐靡所不有殆弗止撤藩篱毁薪木而已屋既倾欹地又卑湿懔乎有覆压之虞咸淳丁卯诏岁大使亲即其所爰究爰度悉命撤而新之鳩工聚材筑基崇址宏壮爽垲视昔迺庭厅事之後为堂三间扁曰衡监翼以考官位次薇堦莲沼前後相辉供帐什物百尔具备试場旧止四庑衆以为隘乃即西偏辟地数百弓添翔两庑为屋共二百九十四间庖湔守视之所罔不整洁又仿金华诸郡例置长卓钉柱间闾三门以来多士中门之外设弥封交卷誊録对读所各有司存井然不紊栋宇翬飞与正厅埒始置鎖钥属府学董之规模於是乎详密矣自是年四月日兴工讫五月竣事不月而成民不知役共糜钱十八界一十三万三千八百九十五贯有奇米一千五百五十石他物从官给者不与焉右史冯公梦得为之记云皇帝嗣位越三年二月初吉诏天下郡国以士来贡若曰宋德当天奎聚五纬文明景运实此乎开维兹岁行适合维予一人祇见先圣阐道立教聿兴斯文维躬用劝维尔多士懋旃於是建康府新作贡院成留守大制使观文马公以书谕梦得曰维此文闡乾道立之紹熙辟之嘉定葺之今又四十有五年每莅校比有司取具目前猿狙之杙侏儒之柱苦盖櫟局谓是则苟而可老屋岌岌不任风雨垫隘湫底爽气弗集笈负而至者外捷内躓僂焉惧寘?之及殆非所以使之簸羽翮而吐铍轰也以吾为守长於斯而是之弗虑弗图母已闕乎乃鳩工虑材培卑而崇拓隘而广规画褰举再阅月亟溃於成而人未始知有役国家之贤才自出多士之气数攸关可无文字以觉久远子盍为我记诸梦得尝考宾贡之制自周迄唐其意寢以荒失未尝不慨古之士贵以肆而後世之士不然也夫宾士以礼而乡射行焉所谓揖让而升下而饮其雍容和衍之气象何如哉逮至束缚检约围棘重重寒庑单席如唐人所云者则偪介已甚於古意无复彷彿矣我朝以儒立国三岁大比考其德行道义之法虽未能纯用周制而兴贤兴能使长使治其意亦何以异於周六飞渡江王气聚於东南而金陵首当其会警蹕驻焉地载神气风霆流形采芑新田润泽丰美是开中兴以来无穷之用圣天子垂意文治烝我髦俊制诏一下遐不作人嶮嶮陪都视周丰镐所谓庶物冯生文武之德有衍未艾也居留重臣用克知於德意共明命而厚同气有开必先夫岂偶然前五十年文忠真公将指转输始作漕贡院於是邦越明年即有冠南宫者维马公之学源流真氏故知所崇尚类如此昇本多奇士加之以新大之会扶摇天飞志气固应倍百嘉定数闈得士之盛吾知其殆有过之公三至玉麟十年之间揆教奋卫兴补润赖之绩不可选纪而於是役尤汲汲焉公之盛心盖可知矣梦得於授简之辱用次第其说以笔受而不复以不文辞若夫山川之美方隅之吉面势之宜旧记具焉不书役用材植金谷几何非见属之大指亦不书公在先朝尝贰枢庭名字系出天下尽知之学士大夫尊之皆曰裕斋先生云是岁为咸淳三年四月甲子朝散大夫太府少卿兼权直舍人院权直学士院兼侍立修注官冯梦得记朝散大夫新除军器少监兼权国子司业兼权直舍人院兼景献府教授林应炎书并篆盖

进士题名

庆历二年 张识 张谔

熙寧九年 杨之道 巫钺

江适道 潘温之

绍圣元年【毕渐榜】 许之美

崇宁五年【上舍及第】 余? 蔡敦礼

崇宁五年【蔡薏榜】 宋昇 秦济

大观元年【上舍及第】 段拂

大观二年【上舍及第】 霍廸

政和二年【莫俦榜】 俞迎 朱天任

钱时敏

政和四年【上舍及第】 陈鸢

政和五年【何?榜】 秦桧 范同

政和八年【嘉王榜】 朱端彦 朱慮

徐时升

宣和三年【何涣榜】 魏良臣 朱元佐

陈秉成 鍾大方

宣和六年【沈晦榜】 何若 秦梓

建炎二年【李易榜】 钱周材 吴?

王绛 戴巽

李朝正 赵震

张士襄

绍兴二年【张九成榜】 潘祺

绍兴五年【任应成榜】 王纶 朱端稟

绍兴八年【黄公度榜】 巫孝立 鲍同

巫汲

绍兴十二年【陈诚之榜】 秦熺【本第一甲第一人为宰臣辞免降充第二人为系省试上十人合升甲与还第一人恩例】

秦昌时 秦昌龄

苗昌言 江汉

魏元若

绍兴十五年【刘章榜】 李瑄

绍兴十八年【王佐榜】 魏师逊 锺离松

周彦 江宾王

鲍慎履

绍兴二十一年【赵逵榜】 汤彦升 巫孝恭

庄震

绍兴二十四年【张孝祥榜】 秦垠【第一甲第三人为系两府亲属依第一人恩例】

秦焯 秦焞

葛揆 赵公彬

绍兴二十七年【王十朋榜】 陈自修

乾道二年【萧国梁榜】 李机

乾道五年【郑侨榜】 刘炜 沈监

乾道八年【黄定榜】 钱閼 夏融

淳熙五年【姚顗榜】 梁文恭 张衡

淳熙八年【黄由榜】 张逢辰 吴柔胜

何掞

绍熙元年【余复榜】 刘枢 戴錡

耿戡

绍熙四年【陈亮榜】 孔盖 李岩

李大同 李琦

李秀寔

庆元五年【曾从龙榜】 汪瀛

嘉泰二年【傅行简榜】 卞伯光 成灋

胡景愈 郑震

嘉泰三年【上舍及第】 卫燾

嘉定四年【赵建大榜】 王晋 郑南

王辽

嘉定七年【袁甫榜】 吴渊 朱应龙

潘彙征 李芥

嘉定十年 状元吴潜

嘉定十三年【刘渭榜】 杨成大 沈先庚

嘉定十五年【上舍及第】 许思齐

嘉定十六年【蒋重珍榜】

绍定五年 元宋兴

嘉熙二年 陈熙

淳佑元年 胡景龙 吴起潜

淳佑四年 卞文显

淳佑七年 吴琪 包秀实

陈晟 陈昂

淳佑十年 洪心会 吴庆龙

傅文振 李□

宝佑元年 潘孜

宝佑四年【文天祥榜】 吴景伯 李仲龙

朱文德 吴璞

开庆元年 张震龙 朱绍远

平天佑

景定建康志卷三十二

卷三十三

钦定四库全书

景定建康志卷三十三 宋 周应合 撰

文籍志一

文籍生於伏羲世久益繁凡治乱安危成败得失其理着於经事具於史议论感慨发於文章居今知古赖此耳孔子观夏殷之道徵之杞宋文献而不足韩宣子适鲁见易象与鲁春秋曰周礼尽在鲁文籍盖观国之所重欤究其所以始验其所以终法其所以得鉴其所以失必善用文籍者而後能用其国耳皇朝初平江南得书六万卷盖南唐以前有其书而不能用天锡我宋而善用之书非徒书矣武惠王曹彬策勋而还?宝无所取满载皆图书武帅读书固艺祖皇帝之所深勉况文人乎公卿大夫士读其书而用其书见之行事则忠孝大节追配前古着之言辞则诏今传後皆有补於世道今以建康所存之书序列於前其锓梓者次之刻石者又次之若历代文章之有關於建康而散见於诸帙者又选而梓之非曰夸富於文籍庶有可徵之文献云作文籍志

书籍

皇朝开宝八年平江南命太子洗马吕龟祥就金陵籍其图书得六万余卷分送三馆及学士院其书雋校精审编秩全具与诸国书不类雍熙中太宗皇帝以板本九经尚多讹谬重加刊校史馆先有宋臧荣绪梁岑敬之所校左传诸儒引以为证祭酒孔维上言其书来自南朝不可按据章下有司检讨杜镐引贞观四年勅以经籍讹舛盖由五胡之乱天下学士率多南迁中国经术寢微之致也今後并以六朝旧本为正持以诂维维不能对天圣七年丞相张士逊出守江宁建府学奏请於朝全赐国子监书绍兴初叶梦得为守尝求周易无从得盖当大兵之後旧书无复存者梦得乃捐军赋余缗六百万以授学官使刊六经後七年梦得复至询汉唐史尚未有又捐公厨羡钱二百万徧售经史诸书为重屋以藏名之曰紬书阁而着其籍於有司後阁毁於火籍与书皆不可见至绍兴十六年高宗皇帝亲书九经及先圣文宣王赞刻石於国子监首以石本赐建康今藏於府学之御书阁而经子史集之仅存者皆附焉景?二年留守马光祖念文籍之阙复求国子监书之全以惠多士

御书石经之目

周易三卷 尚书三卷 毛诗四卷

周官一卷 礼记一册 春秋经传十五卷 孝经一卷 论语二卷 孟子五卷

文宣王赞一卷 乐毅传一卷 羊祜传一卷 经书之目【以下两学见管】

周易二十六本【监本正文 建本正文 监本注 监本注疏 建本注疏 正义 大传系义 约说 易索 或问 太玄集注 监本程氏传 婺本程氏传 伊川系辞 横渠解 朱氏解 麻衣解 十先生解 胡先生解 沈丞相子传 监本义海 龚氏解 了斋解 刘教授解 婺本义海】尚书二十四本【监本正文 建本正文 婺本正文 监本正文 建本正文 建本注疏 监本注 胡安?解 东坡解?公解 张博士解 史教授断 罗氏解 陈氏解 吕伯修解 孙曾解 刘博士解 萧先生解 疑难集解 羣儒解 石林解 吴才老解 新注 治要】毛诗十三本【监本正文 建本正文 监本正文 建本正文 监本注 建本注疏 婺本注 吕氏读 诗记 欧阳义 颖 滨解 总义 意义】周礼七本【新经 监本正文 建本正文 婺本正文 监本注 建本注 婺本注 监本】礼记二十二本【正义 监本正文 建本正文 婺本正文 监本注 监本正文 音义 监本 仪礼 建本 仪礼 仪礼 正义 仪礼疏 中庸 大学 中庸 大学解 中庸 约说 中庸 大学 广义 无垢先生 中庸 大学 说大学 衍义 中庸讲义 礼象 三礼图 中庸 大学 集义】春秋二十七本【集畧 少仪 列传 监本 正经 监本注 上下经 春秋 年义 监本 左传 建本 左传 左传 正义 注疏 监本 公羊 正文 监本 谷梁 正文 监本 公谷 二传 公羊 正义 谷梁 正义 春秋 释文 伊川传 胡氏传 春秋 辨疑 左传 法语 春秋 释例 春秋 纂例 经典】左氏摘奇【释文 左传 事类 名臣 传西畴】

孝经十二本【解师先生 解监 本国语 监本正文 古文 监本正文 郑康成 注唐明皇】范侍讲【解 古文 指解 二程 师说 解二】

论语三十一本【老指解释 文刊误法 语 监本正文 川本正文 监本注 监本正文 建本疏 程子解 伊川说 龟山解 朱子集注 朱子详说 朱子语类 东坡解 颖滨拾遗 谢上】

【解 范学士 解南轩 说葵轩 解汪省元直解 施景明解 洪氏解 曾文清 义文】

【莹解 释言 义原 集义 十说 大意 诸】

孟子十四本【儒集义 集略 监本注 建本注 川本注 朱子集注 朱子要畧 张无垢 拾遗 三山解 文莹解 王博士解 五臣注 直讲】史书之目

史记 古史 国语 战国策

前汉书八本【晋之解 诸儒 集义 集畧 纪志 表传 法语 字类 博】後汉书六本【闻发挥 史评 荀悦 汉纪 史编 纪志 表传 法】三国志 晋书 宋书 南齐书 梁书 陈书

隋书 魏书 北齐书 周书

唐书十三本【语精语 博闻 袁宏 汉纪 白虎通 旧唐书 新唐书 六典 会要 发挥 纠谬

摘寔】

五代史 历代制度 编年通载 七制三宗

史传论 十七史赞 十七史蒙求 通典

资治通监【论断 唐监 音训 郑节 吕节 政要监本蜀本建 本外 纪举 要朱
子纲目纲】 皇朝圣政 三朝宝训 垂拱龟监

续资治通监长编【全本节本】 稽古编年 隆平集

子书之目

孔子家语【监本建本】 曾子 周子【通书 太极图解】 程子老子 庄子 荀子 扬子
文中子列子 抱朴子 孔丛子 管子 鶡冠子 淮南子 刘子 尹文子 商子 公孙龙子 韩子
邓析子 杜牧之注孙子 扬子法言道德经注【王弼 司马公】 十一家注孙子
太玄经施子美七书解 墨子 南华经释文

理学书之目

濂溪集 程氏遗书 伊川集

横渠集 正蒙书 司马温公家范温公居家杂仪 温公书仪 武夷先生集胡子知言
晦庵大全集 朱文公语类朱文公语録 朱文公感兴诗 朱文公小学之书朱文公年谱
晦庵东莱学规 南轩先生集

张宣公语类 东莱集 吕氏乡仪

诸儒鸣道集 十三朝言行録 近思録

修学门庭 书堂讲义

文集之目

先秦五书 楚辞集注 文苑英华

扬子云二十四箴 渊明集

梁昭明集 文选 唐文粹

张曲江文 韩昌黎文 柳柳州文

陆宣公集 陆宣公奏议 颜鲁公集

李卫公集 李太白集 杜工部集

樊川集 独孤集 李翱文

蔡邕独断 夷白堂集 长庆集

李文公集 皇朝文监 富郑公奏议

乖崖集 六一公文 秦少游文

陈了翁文 范太师文 胡澹庵集

范文正公集 临川文集 南丰集

陈无已集 范蜀公集 范蜀公奏议

嘉佑集 徂徕集 宛陵集

老苏文 三苏文 东坡大全

曲阜文 华阳文 苏魏公文

李泰伯文 忠惠集 节孝先生文

龙溪文 岩谷文 马子才文

五溪集 豫章集 栾城集

胡文恭集 骨鲠集 忧五集

唐先生集 大名集 金氏文集

吴使君集 南阳集 鄱阳集

斜川集 好还集 欧阳四六集

涵水集 徐公集 青山集

潜山集 横塘集 毛泽民集

毗陵公集 强祠部集 道院集

巴东集 广陵集 忠定公集

番江集 杨诚斋集 鹤山集

京口集 南州集 庐山前後集 张文昌集 见一堂集 东湖居士集

东牟集 东窗集 盘洲集

庆历集 陈止斋集 文海

姑溪居士集 青山集 陈侍郎奏议 邹忠公奏议 范忠宣公弹事 谏垣集

经纬集 韩魏公谏藁 范忠宣公国论 张公奏议 定庵类藁 竹轩杂着

范蜀公正书 谕俗编 百家诗

东坡诗 李嘉佑诗 李商隐诗

喜雪诗 曾使君诗 神秀楼诗

瑞麦诗 梅山诗 极目亭诗词

集韵 杜诗押韵 张孟押韵

救荒活民书 璜宫杂着

图志之目

三礼图 释奠图 指掌图

九域志 江行图 水经

麟凤图 元和郡县图 建康实録

乾道建康志 庆元建康志 景定建康志诸郡志【镇江 姑孰 四明 嘉禾 东阳 庐山拾遗】
四明乡饮图类书之【目】

艺文类聚 白氏六帖 皇朝类苑

翰苑羣书 记室新书 四时纂要

事物纪元 世说新语 世说叙録

太平广记 初学记 职林

说苑 职官分纪 四库闕书

书林 千姓编 文章缘起

绀珠集

字书之目

礼部韵略【监本建本】 广韵 玉篇

经典法帖 文公法帖 九经字樣

班马字类 许氏说文 说文解篆类语

字宝 韵谱 埤雅

佩觿集

法书之目

刑统 三省总括 绍兴令

绍兴勅令格 绍兴勅令贡举 御试省试勅令绍兴刑统 太学勅令

医书之目

神农本草 黄帝素问 大观本草

图经本草 本草单方 太平圣惠方 膏肓灸经 铜人灸经 卫生方

治风药方 备急药方 养老奉亲书 小儿药方

书版

横渠易说一百六十八版 易象图【阙】

易索一百四十五版 周易终说一百二十版 李公易解二百八十版

学易蹊径一千五百版 礼记集说四千六百版

春秋讲义三百一十版 春秋纪咏四百九十三版 语孟拾遗一十九版 东坡论语一百二十版

论语约说三百二十版 孝经集遗一十九版 程子一百七十九版 近思录二百六十版

小学之书二百一十版 朱文公年谱一百二十版 师说一百五十四版 四家礼范一百五十版

释奠通祀图三十五版 诸史精语七百三十版

通监笔义一百五十五版 建康实录七百四十版

六朝事迹二百三十版 乾道建康志二百八十版

庆元建康志一百二十版 景定建康志一千七百二十八版

皇朝特命录四十五版 翰苑群书二百五版 集贤注记六十一版

文昌杂录九十二版 东观余论二百一十版 富文公赈济录六十二版 救荒录一百八十六版

活民书一百七十六版 唐花间集一百七十七版

重编楚辞五百七十版 杜工部诗五百一十版

少陵先生年谱六十八版 金陵览古诗三十五版 金陵怀古诗八十五版 庄敏遗事三十二版

棠阴比事五十六版 松漠记闻四十五版 江行图录六十五版 张公奏议二百六十版

李公家传一百四十五版

保庆集一十九版 清晖阁诗四十六版 輶轩唱和三十一版

和晏叔原小山乐府二百四十六版

寒子山诗六十八版 苏氏道德经八十八版 大一醮式三十二版

产宝类要一百七十五版 小儿保生方五十一版

钱氏小儿方一百四十五版

张氏小儿方二百一十版 海上名方六十五版 余山南昇果二十二版

西山先生心政经九十六版

半山老人絕句三十八版

西山先生文章正宗一千九百九十六版

选诗演义七十三版

余山南南轩讲义三十五版

余山南读易记六十五版 伤寒须知二十六版小儿疮疹论方二百二十版

石刻

皇朝御书御制诏令碑刻已錄第四卷

前代近代诸墓碑已载各墓下

秦始皇东游颂德碑 胡亥东行诏书碑

西汉东平赳王庙记 溧阳长潘元草校官碑

吴大帝封禅碑 後主纪功三段石碑太极左仙翁葛公碑 晋元帝庙碑

礼乐羣英三十六像 太傅谢文靖公白碑

都督谢公庙碑 卞将军石柱

忠臣孝子碑 卞公忠烈庙碑

忠贞公祠堂碑 顔氏大宗碑

顔府君碑 维摩居士像碑

王羲之书兰亭记 王羲之书乐毅论

冠军将军史爽石柱 盘白真人李僊公碑

子隐堂记 兴严寺塔记

宋昭灵沈襄王庙记 齐尚书令巴东献武公碑

海阳三碑【谢朓撰】 梁萧武帝寺记【在鹿苑寺】 始兴忠武王碑【徐勉造在黄城村】
司空安成康王碑【刘孝绰撰】

永阳昭王碑【徐勉撰】 临川靖惠王碑

吴平侯萧公碑 建安敏侯碑【在淳化镇】

梁都承旨题名碑 许长史旧馆坛碑

梁宣帝明帝二陵碑 九锡碑

太元真人司命茅君碑 陶隐居帖【玉晨观】

义和寺额【梁昭明太子书】 草堂法师碑

司徒鄱阳忠烈王碑 华阳宫记

陈景阳宫井栏题刻 陈宫石井栏记【苏易简撰】 赵知府题栖霞寺山天开岩诗

王给事栖霞寺诗 摄山栖霞寺诗碑

隋平陈碑 隋朝律大师碑

唐明徵君碑【高宗御制在栖霞寺】 唐重建蒋山开善寺记

神霄宫铜钟文 华阳颂碑

紫阳观王先生碑 陶隐居碑【邵陵王萧纶撰】

崇禧观碑【唐三拾遗孙处立文】 灵宝院碑

华阳洞唐玄宗授上清籙碑

禁山碑【在玉晨观】

句容县令岑公德政碑【张景毓撰】

方山洞玄观勅还钟碑 玉清观回等碑

下泊宫记【黄洞元撰】 贞白先生碑【邵陵王萧纶撰】

祠宇官白鹤庙记 玄静先生广陵李君碑茅山紫阳观玄静先生碑【柳识撰】

玄静先生勅书碑

三洞景昭大法师韦君碑【陆长源撰】

崇玄圣祖庙碑【李德裕建】 孔子尹直父赞皇公三碑孝子张君纪孝行铭 孝子旌表碑赞

茅山孙尊师诗碑【李德裕文】

题陶隐居铭葛僊公碑青玄观九天使者功德殿记【贾穆撰】

宣州漂阳县承僊观玄宗先生碑

卢大王庙记 重换目空庙殿记

祭酒史公仲谟碑【贾曾文】 瀨水贞义女碑【李白文】 潘城寺碑

礼部侍郎刘府君神道碑【裴度撰】

白府君铭【从侄居易撰】 贞索先生碑【徐铉撰】

紫阳观碑【徐铉撰】 许长史月井铭【徐铉撰】 玄博大师王君碑【徐铉撰】

五云观碑【晏殊撰】

昇直王先生諡赠碑 百福寺铜钟碑

佛窟寺碑【孙忌撰】 多心经碑

蒋庄武帝庙碑【徐铉撰】 张长史千字文碑

溧水顔鲁公叙 永僊观宗先生碑

李白凤凰台诗碑 句容修夫子庙记【开元十一年】 吴郡孝子张常洧庐墓记

李太白赞宝公画像

顔鲁公祠记 来贤亭诗

融师塔记 重兴隐静院记

福兴寺碑 祈泽寺碑

本业寺记

伪吴兴化院铸铜钟文【在香林寺】

砭石铸文【在靖安镇】

南唐五龙堂玄元像记【徐锴撰】

李顺公碑【高越书在西门外】 张懿公碑【在石头城後】

李後主祭悟空禅师文【在清凉寺】

开善寺井记【在蒋山寺】

南唐追封庆王碑【在城南娄湖桥韩熙载作】

宋齐丘凤凰台诗 太守题名碑

金陵图 建康图

建康府重建贡院记【陈天麟】

江东运司试院记【李道传】 建康府新作贡院记【杨万里】

江宁府移建康府学记【张元用】

重修府学记【章汝楫】 府学上舍登科题名记 府学廪送贡士规约碑 建康府新建义庄记

江宁府学田产记 续置田产房廊碑

府学义庄田亩数碑 学斋记

上元县学记 溧水县学记

溧水县小学记 句容县【阙三字】记

溧阳县重修学记三

明道先生祠记三【朱熹游九言真德秀作马光祖跋】

程纯公画像记 刘给事祠堂记【李处全作】 范忠宣祠堂记【袁变作】

黄尚书生祠记【李慥作】 忠襄杨公祠堂记【魏翁作】

留守大资政钱公生祠记【郑若容作】

真西山祠堂记【王遂作】 吴状元生祠记【孙沂作】 陈大使生祠记【王梦义作】

南轩先生祠堂记【杜杲作】 吴大资祠堂记【曹庭褒作】

吴相公生祠记【程公许作】 野亭先生祠堂记【倪屋作】

野亭先生祠瞻祠规式碑马观文生祠记【赵与和孙益大作】

父老建马观文祠记【刘梦周作】 青溪先贤堂记【周应合作】

溧阳县学四先生祠记 圣母惠泽龙王一祠记【在戒坛寺】

忠节王公庙记【刘岑作】 府治三圣庙记

秣陵东岳庙记 在城武烈帝庙记

江渎庙记【黄度作】 昭灵沈襄王庙记【陈尧咨作】 铁塔寺二判官庙记 越台三圣庙记

惠泽王庙记 显忠庙记【洪迈作】

广惠庙事迹记【沈瀛作】 马司真圣庙记【冯去非作】

圣烈王行状碑 武氏石室碑

正显庙记 褒忠庙记【叶梦得作】

蒋武帝庙记 栖霞寺佛殿记

摄山白云庵记 能仁寺记

天庆观记【章公权作】 吉祥寺记

永宁院记【刘岑作】 戒坛寺记【韩元吉作】

殊胜寺记【杨天麟作】 明庆寺记

保宁寺碑 定杯寺记【朱舜庸作】

圣汤延祥院记 蒋山妆绘大佛殿记

宝公行状碑 天禧寺重修宝塔碑

二藏道公塔记 北山移文碑

高座寺铜钟碑 三茅真君像记

道光泉记 八功德水记

双女坟记 左伯桃墓诗

萧闲堂碑 二李亭碑

挿竹亭记 俞氏十牒传家记

通济桥记 中山馆驿记

广惠侯庙碑 镇淮饮虹二桥记【梁椅作】

白下桥记【刘叔白作】 嘉泰重修二桥记【刘叔向作】 乾道重修二桥记【丘霁作】
明道先生格言碑

赵忠肃公秋风诗碑【马观文书】 杜尚书学斋记

王潜斋六州歌颂

马裕斋书格言碑六【寬平笃厚敬觉详缓 喜闻过强为善
愿我壽命长广行一切善愿我福德盛普济一切人
一日之事在寅一年之事在春一生之事在勤一家之事在身
无益之言勿听无益之事勿为无益之书勿观无益之友勿亲
和平福之基忿躁祸之随谦?德之吉骄傲身之贼】

高斋记【胡宿作】 子隐堂记【梅摯作】

凉馆记【元时敏作】 筹思堂记【边惇德作】

四老堂记【韩元吉作】 思政堂记【章谦作】

忠宣堂记 飞泳堂记【杨迈作】

戏彩堂记【王埜识】 達尊堂记【范先作】

忠实不欺之堂记【陆景思作】 清如堂记【梁椅作】

东冶亭记【梅挚作】 筹思亭诗碑【王安石范纯仁王扣作】

此君亭歌【毛渐作】 赏心亭东坡长短句【丘壑作】 昭阳亭饯别留题【李书】
昭阳亭诗【张状元作】

二水亭记【史正志作】 八功德水亭记【赵师晋识】

新亭记【史正志作】 兰亭记【李洪识】

双玉亭记【刘字作】 翠微亭记【吴渊作】

凤凰台记【马观文作】 赏心亭记【萧山则作】

川泳轩记【周必大作】 存爱轩记【周师成作】

敬斋铭【传行简作】 使华园记【戴桷作】

政足园记【戴捐作】 绣春园碑【高定于识】

府学御书阁记【游九言作】 青溪阁记【张椿作】

德所新建门楼记【马光祖作】 东南佳丽楼记【李衢作】 葛僊公链丹井铭【景通作】
濡惠泉记【王元忠作】

舍利泉记【李处厚作】 忠孝泉记【周虎作】

道光泉记 义井记【李廸作】

广济新仓记【赵彦端】 平止仓须知碑

平止仓省劄指挥碑 平采仓省劄碑【岳珂立石】 复置平采仓省劄碑【舒滋立石】

平糴仓记【吴渊作】

泛恩指挥碑【赵善湘立】 亲兵营记【游九言作】

沿江新建游击军记【胡居仁作】

宋兴寺奉省劄养济两院碑【黄度作】

真运使申遗弃小儿省劄碑

余运使申置寔济院省劄碑

奉旨建寔济院记【冯去非作】 建康府新安乐庐记【马元演作】

二王帖 裴将军帖

宋忠简公帖 章尚书墨帖

刘给事墨帖 张状元墨帖

安抚司书帖右约 苏东坡近移文

临川王游碑 蒋山西庵墨帖

张丞相墨帖 蒋山丹霞访龐居士

真运使版榜移文 张状元请疏

张都督祭病亲刻 柳子厚送薛存义序

洛神赋 责沈碑

张赐记碑 韩元吉饯别留题

崇因寺范石湖碑 章尚书题范石湖碑

横渠先生大字碑 濂溪先生大字碑

王尚书石头城大字 清凉寺咏竹赋

登山铭无为赞 韩南涧荼蘼亭诗

马野亭吴琚游青溪浪淘沙词

总得翁题断碑诗 魏督相题王文公祠诗

景定建康志卷三十三

卷三十四

钦定四库全书

景定建康志卷三十四 宋 周应合 撰

文籍志二

诸国论

陆机二论【机本吴人居秦淮晋灭吴乃作辨亡二论并述其祖逊父抗之功业】上篇曰昔汉氏失御奸臣窃命祸基京畿毒徧宇内皇纲弛顿王室遂卑於是羣蜂骇义兵四合吴武烈皇帝慷慨下国电发荆南权畧纷纭忠勇霸世威棱则夷羿震荡兵交则丑虏授馘遂扫清宗祊烝禋皇祖於时云兴之将带州焱起之师跨邑哮阗之羣风驱熊黑之族雾合虽兵以义动同盟戮力然皆包藏祸心阻兵怙乱?师无谋律丧威稔寇忠规武节未有如此其着者也武烈既没长沙桓王逸才命世弱冠秀发招揽遗老与之述业神兵东驱奋寡犯衆攻无坚城之将战无交锋之虏诛叛柔服而江外底定飭法修师则威德翕赫宾礼名贤而张昭为之雄交御豪俊而周瑜为之杰彼二君子皆弘敏而多奇雅达而聪哲故同方者以类附等契者以气集江东盖多士矣将北伐诸华诛鉏干纪旋皇輿於夷庚反帝坐於紫闥挟天子以令诸侯清天步而归旧物戎车既次羣凶侧目大业未就中世而殒用集我大皇帝以奇踪袭逸轨馭心因令图从政咨於故寔播宪稽乎遗风而加之以笃固申之以节俭畴谘俊茂好谋善断束帛旅於丘园旌命交乎涂巷故豪彦寻声而响臻志士希光而景骛异人辐凑猛士如林於是张昭为师傅周瑜陆公鲁肃吕蒙之俦入为心腹出作股肱甘宁凌统程普贺齐朱桓朱然之徒奋其威韩当潘璋黄盖蒋钦周泰之属宣其力风雅则诸葛瑾张承步騭以名声光国政事则顾雍潘濬吕范吕岱以器任干职奇伟则虞翻陆绩张惇以讽议举正奉使则赵咨沈珩以敏達延誉术数则吴范赵達以禨祥協德董袭陈武杀身以卫主骆统刘基强諫以补过谋无遗譖举不失策故遂割据山川跨制荆吴而与天下争衡矣魏氏尝藉战胜之威率百万之师浮邓塞之舟下汉阴之衆羽檄万计龙跃顺流銳骑千旅虎步原隰谟臣盈室武将连衡喟然有吞江沔之志一宇宙之气而周瑜驱我偏师黜之赤壁丧旗乱辙仅而获免收迹远遁汉王亦凭帝王之号帅巴汉之人乘危骋变结垒千里志报关侯之败图收湘西之地而我陆公亦挫之西陵覆师败绩困而後济絶命永安续以濡须之寇临川摧锐蓬笼之战子轮不反由是二邦之将丧气挫锋势岌财匱而吴莞然坐乘其弊故魏人请好汉氏乞盟遂躋天号鼎峙而立西界庸益之郊北裂淮汉之浹东苞百越之地南括羣蛮之表於是讲八代之礼蒐三王之乐告类上帝拱揖羣后虎臣毅卒循江而守长棘劲铄望鸞而奋庶尹尽规於上四民展业於下化协殊裔风衍遐圻乃俾一介行人抚巡外域巨象逸骏扰於外闲明珠玮宝耀於内府玫瑰重迹而至奇玩应响而赴輶轩骋於南荒冲軻息於朔野黎庶免干戈之患戎马无晨服之虞而帝业固矣大皇既没幼主莅朝奸回肆虐景皇聿兴?修遗宪政无大阙守文之良主也降及归

命之初典刑未灭故老犹存大司马陆公以文武熙朝左丞相陆凯以謇谔尽规而施绩范慎以威重显丁奉锺离斐以武毅称孟宗丁固之徒为公卿楼玄贺邵之属掌机事元首虽病股肱犹良爰逮末叶羣公既丧然後黔首有瓦解之患皇家有土崩之衅历命应化而微王师蹶运而发卒散於阵民奔於邑城池无藩篱之固山川无沟阜之势非有工输云梯之械智伯灌激之害楚子筑室之围燕人济西之队军未浹辰而社稷夷矣虽忠臣孤愤烈士死节将奚救哉夫曹刘之将非一世所选向时之师无曩日之衆战守之道抑有前符险阻之利俄然未改而成败贸理古今诡趣何哉彼此之化殊授任之才异也下篇曰昔三方之王也魏人据中夏汉氏有岷益吴

制荆扬而奄有交广曹氏虽功济诸华虐亦深矣其人怨刘公因险以饰智功已薄矣其俗陋夫吴桓王基之以武太祖成之以德聪明叡達懿度弘远矣其求贤如弗及恤人如稚子接士尽盛德之容亲仁罄丹府之爱拔吕蒙於戎行识潘濬於系虏推诚信士不恤人之我欺量能授器不患权之我偏执鞭鞠躬以重陆公之威悉委武卫以济周瑜之师卑宫菲食丰功臣之赏披怀虚已纳谏士之策故鲁肃一面而自托士燮蒙险而效命高张公之德而省游田之娱贤诸葛之言而割情欲之欢感陆公之规而除刑法之烦奇刘基之议而作三爵之誓屏气局蹐以伺子明之疾分滋捐甘以育凌统之孤登坛忼忼归鲁子之功削投恶言信子瑜之节是以忠臣竞尽其谏志士咸得肆力洪规远略固不厌夫区区者也故百官苟合庶务未遑初都建业羣臣请备礼秩天子辞而弗许曰天下其谓朕何宫室舆服盖慊如也爰及中叶天人之分既定故百度之缺粗修虽醴化懿纲未齿乎上代抑其体国经邦之具亦足以为政矣地方几万里带甲将百万其野沃其兵练其器利其财丰东负沧海西阻险塞长江制其区宇峻山带其封?国家之利未见有弘於兹者也借使守之以道御之有术敦率遗典勤民谨政修定策守常险则可以长世永年未有危亡之患也或曰吴蜀唇齿之国也夫蜀灭吴亡理则然矣夫蜀盖藩援之与国而非吴人之存亡也其郊境之接重山积险陆无长毂之径川厄流迅水有惊波之艰虽有锐师百万启行不过千夫舳舻千里前驱不过百舰故刘氏之伐陆公喻之长蛇其势然也昔蜀之初亡朝臣异谋或欲积石以险其流或欲机械以御其变天子總羣议而谕之大司马陆公公以四渎天地之所以节宣其气固无可遏之理而机械则彼我所共彼若弃长技以就所屈即荆扬而争舟楫之用是天赞我也将谨守峡口以待擒耳逮步阐之乱凭宝城以延强寇资重币以诱羣蛮於时大邦之衆云翔电发悬旌江介筑垒遵渚衿带要害以止吴人之西巴汉舟师沿江东下陆公偏师三万北据东坑深沟高垒按甲养威反虏踣迹待戮而不敢北窥生路强寇败绩宵遁丧师大半分命銳师五千西御水军东西同捷献俘万计信哉贤人之谋岂欺我?自是烽燧罕警封域寡虞陆公没而潜谋兆吴衅深而六师骇夫太康之役衆未盛乎曩日之师广州之乱祸有愈乎向时之难而邦家颠覆宗庙为墟呜呼人之云亡邦国殄瘁不其然欤易曰汤武革命顺乎天或曰乱不极则治不形言帝王之因天时也古人有言曰天时不如地利易曰王侯设险以守其国言为国之恃险也又曰地利不如人和在德不在险言守险之在人也吴之兴也参而由焉孙卿所谓合其参者也及其亡也恃险而已又孙卿所谓舍其参者也夫四州之氓非无衆也大江以南非乏俊也山川之险易守也劲利之器易用也先政之策易循也功不兴而祸遘何哉所以用之者失也故先王达经国之长规审存亡之至数谦已以安百姓敦惠以致人和寬冲以诱俊乂之谋慈和以结士庶之爱是以其安也则黎元与之同庆及其危也则兆庶与之共患安与衆同庆则其危不可得也危与下

同患则其难不足恤也夫然故能保其社稷而固其土宇麦秀无悲殷之思黍离无愍周之感矣

皇甫湜作东晋正闰论曰王者受命於天作主於人必大一统明所受【一作授】所以正天下之位一天下之心舜传之尧禹传之舜以德禪者也桀放於汤纣【一作受】杀於武以时合者也秦灭二周兼六国以力成者也汉除【一作革】秦社稷以义取者也故自尧以降或以德或以时或以力或以义承授如贯始终【一作终始】可明虽殊厥迹皆得其正以及魏取於汉晋得於魏史册既载彰明可知百王既通行万代无异辞矣惠帝无道故国陆沉晋之南迁寔曰元帝与夫祖乙之圯耿盘庚之徙亳幽王之灭戏平王之避戎有异乎哉【四字一作其事同其义一矣】而拓跋氏种实匈奴来自幽代袭有先王之桑梓自为中国之位号谓之邪晋寔未改谓之禪邪已无所传而昔【一作往】之着书者有帝元今之为録者皆闰晋可谓失之远矣或曰魏之所据中国也对曰所以为尧舜者以礼义也所以为幽厉者无礼义也非系於地【四字一作岂系於地哉】杞用夷礼杞即夷矣子居九夷夷不陋矣沐纣之化殷士为顽人矣因戎之迁伊川为陆浑矣非繫於地也晋之南渡人物攸归礼乐咸在流风善政史实存焉魏氏恣其暴强虐此中夏斩伐之地鸡犬无余驱士女为内篱委之戕杀指衣冠为刍狗逞其屠刈种落繁炽历年滋多此而帝之则天下之士有蹈海而死天下之人必【一作有】登山而饿忍食其粟而立其朝哉至於【一作于】孝文始用夏变夷而易姓更法将无及矣且授受无所谓之何哉又曰周继元隋继周国家之兴寔继隋氏子谓是何对曰亚曰为宋宋为齐齐为梁江陵之则为周矣陈氏自树而夺无容於言况隋兼江南一天下而授之於【一作于】我故推而上我受之隋隋得之周周取之梁推梁而上以至於尧舜得天统矣则陈奸于南元闰於北其不昭昭乎其不昭昭乎

吕祖谦十论吴论孙权起於江东拓境荆楚北图襄阳西图巴蜀而不得北敌曹操西敌刘备二人皆天下英雄所用将帅亦一时之杰权左右胜之而後能定其国及权国既定曹公已死丕叡继世中原有可图之衅权之名将死丧且尽权亦老矣世人谓权之所以为固者东南之地所以为强者东南之兵此大不然夫东南之地天下至弱而孙氏之地又为六朝最弱独权守之而固东南之兵天下至弱而孙氏之兵又为六朝最弱独权用之而强长江而上達於江陵转江陵之南厄於巫峡上下千里可航而渡者凡几可扼而守者凡几道路坦然非有潼关剑门之阻也自广陵而渡京口自历阳而渡采石自邾城而渡武昌易若反手江陵破则上流无结草之固濡须破则江上不知所以为计地之形势可谓弱矣权之兵衆皆江南舟子绵力薄材之人区区招拾盗贼驱猎止越以寔行伍兵亦可谓弱矣然权用之如此之固且强何也盖权之所以自立者有谋而已不独用其臣之谋而又自出其谋内以谋用衆外以谋应敌所以地狭兵少处天下之至弱而抗衡中原成三分之势者欤始权之初立曹操下荆州移书吴会举国震骇权闻鲁肃之言翻然而悟闻周瑜之议奋然而起一举而走曹操存刘备基王伯之业此用周瑜鲁肃之谋也及刘备借荆州而不反云长颡颡於上流权谓养云长使北吞许洛全有江汉回舟东下谁能御之欲图之惧曹操之乘其弊也乘云长逼许洛曹公以朝命见招权乃賤击云长以自効使吕蒙陆逊一袭而得之全有荆楚西闭刘备於三峡北释曹公之患以安江东此用吕蒙陆逊之谋也方曹丕已禪汉天下愤怒切齿之时权知刘备必报云长恐曹氏之掎其後也乃於是时释其愤切之心而称臣於魏受其爵封击备而走之此权之谋

也及魏责任子而权不遣西患未解而北患复起权之计宜乎穷也权知刘备以复汉为名而曹操篡位之罪甚於杀云长备亦欲结已为与国而专意北图於是遣使讲和以中备之欲遂得息肩於西而专意於北拒魏而退之此权之谋也方曹操之反自乌林愤权而东征谓权恃水以自固故以舟帅下合肥权若拒之於江南则曹公水军入江权军不战自溃矣故逆拒之於濡须使操虽有水军无所施步骑虽多濒阻江沕春水方生义无所用操叹息而退此又权之谋也操之既还自他人观之大则追军逐北小则自足称?今权不然反请降於操盖权料操之内忧尚多北有未定之河北西有未复之关中操欲伐之而虑东南之变非大定不往也故称降以少厌其意而安之使操不复虞东南而尽力西北已得於其间益缮战守之备以待其再来此权之谋也方曹丕之责任子不得而南征也权见丕之用兵不如其父而老臣宿将亦不尽力如操之时始却之於濡须而再来权之意以谓丕不知兵非使之深入疲竭上下之力则不止非使之临江南反则丕必不休故开而致之濒江而不与之战挑之而又不使之力尽而自还又小发以警之魏自是不复敢南出此又权之谋也权又以为兵久不用则士气钝疆场久安则人心逸且使敌人晏然积以岁月坐以成资非计之得也故两谲淮南之将致而击之所虏获足以自资而敌人之资又为之破坏此亦权之谋也权又以谓所用多南兵便于舟楫短於陆战故用兵未尝一日舍舟楫而乘胜逐北亦不肯远水以逐利虽有大举长驱之计亦不敢行以饶一时之幸故曹休败而不敢追殷札献言而不敢用此亦权之谋也权之受封吴王也尽恭以受其爵命使其国中知已为百姓屈也与邢真为盟阴以怒其羣下方且为进取之计而自卑屈如此此亦权之谋也故权之为国自奋亦用谋自屈亦用谋胜亦用谋危亦用谋动无非谋也故能以一江为阻而与曹刘为敌然权起非仗义徒知以割据为?不能兴汉室以倾天下之心使当汉末大乱权能招徕中原之士广募西北之兵缉马步之銳挟舟楫而用之鼓行北出水陆并进孰能当之哉当曹丕之立也权又能求汉室子孙而辅之出师问罪刘备必亦连衡而掎角中原之士挟思汉之民必有起而应我者矣权不知出此徒自尊於崎岖蛮夷山海之间故虽力为计谋诡诈然基业仅足以终其身而无足以遗子孙仅足以保其国而不足以争衡天下惜哉然使权不为计谋以自立则虽其身不能终也况子孙乎其国不能保也况天下乎何以言之权没未几诸葛恪一用之而仅胜再用之而大败孙綝用之又败江淮之间惴惴而已上流藉陆抗之贤挟以重兵仅能支襄阳一面抗死则亦惴惴然矣藉使孙皓不为暴虐亦岂能久存也哉後世不察权以计谋自立而区区欲効权之画江为守是不察夫形势甲兵之最弱也古人惟陆抗知此抗言於孙皓曰长江峻川限制封域乃守国之常事非智者之所先审抗此言则当时之形势为不足言而所谓智者所先则有道也抗可谓善论孙氏形势者矣

晋论上东晋之始形势与吴相若然吴北不能过淮而东晋时得中原之地吴旋为晋?而晋更石勒苻坚之强终不能破其君臣人材去吴远甚而其固如此者晋以中原正统所系天下以为共主故也以正统所系天下共主而百余年不能平天下雪讎耻恢复旧物晋之君臣斯可罪矣诗美宣王曰内修政事外攘夷狄齐威公晋文公越王句践皆国中已治然後征伐今夫晋室南迁士大夫袭中朝之旧贤者以游谈自逸而下者以放诞为娱庶政陵迟风俗大坏故威权兵柄奸人得窃而取之小则跋扈大则篡夺士大夫虽有以事业自任者亦以政事不修财匱力乏而不得尽其志可胜惜哉易曰君子藏器於身待时而动何不利之有夫政事已修任属贤将而待可为之时时而进焉则无不成矣晋既内无政事外而任属又非其人虽有中

原可乘之时而我无以赴之虽赴之而败矣故褚裒北伐蔡謨曰今日之事必非时贤所办殷浩之再举北伐王羲之曰区区江左固已寒心力争武功非所当作又曰虽有可喜之会内求诸已而所忧乃重於所喜由是观之晋之政事不修任属非其人虽有中原可乘之时亦无能为也然謨之言大抵谓任属非其人故曰非上圣与英雄自余莫若度德量力羲之之言大抵谓根本不固故曰保淮非复所及长江以外羈縻而已二君虽相当时之失然尽如二君所言则东晋未有复中原雪讎耻之期端坐江左以待衰弱亡而已此知其一而不知其二也夫东晋之初其强弱何如三国之吴蜀当时有志之士尚能欲自强而不肯休诸葛亮诸葛恪之语最着然亦知其一而不知其二也亮之言曰先帝知臣伐贼材弱敌强然不伐贼王业亦亡惟坐而待亡孰与伐之孔明之治蜀可谓有政蜀之任孔明可谓得人然未有可乘之时恪之言曰今所以敌曹氏者以操兵衆于今适尽司马懿已死其子幼弱未能用智计之士今伐之是其厄会恪之言知可乘之时而不知所修之政而自量其材与夫所用之人也是故孔明无成而恪卒以败观蔡謨王羲之与诸葛亮恪之论正相反而各得一偏也今人好兴作者必以孔明元逊之言为先而安偷惰者必以蔡謨王羲之之言为是酌厥中而论之藏器於身待时而动内修政而外攘夷狄圣经之言不可易也後世亦曰事贵乘衅又曰上策莫如自治盖急急自治政事既修恢复之备已具事会之来不患无也一旦观衅而动将无往而不利矣若内虽有自治之名而无自治之寔徒为空言玩日引岁端坐而守而待敌人之自灭非愚之所敢知也苟不相时先事妄发小者无功大者覆败一旦机会之来事力已竭不能复应东晋之事如此者盖多矣晋论中昔孟子曰入无法家拂士出无敌国外患者国常亡夫无敌国外患者谓国安可也乃曰常亡何哉盖既无法家拂士又敌患不至则君骄臣纵入於危亡而不自知东晋之末是也晋之始也敌国云扰强臣专制上下惴恐如处积薪之上而火将燃者故君无骄泰之失而臣下自以危亡为忧是以内虽王敦苏峻反叛相寻桓温擅权废立外则石氏之兵三至江上苻坚淝水之役江东几至不保然当时人主恐惧於上而王导温峤陶侃谢安谢玄之徒足以尽其力故至危而复安将亡而复存也及桓温既死苻坚复亡上流诸镇皆受朝廷号令非有间者跋扈之人也姚氏自守於关西慕容相践於河北非有向日边境之忧也君臣上下自以江东之业为万世之安心满意足孝武渐生奢侈於上道子之徒窃威柄於下谢安谢玄至以功名自疑矣安玄既死其政愈坏甚於已危将亡之时泯泯靡靡不自知也已而君臣兄弟之间争权植党上流之患复开不待外敌之强而国遂亡矣圣人於无事之时而为持盈守成之戒可不信夫况东晋讎耻未复遽以无事自处不其愚哉晋论下杜牧谓宋武不得河北故隋为王宋为伯愚谓不然并吞海内之形势关中为重河北次之关中者周秦汉用之河北者光武用之皆用之以取天下也曹操石勒以河北取关中苻坚以关中取河北三人者皆吞海内十有八九而不能并东晋之後元魏以河北取关中後周以关中取河北隋唐以关中取天下以此论之用关中并天下者五而不得者二用河北并天下者一而不能者三则关中为重河北次之顾不信乎宋武帝非独不得河北暂有关中而已何尝得之哉宋武起於布衣身经百战战胜攻取髣髴曹操司马懿而下不可比也举东南至弱之兵练而用之践西北至强之国前无横阵旁无坚敌逆河而上开关而入之用之如建瓴破竹之易可谓奇矣然得关中而不守翻然东归失百二之地於反掌暮年慷慨登壽阳城楼北望流涕而已可不悲哉愚谓宋武之失关中其罪有三一则好杀伐而不得中原之心二则急窥神器而不能快中原之愤三则倚南兵而不能用中原之人夫宋武下广固欲尽坑其父老韩范力谏犹诛王公以下三千人没入其孥前贤论之以谓举事曾苻姚之不如智勇而无仁义岂不当哉其失一

也宋武帝之不为晋室藩辅天下所知也然辅晋而行能仗大义使中原知为晋雪百年之愤天下其孰能议之其子亦不失天下今急为篡夺大业不终曹操犹能曰天命有在吾为周文王终身辅汉而不取宋武识虑不及操远矣其失二也宋武之北伐魏主以问崔浩浩尝策之以必克而不能久裕之取燕取秦西北之人未闻据连城举大衆来附之者裕独用南人转战山河之间往返万里使裕收燕之後选用燕之豪杰广募壮勇以倾三秦得秦之後选用秦之贤杰广募壮勇以倾河北分爵裂土以功名与衆共之东伐元魏非元嗣所能抗也举元魏则中原尽得矣东扫慕容之余烬西剪赫连之遗种以裕之智勇王镇恶檀传朱沈之徒为爪牙而谢晦之徒主谋议何为而不成裕之施为既已不能选用燕秦贤杰广募壮勇而区区用远客之南兵纵无所练之士卒南兵独用已败不可支其失三也盖南北异宜攻守异便南兵不可专用有三虽勇而轻一也利险不利易易困难久二也易乱难整三也项羽之破赵一以当百高祖征黥布张良戒毋与楚人争锋然羽布皆为高祖以持重困之此虽勇而轻也吴王濞之反有田将军者请急据洛阳曰汉车骑入梁楚之郊则事败此利险而不利易也吴楚屯聚数月无食而溃裕军至长安已讴歌思归此易困而难久也裕军至长安日暴市肆此易乱而难整也裕既无中原之衆欲以南兵守关中人无智愚皆知不可也裕之东归世以谓刘穆之死急於篡取愚以谓正以南兵不能守关耳裕见已所行事已失中原之情欲全军共归则惜关中不忍弃之欲不归而守则南人思归既甚将溃而归矣裕之首领未可保也况关中乎数十年之得一朝失之古今所惜然则後之欲恢复者得中原之郡县可不以裕为深戒哉宋论宋文帝以河南之地为宋武帝旧物故竭国家之力扫国中之兵而取之卒无尺寸之功史称文帝之败坐以中旨指授方畧而江南白下轻进易退以愚言论之文帝不用老将旧人而多用少年新进便专任属犹恐不免於败况从中以制之乎锋鏑交於原野而决机於九重之中机会乘於斯须而定计於千里之外使到彦之辈御精兵亦不能成功况江南白下乎然江南之兵亦非弱也武帝破燕破秦破魏则皆南兵也何武帝用之而强文帝用之而弱也南兵不可专用岂无北方之人可号召而用之乎盖武帝失之於前而文帝失之於後也自古东南北伐者有二道东则水路由淮而泗由泗而河西则陆路越汉而洛由洛而秦自晋氏南迁褚裒殷浩桓温谢玄皆独由一道以进至於武帝则水陆齐举故能成功今文帝专独用南兵而专恃水战舟楫之利虽尝使薛安都等尽力於关陕而孤军无援形势不接此三者文帝之所以败也使文帝得贤将而任之屯於淮外委以经畧不独用南兵而号召中原之衆不独恃舟楫而修车马之利则虽未能坚守河南亦不至於一败而失千里之地再败而胡马饮江也文帝修政事为宋朝之贤主而措置之谬如此可不戒哉齐论上天下之情艰难则勤承平则惰勤者虽弱小而奋惰者虽盛大而衰夫元魏以兵力之强据中原之地士马精健上下习兵而喜战道武以来战胜攻取未尝少挫几并天下然至孝文之时议举兵伐齐而在廷之臣皆以为不可虽驱之以威莫可行也与间者习战之修何其相反哉盖自道武没更以母后幼主持政羣臣皆生长安佚非复拓跋马上之士也稍备朝廷宫室之美非复拓跋穹庐迁徙之俗也金钱玉帛府库充满非复拓跋计牛马锥刀之利也美衣甘食冬温夏凉非复拓跋习饥馑之劳也高谈徐步可以致大官取卿相非复拓跋竞战国攻取之勲也尽变旧俗而流为承平无事矣夫以三代礼义维持而承平无事日久犹且以骄淫致乱况元魏上下无礼义之维持稍稍无事则志气满矣制度侈矣子女盛矣土木兴矣夫人已负其天资骄淫之性而入靡丽纷华之域必至於此此慕容苻姚所以不能久也元魏居於云中未甚离其俗习然犹上下厌兵畏战国主亲在行间而不肯前至於迁洛之後其国衰矣窃譬人之於鸛鸟也去其利爪而傅

以凤鸟之羽则无德可昭无威可畏取死於虞罗必矣然元魏既衰之後宋氏多事齐氏享国日浅梁武谬於攻取待元魏至于国分为二然後自毙若使南朝有英武之主智谋之士蓄开拓之备而伺其隙则元魏岂能据有中原如是之久也哉 齐论下齐氏享国日浅虽无境外之功而疆场之间亦无失矣太祖初立魏以刘昶为主入寇高宗之篡魏又入寇皆有以为辞矣然是时魏之入寇无他奇策而齐御之者亦无高计胜负相当魏不能渡淮南定汉沔齐之大镇无伤焉齐亦不能追击魏全军而反然魏得沔北数城齐不能复取也齐之君臣度未足以开拓故亦不敢深为报复之计待其通使於我然後归其俘而纳之亦计之是者也然敌情无常和好不久高祖与之讲和五年而以明帝篡立为辞分道入寇夫魏孝文岂专为名义者哉求土地之获而已使齐氏自通好以来边备不修一旦变起国中未靖外难又至岂不殆哉不知和好之不可恃自两汉以来然矣梁论上陈庆之以东南之兵数千入中原士马强盛之地大小数十战未尝少挫遂入洛阳六朝征伐之功未有若是之快者也然卒以败归理亦宜然何以言之夫孤军独进不能成功自古皆然当时梁武使诸道并进乘魏人上下崩离之际分收郡县河南之地必可取也庆之既至洛阳纵士卒暴横市里此岂吊伐之师乎当时能整军阵宣布梁德取不乐尔朱氏之人而用之改立魏主则河南之地虽不版图必当为附庸之国矣南人善步战而少马庆之能麤北兵於平原旷野使挟战而用胡可敌哉自入敌地务广骑兵使不乐南之人与南人善射参用之纵不能守洛阳之地多得骑军犹足以归壮国势且安得有嵩阳之败哉然庆之与元颢更相猜忌则广丘之计颢必不行以此观之庆之进退专之可也颢之成败不可任也恤颢之成败而不恤军旅之衆寡非计之善者也夫庆之固奇才不易议也着其所不及以俟有庆之之才者观焉 梁论下梁之亡也以侯景武帝纳景得祸也速受祸也重元帝仅能灭景而卒不能振其国家悲夫昔冯亭以上党输赵平原欲受之赵豹曰圣人甚祸无故之利太史公曰利令智昏武帝之纳侯景是也夫景自以猜疑不容於高氏反覆南来既非吾兵威之所加又非吾驰说之所下忽以三十州数千里之地来归斯可谓无故之利矣武帝思虑朝臣谏说非不详矣始疑而卒纳之可谓利令智昏矣赵之与梁得地各异而受祸相似赵致长平之师几至国亡梁致台城之?亦至於亡国是祸又甚於赵也赵有强秦之敌摧之以致祸梁氏既无强秦之敌而独一侯景已足以致乱是又出於赵之下也然则在武帝勿受可乎曰方高氏宇文制东西魏与鼎立三分地广兵强者胜如之何勿受受之有道乎曰景之初叛先降西魏二人已觉其诈于谨则请加爵位而勿遣兵王思政则请因而进取乃使思政与李绰弼等赴之故已制其肘腋矣已而思政入颍川逐景出之则已倾其巢穴矣而又召景入朝则伐其奸谋矣景既不入朝思政遂据景七州十二镇之地是魏因纳景不血刃而取千余里之地武帝施设罗网略无西魏之一二何为而可纳武帝既信其奸诈而以羊鹇仁应接鹇仁非景敌也不足以制景一失也又信朱异舍鄱阳王范而以渊明为帅卒有寒山之败致军折於外景益无所惮二失也景之地不得尺寸既失景地何用於景不杀则废之可也反豢养於边陲三失也方景之未来而貳於宇文说辞自辩不能逆折其情则曲意为诏以安之既而奔亡入境不能制畜遂舍钤键而纵之盗据边疆则又从而与之跋扈不逊则又虚辞而说之高氏以渊明为间则又不能推大信於景而欺之谋及已露则又不能逆击而讨之梁之失也如此其所施之方略所用之将帅与西魏何相万万也故非独不得景尺寸之地而又不得景丝毫之力而受丘山之祸由梁武所用非其人而制置失其宜故也夫无故之利无时无之方畧制置尚鑒兹哉陈论陈之形势不足道也视吴又无江陵自峡口至海尽江而已使孙权复生且不能守况叔宝之淫昏乎盖自晋以来习於水战以江自恃初不知我能渡

敌亦能渡何足恃哉以愚观之江若夫北之河耳大河犹有悍湍之虞若江则顺风登舟一瞬可济虽有京口采石浔阳武昌巴陵号为控扼岂秦关劔阁之比哉守江之计必得淮南以为战地荆楚控扼上流又有舟师战於江中然後可以粗安孙权之拒曹操东晋之拒苻坚宋之拒魏太武齐之拒魏孝文是也若曰亡淮南荆襄而独凭恃洪流以为大险岂不可笑也今陈既失淮南又失江陵吴阻长江又有南郡一旦王浑之师入自淮南杜预之师入自襄阳王濬之师从江而下沿江镇戍不能御也陈阻长江又失荆州一旦贺若弼出淮南秦王俊出荆襄杨素之师泛江而下沿江镇戍能御而不能破也盖无淮南襄阳则自广陵至於峡口皆可渡也吴陈三世之後亡国已幸矣唐末杨行密据有江淮既死而李昇取之建都金陵以孙权自处迨其有淮南诸郡则阔步高视东攻二浙西取湖南南取闽越南方莫强焉及淮南为周世宗所取则自谿以至於亡亦失淮南则不能守江南之明验也王羲之云保淮非所及不如保江盖见吴之能守而未见若陈与南唐不可守者也後之智计君子既有见焉谨勿割弃荆淮而为守江之论也

景定建康志卷三十四

卷三十五

钦定四库全书

景定建康志卷三十五 宋 周应合 撰

文籍志三

奏议【议关建康而最切者全录于此余者摘录要语随事入於各志】

李纲奏临幸建康在立志以成中兴之功臣伏覩车驾以仲春令辰发轫吴门临幸建康断自宸衷不贰不疑慨然有恢复土宇扫清中原拯济烝黎戡定祸乱克剪大憝刷耻复仇之志天下臣子莫不望风跂踵拚蹈踊跃愿少须臾无死以观中兴之功诚甚盛之举也臣窃观自古建功立事扶持社稷之臣未尝不以立志为先申包胥闻伍员有覆楚之言则曰我必存之其後哭秦庭以乞师卒如其志张柬之语武氏於荆南江中其後卒复唐祚垂祀三百一夫发念其烈如此而况以圣明之资为万乘之主乎高祖之志见於不肯郁郁久居汉中而与韩信论定三秦之策光武之志见於披舆地图於信都城楼上与邓禹论天下大计此皆志定於前功成於後初似落落难合而卒能建大功立大名定大业功施於当年名垂於後世载在典册不可诬也恭惟皇帝陛下天锡勇智运属艰难遵养时晦之久应机立断幡然改图思欲拨乱兴衰光复祖宗之大业故亲揔六师以临江表舍去吴越而幸建康渐为北伐之计志虑规模可谓宏远矣臣愿陛下益广圣志充而行之与神为谋日新其德勿以去冬骤胜而自怠勿以目前粗定而自安凡可以致中兴之治者无不为凡可以害中兴之功者无不去有所规画措置必以天下为度必以施於长久可传於後世为法则中兴不难致矣夫中兴之於用兵只是一事要以修政事信赏刑明是非别邪正招徕人材鼓作士气爱惜民力顺道衆心为先数者既备则士奋於朝农安於野穀粟充盈财用不匮将帅辑睦士卒乐战用兵其有不胜者哉方今敌人虽强不仁不义专务变诈暴虐以胁制天下神怒人愤莫之与亲自古岂有如此而能久立国者正如隆冬涸阴沍寒层冰千里阳和既回应时销释此理之必至无足怪也昔范蠡说越王勾践以持盈者与天定倾者与人节事者与地勾践用之国以富强然又必以人事与天时相参然後乃能成功遂以报吴臣窃观国家去岁诸路丰穰今春雨阳调适又将丰岁是在我者得天时矣正当修人事以应之以我之无衅待彼之有衅则戡乱定功役不再籍夫何远之有臣以固陋自靖康以来与闻国论独持战守之策不敢以和议焉然今十有二年矣孤危寡与屡遭谤诬仰赖圣明曲加照察脱身九死之滨今得承乏待罪方面恭闻戎辂临驻江干将大有为以成戡之烈欣幸之情倍万常品顾虽衰病尚庶几未填沟壑间获观陛下恢复中原摅愤千古志愿毕矣汪藻奏乞分张浚军策应建康臣昨自三月末得之传闻云金人在建康筑城为度夏计臣虽幸其不然然心窃忧之以为中国困於勍敌而得少休息者正赖其不能触热故常已寒方至未暑先归吾於半年间汲汲措画犹每岁奔命不暇今若纵其度夏则长为巢穴无所忌憚不知朝廷何以枝梧泊到行在闻韩世忠列战舰江中遮其归路日有所

获且言金人穷蹙之状臣窃欣幸以为三月所传盖诞妄耳续观黄榜备録韩世忠捷奏又以为朝夕必可扫除今近二十日矣其耗寂然议者颇疑世忠奏状未必皆寔兼数日人自常润来者皆云敌於蔣山雨花台两处各割大寨抱城开河两道以护之及穴山作小洞子以为避暑之地陆增城垒水造战船而采石金人已渡复回者累累不絶今且五月矣比常年去已月余乃反去而复回其欲留建康明甚如此则与三月所传又似符合臣闻金人动设诡诈尤喜为穷蹙之状以疑我师我师堕其计中者前後非一今安知其本不为度夏计而阳为穷蹙者特以疑误我师耶建康为东南咽喉国之门户也天下转输朝廷号令未有不由此而通者若金人果据此为巢穴则东南馈饷遂絶如人扼其咽喉守其门户果得高枕而卧乎不知羣臣日至上前亦常有反复及此者否岂遂以为无事而所当讲者承平之先务乎抑揣陛下非所乐闻而不以闻也不惟是而已人既扼我咽喉守我门户则羣盗亦将视我缓急以我为向背国家果有力能使之退聽屏息乎况又有意外之忧所难言者不得不虑臣愚以为此事所系非细庙堂当若救焚拯溺然朝夕在念及五六月间我师便利之时会诸将与韩世忠一举扫除非特去目前之患将使惩创终身不敢复南其利害岂不相万哉虽闻近遣张浚提兵过江节制浙西人马迤邐前去以为策应此固陛下长筭也不知张浚果能为陛下有慨然立功之意乎臣愚欲乞专差得力使臣数人齎奉陛下宸翰星夜兼程自襄邓荆湖以来迎张浚军令分数万人顺流而下仍於上流自计置粮斛载以自随彼张浚军既皆新人必精鋭可用且敌又见上流之师突然而至莫知其数必破胆奔溃此制敌一奇也如其不然八九月间气候稍凉彼得时矣机会一失虽悔何追伏望睿慈不以臣言为愚轻忽此事特加采纳不胜幸甚

叶适议安集淮民以扞江面窃照去岁敌入两淮所残破处安丰濠盱眙楚庐和无为七郡其民奔逃渡江求活者凡二十万家而依山傍水相保聚以自固者亦几二十万家今所团结即其保聚不流徙者虽不能尽在其中大约已十余万家其流徙者死於冻饿疾疫几殫其半而保聚之民亦有为敌驱掠而去者散为盗贼则又不在焉度今七郡之民通计二十万家和议未定室庐不成就使和议有定其短长之期又未可知此三十万家者终当皇皇无所归宿盖淮土四战之场敌兵往来之地民生其间势固应尔然自古立国未常不有以处之也无以处之则地为弃地而国谁与共守设使今岁边报复急此三十万家者又将奔迸流徙而丧其生乎春秋战国之时画国而守大为城邑小为垒壁百里之国皆有边面自非暴君苛政其民未尝散之四方两汉以後裂为南北中原不合者凡数百年人在战地各自为家养生送死老子长孙未尝有关役非有以自守不肯轻弃其乡安能如此自唐以後至於本朝以和戎为国是千里之州百里之邑混然一区烟火相望无有扞蔽一旦边尘猝起星飞云散无有能自保者南渡之後前经逆亮之祸近有布萨揆之寇累世生聚一朝荡然故某昨於国家营度规恢之初以为未须便做且当於边淮先募弓弩手耕极边三十里之地西至襄汉东尽楚泗约可十万家列屋而居使边面牢寔敌人不得踰越所以安其外也盖汉唐守边郡而安中州未有不如此者也今事已无及长淮之险与敌共之惟有因民之欲令其依山阻水自相保聚用其豪杰借其声势縻以小职济其急难春夏散耕秋冬入保大将凭城郭诸使总号令敌虽大入而吾之人民安堵如故扣城则不下攻壁则不入然後设伏以诱其进纵兵以扰其归使此谋果行之有成又何汲汲於畏敌乎所以安其内也夫徒手搏虎以幸其毙一夫之勇也一夫之勇未必验而一夫之怯其为验也决矣为天下者不以天下之大而就一夫之勇故其愿朝廷以谋困敌以计守边安集两淮以扞江面使淮人不遁则彼又安敢萌窥江之谋乎故堡坞之作

山水寨之聚守以精志行以强力少而必精小而必坚毋徇空言而妨寔利则今日之所行与汉唐之屯田六朝三国春秋之垒壁彼各有以施之不相谋而相得故也伏乞照会指挥施行○某去岁尝首建防江之议继来建康考详前後案牘无非葺治战舰布列岸兵栽埋鹿角钉设暗桩开掘沟堑计步而守数里而屯皆元勲故老之已行谋臣策士之素讲虽其间用之有利不利然终未有能舍此而特立也如鹿角暗桩之类去岁论者固尝指为儿戏及扣其别有何策则又寂无所言适犹谓厉人心而坚守阻大江而自固则如前数事亦岂不足以立功至十月之末边遽告急淮人渡江以亿万计江南震动衆情皇惑一日有两骑伪效番装跃马江岸相传金人至矣济渡之舟斫离岸櫓楫失措渡者攀舟覆溺数十百人某始叹息曰是真不足赖也今虽岸步有寨江流有船鹿角暗桩数重并设沟堑深阔不可越踰其如人心已摇谁与力拒万一敌兵果至彼皆弃之而走尔所以建炎绍兴之间乌珠辈未尝不径渡江南如逆亮之不得济而殒者幸也於是始捐重赏募勇士渡江北刼敌营石跋定山上下凡十数往返取其俘馘系累以报江南奋气见者贾勇而人心始安敌亦由此卷甲遁矣然後知三国孙氏常以江北守江不以江南守江至於六朝无不皆然乃昔人已用之明验自南唐以来始稍失之故建炎绍兴不暇寻绎尔然渡江之兵苦於江北无家基寨无所驻是故石斌贤之徒不能成大功宣司赏急呼邽彦明五益欲令将兵策应和州竟泯嘿而止今石跋则屏蔽采石定山则屏蔽靖安瓜步则屏蔽东阳下蜀西护历阳东连仪真缓急应援首尾联络所筑皆是故基砖石犹在今各堡无事之时只以五百人一将戍守常加修葺勿使废坏收聚居民与之为主令岸渡繁会自成市井若万一有警乞从朝廷即令各堡增募千人照吐浑等伏并与帮放總领所请给随堡防守教閱诸州禁兵抽摘二千人以九月至并於防江效用内摘那千人各堡二千五百人并堡坞内外居民二千家之胜兵者或临时旋行招募亦各二千人各堡通为四千五百人相共守把然後令制置司以八九月别募精勇敢死士千人【去岁十一月募兵今岁敌兵已聚於河南或和议不成其来必早】厚帮请给以待劫寨焚粮直前搏击之用盖堡坞之成於防江有四利往日江南列营五万人去岁亦不下三万而民兵不预然止可坐食而守敌果窥江责其不走固已难矣而况进战乎何者敌在北岸共长江之险兵衆骑多而吾军之气已夺也今堡坞既立敌有所忌固不敢窥江就使来窥江南岸兵胆气自生志力得展使之前进无所畏怯一利也虽有各处战舰然敌已在江岸或声言夺船径渡或寔为造舟之势我之舟师往往不敢放出北岸胜负未决旁观胆落忧恐万端今堡坞既成敌纵在江北我有应接之利或近岸排列千弩并发或舍舟登岸乘势击逐二利也至於海舟风帆八面便利捷疾尤在舟师之上然迫敌於岸而收全功者其势易俟其入江而决死鬪者其势难今堡坞既成有易无难三利也战舰甲士虚闲舟中拥戈坐观从昔病之无策可治今舟得便利人无虚设四利也使敌果忌堡坞为彼之害或拥大衆志在必取今石跋瓜步近在江津定山去江才三里尔我以战舰海舟为江中家计强弩所及彼将腹背受敌自投死地理在不疑脱若敌人畏而不前置而不问尽力攻击和滁真六合等城或有退遯我以堡坞全力助其袭逐或形其前或出其後制胜必矣此堡坞之利所以为用力寡而收功博孙氏六朝以江北而守江南能立国於百战之余者非幸也数也故适欲因屯田堡坞之立收兵民杂守之用屏蔽江面先作一层使江北之民心有所恃敌虽再来不复求渡腾突纷扰殆乱江南次第入深因其险要用其豪杰见团结山水为寨者四十七处此於官司之力无缘周遍特借以声势使自为守春夏散耕秋冬入保盖孙氏六朝保固江淮之成规非充国先零枣祗许下之谓也不然则南北并争之际无岁不有兵革淮人岂能屡逃屡复以自滨於流离死亡也哉所有定山瓜步石跋三

处堡坞图本并四十七处团结山水寨居民户口姓名帐册谨随状缴申伏乞指挥施行一自江距淮地里阔远加以濠梁残寇未退人情忧疑未敢放心复业保聚之计只得自近而远今欲先於沿江地分真滁和三州各立堡坞一层如真州则於瓜步滁州则於定山一带【定山一带系属真和州界缘沿江别无滁州地分惟定山一带最为径便其滁州人户愿就此处并聚者聽从所有税役自合仍旧属真和州】和州则於杨林石跋不但缓急之际可以保卫居民亦可扞蔽江面以待策应【去岁敌骑蹂践两淮曾於瓜步定山一带割寨及於杨林石跋窥觐江面今措置保聚最为紧切去处】一上项瓜步定山杨林石跋并合从官司措置随其地势或依山或阻水就加葺理务令牢寔此外入深第二层更择别有山水险要可充堡坞去处接续措置以次申奏其沿边差官未及去处见已出给公据付忠义头目等人分头前去说谕各处土豪人从便一面先次团结本司即与差官覆寔措置仍量立赏格以示激励今具所给公据如後【当司今差某人前去某州军界内说谕本处土豪有信义为衆所推服之人先与借补官资差充總首令各役便选择地利依山傍水可充堡坞去处团结人户防备敌骑冲突目即劝诱流民复业且就便居止或有急难则入坞屯聚如保守无虞即当差官前去点检照当司所定则例具申朝廷正补官资施行今开具下项三千口以上补进勇副尉五千口以上补进义副尉一万口以上补进义校尉一万五千口以上补进武校尉二万口以上补承信郎三万口以上补承节郎四万口以上补保义郎五万口以上补成忠郎右帖付某人仰执此前去多方说谕仍开具已说谕到土豪姓名及图画堡坞去处山水形势逐一贴说缴申切待差官覆寔施行】此项目今淮上如和州沥湖有胡知礼盱眙嘉山有赵玘兄弟等去岁皆自团结北骑侵犯已能保守内沥湖曾射杀金统军并人骑甚衆遗屍至今满河功赏未録其他安丰光黄等处往往皆有土豪保聚之人官司安顿因其险阻斟酌措置候见次第续行条具申明一瓜步定山杨林石跋等处系是扞蔽江面不止为淮民保聚之计合於内起盖芦厰屋屯驻官兵及应副本司官吏安泊桩顿钱粮军器等【内仓厰军杖库等合用瓦屋】仍开掘壕堑筑垒土城以备敌骑冲突及其余接续措置去处所有工料钱米难以便行拘措归一数目欲乞朝廷科拨钱四十万贯米一十万石付淮东西總领所桩管仍就總领所差官受给遇有本司支遣即关牒照数支破俟结局日具细数申朝廷出豁施行【兼照若兴此役流民必多应募因可以贍给之不至狼狽失所】一今来所立堡坞盖为各自保护一处及敌或冲突攻围即互策应烧劫营寨出奇立功所用兵器合从官司量行给付照得两淮民兵最便于皮笠纸甲皮甲短装弩胜於铁兜鍪铁甲及神劲剋敌等弩远甚又其工费难易相去十之七八此外如三义枪短枪手斧提刀之类皆不可阙今当以十万人军器为率欲乞朝廷行下内郡逐急分头置造施行一两淮地分除舒蘄通泰诸州人户见自安业不用措置外有庐和濠光扬楚其滁州安丰高邮盱眙及黄州故镇无为巢县等处并合从上项条具次第措置施行

书

叶梦得与丞相论防冬书某顿首 拜仆射相公钧座秋暑犹未退即日伏惟钧候动止万福某近因到官具书伸谢必已呈浼记室衰钝黽勉亦将几月郡事虽甚敝连日拨遣冗滞数百事似已少闲其余皆可徐以力治惟是防冬一事不无私忧茫然都未有图议者或谓今岁敌未必来?谓二大將既分宣抚两淮本道乃在腹里非所虑或谓万一有警朝廷必自委二大將守江非本道之职三者窃皆以为过据日前探报颇言敌点兵开河积粮料器具远近略同必

无安静之理今淮东伪邳州兵形已见不来则已来恐非常岁之比前为敌者刘豫主兵者刘麟所驱用者吾山东淮甸之民今以金主易刘豫以四太子易刘麟以北骑易吾民是岂可忽乎二大将宣抚两淮固其职矣然未见别有大措置必可以固吾圉者近惟张宗颜数千人趋合淝尔甲寅岁豫贼至楚州丙辰岁豫贼过濠州皆在九月十月之间非无大将未尝前知今可保复无此乎自古保江必先固淮曹操不能越濡须苻坚不能出涡口魏太武不能窥瓜步周世宗不能有壽春皆以我先得淮东也今淮未有必固之理而欲恃江以为重何可为万全计前岁闻以四大将自池州而上直至平江之境各分其地州郡皆不与此固势必如此然以兵扞疆场乃所以为民保境土若将帅与州郡不相关则兵民分为二境上何以独济往时杜充失守之因江上兵非不多自王 先遁於采石诸军皆溃无复扞敌吾民奔避不及反为溃兵剽略敌得乘之南渡此相公所知也况本道界分已自无刘光世一军若以他军那融添补则兵力厚薄尤可见今若责江淮於将帅而使守臣表里得共为之计犹可待不虞若淮未能固而必恃江以为守则王 之戒不可不思某久在山林不闻庙议既不得已於此惩往者吕公之困誓不敢复出一语然平日拳拳之心有不能终愧藿食者因季华行辄私布之本府惟有民间自欲团结可使保乡里渐已料理复恐议者不知本末谨具劄子稟達其余数十条并附之别纸此非其职徒以相公平昔相予之厚忘其僭率思致輿人之言以答豪末皇恐余祈倍保钧重上副眷倚不宣

又与丞相书某顿首 拜上啓仆射相公钧座某昨日早递中忽遽上状必获呈浼即日伏惟钧候动止万福敌自昨日探报後未有继至者张少傅处见録到伪榜文必已缴申狂悖之志可见传闻既广远近不无震骇姑示以持重镇安人心而密计所当为者以俟朝廷处分然後施行事不一未易遽陈窃料庙谋必皆有定策今沿江一带自江州直至临安几千余里顺流而下无非可堤防者昨敌两至江上审观形势已熟四五年来又多得淮浙人讲究利害宜无所不至必不更循旧辙当有出我不意者则我恐亦不当但以前日待之询之衆论多谓敌前两至朝廷先失之畏而不为守计故但退避彼得乘以渡江复失之怯而不为战计故仅能守彼师老得以善去今日之算惟一切反此内力为守备使纖悉无遗策外示以战形使知吾无所憚姑存和议佯为小屈以观其衅彼是畏我则必以谬悠之辞迫我而不敢来倘疑而未决则必且拥重兵向江以尝我我坚壁不动与之相持待其粮尽力屈则惟所欲为不识亦足聽采否目下急务莫若先弃蕩积聚使无所仰食以伐其谋纵有不及亦胜不为若朝廷不欲便行则但委诸将分为固不害事我所储备尤不可缓本路建康最号丰足比计之内外诸司一金以上共不满七十万缗米六七万石而已他州可知常平糴米并买牛更乞详度轻重民去接新已近阙牛户早禾栽插已徧晚禾人各自擘画亦不至甚病姑存之亦善某职守过计仰恃眷予不敢自为形迹辄僭具稟达继有可效区区者亦当节次续闻伏幸寬明貸亮不宣

卷三十六

<史部,地理类,都会郡县之属,景定建康志>

钦定四库全书

景定建康志卷三十六 宋 周应合 撰

文籍志四

露布

曹彬平李煜露布行营马步军战棹都摠管宣徽南院使义成军节度使臣曹彬等上尚书兵部臣等闻天道之生成庶类不无雷电之威圣君之统制万邦须有干戈之役所以表陰慘阳舒之义彰吊民伐罪之功我国家开万世之基应千年之运四海尽归於临照八紘皆入於提封西定巴邛复五千里昇平之地南收岭表除七十年僭伪之邦巍巍而帝道弥光赫赫而皇威远被顷者因缘丧乱分裂土疆累朝皆遇於暗君莫能开拓中夏今逢於英主无不扫除惟彼江南言修臣礼外示恭勤之兒内怀奸诈之谋况李煜比是駮童固无远略负君亲之煦育信左右之奸邪曾乖量力之心但贮欺天之意修葺城垒欲为固守之谋招纳叛亡潜萌抵拒之计我皇帝义深含垢志在包荒擢青琐之近臣降紫泥之丹诏曲示推恩之道俾修入覲之仪期暂詣於阙庭庶尽消於疑间示信特开於生路执迷自履於危途托疾不朝坚心背顺士庶咸怀於愤激君亲曲为之优容但矜孤孽之愚蒙虑陷人民於涂炭累宣明旨庶俾自新略无悛悟之心转恣陆梁之性事不获已至於用兵大江特剗於长桥锐旅寻围於逆垒皇帝陛下尚垂恩宥终欲保全遣亲弟从监归回降天书委曲抚谕务从庇护无所阙焉终怀蛇豕之心不体乾坤之造送蜡书则勾连逆寇肆凶徒则刼掠王民劳我大军驻蹕周岁既人神之共怒复飞走以无门貔貅竟効其先登虬虱自悲於相吊臣等於十一月二十七日齐驱战士直取孤城奸臣无漏於?中李煜生擒於麾下千里之氛霾顿息万家之生聚寻安其在城官吏僧道军人百姓等久在偏方困於虐政喜逢荡定皆遂舒苏望天朝而无不涕洟乐皇化而惟知鼓舞有以见穹旻助顺海岳知归当圣朝临御之期是文轨混同之日卷甲而兵锋永戢垂衣而帝祚无穷臣等俱乏将材谬司戎律遥禀一人之睿略幸成九伐之微劳其江南国主煜并伪命臣僚既就生擒合将献捷臣等无任歌时乐圣庆快懽呼之至谨奉露布以闻

表状

张咏到任谢表臣咏言伏奉六月二十七日勅差臣知昇州军州兼提举江南东路兵马巡检捉贼公事已於八月二十二日到州署事讫恭以道有所存物无不遂臣萦宿疾分合退身皇情重惜其辞荣大镇许从於卧理感深出涕恩极难言中谢臣闻昔者圣君之御人也博爱溥

施包荒济美九有仰大中之化羣伦无不达之情伏惟皇帝陛下恭已临朝推诚接下英断比於太祖寬仁类於太宗谓选能为共治之资则躬行采录谓节用为恤民之本则慎乃盘游加不忘功兼之念旧有若陈纬苦战田锡直言越次褒延惊骇视听梁周翰前朝名辈邢昺望苑元勲俱及耄年不许去位非常礼遇优与俸钱四海之人聚首而议以为陛下之德有以继舜齐尧辉宗映祖若周文之兢持未足多也书美昌言礼贵养老未为可也虽圣政无涯不可妄纪而生民受赐抑又何名窃念臣本族无称学文自任爰从中第洎至登朝徒切励精少防於责实絕无朋比曲借於余光凡四转官便参枢要复三数岁已忝丞郎信暘时骤进之身过往哲九迁之遇退量浅劣不称翺扬止在捐軀聊以报国重念臣少因酒过晚觉病多仰天眷以抚安烦国医之诊护其如气候渐劣根本难瘳既乖侍从之仪寔玷衣冠之列岂敢便谋致政坚请分司重闕辄拜於封章小郡觐全於颐养不谓睿慈惻愍兑泽沾濡作藩更委於兵权起任仍兼於水路而复中官赐药内府支金谓九转之灵丹可延性命谓三钱之秘宝足了生涯天意所鍾愚臣备识必将垂世流为美谈知微臣遇主之荣比肩旧老广陛下爱人之旨接武前皇臣虽事上之少劳陛下待臣之已甚而况江山秀絕民物骈繁狱讼简清事务整集上仗神妙之力下因僚吏之勤望保残年再覩双阙此愚臣之愿陛下之恩也既感陛下忧臣之身臣敢不忧陛下之事一欲宣导风化惠绥黎元兼令凶忤之人渐识淳和之理凭兹恳款上答恩休云云张咏谢抚问状右臣四月日侍御史赵湘到州奉传圣旨抚问臣治郡不易头上疮子瘥否祇荷宠灵不任感惧窃念臣素昧摄生早戒酒因成癖饮薄在中焦疗之虽得暂通食後依然复改引不归胃传之入头积鬱既多疮痛斯见医工切脉惟云五脏以皆安疡人傳膏未覩一毫之为減盖由臣光陰迟暮气血衰微凉难尽保於瘥平祇可更坚於调护而幸官曹知劝黎庶轻徭兼缘静治之时希有挠心之事觐延算数上奉君亲伏蒙皇帝陛下曲赐軫怜远加安抚手舞足蹈似非多病之身宠异荣深不类具臣之列得不恭遵善训恳守冲和励益壮之筋骸了旋生之公事少分忧寄以报鸿私云云

又谢传宣问失火及安抚人户事状右臣今月十四日得入内内侍殿头郝昭信到州传宣王智家失火卿何不早与救灭致伤人口仰安抚人户者拜命之次惊惧失图窃念臣谬处要官叨知大郡虽切向公之志全无利物之能况当州经伪号之余庶事失酌中之理街衢徧隘凉车马以才通屋宇低徊复茅竹之相杂一昨阳春始半时雨稍愆烈焰忽飞狂风并作人不及走目不暇旋一食之间千室俱烬虽有貔貅之士参以保甲之民衆力同驰百心一济并防库务及护衙城猛势之中幸而获免皆疑天火或说人灾寔由郡政之未孚致使炎灵之不佑俾民罹祸貽君远忧臣合自疏愆尤请行典宪甘从深谴以谢无功伏蒙皇帝陛下特遣近人远传宥命抚安居户奠祭亡魂被苦之家已识哀矜之意垂白之老兼闻感泣之声臣敢不益励赤诚恭求要道期收来效少赎前非臣与经火户人无任感天荷圣激切屏营之至云云

曾肇到任谢表臣肇言伏奉勅命差知江宁军府充江南东路兵马钤辖臣已於今月二十四日到任讫七旬魏阙未偿去国之思五月彭门曾乏近民之政忽奉除书之赐更叨易地之优事云初省躬知幸中谢窃念臣学术不足知古而早坐侍从之班治行亡以过人而屡忝藩宣之寄矧六朝都邑之旧有四面山川之雄舟楫往来几半天下师屯节制寔總江东屏蔽王都控带南国折冲御侮自昔固难其材宣化承流於今尤遴其选岂伊疲輓可副咨求此盖伏遇皇帝陛下礼遇臣隣惠绥黎庶谓臣偶缀朝廷之近职是宜假宠於名城以臣粗知仁圣之用

心因使分忧於远服谨当夙夜匪懈奉行寬大之书悃悃无华希慕循良之迹庶收丝髮之效少称丘山之恩臣无任感天荷圣激切屏营之至云云太皇太后词同

汪藻到任谢表戎车未殄方勤旰食之忧将钺分临误忝方维之寄任非所可委莫获辞伏念臣顷缘病衰自投闲散田庐退屏岁月再更当践土之未还念朔方之犹炽既不能负羈紲以从奔走之役又不获执干戈以宣屏卫之劳谁意眷慈犹叨寄省惟六朝之旧国控三路之要津代马饮江已兆佛狸之死秦兵出项难逃淝水之诛但愧厓残知难勉强恭惟皇帝陛下志存宗社德冒华夷愤中原之沦胥悯多方之横溃栉风沐雨跋履山川推食解衣招徠将士将回鸾而北指用推轂以先驱但臣筋力已疲智谋何有周旋一壑已惭祖逖起舞之言顾视四方安取元龙上床之意敢不作兴士气申固疆圉陈力不能虽精神之未効见危致命尚宿志之犹存

车驾幸建康府李纲起居表臣某言伏覩都进奏院报车驾以二月二十七日进发临幸建康府者乾旋坤转共知天意之回雷动风行顿觉皇威之畅御六龙以于迈屯万乘以要区三灵懽忻四海呼舞中贺窃以江左之形势莫如建邺之雄浑自昔称帝王之州於今为东南之会控引淮海襟带江湖岂惟民物之阜蕃寔乃舟车之辐凑玉麟神玺晋以中兴虎踞龙盘吴资用武兵戎之後王气方隆皇帝陛下慨国步之多艰悯帝都之未复因兹天险济以人谋高祖之固关中战必胜而攻必取光武之保河内利则伸而钝则蟠赤县神州行遂定都於河洛灵州沃野聊兹临幸於江山方将张皇六师震叠中土驾馭貔虎翦屠鲸鲵扫陵寢之氛埃葺宗庙之钟虞恢复故境再臻太平而臣误被宸恩滥当闕寄虽长堤新廐窃慕於韦丹顾重镇上流有慙於温峤心驰魏阙莫参鸳鹭之行地近日畿益倾葵藿之志大驾驻蹕建康府綦宗礼起居表地鍾王气兆凤见於前朝名协藩封祥寔开於上圣仰銮輿之再驾知寰宇之将同中谢恭惟皇帝陛下德迈宣光孝如舜禹励枕戈之志勤万乘以亲行均挟纆之恩抚六师而争奋遂临江次以定域中神灵所扶夷夏咸耸臣昔从清蹕叨侍禁墀梦越秦淮已远同朝之倡功成京邑庶陪复会之期

叶梦得到任谢表分东道之封圻再临江国守北门之管钥密护宸居任非所堪辞不获命臣某中谢伏念臣去违轩陛俯仰十年退伏丘园栖迟一壑念多垒尚艰则怀捐躯尽瘁之义思大恩未报则有毕念靡它之言敢择所安自求远屏喟年龄之浸晚迫疾恙之交攻惟圣主曲亮此心故愚臣得安其分岂期人乏复误诏除力殫恳欸之诚莫动高明之听勉交印绶寔愧吏民兹盖伏遇皇帝陛下惠顾臣邻忧勤土宇抚万邦巡侯甸何止临践土之宫会诸侯选车徒是将复东都之业责其来效付以旧邦斗运天旋已振荆吴之胜槩风驱电扫行销河岱之妖氛但臣陈力不能强顏何补钦承威旨暂假岁时疆场无虞倘苟逃於譴累冕旒甚还尚终冀於慈怜

谢奏陈金人退败降诏獎谕表正王者之兵既张天讨申輿人之诵少达下情仰荷眷慈特膺殊獎臣某中谢伏念臣少而不武老益无能当长江御侮之冲适敌人败盟之际惟紂臣有亿万衆皆倒戈攻後之徒而楚恶已数十年亦曷丧偕亡之日戎车既驾我武惟扬敌所恃以争先首摧凶焰取彼残而共殄卒扫妖氛慙无矢石之勤滥窃玺书之赐敢怀掠美辄奏罔功兹

盖伏遇皇帝陛下谋发自中威行无外不震不动图维每尽於敌情能弱能强终始弗逃於圣算欲励服劳之士故捐假宠之荣臣方以病衰恳祈退免尧言争诵虽莫酬君父不费之恩汉史絀书犹足贻子孙无穷之宝

谢军寨遗欠放罪表奉职不?自貽旷败抚躬引咎方俟谴诃仰荷宽慈曲从贷释中谢伏念臣素无远用本窻凡材沈迷簿领之间徒劳无补出入兵戈之际愈久益?误窃守符仍司留钥既不能折冲强敌少尽力於疆陲又无以和辑疲民使安生於闾里致令非意罔戒不虞知重废於官常敢幸逃於吏议兹盖伏遇皇帝陛下谨微接下以德行仁虽爱悯黎元如御朽索之马而保全臣子每漏吞舟之鱼念将迫於终更俾不污於後累臣敢不勉殫衰懦深务省循岂不怀归未遂乞身之请退思补过终慙报国之心

辞免资政殿大学士窃惟幸不可数常情所畏老而戒得前训甚明非至愚迷孰不知警而况身忝近臣职当剧任方陛下信赏劝功之日而羣臣忘身为国之时此而不思曷逃大戾伏念臣出入侍从殆涉三纪中间坐闲几过其半固未尝有一言一事见称於世可报廩食之责而荣名厚禄每以冒居退自省量常若芒刺在已今者待罪近藩甫踰二年虽簿书米盐躬督僚吏夙夜尽瘁乃其职事所当为至於陛下爱恤疲民欲其蕃庶整齐军旅欲其安强则无毫髮之效而进官未几加职继下况资政殿设大学士真宗皇帝特创以为近弼非常之宠累朝不轻与人臣独何心乃敢贪取欲望圣慈察其危情出於恳迫不敢但同常礼屡勤诏旨许令特赐罢免使臣垂白之年粗免清议得窃知耻止足之名陛下所赐已多虽一日九迁何以复加

谢资政殿大学士表一字之褒仰勤明训十旬之内再沐误恩恳辞莫効於精诚祇命惟增於战栗中谢伏念臣逢时过幸受宠居多积丘山未报之私无毫髮可论之效岂不曰知难而退悼此志之未伸固尝怀见义必为曾余生之何有矧兹黠寇方正严诛驱太原北伐之师虽即期於殄灭保洛邑东郊之衆可无待於抚绥自省何劳能当异数兹盖伏遇皇帝陛下矜存旧物驾御羣材视臣隣如股肱盖欲奔趋而承事以爵禄为砥石又将磨厉以劝功重假衰残申加獎饰佩景德升班之意敢陪近弼之殊荣追修文创始之名尤愧诸儒之极选虽期陨首莫称所天

辞免观文殿学士仍再任臣今月某日準御前金字牌降到尚书省劄子一道伏奉圣恩除臣观文殿学士令再任者闻命震惊罔知攸措伏念臣衰病余生昨者误蒙圣知起之闲废付以一面虽夙夜罄竭疲弩自知无以报称故频年屡干天聽乞从罢免仰荷眷私未即报可迂延已及终更方局踣以俟俞旨忽闻有此除授退量已试之效寔无秋毫小补岂敢重愧军民辄怀贪冒兼观文殿学士职名祖宗故事藩镇外除无几臣独何人可当异数伏望天高听卑俯察微恳特赐寝罢新命检会臣前後累奏除一外任宫观差遣

谢观文殿学士表恩非所称难逃负乘之讥命出非常莫获循墙之避重勤训饬倍极兢危臣某中谢窃惟学士建名虽兴前代近臣分职盖始本朝至於易文明顾问之称冠秘殿宠褒之盛仰观故事尤号殊荣爰历艰难盖多勲德以旧臣宣劳於外固不乏人由建炎越次而除则无前比乃如固陋其敢叨逾兹盖伏遇皇帝陛下义笃臣邻忧深中外谓与之名者将求其实

而使之礼者必报其忠故於贤贤蒐选之间每有下下并包之意重念臣受材至薄涉世多艰少日量能尚有满盈之戒暮年多取岂无颠覆之忧虽愿竭於余生恐终辜於大造

谢再任表三载黜幽方惧干於明宪再命而伋忽荐被於异恩不称所蒙重慙非据臣某中谢伏念臣早由?贱误窃宠荣先朝滥竇於从班本无报效陛下擢登於政路已迫衰残自知陈力之无堪唯有乞身而退屏逮谋帅阉仍玷留都故连年虽幸於苟安而无岁不祈於罢免仰蒙全贷偶及终更惟鼯鼠五技之既穷亦弩马十驾之何及岂期过听更责後图兹盖伏遇皇帝陛下体貌羣工作兴庶政念其拳拳忠款初非有爱於余生察其龊龊廉勤犹未遽罹於大过姑令代匱岂曰因能丁宁殆至於再三感励难酬於万一臣敢不钦承德意勉激愚衷苟子产见推晚或容於郑俗虽廉颇已老终无憾於赵人

贺大朝会表宸心抑畏旷盛典而弗居羣议载扬幸戎兵之始间是为周礼岂惟汉仪臣某中谢恭惟皇帝陛下基命昊天绍休文祖惟聪明睿知而不杀故能服天下无所用威既艰难险阻之备尝则必履帝位以大居正路车在列钟虞毕陈湛露惟曦共仰朝阳之盛横流式遏敢忘巨海之归臣假守外藩获逢熙事五侯奉币滥居邦甸之先万壽称觴莫预公王之末

叶适到任谢表内参从橐之业外付师垣之重盖人以为宠而臣之所忧中谢伏以行宫蒙高宗临御之频建邺为六朝都邑之旧感时虽远抚事尚存义报仇讎安得不居今而思古虑先根本则岂容忘实而徇名藩墙初锐於扫除堂奥遽烦於备警江流回绕遂将数里而屯民力空殫必也计丁而役募市人至万数閱水舰且千余欲以岁年之规责於旬月之近自怜忧患复苦病昏忽被趣行罔知攸措此盖伏遇皇帝陛下文训武克天施地生观衣袂濡曳之爻所宜戒惧诵桑土绸繆之句尤在恩勤臣敢不?惕以预防拊循而夙具视身衰谢已无欲速之心凭国威灵愿附不争之胜

赵葵到任谢表臣葵言恭準四月十八日制可授臣枢密使兼参知政事督视江淮京西湖北军马续準御笔兼知建康府行宫留守江东南安抚使寻具辞免三省司奉御笔不允不得更有陈请臣已於五月二十六日就镇江府交割江东南安抚使职事今来又於六月初九日到建康府交割建康府行宫留守司职事管干乞者濫陪兵柄何裨立武之功峻陟使权乃冒视师之任申明兼司於筦钥误恩仍被於丝纶叠是龙光凛然蚊负兹饮水而就道已涓日而临戎中谢窃惟帷幄任颢既出膺於隆委宫府体一斯克应於危机未有脉络不贯而忠可输未有心得不孚而事可集尝观往辙徒抱壮怀虽当獎率三军之秋莫展经营四国之志兵事尽付节度宁免拘挛明主可为忠言尚存形迹繄欲乞寬於忧顾允惟信任而责成如臣者多病早衰至愚极陋夙尝艰险仅逃乏絕之讥晚被简知深积侥踰之惧忧时之髮已白体国之心尚丹典枢要则无运动之精神翊政机则蔑贊襄之智略素餐尸位人谓如斯为斲汗顏技止此尔比吁天而沥悃谓指日以投闲宥密高聯倏拜超迁之渥丕宁垣制趣为督护之行勉之以不从中御之词继之以汝择自从之训圣恩天大臣想渊临果曷称於倚毗但莫胜於陨越兹盖恭遇皇帝陛下乾坤覆育日月照临明目达聪广虞舜知人之哲谨微接下懋宣王复古之勋俾申饬於师干庸布昭於圣武凡叨任使畴不激昂臣敢不仰体宸心俯殫臣节鞠躬尽力所当无歉於前修御侮折冲尚覬少收於後效

赵葵辞免转官表臣葵言伏蒙圣恩以臣视师朞年特转三官依前枢密使兼参知政事督视江淮京西湖北军马兼知建康府江东安抚使行宫留守仍加恩寻具辞免特降诏书不允者囊封飞奏恳还褒赏之荣銓禁出纶曲示训辞之宠冀乞收於误渥庸叠冒於聪闻中谢臣曩稟庙谟出提师律谨守平平之策曾无赫赫之名受任朞年技已穷而宜去祈闲累疏言虽切而弗俞爱仰体於眷留用复祗於戎役尚虞绵力莫济後艰至若计官资之崇卑较邑封之多少臣之素志寔匪敢知夫何诞布於恩徽抑且申嘉於戎捷边城郤敌盖将士之勤劳淮水安流本朝廷之威德而臣下掠衆美上冒洪私倘复昧於牢辞将重干于大戾伏望皇帝陛下执驭臣之轡策谨在笥之衣裳念臣忝备端枢於宠荣而已极察臣偶无阙事乃职分之当为母拘反汗之嫌俯徇由衷之请俾仍旧秩用穆僉言所有恩命臣未敢只受臣无任瞻天望圣激切屏营之至

马光祖到任谢表臣光祖言伏奉告命除臣江淮制置大使知建康府兼江东安抚使臣除已於四月初三日到任交割职事望阙遥谢祇受讠者荆州授代祈返故庐书殿陞班还畀旧镇大恩天造危涕雨零已延见於吏民如归对其子弟谓臣去畀之後才及一年讶臣守边北来老已数倍臣具宣德意咸得欢心中谢载念臣蒙被简知当加鞭辟虽一日欲办一日之事母敢惰容然三边自有三边之才终慚本色曩风涛之震撼每雨露之涵濡既全孤踪复误殊渥恩言嘉獎岂憚再三温旨慰存非止一二臣际逢明圣殊异寻常他无称塞之方惟竭驰驱之力深惟阃事尤切江防绸繆牖户之当先绵络舟船之当急兵当使练民当使安昔素幸其相孚今仍持於不扰尝以重来之意揭诸四达之衢上昭皇仁下尽臣职兹盖恭遇皇帝陛下文武并用功德兼隆朝夕忧勤至损玉食时几谨勅思保金瓯厚司马法之赏以激士心辍奉宸库之财以济国用爰重陪都之寄濫叨易地之除臣敢不体奎画之下賁於风采而振飭忠信以事其上直可通天死生不入於心惟知报国臣无任感天荷圣激切屏营之至

马光祖谢赐大使印表麟符改畀增重使名龟印肇颁有辜恩命矩陰阳而办器炉天地以成功八字昭垂百神参护【中谢】伏念臣身叨授钺才匪攻金砥砺孤忠不移水火之性销磨万事犹存铁石之心奉绋诏以重来愧铅刀之再割爰趣有司之刻式隆外阃之权森玉筯以分明俨金窠而妥帖江山精采壁奎辉煌兹盖恭遇皇帝陛下同符三皇作信万国公侯封而论赏曾无刊敝之私核治效以赐书具严勉励之意用广陶熔之造俾膺累若之荣臣敢不奉以钦行守而勿坠恐威棱寢减望风乏解綬之人逮边鄙康宁即日上归田之疏马光祖谢授资政殿大学士表上公制胜赏及济师遽殿陞班任仍专阃所谓因人而成事是为不稼而取禾牢辞弗俞冒受知愧中谢臣窃观大学士之选间宠旧辅臣之尊祥符赐敏中之诗参以两制康定如梁适之请止於二员凡特冠于隆名盖有资於庶政我祖宗所不轻授故臣子以为至荣矧管钥之寄要在当仁而铅刀之材已试弗绩乃颁误渥更厠黄扉伏念臣本乏异能过叨繁使属蚁蜂之巢聚上贻当宁之忧率貔虎以徂征外稟宣威之令赖武丝之密运致晷纬之森明皆谢安授将之功皆裴度董师之力於臣何有敢意此除兹盖恭遇皇帝陛下刚健时行武文天运谓朝廷之名器不以假人谓军国之纪纲先乎信赏知臣虽无可利用之寔察臣粗守不欺之忠爰锡袞褒聊示甄别臣敢不誓酬獎拔徒恨衰頹颺技已穷况复过饮河之量弩材既顿恐难妨历块之良

马光祖谢授观文殿学士表它职留台慙无寸效通班书殿序进一阶俨分野之不移赫观瞻之自改中谢眷延恩之遽幄本集瑞之秘庭夷考先朝以待旧辅臣之礼亦有宰揆未加大学士之名至於外臣之叨际盖亦历年而间见允为异数顾可冒居乃若臣愚滥承人乏少仕州县但服劳於期会之间晚际圣明遂许国以驰驱之事克恭朝夕惟命东西诵诸葛讨贼之词慨然太息慕充国请行之勇疑是前生虽两阕之间粗免踈虞然三军之事竟非习熟而况老将知而毫及食既少而事烦岁月暮迟病疾萦绊臣为此惧将削牍以祈闲帝矜其愚又加恩而因任循墙无计望阙知归兹盖伏遇皇帝陛下圣策有功常德立武谨微接下聿嘉庭燎之规复古会侯克振车攻之业致令冗散获与调剂臣惟有寤寐铁衣摩娑石鼓观人文以化天下虽莫辅於缉熙锡王命以在师中尚力全於征吉

卷三十七

钦定四库全书

景定建康志卷三十七 宋 周应合 撰

文籍志五

诗章【此卷不能尽者各载於诸志所为作之下】

陶潜初为刘裕参军曰赋诗【臧荣绪晋书曰宋武帝行镇军将军沈约宋书曰陶潜字渊明浔阳人少有高趣为镇军参军後为彭泽令解印绶去职】弱龄寄事外委怀在琴书被褐欣自得屡空常晏如时来苟宜会宛讐憩通衢投策命晨旅暂与园田踈渺渺孤舟逝縣縣归思紆我行岂不遥登降千里余目倦修涂异心念山泽居望云慙高鸟临水愧游鱼真想初在襟谁谓形迹拘聊且凭化迁终反班生庐【渊明初为参军时已察事变志於遯世矣】辛丑岁七月赴假夜行涂口诗【沈约宋书曰潜自以曾祖晋世宰辅不复屈身後代自宋祖王业渐隆不复肯仕所着文章皆题年月义熙以前者则书晋氏年号永初以来唯云甲子而已】闲居三十载遂与尘事冥诗书敦宿好林园无世情如何舍此去遥遥至西荆叩棧亲秋月临流别友生凉风起将夕夜景湛虚明昭昭天宇阔晶晶川上平怀役不遑寐中宵尚孤征商歌非吾事依依在耦耕投冠旋旧墟不为好爵荣养真衡茅下庶以善自名金陵阻风雪书寄杨江宁【一作新林浦阻风寄友人】潮水定可信大风难与期清晨西北转薄暮东南吹以此难挂席洄沿颇淹迟使索金陵书又叨贤宰知弦歌止过客惠化闻京师海月破团景菰蒋生渌池昨日北苑花初开未滿枝今看白门柳夹道垂青丝岁物忽如此我来复几时纷纷江上雪草草客中悲明发板桥浦空吟谢朓诗【此系李太白诗】

谢朓作鼓吹曲江南佳丽地金陵帝王州迢迢带绿水迢迢起朱楼飞甍夹驰道垂杨御沟凝笳翼高盖叠鼓送华輶献纳云台表功名良可收游东田诗【朓有庄在鍾山东游还作】戚戚苦无惊攜手共行乐寻云陟累榭随山望菌阁远树暖芊芊生烟纷漠漠鱼戏新荷动鸟散余花落不对芳春酒还望青山郭

高蟾金陵晚望诗曾作浮云归晚翠犹陪落日泛秋声世间无限丹青手一片伤心画不成

司空文明金陵怀古诗輶路江枫暗宫潮野草春伤心庾开府老作北朝臣

顏延之作释奠诗【文帝元嘉二十年三月皇太子劭释奠於国学延年奉诏而作诗】国尚师位家崇儒门稟道毓德讲艺立言浚明爽曙达义兹昏永瞻先觉顾惟後昆大人长物继天接圣时屯必亨运蒙则正偃闭武术阐扬文令庶士倾风万流仰镜虞庠饰馆睿图炳睟怀仁

憬集抱智麝至踵门陈书蹶躄献器澡身玄渊宅心道秘伊昔周储聿光往记思皇世哲体元
作嗣资此夙知降从经志遶彼前文规周矩植正殿虚筵司分简日尚席函丈丞疑奉帙侍言
称辞惇史秉笔妙识几音王载有述肆议芳讯大教克明敬躬祀典告奠圣灵礼属观盟乐荐
歌笙昭事是肃俎寔非馨献终袞吉即宫广譙堂设象筵庭宿金悬台保兼徽皇戚比彦肴乾
酒澄端服整弁六官眡命九宾相仪纓笏匝序巾卷充街都庄云动野馗风驰伦周伍汉超哉
邈猗清晖在天容光必照物任其情理宣其奥妄先国胄侧闻邦教徒愧微冥终谢智効

沈约登鍾山作灵山纪地德地险资岳灵终南表秦观少室迹王城翠凤翔淮海衿带绕神垵
北阜何其峻林薄杳葱青发地多奇岭干云非一状合?共隐天参差互相望郁律构丹巘峻嶒
起青嶂势随九疑高气与三山壮即事既多美临眺殊复奇南瞻储胥观西望昆明池山口咸
可悦赏逐四时移春光发陇首秋风生桂枝多值息心侣结架山之足八解鸣涧流四禅隐岩
曲窈冥终不见萧条无可欲所愿从之游寸心於此足君王挺逸趣羽旆临崇基白云随玉趾
青霞杂桂旗淹留访五药顾步伫三芝于焉仰鑣驾岁暮以为期

李白金陵歌送别范宣石头巉巖如虎踞凌波欲过沧江去鍾山龙盘走势来秀色横分历阳
树四十余帝三百秋功名事迹随东流白马小儿谁家子泰清之岁来关囚【一作白马金鞍
谁家子吹唇虎啸凤凰楼】金陵昔时何壮哉席卷英豪天下来冠盖散为烟雾尽金舆玉座
成寒灰扣劍悲吟空咄嗟梁陈白骨乱如麻天子龙沈景阳井谁歌玉树後庭花此地伤心不
能道目下离离长春草送尔长江万里心他年来访商山皓金陵三首晋室【一作家】南渡
日此地旧长安地即帝王宅山为龙虎盘金陵空壮观天堑【一作江寒】淨波澜醉落回桡
去吴歌且自欢【一作谁云行路难】又地拥金陵势城回江【一作汉】水流当时百万户
夹道起朱楼亡国生春草离宫没古丘空余後湖月波上对沧洲【一作瀛洲】又六代兴亡
国三杯为尔歌苑方秦地少【一作小】山似洛阳多古殿吴花草深宫晋绮罗并随人事灭
东逝与【一作只】沧波登梅岗望金陵赠族侄高座寺僧中孚鍾山抱金陵霸气昔腾发天
开帝王居海日照宫阙羣峰如逐鹿奔走相驰突江水九道来云端遥明没时迁大运去龙虎
势休歇我来属天清登览穷楚越吾宗挺禅伯特秀鸾凤骨衆星罗青天明者独有月冥居顺
生理草木不翦伐烟牕引薔薇石壁老野蕨吴风谢安屐白足傲履屨几宿一下山萧然忘干
谒谈经演金偈降鹤舞海雪时间天香来了与世事絶佳游不可得春风惜远别赋诗留岩屏
千载庶不灭赠昇州王使君忠臣六代帝王国三吴佳丽城贤人当重寄天子借高名巨海一
边静长江万里清应须救赵策未许弃侯嬴别金陵诸公海水昔飞动三龙纷战争鍾山危波
澜倾

侧駭奔鯨黃旗一掃蕩割壤開吳京六代更霸主遺迹見都城【一作遺都見空城】至今秦
淮間禮樂秀羣英地扇鄒魯學詩騰顏謝名五月金陵西祖余白下亭欲尋廬峰頂先繞漢水
行香爐紫烟滅瀑布落太清若攀星辰去揮手緬含情金陵泝流玩月達天門因寄句容主簿
滄江泝流歸白壁見秋月秋月照白壁皓如山陰雪幽人停宵征賈客忘早發進帆天門山回
首牛渚沒川長信風來日出宿霧歇故人在咫尺新賞成胡越寄君青蘭花惠好庶不絶游金
陵贈同旅朝登北湖亭遙望瓦屋山天清白露下始覺秋風還游子托主人仰觀眉睫間日【
一作目】色送飛鴻邈然不可攀長吁相勸勉何事來吳關聞有貞義女振窮漂水灣清光了

在目【一作眼】白日如披顏高坟五六墩峯兀栖猛虎遗迹翳九泉芳名动千古子胥昔乞食此女倾壶浆运开展宿愤入楚鞭平王凜烈天地间闻名若怀霜壮夫或未达十步九太行与君拂衣去万里同翱翔金陵听韩侍御吹笛韩公吹玉笛倜傥流英音风吹绕鍾山万壑皆龙吟王子停凤管师襄掩瑶琴余响渡江去天涯安可寻春日陪杨江宁宴感古作昔闻顏光禄攀龙宴京湖楼船入天镜帐殿开云衢君王歌大风如乐丰沛都延年献嘉作邈与诗人俱我来不及此独立鍾山孤杨宰穆清飈芳声腾海隅英寮满四座灿若琼林敷鷁首弄倒景蛾眉缀明珠新弦采梨园古舞娇吴歆曲度绕云汉听者皆欢娱鸡栖何嘈嘈沿月沸笙竽古之帝宫苑今乃人樵苏感此劝一觴愿君覆瓢壶荣盛【一作盛时】当作乐无令後贤吁金陵江上遇蓬池隐者【时於落星石上以紫绮裘换酒为欢】心爱名山游身随名山远罗浮麻姑台此去或未返遇君蓬池隐就我石上饭空言不成欢强笑惜日晚綠水向鴈门黄云蔽龙山叹息两客者徘徊吴越间共语一执手留连夜将久解我紫绮裘且换金陵酒酒来笑复歌兴酣乐事多水影弄月色清光奈愁何明晨挂帆席离恨满沧波金陵城西楼月下吟金陵夜寂凉风发独上西楼望吴越白云映水摇空城白露如珠滴秋月月下长吟久不归古今相接眼中稀解道澄江静如练令人却忆谢元晖月夜金陵怀古苍苍金陵月空悬帝王州天文列宿在霸业大江流綠水絕驰道青松摧古丘台倾鵙鹊观宫没凤凰楼别殿悲清暑芳园罢乐游一闻歌玉树萧?後庭秋戏赠郑溧阳陶令日日醉不知五柳春素琴本无弦漉酒用葛巾清风北窗下自谓羲皇人何时到溧里一见平生亲赠溧阳宋少府陟李斯未相秦且逐东门兔宋玉事襄王能为高唐赋常闻淶水曲忽此相逢遇潇洒青天开豁然披云雾葳蕤紫鸾鸟巢在崑山树惊风西北吹飞落南溟去早怀经济策特受龙顏顾白玉栖青蝇君臣忽行路人生感分义贵欲呈丹素何日清中原相期廓天步猛虎行朝作猛虎行暮作猛虎吟肠断非关陇头水泪下不为雍门琴旂旌缤纷两河道战鼓惊山欲倾倒秦人半作燕地囚胡马翻衔洛阳草一输一失关下兵朝降夕叛幽蓟城巨鳌未斩海水动鱼龙奔走安得宁颇似楚汉时翻覆无定止朝过博浪沙暮入淮陰市张良未遇韩信贫刘项存亡在两臣暂到下邳受兵略来投漂母作主人贤哲栖栖古如此今时亦弃青云士有策不敢犯龙鳞窜身南国避胡尘宝书长劔挂高阁金鞍骏马散故人昨日方为宣城客掣铃交通二千石有时六博快壮心遶牀三匝呼一掷楚人每道张旭奇心藏风云世莫知三吴邦伯皆顾盼四海雄侠相追随萧曹曾作沛中吏攀龙附凤当有时溧阳酒楼三月春杨花茫茫愁杀人胡人【一作胡雏】綠眼吹玉笛吴歌白紵飞梁尘丈夫相见且为乐槌牛糴鼓会衆宾我从此去钓东海得鱼笑寄情相亲

杜甫送许八拾遗归江宁觀省【甫昔时尝客游此县於许生处乞瓦棺寺维摩图樣志诸篇末】诏许辞中禁慈顏赴北堂圣朝新孝理祖席倍辉光内帑擎偏重官衣着更香淮陰新夜驿京口渡江航春隔鸡人昼秋期燕子凉赐书夸父老壽酒乐城隍看画曾饥渴追踪恨淼茫虎头金粟影神妙独难忘韦庄金陵图江雨霏霏江草齐六朝如梦鸟空啼无情最是台城柳依旧烟笼十里堤

刘禹锡金陵怀古王濬楼船下益州金陵王气黯然收千寻铁锁沈江底一片降幡出石头人世几回伤往事山形依旧枕寒流而今四海为家日故垒萧萧芦荻秋沈彬金陵杂题王气生秦四百年晋元东渡浪花船正慙海内皆涂地来保江南一片天古树着行临远岸暮山相亚出微烟千征万战英雄尽落日牛羊食野田暮潮声落草光沈贾客来帆宿岸陰一笛月明何

处酒满城秋色几家砧时清曾恶桓温盛山翠长牵谢傅心今日到来何物在碧烟和雨锁寒林
再过金陵玉树歌终王气收鴈行高送石头秋江山不管兴亡事一任斜阳伴客愁

王贞白金陵怀古恃险不种德兴亡叹数穷石城几换主天堑漫连空御路叠成塚台基聚牧童
折碑犹有字多纪晋英雄 又六代江山在繁华古帝都乱来城不守战後地多芜寒日随潮落
归帆与鸟孤兴亡多少事回首一长吁

杜牧金陵始发碧江口旷然谐远心风清舟在监日落水浮金瓜步逢潮信台城过雁音故乡
何处是云外即乔林

罗隐过江宁县前水色细鳞鳞一为夫君吊水滨漫把文章矜後代可知荣贵是他人口偷旧韵
还成曲草赖余吟尽解春我亦有心无处说等闲停棹似迷津 夜泊金陵冷烟轻澹傍衰丛
此夕秦淮驻断篷栖雁远惊沽酒火乱鷗高避落帆风地销王气波声急山带秋陰树影空六
代精灵人不见思量应在月明中

又玉树歌声泽国春累累辘轳重忆亡陈垂衣端拱浑闲事忍把江山乞与人 又潮平远岸草侵沙
东晋衰来最可嗟庾舅已能窥帝室王郎还是预人家山寒老树啼风曲泉暖枯茭动芷芽
欲起九原看一遍秦淮声急日西斜李羣玉秣陵怀古野花黄叶旧吴宫六代豪华烛散风龙
虎势衰佳气歇凤凰名在故台空市朝迁变秋芜绿坟壠高低落照红霸业鼎图人去尽独来
惆怅水云中崔涂金陵怀古苇声萧飒水天秋吟对金陵古渡头千载是非输蝶梦一樽风雨
属渔舟若无仙分应须老幸有山归即合休何必登临更惆怅本来身世只如浮唐尧臣金陵
怀古晋末英雄起神器沦荒服胡月蚀中原白日升阳谷金陵寔形胜关山固重复巨壑隍北
壩长江堑西隩凿山拟嵩华穿地象伊谷草昧席罗图萆路戴黄屋一时因地险五世享天禄
礼乐何煌煌文章纷郁郁多士春林秀作颂清风穆出入三百年朝事几翻覆揜如云勃鲸
蜃旋自曝倦闻金鼎移骤覩灵龟卜吁嗟王气尽坐悲天运倏天道何茫茫善淫乃相复行路
偏衣半遂亡大梁族日隐汀洲上舳舻登川陆月回吴山树风闻楚江鹄因依兰蕙丛采蘋不
盈掬皮日休金陵道中酬茅山广文南阳博士寒岚依约认华阳遥忆高人卧草堂半日始斋
青?饭移时空印白檀香鹤雏入夜归云屋乳管逢春落石床谁道夫君无伴侣不离窗下见羲
皇 住在华阳第八天望君唯欲结良缘堂后洞里千秋燕厨盖岩根数井泉坛上古松疑度世
观中幽鸟恐成仙不知何事迎新岁乌纳裘中一觉眠 五色香烟惹内文石饴初熟酒微醺
将开丹竈那妨鹤欲算碁图却望云海气半生当洞见瀑冰初坼隔山闻如何世外无交者一卧
金坛祇有君

孟郊溧阳秋霁晚雨晓犹在萧寥激前阶星星满衰鬓耿耿入秋怀旧识半零落前心骤相乖
饱泉亦恐醉惕宦肃如斋上客处华地下寮宅枯崖叩高占生物齟齬固难谐 溧阳唐兴寺观
蔷薇花忽惊红琉璃千艷万艷开佛火不烧物净【一本作静】香空徘徊花下印文字林间
咏觴杯羣官钱宰官此地车马来

许浑赠茅山高拾遗谏猎归来绮季歌大茅峰影薄秋波山斋留客扫红叶野艇送僧披绿莎
长覆旧图碁势尽遍?新品药名多云中黄鹄日千里自宿自飞无?罗

李德裕陪金陵府相中堂夜宴满耳笙歌满眼花满楼珠翠胜吴娃因知海上神仙窟只似人间富贵家绣户夜攒红烛市舞衣晴曳碧天霞声愁夜半青娥散扬子江头月未斜寄茅山孙尊师何地最翛然华阳第八天松风清有露萝月静无烟乍警瑶坛鹤时嘶玉树蝉欲驰千里恋唯有凤门泉石上溪荪发紫茸碧山幽蔼水溶溶菖花定是无人见春日唯应羽客逢独寻兰渚翫驰晖闲倚松窗望翠微遥想春山明月晓玉坛清磬步虚归

崔颢咏江畔老人怨江南年少十八九乘舟欲渡青溪口青溪口边一老翁鬓眉皓白已衰朽自言家代仕梁陈垂朱拖紫三十人两朝出将复入相五世叠起乘朱轮父兄三叶皆尚主子女四代为妃嫔南山赐田接御苑北宫甲第连紫宸直言荣华未休歇不觉山崩海将竭兵戈乱入建康城烟火连烧未央阙衣冠士子陷锋刃良将名臣尽埋没山川改易失市朝衢路纵横填白骨老人此时尚少年脱身走得投海边罢兵岁余未敢出去乡三载方来旋蓬蒿忘却五城宅草木不识青谿田虽然得归到乡土零丁贫贱长辛苦采樵屡入溧阳山刈稻常过新林浦少年欲知老人岁岂知今年一百五君今少壮我已衰我昔少年君不覩人生贵贱各有时莫见羸老相轻欺感君相问为君说说罢不觉令人悲

孙逖杂言丹阳行诗丹阳古郡洞庭阴落日扁舟此路寻传是东南旧都处金陵中断碧江深在昔风尘起京都乱如毁双关戎虏间千门战场里传闻一马化为龙南渡衣冠亦愿从石头横帝里京口拒戎锋青枫林下回天辔杜若洲前转国容都门不见河阳树辇道唯闻建业钟中原悠悠几千里欲扫搀抢未云已英雄倾夺何纷然一盛一衰如逝川可怜宫观重江里金镜相传三百年自从龙见圣人出六合车书混为一昔年王气今何在并向长安就尧日荆榛古木闲荒阡共道繁华不复全赤县余存江树月黄图半入海人烟暮来山川登临遍览古愁吟泪如霰唯有空城多白云春风淡荡无人见

许浑金陵怀古玉树歌残【一作愁】王气终景阳兵合【一作尽】戍楼空松【一作梧】楸远近千官塚禾黍高低六代宫石燕拂云晴亦雨江豚吹浪夜还风英雄一去豪华尽惟有青山似洛中 秋月寄茅山高拾遗一笛迎风黄叶飞强携刀笔换荷衣潮寒水国秋砧早月暗山城夜漏稀岩响远闻樵客过浦深遥送钓童归中年未识从军乐虚近三茅望少微茅山赠梁尊师云屋何年客青山白日长种花春扫雪看籙夜焚香上象壶中濶平生梦里忙幸承仙籍後乞取大还方游茅山步步入山门仙家鸟径分渔樵不到处麋鹿自成羣石面迸出水松头穿破云道人星月下相次礼茅君

李司徒建勲阙下偶书寄孙员外长安驱驰地贵贱共悠悠白日谁相促劳生自不休凤翔双阙晓蝉噪六街秋独有南宫客时来话钓舟离阙下日感恩二年尘冒处中台喜得南归退不才即路敢期皇子送出关犹有御书来未知天地恩何报翻对江山思莫开斜日苇汀凝立处远波微扬翠如苔

王安石和王微之重感南唐事叔宝倾陈衍弊梁可嗟曾不见兴亡斋祠父子终身费酣咏君臣举国荒南狩皖山非故地北师淮水失名王天移四海归真主谁诱昏童肯用长和金陵怀古怀乡访古事悠悠独上江城满目秋一鸟带烟来别渚数帆和雨下归舟萧萧暮吹惊红叶

惨惨寒云厌旧楼故国凄凉谁与问人心无复更风流

和陈辅金陵即事南郭先生比鷓鴣年年过我未愆期休论王谢当时事大抵乌衣祇旧时 和
吴御史临淮感事栅鏐城扉晓一开拖牙车轴转成雷黄尘欲碍龟山出白浪空分汴水来澄
观有材邀昧陋霁云无力报奸回骚人此日追前事悲气随风动管灰送吴龙图知江宁才高
明主睠方深属郡闻风自革心闾里不须多按治山川从此数登临茅檐坐隔云千里栢垄初
抽翠一寻东望泫然知有寄但疑公岂久分襟赠上元宰白下有贤宰能诗如紫芝民欺自不
忍县

治本无为风月谁同赏江山我亦思粉墙侵醉墨惆怅绿苔滋

台城寺侧独行春山撩乱水纵横篱落荒畦草自生独往独来山下路笋舆看得绿阴成 自金
陵至丹阳道中有感数百年来王气销难将往事问渔樵苑方秦地皆芜没山借扬州更寂寥
荒埭暗鸡催月晓空场老雉挟春骄豪华只有诸陵在往往黄金出市朝金陵绝句水际柴门
一半开小桥分路入青苔背人

照影无穷柳隔屋吹香并是梅

结绮临春歌舞地荒蹊狭巷【一云颓城断堑】两三家东风漫漫吹桃李非复当时仗外花
怀古六代豪华空处所金陵王气黯然收烟浓草远望不尽物换星移几度秋毕竟江山谁是
主却因歌舞破除休我来不见当时事上尽重城更上楼

出金陵白石冈头草木深春风相与散衣襟浮云映郭留佳气飞鸟随人作好音 到金陵江湖
归不及花时空遶扶疎绿玉枝夜直去年看蓓蕾昼眠今日对纷披乞得胶胶扰扰身五湖烟
水替风尘祇将鳬雁为同侣不与龟鱼作主人 蒋山手种松青青石上岁寒枝一寸岩前手自
移闻道近来高数尺此身蒲柳故应衰金陵怀古霸祖孤身取二江子孙多以百城降豪华尽
出成功後逸乐安知与祸双东府旧基留佛刹後庭余唱落船窗黍离麦秀从来事且置兴亡
近酒缸 天兵南下此桥江敌国当时指顾降山水雄豪空复在君王神武自难双留连落日频
回首想像余墟独倚窗却怪夏阳才一苇汉家何事费?缸 地势东回万里江云间天阙古来
双兵纒四海英雄得圣出中原次第降山水寂寥埋王气风烟萧飒满僧窗废陵坏塚空冠劔
谁复沾纓酌一缸 忆昨天兵下蜀江将军谈笑士争降黄旗已尽年三百紫气空收劔一双破
堞自生新草木废宫谁识旧轩窗不须搔首寻遗事且倒花前白玉缸忆金陵覆舟山下龙光
寺元武湖畔五龙堂想见旧

时游历处烟云渺渺水茫茫

烟云渺渺水茫茫缭绕芜城一带长蒿目黄尘忧世事追思尘迹故难忘
追思尘迹故难忘翠木苍藤水一方闻说精庐今更好好随残汴理归舫 清明輦下怀金陵春
阴天气草如烟时有飞花舞道边院落日长人寂寂池塘风慢鸟翩翩故园回首二千里新火
伤心六七年青盖皂衫无复禁可能乘兴酒家眠
句容道中荒烟寒雨暮山重草木冥冥但有风二十四年三往返一身长在百忧中
游鍾山终日看山不厌山买山终待老山间山花落尽山长在山水空流山自闲
两山松栢暗朱藤一水中间胜武陵午梵隔云知有寺夕阳归去不逢僧
偶向松间覓旧题野人休诵北山移丈夫出处非无意猿鹤从来自不知

荣禄嗟何及明恩愧未酬欲寻西掖路更上北山头

锺山晚步小雨轻风落栋花细红如雪点平沙槿篱竹屋江村路时见宜城卖酒家

怀锺山投老归来供奉班尘埃无复见锺山何须更待黄粱熟始觉人间是梦间

锺山絶句涧水无声遶竹流竹西花草弄春柔茅檐相对坐终日一鸟不鸣山更幽

竹窻红芡两三根山色遥供水际门只我近知墙下路能将屐齿记苔?

望锺山伫立望锺山阳春更萧瑟暮寻北郭归故遶东冈出忆锺山苍藤翠木江南山激激流水两山间山高水深鱼鸟乐车马迹絶人长闻云埋樵声隔葱蒨月弄钓影临潺湲黄尘满眼衣可濯梦寐惆怅何时还思北山日日思北山而今北山去寄语白莲庵迎我青松路北山暮归示道人千山复万山行路有无间花发蜂逋绕果垂猿对攀独寻寒水渡欲趁夕阳还天黑月未上儿童初掩关还家岂不乐生事未应闲朝日已复出征鞍方便攀伤心百道水阅目数重山何以忘羈旅翛然醉梦间

秣陵道中口占经世才难就田园路欲迷殷懃将白髮下马照青溪

岁熟田家乐秋风客自悲茫茫曲城路归马日斜时

知金陵投老归来一幅巾君恩犹许备藩臣芙蓉堂下疏秋水且与龟鱼作主人

苏魏公颂咏天禧寺竹万个碧琅玕两旁?潭沼丛深蔽岩麓干直露云表刹影下交加山房上环绕昔尝止鸣凤今肯栖凡鸟笋抽龙种瘦籜坠孙枝小美胜会稽箭珍逾汶阳筱兔园名非奇渭川比终少樵删草根变客玩茶烟繚创亭僧意高谕佛禅心了吾爱有霜竹一到忘昏晓暮春与诸同僚登锺山望牛首清明天气和江南春色浓风物正繁富邦人竞游从官曹幸多暇交朋偶相逢并驱出东郊乘兴游北锺陟险不蜡屐扶危靡撻策上登道林祠俯观辟支峰乱山次阡陌长江遶提封萧条旧井邑茂盛新杉松揽物思浩然怀古心顒顒念昔全盛时兹山衆之宗天都对双阙霸业基盘龙六朝逋兴废百祀居要冲人情屡改易世事纷交攻当时佳丽地一旦空遗踪惟有出岫云古今无变容苏东坡轼六月七日泊金陵阻风得锺山泉公书寄诗为谢今日江头天色恶礮车云起风欲作独望锺山唤宝公林间白塔如孤鹤宝公骨冷唤不闻却有老泉来唤人电眸虎齿霹雳舌为予吹散千峰云南行万里亦何事一酌曹谿知水味他年若画蒋山图为作泉公唤居士同王胜之游蒋山到郡席不暖居愁空惘然好山无十里遗恨恐他年欲欸南朝寺同登北郭船朱门收画戟紺宇出青莲夹路苍髯古迎人翠麓偏龙腰蟠故国鸟爪寄层巔竹杪飞华屋松根泣细泉峰多巧障日江远欲浮天略约横秋水浮屠插暮烟归来踏人影云细月娟娟

郑獬题金陵道中六国相排一局碁岸头百草野烟微树深啼鸟自相失山静晚云犹未归濡口潮回残照满石城春尽乱花飞周郎屈指图天下谁道江南玉鱠肥范丈正公仲淹移丹阳郡先游茅山作丹阳太守意何如先谒茅卿始下车展节事君三黜後收心奉道五旬初偶寻灵草逢芝圃欲叩真关借玉书不更从人问通塞天教吏隐接山居

赠茅山张道者有客平生爱白云无端年老尚红尘只应金简名犹在得见仙岩种玉人送陈瓌秀才游金陵君有江南行为君歌以喜龙盘山万曲练静江千里江山不可空台星照吴中古来王谢地今有周召风幕间杨与郑万丈光相映煌煌聚宰府金陵一何盛此去知己贤雅客情无边白云起江树明月逐江船云月共徘徊优哉如游仙归来笑春风白日登青天

胡澹庵铨与正觉长老同游蒋山宝公何似赞公房【是日登宝公塔】好句还追铁凤翔【铁凤翔见赞公房诗】金象妙高惊地胜木犀清远送天香明年蜡屐谁犹健昨日登楼我尚强【阁高百尺梯凡五折最难上】三老未应输二老兹游奇绝永难忘 金陵书事六代风流最永嘉鬱葱胜气隐晴霞折冲樽俎神俱旺表里山河险莫夸几缕碧烟迷杏眼半篙清涨减蒲芽歌声已得檀郎怨四海而今再一家

张乖崖咏郡斋述怀傍人往往美清途野逸情怀亦自扶官舍四边多种竹潮沟一面近生芦病嫌对客低徊甚老觉临官气味麤不信浮名是身累有时闲捻白髭须

晁吏部补之龙盘虎踞望南津余烈峥嵘尚霸陈醉着不知风揭屋可能杨素是江神

洪驹父沙觜弯环转拖牙一衣带水遶城斜飞廉解使冯夷怒渡口风吹荞麦花

夏文庄公竦金陵晚望雨霁吴城晚谿泉四散流禽归半峰树人在夕阳楼国望分江海星躔次斗牛堪嗟兴废地千载有闲愁

韩南涧无咎永丰行丹阳湖中好风色晴日波光漾南北湖岸人家榆柳行风颭低昂似迎客系船并岸聊一呼老农指示官田圩长衫紫领数百辈见我罗拜长嗟吁政和回头五十载官筑长圩宛然在东西相望五百圩有利由来得无害官圩民圩奚所拘此地无田但有湖围湖作田事应尔底用彻地还龟鱼民圩不坚自招水水潦何常镇如此官圩六十里如城削平为湖定何理请看今来禾上场七百顷地云堆黄县官糴米三万斛度僧给牒能商量我闻此语汗生面千闻岂如目一见吾君神圣坐九重轻易献言谁复辨却忆吴中初夏时畚插去决湖田围鸡惊上篱犬上屋水至不得携妻儿无田赴水均一死善政养民那得尔寄言父老且深耕为汝驰书报天子

李忠定公纲金陵怀古六代兵戈王气销山围故国自周遭豪华散灭城池古人物摧残丘塚高阜转蟠龙翔宝塔洲分白鹭涌云涛悠悠世事都如梦且对金尊把蟹螯 六代繁华三百年我来吊古一凄然景阳钟断鸡空唱玉树歌沈月自圆潮没旧?生晚浦柳摇新色媚晴天高楼上尽窮双目千里江山遶檻前 六代兴亡江上城倦游还向此中行龙蟠虎踞空形势井废台荒为战争云气霏霏春雨急烟波渺渺暮潮平商人不识前朝恨短笛还为激烈声 六代当年恨最长兵戈陵灭故城荒非关霸气俱消歇自是人谋未允臧王谢风流今寂寞江山形势亦凄凉我来正值兴戎马慨念东南更惨伤 阻风泊慈湖夹焚香默祷有长鱼跃波面江豚出没舟人大惊抵暮风便因命解舟乘月泛江一夕至於金陵盖数百里作二绝以纪其事江险不可行者为禁江江豚出没白波中十丈神鱼跃晚空知是阳侯怜我拙故教来助一帆风 露气漫漫欲结霜扁舟夜下秣陵江烟波如席月如昼快意倒尽黄金缸 同李似之游蒋山北风阻行舟驾言游蒋山相携得良友谈笑穷跻攀松林静杳冥殿阁罗烟鬢宝公骨已冷白塔孤云间乘高望长空极目波涛翻东南正戎马戈甲照江干与子适相遇偷此半日闲怀古六朝远道旧一笑欢忆昨赐对初接武玉殿班螭坳珥史笔每慙追继难迂踈与世违谪官堕甌蛮寬恩幸脱去假道来江关邂逅两萍梗飘泊惊风旛回首顾淞河不知涕泗潜着鞭愿努力

世路方多艰 登锺山谒宝公塔宝公真至人鸟爪金色身杖携刀尺拂语隐齐梁陈我登锺山顶白塔高嶙峋再拜礼双足聊结香火因

题定林院行过锺山到定林青松一径白云深三间古屋昭文馆那有沈迷富贵心

题八功德水石作方池紫翠崖湛然定水贮琼瑰何须功德标为八万派圆成自此来 次韵上元宰胡俊明蒋山勤老唱和古风竺教流传入中土以相求之无自可达磨西来直指心拟议之间已蹉过皮髓谁分深浅机祖祢翻贻子孙祸锺山禅老真可人高唱宗风震江左学流云集欲何为佛祖要须自心作宰官恠惚牒讼间偷暇相从还作麽也知襟抱素相亲更把篇章迭酬和词严义密读难晓字顺文从诚皆妥应怜孤陋方杜门亦欲追随良未果故将佳句寄幽人此意勤渠滋愧荷谈空摩诘无一言听法文殊非两个若将情解议真如明眼人前应看破世间万法互低昂正若旋轮与推磨随时俯仰乃善谋就中拙者无过我九折羊肠欲着鞭万里沧溟思纵施只今行年四十余已觉衰颓多坐卧平生作具何所施尽以付之一畀火回光返照默自参妙湛本然无点涴公方齿壮志气豪正可立功同魏颗胡为亦复味禅那坐视轩裳如縶锁莲社庄严清净池文室含容高广座他时共结香火缘心期耿耿当非颇为余稽首问勤师如师材德诚磊砢钓龙罗凤大江滨法器谁为语无堕庭前倘有立雪人我欲因风致三贺 投金濂有感楚王听谗诛伍卿招呼二子同就烹子胥弯弓见使者义不戴天非惜生操瓢乞食困江表曷尝一日忘郢城溧水之阳遇义女壶浆簞食欣相迎当时追捕向尔急杀身灭口意岂轻霸吴何止服句践破楚遂以鞭荆平倒行逆施道虽远复仇摠愤圣所称却来访旧欲报德叹息亡质随流萍投金浅濂亦何有聊以寓意通精诚哀穷进食类漂母解劔挂墓同延陵古人已矣不可见空有史笔垂英声自金陵江行未至长芦阻风倏忽风云接地陰扁舟繫缆暮江浔波涛何必深为阻万里归来一寸心 七日风不止归心何似生烟添暮山色风撼满江声淮楚已非远波涛殊未平坐看云解駁犹喜晚来晴

汪内翰藻过金陵六代兴亡迹愈陈迹陈谁遣意如新古今更欲悲何事天地长留景似人云压山低惟妬晚雾蟠江濶更含春因知到此无穷感岂独区区我一身食溧阳县平生始到溧阳县东野钓游今几年岚光

卷树出孤日雨气入山鸣百泉稻畦初秧秀色满藤枝半折幽芳悬武陵商岭政应尔倚杖欲去心茫然 宿靖安镇檣竿历历表中流暝宿河堤古驿头天遣山川浑着月人将榆柳共惊秋重来骨肉唯身在无限风烟到眼休得意枕中犹梦尔人生何况足悲愁

周丞相必大留别金陵韩帅仲通十二麟符玉截肪腰间仍映带围黄化行江国春常早讼息堦除日自长槐影缓趋三接昼棠陰先满十连堂子渊去踏长安道待赋中和奏未央 又再点宾筵又一期千金敝帚赖提撕泮宫正采僖侯藻太学俄甘吏部蠶人似塞鸿春向北心随江水日潮西太平勲业须公助不用频年恋节犀 次韵邢怀正孝庸通判游蒋山仙人薄蓬莱乘槎渡河浒旧观桑田变今访锺山古驾言出东门恍若之帝所朝曦霁青霜枫叶落红雨亭亭望浮图隐隐插天宇坡垂北溟鳌石卧南山虎遥闻饭後钟絶胜統如鼓恭惟布金地草木谁敢侮孤芳破冰雪喜见梅萼吐同游皆大雅緇素竞先覩巾车似元亮漱石杂孙楚相将挹灵泉何用照牛渚西方化人国未觉道修阻法筵盛龙象一一会心侣茗椀散午梦蒲团便软语悬知雨花社重辯风幡舞相投甚针芥味道真酪乳从来草堂灵俗驾回吾祖况如云仍辈么

麼那复数後车倘许随未美黄金坞

曾极题陈後主祠真珠帘下变离声多少嬙妃掩袂听赢得牢愁三万斛孤舟撑入大梁城
东晋断简残编迹可寻诸贤兴复不关心未应全罪王夷甫一任神州自陆沈 渔父智士旁观
当局迷沧浪钓叟出陈诗江头风怒掀却屋底事全家醉不知【後主召一隐者问近曾作何
诗云有渔父诗风雨掀却屋全家醉不知】孙陵鹅眼钱六代初终几变迁孙陵无树起寒烟
青蚨细薄如榆荚犹是当年买笑钱

澄心堂纸楮生玉面务深藏未肯横陈翰墨場一幅降牋何用许价高缘写宋文章
南唐金铜香炉制作元从建业宫形模奇古杂金铜烟昏尘暗君休笑曾在红鸾扇影中 南唐
宫中残獐【南唐宫中忽得残獐一枚陈陶云是夜狼星上直】周庐巡徼列千兵那得残獐
堕禁庭鹿走棘生先有象天文未必直狼星

南唐遣使谈锋亶亶折强邻专对当年亦有人国老胸中兵百万不将全力靠江神
玉树後庭花结绮临春成草莽繁华都入暮烟中後庭玉树迎秋色犹带张妃脸上红 石麒麟
短樊长堑起寒烟知是何人古墓田千岁石麟相对立肘驂膊焰故依然石步道中有石麒麟
数十地悴天荒丘壠平难从野老问兴衰苍烟落日低迷处折足麒麟记坏陵
辘车娅姹吴音今古同宫粧衮服已成空雕文结角辘车巧犹有梁陈宫掖风 决囚灯【後主
聽死囚燃灯决之囚家赂左右窃益膏油辄得不死】五详三覆始施刑明灭兰膏岂足凭可
惜当年杀严续无人为益决囚灯

江南錄自古撓鳞或似狂按诛潘佑事堪伤凭谁寄语徐常侍不杀忠臣国未亡 凤州柳【凤
州柳蜀主与江南结婚求得其种凤州出柳酒手】蜀主函封遣使时芳根元自凤州移柔荑
醪今安在唯有青丝拂地垂

三十六陂渺然三十六陂春石黛潮生岁岁新杨柳杏花浑好在吟边只欠跨驴人 金陵诗凿
地破除函谷帝埋金压胜郢中王兴亡摠不关君事五百年前枉断肠古龙屏风宣和旧物建
炎携之渡江官官惜之裁剪背成屏风立殿上乘云游雾过江东绘事当年笑叶公可恨横空
千丈势剪裁今入小屏风

杨虞部备咏鍾山周子无心隐姓名裂荷焚芰使猿惊不能高枕云中卧琐屑贪它墨绶荣
石头城五城楼雉各相望山水英灵宅帝王此地定由天造险古来长恃作金汤
太初宫三军不食武昌鱼万骑时迁建业居会得紫髯开国意太初名是作宫初
白都山驾鹤骖鸾自古闻策名仙籍是真君天边旧迹无寻处满目青山空白云
陆机宅陆家兄弟颇能文入洛仍将笔砚焚旧宅荆榛狐兔窟机云无复有昆云
天阙山牛头天际碧凝岚王导无稽亦妄谈若指远山为上阙长安应合指终南
灵和蜀柳得地恩深雨露偏丹墀左右玉阶前君王属意君知否好似风流一少年
梅梁殿玉案金鑪对御牀岿然应似鲁灵光螭头直上双鱼尾不让西京旧栢梁
台城六朝遗迹旧山川远想繁华一怅然江令白头归故国多情合赋黍离篇
金城柳风絮烟丝春复秋攀条何故泪双流因怜树老犹青眼不觉人衰已白头
潜鹤鼓雷门击破使人惊潜鹤双飞上玉清怪得旧时声太远闻天合似九臯鸣
乘黄署执轡何人籍帝台汉家天马不时来疲弩多亦费刍粟莫惜千金市骏材 铜螭署挈壶
传箭逼天聪铸出蟠螭巧范铜何事腹中藏怪物人惊螭气如虹锦署人衣蓝缕地衣红不

念家家杼柚空厥篚织文应岁贡更翻新樣集机工

絕地列戟高门气自雄主人应是偶相逢由来祸福皆人召此地无辜唤作凶

清暑殿窳地帘光映水明玉钩斜处月初生龙皮席上鹅毛扇何必风来暑始清 促粧钟枕面
钟声及早催锦衾香叠百花堆蟾蜍影落珊瑚架照得仙娥下界来青溪姑曩不乘龙即跨鱼
岸傍人复乞灵无柳如眉黛花如面闻是青溪一小姑 披香殿兽口金香烟穗浓螭头玉照露
华融萧郎的是春光主曾作春衣此殿中东礪行拖葛屨坐藜牀竹树萧然一水傍枕上白云

船下月卜隣东礪胜东冈 青溪栅倾城倾国两妃嫔此地闻名不见人潜想旧时红粉血落花
风里步香尘江令宅竹木池台尚俨然归时头鬓雪霜寒青溪隐

映朱门处曾属中书一品官

刘彦冲金陵怀古荒城莽莽蔽荆榛虎踞龙盘迹已陈赤壁战争江照镜青楼歌舞鸟鸣春千
年王气雄图尽一叠寒笳客恨新折屐风流犹可想只今高卧岂无人杨诚斋万里陪留守全
处恭总领钱进思提刑傅景仁游清凉寺山自新亭走下来化为一虎首重围平吞雪浪三江
水卧对雨花千丈台点检故城遗址在凄凉浩叹宿云开六朝踪迹登临徧底事兹游独壮哉
万里长江天上来石头却欲打江回青山外面周如削紫府中间划洞开苏峻战場今草树仲
谋庙貌古尘埃多情白鹭洲前水月落潮生声自哀 已守台城更石城不知并力或分营六师
祇遣环天阙一垒真成借寇兵间者王苏俱解此冤哉隗协可怜生若言虎踞浑堪倚万岁千
秋无战争 贺建康帅全处恭迎宝公祷雨随应大士多时不入城入城犹未炷炉熏忽吹淮水
千峰雨不费锺山半朵云桑叶秧苗俱起舞葵花萱草亦欢欣尚书欵送公归去留下丰年二
十分 横山再见横山滴眼新山曾劝我脱官身灯笼箫鼓年年社酒醅莺花处处人忽忆诸公
牡丹会转头五柞去年春野云墟月空荒寺两袖寒风一幅尘 辛亥元日送章德茂自建康移
帅江陵极知借寇未多时道是徵黄有近期不割半青江令宅却飞大白习家池湖山解语云
来暮淮水无情也去思莫近乡关动归兴轻黄一点上双眉 西湖一别忽三年白首相从岂偶
然到得我来恰君去正当腊後与春前醉余犯雪追征帽送了凭栏望去船待把衣冠挂神武
看渠勲业上凌烟

金陵官舍後圃散策江梅未落杏先繁萱草都齐柳半园却是浅寒花较耐东风未要十分温
旋种花窠二百株不知种了有花无阿谁便向春工说急搗红蓝染玉酥

过秦淮晓过新桥启轿窗要看春水弄春光东风作急惊诗眼搅乱垂杨两岸黄

过笪桥轻风欲动没人知早被垂杨报酒旗行到笪桥中半处锺山飞入轿窗来 登凤凰台千
年百尺凤凰台送尽潮回凤不回白鹭北头江草合乌衣西面杏花开龙蟠虎踞山川在古往
今来鼓角哀只有谪仙留句处春风掌管拂蛛煤 行阙养种园千叶杏花不信东皇也有私如
何偏宠杏花枝於中更出红千叶且道此花奇不奇

白白红红两不真重重叠叠是精神谁言跂石眠云客也见长杨五柞春 和傅景仁游清凉寺
旧时月过女墙头风雨摧颓废不修地老天荒无处问松声滩响替人愁祥刑使者来何暮吊
古诗篇清更幽收拾江山入怀袖却归讲席进鸿畴夏日杂兴金陵六月晓犹寒近北天时较
少暄打尽

来禽那待熟半开萱草已先翻独龙冈顶青千摺十字河头碧一?九郡报来都雨足插秧收麦
喜村村圩田周遭圩岸缭金城一眼圩田翠不分行到秋苗初熟处翠茸锦上织黄云
古来圩岸护堤防岸岸行行种绿杨岁久树根无寸土绿杨走入水中央早起秣陵镇人趁林
中市鸡鸣檐上笼忽看一天紫未吐半轮红谁撼扶桑露吹来杨柳风诗肩忍凉冷已出两山
峰山路只言迴农家俱夙兴短长羣稚子回避一田塍随犬能知路骑牛底用绳兹行有胜事
何处不丰登路口回望方山锺阜回头失方山恋眼寒似巾檐短帽如覆玉凋盘每恨青苍远
因行反覆看归时记面目城里指云端横山已过方山了横山更絶奇争高一尖喜妬逸衆青
追万马头惊撈千旗脚恣吹娟峰恰三五隔柳尚参差【凡十五峯从南数起第三最高尖】
圩丁词十解江东水乡堤河两涯而田其中谓之圩农家云圩者围也内以围田外以围水盖
河高而田反在水下沿堤通斗门每门疏港以溉田故有丰年而无水患余自溧水县南一舍
所登蒲塘河小舟至孔镇水行十二里备见水之曲折上自池阳下至当涂圩河皆通大江而
蒲塘河之下十里所有湖曰石臼广八十里河入湖湖入江乡有圩长岁晏水落则集圩丁曰
具土石撻菑以修圩余因作词以拟刘梦得竹枝柳枝之声以授圩丁之修圩者歌之以相其
劳云圩田元是一平湖凭仗儿郎筑作圩万雉长城倩谁守两堤杨柳当防夫何代何人作此
圩石顽土膩铁难如年年二月桃花水一律流归石臼湖上通建德下当涂千里江湖缭一圩
本是阳侯水精国天公勅赐上农夫南望双峰抹绿明一峰起立一峰横不知圩里田多少直
到峰根不见塍两岸沿堤有水门万波随吐复随吞君看红蓼花边脚补去修来无水痕年年
圩长集圩丁不要招呼自要行万杵一鸣千畚土大呼高唱总齐声儿郎辛苦莫呼天一日修
圩一岁眠六七月头无点雨试登高处望圩田岸头石板紫纵横不是修圩是筑城传语赫连
莫蒸土霸图未必赛春耕河水还高港水低千枝万派曲穿畦斗门一闭君休笑要看水从人
指挥圩上人牵水上航从头检点万农桑即非使者秋行部乃是圩翁晓按庄宿牧牛亭秦太
师坟庵函关只有一穰侯瀛馆宁无再帝丘天极八重心未死台星三点坼方休只看壁後新
亭策恐作移中属国羞今日牛羊上丘壠不知丞相更嗔不【暮年起大狱必杀张德远胡邦
衡等五十余人不知诸公杀尽将欲何为奏垂上而卒故有新亭之句然初节似苏子卿而晚
谬】儿侄新亭相迎送客新亭恰放灯儿曹迎我复新亭百年事业何为者送往迎来过一生

任希夷南朝古迹惟天禧凤凰台鹿苑寺郗氏窟为最久有梟何取台仪凤事佛空知后作蛇
狐穴蚁巢零落尽却能留此梵王家行宫口号绛阙前头天阙横春烟收尽两峰青中流淮水
成河汉旁列锺山作御屏新青染徧金堤柳废绿羞开玉树花今代离宫呈气象六朝荒址满
桑麻石头城石城只解着王苏漫说夷吾计亦疎尽使西风能举扇可堪重见伯仁书
城东怀古谢安游处犹留墅李白吟边亦有亭两地东山春寂寂至今白下柳青青
锺山城如虎踞来擒虎山号盘龙属卧龙天险不能回运去地灵元自要人雄同刘武子孙季
和游锺山和刘武子韵有客新从蜀道还共招北隐步松间何人写出秋风句付与淮南大小
山台城隋家耕垄徧陈宫留得锺山蒋郡东只怕东南

分王气那知零落锦帆风

题谢氏山居风流谁似谢家安不爱苍生祇爱闲今日云孙仍不恶一间茅屋尚东山
锺山春游青楼 醪客中圣碧苑秋千人半仙春满江南佳丽地绿杨芳草思娟娟
柳边淮水一般绿花底锺山分外青闲趣游丝不知远夕阳才过已踈星

刘龙洲过登金陵清凉寺台江南江北许多山到处登临得凭栏老木换丹霜有信怒涛拍岸水生寒倦游半世乌三匝往事千年指一弹落日正西催上马依依回首望长安

王崕清凉寺竹赋棱桀兮娟娟玉立兮露寒翠青葱兮荟蔚风鸾舞兮琅玕风之来兮天之庭过巘谷兮韵秋声金鏐碎兮满坠日晖晖兮净明若有人焉凛高节历岁寒兮傲霜雪我欲从之兮路修绝隔秋水兮共明月李山甫上元怀古南朝天子爱风流尽守江山不到头总是战争收拾得却因歌舞破除休尧将道德终无敌秦把金汤可自由试问繁华何处在雨苔烟草石城秋争帝图王德尽衰骤兴驰骛亦何为君臣都是一场

笑家国共成千载悲排岸远檣森似槩落波残照赫如旗今朝城上难回首不见楼船索战时

张南轩棖送胡伯逢之官金陵相望数舍已云疎远别何因执子祛漫仕想应同捧?旧闻当不废观书月明淮水空陈迹山绕新亭有故墟暇日更须频访古因来为我道何如

赵汝莹金陵作龙虎帝王宅凤凰仙子台六朝遗事冷八月夜潮回陇鴈秋初到江花晚自开凭高一樽酒何代独无才

施文靖金陵作紫盖东南久寂寥石城烟雾压迢嶢登台倦客怀千古宿内闲人梦六朝御苑云浮曾拾翠旧桥月落尚吹箫诸公不说新亭事目断空江半日潮袁泰初金陵怀古晋委东都帝秣陵岂无机会可争衡诸公坐视敌来往一水反为国重轻北伐上章空有语中流击楫竟何成登临不是多伤感老却胸中十万兵吴陵金陵怀古烟云莽莽对穷秋六代雄豪见古丘万里长波东赴海千年闲客独登楼山川冥漠天难问运数推移地莫留终信东南多王气浙中今是帝王州刘沧经过金陵六代兴衰曾此地西风露泣白苹花烟波浩渺空亡国杨柳萧条有几家楚塞秋光晴入树浙江残雨晚生霞凄凉处处渔樵路鸟去人归山影斜李巽岩涛诗看尽庵前手种松草堂聊复少从容令人却忆骑驴老悔不终身作卧龙昇元古寺宝灵珠照影东西与衆殊本为仁皇贲潜府岂知今日镇留都余尚书端礼劝农石头城赋诗去年出郊春欲半锺阜林峦青未遍今年此日蛰初惊动地春光满石城柳如蹙金梅碾玉川原高下麦苗绿一声布谷已催人吴侬莫问春迟速苍颜老守政无奇只要我民不苦饥奉诏偕行两赤令职在劝耕无扰之鲐背龉眉数十叟听取吾言醉此酒但遣儿郎力南亩不患三钱无米斗米斗三钱大江东从今更祝八方同同见三登太平日老守不愿万户封

叶晖咏清凉寺竹茂林修竹绿侵云清到心中赖有君李主当年饱凉後民间苦热几曾闻

薛许昌诗南朝三十六英雄角逐兴亡尽此中有国有家皆是梦为龙为虎亦成空残花旧宅悲江令落日青山吊谢公毕竟霸图何物在石麟无主卧秋风

王寔斋遂凤凰台诗天连宫阙云烟湿地接淮山日月低不知何处两黄鹄飞向白云云外归天上十分月人间一半秋笙歌传小寨灯火认层楼酒怕初斟满暮欣未了收分明浑似水只是欠双鸥

刘後村克庄金陵作高牙拂云车带雨清晓西州气成雾玉麟堂上少文书白鹭亭前多杖屨
古来此地一都会城郭楼台尽非故落日矐矐江北山断烟髣髴新亭路神州岂但夷甫责西
风更有元规污是中端的得长城正自不能堪短簿戏马频从九日游南楼许共诸君住眼前
突兀坡老碑醉里吟哦谪仙句只今蕙帐怨猿鹤想见齐盟忆鸥鹭淮南四月蚕麦熟宫阙山
河烦卧护了知此意诚能驯未许寻公遂初赋 凤凰台晚眺经月踈行台上路秣陵城郭忽秋
风马嘶卫霍空营里萤起齐梁废苑中野寺旧曾开玉帐翠华人不幸离宫小儒记得隆兴事
闲对山僧说魏公

罗必元金陵作六朝遗迹旧山川万里长江当守边一念易骄人事废不关飞渡北来船 凭高
怀古思悠悠遥想骑驴白下游不是龙眠图画里如今亲到蒋山头金莲步金陵佳丽不虚传
浦浦荷花水上仙未会与

民同乐意却於宫里看金莲
清凉寺竹清凉世界竹如云旧日君王爱此君时代改迁龙变化荒山啼鸟不堪闻

王周金陵作杳杳金陵路难禁欲断魂雨晴山有态风晚水无痕远色千樯岸愁声一笛村如
何遣怀抱诗毕自开尊

陈丞相俊卿蒋山谢雨诗农事春郊闵雨时乞灵奔走宝公祠鑪中沈水才三祝天外油云已
四垂蔌蔌通宵茅屋冷青青破晓麦田滋更祈三日滂然泽大作丰年遍海涯

范石湖成大祷雨用陈丞相韵陂原龟坼莫春时夹路鑪薰共祷祠唤起云头千嶂涌飞来雨
脚万丝垂无情梅坞犹红绽有意秧田尽绿滋大施门开须满愿愿均此施布天涯

江宁令张伯子视旱田赋呈上元主簿杨明卿轮蹄旦旦风尘表入眼羣山青未了刺藤迎日
子先红荞麦得霜花渐老丛祠诡怪画村疇古寺騫腾出林杪征衫多次逐飞鸢下檐有时随
宿鸟初晴得去恨迟迟独夜不眠忧悄悄公如老骥暂伏枥我类游儻终屈沼一朝王事有期
会百里民情同探讨详於禹贡辨等级明似离娄烛幽渺高依丘垄或微收低近陂塘翻尽槁
凶荒有数合均一报应於中又分晓不能究实害非浅倘使从宽恩岂小兹行到处欲春风批
放莫教分数少

张祁游鍾阜呈同集诸公晓出白下门东山耸孱顔脱身?市中办此一日闲西风忽凜冽秋容
着坚顽烟树小摇落寒云起瀾斑但惊节物变敢辞登陟艰诸峰互崭絶落势相回环盘固建
康城俨若呵神奸造化鍾英灵尽压东南山厚疑接坤轴高欲窥帝关太平严梵刹华屋罗千
间向来劫烧灰旧观初未还象教岂易灭佛力不可扳风雷运梁栋斤斧勤输般会见落成日
千门响铜环山僧肯分甘我亦诛茅营人生少会心胜处天所慳归鞿理残照欲去仍跻攀後
会倘可约此兴殊未阑祇恐俗士驾频来遭诋讪哦诗记幽讨賸语君其删程内翰秘建业赋
醉庵居士闲从二客繫孤舟呼短策陟层城之岌嶭望故宫之崔嵬山势降伏大江东奔客有
诵金陵之诗歌赤壁之词如怀古如怨今咿呜流涕悲不自胜居士曰子无使然客曰天时既

冬夜气将分水连烟重月带霜明陨周郎之涕恹谢安之望伤周顗之情子独何能惘然於斯乎居士行且笑徐语客曰宇宙间兴亡何足深悲英雄豪杰乘时可为登战场过故都必凄然怅然如闺女望夫之时此盖骚人墨客借助笔端之愁语而非天生上智经营八紘之长规也客愧且谢於是相与指画山川极望中原叹昔人之庸陋而遗大功于指顾之间既而席地布酒酒酣歌发晓风翻树潮来海口挽客登舟急赴行在用栢梁体题式敬斋惟古知哲粲青编胡为典狱难其贤臯陶苏公相後先舍是未见书聯翩果哉知仁人难全未得其情智欲研既悉其罪乃寬旃吾心钧石何所偏服而舍之天则然画冠不犯何由缘教明化洽上所宣上失其道民乃愆又复淫刑如蔓延立法初意浸天渊苗民作威天弃捐圣神应运符握乾春风甘雨徧八埏内外建官相综綰州复设掾职其专此盖椎轮当益?县令狱掾非充员渠用资格宜加铨邢君天资静不僊且尝一饮诗书泉大府狱市来阗阗严明之长日趋前莫难此时周折还三年一心上通天荻苗水长问归船而君胡为华此扁吾非空扁乃心传上遡苏公岁二千下视方来漫无边吾乃渺然丘中焉来者式之不计年 题朝阳亭晖晖朝阳亭亭前锺阜青巘陰尚积雪光彩浮初晴亭下清溪水滑流新泮冰双鳬知随阳亦逐流漸行亭中贤主人快此景物清开门延客入掬雪当泉烹凌蹙淮水涨修鳞烂银瓶更酌秦淮春配此玉豉羹了无一物俗表里俱蓬瀛宇宙有佳致心清境乃并甚爱主人贤澹然遗世营不言饮人和恂恂发天诚清处亦絕奇亭亭秋露茎胸中足丘壑城头亦林垧不与风月期结屋谩茅菁却慚最下客形秽识不灵宿慄幽深趣侵寻尘坌纓一官冷於铁痴坐如冻蝇唤来俎豆间不知梅已英清赏可无传陋语恐难徵春风送鹏程睠言寻此盟登忠武下公墓底用荒村访野坟青编相对俨如存当年但识清谈乐今日方知节槩尊千载腐儒空吊古几章冷语自销魂何当戮力清河洛一洗新亭旧泪痕金陵驿铁瓮高资只半程柴沟晓发暮金陵莫言三宿何濡滞已觉匆匆役此生 登石头城邂逅乡人却异方蹇驴仍得庾东阳不妨令节随流水自看寒花吐晚香微岸纶巾风力劲小亭飞觥午陰长不堪细数淮南树独倚青冥兴欲狂 别金陵校官舍双栢手自移时尺许长三年拂拂及宫墙愿言勿负栽培力保此坚贞傲雪霜

马野亭之纯咏台城吴时後苑晋宫城见得当时似玉京往事茫茫同水远长郊渺渺与云平珠玑常向耕锄得禁籞今为陌路行只有月华还似旧徘徊花上听寒更 石麒麟石虎石羊还石人此间独有石麒麟定应侧近藏陵墓仗此威灵护鬼神一石琢成高且大两头相望俨如真参天宰木知何在今与渔樵作四邻 断碑百尺丰碑立路南尽停车马试来看不知神道是谁墓为问康王何代官初谓流传须永永安知磨灭已漫漫姓名不足标青史休把将来础石观 锺山石城为虎此为龙都邑无如此地雄万壑千巘皆拱北三江七泽尽朝东埋金依旧祥光现凿浦仍前地脉通吴晋六朝尝已验如今留钥比关中 石头城几年闻说石头城初谓坚牢似削成只是一拳如卓望初非四面有楼棚依山最好防车骑举目何妨矚贼营为问区区徒自守何如席卷向宸京 幕府山当初一马过江来幕府权宜向此开万里封疆吾旧物一时宾客尔多才建台此事虽堪美掩泣其人更可哀相视不曾言及此欲教天意此时回 灵和殿前蜀柳此柳栽从蜀郡移宫中诸柳不能垂祗缘草木根灵异非是乾坤雨露私轻似行云清似水软於吹絮细於丝风流可爱如何比最是风生月上时 天阙山不知象魏欲何为布政颁条总在兹凡有往来须仰视庶几衆庶可周知後來江左当新造好向城隅踵旧规却指牛头作天阙此言多少被人嗤 清暑殿见说当时百尺梁四围修竹翠云长正当盛暑都无热不有薰风亦自凉郡与人间同日月直疑天上两陰阳有时更取龙皮浸凜凜如飞六月霜梅梁殿

太极初时欠一梁漂流偶见石城傍曾闻禹庙还如此可见川祇欲效祥不但千年无朽蠹能令满殿有芳香要将盛事传来世画出梅花十丈长潜鹤鼓板木为腔冒以皮其中宁有鹤来栖如何音响闻西洛未必源流自会稽既被兵人都击破却云禽鸟不鸣嘶分明伪妄无人辨可笑诸人识见迷促粧钟禁鼓城头报五更景阳楼上打钟声祇疑髣髴天将晓不省徘徊月尚明闪闪青灯星户缀松松緑鬟雾窗横蜂黄蝶粉都描得那有鸦儿画不成铜螭署洛阳当日铸铜螭徒得形模怪且奇玉刺口中藏不见虫居腹内出无时移来建业尚如此徙在江陵无复兹此说流传真诞妄便当不信不须疑金城柳金城四面柳为营此日征西路再经忆昔仅能高咫尺如今端可拂青冥清眸渐隔花中雾緑髮俄悬镜里星功业未成多少事攀枝挽叶泪淋零东山谢安人物江南第一流居常不肯利名求壮年甘向东山隐暇日须将妓女游既与斯人尝共乐固应有患即同忧後來一为苍生起破敌成功祇坐筹披香殿绣栢藻井栢为梁翡翠帘栊映璧璫宝篆烟云凝馥郁华林锦绮竞纷芳荷花永昼湘江静桂子西风陌路长最是春衣裁已就领巾飘动尽天香古越城府城西北瓦棺东尚有遗基在此中旋折才方二里许规模不得小邦同正当进取争强霸聊作屯营备敌冲老死智谋曾不识却云争似建康宫西州城运甍居东西冶城西州遗迹甚分明多言东晋才经始或说孙吴已创成池苑春风罗绮市楼台夜月管弦声入门尽是嬉游地惟有羊公不愿行王导宅当时一马渡江来幕府山头刈草莱四海纷披都似此一时缔造亦艰哉朝纲治具提还挈国本人心壅更培辅佐中兴功第一应须千尺上云台陆机宅只闻二陆住华亭却有书堂在秣陵如此弟兄无比拟翦然京洛有声称辩亡着论真难及受命专征若易能十万河桥俱溃散儒生虚语不堪凭沈约宅饱观明月双溪水徧倚清风八咏楼但见遗踪留婺女安知故宅在昇州文章至好虽堪羨节行全亏亦可羞看得齐梁相禅际只宜称隐不称侯江總宅青溪第宅鬪鲜妍最是江家宅可怜路上行人争指处桥边遗迹尚依然南冠辞往长安日北客归来建邺年惜此屋庐还似旧不知曾读黍离篇三山九华境上曾亲历五老峰前亦屡过不似三山殊媚好何须千仞极峩峩翠围宛似屏间画緑折全如水上波况与沧江苦相近见来心眼定如何翁思斋迹已未秋登城北楼脚底江南第一州台城北上小淹留难忘故国千年恨不尽长江万古流目断中原谁击楫秋来多雨独登楼举头忽见长安日一醉能消太白愁陪周溪园登赏心亭建业城楼四面窗赏心胜处冠南邦石头西峙云藏寺水面南浮月满江故国秋深入自老新河夜遁敌谁升高人登眺同怀古忽有飞来白鹭双

乐府

王介甫桂枝香【古今词话云金陵怀古寄词於桂枝香凡三十余首独介甫最为絶唱】登临纵目正故国晚秋天气初肃潇潇澄江似练翠峰如簇征帆去棹残阳里背西风酒旗斜矗彩舟云淡星河鹭起画图难足念自昔豪华竞逐帐门外楼头悲恨相续千古凭高望眼漫嗟荣辱六朝旧事随流水但寒烟衰草凝緑至今商女时时尚歌後庭遗曲

周邦彦金陵怀古佳丽地南朝盛事谁记山围故国遶清江髣髴对起怒涛寂寞打空城风樯遥度天际断崖树犹倒倚莫愁艇子曾繫空余旧迹郁苍苍雾沈半垒夜深月过女墙来伤心东畔淮水酒旗戲鼓甚处是【一作市】想依稀王谢邻里燕子不知何世向寻常巷陌人家相对如说兴亡斜阳里隔浦莲迹拍【溧水县图如射亭避暑作】新篁摇动翠葆曲径通深

窃夏果收新脆金丸惊落飞鸟浓霭迷岸草蛙声闹骤雨鸣池沼水亭小浮萍破处帘花檐影
【一作檐花帘影】颠倒纶巾羽扇困卧北窗清晓屏里吴山梦自到惊觉依然身在江表
鹤冲天【溧水县长寿乡作】梅雨霁暑风和高柳乱蝉多小园台榭远池波鱼戏动新荷
薄纱厨轻羽扇枕冷簟凉深院此时情绪此时天无事小神仙

马子严卜算子慢壁月上极浦帆落人挝鼓石城倒影深夜鱼龙舞佳气郁郁紫阙腾云雨回
首分今古千载是和非夕阳中双燕语向人诉记玉井辘轳蘸脂涨腻几许蛾眉妬感叹息花
好随风去流景如羽且共乐昇平不须後庭玉树

张于湖孝祥西江月【题溧阳三塔寺】问讯湖边春色重来又是三年东风吹我过湖船杨
柳丝丝拂面世路如今已惯此心到处悠然寒光亭下水如天飞起沙鸥一片程内翰秘满江
红【登石头城归已月生】颇恨登临浪商作骚人愁语石城上何须苦说死袁生褚当日卧
龙商略处秦淮王气真何许与君来萧瑟北风寒黄云暮枕锺阜湖玄武生此虎真蹲踞看四
山环合休临江渚可笑唐人无意度却言此虎凌波去君且住明月为人来潮生浦王潜斋楚
六州歌头龙蟠虎踞今古帝王州水如淮山似洛凤来游五云浮宇宙无终极千载恨六朝事
同一梦休更问莫闲愁风景悠悠得似青溪曲着我扁舟残烟衰草满目是清秋白鹭汀洲夕
阳收黄旗紫盖中兴运锺王气护金甌驻游踪开行殿夹朱楼送华辀万里长江险集鸿雁列
貔貅扫关河青海岱志应酬机会何常鹤唳风声处天意人谋臣今虽老未遣壮心休击楫中
流

景定建康志卷三十七

卷三十八

<史部,地理类,都会郡县之属,景定建康志>

钦定四库全书

景定建康志卷三十八 宋 周应合 撰

武卫志一

武事非圣人所先也而卫国卫民有不可废禹贡之制奋武卫於绥要之间所以固内而备外者虽盛时未尝忘也岂若後世敌至而惧敌去而玩者哉周文武时命将帅遣戍役亦惟曰守卫中国而已又岂若後世黷武逞威而至於弗戢自焚者哉自吴以来立国江南者莫不恃江以为固江又恃人以为固人谋善而武事修则江为我之江否则与敌共尔易曰天险不可升也地险山川丘陵也王公设险以守其国险必能设国乃可守今之建康内屏畿甸外控淮堧寔长江之要会中兴以来任重臣建大阍用名将宿重兵於此上接荆鄂下聯海道守卫至重安危所关审形势而後知政守之宜审攻守而後知江防之要严江防而後知兵籍之不可单兵政之不可怠兵船之不可不备兵器之不可不利兵寨之不可不整烽燧之不可不谨而浚筑之不可不勤也作武卫志

形势

诸葛亮曰鍾阜龙蟠石城虎踞真帝王之宅

丹阳记曰石头因山为城因江为池地形险固尤有奇势

李纲曰天下形势关中为上建康次之宜以长安为西都建康为东都

卫肤敏曰建康寔是帝都外连江淮内控湖海为东南要会之地

刘珏曰金陵天险前据大江可以固守 张浚曰东南形势莫重於建康寔为中兴根本 陈亮曰旧日台城在鍾阜之侧据高临下东环平冈以为安西城石头以为重带元武湖以为险拥秦淮青溪以为阻是以王气可乘而运动如意 江默曰自淮而东以楚泗广陵为之表则京口秣陵得以蔽遮自淮而西以壽庐历阳为之表则建康姑孰得以襟带表里之形合则东南之守不孤其来尚矣余见江防

攻守

张敦颐曰晋蔡謨曰时有否泰道有屈伸暴逆之寇虽终灭亡方其强盛皆当诘而避之要终归於大济而已为今之计莫若养威以俟时王羲之曰以区区江左营综如此天下寒心久矣中兴之业政以道胜寬和为本力争武功非所当作二人者能言之而不得行之行之而足以

安江南者孙权一人耳陆瑁尝劝权曰九域盘互之时率须深根固本爱力惜费陆逊尝劝权曰施德缓刑宽赋息调权报之曰发调者盖谓天下未定事以众济若徒守江东修崇宽政兵自足用何以多为顾坐自守可陋耳以此知权之志未尝不在於天下然以传考之亦未尝肯求逞於中原曹公来侵则破之拒之而已治舰立坞筑堤遏湖作涂塘明烽燧始终所以备魏者至矣及移牋於曹公曰足下不死孤不得安则权固未尝得志也嘉禾中因蜀寇魏一攻淮南闻明帝东行遽则敛避诸将之攻樊城司马懿救之亦引军亟退自後世观之谓之怯可也而权不以为耻岂非天下之势既未有可投之隙与其力争而取败不若退守而待时也耶史称权继父兄之业有臣以为腹心股肱爪牙兵不妄动故战少败而江南安此权之所以为治也及嗣主立诸葛恪为政首侵边以怒敌东兴之战幸捷顾不能持胜复违众大举一败涂地恪既丧躯而孙氏之业因以衰焉则权之兵不妄动利害果何如也其後孙皓用诸将计数侵盗晋鄙陆抗曰苟无其时虽复大圣亦宜养威自保不可轻动今不务力农富国审官任能明黜陟慎刑罚训诸司以德拊百姓以仁而听诸将狗名穷兵黷武动费万计士卒凋弊寇不为衰而我已大病矣夫争帝王之资而昧十百之利此人臣之奸便非国家之良策也抗之言兼有陆瑁陆逊蔡谟王羲之之论而皓不知用此其所以亡也东晋自庾亮经营征伐皆不能有成谢安父子乘苻坚倾败之余图之如恐不及也至於渡河入邺讫无尺寸之得宋文自以富强诘戎兵於元魏檀道济再行无功皆诸将以败继败而胡马遂至瓜步梁武遭魏世之乱陈庆之以数千兵入洛而嵩高之袭几至殲尽及贪河南之地纳叛将弃睦邻而身国颠覆陈宣帝辟土宇於北齐旋失淮泗於後周虽以桓温刘裕非常之才度越历代诸将而温伐苻健慕容暉皆几成而败裕平南燕灭姚秦亦既得而失则六朝用兵攻伐之策可见矣【详见表】

江防

吴聿曰江出岷山自湖口合流而下奔放荡潏吐吞日月山或砥之则其势悍怒触舞大扁兀若转梗至其广处旷数百里断岸相望仅指一髮而舳舻上下中流遇风则四顾茫然无所隐避自金陵抵白沙其尤者为乐官山李家漾至急流浊港口凡十有八处称号老风波而玩险阻者至是鲜不袖手 吴志曰魏文帝有渡江之志望江水盛长弥漫数百里便引退自叹曰魏虽有武骑千羣无所用也 干宝晋纪曰魏文帝之在广陵吴人大骇乃临江为疑城自石头至於江乘垣以木楨衣以苇蓆加采饰焉一夕而成魏人自江北望甚憚之曰彼有人焉未可图也乃还 宋书元嘉二十七年魏声欲渡江太祖大具水军为防御之备领军将军刘遵考左将军尹宏守横江少府刘兴祖守白下建威将军黄门侍郎萧元邕守裨洲羽林左监孟宗嗣守新洲上建武将军泰容守新洲下征北中兵参军向柳守贵洲司马到元度守蒜山谿议参军沈昙庆守北固尚书褚湛之先行京陵使仍守西津徐州从事史萧尚之守练壁征北参军管法祖守谯山徐州从事武仲河守博落尚书左丞刘伯龙守采石寻迁建武将军淮南太守仍总守事游逻上接于湖下至蔡洲陈舰列营周亘江畔自采石至暨阳六七百里船舰盖江旗甲星烛皇太子出戍石头徐湛之守石头仓城 齐书建元元年魏主宏闻太祖受禅其冬发众遣丹阳王刘昶为太师寇司豫二州明年诏遣众军北讨初虏寇至缘淮驱略江北居民犹惩佛狸时事皆惊走不可禁止乃於梁山置二军南置三军慈姥置一军烈洲置二军三山置二军白沙置一军蔡洲置五军长芦置三军徐浦置一军以备之魏不能攻 周世宗问江南虚实孙忌答曰本国虽小甲兵尚三十万世宗曰江南不过十数郡何见欺也忌曰精兵虽止十余

万然长江一条飞湍千里险过汤池可敌十万之师国老宋齐丘乃王猛谢安之徒又可敌十万张虞卿曰历考前世南北战争之地魏军尝至瓜步矣石季龙尝至历阳矣石勒寇豫州至江而还此皆限於江而不得骋者也然江出岷山跨郡十数备之不至一处得渡皆为我忧使吾斥堠既明屯戍惟谨士气振而人心固矣恃江为阻可也虽无长江之险亦可也苻坚百万之衆马未及一饮江水谢玄八千鋭卒破之於淮淝岂非其效欤不然任巢以奇兵八百泛舟即渡吴人有北来诸军乃飞过之语韩擒虎以五百人宵济采石守者皆醉遂袭取之由是观之徒恃江而不足於守鲜克有济矣曹操初得荆州议者谓东南之势可以拒操者长江也操既得荆州蒙冲战舰浮江而下则长江之险已与我共之独周瑜谓舍鞍马而仗舟楫非彼所长赤壁之役果有成功至於羊祜之言则以南人所长惟在水战一入其境长江非复所用他日成功畧如祜言故臣以为有如瑜者为用则祜之言谓之不然可也无如瑜者则祜之言不可不察也彼为说者谓北人以马为强而江流迅急渡马为难北人便於作?而江流迅急非?能济是未知侯景以马数百一夕而渡王濬自上流来未尝用?也州县一也有最为要害者津渡一也有最宜备豫者苻坚自项城来壽阳侯景自壽阳移历阳孙恩自广陵趋石头王敦渡竹格苏峻泛横江侯景渡采石考前世盗贼与夫南北用兵由壽阳历阳来者十之七由横江采石渡者三之二至於据上流之势以窥江左者未论也建炎三年冬金兵自黄州渡又自马家洲渡时杜充在建康闻敌至以军六万列戍江南岸而闭门不出师无统一皆无鬪志王綯曰杜充提兵守建康不称任使事乃至此云云明年夏四月韩世忠提舟师截大江以邀金兵相持黄天荡四十八日乌珠遣使与世忠约曰会战世忠募海船百余艘进泊金山下仍植一旗书姓名表其上敌望见大笑曰此吾几上肉耳世忠预命工鍛铁相联为长细贯一大钩徧授诸军之强壮者平旦敌拥十舟噪而前比合战世忠分海船为两道出其背每细一细则曳一舟而入敌不得渡复遣使愿还所掠及献马三千世忠不听曰只留下乌珠乃可去时达兰所遣之兵在仪真江南北两岸皆敌衆世忠据中流风帆浪楫飘忽若神乌珠闭垒不敢出完顔宗弼谓诸将曰使船如使马何以破之乃欲自建康谋北归凡古津渡又被世忠八面控扼不得去或献谋於芦场地凿大渠二十余里上接江口舟从江背出世忠之上流一夜渠成次早出舟世忠大惊尾击败之敌终不得济一日敌乘天霁无风我所用海舟皆不得动彼乃以轻舠絶江而遁世忠曰穷寇勿追使去乌珠回江北屯於六合县达兰在山东遣人谓乌珠入寇无功盍止於淮东候秋高相会再寇江南乌珠以前日渡江之危为辞吕颐浩言敌人多诈难测诏刘光世分兵以备江岸绍兴三十一年金人万户高景山以兵数万犯扬州刘錡提大军御之於清河敌以毡裹舟载粮挽而上錡募善没者凿舟沈之敌大惊俄犯扬子桥錡以兵掠瓜洲敌骑逼江錡遣麾下员琦设伏於皂角林与敌接战诱敌入张弩俄发敌大败斩景山俘数百人逆亮亲统细军驻和州之鸡笼山临江筑坛刑马祭天必欲由采石而渡朝廷诏王权诣行在以池州都统制李显忠代权命督府参议官中书舍人虞允文趣显忠交权兵时显忠未至允文夜见建康留守张焘议御敌之计焘但言已当死守留钥丙子逆亮登坛建黄绣旗二中张黄盖亮执小红旗麾衆渡江时王权所留水军车船咸在而诸将未有统属莫肯用命尽伏山崦惟提举张振王琪稍任其责允文自建康因使人督之敌舟稍近於是振琪与统制时俊盛新等徐出山崦列右江岸敌初未之觉一见大惊欲退不可我军用海鳅船迎击士皆死鬪敌舟沈溺者数万其回北岸者亮皆杀之遂不能济丁丑敌往来望见车船遽却我军复以海鳅船先往北岸截横林渡口用克敌弓射之敌兵弃船上岸者悉陷泥中而毙上急差杨存中措置守江虞允文亦自建康驰至镇江时江岸有车船二十四艘敌已瞰江恐临期不

堪驾用存中允文临江按试命战士踏车船径趋瓜洲将迫岸复回敌兵皆持满以待其船中流上下回转如飞敌衆相顾骇愕亮愈忿召诸酋约三日毕济过期尽杀之诸酋谋曰南军有备如此进有渰杀之祸退有敲杀之忧奈何有总管万戴者曰杀郎主与南宋通和则生矣衆曰诺乙未诸酋集兵射杀亮并杀其太傅三妃与谋事者十余人绍兴中诏沿边修守备吴表臣言大江之南上自荆鄂下至常润其要紧处不过七渡下流最紧者二建康之宣化镇江之瓜洲是也当择官兵修器械以谨其防王彦恢言建康古都乃用武之地欲保建康必内以大江为之控扼外以淮甸为之藩篱又必措置兵食以贍国费然大江以南千里浩渺决欲控扼非战舰不可大江以北万里坦途欲遏长驱非战车不可舒庐滁和良畴百万欲措置军食非营田不可舟车之法以轻捷为上彦恢所制飞虎战舰傍设四轮每轮八楫四人旋干日行千里又有神武战车下安四轮略同飞虎顶张布帷以避矢石傍斜冲击其用如神又有拒马车一人之力可以转用比之蒙冲偏箱鹿角此尤至要淮西良畴不可以数计不须朝廷给本祇以有无相济并力营田计其户口什一养兵则淮西可以守矣如许令彦恢招兵教习只乞那融淮西数州财赋可足舟车之用及以数州秋成所得那融营田可足兵食之费万一敌人入寇及盗贼猖獗彦恢当以此舟车摧锋?阵以此士卒斩将搴旗以此种蒔飞刍挽粟保守江淮决无踈失诏彦恢就本军措置时之论边防要害者有曰自古倚长江之险者屯兵据要虽在江南而挫敌取胜多在江北故吕蒙筑濡须坞而朱威以偏将郤曹仁之全师诸葛恪修东兴堤而丁奉以兵三千破胡遵之七万转弱为强形势然也淮甸郡县不必尽守故城各随所在择险据要置寨栅守以偏将敌来仰攻固非其利若长驱深入则我缀其後二三大将浮江上下为之声援敌之进退落吾计中万全之策也又有曰无为军巢县之濡须及东西关山川重复盖昔人尺寸必争之地大率巢湖之水上通焦湖濡须正当其冲东西两关又从而左右辅翼之馈舟既已难通故虽有十万之师未能便寇大江得逞其志淮西虽号地平而水陆要害皆可战守稍加措置未易轻犯又有曰若敌重兵出淮西则池州军出巢县江州军出无为军便可为淮西官军之援又有曰自建康至姑孰一百八十里其险可守者有六曰江宁镇曰礪砂夹曰采石曰大信口其下则有芜湖繁昌皆与淮南对境其余皆芦荻之场或倚岸斗絶水势湍险难施舟楫又有曰采石渡在太平州界下马家渡在建康府界上宣化渡在府界之下采石江阔而险马家渡江狭而平相去六十里皆与和州对岸昔金人入寇直犯马家渡杜充以万衆不能扞亦尝分兵犯采石太平州以乡兵等御之遂退虽杜充处置有未尽善亦形势使然则马家渡比采石尤为要害又有曰和州乌江县界可自江北车家渡径冲建康府马家渡滁州全椒县可自江北宣化渡径冲建康府之靖安兼泗州盱眙有径小路曰张店上下瓦梁盘城亦可径至宣化不满三百里乌珠曾於此路来至六合下寨并自上瓦梁下船直至滁河口可以入江宜於靖安渡礪砂夹相对三处防守所有北岸滁河口宣化两处来路应和州东地分尤宜严切堤防【又有曰昨来金人自黄州张家渡渡江由湖北路鄂州武昌县上岸方入兴国军大冶县界取山路以犯江西宜於兴国军大冶县界通山等处摆布防拒又有言曰汉阳沌口系汉江下流湖北帅司所隶尤宜严切堤防】隆兴二年议幸建康张浚受任督府讲论军务不遑寝食招来山东淮北忠义之士以实建康镇江两军凡万二千余人万弩营所招淮南壮士及江西羣盗又万余人要害之地城壁皆筑其可因水为险者皆积水为堰置江淮战舰诸军弓矢器械悉备两年冬金屯重兵十万於河南为虚声胁我有刻日决战之语将士望敌至成大功而敌亦知吾有备卒不敢动及是浚又以宰相来抚诸军将士踊跃思奋敌闻浚来亦檄宿州之兵归南京沿边清野以俟淮北来归者曰不絶山东豪杰悉愿受节度

敌益惧 景定元年马光祖置镇巢军照得本司所部淮西三城独巢县正当要害之冲北据焦湖南扼濡坞跨联合肥和阳无为三郡自丙申被兵之後增城筑堤屯兵几至万人至假邑宰以节制之权俾任干城之寄去秋上流之警谍报谓敌谋於此窥觎欲掠焦湖之舟出从裕溪以瞰江面至烦宣谕行下措置防拓本司随即调遣台项兵船把守终是隔涉一江不过遥制而已况巢民每遇清野船多迂避焦湖之中地隶合肥动以帅司临之使不得专守御识者病焉按图志此邑旧为巢州而南渡初张魏公丞相经理淮西亦尝进军於此当孙氏有国时每於此进军以扼魏师盖其形势足恃如此今既严为江防合於此增屯加备谓宜升为军垒缓急之际庶可倚重保障急务莫先於此奉圣旨将巢县升为军使仍令沿江制司选辟一次续申乞以镇巢军为名辟武德郎江东副总管建康府驻劄王珍充镇巢军使兼知无为军巢县事仍带江东副总管建康府驻劄八月二日奉圣旨依马光祖申措置下流江防本司被旨通制下流亦既立通卒分隘兵摆战舰次第施行矣续据分司孙制参备总统汤华申射阳湖通江港汊岂止三二十处惟最紧河阔水深冬月不涸者七处一曰口岸即柴墟是也二曰过船港即泰兴港是也三曰新河即魏村相对是也四曰漾港即马驮沙相对是也五曰石庄河六曰天赐港七曰通州新河并旧来泰兴县一城每遇潮生通彻城下或有哨来为其占据返为寇基既不可守只当摊平如钉塞港汊只可暂为间隔我既可塞彼亦可开兼钉塞港口徒费民力须当於发源浅狭要路去处如芦?桥下左侧六七里用工填塞更填流复溪桥下及将泰兴旧城土摊平填本县西北门河直至周桥以断泰兴过船港新河漾港三口子来路等处本职再详汤知郡所申得於足历目击之审极为详尽於江防事最有关系然地分既隶淮东镇江节制司岂敢越境而问若非於源头下手关防直待其侵逼江面与之相持则彼我之势悬絶客主之权遂分力倍事难居然可见兼射阳既迫涟水贼骑向後出没不常其中百姓一闻哨警必是各随所通港汊迂避渡江民导其前贼乘其後仓卒之际着手不及乘间窥伺岂不可忧此事合从朝廷下之淮东制司着紧措置关防当於紧要来路浅狭源头填塞使支港别汊不可得而通及将泰兴旧城摊平使倏去忽来不可得而据然後用防江兵船移寔以备用那缓以图急可合者则合可分者则分又将三流之兵循江上下联络气势令首尾相应如常山虵势彼此救援然後江面方为牢寔缓急之际委可倚仗允为江防之幸本职除已就诸隘点视却将敷布兵船斟酌紧慢别行摆泊防拓续容开申外候指挥所据状申事理备录在前本司照得参议官孙料院备汤知郡所申泰兴县一带出江港汊合於近里措置关防其说利害甚明合行备申朝廷乞赐劄下两淮制置使司照应施行寻准劄付沿江制置大使司照应已劄两淮制置使司照所申差官点视速作措置具已施行状申枢密院等劄镇江府节制司一体施行 马光祖筑宜城以固上流宜城者鴈汊对岸一要害处吴魏相拒时尝设疑城於此其後方言讹疑为宜字义宜善於疑故袭称宜城其地山从北来分为七枝中短而外长自西南以及於东则大江环遶其东北隅则有段塘湖水为之限惟北当备而有大小青龙山可以屯兵而设伏形势如此而古今屡城不克者盖亦有说北隅山高而大城欲包之则不可城於山趾则外高於内非城之利况山骨在此地不可堑故昔人能为疑城而不能城也以二十余年间事体言之不可不城者有三说大江以北自黄州而下和州而上中间无一城垒以为限隔城戍於比则自黄而和之间声援易接利一也石簪菩萨石之间江面最狭正在宜城之下曩汹汹时谍知敌谋欲窥此途有城於此戍兵为守则敌有所憚而不敢睥睨利二也自旧安庆府荒榛之後寓治杨柴洲上鸿鴈飞鸣无城郭可恃旧城既未可修复此地去寓治不远有险可恃徙民为便利三也不可不城者其利三不可以城其害一此自戊戌以来议而辄沮城

而輒止盖知其利而未知所以避其害也已未庚申之间制臣马光祖往还江上尝舣舟而视其地语客曰旧日杨义所筑城基址临张家港之滨客山高而下视之宜其不克城也城外即是山脚宜其不能堑也曷不缩其城而小之移入主山之上盖北隅有张家港水通大江秋冬则涸客山在港之北而近主山在港之南而稍远因注江而为城则视昔为狭然城因山则用力省狭则守之易城在山上则内高而外低险在我矣向所谓客山高而下瞰吾城者不足虑也远北山之趾而为濠则向所谓石不可堑者亦可避也察其故而未敢决其事会宰臣归阙舟过其下审其形势察其利害果不可以不城一见决矣与制阃合入告於上诏光祖城之速其成糜缗钱一千余万米十万余石筑城周十有三里高二丈八尺趾高七尺顶半之城门凡七上皆为楼羊马墙一千二百六十二丈濠长一千四百三十五丈而与江湖接犄角精兵坚甲利器戍守其中遂为江上一巨屏有诏褒谕进光祖光禄大夫任其事者自郡守而下赏有差【详见诏令录及侯牧表制纂官所作安庆府新城志尤详】

创宁江新军景定四年制使姚公希得任内準朝廷行下沿江建屯招军防扞务使声势连属其分屯建寨招军置将优待犒给拨给军器衣甲各有条画

分屯建寨建康太平池三郡江面计一千七十一里共建大小二十九屯建康八屯曰下蜀曰马家步曰沙河曰韩桥曰王沙曰新开河曰下三山曰汪蔡港太平七屯曰濮家圩曰褐山曰采石矶曰白泥浦曰上三山曰板子矶曰周家庄池州十四屯曰菖蒲山曰大通曰梅根曰穴港曰戚家沟曰李王河曰宝赛矶曰黄石矶曰吉阳湖曰祝家矶曰乌石矶曰香口曰双河三郡诸屯共创制寨屋一万一千九十五间本府一千七百间太平四千四百间池州四千八百间准朝廷科下十八界六十万每间科四十贯共支过科下钱四十四万三千八百贯外余钱续建各屯制领将佐衙屋本府一百三十间太平一百四十六间池州一百九十五间内本府寨屋每间贴助十八界二十贯计支过三万四千贯十八界将佐衙屋不计焉诸寨内有坐落低窰去处别议合并移改

招刺宁江军宁江前後军额六千二百人马公光祖刷具阙额凡一千一百七十余名差将校分头招募每一名支等下钱三百贯七事件军装一副截至咸淳元年十一月终共招到一千三百七人

教习宁江军及束并军分初宁江分屯二十有九然少者仅数十人为一屯非所以联队伍壮气势也马公光祖将前後两军束并前军二千六百九十一人并为八寨後军二千六百三十六人并为七寨每五百人置正副準備将不及五百人置正副将然後稍成将队各有统纪又因巡江亲至诸屯閱习武艺士皆新募挽弓蹶弩鲜能应格遂遴选江淮精兵发下各屯夹持训习不时委官賚钱银激犒射箭撙抢行之稍久人渐精熟今秋敌闯濡舒诸屯旗帜鲜明炮坐森列步骑出入金鼓喧轰其习熟波涛者又操舟往来上连下接敌隔江觐其有备乃遁去赏格【红心箭一只支钱五贯文帖箭一只支钱三贯文垛箭一只支钱一贯文抢手每撙三百撙支钱两贯文又各屯支银掏一个一名射中独得二名以上均给累给十六中以上补训练官】

招军置将準朝省指挥将建康太平池三郡阙额六千二百八十人以宁江新军为额每人科下身子军装等钱十八界一百贯共科到六十万遂差官分往诸郡招募本司招到四千五百一十五人太平州招到八百五十人池州招到九百一十五人为数已足总支过六十二万八千贯十八界建康八屯派拨九百二十人太平七屯派拨二千三百六十人池州十四屯派拨三千人建康太平一十五屯为宁江前军池州一十四屯为宁江後军各军置统制兼总制一员统制三员正副将各三员準?将六员

优待将士制领将佐本身请给外本司务从优厚差兼帐前职事添帮月给成年该支钱三万四百八十贯旧措米四百四十四石酒一千六百三十二瓶各有等差其发遣新军着屯自制领将佐以至官兵等第支犒共支钱四万五千二百二十五贯其各屯器具动用悉与办集如床荐蓆锅盆桶二万三千五百六十四件计钱一十六万八千七百二十九贯有奇其单身人刱给冬衣白布绵袄三千领该钱一十八万三千三十八贯又造到旗帜大小三千一百七十面前後军各给其半为费五万八千八百八十七贯有奇又置惠军典本一十二万八千贯应副诸军急缺质当不许收息杂卖本钱六万四千贯以便诸军食用不许取利又置碓臼一百四十副分拨诸屯以便舂伐以至聘娶教閱冬年节支犒及纸劄捉逃菜种等杂费钱通约计三十一万一千七百二十贯又新军入营之後多有不服水土病患者与之修合药餌支拨钱米木炭等选择医人优支月给节次差官提点医治又虑奉行未至分委募属同医人将带生熟药白米等前去诸屯家至户到点视医疗通支钱二万九千六百八十七贯有奇米一百二十七石六斗炭三千五百斤其新军老小住居各州县者支給路费移文各处取发至司遣赴屯所又各支安家路券等钱及不时差官吏往诸屯点检抚劳一应券食杂支截日通用过十六万二十余贯又恐诸兵着寨未久时加优恤差官逐屯支犒共支过钱六万六千余贯旧凡百加意靡不修至焉

给军器衣甲付各屯桩管以备使用角弓九百四十二张弩六百二十八件枪一千五百七十条弓箭四万七千一百只弓??九百四十二个弓弦九百四十二条弩箭六万二千八百只腰刀二千五百一十二把弩??六百二十八个手斧六百二十八把金一十八面鼓四十六面划车弩三十三座甲一千二百五十六副胖袄一千八百八十四领绵裙一千八百八十四腰衲袄三千一百四十领衲裙三千一百四十腰以上共发过一十三万九千四百件【内除朝廷科下殿司鉄甲袄裙五千九十六件并建康府胖袄绵裙一千八百八十七件太平州军器一万八千五百七十二件外余从本司库支】

制使姚公希得任内刱买战马沿江守备虽以舟楫为要然上流万一有警牵泝必迟非得精骑疾驰巡连江面又恐坐失事机旧来此地号为多马考之尺籍戎司以数千计马司以万计近来减耗百无二三边备所关岂容偏废於是拨一百万贯专委都统赵纪祥以买战马以备调用自景定三年节次收买及解捆之日共买到三百一十四匹余缙桩之司存接续收买

创建马寨有马无屋寒暑非便景定三年制使姚公希得解阕有日又与措置度地建寨以便牧养据所委官申武定桥东堤岸头可为寨地遂差濠寨计料创屋八百五十间约费四十五万二百六十余缙旧楮米八百一十五石柴五千余束用四月初三日兴工动土间续据白劄

条陈寨基卑湿不便欲於北门寨骆驼寨两处旧基择其稳便者缘新政将至仓卒未容改作又虑移改增费遂再刷一十万通前共桩立十五万并柴米等一面烧造砖瓦置办材料责付所差提点受给官范胜等任责桩管仍备申朝廷乞割下新制使照应承续区处高平寨地起盖庶经久云

先锋马并建寨先锋军马旧管止八十一疋姚公希得及马公光祖任内买到三百七十六疋通前共四百五十七疋初议建寨以便牧养而难其地景定五年夏四月定卜於南门外沙井头面势寛平水草饶美以是月二十五日经始至九月二十四日毕工为屋八百七十八间官廨庙门楼点亭一一备具续以人马数增又益屋一百二十六间 寨记【南方倚舟师为长技北人事鞍马利驰突南不言骑北不言舟师非习也虽然用我之长兼彼之长彼以其偏我以其全何战不克何守不固哉中兴六飞南渡驻蹕全吴天险在前利在舟楫然是时命吴璘通马於西胡舜陟市骏於广至绍兴间李世辅以马司精锐一日驰安丰会采石蹙逆亮而毙之其兼用所长之效如此昇左臂淮右吭浙首枕荆蜀水陆上下之会武修宜毕精制司旧有先锋马军历岁久圉牧废存者不什一余奉命留钥始至百废如蝟毛念未及兹再至则计宿储考初籍欲举而未遂橘州姚公寔来方擢度费务而余又三至矣先是姚公命都统赵纪祥市马得三百一十四余不敢堕公志乃益选良骏籍厥毛齿慨聚之之难则廐而牧之其可易遂度地南门之外曰沙井者平坡曼衍水草丰沃河浒近则洗之易刍茭便则饲之勤廼召匠经始程土物量事期计徒庸主费有司护作有校役始於景定甲子四月至咸淳乙丑正月成列楹一千有四廩缗钱一十一万五千有奇米八百二十三石有奇费一出於制帑役成昇人不知因念隆兴乾道间张虞二公志在规恢士马精壮马司移屯自兹始也余老矣方将为伏枥想何敢望二公然力不足意有余倘尚此一日留尚当殫一日力谋多务广终求以足余意而亦以成姚公欲为未竟之志焉异时驰劲骑三千蹀血虏庭不肯以天限南北一语挂牙辅知必有不负余志者姑识诸石以俟观文殿学士金紫光禄大夫沿江制置大使兼知建康军府事兼管内劝农营田使兼江南东路安抚大使马步军都总管兼行宫留守节制和州无为军安庆府三郡屯田使兼权淮西总领金华郡开国公食邑四千一百户食寔封八百户马光祖记并书朝奉大夫秘阁修撰江南东路计度转运副使兼本路劝农使借紫赵孟頫篆盖】

买宁江军战马景定五年九月马光祖準省劄行下每宁江军一千人以二百人为骑军前後二军共合办马一千二百五十六疋江南非产马之地措置收买为力倍难所得之马皆择其齿嫩格高者鞍辔槽具色色齐备分派诸屯使善骑者训习弓矢矛稍各有执艺今余半年驰骤施放大略可观缓急足为战御之备【宁江前军六百二十八疋第一将沙河寨一百单四疋第二将韩桥寨三十六疋下三山寨三十六疋第三将褐山寨八十疋第四将乌石港寨八十三疋第五将上三山寨九十一疋第六将板子矶寨一百疋第七将周家庄寨九十八疋宁江後军六百二十八疋第一将菖蒲山寨八十疋第二将梅根寨一百疋第三将戚家沟寨八十疋第四将李王河寨一百五十八疋第五将吉阳湖寨六十四疋第六将乌石矶寨八十三疋第七将香口寨六十疋】

景定建康志卷三十八

卷三十九

钦定四库全书

景定建康志卷三十九 宋 周应合 撰

武卫志二

尺籍【营寨已具城阙志後】

建康府厢禁军隶安抚司元额四千人亲兵一千人禁军一十一指挥元额一千五百人
钤辖司五指挥马军指挥忠义指挥全捷第一指挥威果四十四指挥横江水军指挥 将司六
指挥威果十三指挥威果十四指挥威果十五指挥全捷第六指挥忠节十一指挥武雄第一
指挥

厢军四指挥元额一千五百人 効一指挥効二指挥牢一指挥牢二指挥

亲兵一千人系禁军内拨到

建康府驻劄御前诸军隶都统制司兵五万马五千八十七疋

绍兴初张循王俊将带所部神武右军人马前来建康府驻劄後改充行营中护军起发泗州
绍兴七年复回建康至十一年四月内奉圣旨改充御前军立名都统制司续于节度使王德
任内準密劄以五万人马五千八十七疋为额游奕前右中左後六军每军各置统制官一员
统领官二员正将五员準备将五员钱粮系淮西总领所帮给

游奕军 前军 右军 中军 左军 後军

侍卫马军移屯建康府以三万人骑为额

乾道二年正月二十八日奉旨以二万八千人为额六年四月十五日李舜举奏乞以三万人
为额奉旨依七年三月太尉威武军节度使王管侍卫马军司公事李显忠奉旨移屯建康

选锋军三千五百人马八百疋统制官一员统领官二员正将二员副将二员準备将二员

前军三千人马六百疋统制官一员统领官二员正将三员副将三员準备将三员

右军五千五百人马八百正统制官一员统领官二员正副准备将共一十七员

中军五千二百人马八百正统制官一员统领官二员正将六员副将六员准备将六员

左军五千人马八百正统制官一员统领官二员正将五员副将五员准备将五员

後军五千人马八百正统制官一员统领官二员正将五员副将五员准备将五员

沿江制置司增置军额

防江军三千三百人内步军三千人【胜捷五百人吐浑一千人雄威一千五百人】马军三百人骑嘉定十七年十一月三十日准密劄勘会建康府系沿江重镇合行增屯兵马以壮声势须议指挥十一月初八日奉旨令沿江制司日下措置招刺步军三千人马军三百人骑并聽沿江制司节制步军并刺充三色军兵胜捷五百人吐浑一千人雄威一千五百人马军三百人并刺充次等效用【其马军三百人骑步军一千人理作建康府都统司阙额六千人理作马军司阙额】本军统制官一员统领官一员正将四员副将四员准备将四员

效用军一千四百五十五人 绍定元年十二月因逆全为乱赵大使善湘申请朝廷招募效用军一千四百五十五人理填骑戎两司阙额放请

破敌军一千四十四人 嘉熙元年四月陈制使韓申请於朝取发福建两浙江西湖南诸郡土牢拘锁人拣选强壮赴本司面刺双旗借理诸军阙额放请立名破敌军自後逐时又将所部去处曾经作过及犯盗强壮堪以充军之人一例刺旗发下破敌军收管放请置立将队选差制领将佐训练官合千人部辖【密劄沿江制置使司申照得本司累准朝廷指挥招军填额缘沿江就招率是游手缓急无用近尝以福建八郡土牢人申请乞行下安抚转运两司拣择前来驱用又窃见江西湖南乃峒寇接连之地贩负茶盐犯法尤重罪不至死必至縲继两浙州郡亦有刼盗私犯作过拘繫之人内地无用徒费粮食而强悍之人囚首待尽终无洗濯自新之路不若驱之军前使効死力其与招收脆弱未习武艺者相去甚远欲乞朝廷严赐立限劄下两浙江西湖南诸郡各处守臣将土牢拘锁人?择强壮选有心力官员部押优给路费发付本司早得抚养训齐使成一军为秋防用寔为两便右谨具申枢密院伏乞指挥亟赐施行中间事已劄下两浙安抚司湖南安抚司各从所申事理行下本路诸郡守精加拣择强壮委可备战鬪役之人不许以老弱病幼者充数候有拣到人数责委有心力官部押前去沿江制置使司交管仍须管严加督责在路谨守纪律毋令稍有违犯及生事搔扰起程一日先具遵禀及已作如何措置仍陆续具起程日时元犯申枢密院外右劄付沿江制置使司从所申事理施行准此】本军统制官一员统领官一员正将一员副将二员准备将二员

精锐军二千五百三十一人 淳佑七年都督赵葵给旗榜于两淮等处招募农业强壮创立军将理帮骑戎两司并策胜防江军名请本军统制官一员统领官一员正将四员副将四员准备将四员

亲兵左右部共一千人 淳佑七年枢密陈韡招收沿江诸沙一带强壮淮民帮四百例请给带行湖南潭州驻劄立为行府亲兵镇压巉峒九年陈枢密结局具申朝廷将上项七百人拨隶沿江制置司收管听候调遣本司续招强壮三百人凑作一千人为额本军统制官一员统领官二员正将二员副将二员准备将三员

策胜中右二军元额二万人

淳佑五年八月密劄勘会朝廷近已行下淮东两制司沿江制司沿江副司京湖制置大使司湖南安抚大使司淮西招抚司淮西安抚司浙西兵船司太平州节制司共招募游击军三万人今来陆续将已招到人数分解屯劄之所八月十二日奉旨以御前策胜为名其三万人分为前右中左後先锋六军每军五千人差统制一员内前军左军屯劄镇江府右军中军屯驻建康府先锋後军屯驻池州仍听各郡守臣节制劄付建康府节制司施行

中军五千人统制官一员同统制一员统领官一员正将二员副将三员准备将三员

右军五千人统制官一员统领官二员正将三员副将五员准备将五员

制劄两军元额二千三百二十六人

元系两淮土着税户因金兵连年侵扰避地诸沙端平三年间制置司差官抚恤招募涅刺充民兵制劄军理骑戎两司阙额帮放次等劄用二百食钱请给分为十部差置制领将佐管干趲应差调续於淳佑十年内本司以诸部零抽不成军分具申朝廷并作两军每军立为四将给降制领将佐付身帮行供给第一军一千一百一十人

第二军一千二百一十六人 各军统制官一员统领官一员正将四员副将四员准备将二员

靖安唐湾水军元额五千七百二人

靖安水军于淳熙十三年三月内移拨采石水军一将二千五百人前来靖安镇屯驻并理建康府都统司阙额续於嘉定八年七月创置唐湾水军二千五百人并理马司阙额嘉定十四年十一月内准密劄备奉圣旨唐湾靖安两水军合并一军差置统制统领各一员嘉熙二年以後创置寄泊新军七百二人理骑戎两司阙额

龙湾游击水军元额二千九人

绍定三年招刺理填马司请给

金山团窝制劄军元额六百五十九人

元系两淮土着税户因金人连岁侵犯避地江南都督赵葵任内委官团结充民兵制効半年军前来地名金山庄团窝屯驻淳佑九年委官下沙劝谕掎刺放行全请并理都统司阙额

游击军五军共一万二千四百一十二人

宝佑四年制使马光祖奉朝旨创招游击军四千人宝佑六年制使赵与?续招三千余人开庆元年马公再至又增招五千四百余人通前共招万二千四百余人增给衣装等下钱【每名给等下钱三百贯青纱头巾一顶布衲袄一领小布衫一领都管皮一条布袴一腰?鞋一双脚绊一对并常官给付二】般家钱利物等【每名般家钱并起发券食钱共一百三十贯文银环一对花一枝红斑绢十段】作新寨以安其居【详见营寨】支婚嫁钱酒米帛以乐其家【每名支钱一百贯酒四瓶米一硕绢一疋】拨典本钱二十万贯以济其急【内二十万贯不起息应副军士急阙借用】拨营运本钱一十万贯以其息佐军用酒库药舖靡不备具请於朝以御前游击军为额乞置都统制一员五军统制统领官各一员【内在军增统领一员】正副准备将各一员

前军 右军 中军 左军 後军

雄武军五百八十七人

景定元年正月内江东宣抚大使司创招此军寄泊精锐军本军统制一员正将二员副将三员准备将三员

义士军一千八百七十三人

开庆元年十月内大使马光祖创招强壮胆勇之人立名义士军每名支军装钱三百贯贍家稻一十硕日支十八界三百文米三升节次调遣上流景定元年五月抽回寄泊游击中左後三军

良家子

开庆元年十月大使马光祖招收土豪壮士材武出衆之人充良家子优赏格以劝其来精閱习以程其能军装钱并特支钱每名四百贯文日支十八界四百文米三升

宁江新军六千二百八十人

制使姚希得任内新招【附见江防内】

新招帐前将官

景定三年八月姚尚书任内抚司準枢劄奉宣谕指挥行下江东九郡招募不涅寄请将官共募到三百单六人

建康府一百一十一人 太平州三十三人 宁国府二十一人 池州六人 徽州四人 饶州六人 信州九十三人 广德军二十八人 南康军四人 内本府招到人各支紵丝一疋青绢搭膊一条并等下钱计三万一千五百贯酒二百二十二瓶外每人月给钱一百贯米一石至五年三月计支过钱一十七万七千六百贯通前总支过二十万七千六百贯米一千七百七十六石除节次放至是本府见管六十六人令行移未已

重新中军教场亭

閱武所在军务系焉屋老且狭弗称大閱景定三年制使姚希得任内遂拨松木城砖等物委都统赵纪祥鼎新翺盖比旧展阔增高为屋计二十四间结筑将坛布甃堦面廊墙回合丹雘完备总费钱二万六千九百七十余缗砖木不与焉

制使姚希得任内修整诸营寨水井

景定四年十一月初三日準银牌批判访问诸营寨甃井少土井多土堙水浑汲水不便仰各军统领契勘见在井数如甃井浑臭者即与淘浚土井崩坏者即与甃砌人稠井少去处即与添凿庶几军中省远汲之劳来春免疠疫之疾限一月区处申不许文具後据所差点视官韩明申除堪好不必修者外有五百九十六眼当修随其损坏多少给钱有差总费一万六千九百七十贯

大使马光祖到任将例册稿给军民

乙卯开闢钧判昔谢尚为建武将军能坏乌布帐以为军士襦裤当使於前修无能为役然损已利人心庶几焉分闢以来内省望薄无以上报君恩下副人望岂敢尚循故例安受例册自当使到任送到例册并备堂公用器皿见钱等约计一十八万三千贯更关宅库拨凑二十万将合赴教射射诸军均犒一次已米再至并及诸厢人户至是复举旧例行之

省罢冗员以其俸给宁江军制领将佐

大使马光祖景定五年六月【阙】日準枢密院劄子备本司申照得安军士之心者莫若择抚循之将厉撻克之禁者不若厚廩稍之给年来军校俸入无几物价腾翔米盐之靡密妻孥之供贍未必不取办于诸军甚至受钱以买闲私役以营利以故贫者不容於不病病者不容於不死不病不死不逃何待是固管军者之责循流溯源亦由俸廩微薄不足以自给故也母已则稍增其俸然为数浩瀚日引月长一时行之後将安继展转而思惟有去无益而就有益省去无用而为有用其於责实之政庶几有补今照得建康府总管钤路正副将等阙添差猥衆往往多是不堪任事之人前任未滿又於再任请给人从悉同正官委为帑廩之蠹今纵未

能尽汰亦当就内节省照对总管除正任一员归正二员外添差八员今欲省罢四员存留四员路钤除正任一员外添差者七员今欲省罢三员存留四员州钤除正任一员归正一员外添差者三员今欲省罢一员存留二员路分除正任一员归正二员外添差一十二员今欲省罢六员存留六员正将除正任一员归正三员外添差八员今欲省罢四员存留四员副将除正任一员归正四员外添差者五员今欲省罢二员存留三员准备将见任添差一员仍旧却以省到各官每月所请钱米添给宁江新军制领将佐庶几稍有顾藉不至掊尅如蒙朝廷矜允所申乞赐敷奏割下本司照应仍关合属去处其已省罢者见任人听令终满已注下者别令注授伏候指挥朝廷照得此项省罢添差等官以增制领将佐月俸割送本司照应仍具已减员数钱米与今来增支数目申令开具省罢创置员数下项

省汰共二十员

添差总管四员添差路钤三员添差州钤一员添差路分六员添差正将四员添差副将二员

创置共三十八员 统制二员统领四员正将十四员副将十四员准备将四员

招募在府诸军阙额

咸淳元年五月十九日大使马光祖判云诸军近日阙额颇有妨差调合行下诸军任责招募须要各等每胜捷一名支二十贯吐浑一名支十六贯雄威一名支十二贯截日终共招到一千九百八十九人

招募水军

咸淳元年闰五月二十九日马光祖判云差人招军多是拖扯生事今所招水军合行下镇江浒浦两戎司澈浦水军各任责招三百人能船能水刺胜捷支等下钱六十贯能水不能船刺吐浑支四十贯能船不能水刺雄威支二十贯仍各支五事件军装一副截日终已招到

诸军婚嫁

大使马光祖先未开阍尝行下诸军应有女年十四岁以上及孀妇无依愿再嫁者许就诸军择年纪相当之人议亲每一名支十八界二十贯米一石绢一疋酒四瓶至是复照旧例行之

提兵剿逐安庆无为虏哨

咸淳乙丑秋八月金重兵由丰庐入寇侵无为境甫三日奄至安庆城下奸谋叵测本司先已节次调兵守御至是大使马光祖亲提舟师以十五日发龙湾二十三日抵安庆敌酋登山远望舳舻衔尾戈甲耀日数十里不絶呼被掳者诘之或告之曰此马相公军马也於是震惧丧魄伪立排架一夕遁去上亲御翰墨奖谕九月十六日班师解严

军器

除戎器戒不虞传於易砺锋刃鍛戈矛誓于书修车马备器械序於诗有备无患其来尚矣汉帝使人视吴汉何为方修战攻具乃有隐若一敌国之叹祖逖用二千人起冶铸兵固知其有誓清中原之志李德裕请甲人於安定弓人於河东弩人於浙西於是兵器皆犀利而蕃外不敢窥焉修政攘夷兹非急务乎我朝建阊金陵藩屏畿甸兵甲四出则北援淮东备海南控荆楚西助巴峡开庆景定间凡甲冑戈劔弓矢之需取具於异者无虑数十万计取之不竭备有素也先是宝佑丙辰马光祖为制使首措置军器库已未以大使再至则鼎建都作院无日不讨百工皆精而器愈备焉姑志其凡於左

军器库措置条目已列於诸库之编

都作院记【戎器为战守要务尚矣金陵国家陪都襟江带淮虎视京洛常宿重兵根本三边有警水行陆骛百道竝出戈矛劔甲累钜万计率顷刻立具用广数夥以故缮治益急作院旧在郡治之东南青溪地垫隘沮洳屋老欲压数议改荆未果观文殿学士制置大使裕斋金华马公再镇之三年政通力纾百弛具张廼即故址撤而新之谓幕客朱君幼学敏毅有干局俾课役培土石增其崇取旁废营地益其广表以门帘以长垣听事所中居翼以重廊鍛砺刮磨绵络弦甲筋革之工凡十有二列于左熔冶麻缕竹木骨角设色之工凡十有六位於右帑藏祠廨先後环拥大都百三十有三楹牖分棋布相望如引?宅幽势闲夏凄冬温视昔人冶城铸兵规制畧同糜金钱若干缗粟若干硕各有奇役始景定二年四月甲午成五月戊辰居佚艺生器以犀利无有苦窳吁盛哉公之精神思虑知周曲成如此引而伸之可以用天下矣且天下一器耳政其工人其材心其弥纶范围之乡也含茹至广大经纬至微密万物备百工具故君子先治心为之地犹斯宇之虚畅洞达工师得以藏修夷愉也欵治人犹工之用五材度五则以致其美毕其巧也欵平天下则器之成而勿坏也考乎此为考工记攻乎此为车攻诗除乎此为除戎器戒不虞之萃器耶抑道耶其利无前而长铗为顿其捷无方而弩羽为缓于战守乎何有信乎公此举可为佐天子用天下法矣公授简之巽不敢辞因衍迤其义为记门生承事郎特改差充沿江制置大使司干办公事家之巽撰门生儒林郎宜差总领淮西江东军马钱粮所準備差遣赵与鑒书门生通直郎特差充沿江制置大使司参议官王起晦篆盖】

宝佑二年终见管旧军器二十七万二千五百四十一件【铁甲身七千八百四十七领铁头牟六千五百七十一顶鉄披膊八百五十九副角弓一万五百九十七张角弩稍四百八枝毛翎弓箭六万四千六百八十五只竹翎弩箭八万六千六百四十三只黑油弓箭??五千四百八个黑漆弩箭??三千四个黑漆栲栳子二万四千三百五十二个手刀皮鞘一万二千一百二个黑漆弩桩一千九百九条手刀八千五百九十二把捧刀六百七十把铁叉四十把金三十七面黑油弓袋箭??一百六十五副捧刀皮鞘四百一十四个黑漆皮马甲一副炮砂一千三百二十八个队鼓三百二十一面红布衲袄五千八百三十一领红布衲裙二千七十三腰黑布衫五领黑布绵衲裙一千五百三十五腰红布绵絮软纏袄五千七百六十三领皂绵纸台?子一百六顶红布纸台?子五千三百二十四顶黑布纸台帽子一千三百二十六顶金褐布衲裙五千九十九腰豹班布?子二千九百二顶车鼓七面红布衫一十领鞭箭??三百个小小

皮竹牌一百一十五面大斧三百九十二具黑油长枪六千条】

宝佑三年八月二十七日至宝佑六年正月二十六日制使马光祖任内剏造及添修共三十六万七百三十二件

内剏造三十七项共八万八千一百九十一件【倒穿鉄甲身五百领倒穿鉄头盔五百顶鉄披膊一百八十副角弓丝弦一万一百八十条射亲弓箭五千只射亲弩箭五千只毛翎弓箭三万只毛翎弩箭二万只破阵刀五百把虎斑皮鞘全炮砂五百个红布绵絮软纒袄一千领红布衲袄九千一百七十九领木弩麻弦一千五百条鼠尾解扎?二千五百副扮拽木弓五百五十张罗圈皮甲二副头盔一顶梯儿角弩二弄弦索事件金铡刀一把金丝褐布衲裙二千腰掠阵刀二把皮鞘全腰刀二把皮鞘全狼牙棒二条山字叉三把羊头叉一把月斧三把黑油弓箭??三个黑漆弩箭??一个金褐布衲袄一领黑漆腔队鼓一面天王等旗三十二面枪头拒马子五十座炮?五十条车鼓六面车鼓架子六座金鼓袍儿六十领黑油敲棍一百条破甲锥枪一千二百九条茅叶枪二千一百条朴刀枪二千八百条改穿鉄甲身七百三十六领辘洒剏穿鉄甲身九百六十四领鉄头盔九百六十四领】

内添修三十七项共二十七万二千五百四十一

件【细数见前项旧管】

宝佑六年三月二十一日至十二月二十二日大使赵与?任内剏造及添修共七万一千一百六十二件

内剏造二十一项共三万一千二百六十八件【倒穿鉄甲身六百七十九领倒穿鉄头盔六百七十九领红油破木枪四千四百条黑漆四道红木弩八百三十五枝角弓丝弦四千九百五条弓箭??一千个红麻鼠尾?四百五十条红麻解扎?四百五十条红油食 二百六十只炮砂五百个角弓一百张?筒桩弩五十弄计三百件?筒弩桩一百五十条鹿耳子一百五十个弩箭四千只弩箭??五十个红布小绵袄五千五百领杂色间道旗三百五十五面红麻突头三百五十五个红布衲袄一千领两浙诸郡代军号月子五千一百五十个】

内添修三十二项共三万九千八百九十四件【角弓四千张黑油木枪七百条红布绵絮软纒袄一千五百三十六领红布衲袄九千一百四十四领红布纸台帽子一千七百个金褐布衲裙一千五百腰栲栳子五千二百八十个豹斑布纸台帽子六百三十五个队鼓七十六面黑布衲袄四千四十二领黑布衲裙一千腰鉄甲身一千一十二领刷染红布衲袄一千九百三十五领鉄头盔七百五十五顶红油木枪四十一条手刀一千三百一十五把大斧七十六具木弩桩八条摔刀皮鞘一百一十三个手刀皮鞘二千九百七十四个弓箭??七百九十六个小皮竹牌四面炮砂三百三十六个鉄锹二百四十八把鉄鑊一百三十六把鉄披膊七副摔刀三十六把弩箭??一百三十五个角弩三十枝铡刀一百三十四把夏射本弓一百张扮拽木弓一百张】

开庆元年四月十三日至景定二年七月大使马光祖任内剏造及添修共三十万八千六百六十五件内剏造五十一项共六万二千六百二十五件【铁甲身三千六百六十四领铁头盔一千一百一顶红布衲袄四千领黑布衲袄三千一百五十领破甲锥枪二千三百五十六条大朴刀五千三百八十条红油靶手刀三千五百把弓弦一万五千五百八十三条梯子弩丝弦四千二条茅叶枪八百五十六条小朴刀枪一千三百八十八条朱红油大朴刀枪一百条白油麦穗枪二百条白油大朴刀枪一百条朱红漆靶□面刀一百把皮鞘全梯儿□车弩床一十座校棒四十二条梯儿弩?四十二弄炮?七百五十条黑油敲棒五百条四道红木弩枝一千二百八十条黑漆木弩桩一百五十条弩丝弦二百四十条毛翎弩箭三千只黑漆弩箭??三百五十个红麻鼠尾?一千四百三十条红麻解扎?二千一百五十条鹿耳子一千二百五十个黑漆栲栳子七千个角弓四百张弓箭??五百个破锋刀一千把皮鞘全朱红油靶破阵刀三百把皮鞘全水弩麻弦一千五百条扮拽木弓五百五十张黑漆柄大斧一千具摔刀皮鞘五百个白木枪五百条红布绵腿裙五百腰红布纸台帽子二百顶黑布纸台帽子一千顶都管皮五百条铁披膊七百二十副黄布衲袄三百五十领黑布衲裙一千腰虎斑皮鞘九百个木弩桩一百三十条红麻鼠尾?七百二十条弩麻弦二百四十条红油食 四十只】

内添修三十一项共六万四千三百六十三件【铁甲身九千九百九十领铁头盔一万一千七百二十一领红布衲袄一千五百领黑布衲袄一千五百领红布绵絮软纒袄三百四十领黑布纸台帽子五百顶白木夏射弓七十五张角弓一万七百四十三张角弩一千三百五十九枝手刀六千六十九把队鼓三百四十三面炮砂一千八十三个黑漆栲栳子七千一百三十九个掠阵刀七百二十把摔刀三百四十三把铡刀二百三十九把手斧二千六百九十八具红木枪四十五条神臂角弓一百一十六张黑油弓箭??四千三百九十个金一十五面黑漆弩箭??一千六百四十八个手刀皮鞘七千六百三十四个鹿耳子三十八个皮竹牌七十四面摔刀皮鞘三百四十三个黑漆弩桩二百八十一条铁锹六百一十九把铁钁二百八十八把伍胜划车角弩七十八枝掠阵刀皮鞘一十三个破锋刀四十二把】

又造军装共一十一万七千八百九十三件【月解衲袄三万五千二百八十四领衲裙二万六千八十六腰胖袄九千九百六领绵裙八千九百七十二腰?子一万六百七十六顶褐绢衲袄五百八十二领?鞋二千双掇补衲袄一千八百七十二领招军黄布衫五千四百一领绿布衫二千二百二十七领红布手巾二千二百一十七条小布衫三千六百九领麻布袴四千六百六十六腰膝袴子三千八百八十四双青纱头巾五百顶】又剏造添修火攻器具共六万三千七百五十四件

内剏造三万八千三百五十九件【铁炮壳十斤重四只七斤重八只六斤重一百只五斤重一万三千一百四只三斤重二万二千四十四只火弓箭一千只大弩箭一千只突火筒三百三十三三个火蒺藜三百三十三三个火药弃袴枪头三百三十三三个霹雳火炮壳一百只】

内添修二万五千三百九十五件【火弓箭九千八百八只火弩箭一万二千九百八十只突火筒五百二个火药弃袴枪头一千三百九十六个火药蒺藜四百四个小铁炮二百八只铁火桶七十四只铁火锥六十三条】

制使姚希得任内令项置局造万人军器【除戎器戒不虞分阃者当加之意本司作院邇年所造固有常规近来应副荆蜀等处调遣支拨不一器械之备不厌其多於是令项置局制造万人军器如鉄甲胖袄帽子衲袄腿裙长枪大朴刀枪手刀手斧角弓木弩旗帜金鼓栲栳之属总八万七千五百五十件专差游击右军统制张武等监造贮以别库用备不测调遣事非紧急毋得轻动物料共费二百二十一万贯鉄炭米之类不在焉自景定四年十月下手及解阃之日共已造到二万七千一百九十六件余缙及物料桩之司存接续置造】

翔新造解内军器库鉄甲 景定三年姚尚书任内準密劄行下每季造解五十副自当年冬季为始本府备土物钱计一万八千余贯附制司作院造解行在内军器库至景定五年春解六季讫每季计脚费一千九百四十三贯旧会

翔造新军衣袄 新屯宁江诸军本府所当添办军装遂行下作院造办胖袄绵裙布帽各一千件工物共该六万六千四百三十贯旧会

大使马光祖任内修翔一应军装军器及火攻器目等 本司军器逐时关支回戍拘收类损失多以是创新修旧列无宁时今具截日终造到修到军器军装甲冑火攻件项共【阙】

战舰

李忠定公纲尝奏於高宗皇帝曰臣闻生於陵者安於陵生於水者安於水南方之人习水而善没其操舟若神而北人有惧舟楫而不敢登者习与性成也骑兵施於南方非所便而南人教之水战必可取胜昔曹操以数十万衆顺流袭吴而周瑜以三万人逆战於赤壁因风纵火焚其船楫遂大破之操自此不敢有窥江表之心而鼎足之势立其後曹丕复以大兵收广陵观长江风涛汹涌吴人戈甲旌旗之盛恐惧而退晋有江左苻坚以百万之衆次淝水而谢玄以八千人破之衆皆奔北闻风声鹤唳皆以为王师将至则东南之兵养育训练因地利而用之亦足以自守其地应沿河沿淮沿江帅府要郡凡临流去处宜仿古制以造战船上设楼櫓可以施弓弩下运櫓棹可以破风涛颁法式以授之仍募习水者为水军以时教閱激赏贼舟济渡会合掩击以我之素习击彼之彊济其势必胜得一胜则贼必破胆不敢有窥东南之心矣嘉佑中范仲淹上言乞於河阳置战舰水军以防契丹当时以为迂濶不果行使用其说翔设至今则大河有备靖康初金人岂能遽济渡哉先事而言则近乎迂事至而後图之则无所及其寔今日之急务也所有诸路合置战船募水军欲乞专差官前去措置

建康府制置司累政修造战船旧志续志皆无所纪自淳佑九年以後大略可考造船修船共三千五百五十只【造新船共八百五十七只修旧船共二千六百九十三只】

都督赵葵任内淳佑九年二月终见管船四百二十二只【车头船五十只飞捷船五十只桨船九十九只板船一百八十只鉄头船一十只罗框船三只脚船三十只】

制使吴渊自淳佑九年二月开阃在任三年造新船八十只【鉄鷁船五十只柴舫船二十只

马船一十只】修旧船四百余只制使王埜自淳佑十二年四月开阕在任三年四个月造新船一百二十只【多棹船一百只车头船一十只脚船十只】修旧船四百七十七只

制使丘岳自宝佑二年八月开阕在任一年造新船五十二只【小富阳座船一只脚船五十一只】修旧船二百五十八只制使马光祖自宝佑三年八月开阕在任二年半造新船一百五十三只【申省状照对本司见管战船除添新补旧之外欠数尚多今措置那拨官钱专差靖安唐湾水军统制郭俊将带工匠前往江西吉州置塲收买材植物料打造三百料四橰海船五十只三百五十料四橰富阳船五十只所费几及百万不敢遽申朝廷科拨且於本司诸项窠名钱内那拨前去窃照江西一路不隶本司节制窃恐所差兵将道里生疎未能办集或致抵牾徒老日月所合具申朝廷乞赐割下吉州照应仍就差本州陈道判任责提督庶易办集造到船数四橰富阳船五十只各三百料四橰海船五十只各二百五十料富阳船一只五百料脚船五十一只】修旧船四百七十七只【申严修船约束当使前日曾亲到船场见得全然浩散无统合专令刘準使坐局监修陈路分专充受给所有书拟船场一行事务委孙制干胡制参别立规模须管以日计効修到船数车头船五十只富阳船二十只四车船三十只多棹船二十只桨船五十只板船一百九十五只鉄鹞船二十只柴舫船二十只飞捷船三十只鉄头船一十只脚船四十二只】拨助属郡造船钱【镇江府兵船虽有专司然江面关系不小所有兵船除本司已为管认三十只其余合系都大兵船司修葺访闻本府事力有限谊同一家无缘置而不问本司助钱一十万贯文专人牒押赴镇江府都大司交管作急?修仍申枢密院照应采石战舰见此修葺虽是本州之责窃恐事力有限一时不能副速当使襄以当涂兼领所事多是撙节二厘库余钱添助工费今契勘本所二厘库支遣之外所余无几然不过支給官吏并以分发解发朝省此外或有些少寛剩不当妄有支用且於现在二厘杂收钱内拨一十五万贯文牒太平州收管专一打造采石战船仍割远路分主兵官申密院尚书省太平镇江两处本司已行支助池州事力其寔不能及当涂而提举知郡守簿自能撙节创造前事已】

【为申闻今又欲接续为之虽无假本司之力而本司寔自不容阻已特助五万贯仍申尚书省照应并割池州催镇江府计拨钱一十万贯文太平州计拨钱一十五万贯文池州计拨钱五万贯文修造兵船本州之责当使曩守当涂皆是撙节浮费躬自为之未尝干瀆于朝亦未尝请于制司至今采石江防犹获其利但镇江凋弊财计匱乏积非一日又难援此为比只得彼此相体今於八十三只内本司自为包认修葺三十只行下张斌监督日下兴工其余船只仰本府任责仍申朝廷乞于已支降一十万贯外更与科降庶几不至悠悠推抵以致误事增修到护沙船一十一只许司船七只激浦板船二只金山板船一只棹船一只江陰军板船二只运司桨船五只】

大使赵与?自宝佑六年三月开阕在任一年新造无修旧船三百四十七只

大使马光祖自开庆元年四月再至开阕至景定二年五月以前造新船五百五只【水哨马船四百五十只漕湖船二十五只轻捷多桨船五只脚船二十五只】修旧船二百七十五只

制使姚希得任内新造水哨马船二百只【江防要务战舰为先旧来多是大舟缓急难於运棹自开庆敌骑渡江我师尝以水哨马小舟破敌取胜允为便利时虽无虞备岂容弛於是拨钱百万收置物料差水军统制张超置场打造自景定四年二月初九日兴工至四年十二月十一日竣事本司準遣李子龙专一书拟程督其事以劳赏免常员举主一人】景定二年十一月十三日兴工至景定三年四月初九日造过大様多将木船三十四只【每半年一奏申案牒具在】景定二年十一月十三日兴工至景定五年三月十五日修过大小船共五百一十四只【每半年一奏申案牒具在】

大使马光祖咸淳元年第一次打造水哨马船三百只本司船只籍管虽多堪用实少开阕之初首那官钱九十万贯发下诸处并手打造新様水哨马船三百只蓬贡具色色齐备续準闰五月空日密割将上项船并於本司簿管船内拨一百只共四百只发赴两淮制司听候调用当即差水路拨发官张超管押前去淮阕交管

大使马光祖第二次造板船并水哨马船共二百只自準朝命拨船四百只赴淮阕调用在岸之船无几委官分别有多年损坏不堪修补者计二百七十四只遂申朝廷乞行打折选剔堪好钉板为修船用庶免尽为弃物割报从申寻分料次打折而岁月深远风雨剥蚀可用船板十无一二遂委参议官毛洪权谏议官王雄专一提督别造新様护膝板船二百只大使马光祖第三次江西打造水哨马船三百只咸淳元年十一月十五日钧判水哨马船以多为贵差官往江西产木地头更打造三百只续差帐前提举刘选点检文字王又新準備将张富专一监造準備将朱珍受给先发十八界一十五万贯文又支一万贯打造大様使座船一只

大使马光祖重修大小船在籍之船随修随调修数非不多而缓急常窘於之用开阕以来即分料次选官董修每五十只为一料截日终计修过【阙】料为船【阙四字】只又额外增修【阙四字】只两项总计【阙五字】只淮海扞御屯隘守把江面巡遑皆於此取办焉

大使马光祖创造船寨江津战舰多且十年少仅三数年已损动矣而浙右民船至三二十年不坏无他亦藏之有其道耳前此护船止用芦关请失时包裹卤莽雨淋日炙雪压风摧寔於船无益也乃即龙湾水次度地三百余丈创屋二百五十间立闸启闭而门其上扁曰沿江大使司船寨神祠官舍列於两旁又创铺屋二十五间以处趯者寨成衆船以次藏泊自是修船之费庶几少损矣

大使马光祖移采石水军酒息钱专一修船造船采石江面最为紧要水军旧有酒库一所专一趣息补治鬪舰其後归之州官於是无以充繕修之费旧岁行下本州复以库归之军今仅一年已造到船【阙四字】只修到船【阙四字】只酒库利入岁增每岁所修所造之船与之俱增自此采石水军之船将不可胜用矣

大使马光祖第四次江西造富阳船并脚船共四十二只咸淳二年六月内支拨十八界会一十四万二千二百九十三贯三百六十文发下江西造船官刘选等打造到三百料富阳船二

十一只并脚船二十一只

大使马光祖第五次江西造富阳船脚船水哨马船共三百只咸淳三年四月内支拨十八界会五十二万贯差提举金全等前往江西吉州打造二百料富阳船一百只并脚船一百只并水哨马船一百只

景定建康志卷三十九

卷四十

钦定四库全书

景定建康志卷四十 宋 周应合 撰

田赋志序

大学平天下之传曰有民此有土有土此有财有财此有用德者本也财者末也外本内末争民施夺昌黎韩愈曰民不出粟米丝麻作器皿通货财以事其上则诛然取财於民而过其中焉则为损下益上如争如夺民方吾仇何以致天下之平哉禹贡扬州厥田下下厥赋下上上错田九而赋六七岂非以山泽之利足以助田之所不足欤後世笼山泽之利悉归於上而田赋又加於古母怪其民力之困也建康盖扬州之一郡耳古今国都多在焉田赋之制凡几变更晋宋尚能立限田之制齐梁亦能为宽赋之条重以陈末之淫奢侈唐之僭侈苛赋横敛一切不恤而民不胜其虐矣天启我宋剗伪除苛拯民涂炭蠲无艺之征损折变之例严者弛之重者轻之而民力纾矣剖符授节选用廉平安富恤贫损上益下而仁泽溥矣今之建康号为乐国勤无旷土富无负租本根所由固也作田赋志【晋平吴之後有司奏王公以国为家京城不宜复有田宅未暇作邸当使城中有往来之处近郊有刍藁之田今可限之国王公侯京城得有宅一处近郊田大国十五顷次国十顷小国七顷城内无宅城外有者皆聽留之男子一人占田七十亩女子三十亩其丁男课田五十亩丁女二十亩次丁男半之女则不课其官第一品五十顷每品减五顷以为差第九品十顷而又各以品之高卑其亲属多者及九族少者三代宗室国宾先贤之後士人子孙亦如之而又得人为衣食客及佃客量其官品以为差除晋成帝咸和五年初税田亩三升孝武大元八年始增百姓税米每口五石宋孝武帝大明初羊希为尚书左丞时扬州刺史苗阳王子尚上书山湖之禁虽有旧科人俗相因替而不奉占山封水保为家利自顷以来颓弛日甚富强者兼岭而占贫弱者薪苏无托至渔采之地抑又如兹斯寔害理之深弊诸损益旧条更申恒制有司检壬辰诏书擅占山泽强盗律论赃一丈以上皆弃市希以壬辰之制其禁严刻事既难遵理与时弛而占山封水渐染复滋更相因仍便成先业一朝顿失易致怨咨今更刊革立制五条凡是山泽先陌概树种竹木薪果为林仍及陂湖江海鱼梁鰿砦恒加工修作者听不追旧官品第一第二品听占山三顷第三第四品二顷五十亩第五第六品二顷第七第八品一顷五十亩第九品及百姓一顷皆依定格条上货簿若先已占山不得更占先占足者非前条旧业一不得禁有犯者未上一尺以上并计赃依常盗论除晋咸康二年壬辰之科从之齐高帝初景陵王子良上表曰宋文帝元嘉中皆责成郡县孝武徵求急速以郡县迟缓始遣台使自此公役劳扰凡此辈使人既非详慎贪险崎岖以求此役朝辞禁门情态即异暮宿村县威福便行驱迫邮传侮折守宰瞻郭覩境飞下严符但称行台未明所督摄摠曹属震惊都邑深村远里俄刺十催或尺布之逋曲以当疋百钱余税且增为千诳云质作尚方寄繫东冶百姓骇迫不堪其命恣意赃贿无人敢言贫薄礼轻即生谤讟愚谓凡诸检课宜停遣使明下符者审定期限如有违越随事纠坐则政有常典

人无怨咨子良又尝曰今所在谷价虽和室家饥嗟缱绻虽贱骈门裸质而守宰务在哀刻围桑品屋以准费课致令动木发瓦以充重赋破人败产要利一时东郡使人年无常限郡县相承准令上直每至州台使命切求迫急及有畏失严期自残躯命亦有斩绝手足以避课役守长不务先富人而唯言益国岂有人贫於下而国富於上耶又钱铸岁远类多翦凿江东大钱十不一存公家所受必须轮郭遂买本一千加子七百犹求请无地且钱布相半为制永久或闻长宰酒令输钱进违旧科退容奸利欲人康泰其可得乎又启曰诸赋税所应纳钱不限大小但令所在兼折布帛若杂物是军国所须者听随价准直不必尽会送钱于公不亏其用在私寔荷其渥昔晋氏初迁江左草荆绢两所值十倍於今赋调多少因时增减永初中官布一疋直钱十千而人所输听为九百渐及元嘉物价转贱私货则疋直六百官受则疋准五百所收每优欲人必为降落今入官好布疋下百余其四人所送犹依旧制昔为刻上今为刻下土庶空俭岂不由之救人拯弊莫过减赋略其目前小利取其长久大益无患人货不殷国用不阜也自东晋寓居江左百姓南奔者并谓之侨人往往散居无有土着而江南之俗火耕水耨土地卑湿无有蓄积之资诸蛮陬俚洞沾沐王化者各随轻重收财物以稗国用又岭外酋帅因生产翡翠明珠犀象之雄饶於乡曲者朝廷多因而注之以收其利历宋齐梁陈皆因而不改其军国所需杂物随土所出临时折课市取乃无常法定令列州郡县其在土所出以为征赋其无贯之人不乐州县编者谓之浮浪人乐输亦无定数任量唯所输优於正课焉佃客丁男调布绢各二丈丝三两绵八两禄绢八尺禄绵三两二分租米五石丁女并半之男年十六亦半课年十八正课六十六免课其男丁每岁役不过二十日其田亩税米二升盖大率如此其度量三升当今一升秤则三两当今一两尺则一尺二寸当今一尺咸平元年转运使陈靖奏曰江南伪命之日于夏税正税外有沿征钱物曰盐博紬绢加耗丝绵户口盐钱耗脚斗面盐博斛斗醢酒麴钱率分纸笔钱村生望户钱申料丝盐博绵公用钱米铺衬芦?米面脚钱等凡一十四件悉与诸路不同乃煜父子僭窃江淮糜费爵禄寻纳朝廷之琛賫又失淮海之土田物力不充征敛复暴太祖?行天罚诚欲吊民而自克复之初旧弊不去者盖樊知古加怨伪朝不与名第担簦去国献策复仇属天运之有归遂甘心於故土然小人见无大畧于时既任转输罔思鼎革而辄怨怒其主流毒其民使我朝只得伐罪之名未见吊民之实因仍旧贯以至於今又其沿征数内醢酒麴钱盐博紬绢盐博斛斗者江南旧日许人私下造酒等第科纳麴钱及尝散与官盐博换纳绢斛斗归复之後酒则禁断盐则不支上件所征准前输纳其次耗脚斗面加耗丝绵诘其所由亦皆类此前後巡抚采访制置茶盐承受体量发赈贷等皆承委寄不察疲羸不惟不察疲羸而复益加之疮痍遂使货家鬻产偿债叠之征科去土离乡入逋亡之簿籍目击堪叹天高莫闻诏悉除之祥符八年知昇州薛映言官有牛税民出租牛死而税不得蠲上览奏矍然曰此岂朝廷所知耶遂诏诸所条上悉蠲之明道二年江淮安抚使范仲淹奏当司看详江宁府上元等五县主客户通年送纳下口盐钱即不曾请盐食用据本府分析及体问得始属江南伪命之时有通泰盐货给散计口纳钱入官後來淮南通泰归属朝廷之後江南自此无盐给散所以百姓至今虚纳钱并更折纳绵绢未曾起请今江宁府有新旧逃亡七千三百宣州五千五百太平州四千四百缘江南东路诸邑租税甚多地薄民贫欲乞朝廷调度指挥江南东路主户所纳税赋内丁口盐钱以本处见卖盐价上纳定升合数目逐春更与米盐吃用随夏税送纳一色见钱更不折纳不赐纳绢可减去疾苦招携逃亡所有客户名下盐钱盖是浮浪之人起移不定每到泰初被乡司里正户长抄割浮户配纳盐钱遂旋走移其客户盐钱不多望朝廷特与除改】

田数

乾道旧志通管田七百七十七万二千八百六十三亩景定辛酉五县具到挨究实数见管田寔计四百三十四万一千六百四十三亩三角二十六步【亏数未详】

上元县 山田四十一万五千九百二十一亩一角四十七步
圩田二十万三千九百八十三亩三角五十五步隶总领所者六百一十二亩
沙田一十一万二千二十六亩六分 营田一千八百八十九亩二十三步

江宁县 山田二十六万二千一百一十三亩三角三十四步
圩田一十八万七千三百二十四亩一角一十七步 沙田四万四千三百一十亩二角二步 营
租田地隶总领所者田九千六百九十七亩一角一步地一千八百二十七亩二角二十步草
塌七十三亩一角五十一歩水漾六十六亩一角四十歩
营租田地隶转运司者田地共二千一十四亩三角一十六歩半

溧阳县 田九十五万五千七百五亩一角一十二歩半
地八十万一千四百七十四亩二角九歩半 圩田三万一千七百七十六亩二角二寸四歩【
泰兴庄管圩田八千八十八亩三角四十三歩计七圩坐落来苏来安两乡 福贤庄管圩田二
万三千六百八十七亩二角四十二歩圩内奉朝省拨赐田三千亩与夏金君外寔存田二万
六百八十七亩二角四十二歩】

句容县 田七十四万三百一亩二十三歩 地一十六万一千四十六亩三角五歩
沙田一千一百二十三亩一角三十三歩半
沙地芦场草塌白面沙溪滩等三千五百九亩一十四歩 营田五千八百九十五亩三角九歩
营地一千八百九亩三十歩

溧水县 圩田二十九万一千一百九亩一角 沙田一千三百九十亩三角五十九歩
营田三千四百七十八亩四十五歩 营地一百六十二亩一角五十五歩

税赋

夏料管催

折帛钱三十四万一千四百三十三贯九百四十二文钱会中半于内除豁江圻寨占并本府
运司合包认江宁句容县和买役钱共一万一千二百四贯二百五十五文外寔催三十三万
二百二十九贯六百八十七文钱会中半

绢紬共八万六千七十一疋五丈四尺二寸八分五厘【内二千八百四十疋一丈五尺九寸
元系折紬照科折则例紬每疋折钱五贯绢每疋亦折钱五贯遂将上件紬并改折绢催纳】

丝五千二百七十五两【加耗在内】

绵三十三万九千六百九十四两四钱六分【元额正绵二十八万八百两五钱内除豁改科绢绵计正绵五万八十两系改科税绢四千一百四十疋拾入前项绢数催纳外令催正绵二十三万七千一百一十两五钱耗绵一十万八千九百七十三两九钱六分】小麦三千六十一石一斗二升二合【上元江宁两县府仓纳正小麦二千石搭上加耗应副公使酒库造麴使用句容溧水溧阳三县仓纳正小麦一千六十一石一斗二升二合搭上加耗应副各县酒库造麴使用】

麻皮二千五百斤【系上元江宁两县催解拨充运司本府杂支等用】

上元县

折帛钱六万九千八百三十五贯七百九十三文除豁外寔催一万四千八百九十四贯六百八十五文【三百九十三贯二百八十八文系防江军寨占张府北庄地段税钱一百三贯四百五十三文系游击军寨占民居税钱二百一十贯九百八十文系制府拘占冯汝贤诡名税钱二千九百一十三贯三百八十七文少豁寨占等钱一千三百二十贯文系增科本县催遇额外绵四千两于後项内搭入拘催于折帛钱内除豁】

绢一万七千八百六疋二丈八寸五分【元科一万六千八百六疋二丈八寸五分改科一千疋系于嘉熙四年为始将省税绵一万两改科税绢每一十两折绢一疋计上件】省税一万二千八百九十六疋三丈一尺六寸五分和买四千一百八十九疋一丈一尺二寸

紬五百十疋三丈六尺五寸

丝二千三百一十七两六钱

绵五万五千三百四十九两五钱除豁省税绵一万两改科税绢外寔催四万五千三百四十九两五钱【元科五万一千三百四十九两五钱搭入本县催过元额绵四千两除豁折帛钱一千三百二十贯文】省税绵三万三千四百九十七两和买绵一万一千八百五十二两五钱

小麦正催一千五百石

麻皮正催一千三百斤

江宁县

折帛钱四万七千六百六贯八百九十一文除豁包数外寔催四万五千一百七十八贯七百

六十三文【包认钱数详具下卷】

折帛钱四万四千五百三十四贯一十五文令项拘催城南厢两料役钱六百四十四贯七百四十八文

绢一万一千四百八十三疋六寸【元科一万八百四十三疋六寸改科六百四十疋系嘉熙四年为始将省税绵六千四百两折税绢每一十两改绢一疋计上件】省税八千七百四十三疋一丈九尺六寸和买二千七百三十九疋二丈一尺

紬二百七疋九尺七寸

丝四百六十八两七钱

绵三万六千三十四两五钱除豁省税绵六千四百两改科土绢催纳外寔催二万九千六百一十四两五钱省税绵一万五千八百八十六两五钱和买绵一万三千七百三十八两

小麦正催五百石

麻皮正催一千二百斤

句容县

折帛钱五万二千一百五十七贯九百二十八文除豁包认数外实催四万八千三百二十二贯九百九文【包认钱数详具下卷】

绢一万九千八百四疋一丈八尺五分【元科一万九千一百四十四疋一丈八尺五分改科六百六十疋系自嘉熙四年为始将省税绵七千九百二十两改科绵每一十二两并加耗随球绵四两八分共折绢一疋】省税一万四千九百九十七疋四尺九寸九分和买四千八百七疋一丈三尺六分

紬七百八十七疋九尺七寸

丝六百二十七两八钱九分

绵四万四千四百六十五两五钱除豁省税绵七千九百二十两改科税绢催纳外寔催三万六千五百四十五两五钱省税绵一万六千五百六十七两五钱和买绵一万九千九百七十八两小麦正催四百四十五石七斗五升五合

溧水县

折帛钱八万六千五百五十六贯九十八文绢一万六千九百五十五疋三丈六尺八十一分五厘【元科一万五千八百七十五疋三丈八寸一分五厘改科一千八十疋系自嘉熙四年为始将省税绵一万五千一百二十两改科绵每一十四两并加耗随球绵二两五钱二分共折绢一疋】省税一万一千九百八十九疋二寸七分三厘和买四千九百六十六疋三丈六尺五寸四分二厘紬六百三疋一丈八尺五寸

绵八万五千一百五十八两八钱除豁省税绵一万五千一百二十两改科税绢催纳外实催七万一十八两八钱省税绵四万五千六百九两八钱和买绵二万四千四百九两

小麦正催三百二十九石九斗九升

溧阳县

折帛钱八万五千二百七十七贯二百三十二文绢一万七千九百二疋二丈七分【元科一万七千一百四十二疋一丈七分改科七百六十疋系自嘉熙四年为始将省税绵一万六百四十两改科绢每绵一十四两并加耗绵二两五钱二分共折纳绢一疋】省税一万六百九十七疋二丈七分和买七千二百五疋

紬六百二十四疋二丈一尺五寸

丝二百六十八两四钱五分

绵五万九千八百二十二两二钱除豁省税绵一万六百四十两改科税绢催纳外寔催四万九千一百八十二两二钱省税绵二万六千六百三十六两二钱和买绵二万二千五百四十六两小麦正催二百八十五石三斗七升七合

秋料管催

苗米二十万七千七百一十二石一升九合除豁外寔理米一十九万九千一十七石九斗三升四合三勺【于元额内照例除豁江坍寨占并无人收并等米九千一十一石八斗一升一合七勺外寔理米一十九万八千七百石二斗七升三勺续据溧阳县寔田增到苗米三百一十七石七斗二升七合共寔计上顷其县仓受纳米数并折变改科糯米等常年为数不定】

穰草一十六万七千束五县分理应副拨解江东转运司马草【元额本色正草九万四千八百八十六束并搭上加七分六厘耗様草共计上项数】布二千四百五十七疋系五县分理应副本府厢禁军等春冬衣赐等用

芦?四万九千五百四十三领内一万五千领解运司内三万四千五百四十三领本府岁计支用【正?本色三万五千三十九领并搭上前项粳米一百六十石改折科催?一万领贴凑共

科正?四万五千三十九领并搭上加一耗?四千五百四领共计上项】

折草豆钱一万三千六百八十三贯八百五十七文十八界钱会中半

上元县

苗米二万九千五百九十石八斗四升五合正草三万九千束

布五百二疋

正?一万六千六百领

折豆钱一万二千五百八十九贯九百五十四文

江宁县

苗米二万二千六百五十五石八斗四升一合五勺

正草三万八千束

布四百二十二疋

正?一万八千四百三十九领

折豆钱八千三百二十三贯九百六十二文

句容县

苗米四万七千三百四十二石二斗九升九合七勺

正草一万三千三百八十六束

布五百八十八疋

折草钱二千四百六贯四百文

折豆钱二百六十九贯一百文

溧水县

苗米四万八千二百三十八石六斗二升二合七勺

正草四千五百束

布四百七十三疋

折草钱二百九十四贯四百文

溧阳县

苗米五万一千一百九十石三斗二升五合布四百七十二疋

折布钱二十四文

右五县田赋之数参之乾道旧志百年之间互有亏增若田数则今少於昔者三百余万亩【乾道间未有沙田营田而旧志所载五县田数已有七百七十七万一千八百余亩今五县具到田数并沙田圩田计之止有四百二十四万一千六百余亩】若夏料所入则今多于昔秋料所入则昔多於今其间赋税窠名又有昔无而今有者或昔有而今无者皆未详其所以然之故意者田有坍毁或有拨隶赋有因革或有增除姑即今日府县所报之数按而书之尔若夫因革增除之仅可考者录於下卷

咸淳元年黄榜指挥输纳折帛钱关中半民间颇以措置见镪为艰大使马光祖尽令全纳关会上供现镪从本府代解二年亦如之三年请於朝并用关会起解常平坊坝钱亦如之自此为例于是金陵五邑钱楮流通为他郡倡

咸淳元年上元江宁两县推排和买比旧额各有增数大使马公判云公朝讲行挨量祇欲革去诡挟欺隐及产去税存之弊赋输各有归着差科咸得其平即不求增见诸播告本府布宣德音深戒烦苛附城两邑厥既讫功较之原数及与不及亦不暇问也和买例於及等产钱内均敷比之登承却有增益有产此有税亦合照例起理但新籍甫成开场已迫人户不能尽悉备办未能如期姑为一分茧丝之寛少慰两邑旌倪之望割江宁上元两县且将今年和买绵绢照登承数起催仍榜市曹并两县门晓谕仰两县遍榜乡都贴挂各令通知

咸淳三年七月减河税务岁额商税钱一分计钱会一万九千六百七贯着为例

咸淳四年三月内蠲放银林东坝税钱大使马公判云银林东坝官旅往来和雇车船自宝佑元年立定规式斟酌已当近闻本务巧作名色官牙私牙乘时为奸苛取不一重为往来和雇者之困当使闻之久矣契勘本务课额自宝佑减旋之外月解至为不多一行人挟此为名入於公者一归於私者十若官司不为倡率一笔勾去则虽榜文日下戒飭日严终不能革损上益下古有明训倡自官府令乃可行当使平生朴寔工夫寔不欲见之空言合行下本务将月

解本府车船水脚官钱以成年计之约计四万余贯十八界并与除放免解抽回清册毁抹所以如此施行者正为寛商之地若牙侖不体此意而仍前诛求高价者决不容恕本府自当时时觉察犯人重议施行守此之令坚如金石备判镂榜

咸淳四年四月内放免人户夏税市例钱大使马公判云人户输纳物帛则例前此已行痛减十数年来因而行之他无增损受纳官人从并场衆合得者且当仍旧若又痛损则吏奸捷出必将多方卖弄又渔猎于常例之外前辈所谓好处却穿破是也母已惟有将市例钱一项一切罢免其人从并场衆合得者别措置从官给此盖损上益下酌中絜矩之道若以纣薄为堪好以餽药为厚实致令美恶之易位误认选委之初心事关上供责有攸属备榜五县并镂小字榜散贴俾深山穷谷小民皆户知之务在经久庶可持循其有已算在揽户名下者仰自行理算镂榜式 勘会咸淳四年分夏税物帛开场在即已选委官受纳所有场衆旧例合收市例钱今并与除放既放之後却恐吏奸捷出渔猎于常例之外合从官司措置官钱代给除已备榜五县及场所晓示外所合镂榜遍行张贴晓谕人户知悉其正钱并场衆食利并在下项之内不许分文增添如揽户辄敢多算人户钱数一文以上计赃定罪其有已算在揽户名下者仰自行理算开具下项须至指挥

上元等四县

紬每疋取十八界会一贯四百二十一文七分二厘今减六十文一分五厘五毫实交一贯三百六十一文五分六厘五毫

绢每疋收十八界会一贯四百二十一文五分八厘今减六十文一分五厘五毫实交一贯三百六十三文五分五厘三毫

丝每一十两收十八界会二贯七十一文三厘二毫今减六十三文六厘九毫实交二贯七文九分六厘三毫

绵每一十两收十八界会一贯八百八十七文七分二毫今减五十四文七分三厘四毫实交一贯八百三十二文九分六厘八毫

小麦每石正收十八界会九百六十五文今减一百二十九文五分实交八百三十五文五分
麻皮每一十斤收十八界会一贯九百一十文四分八厘今减二百一十五文七分六厘实交一贯五百九十四文七分二厘

折帛钱【每买正钱许以关子一贯文或十 界三贯文送纳】仍照则例每贯收头子等钱十八界会三百六十二文四厘今减一十九文三分五厘实交三百四十二文六分九厘

溧阳县

紬每疋收十八界会一贯四百八十八文二分五厘今减一百四十一文四分五厘实交一贯三百四十六文八分

绢每疋收十八界会一贯五百六十七文八分五厘今减一百四十六文六分五厘实交一贯四百二十一文三分

丝每一十两收十八界会二贯一十文一分今减一百五十九文八分实交一贯八百五十五文三分

绵每一十两收十八界会一贯九百五十三文今减一百五十九文八分实交一贯七百九十三文二分

折帛钱【每贯正钱许以关子一贯文或十八界三贯文送纳】仍照则例每贯收头子等钱十八界三百五十二文四分四厘今减一十九文三分五厘寔交三百三十三文九分

右令镂榜晓谕各仰知悉

咸淳四年十月内重依文思院式铸铜斛受纳大使马公判云苗仓受输之斛自绍兴年间朝廷发下文思院式樣之後岁久更换不常州府不曾子细契勘听其添新换旧剏造一等新斛所谓新斛者多用碎板合成厚薄不等其口或敞或撮其制或高或低分寸差殊升斗赢缩官员每早入仓斗级谬为新斛诡称公当其寔不然瞬息之间纳米从脰心机手法捷若鬼神弊端万端不可枚数究其大指则揽户城居也仓斗亦城居也或自为揽户或自非揽户而子壻亲戚为之事同一家臂指相应始者受纳民户之米民户乡人也岂能一一计嘱此曹就使效尤局生情节不能相符故自纳者常是吃亏堆头量米已自取尖暨过厅前复行打住拂去尖角再令增加至於揽户人纳则尽是自家人暗记小斛计嘱扛夫注米则如奉盈倒斛则必看铁或用泥涂其底或用板衬令高过厅则疾走如飞官员虽欲诘问而已去却取民户之有余以补揽户之不足粃碎当筛不筛而亦交湿润当退不退而亦来今日退出明日复入而亦如是利尽归於猾揽矣民户则无是也一行仓斗都吏所差彼固不应无谓而差而被差者皆以钱买也借钱做债以媒身幸其着身而偿债享肥甘据娼妓皆做此一番经纪而吾民之膏血不得而不朘削矣此固老守之所痛心疾首者也始者锐意剏造铜斛一百枚易去木斛以垂永久铸未易成受输已迫仅铸其一余则悉用全片之板为之铁叶帮钉以周斛身底板不凑防换易也桶板成片防脱落也当厅较制矣更请佥厅官审而较之非为一時計也虽然老守至此已閱五周行且谋去作法詎能无弊美意贵於逌续至於体认而力行之则老守虽去犹不去也旧斛索上劈碎焚之通衢仍雕小榜使户知之异时岂无收一二於千百以为印证者乎并榜

景定建康志卷四十

卷四十一

钦定四库全书

景定建康志卷四十一 宋 周应合 撰

田赋志二

营租

绍兴初以闲田立官庄以畸田募耕垦此营田所由始也初以军耕後以民耕初以稻入後以镶入初以饲马後以饷军初则优其课蠲其征而民乐趋之後则民畏之畏欲避之而籍不能改矣今其租入隶於总领所建康五县田地以亩计者二万七千七百七十四亩九十九步半租以钱会计者四千四百二十贯五百五十二文一一【半用官省现钱半用十八界会】以麦计者五十六石八斗四升二合三勺以料计者一万三千八百七十二石九斗八升五合四勺

上元县 营田地等三千一百一十四亩三角三十一步 钱会五百三十五贯八百九十四文 大麦四十三石八斗九升六合 马料二千一百七十七石二斗八升

江宁县 营田地等一万一千五百二十四亩三角二十一步 钱会五百七十二贯九百七十八文 大麦九石五斗九升二合 马料六千五十石

四斗三升五合四勺

句容县 营田地等七千七百五十四亩三角三十九步 钱会一千一百二十七贯六百一十一文 马料四千四百二石三斗三升

溧水县 营田地等三千六百四十亩三角 钱会八百三十七贯八百七十文 马料一千二百三十二石五斗七升

溧阳县 钱会一千三百四十六贯一百九十九文 小麦三石三斗五升四合二勺 马料三石一斗七升

沙租

沙租云者沙磧之地民垦而业之或以种谷或以长芦而县乃收其租焉自淳佑八年田事所差官经理县不得有其租而隶之总领所未经经理之前沙田沙地租皆以钱经理後田租纳米地租纳钱多寡互有不同宝佑三年有旨三分减一以宽民力今建康五县沙田沙地共计一十六万二千三百五十八亩六角五十四步六分租以米计者四万二千四百四十七石四斗四升二勺钱不与焉【上元县未经经理前沙田每亩一百九十四文沙地每亩五百二文并钱会中半芦场每亩起四束雁儿芦苇每亩起二束每束并折四百二十文足草塌藕池茭荡每亩三十九文八分白面沉水沙每亩一十九文九分淳佑八经理後沙田每亩纳米一斗五升沙地每亩一贯二百文芦场每亩一贯雁儿芦苇每亩四百文草塌藕池茭荡每亩二百文白面沈水沙每亩一百文并纳十八界官会江宁县未经经理前沙田每亩四百三十一文沙地每亩三百四十五文芦场每亩二百一十八文草塌每亩四十九文三分并钱会中半淳佑八经理後沙田每亩起米一斗五升沙地每亩起租钱一贯二百文芦场每亩租钱一贯草塌每亩租钱二百文并十八界宝佑三年朝廷行下于已经经理租米租钱数内三分减一诸县一体施行】

圩租

景定二年準省割坐下江东转运司括到吴府圩田租数隶建康府上元溧水两县者岁计租米一万三千七百七十八石八斗八升四合五勺租麦一千四石五斗九升五合并文思院斛拨入淮西总领所理充支遣税田租米不在此数

蠲赋杂录

江宁县嘉定八年六月初七日準府帖备準尚书省劄子节文本路安抚转运奏请建康府城南第一第二第三都系江宁县绍兴中推行经界将人户房地起纳两料役钱成年计六百四十四贯七百二十八文後於淳熙五年内本县将家业营运刱增作和买绵绢钱共三千七十二贯八百五十六文较以畴昔已多二千四百二十八贯一百二十八文民力重困欲从本府及运司各於支用钱内中半包认取拨自嘉定八年为始每一岁一处均补钱一千二百一十四贯六十四文却乞将刱置和买尽与除豁其现在房地以经界则例起催元来两料役钱六百四十四贯七百二十八文从本县令项催赴本府交纳添凑两司包认钱共作三千七十二贯八百三十六文理充上项除豁科名起拨上供五月二十九日奉圣旨依劄付本府已备帖江宁县遵守及申安抚司转运司照会其逐项钱已自嘉定八年为始包认至今照已降指挥施行

转运副使眞德秀板榜契勘建康府江宁县城南厢第一第二第三都偶因淳熙五年增科家业及营运钱起息和买绵绢钱二千四百二十八贯一百二十八文委是重困于民本司同建康府乞自嘉定八年为始各包认一半却将上件增科和买绵绢尽与除豁所有本县每年元催两料役钱计六百四十四贯七百二十八文从本县令项催促赴建康府交纳添凑转运司并本府包认钱共成三千七十二贯八百三十六文理充刱增和买绵绢等事本司同建康府已於嘉定八年四月二十六日具奏回准嘉定八年六月三日尚书省劄子五月二十九日奉

圣旨依割付本司已帖江宁县知佐遵从施行并牒建康府照会仍於合解本司科各钱内扣豁一千二百一十四贯六十四文作本司包认城南民户和买绵绢一半钱数今据建康府申已扣豁到钱二百九十七贯八百一十四文外有未截钱九百二十六贯二百五十文申乞契勘别有合截科名钱数行下本府扣截贴凑解发施行奉运使修撰直院舍人台判有利民之名必须有利民之实本司昨与建康府共申朝省乞将江宁县城南厢第一第二第三都增科和买绵绢钱除罢其合解发上供钱各行包认一半本司遂牒府将合解本司钱截支今据都金厅官申割称祇有二百九十七贯八百二十四文可截当职窃思若每岁如此将恐因循成例将不可摧之科名掇与本府本府不免以别色官钱陪解是本司徒有利民之名初非有利民之寔也如此则已罢之和买它时未必不复除嘉定八年钱送金厅契勘将新近合解钱截拨凑数外所有嘉定九年钱候本府起催和买日径申本司将经常钱尽数发下其本府入解本司钱却正行催理自今岁以为常案造板榜一面黑漆白字陷置本司厅壁庶几後政永远遵守牒本府金厅照会

句容县均豁和买记有一言可以怀天下曰平而已平之义圣者莫能易也我国家于民役和买之制豫给缗钱责偿於後寔利之云故贷以春输以夏秋补於其不足敛于其有余熙陵仁风动荡有截范蜀忠文公尝笔此举於东斋记中历祥符熙宁法浸以立由强而给齟齬亡而额自若殆失初意顾罔不受命则有平之义存焉耳邑隶建邺者五合一府所应输均之五邑宜也有为绍兴时相乡曲地者指上元江宁为寇攘焚荡之余无所从出遂并抑之溧阳溧水句容三邑蔓延迨今邑不以告固有待焉溧阳溧水源源擢裁弊久未除莫句容若民之戴白者相与言吾属供赋夥将奚辞不容已吾言者偏耳虽然利害等谨毋言当有为吾平之者淳熙庚子郡丞张君埏果尝有请于去郡调守零陵之日事虽中止其说不诬逮庆元六年少保吴公据以重臣居留喜任所部兴利除害之责又邑令赵君时侃雅意为民亟疏顛末累数千百言一再白公公慨然动心即日露章乞岁捐郡计以宽民力天子既从公请乃召观察推官刘君叔向而语之曰句容增赋之弊吾欲断自今始出州家万三千缗为之代输朝奏九重而暮拜曰俞之诏然则奉行德意之盛可无其人子其为我条均豁之要刘君於是赞美不暇毕智幕府稽实簿书家有廛征户有亩税一金以上等杀秩秩不使黠胥并缘肆欺民受虚赐凡均豁之目绢疋二千十九绵两万一百六十不平之赋削于一朝槩之旁邑平矣顾其事未及示民而吴公疾病致为臣而归适太府卿王公补之将指饷军就摄帅事乐成前人之志复得刘君力右其说荐於剡奏图功攸终时赵君去令已久齐君砺来继之奉命益?计等均豁浓墨大字揭诸通衢稚耄聚观曰此吾赵令君权舆之齐令君绪成之吾党何能报耶君谦不自居方与民叹咏天子之德之闕二帅之请之力旧令之虑之远府寮之画之精此其归美之忠推行之善岂为一日计哉沆居宣宣隶建邺视句容为一道从往来者得君句容之政廉以律已明以决讼惠以养民威以戢吏邑自常赋外一毫不妄取予而学宫社坛犴狱逵路与夫董征之靡铖累羡财繕治一新知所先後类非苟於应县课者所能及也当路诸公列上政绩行为时用矣有如均豁一事虽倡自赵君而委实推行无复遗恨则君之有功是邑尤多夫以天子之加惠二帅之将顺赵君之建谋刘君之参赞必得当世名能为文词者垂之永久而远以属沆失所择矣沆去年秋仲解贵池县章回视三年抚字催科仅不乏事莫能大有建立动人耳目故重违君请且以自媿云尔君世为青社人今家锡山寔淳熙名臣次对文华公之子治县有声不问可知沆独取其大者书焉盖革弊为难而三数君子相承一心拔本塞源损上益下

难之尤者自春及冬君法当代可无以告後之人俾知革弊之难相与谨守庶乎称物平施之意偕宋无极为斯民者何其幸欤嘉泰四年三月三日奉议郎提辖行在榷货务都茶场颍州韩沆记并书

赵时侃申豁和买役钱状照对时侃所领县在使府属邑最为僻陋壤地硗瘠赋重民贫无问岁之凶丰动辄转徙时侃窃尝寻流溯源而考求其故本县元额和买绢八千四十九疋绵三万八千九十两後因江宁上元两县房廊营建店业之家荡然於兵火之余人户多是流寓遂权将在城人户合纳和买绢一万余疋绵一万一百六十两敷下外三县包纳本县添起和买绢二千一十九疋已是重困而和买绵一万一百六十两不及溧阳溧水两县乃独尽令句容一县包认绍兴间宋侍郎知建康日申请除减诸县前项续增和买绢不幸句容一县独无时相产主一时观望却出榜晓示谓句容逐年催驱税赋数足祇将溧阳溧水县元包认城下两邑绢数除免外而句容例增之绢独认之绵不与焉犹以为未也则又以句容县合减绢二千一十九疋之数再行均减在其余四县则是将句容县合减额外增添税赋却与上元江宁溧阳溧水四县再於额内除减自是民始不堪矣至淳熙七年本府通判张朝奉任满差知永州上殿尝以句容租税过重为请得旨行下蒙上司委宁国府赵通判前来取会而邑民贫困无力相继陈雪未奉施行时侃请言坊郭所科和买之不均

在城江宁上元两县有房廊之家少者日掠钱三二十千及开解库店业之人家计有数十万缗者营运本钱动是万数并无分寸和买句容县有房廊及开解库店业之家富者家计不过五七千缗而止营运本钱不过三二千缗而止其日掠房钱一百五十六文足者即趣纳和买绢一疋开解库店业之家营运业钱每一贯文足即纳和买绢二寸二厘八毫各家岁纳和买绢不下五七疋则府城之人何其幸而县郭之人何其不幸耶此特坊郭之不均耳时侃请言乡村所租和买之不均且上元之与句容境壤相接阡陌相隣句容县上等人户每田一亩起纳和买绢一尺六寸二分六厘三毫和买绵五分五厘五丝上元县上等人户每田一亩只起纳和买绢三寸一分买绵二分二厘则上元之村民何其幸而句容之村民何其重不幸耶均是属邑也均是赤子也其税赋大不侔如此其他诸县如江宁每亩止科和买绢六寸如溧阳溧水虽等则组算不同亦无有重如句容者夫减免之恩既不能例沾而合放之数又均在他县人户日贫而税赋日增斯民有转徙而已痛哉榜文数语之祸也噫其忍言之哉时侃职在字民访求利害无大於此重以催科抚字之责丛於一身政拙心劳不敢偏废虽催理之际究心尽力不敢辄违使府比较期限以上劳督责而此身如据针氈而坐未尝一日敢安也苟於是时不能激切而详言之岂惟无以纾邑人郁郁不获伸之志亦将上辜使府布宣寛大勤恤民隐之意矣时侃区区之愚欲乞钧慈於比较诸县催科之时念邑民困於赋税之重其来已久摘出句容一县别赐寛假以苏民力不胜大愿仍乞断自钧慈特赐敷奏将本县例认之绢二千一十九疋独认之绵一万一百六十两拨还上元江宁两县在城人户名下仍旧均纳施行庶使一邑之民共戴天地父母无穷之恩

大乡李大东蠲和买榜契勘本府近準转运使台牒据管属句容县市户朱裕等状本县系山邑不通舟楫坊郭之内多是贫民下户应于货卖物色并是入府城打发下县所得甚微每遇官司推排却有一项虚桩管运钱六十五贯一百七文计买绢八十六疋三丈官折钱四百三十三贯七百五十文白乾敷认於编户名下陈乞比附江宁一体除免本府并江东运司遂委

本县丞簿尉同共讲求利病本职照得本县每岁于田产店库上已均敷和买绢八千二百四十余疋坊郭房廊赁钱上已均敷二百二十余疋却又白敷坊郭市户八十六疋有奇谓之虚增营运钱每遇推排别置一局深局固鑄关防备至凡邑之民次第高下号十等户虽负贩小夫下至植蔬鬻饼之徒稍能经营者在焉内择一人董其局事令自相纠决铢较寸量譁然争竞甚于仇敌虽民力有限虚额常存必欲包认八十六疋而後已遂使诈力者以多为寡弱者宜寡而多结局未几词诉蠹起其弊非一日矣本县以虚增八十六疋计之为钱仅四百三十余缗缘事关州郡经赋申府施行奉知府安抚留守制置殿撰大乡台判上件绢科之本县坊郭民户通年推排扰害不一不止催科追扰而已案帖县自九年为始与蠲除本州自行包认仍具申转运司本府已帖句容县遵从自嘉定九年为始蠲免本府自行包认及具申转运司照会了当合行晓示永远为照除已出版榜句容县门钉挂晓示民户知悉如本县不遵使府已行蠲免妄作名色催理许被扰人具状经府陈诉切待追捉县吏典押送狱根究从条施行

溧阳县均赋役记嘉定十有一年正月望日山陰陆子遹从天官选来知县事至之日延见士民问所先急咸以和买及差役对子遹曰请问和买之弊则曰名和买而不给直此已往事民不为病今之弊在於虚额子遹曰何谓虚额则又曰常产之谓实货财之谓虚常产之所赋出於甲则入於乙出於乙则入於丙视产之所在为赋之所系彼货财则不然或藏金珠或鬻醯茗或蓄马牛或乘舟车或广栋宇或啓贸易或称子本若此之类和买出焉其全盛则从而加之不为难其衰替则不可得而损至有身沦乞丐而负和买数十百缗者以无所受焉故也民既被其害官亦无所入是箠楚於无告之地文移於徒设之所何弊如之子遹曰请问差役之弊则曰自胥吏之徇私也而取决於书手自书手之患滋也而求正於推排使推排之公也尚恐不能无弊而推排一有不公则诉讼互兴而姑仍旧贯之说兴焉鼠尾之不立而销丹之莫辨白脚之隐匿而析户之规免窜形诡迹深闭固拒虽娄眼曠耳且弗能察名之曰承充而未尝任责者有之名之曰宜充而家业已罄者有之富者无一日之劳而贫者困海岁之扰民有妄差之患官有乏使之虞苟非因民之有词则亦何从而考察子遹曰谨奉教子遹昔者闻之先太史和买必履亩而後可或者以为履亩则困下户殊不悟察第赋和买则惠奸而病良析上下之等则豪家大姓所以欺罔者万端姑槩言之则名字行第小字称谓裂为数户者有之若祖若父若兄弟若子侄若姻党剖为数十户者又有之大抵岁月浸久则上户皆入於下惟谨畏之家不敢肆欺者则和买之额偏聚焉而重受其害如是乃下户岁加进而上户日加削愚弄官府虐视良民安可不革子遹闻而铭於膺臚三十年矣与今日所闻合为二大患夫差役之弊诚未易革而其为弊则所在不同盖乡间族党自有公论吏奸蔽障情不上达若能一听民欲不使吏与其间则谋无不成举无不遂比年以来浙中之义役江西之议役行之而民以为便义云者使民以等第捐粟以募役议云者户之高下役之久近一听於衆议有司但视成而已若酌二者之宜而折衷焉使村都之腴者损粟以募役其乏者议定而行之当不为难其明年冬会庾台举行推排义役事子遹欣然奉命先致力於和买旧比家业钱六千以下与夫变菰芦而艺麴杭者和买皆不与於是悉比而同之列为九品履亩成赋揭令一出民无异辞虚额之害不除而自除诡户之奸不革而自革与夫啓告讐之门滋议逮之扰者不可同年而语矣其次从事乎役乃告之尉陈君嶠山前巡检陈君锡罗君球臣旧县巡检罗君镒相与自邑而分乡自乡而分都自都而分保能捐粟者从其便不能者以官产代充凡与役之家皆书名而叙其次第与捐粟之多寡焉豪者不得逞其私乡胥莫能肆其欺矣於是悉去和买之

虚额凡为帛五千六十缣而赢纡万九千六百两而缩其均之常产者凡为帛三千一百六十缣而赢纡万三千五百两而缩均之业钱六千以下者凡为帛八百七十缣而赢纡二千九百二十两而赢自菰芦而杭蕘者其均之为帛千三十缣而缩纡三千一百八十两而赢役户凡得保正三百六十有七保长二千八百八十有七其次第自嘉定庚辰至於庚寅周而复始其捐粟岁通二千九十石有奇谷四万八百斤有奇官补其不足者七百六十有六石为亩三千七百二十有奇又明年夏督税秋督租其效则倍於前其力则省於旧官事无乏而民害顿除矣窃惟子通迂拙猥疎潜心往哲无能为役一旦取民不便者上稽父师之训傍酌輿人之论内则断以己意不以衆摇不以难止用能底於有成岂非幸欤然变更往辙以便目前昔人所以遗後來者往往自子通而无传则恶得无罪故直书以识吾过嘉定十有三年仲冬壬辰承事郎知建康府溧阳县主管劝农公事陆子通记并书

马光祖倚阁诸县积欠苗税宝佑三年榜示元年五县现欠夏秋畸零二税权行倚阁以寬民力夏税折帛钱七万六千五百三贯四百三十六文绢八千六百四十二疋一丈六尺九寸绵一万六千二百一十一两五钱七分丝一百七两六钱五分秋苗粳米三万四千一百八十五石八斗六升七合糯米一千二百九十五石五斗六升三合穰草七千五百六十九束豆钱一千三百一十七贯七百六十八文十八界钱会中半仍帖各县将目前已催在官未解府者尽数起发一毫不许欺隐二三年照现催却不许又行拖欠出榜晓示仍申朝省户部照应

宝佑四年榜示三年六料催科所在皆然事关上供本难蠲阁缘今岁诸邑间有被涝去处损上益下有不容已榜帖下三县将二年折帛钱绢并穰草未催之数普下权与倚阁以寬民力夏税折帛钱六万八千二百九十二贯九百七十二文绢一万一千八百九十九疋二丈六寸三分绵二万五百七两二钱六分紬五百八疋二丈六寸丝三十五两四钱五分秋苗粳米二万七千九百九十石二斗八合二勺糯米四百五十六石八斗一升四合穰草四千九百二十八束豆钱二千八百九贯二百二十三文其民户有已等在团揽名下者仰一面自行理取庶几实惠及民其已催在官者自榜帖下日为始倒底解发不许隐漏如违根究

宝佑五年榜示今年夏税若以二年比之尚未及数且特与倚阁以寬民力榜悬门仍帖县照应通前若放过五县夏税折帛钱一十五万三百三十五贯七百五十二文十八界钱会中半绢二万一千一百九十六疋三丈五尺三十七分七厘绵三万六千七百六十八两八钱三分紬五百八疋二丈六寸丝一百四十三两一钱秋苗粳米六万一千一百七十五石九斗七升五合二勺糯米一千七百五十二石三斗七升七合穰草一万二千四百九十七束豆钱四千一百二十六贯九百九十一文十八界钱会中半

马光祖蠲秋苗斛面宝佑三年榜文照得受纳秋苗斛面事关郡计一粒以上指为经常支遣本亦未易蠲除然寬之一分培植根本乃刍牧之本心况当使增耗正恐专斗无艺取於斛面故使明增今明增之外又再尖量即是增而又增官司之取於揽户者如此揽户之取於百姓者又不止是当使假守当涂之时除明收耗米之外并听百姓亲自行槩撙节支遣亦自不致大段亏损岂此例可行於当涂而不可行於留都乎备缕榜晓谕余照条收明耗米外并听民户亲自槩量但不许亏官仍帖受纳官并诸县照应使明知此意毋为揽户多算庶几百姓可

被实惠【自宝佑三年冬免收斛面外每年计亏指拟经常米一万八千石】开庆元年榜示照对本府受纳秋苗自来所取斛面为数甚夥自当使开阡通年优减除合收数外并听民户亲自执槩人所素知今準朝省备据臣寮奏请每亩一石止收义耗用米共四斗二升选委廉谨官员下场受纳务在尽革前弊圣恩寛大惠养元元培护根本本司所当奉以布宣为属部郡县之倡合镂榜晓谕并遵照朝省指挥行仍申省部照应【通前计亏经常米七万三十余石】

马光祖蠲除两县亏隐税额上元江宁两县逐年奸民遇起催夏秋二税拘纳亏隐等税钱宝佑三年八月二十二日具呈潘府判拟申呈奉台判奸民果有欺隐究见主名分晓付之三尺其将奚辞若槩立欺隐之名不得欺隐之实岁岁为例责令户长代输户长决须斂掠人户两县之入於府者不满三千缗而齐民之受其害者不知其几也以若所为殊非理财正辞之义潘通判所拟可谓切当有志於民并自当使交割日为始一切住罢仍备榜晓示不许县吏乡胥尚循旧辙私行催讨本府傥有所闻决不轻恕知县失觉察亦议责罚上元江宁两县共放过钱一万八千二百一十六贯五百文制使姚希得任内蠲放和州水退租米壹万五千余石永远筑堤壅水以限戎马【和州截三湖出江之派筑堤壅水为戎马限数十里膏腴莽成巨浸以亩计之二万八千有奇前政吴制置尽决堤水起立屯租名曰水退以石计之一万四千有奇未几守臣以备御为请仍前筑堤更不申明为民蠲租遂使屯户年年诉潦本司年年检踏追会纷纷终归放免非徒无益而又害之景定三年十二月準使判所谓检涝放租者以天时不能常涝则田租不致常蠲是不容以永免也今和州之堤以备御言则此堤当与国相为悠久矣此堤既无可撤之时则此租终无可入之日不永免而何待哉分司所由正与当职之见合虽田免之数计万五千余石然事之便民者岂容靳于施行自景定三年为始水退租一项永与蠲免从前所欠并与住催割和州及分司照应备榜晓谕有合关防事件金厅具呈仍申朝省照会】

景定建康志卷四十一

卷四十二

<史部,地理类,都会郡县之属,景定建康志>

钦定四库全书

景定建康志卷四十二 宋 周应合 撰

风土志一

江左人物金陵为盛盖土地所生风气所宜也既作古今人表及先贤传更书民风以志其习书民数以志其聚书第宅以志其安书丘塚以志其藏书物产以志其阜书妖祥以志其异作风土志【当涂江陵九江皆有风土志】

风俗

惰志曰丹阳旧京所在人物繁盛小人率多商贩君子资于官禄市?列肆埒于二京人杂五方俗颇相类杜佑通典曰永嘉之後衣冠违难多所萃止艺文儒术斯之为盛今虽閭阎贱隶处力役之际吟咏不辍盖因顔谢徐庾之风焉

沈立金陵记云其人士习王谢之遗风以文章取功名者甚衆

祥符图经曰君子勤礼而恭谨小人尽力而耕殖性知文学音辞清举

顔介之曰南方水土柔和其音清举而切天下之能言唯金陵与洛下

杨万里曰金陵六朝之故国也有孙仲谋宋武之遗烈故其俗毅且英有王茂弘谢安石之余风故其士清以迈有鍾山石城之形胜长江秦淮之天险故地大而才杰【时杨公为江东转运副使】

游九言曰每爱金陵土风质厚尚气前年摄行倅事日受诉牒不过百余较剧郡才十一尔为吏为兵者颇知自爱少健狡之风工商负贩亦罕闻巧伪【游为抚干】

句容县在江南卑湿之地火耕水耨民食鱼稻以渔猎山水为业果蓏蠃蛤食物常足故些窳媮生亡千金之家【县志】

溧水县有山林川泽之饶民勤稼穡鱼稻果茹随给粗足虽无千金之家亦罕冻馁之民信巫

鬼重淫祀畏法奉公各守其分安业重迁尤好文学承平时儒风蔼然为五邑冠

溧阳县介江淞之间其君子笃厚恭谨恬静自得艺文儒术蔼然相尚其细民务本力农淳朴质直类知畏法名儒胜士多因避地来寓溧上往往乐其风土而定居焉宗丞王端朝曰是邑有李太白之英风故其人多秀而文有伍子胥之古迹故其俗多义而勇

民数

主户一十万三千五百四十五口二十二万一千七百五十五

客户一万四千二百四十二口二万六千四百四十一隶上元县者

主户一万一千二百八十口一万五千七百八十五客户七千四百六十六口八千七百五十七

隶江寧县者

主户一万一千三百五十四口一万六千四百八十五客户二千二百五十七口二千四十七

隶句容县者

主户二万二千三百七十口五万一百三十

客户三千九百九十六口七千二百一十三

按乾道旧志句容主户二万五千八百九十七主丁口六万七千五十客户二千四百九十六客丁口五千七百六十六较之今数主户减二千五百二十七客户增一千五百

隶溧水县者

主户二万二千五百二口四万四千八百六十六客户二千二百五十九口八千二百五十九

隶溧阳县者

户六万三千九百八十三口一十三万七千五百五皆主户也

按乾道旧志溧阳主户三万一千二百一十二口六万八千九百三十一客户无较之今数主户增三万二千七百七十一口增六万一千七百七十四灾祥

周显王三十六年楚熊商见地有王气 秦始皇三十七年望气者言五百年後金陵有天子气 吴太祖元年夏五月甘露降于建业 黄武四年七月地连震 赤乌十三年八月丹阳句容诸山崩洪水溢 太元元年风拔树三千株 石碑搓动 城门瓦飞落 永安元年十一月甲午有风四转 五复蒙雾连日 三年赤乌见 四年白龙见 五年白虎 门北楼灾 七月黄龙见 六年十月癸未石头小城西南灾 甘露元年甘露降 蒋陵建衡三年十一月凤凰集西苑 天纪三年建业有鬼目 草生 工人黄耆家 晋元帝渡江时望蒋山有紫气 时时晨见 永和三年

夏四月地震 五年十一月甘露降 崇平陵玄宫前殿 七年七月涛水入石头 溺死者数百人 九年秋七月丁酉地震 有声如雷 十一年夏四月陨霜 地震 升平二年冬十一月地震 宁康三年十二月甲申神虎门灾 太元元年夏五月癸丑地震 二年闰三月壬午地震 暴风折木 发屋扬砂石 十一年二月壬子暴风 发屋折木 冬十二月戊子涛水入石头 毁大航 杀人 乙未大风 昼晦 延贤堂灾 十五年三月己酉朔地震 东北有声如雷 八月己丑地震 十七年夏六月癸卯地震 甲寅涛水入石头 毁大航 十八年正月癸卯朔地震 二月乙未又地震 隆安二年九月地震 元兴三年庚寅夜涛入石头 漂毁大航 杀人 其声动天 宋元嘉五年正月庚午朔大风大水 六月庚午都下大水 十二年四月丙辰夜地震 十四年凤凰见 改其地为凤凰里 十七年十一月乙酉朔甘露降于乐游苑 二十年六月秣陵县白雀见 二十一年七月甘露降于乐游苑 二十三年六月甘露降于长宁陵 二十四年三月甘露降景阳山 二十五年四月丁丑青龙见于玄武湖南 五月戊戌黑龙见玄武湖 二十九年十二月戊申黄雾四塞 孝建元年十一月甲申甘露降长宁陵 大明元年五月壬子紫气出景阳楼 状如烟回薄 久之 二年夏四月辛丑地震 六年二月戊午甘露降于京师 秋七月甲申地震 有声如雷 七年四月大风折和宁陵华表 泰始四年正月丙辰朔雨草于宫 泰豫元年正月丁巳巨人迹见西池冰上 齐建元元年二月地震 建阳门 永明元年望气者言新林娄湖有王气 帝乃筑青溪旧宫 作新娄湖苑 以厌之 十年都下大水 梁天监元年正月乙酉甘露降于茅山 弥漫数里 三年戊辰重云殿东鸱吻有紫烟出 属天 六年八月戊戌大风折木 京师大水 涛入御道七尺 十年九月丙申天西北隆隆 有声赤气下至地中 大通五年地震 大同元年十月黄尘如雪 二年十一月都下地生白毛长二尺 九年正月丙申地震 生毛 四月丙戌同泰寺浮图灾 太平元年九月龙见于御路 自太社至于象魏 陈天嘉四年六月丁未夜白虹两道出北斗间 重云殿灾 六年七月癸未大风自西南至 才广百余步 激坏云台候馆 太建七年九月甘露三降 乐游苑 八年正月庚辰西南紫云见 九年七月大风雨震 万安陵华表 癸亥震瓦 官寺重门一女子死 十年六月大雨震大皇寺刹庄严寺露盘 重阳阁东楼 千秋门槐树 鸿胪寺府门 十二年六月大风坏臯门中 閤九月天东南有声如风水相激 三夜乃止 十三年九月癸亥夜大风从西南来 发屋拔树 大雨雹 十四年四月建康江水色赤如血 八月丁酉天赤如火 九月辛亥夜天东北有声如虫飞 渐移西北 至德元年九月丁巳天东南有声如虫飞 十二月戊午夜天开自西北至东南 其内青黄杂色 隆隆若雷声 祯明元年正月乙卯地震 二年夏四月羣鼠无数 自蔡洲岸入石头 缘淮至于青塘 两岸数日自死 五月甲午东冶铸铁有物赤如火 大数升 自天坠 熔所隆隆 有声如雷 铸铁飞出墙外 烧人家 丁巳大风自西北激 涛水入石头 城秦淮暴溢 漂没船舫 又船下有声云 明年乱 视之得婴儿三尺无头 又蒋山衆鸟鼓翼拊膺曰 奈何帝 奈何帝 又府城无故自坏 青龙出建阳门 井中涌赤雾 地生白黑毛 大风拔朱雀门 五代伪唐天祚元年二月甲申金陵大火 乙酉又大火 大和中徐知诰典金陵 鍾山之阳 积飞蝗尺余厚 有数十僧白昼聚首 之 尽昇元六年十

一月丁丑溧水县天兴寺桑树生木人广顺二年建康灾焚庐舍营署踰月乃止

第宅

张昭宅在淮水南对瓦棺寺张侯桥所桥因宅而名考证丹阳记大长干寺西有张子布宅本传昭仕吴言不用杜门称疾帝恨之以土塞其门复以火烧之诸子扶昭起朝

诸葛恪宅在县东二里古元风观前南接青溪里其东即江令宅也

是仪宅在西明门台城之西

考证吴志是仪为人俭让不治产业又爱施惠宅在西明门甚卑陋虽处尊官弊衣簞食帝闻之幸其宅求视蔬饭亲尝之对而叹息有所增加皆辞而不受又一日仪隣家起大屋孙权出望见左右对以是仪家权曰仪俭必非问果他家其见信如此

骆监军宅在上元县东二十五里崇礼乡土山之下父老传云吴骆监军宅也

考证吴志骆统字公绪封新阳亭侯尝为濡须督此宅疑所居也今基址犹存

陆机宅在秦淮侧又金陵故事临秦淮有二陆读书堂其迹犹在

考证陆机入洛作怀旧居赋云望东城之纡余邈吾庐之延伫
李太白题王处士水亭云齐朝南苑是陆机宅故有北堂见明月更忆陆平原之句

王导宅在乌衣巷中南临骠骑航

考证晋记江左初立琅邪诸王居乌衣巷王敦谋逆导忧覆族使郭璞筮之卦成叹曰吉无不利淮水竭王氏灭子孙繁衍世说王导曰庾元规若来吾角巾还乌衣南

谢安宅在乌衣巷骠骑航之侧乃秦淮南岸谢万居之北

考证桓玄得志欲以谢安宅为营谢混曰召伯之仁犹惠及甘棠文靖之德更不保五亩之宅耶玄闻慙而止蔡宗旦金陵赋云前予立乎淮渚思骠骑之古航慕文靖其既远宅五亩其已荒念憇茝犹勿剪歌诗人之甘棠

谢尚宅在城东南一里二百步永和四年舍宅造寺名庄严

谢万宅在长乐桥东傍丹阳郡城今桐林湾东

纪瞻宅在乌衣巷

考证晋书瞻厚自奉养立宅乌衣巷馆宇崇丽园池竹木有足玩焉

郗鉴宅在青溪上

杜姥宅在旧县东北三里旧县在冶城今天庆观之【阙】是也

考证杜姥宅輿地志云在端门外直兰台路东 晋成帝恭皇后杜氏母裴氏即杜弘治之妻名穆孝武帝封为广德县君初穆渡江宅於南掖门外时已壽考故呼为杜姥
宋元徽二年桂阳王举兵杜黑蠡进至杜姥宅陈显達出杜姥宅大战于宣阳门破之

吴隐之宅在城东南五里

考证隐之为广州刺史官罢并无还资篱垣反陋妻子寒露内外茆屋六间女嫁谢安移厨助之使人至日高萧然乃令其婢牵一犬入市卖之其清操如此

絕宅地旧志云在县南三里古大社西有凶地三亩晋周顗司马秀苏峻皆宅于此悉以祸败宋王僧绰曰大丈夫当以正道自居何宅之有凶吉寻为元凶所害杨备有诗曰四主衣冠今不终高门列戟漫重重由来瘠沃分劳逸莫道人凶非宅凶

宋檀道济宅在青溪

考证异苑云檀道济居青溪此宅先是吴将步阐所居谚云扬州青是鬼营青溪青杨是也自步及檀皆被诛【青杨巷名】

何尚之宅在南涧寺侧

考证袁?与尚之书云丈人徽明未耗举业方隆傥能屈事康道降节徇务舍南涧之采菽此行决矣尚之宅在南涧寺侧故书云南涧诗所谓于以采苹南涧之滨也南涧今城南落马涧是也

沈庆之宅在城东南十里

考证南史沈庆之传居清明门外有宅四所室宇甚丽又有园在娄湖庆之一夕携子孙徙居之以宅还官悉移亲戚中表于娄湖同閤迨前废帝立加几杖给三望车庆之每朝贺常乘猪鼻无轡车左右从者不三五骑履行田园每农桑剧月无人从行遇者不知其三公也柳元景造之鸣笳列卒满道庆之挿杖而耘尝侍宴赋诗云老朽筋力尽徒步还南岗

谢几卿宅在今府城东南十八里

考证宋谢几卿坐免官居白杨之石井朝中交好者载酒从之客常满座

建平王刘宏第在鸡笼山

考证宋书云建平宣简王少而闲素笃好文籍太祖宠爱殊常立第于鸡笼山尽山水之美

齐武帝旧宅在青溪今城东一里临秦淮是其地【旧志】考证齐书云武帝讳颐字宣远太祖长子也小字龙儿生于建康青溪宅其夜陈孝后刘昭后同梦龙据屋上故字焉
永明二年帝幸青溪旧宅

萧子良宅在锺山之西

考证竟陵王子良行宅诗曰访宅北山阿卜居西野外幼尝悦禽鱼卑性羨蓬荜

刘子珪宅在今城东二十五里青龙山之前

考证南史齐刘瓛居于檀桥瓦屋数间上皆穿漏永平七年竟陵王子良表武帝为立馆帝以檀桥地给之

梁武帝宅今府城东南七里光宅寺基是

考证梁高祖于宋大明八年甲辰生于秣陵县同夏里三桥宅

沈约宅在锺山之下名东田

考证南史梁沈约迁尚书令虽名位隆重而居处俭素立宅东田瞩望郊阜尝为郊居赋以叙其事又尝赋东园诗有櫜籥踈复密荆扉新且故之句
鸡跖集云宅成刘查赞之约报云惠以二赞词采妍富便觉此地十倍

朱异宅在今府城东北

考证南史梁朱异及诸子自潮沟列宅至青溪其中有台池玩好每暇日与宾客游焉

范云宅在今府城东南七里

考证陈轩金陵集载何逊行经范将军三桥故宅诗云旅葵应蔓井荒藤已上扉寂寂空郊野无复车马归

江摠宅在青溪大桥北与孙瑒宅对

考证摠仕陈为尚书令故亦称江令宅

寔録云江令宅在青溪中桥傍湘宫寺巷对桃花园路北後主尝幸其宅呼狎客

杨备诗注云南朝鼎族多夹青溪江令宅尤占胜地 隋初摠还宅诗云悵然想泉石驱驾出台城玩竹春前笋惊花雪後春记室新书云江摠之泉石依然谓此也

刘禹锡诗云南朝词臣北朝客归来惟见秦淮碧池台竹木三亩余至今人道江家宅

本朝为段细约之宅青溪阁亦其地也故荆公诗云昔时江令宅今日段侯家

孙瑒宅在青溪东其西即江摠宅

考证寔録陈起部尚书孙瑒居处奢豪家庭穿筑极林泉之致歌童舞女当世罕俦

伏曼容宅在今府治西南三里

考证曼容居瓦棺寺东施高座于厅事有宾客辄升高座为讲说生徒常数百人

伏挺宅在今府城北潮沟

考证挺于宅讲论语听者倾朝

唐柳郎中故居在茅山

考证权德輿作柳郎中茅山故居诗云下马荒堦日欲曛潺湲石溜静中闻鸟啼花落人声絶寂寞山窗掩白云今不详其处

孙晟宅在凤台山西

考证郑文宝南唐遗事云孙晟为尚书郎赐宅一区在凤台山西岗壠之间徙居之日羣公萃止韩熙载见其门巷卑陋谓孙曰湫隘若此岂称为相第邪举坐莫喻其旨明年孙拜御史大夫百日之间果登台席

徐铉宅旧在摄山栖霞寺西今日陶庄者是也园池甚盛

考证裴迪留题徐氏来贤亭云常侍江东第一流子孙今不泯先猷结亭意在来贤者谁慕清风为驻留王荆公题徐秀才园亭诗云茂林修竹翠纷纷正得山阿与水濱笑傲一生虽有乐有司还欲选方闻二诗刻石今在栖霞市酒坊

王荆公宅今半山寺是

考证公再罢政以使相判金陵到任即纳节 辞同平章事恳请赐允改左仆射未几义求宫观累表得会灵观使筑第于白下门外去城七里去蒋山亦七里平日乘一驴从数僮游诸寺欲入城则乘小舫泛潮沟以行盖未尝乘马与肩舆也所居之地四无人家其宅仅蔽风雨又不设垣墙望之若逆旅之舍有劝筑垣辄不答元丰之末公被疾奏舍此宅为寺有旨赐名报宁既而疾愈僦城中屋以居不复造宅父老曰今江宁县治後废惠民药局其地即公城中所僦之宅也

蔡寬夫宅在今贡院

考证南窗纪谈云蔡寬夫侍郎治第于金陵青溪之南穴地为池数尺之下见有瓦砾及朱髹匕筯数十蔡惊异命工愈掘之又深尺余有金镬瓦錫之器甚多皆破碎交错仆压于下竈下苇灰犹存又穷其傍大抵皆人居也然後知其下前代为平地经六朝丧乱瓦砾粪壤积而至此高岸为谷深谷为陵岂不信哉今贡院基是

湖陰先生居今不详其所

考证王直方诗话云杨德逢号湖阴先生丹阳陈辅浙西佳士也每岁清明过金陵上塚事毕则至蒋山过湖阴先生之居清谈终日岁率以为常元丰辛酉癸亥频岁访之不遇题一絶于门云北山松粉未飘花白下风轻麦脚斜身似旧时王谢燕一年一度到君家湖阴归见其诗吟赏久之曾称于舒王闻之辄笑曰此正戏君为寻常百姓耳湖阴亦大笑

土贡

唐岁贡笔及甘棠梨

皇朝岁贡罗二十疋

物产

谷之品稻粳来牟【饼餌皆胜它郡】菽麻粟

帛之品【俗勤蚕桑帛冠它郡】罗绢纱花绢花纱四紧纱【溧阳最多】夏纺丝冬纺丝绵

金之品金【句曲山】铜铁【赤山】铜器【句容】

药之品玉屑【淮南子云出鍾山】石鍾乳【本草云茅山土石相杂徧生茅草以茅津相滋乳色稍黑而滑润谓之茅山乳性微寒】禹余粮【本草云茅山甚有好者状如牛黄重重甲错其佳处乃紫色泯泯如面啮之无礮然用之宜细研以水洮取汁澄之勿令有沙土也】黄精【本草云叶大根麓黄白色至夏有花实】生人葠【阮孝绪因母疾用药须得生人葠旧

传鍾山所出孝绪躬历幽险累日不获忽一日鹿前行至一所遂不见就求之果得】鹿藜【本草云江宁府出一种小藜名鹿藜叶如茶根如小拇指彼处人取其皮治疮癬及疥癩云甚效八月采】木【陶隐居云蒋山白山茅山者为胜】卷栢【建康记云出卷栢】石脑【陶隐居云今茅山东西平山并有凿土龛取之】芍药【陶隐居云今出白山蒋茅最好白而大】乾地黄【陶隐居云板桥者为胜】柴胡麦门冬苘蓎王不留行前胡败醬石韦菝葜地榆京三?甘遂牙子天南星鬼臼僊茅连翘紫葛桑上寄生地蜈蚣苈麻茵陈蒿【按本草以上并出江宁】桔梗兔丝子香附子罌粟荆芥苍术玄参百合百部白斂白及地黄地榆贯衆芫花半夏天门冬天仙藤威灵仙刘寄奴何首乌夏枯草谷精草【按本草并出溧阳县】芝草菖蒲南烛山桃【按本草并出句曲山】覆盆子吴茱萸【按本草并出溧水县】溪荪草侧柏【并出句曲山】芝草【龙仙芝叁成芝燕胎芝洞草芝料玉芝荧火芝琅葛芝夜光芝并出茅山】

香之品黄连香【出茅山】

果之品来禽大杏海红金锭梅红桃绿李相公李【出句容】秦公梨樱桃绣莲藕芡寔菱寔蒲萄海门柿石榴香查西瓜甜瓜梧桐子地栗橘橙乳柑竹蔗荻蔗【出府境】福乡柰【出句曲】

菜之品莴笋大葱萝卜【溧水】冬瓜笋茭白芹菱蒿防风菜甘露子

禽之品鳧鶉鳩

鱼之品鲟鱼鲈鱼邵鱼【状如鸢】蟹河魮石首鲚鱼鳊鱼鲴鱼金鱼银鱼比目鱼鲋鱼

兽之品獐鹿

景定建康志卷四十二

卷四十三

钦定四库全书

景定建康志卷四十三 宋 周应合 撰

风土志二

古陵

古越王塚在句容县

考证王名翳周安王时薨葬句容大横山下

吴大帝陵在蒋山之阳去城一十五里

考证吴志神凤元年大帝崩葬蒋陵 寰宇记在县东北蒋山八里 丹阳记云蒋陵因山为名 輿地志云九日台当孙陵曲折之傍故名蒋陵亭 今蒋庙西有孙陵冈蒋陵地也【何逊经孙氏陵诗在昔零陵厌神器若无依逐兔争先捷猗鹿竞因机呼吸开霸道叱咤掩江畿豹变分奇略虎视肃戎威长蛇衄巴汉冀马絶淮淝交戟无内御重门岂外扉成功终已弃凶德愎而违水龙忽东骛青盖乃西归竭来易永久年代暖湮微苔石疑文字荆坟失是非山鷖空曙响陇月自秋辉银海终无浪金鳧永不飞閭閻今如此望望沾人衣】

步夫人陵在蒋陵

考证吴志赤乌元年追拜夫人步氏为皇后後合葬蒋陵
今蒋庙西南有孙陵冈上有步夫人墩墩之侧有夫人塚乃其地也

宣明太子坟亦在蒋陵

考证吴志大帝皇太子登初葬句容後三年移葬鍾山西北蒋陵

晋康帝陵 晋简文帝陵

晋孝武帝陵 晋安帝陵

晋恭帝陵

考证寔录康帝建元三年葬崇平陵简文帝咸安二年葬高平陵孝武帝太元二十一年葬隆平陵安帝义熙十四年崩明年葬休平陵恭帝元熙二年葬冲平陵五陵并在锺山之阳皆不起坟

晋元帝陵 晋明帝陵

晋成帝陵 晋哀帝陵

考证寔录元帝永昌元年春葬建平陵明帝太宁三年葬武平陵成帝成康八年葬兴平陵哀帝兴宁三年葬安平陵四陵并在鸡笼山之阳皆不起坟

晋穆帝陵在幕府山前近西里俗相传穆天子坟即其地也

考证寔录穆帝升平五年葬永平陵在幕府山

宋武帝陵在县东北二十里

考证寔录宋高祖永初三年葬初宁陵隶建康县蒋山
政和间有人于蒋庙侧得一石柱题云初宁陵西北隅以此考之其坟去蒋庙不远

宋文帝陵在县东北二十五里与武帝陵相近

考证文帝元嘉二十年葬长宁陵

袁后陵即文帝后合葬长宁陵

考证南史元嘉十七年葬先皇后袁氏于长宁陵长宁即文帝陵也

宋明宣沈太后陵在今宝林寺西南有坟壠相传为国婆坟疑即沈后所葬之地【旧志】

考证南史宋明宣沈太后为文帝美人生明帝元嘉三十年葬建康之幕府山

宋明帝陵在幕府山西与王导坟相近今山前有坟壠晋穆帝陵在山南或以西为明帝之墓

考证明帝泰豫元年葬高宁陵隶临沂县

齐明钦皇后陵在今淳化镇之北

考证南史齐明钦刘皇后永明七年葬江乘县张山

梁昭明陵在城东北四十五里贾山前与齐文惠太子同处排陵并葬

萧墓冈西去县三十五里或云萧梁帝陵寝未详陈高祖陵在上元县东崇礼乡地名陵里有曰天子林其地有石麒麟二里俗相传即陈高祖墓也去城二十五里

考证陈高祖永定三年葬万安陵隶城东南古彭城驿侧

陈文帝陵在县东北陵山之南今鴈门山之北

考证陈文帝天康元年葬永宁陵

诸墓

左伯桃墓羊角哀墓并在溧水县南四十五里仪凤乡孔镇南大驿路西

考证烈士传云左伯桃羊角哀燕人也二人为友闻楚王待士乃同入楚至梁山值雨雪粮少伯桃乃并粮与哀令往楚自饿死于空树中哀至楚为上大夫乃告楚王备礼葬于此一夕哀梦伯桃告之曰幸感子葬我奈何与荆将军墓相邻每与吾战为之困迫今年九月十五日将大战以决胜负幸假我兵马叫噪塚上以相助哀觉而悲之如期而往叹曰今在塚上安知我友之胜负乃开棺自刎而死就葬伯桃墓中刘孝标广絶交云续羊左之徽烈正谓是也唐大历六年顔真卿过墓下作诗吊之【此诗书于莆塘客馆大中十一年宣歙池观察使郑薰徙鲁公墨蹟置宣州之北望楼作文以记之诗今亡】熙宁中太子中允关杞知县事梦二人告之曰余羊左也为魏伦所苦出祭文百余篇示杞既觉仅能记其一语云千花落兮奠酒空明日问之邑人有魏伦者以钱买羊左墓木将伐焉杞遽止之乃表墓事见胡宗愈诗【诗云古有二烈士羊左哀与桃结交事游学心若胶漆牢远闻楚王贤待士皆英髦负笈首燕路不憚千里劳行行及梁山雨雪填岩途穷食不继饿口空瞀瞀无为俱死尔原野徒身膏我留子独往命各系所遭慷慨示一诀并粮解衣袍僵坐空穴中视死轻鸿毛角哀既仕楚爵位联执羔顾怀交旧心血泣声号咷王闻义其事礼葬迁蓬蒿孤风激颓俗千古清萧飀叔世忠义丧友道皆滔滔平居论莫逆握手相游遨利害一轧已所得无秋毫挤壑又下右反若豺狼嗥秦末余耳辈遇时方驿骚誓为刎颈交名节初相高一且成毗睚亲勒兵相鏖斩余泝水上论功传子敖较此岂不愧清议安能逃凛凛溧水傍危坟望江臯蔚宗宰兹邑梦睹斯人曹衣冠甚奇古晤语开鬱陶持示古祭文百本皆旌褒其间记一二花落空奠醪薄诉魏伦者相侵意贪饕诘朝究其详伦果邑之豪墓木合数抱私欲挥斧刀移丈禁采伐表识严芟薶英灵俨如旧虽久不闻韬哀我今之人五交戒所操枢密蔣之奇诗结交有羊左是惟一时才为闻楚王贤翩然自燕来一旦食欲尽俱往空双埋伯桃乃独留饿死梁山隈角哀仕既達感旧肝胆摧念此并粮惠告还葬遗骸至今溧水旁突兀穴土堆何人致荐奠千花飞酒杯精灵今在否古木生风雷鲁公昔过之驻车久徘徊感叹蒺藜篇咏洒翰□琼瑰惜哉今不存散落随尘埃空余郑薰记片石昏苍苔末世友道絶雅歌堪式颓草木尚萎死小怨何足怀我思有所矫巨焰明寒灰兹事虽过中义烈亦壮哉幸逢太丘长掲表旌泉台寥寥千载间下激清风回还顾势利交

市道良可哀邑宰周邠跋此诗刻石庙中 元佑中知县周邦彦诗古交久沦丧末世尤反覆谷风歌焚轮黄鸟譬伐木永怀羊与左重义踰血属客行干楚王冬雪无斗粟倾粮活一士誓不俱死辱风云为惨变鸟兽同踣躅角哀哭前途伯桃槁空谷终乘大夫车千骑下棺槨子长何所疑旧史刊不录独行贵苟难义侠轻杀戮虽云匪中制要可兴薄俗荒坟邻万鬼湔死皆碌碌何事荆将军 戈相窘逐 史吏部弥巩宰溧水日有诗词云余耳当年刎颈交所争利害仅毫毛一朝泚水相屠戮岂识羊哀左伯桃交情切戒勤终堕以义存心心必果死生可托永无睽自古中山说羊左羊左合人我左既逊粮甘自饿羊仕楚王官职大佑旧杀身蓬颗顔公畴昔曾经过佳咏至今传播】书此为诸墓先又加详焉非语怪也将以厉薄俗也

西汉甄邯墓在後湖之侧

考证南史宋张永尝开玄武湖过古塚塚上得一铜斗有柄文帝以访朝士着作郎何承天曰此亡新威斗王莽时三公亡皆赐之一在塚外一在塚内时三台居江左者惟甄邯为大司徒必邯之墓及啓塚内更得一斗复有一石铭云大司徒甄邯之墓

後汉史君崇墓在溧阳县北三十里

考证崇为司空骠骑将军青冀二州刺史赠溧阳侯使持节徐兖二州刺史有神道碑在墓所晋永和八年立唐贞观十四年十八代孙越王府东阁祭酒常州长史仲谔题云隋末大乱避地闽越碑坏再立其颂曰山岳降精川渎耀灵猗欤史氏世济其英忠言允塞嘉猷有声从容燮理散诞飞纓含香青琐敷奏丹庭有犯无隐唯言是聽王室斯赖诸侯以宁内侍帷幄外典专城为政以德察狱以情化俗草偃溪谷风清金相玉质不陨厥名处溢不骄居劳不憚视险如夷忘身逐叛駟颂美鲁青蒲安汉执简书愆奸邪逃窜匪君之忠孰能戡乱在昔隆汉姻娅皇家唯帝念功爵命屡加三台五鼎驸马奉车腰佩两印綬带双緌何彼穠矣常棣之华如珪不玷似玉无瑕节之以礼俭而不奢笃生我侯英略备举有艺有才能文能武孝以奉亲忠惟卫主赤眉始结白波犹侮执锐被坚斩馘灭虜截彼长蛇殲斯猾竖策赏庙堂书勲王府功成弗居名立不取简在帝心酬封祚土厥土惟何在溧之浒初食三千卒封万户葭莩揭揭尘鹿麋麋禾役旆旆原田膺膺俯营川陆鱼盐所聚蝗飞火灭还珠去虎子民辑悦建兹城宇大厦耽耽聽政之所祠堂石殿坐灵攸处【阙字】春秋兮祭祀不阻

溧阳侯陶谦墓在溧阳县

考证後汉书献帝兴平元年溧阳侯陶谦卒且葬张昭哀之其词曰猗欤使君君侯将军膺秉懿德允武允文体足刚直守以温仁令舒及庠遗爱于民牧幽暨徐甘棠是均憬憬夷貊赖侯以清蠹蠹妖寇匪侯不寧唯帝念绩爵命以章既牧且侯啓土溧阳遂升上将受号安东将平世难社稷是崇降年不永奄忽殂薨丧复失恃民知困穷曾不旬日五郡溃崩哀我人斯将谁仰凭追思靡及仰叫皇穹呜呼哀哉观张公辞意则陶侯之贤可想矣

吴丞相万彧墓在溧阳县南五十里惠德乡银方山下考证吴志孙皓宝鼎元年彧为右丞相

凤凰元年被讪忧死

吴甘宁墓在直渚山下

考证伏滔记吴将甘宁墓在直渚之下俗云墓有王气孙皓恶之凿其後为直渚

僊翁葛玄墓吴太极左僊翁葛玄墓在句容县西南一里郡国志云句曲有葛玄家

诸恪墓旧府志及句容县志皆言在句容县石子岗今考恪墓寔在城西南

考证恪仕吴累官至州牧为孙峻所杀葬石子岗先是童谣曰诸葛恪芦苇单衣箴钩落于何相求成子阁成子阁者反语石子岗也建业西南有长陵名石子岗今清凉寺侧亦有石子岗峻杀恪处非句容也详见石子岗下

晋山简墓在乐游苑内【旧志】

考证晋永嘉六年征南将军荆州刺史山简卒归葬建康真武湖南覆舟山之阴

温峤墓初葬豫章朝廷追思之乃为造大墓还葬元明陵北幕府山之阳

考证按晋书峤拜骠骑将军开府仪同三司散骑常侍封始安郡公初葬豫章後朝廷追峤勲德将为造大墓于元明二帝陵之北陶侃上表愿停移葬诏从之其後峤妻何氏卒子放之便载丧还诏葬建平陵北即是峤妻何氏墓非峤墓也

郭璞墓真武湖中有大墩里俗相传曰郭璞墓

考证按晋书王敦加荆州牧敦将举兵使璞筮璞曰无成敦怒收璞斩之时在武昌或归葬于此未可知也世传璞墓非一恐未可执此为是

卞壺墓在冶城

考证晋苏峻之乱尚书令右将军卞公壺力疾率厉散衆及左右更数百攻贼苦战死之二子眕盱见父没相随赴贼同时见害并葬冶城义熙间盗发壺墓尸僵鬓发苍白面如生两手悉拳爪甲穿達手背安帝诏给钱十万以修莹兆齐梁续加修治【齐任彦升代綏建太守卞彬谢修墓啓云臣彬啓伏见诏书并郑义泰定勅当赐修理臣高祖晋故骠骑大将军建兴忠贞公壺坟莹臣门绪不昌天道所昧忠邁身危孝积家祸名教同悲隱沦惆悵而年世贸迁孤裔沦塞遂使碑表芜灭丘树荒毀狐兔成穴童牧刍歌感慨自哀日月纏迈陛下弘宣教义非求効于方今壺余烈不泯固陈力于异世但加?之渥近阙于晋典樵采之禁远流于皇代臣亦何人敢谢斯幸不任悲荷之至】南唐于墓所建忠贞亭穿地得断碑徐锴为之识宋朝庆历三

年叶公清臣改忠孝亭元佑八年曾公肇为堂绘壺像其中列诸祀典为之记建炎兵革碑毁不存史公正志取曾公记重刻石【记云江宁府之天庆观关冶城地也有晋卞忠贞公墓在焉按公讳壺官至尚书令右将军苏峻之难与其二子力战死之諡忠贞葬冶城後七十余年盗发公墓尸僵如生鬢髮苍然爪甲穿达手背安帝赐钱十万封之梁人复毁武帝又加修治李氏有江南建忠贞亭于其墓比穿地得断碑公名存焉徐公锴实为之记本朝庆历中知府事龙图阁直学士叶公清臣又封墓刻石表之改亭名曰忠孝後五十年余来守是邦即亭为堂图公像其中列之祀典春秋祠焉或曰将军死绥职也自古仗节死难之臣衆矣何独祠公哉余曰不然晋自渡江崎岖百年王敦苏峻桓温父子相继称兵内侮其弱甚矣敦峻之乱自刘隗刁协庾亮启之然寇至辄遁王导亦避峻出奔数人皆执政大臣或元舅故老一时之望而仓卒之际委主于贼苟求自全况其下者哉此无它自西晋以来清谈胜而节义废故学士大夫不以苟免为耻公于是时独能见危授命破家为国其过人远甚矧公刚烈鲠直见于平生王导贵重虽天子犹卑下之而公数攻其失可谓柔不茹刚不吐者矣至于当官干寔以矫革放诞敦崇名检为任其志岂苟阿时好以取容流俗者哉及亮之召峻举朝知其不可而莫敢正言公独固争不从卒蹈其祸盖其始终大节如此异乎匹夫之勇効死于一旦者矣虽更万世闻其风者犹将感激奋厉想见其为人况神灵所依拱木犹在祠之所以慰忠魂于地下兴节义于坏俗岂苟然哉在礼以死勤事则祀之历代之制贤臣之墓刍牧有禁维公所立寔应二法况夫远论随会见思九原近稽巡远血食双庙则公之庙祀夫何歉哉堂成宾属曰愿有识余不得辞迺并着所以祠公之意使来者有考云左朝请大夫充宝文阁待制知江宁军府事曹啓记曲阜文昭公以元佑八年自彭城镇建业明年移河间经建炎兵火记刻久失之见于庙壁後七十有六年得番阳章甫隶而移之石乾道四年三月壬申右朝散郎直秘阁江南东路转运判官韩元吉题左朝散郎直显谟阁权发遣江南东路计度转运副使公事兼本路劝农使赵彦端左朝请郎尚书户部员外郎總领淮西军马钱粮专一报发御前军马文字叶衡左朝奉郎充集英殿修撰知建康军府事充江南东路安抚使马步军都總管兼行宫留守司公事兼沿江水军制置使史正志立石】嘉定四年黄公度建忠孝堂冶城楼于墓侧【马公之纯诗当时风俗尚清谈笑道公心瓦石含临难此曹皆处女惟公一个是奇男一门忠孝真难得六代衣冠孰与参墓草没头人不见令人惆怅极无堪南川曾极诗握节顔公拳透爪归元先軫面如生晋陵发掘今无主独有忠魂占冶城

钱汝元诗哀哉战死国门边忠孝千年独两全盖有完躯保妻子谩谈奏凯说縻捐北谷罗愚诗节义之风古所褒清谈于晋视如毛百年王谢丘墟了惟卞将军墓最高】详见冶城楼忠孝亭忠烈庙

谢安墓在城南九里梅岭岗

考证汉晋纪事云谢安墓前惟立一白碑当时谓难述其功德耳按南史齐豫章文宪王萧嶷薨郡吏南阳乐蔼与右率沈约书请为碑文荅曰郭有道汉末之匹夫非蔡伯喈不足以耦三絶谢安石贵族之台辅时无丽藻迄乃有碑无文盖谓此也安墓旧在城南梅岗南唐书云梅颐岗相接处即谢安墓【野亭马公之纯诗中兴江左百余年人物谁如太傅贤桓贼寻常思问鼎苻秦百万已临边笑谈解折奸雄锐指顾能摧敌阵坚平昔经纶才试此依依賫恨向重泉】

王祥墓在城西南八十里化城寺之北有断碑

卫玠墓在新亭东去城一十里

考证玠字叔宝河东安邑人以天下大乱遂扶老母将家南行至豫章以王敦非纯臣而不久留来向建业京师人士闻其姿容观者如堵卒年二十七葬新亭东今在县南十里时人谓看杀卫玠

顏含墓右光禄大夫西平靖侯顏府君葬靖安道旁考证晋顏含乃唐时真卿十四世祖也得古碑于靖安道旁乃李闳及顏延之文墓不知所在君讳含字弘都琅邪临沂人春秋以降战国以前贤智比肩备于载策昭穆次序上至顏?汉末丧乱旧谱沦亡自青州使君以上不复详具祖欽给事贞侯父默汝陰太守学素相承有声邦党君幼稟贞粹长而好古睦亲之誉发于羈贯每读书见孝友通灵之事辄凄然改容以为人神相与何远之有但患人心浇伪自絕于神耳苟能无以伪杂真神其舍诸修已立诚尽欢就养训行闺门义达州里久要心许之信夷险不爽正冠纳履之嫌终始不蹈兄畿患亡更生君弃絕人事蓬首屏气以就嗆养者十有三年次【阙一字】繁欽孙老而失明合药须髯蛇胆有青衣童子持裹授君出户化成青鸟飞去本州辟不就镇东琅邪王参军事过江累迁东阁祭酒朝议谓君正性端素学行通深有命太子中庶子转黄门侍郎本州大中正封回县侯转侍中吴郡太守事停还除侍中国子祭酒加散骑常侍光禄勳以年逊位就加右光禄大夫门施行马特赐牀帐被褥四时致膳固辞不受冯怀欲为王导降礼君不从曰王公虽重故是吾家阿龙君是王亲丈人故呼王小字王处明君之外弟为子允之求君女婚桓温君夫人从甥也求君小女婚君竝不许曰吾与茂伦于江上相得言及知旧擦泪叙情茂伦曰唯当结一婚姻耳吾岂忘此言温负气好名若其大成倾危之道若其【阙字】败也罪及姻党尔家书生为门世无富贵终不为汝树祸自今仕宦不可过二千石【阙一字】婚嫁不须贪世位家时议者以君审裁将以应军司之选君遽告蔡謨曰此非轻弱所宜尸泰羯逆方炽当保国养民以俟事会想爱人以礼宜寝此言王相闻之卒不授督统之任謨秉君此言终不唱讨贼之计在朝正立不昵权豪及致仕?居长子髦解職视膳中子谦躬率田桑中外莫不取给阖门静轨廿余年九十三薨遗命素棺薄歛吉凶官饰一无施列天子嗟悼诏赐墓田諡曰靖侯礼也停柩在殡邻家失火三子抱柩号惶分同灰烬焱燭垂及欬然顿灭论曰君平生素行既感达幽灵终殡在堂又获福异岂神祇保佑以显淳德乎闕托姻顏氏颇识旧闻与君二子髦约采集言行而着此传铭曰嵎夷导日岱方禋春星离望合水别浸邻少阳畜德苍祇效神孕僊字圣诞智息仁洙上道奥稷下儒渊乃昔宗林倾席曜筵升门取偶接室称贤闕则遯哀?亦抗宣犷彼琅邪寔惟海宇憬属之罟邪临朝儼载济越师大淹秦旅谁其来迁时闻远祖青州隐秀爰始直居内辞鼎府外康邦闕建节中平分竹黄初刑清齐右政偃营区葛峰明懿平阳聰理或荐公庭或登宰士列美霸朝双风千里华萼之茂於昭不已博士渊退再逯儒躬贞子七穆比世称盛无忝汝陰有伟安定舍人攷敏亦元储命靖侯潜德信岂在明言则侧幽叹寔聳灵仁亲之宝大孝之荣官必凝绩学乃敦经随难蕃霸持安閼掖扶元陟帝翼成复辟忌满裁婚鑒冲贬石望年静驾乐恬延历三祖连光衆門稟教于时列孝克端殊操洁景衡陰湮心理奥任不穷秩是谓高蹈山曾木【阙一字】冑积亥?永惟世【少一字】思树辞林碑表有毀策素匪任诵灵坟阿长寄风音晋江夏李闳

字弘模传曾孙宋金紫光禄大夫赠特进延之字延年铭大历七年岁次壬子夏四月甲寅十四代孙唐金紫光禄大夫前行抚州刺史上柱国鲁郡开国公真卿书重建于旧龟趺上

史万壽墓在溧阳县东北三十五里

考证晋书万壽为安南将军蔡州刺史

史爽墓在溧阳县东北十五里

考证晋书史爽为冠军将军

马训墓在溧阳县东北三十里【旧志】

考证晋书训为南海太守

吕游墓在溧阳县东北五十里【旧志】

考证晋书游为尚书起居郎庐陵太守

史光墓在溧阳县东南四十里

考证晋书光为中书侍郎

史宪墓在溧阳县东北五十里

考证晋书宪为尚书山陰侯 史嶷撰神道碑云伊昔有?道德资始名列五帝泽流千祀文舍伯邑武兴太史官有世功春秋所纪卫尉畴嗣孝成以康将军树绩光武其昌事列盟府功书太常源分陆海派别三江懿彼侍中飞纓殿内为王之伯熙帝之载左貂右蟬切问近对八舍攸履七车不昧散骑帝友朝夕进规奉輿肃事赞道攸宜有济之论兼濬之仪献替之美复在于斯桓桓积石允文允武外擅爪牙内为心膂气逸南仲才高召虎作师之贞爰誓其旅豫章太守人之领袖如玉之贞如松之茂共理天下实资时秀良二千石抑非虚授惟君挺生材术纵横黄裳元吉白贲永贞荆岩植润汉水腾明是谓家宝膺兹国桢英英学艺为郎满岁紫帟趋荣青缣沐惠王谭练习郑泰才计持寔有章大猷无替悠悠广熙南海之湄言典斯郡远于将之变其风俗镇以宣慈人斯攸赖吏不忍欺列郡之政兹焉为盛开国承家大君有命山川光锡圭组辉映是曰懋功往哉惟敬重此召望期诸栋隆初欣郑鹿奄叹虞鸿麟伤孔子马思滕公死而可作善始令终言式其墓岨山之路如斧载形广轮为度委鬱松檟苍茫草露万古同悲千春罢曙猗欤云仍世岂乏贤不忘其本愿述其先陆家茂德潘氏流泉【少一字】声懿【缺】日月俱悬【唐景龙四年所作其碑字多磨?】

史雅墓在溧阳县东六十里

考证晋书雅为散骑常侍

史辉墓在溧阳县东六十里

考证晋书辉为积石将军

吕员墓在溧阳县东北五十里

考证晋书员为安西将军南蔡州刺史

周琛墓在溧阳县西南三十里

考证晋书琛为遂安太守

纪瞻墓在句容县东南二十五里【旧府志云在县一里县志云在东南一十五里府远而县近今从县志】

考证晋书穆侯讳瞻有宅在乌衣巷今有古碑在县圃易并堂碑字磨灭仅辨其额云二日故仆射散骑常侍大将军开府仪同三司纪穆侯之铭後有胡克充跋未详何代人字漫不可辨知县山阳真元弼题云纪思远之碑自东晋明帝时逮今元丰癸亥岁仅千余年可谓远也已然风霜剥裂字皆漫灭惟题额存焉石亦断而为二僵仆于道旁几为农夫野老所坏故置之县宇之东轩屋壁间盖以其古物可贵尔後之好事者愿常护之勿使毁也知县?城张偁题云元丰癸亥邑令山阳真公元弼取纪穆侯碑?东轩壁间且识岁月後百三十四年宝庆丙戌?城张偁得之邑後圃榛棘中拂尘而观题额尚存因诵古物可贵护使勿毁之语益信前辈所谓风霜湮沦磨灭散弃于山崖虚莽未尝收拾良可惜也初明帝引穆侯于广室论社稷之臣屈指君便其一班班史册观此则铭章颂美又下一等遂买石作趺移置于易并堂左

宋谢涛墓在上元县土山

考证净名寺得古碑云宋散骑常侍谢涛元嘉十七年葬于扬州丹阳郡建康县东乡土山里

王夫人墓在土山

考证大明七年夫人琅邪王氏合祔于土山里谢涛之墓有古碑可考夫人之祖曰献之父曰静之

冥漠君墓在东岗

考证宋书元嘉七年彭城王义康修东府城城堑中得石塚为之改葬东岗使法曹参军谢惠连为文祭以豚酒不知其名字远近故假为之号曰冥漠君【文云元嘉七年九月十四日司侍御属领直兵令史统作城录事临漳令亭侯朱林具豚醪之祭敬荐冥漠君之灵忝摠徒旅板筑是司穷泉为壑聚壤成基一椁既啓双棺在兹舍畚凄怆纵锄漣洏刳灵已毁涂车既摧九筵糜腐俎豆倾低盘或梅李盎或醢醢蔗传余节瓜表遗犀追维夫子生自何代曜质几年潜灵几载为壽为天寧顓宁晦铭志堙?姓字不传号冥漠君永垂千年 马公之纯诗经营东府漫纷纷掘土城壕得古坟但见双棺垂欲朽不知何世了无闻遂令移殡东冈上仍与号为冥漠君万事到头成幻?祭时犹读惠连文
虞部杨公备诗柴垒牢壕见古坟元嘉东府惠连文可怜名字知音少只使双棺万古闻】

宋宗愨母郑夫人墓在秣陵

考证皇佑中金陵发一墓有石志乃宋宗愨母夫人墓有志无铭不着书撰人名氏其後云谨牒子孙男女名位婚嫁如左盖一时之制也按愨本传与此志历官终始不同传云孝武即位以愨为左将军累迁豫州刺史监五州诸军事讨竟陵王诞入为左卫将军废帝即位为宁蛮校尉雍州刺史卒此志乃大明六年作云为左卫将军监交广二州湘州之始兴冠军将军平越中郎将广州刺史始迁豫州刺史监五州军事又为散骑常侍左卫将军领太子中庶子荆州大中正而传皆略之愨南阳涅阳人而此志云涅阳县都乡安衆里人又云岁于秣陵县都乡石泉里都乡之制前史不载

谢惠连墓在上元县本业寺相近

考证唐保大中里人孙熹等尝建碑【南谯张晋孙诗几年梦草句难成一日春风草又生来谒荒坟空展转卜塘幸有谢公名】

齐巴东公墓在栖霞寺侧有墓碑字皆不可辨其额云齐故侍中尚书令丞相巴东献武公之碑

齐海陵王墓在金陵

考证梦溪笔谈曰庆历中予在金陵有饕人以方石镇肉视之若有镌刻取石洗濯乃齐海陵王墓志谢朓撰并书其字尽如鍾繇可爱予携之十余年文思副使夏元昭借去托以坠水

齐王孝恭墓在溧阳县东南二十八里

考证齐史孝恭为散骑常侍

梁始兴王墓去城三十里

考证南史梁始兴王萧憺谥曰忠武墓在清风乡黄城村有石麒麟四及神道碑云梁故侍中司徒骠骑将军始兴忠武王之碑

安成王墓去城三十八里

考证梁安成王萧秀字彦逵谥曰康墓在清风乡甘家巷有石麒麟二石柱一神道碑二题云梁故散骑常侍司空安成康王之神道又南史云佐史夏侯亶等表立墓碑志王僧孺陆倕刘孝绰裴子野各制其文欲择用之而咸称寔录遂并建于墓今存者二其一已磨灭其一字画面有可辨乃孝绰文也

临川王墓去城三十里

考证南史临川王萧宏字宣逵谥曰靖惠其墓在北城乡有石柱碑二题云梁故使黄钺侍中大将军扬州牧临川靖惠王之神道

吴平忠侯墓去城三十五里

考证南史梁吴平忠侯萧景字子照谥曰忠墓在清风乡花林村之北有石麒麟二石柱一题云梁故侍中中抚将军开府仪同三司吴平忠侯萧公之神道

建安侯墓去城三十五里

考证南史建安侯萧正立谥曰敏其墓在淳化镇西宋野石柱塘有石柱二题云梁故侍中左卫将军建安敏侯之神道

南康简王续墓在句容县西北二十五里

范府君墓梁招远将军临川王国侍郎范府君墓在溧阳县东北五十里

史府君墓梁散骑常侍兖州刺史史府君墓在溧阳县东北五十里【旧志】

周洪正墓在上元县东三十五里

考证梁元帝平侯景于江陵嗣位洪正谏帝不纳江陵果?洪正兄弟遁归金陵大同末洪正尝因蓍占谓弟曰国家危在数年间吾与汝等不知何处逃形及帝纳景又曰祸至矣

陈王僧辩墓在方山下

考证僧辩为陈霸先所害父子七人束以苇席同瘞一穴宣帝天嘉中故吏卫卿许亨抗表请

以家财造墓葬之

唐顏尚书塚在县东来苏乡後顏村石龟尚存淳熙十一年顏运使度重建祠堂

考证寔斋王公遂因阅县志见所载来苏顏墓属邑士高元龟访求遗迹所在得尚书墓隧于荆榛间隧门龟趺俨然如旧顏氏子孙之居是乡者出淳熙年间江东计使顏公度蠲租故籍以白元龟好义者也因屋墓前而祠之寔斋感慨忠义援笔作记推原鲁公从容就死之志其目有四继得鲁公集读之乃知鲁公之墓寔在长安今来苏之墓尚书墓而非鲁公墓也按鲁公所撰靖侯含大宗碑则知自含以下七叶皆葬金陵就七叶中言之如延之之子曰竣曰盖鲁公八世从祖皆尝历位尚书则来苏所谓顏尚书墓者岂其人耶

许司徒墓在句容县东白土奉圣寺侧今寺中有舍寺墓碑见存

史仲谔墓唐越王府东阁祭酒史仲谔墓在溧阳县东北三十里西山之前贾曾为之碑

史务滋墓在溧阳县东北三十五里

考证务滋仕唐通议大夫守纳言详见古今人表

刘府君墓在溧水县北三十五里

考证唐文艺传刘太真宣城人善属文师兰陵萧穎士为信州刺史卒葬于此

李顺公墓在金陵乡七里铺去城十二里

考证公名金全字德鏐有神道碑题云唐故开府仪同三司检校太尉兼侍中赠中书令李顺公神道

张懿公墓在金陵乡石头城後去城一十里

考证公名君咏字德之有神道碑题云大唐顺天翼运功臣特进守太子太傅上柱国清河郡开国公张懿公神道

高越墓在栖霞寺旧门外北山之麓去城四十五里有石题云侍郎高府君墓南唐人也

韩熙载墓在梅颐岗

考证熙载病卒後主谓近臣曰吾竟不得熙载为相乃追赠平章事谥文靖葬于此

荆将军墓在溧水县南四十五里因羊左事始知有荆将军墓

卢循道王师乾墓在句容县东一十里

菖府墓西平将军杜陵侯菖府墓在句容县西七里有碑

双女坟在溧水县南一百一十里

考证双女坟记曰有鸡林人崔致远者唐乾符中补溧水尉尝憩于招贤馆前有塚号曰双女坟询其事迹莫有知者因为诗以吊之是夜感二女至称谢曰儿本宣城郡开化县马阳乡张氏二女少亲笔砚长负才情不意为父母匹于盐商小竖以此愤恚而终天宝六年同葬于此宴语至晓而别

元懿太子攢宫

高宗皇帝建炎元年五月十三日申时生太子三年车驾在建康行宫太子得疾未瘳有金香鼎置于地宫人误触之仆地有声太子应时惊搐不止上命斩宫人于庑下少顷太子薨寔七月十二日也攢于府城内西冶城後铁塔正觉寺法堂西偏小室中绍兴元年二月二十九日三省同奉圣旨给降度牒一十道付建康府专一应副修葺月轮军员兵级防护本地分官旬具平安状申府春秋差官祭享

杨忠襄墓在南门外

考证建炎元年江宁府禁卒周德叛溧阳县卒起应之杨公邦乂为宰谕止之不聽乃设方略围捕杀之且檄隣邑共入讨贼贼以故不得逞卒就擒事闻于朝廷本府通判三年十一月金犯建康官吏皆降敌邦乂独不从骂敌人口不絶宁作赵氏鬼不作它邦臣敌剖其心以死【详见表及传】绍兴中游公九言作墓道碑庆元初赵师晨立石【碑云所贵乎大丈夫者为其有耻心也孰不好生而畏死宁死弗顾者为其所以自立于天地间有重于生故也如其不耻则大丈夫不足为难而名义不重矣建炎巳酉金人寇江驻军采石先是车驾幸越杜充以宰相總诸道兵镇江左前执政李昉供饗事顯谟阁待制陈邦光守建康充懦不能战以军六万人列江岸乃闭壁莫敢出敌谍知遂渡江我师自溃充与麾下数十降敌北去敌入建康昉先降邦光欲弃城度不能遁亦降通判杨公邦乂独不从大书其衣裾曰宁作赵氏鬼不为它邦臣授其仆曰持此以见志吾死矣昉邦光惭谢犹强拥公上马即野次俱见敌帅四太子者命之拜公叱曰我不降何拜敌莫敢遏纵归明日遣其将张太师谕公授以旧官公以首触阶陞求死金人惊止之徐曰公所守固高然势去矣第归审思之明日复来公亟移书其将曰世岂有不畏死而可利动者幸速杀我又明日四太子觴二降人于堂上乐作召公立庭下公注视昉邦光曰天子以若扞城贼至不能抗又不守节更与共燕乐尚有面目见我乎敌取纸书死活二字谓曰无多言即欲死书死字下则顾旁吏有簪笔者跃起夺而书曰死于是敌皆动色又使引去明日再以见公遥望四太子遂大骂极口丑诋呼天言天宁久假汝行磔万段尚

安得污我敌怒使人疾击挺交下公骂不絕口见杀剖腹取其心明年敌去州以事上闻诏贈直秘阁官其子二人即死旁为墓立庙賜謚忠襄九言尝謂节义者国家之元气也人无元气则死国无节义则亡朝廷有伉直之风则遇变多仗节之士大丈夫临难不可免遂以身死之所以立君臣之义明逆顺之理使任人之事者晓然知废义背理决不可以立乎天地之间其有功于名教也大矣呜呼我国家涵养二百年自熙丰一坏蔓延以至政宣变起仓猝当时京师不屈仅得数人而繼之者公也使靖康之难一时在位人人如数公金人安得谈笑而移城阙又使靖康之难无公等数人南渡何以中兴然则有国家者平时獎崇正直扶持人心其可忽乎以建康论之杜充輩皆宰执侍从相倡降贼公以州佐貳乃挺然若此则官职又可轻乎傥朝廷以充之柄授公之手城未必遽?今既败事在公报国之义固已无负而朝廷所失何如哉此又为古今忠义之士所深叹也公吉州人政和乙未进士後六十九年建川游言为吏金陵再拜墓道嗟叹而为辞曰山云起兮陰木肃风兮萧森骨荒榛兮頽隧野鸟怨兮清音噫丙午兮燕安蕩荐绅兮多盘系苞桑兮弗戒论旧好兮开边衅生兮召戎倾天地兮尘蒙絜承平兮百载莽夷门兮庙宫我踰邠兮梁山蛇洊食兮江干拥貔貅兮首鼠纷推拜兮後先独立兮慨陈人自靖兮此身宁为鬼兮赵氏肯涅緇兮金庭肴醕饲兮苟哺弗自知兮貌頽握玉麟兮拜强敌曾莫嗔兮丧心岂曰余兮独死汝尸坐兮偷生振英声兮堦下气烈动兮清宁凛名义兮身世九鼎重兮一羽轻翳翳兮幽藏頽阳照兮山荒发毛爪齿兮一世同腐庙貌圭衮兮千古之光春秋兮代谢勿替兮烝尝庆元戊午春修职郎建康司户参军赵师农立石】

王舒王墓在半山寺後

翰林給事張唐公墓在上元縣長寧鄉呂惠卿作志資政管元善墓在句容縣下蜀鎮柔信鄉之原

白時中撰志銘【銘曰管以國氏世遠而分龍泉着姓自公有聞公姿粹秀渾然德器種學績文川流岳峙暨于從政激濁揚清有施有守偉其休聲濟是顯融持橐珥筆獻替絲綸左右密勿出殿方面入濟廟堂謀猷來告愍恤百章惟其令名詔于後裔勒茲堅珉幽宮永閟】

楊忠介墓在上元縣鍾山鄉

考證楊宗閔字景齊代州崞縣人太傅和義郡王存中之父也屢立戰功建炎元年十二月金人犯永興衆以永興無備勸宗閔去宗閔曰吾結髮從戎蒙國厚恩行年六十有七唯有死耳他非所知明年正月城陷血戰而死贈太師魏國公謚忠介其子存中招魂葬于鍾山敷文閣待制劉一正爲之銘【楊爲顯姓世澤以滋由漢及唐別派分支公家鴈門奕奕有聞儒學相授位微德尊公曰丈夫志尚各異我必以功自見于世惟時夏童跳梁干紀躡我西陲几無寧歲公初即戎氣已蓋衆雙帶兩鞬射則命中鏖戰疆場蹂踐斥鹵固敵是求計不返顧公身居先將士內激凡師所臨當百以一料敵制勝不愧古人機變橫出捷若鬼神晚佐永興遭時艱虞連城不守援絕勢孤人或謂公子盍去諸公曰國恩必報以軀帝爲嗟悼告弟疏榮孰慰忠魂公有?孫孝孫翼翼位在九棘勲名孔昭恭懼靡貳光大厥家未見窮已天其賚公孫又有子

】

叶状元墓在上元县宣义乡

考证叶祖洽字惇礼熙宁三年廷对第一官至徽猷阁直学士太中大夫政和七年四月六日终于真州寓舍诏赐赙加等赠宣奉大夫郡县葬事以九年正月二十五日合葬于江宁府上元县宣义乡鴈门原夫人之墓上官均撰志铭【铭曰惟士狃常文弱而弊纂组葩华寢失根柢神宗独运以古为制章明六经策以经济惟公哀然眇视侪类放词汪洋克当帝意声名伟如多士嗟喟峻陟蓬山炳焕郎位出殿侯方入联近侍天官之宗权衡百吏帝咨其人惟公之试有谋必陈有作必遂峙立孤寡弗倾弗倚俗方喜同公则弗随衆为逊?公以简持安于誉诽自信不疑投间缀书研道之微尚期奋飞为国之毗孰云其亡士友嗟歎年岂不多大位克跻有爵其中不究其施勒铭幽宫以永其垂】

太师秦桧墓在牛首山去城十八里

大资秦梓墓在溧阳县南屏风山

少保威定王德墓在上元县锺山之原

傅雱撰神道碑【铭曰赫赫炎宋中兴丕基荡攘蛇豕以及鲸鲵公自熙河提戈崛起感会风云鹰扬万里靖康之初手擒黠寇大振天声名闻圣主筮虎跳梁震惊汉沔戎略一施二逆就禽昱亦拥衆盗据济上亲梟其首风威远畅成挟强援醵张淮蔡公谈笑间星奔兽骇遇寇江夏锋如蝟芒转战千里败之池阳淮海震扰大驾南巡招怀降附独成一军急趋东吴觐靖国难贼压和垒民坠涂炭求援于公乃麾备将昱彦授首军容益壮傅等造变以逞异图公奋袂起期于诛鉏逆臣既擒天子复辟乾维再张公与有力继闻代马南渡武昌卷甲而趋直扼其吭敌进无所其退惟艰势益穷蹙歛军北还公奏凯旅将迎隆佑未達頼上命诛妖寇啸聚贵溪曰王念经僭窃大号恃险凭陵师涉彭蠡江等游魂嬰公之锋如火燎原寻历鄱阳鄱阳危急文舜猖狂矢石四集公冒重围敌人褫魄指顾之顷凶渠尽获爰乘两势搗念经垒枹鼓一鸣巢倾卵毁控扼天堑屏蔽京口羣议退保公请死守仲威时衆翱翔杨土公手擒之不烦一旅青蹂江需公乃拔劔破之崇明遏其?焰琳刼其衆归身逆徒不容旋踵磔死当涂逆雏推麟悉衆淝水公往驱之曾不折箠应援西颍公方整旆羣寇谍知望风奔溃就袭蕲邑虎踞宿城耶律面缚一尘不惊敌人精甲踰十万衆长驱江浒利与我并于时分兵将保江东公请先登以折其冲独麾虎旅夜涉采石父子捐躯誓死于敌贼陈柘臯旌麾塞空公亲合围首挫其锋繫公之胜衆方堵进名王贵酋歼夷殆尽由兹一战敌势大摧不敢南乡饮马长淮惟敌之来其势桀骜视公凜然乞盟请好跻时承平疆场肃靖舍爵策勲节旄是命当宁悯公久膺烦剧聽解军务俾就安适圣恩隆厚其谁公如總符江陵雍容甚都卧镇上游控制荆楚忽焉沦丧失兹召虎讌闻西来上心震悼昭示眷怀锡之涣号兰砌芬芳勲庸益着高大其门绍隆厥绪有宋功臣翊戴皇极用诏後昆刻诸金石】

忠壮李节使墓在溧阳县西北青龙山之南

考证邈字彦思临江军人靖康元年八月诏以邈知真定府事邈至守备单弱金人入寇已未兵薄城下辛酉敌围城邈率其麾下且战且守而援兵不至十月戊戌城陷邈巷战不克将赴井死左右持不得入斡里雅布胁邈拜不拜以火燎其须眉及两髀亦不顾因问邈困境内民使击我谓我为贼何也邈曰汝负盟所至掠吾金帛子女非贼而何卒不能屈乃拘于燕山府久之欲以邈知沧州笑不答且说之曰天下强弱安有常吾中国适逢其隙尔汝不以此时归二圣及两河地岁取重币如契丹以为长利强尚可恃乎敌魁其言命邈祝髮左衽邈愤诋拒甚力乃以槌击邈口流血邈复吮血嚙之翌日自去其髮为浮屠敌于是大怒遂击邈死时建炎二年也绍兴二年招魂葬此叶参政梦得为之铭官至青州观察使真定府路安抚使赠昭化军节度使谥忠壮

四厢王节使墓在上元县鍾山鄉棠梨山

考证王玮字君瑞陇西成纪人绍兴中屡立战功官至四厢都指挥使赠节度使陆敦臣撰志铭碑字断缺

赠节度使盛新墓在上元县宣义鄉武冈山

考证【墓记略云盛新亳州人以剿贼功赐承节郎後因金兵犯境结忠义三千人随张俊护驾南渡转官至武功大夫差充建康府中军统制次差充太平州采石镇水军统制绍兴辛巳金主亲率兵入寇屯兵和州谋自采石渡江时都统制王权在建康府稟议军事存留张提举谓军一行事务官游奕军张统制在石跋岸备御见金主于台上亲麾红旗进发人船自北岸径行冲突南岸盛新贾勇将士以海鳅船一十只进先破敌敌船覆溺杨林岸下时中书虞舍人因宣谕江上至采石登山观看战阵发使收兵保守南岸申发报捷新蒙恩加官至中亮大夫正任濠州团练使淳熙二年追录前劳特赠福州观察使继赠昭庆军节度使】

待制钱端修墓在溧阳县南上墟村

考证端修讳时敏溧阳人擢政和二年上舍第绍兴初监修行宫官至中大夫敷文阁待制李公处全志其墓【苗傅刘正彦之变吕忠穆公颐浩以签书枢密镇金陵谋帅师勤王公时为修行宫官属力赞之预草请复辟表置怀中一日出以告忠穆公曰艰危如此公以见执政处方面讨叛职也勿居它人後忠穆耸然即日提兵趋行在所表语有田太母以柔静之身高居严邃皇帝以幼冲之质渊默临朝陛帘之间天地相隔万一羽书交至变故乘时则迫切之虞可胜道哉惟念神器之大祖业之重不憚再四请复明辟亲揽万几以安衆心然後思致寇之由奋拨乱之略据东南形胜以图西北期以岁月中兴不难致矣张魏公浚时以防遏使留平江同勤王之举得表俾誉本传四方读者增气发运副使吕源览之泣下曰国有人焉可无忧矣公独以不获执鞭弭从诸军周旋为恨及事平诸司表贺往往多出公手公始入朝见大臣于政事堂首言今军旅方兴戎幕所辟置要须智谋策略之士否则仗节死义之人今蜀僚幕

中非奔竞无耻奴事诸将为求官射利之计则阴负咎累絕进取望者苟禄自私徼幸文饰而已至于仓卒见敌欲决疑定议则托儒为奸缘饰前代欺惑主将惟务退缩自为身谋国家何赖焉乞悉从堂选以革前弊切中时病识者韪之】

龙学钱元英墓在溧阳县燕山之原

考证元英讳周材溧阳县人乡举第一登建炎二年进士第尝为孝庙潜邸旧僚再掌内外制官至龙图阁学士尤公袤撰志铭【铭曰堂堂钱公一世之师腾寔蜚英自其少时畴不工文体弱气萎公以道德养其华丽雅健雄深盘诘争奇士以之显器识或卑公所践履明白坦夷在险弗渝在涅弗淄有文有行于政或迷公之应事如烛与龟所居可纪所去见思校讐西山珥笔右螭进登掖垣遂掌训词大册雄篇星晶日晖常杨燕许厥问四驰帝在初潜公始受知执经王府四阅岁朞帝既践祚公方奉祠曰予旧学其亟来归公来自西天子曰嘻久不见卿乃今未衰劝讲华光旋陟琐闼从容谓公卿当辅台棘人桀桀俄反故栖再赐之环终以疾辞皇揆方深我志弗移遂上印绶如脱马羈养浩丘园左书右诗胷奇陈陈有蓄未施人傒文明天不邀遗燕山峩峩溧水縹之有崇其岗自公兆之懿德清芬世其绍之】

待制张孝祥墓在上元县清果寺侧

考证张孝祥字安国举进士第一官至显谟阁学士本历阳人未第时多留建康隆兴中尝为留守後葬于此【乾道六年三月郡人朱旷拜墓下留诗瘦马踏乱山盘折度村坞处处花柳明耕锄徧壠亩麦苗见肤寸拳扁方出土乃知去岁旱布种坐迟暮夏租竞如何未免催迫苦投鞭扣萧寺来谒张公墓再?拭泪行畴昔感知遇盛年厌纷华骑鲸上天去校讐三洞章飞仙自俦侣笑唾人间世一品竟何补世人患死生未?死生故是性本不灭来往若寒暑休矣勿复言僧窗睡春雨 绍熙庚戌中秋後三日门人武陵董道辅拜墓下留诗晓出白下门瘦马踏秋色鍾山度苍翠慰我远游客暮投清果寺花草献幽寂长廊静无人落日照西壁平生张于湖万里去一息翩然九州外汗漫夸鲸脊乾坤能几时安用较顔跖文章失津梁所念斯道厄夜阑耿不寐搔首聽萧瑟怀人感西风翁仲守孤柏 上元县尉操闕名拜墓下留诗古塚谁来香一瓣断蓬衰草日斜阳至今唯有文章骨埋入幽泉土也香】

张防御保墓在江宁县凤台鄉松林庄之原

考证保字和叔太师循王俊之母弟也佐兄立功累官至拱卫大夫荣州防御使留建康十五年绍兴二十六年七月终于私第年六十六【铭曰黄帝子挥始制弓矢以功赐性命张为氏自仲孝友世不乏贤猗欤循王克享其全公以母弟实侍戎陈攻坚击强屡犯锋刃帝曰予嘉好爵汝縻八迁横列震耀一时归自拓臯约成偃武循王入覲留长西府公始脱胄领祠赤城时屯建业皆循王兵公居其间思所以处曰余伯氏为国心膂予敢沽誉以感衆情予敢贾勇以忧吾兄迺屏故习沉默间静晦智与能不于世竞十有五年迹不涉疑循王之忠天下益知防遏真拜戎律貳總天与善人意公且用鴈序忽尽公亦何心忧能伤人一夕古今长干之原循王所卜公其宁居贻子孙福】

赵节使彦墓在上元县金陵乡祁家山之原

考证彦字公美本祁之深泽人御前水军统制纯之父也初隶吕刚中戏下建炎初刳臂纳密书间道走谒高宗皇帝于相州遂扈驾驻吴会勤王平寇屡立奇功最後以柘臯功进七等乾道九年十一月卒于建康赠昭庆军节度使

赵總管士吁墓在句容县政仁乡慈恩寺

考证墓志云【士吁字岩老太宗皇帝第八子周恭肃王之四世孙也靖康丙午八月生于睦亲宅丁未之变公在襁褓养于乳母李氏李适梅氏相与保毓甚谨晦其姓氏绍兴己未敌请和公始得同亲王居广来归年已十四矣追念父母泯迹朔荒呜咽流涕殆不能生聪敏长厚以近属赐名授官及冠奉衡山祠禄于金陵揽形势之雄壮叹中州之榛芜谓兹土里江表淮王桀所聚且距河南地近恢复之本当道于此指日疆土还职方之旧则归父母邦不远矣故乐与军帅游谭兵家事以资异□执戈卫社计于焉谋居盖有待尔始则卜筑南郭外咫尺城闉且有清胜之趣卿贵大夫慕公高洁竞与论交车辙阗门殆无虚日公虽天性节俭然雅好宾客有解貂换酒之风居既安不事荣进朝廷尝以公行尊属近欲命袭爵主?公闻之巽谢甚力时议高之故凡奉祠者六食员外监征文禄者三而公处之裕如淳熙辛丑有以公之节行升闻上深嘉叹特命进秩积阶至武经大夫】

崔中书墓在溧阳县南泉山【讳敦诗】

李户部墓在溧阳县北下汤之原【讳朝正】

董侍郎墓在溧阳县北前马里【讳平】

李侍御墓在溧阳县西南大石山【讳处全】

魏参政墓在溧水县【讳良臣】

王宗丞墓在溧水县【讳瑞朝】

程孙墓在清凉寺後山之麓盖明道先生程纯公五世孙也讳偃孙本伊川先生五世孙寓居池州周应合为明道书院山长日请於帅府将求伊川之後人教养选择以继明道之後裕斋马公移文池州寻访太守定斋陈公谋之阖族参之公举礼送偃孙来应兹选【江东抚干兼明道书院山长周应合申照会书院为明道先生程纯公立也固将有以壽其道脉亦当思所以壽其家脉今纯公之後所至未见其人而伊川先生正公之子孙在池阳为稍衆拟欲从阊府行下池州委请通判教授于伊川先生子孙中自十五至三十岁遴选其资质可以进学者五人并礼送书院养而教之观其有立别议区处庶几为子孙者崇德象贤足以嗣续先世之旧而家脉与道脉俱壽矣更合取自指挥秦鈞判行池州回申备述通直郎新差知兴国军永

兴县主管劝农公事兼军正伯阳伯四世嫡长孙程准劄子照得明道先生子二人而端懿居长孙四人而昂居长曾孙六人其後不复可考准本位伊川先生亦二子四孙曾孙八人玄孙十二人仍孙见止十人来孙见止四人可以迁继明道者寔难其选独节之之子涛涛之子偃孙乃伊川一气之正????可为明道後节之与克家为兄弟若空一代而以偃孙为克家之孙于法亦通然不可使节之之无後也今莫若全以节之一位三世为明道先生嫡孙昂命继节之为明道曾孙溥为明道玄孙偃孙为明道来孙则明道先生之後世世有人节之乃伊川长子知宣端中第三子通判晟之第五子于通判本位即不相妨虽非礼之正而合乎礼之权可以仰称继絶之盛德尝经户部看详指定伊川先生次子通判第五子节之一位三世移继纯公之後按礼援法实为允当奉圣旨依劄付池州】偃孙年方十七自幼而孤以贫失学有母六袞无以为养定斋惻然为具衣冠而资送之既至建康山长率堂长以下告于纯公命之为五世孙以掌祠事请于府月廩四百千米四石以养其母贴占官屋以妥其居给绵绢以完其衣定课程以勉其学委堂长胡淳讲书程立本任训导如己子以时察其学之进否专留书院薰陶气质惟休澣日归省其母非休日不许出其後张山长显注意尤笃盖其监丰储仓门日尝纳劄庙堂力言此事方冀偃孙之成立以嗣家学而偃孙忽以疾终实景定二年三月也应合适归自池阳乃与胡山长立本谋具丧斂且请于府偃孙虽死而母无所依仍以偃孙存日所得之餐钱养其母终其身秋八月应合与翁山长泳谋治葬藏得地于清凉寺後山左右环抱面挹江淮咸曰吉壤委讲书李朴任其事应合泳率诸士友缟服临送更议为偃孙立继未得其人姑俟它日

义塚

四门义塚八所今为义阡绍兴巳酉天子大飡明堂诏凡敌所破州县暴骨之未斂者官募僧道收瘞建康守臣叶梦得度城四隅高原隙地各为穴以待藏在西门清凉寺之南茶山之下者二北门张王庙之西北麟蛇山之下者二南门官道之西越台之下者二东门官道之北齐安寺之西者二

掩骼记建康承平时民之籍于坊郭以口计者十七万有奇流寓商贩游手往来不与建炎巳酉冬敌既大入十一月壬戌南渡自溧水径趣浙留其国太师张真努分兵五百薄建康宰相杜充率麾下北去知府事陈邦光以城降敌由是未尽肆其虐别筑城于西南隅以居取城中器械子女金帛储之禁吾民毋得出州城明年夏回自浙东五月复至建康与所留兵合丙午入城始料其强壮与官吏以兵围守于州之正觉寺散取老弱之遗者悉杀之纵火大掠越三日府寺民庐皆尽乃拥衆去凡驱而与俱者十之五逃而免者十之一死於锋镝敲擄者盖十之四城中头颅手足相枕藉血流通道伤残宛转於煨燼之间犹有数月而後絶者官军继收复又二年乌鸢所残风雨所蚀阡陌沟渠暴骨皆充斥行者更践蹙居者杂卧起与瓦砾荆莽相半也绍兴辛亥天子在会稽秋大飡明堂诏凡敌所破州县暴骨之未斂者官为募为传老道者收瘞累数至二百则得度于是州之寺五得其隶业精勤者二十人益以贫民之饿者食而佐之度城四隅高原隙地各为穴以待藏出羨谷四百斛钱三百万以给费为籍日校其所获以时检察之人欣然皆乐效力阅十九日得全体四千六百八十有七断折残毁不可计以全者又七八万以次入于穴而城中之骸略尽十二月甲子遂瘞敌之残酷不道载籍以来未

之有也惟天子仁圣将为斯民请命于上帝而不得则犹欲及其既腐之余昔文王葬枯骨而天下归心其葬未必广也推其所葬以及其所不葬而天下如是则可以王矣秦穆公越国而伐人及其败也能封其尸君子犹许以霸天生斯民必使之生养蕃息以厚其终祸福与夺寔将聽之其曰得乎丘民可以为天子杀一不辜虽得天下不为者名之曰好生之德然则自敌荐食中国夺天之所厚而残之盖不为量数而吾天子方推其所以好生者一二而收之於後天固享之矣合此亿兆无辜之冤则亦必有闻者造物者其忍之乎凡穴深广皆二丈以其四之三藏骨其一实以土其上封皆高一丈在西门清凉寺之南茶山之下者二北门张王庙之西北麟蛇山之下者二南门官道之西越台之下者二东门官道之北齐安寺之西者二合八塚督役者兵马钤辖拱卫大夫宁州防御使张禧都巡检武翼郎王利檢察者安抚大使司準備差遣奉议郎安自求廸功郎沈正路工毕以状上尚书明年二月礼部给牒而度者华藏寺五人能仁寺五人保宁寺五人清凉寺三人壽宁寺二人

义塚之旁遂为义阡凡军民皆杂葬焉垣墙弗设牛羊践之土浅骨暴过者颡泚甚失揜骼之初意开庆己未马公光祖再镇之初惻然动心封其土繚以长垣在东门者一百五十四丈在南门者一百五十八丈在西门者一百九十八丈五尺在北门者二百八十九丈五尺为门为榜严其扃钥非葬祭不啓委上元江宁两尉綜其事选隣僧之慈愍勤事者掌之东阡则选之半山寺南阡则选之宋兴寺西阡则选之清凉寺北阡则选之永庆寺人各月支钱三十缗米一石

南北义阡系转运副使真公德秀立

建康府城内外昨於嘉定八年内民间因有死亡之家无力买地埋葬以致弃在沟壑遂踏逐到南北两门外各有空闲高荒地置立两阡差拨僧道专一在各处看管埋瘞月支僧道等添给钱米内南义阡见造屋三间于毗近殊胜寺轮差僧一员行者一人在庵专一看守早晚焚修每月本司支钱三贯米一石目今见系僧道明行者濮了茂外有此义阡见系後湖真武庙道士孙守清就行看管每月仍支米一石

鹄柱牌以江东转运司新创南北义阡为名两阡并委运管提督遇有贫乏之家欲於义阡埋葬僧行等即时放入不得稍有遏阻及乞取钱物如违许提督厅觉察具申本司追究施行所置义阡地段姑据见定地步尚狭未能开展合立定则例每名只许破一丈庶几不致多占地段有妨他人安葬所破葬地既以一丈為準又恐安葬之时广占尺

寸合行下尉司先将其地以一大界为一眼令深五尺以防他日壘灭止许於界眼内安葬所有坐向却从其便看管僧道并不许抛离如点检得不在其本月钱米更不支給所葬人姓第於簿内抄上义阡葬地如已遍满即申本司支钱取掘焚化有子孙亲属者令其自行举化其日随宜添请僧员就庵修设功德追荐葬穴不可太浅庶免他日暴露仰僧行告报定要掘深五尺

覆舟山下义塚

端平三年十二月十五日制置使陈尚书韡调兵剿敌江北战而死者甚衆遂於建康府北门外覆舟山龙光寺侧择地开二大穴甃以灰砖凡阵歿将士骸骨悉收而葬之给牒度二僧以守其塚给田百五十八亩有奇以其租入为每月供享忌日追荐之用版榜寺门【勘会当司昨于建康府城北门外龙光寺侧择地结砌矿口剿敌鏖战阵歿将士坟塚以安忠魂除给度牒二道附本寺度僧看管外所合给田与寺中每年修忌逐月供养寻呈金厅书拟忌辰欲自十二月十五日鏖战日分逐月供养欲月衙日所定田亩契勘得鍾山鄉委立中户絶见在制司收租计一百五十八亩一角四十步五分与龙光寺附近岁收小麦二十八斛二?一升米三十四斛五?六升六合欲全拨此项给据付本寺逐月忌辰之用仍牒建康府劄僧正司板榜本寺照应】

大使马公光祖任内修四义阡

东西南北四义阡各在城外死而无归者给棺槨殡焉岁久樊墙颓圯牛羊从而牧之暴骨如莽後殡者多发前塚弃枯骼而纳新枢光祖虽屡行禁止然纲维无人率为具文大使始命上元江宁两县簿尉分其责月给十八界二十贯酒四瓶又踏逐寺之去阡近者东半山西清凉南宋兴北永庆分命主僧经理营缮繚以修垣置门啓闭钥则寺僧掌之月各给十八界六贯米一石又虑东义阡之去半山远也创庵三间就寺选僧行各一名守视凡遇殡葬官给土工十八界五贯量棺之短长广狭深穴而厚封立牌标记西南北亦如之又於清凉寺西偏得地三十余亩以广西阡依山为墙自是皆无蹂躪之患凡筑墙五百八十一丈为庵一为门四共糜钱十八界四千三百余贯米七十余石

景定建康志卷四十三

卷四十四

<史部,地理类,都会郡县之属,景定建康志>

钦定四库全书

景定建康志卷四十四 宋 周应合 撰

祠祀志一

十志後祠祀何也先成民而後致力於神也功德之祀着於礼经神之居掌於宗伯詎可忽诸建康山川之灵甲於东南由古以来郊社於此者皆兴君庙食其间者多忠臣若琳宫梵宇又多僊士高僧之迹见於古今名流之所记咏者宜不诬也因而书之是亦社稷宗庙罔不祗肃山川鬼神亦莫不宁之意祠祀志所以作也诸不在祀典非有赐额者不书

古郊庙

南郊坛案建康实录晋太兴二年所筑郭璞卜立之在宫城南十余里注云在长乐桥东篱门外三里又云今县南有郊坛村即吴南郊地

考证吴大帝太元元年始祭南郊在秣陵县南十余里【吴志大帝时羣臣上奏宜修郊社以承天意帝曰郊祀当于中土今非其所于何施此重奏曰普天之下莫非王土王者以天下为家若周文王都于丰镐非必中土帝不听终吴之世郊祀庙社缺然无可纪者】晋元帝渡江大兴三年始议郊祀立南郊於巳地建武二年定郊兆於建业之南【尚书令刁协国子祭酒杜夷议宜须旋都洛邑乃修之司徒荀组据汉献帝都许即便立郊自宜于此修奉王导等皆从组议遂始立南郊于巳地其制度皆太常贺循所定唐会要晋元建武二年定郊兆于建业之南去城七里一坛之上尊卑杂位千五百神实录云大兴三年作南郊在宫城南十五里郭璞卜立之图经云在今县东南八里长乐桥东篱门外三里其县南郊坛村即其南郊也】宋孝武大明三年迁郊兆于秣陵牛头山西在宫之午地废帝复旧【尚书左丞徐爰议郊祀之位远古蔑闻礼燔柴于泰坛就阳位也建元初甘泉河东禋埋失位终亦徙于长安南北光武绍祚定二郊于洛阳南北晋氏过江悉在北及郊兆之议纷然不一又南出道狭未闻开辟遂于东南巳地创立丘坛皇宋受命因而弗改且居民之中非邑外之谓今圣图重造旧章毕新南驿开途阳路修远谓宜郊正午以定天位乃移于秣陵牛头山在宫之午地废帝即位以旧郊为吉祥复移本处】梁武帝即位南郊为坛在国之阳常与北郊间岁普通六年改作南北郊【隋志梁南郊坛高二丈七尺上径十一丈下径十八丈其外再墼四门运历图云梁武中大通五年郊祀异香三至神光五色图照满坛陈武帝人修缮南郊图坛高二丈二尺五寸上广十丈柴燎向天金陵故事云梁武帝时改作四周筑土墼宫三重便殿一所兆域数里今其

地在城东南与娄湖相近】南唐郊坛即梁故处在长乐乡去城十二里今为藏冰之所

北郊坛案建康实录在县东八里潮沟後东近青溪考证晋元帝立南郊未立北郊明帝大宁三年始议立北郊未及建而帝崩成帝咸康八年追述明帝前指於覆舟山南立之制度一如南郊【宋书云江左未立北坛地只衆神共在天郊成帝立二郊天郊六十二神五帝佐日月五星二十八宿文昌北斗三台司命轩辕后土太乙天乙太微鈎陈北极雨师雷电司空风伯老人六十二神也北郊则四十四神五岳四望四海四渎五湖五帝之佐沂山岳山白山霍山鑿无闾山蒋山松江会稽山钱唐江先农凡四十四神也江南诸小山盖江左所立犹如汉京关中小水皆有祭秩也文帝元嘉十六年有事北郊帝复下其议于是八座奏省四望松江浙江五湖?座其锺山白石既土地所在并留如故文帝立儒学館于北郊十二年尝阅武于此】宋孝武大明三年移北郊於锺山北原今锺山定林寺山巔有平基二所濶数十丈即其地【宋书云北郊晋成帝世始立本在覆舟山南宋太祖以其地为乐游苑後以其地为北湖移于湖塘西北其地卑下泥湿又移于白石村东又以为湖乃移于锺山北原道西与南郊相对後罢白石东湖北郊还旧处】梁武帝北郊为方坛上方十丈下方十二丈高一丈四面各有陛其外为墻再重陈北郊为坛高一丈五尺【晋王恭使前将军王珣入守北郊 宋元嘉中每阅武于此梁嗣徽引齐兵为寇侯安都距齐军于北郊坛绍泰中齐萧轨等渡江亦屯于北郊坛】

祿坛石按通典江东太庙门北有石文如竹叶小屋覆之宋文帝元嘉中修庙所得陆澄以为晋孝武时郊祿石然则江左亦有此礼矣或曰百姓祀其傍或谓之落星石

明堂在城东南七里不详其处

考证宋书晋元帝受命中兴依汉故事宜享明堂宗祀之礼江左不立明堂故阙焉大明五年有司奏国学之南地实丙巳爽垲平畅足以营建其墙宇规范宜拟则太庙惟十有二间以应朞数但作大殿屋雕画而已无古三十六户七十二牖之制是年五月新作明堂丙巳之地宫苑记云在博士省南【博士省在国学南国学在太庙南】

梁武帝天监十二年诏以明堂地居卑湿可量就埤起以尽忱敬
陈亡焚毁皆尽将作监大匠宇文恺量台趾丈尺写樣奏闻

晋太庙旧址在秦淮西

考证晋太元十六年二月庚申改作太庙秋九月新庙成案地志太庙中宗置郭璞迁定在今处帝常嫌庙东迫淮水西逼路至此年因修筑欲依洛阳改入宣阳门内尚书仆射王珣奏以为龟筮共违帝从之於旧地不移更开墙埤东西四十丈南北九十丈宋以後仍之至陈乃废

社稷【诸坛附】

府社坛旧在城南与江宁县社坛同处庆元元年留守张公杓移置下水门内秦淮南?风伯雨

师坛附上元县社坛在县白下门外尉司之东

记云【上元治秣陵中名北县先唐合于江宁宣孝皇帝五载号上元明年因以名邑国朝天禧间昇州为节度府中兴岳狩列于陪京一同之寄视昔为重矣淳熙六年五月承议郎赵侯来涖兹邑时丞相申国公以魁望镇北门寛大龢平百吏乐职侯素所蓄积得展布之下车之冬首治马驿财力大充弗沮弗媮顾瞻社宫岁月荒老祠宫日漫间尝寓之他所侯曰是职也宜先粤明年撰日即工以七月既望经始三旬而成其地西直台城财里所东走句曲南枕秦淮北眺锺山中为屋六楹有畸外为垣余百五十丈崇崇其坛时立爽垲云烟紫翠森列献状春秋蒔事?戟具来明宫斋庐崇饰俨雅子男邦君之祠莫与俪焉先是岁戊戌国家用太社令言制诏郡邑增社稷之禋于时百辟肃然连心盖谓风人所称祈报惟谨考儒先论勾龙弃之功与素王等故得祀徧天下嘻其重矣哉今兹坛崇恭上之诏明古之训一举而二媿具其始可书侯名伯晟字明仲笃古而文综练有官业同予第进士且俱吏吴中相乐甚书来徵吾文以记辞谢弗获?为跼蹐月而日之以谗来者俾共于祀事尚侯之心云淳熙八年三月十五日宣教郎充详定一司勅令所删定官奚商衡记并书又记邑社久弗葺後四十年秋浦叶宰为长于斯乃更新之设坛墼四始甃以石筑墙堵百六十有奇始覆以瓦建斋宫十有八楹视昔加崇高焉前辟轩宇拜下始有地後剏直庐更衣始有所择旧材可用者为屋东隅以刳牲牲西隅以处徒御始肃然无譁旧循墙自北而八今始作南门旧行事草莽间今始为砥道县计比岁赤立铢积粒聚经营于庚辰仲夏踰年而後落成夫邑有人民有社稷皆当务所不可缓而新之亦常事也不必书而书之纪岁月也嘉定十四年辛巳岁长至日记 又记金陵五邑上元为壮邑有社社有宫经始于淳熙庚子越四十年稍葺于嘉定辛巳又二十有三年秋浦陈侯始至视宫墙摧颓已甚樵牧出入荡无限制未几斋庐为西风所震栋挠屋压积瓦砾与坛齐秋祀雨骤作仰漏旁穿无所庇障相礼者至操盖行事荐裸兴俯弗暇如式侯惕然靡宁喟然叹曰令所职在农农所重在祀春祈秋报从昔加严旱乾水溢于焉致祷而蒔祀之地圯陋如许奚以收聚诚意求神顾歆乎拱睨之间始锐意更新且召梓人手画口授大畧定矣将漕孟公点廉而闻之自当涂书扁额来力赞其成侯退而视夫帑廩则枵如也且邑为附庸一丝粟皆上之府令不以负租督过已幸苟可撑 了岁月何新为新之宁不勤吾民前此诿之近郊里正吏执旧比来令汎焉责之彼苟焉塞责不久仍敝与其烦费而无补孰若撙约以有待力裕则其办也不扰期寛则其成也不苟乃铢积粒累一意济斯役迨今春而始毕工栋宇易以坚木缭墙覆以陶瓦去积坏披荆榛置门关严扃鐃于是仰瞻乎斋宫昔挠而今隆周视乎垣墉昔痹而今崇循行乎坛墼之中昔窒而今通于斯过者昔慢而今恭矣终三年间无岁不丰十八郷之民讴歌于春风和气中含侯不容口侯曰此神之休吾何功之有欲然以为未足也储材庸力凡可以植坏起仆者靡不精思治事之庭退食之堂游息之圃淑问之所向之浸淫朽腐藉湿支倾凜乎若压不可一朝居者咸撤新之市材役工直与时平交手界予鴈鹜行一孔弗敢漫訖事而田里晏然罔闻知夫严坛宇以事神也肃居处以治民也侯于此盖两得之非才有余孰克办此由逢辰观之学为本才次焉世之为操切为不恤者遇事立办而民不免告病兹非短于才正以过于有才耳然则以才集事非难以学为政斯难吾夫子于门人之为邑者至不轻许子路在四科中以政事称然闻其使子羔为费宰则曰贼夫人之子及其言有人民社稷何必读书则曰是故?夫佞者盖未尝读书而使之即仕以为学未必不适以害之未必不至于慢神而虐民子路且以此为圣人所非甚矣邑之不易为也侯以儒饰吏由分教

有声而长斯邑廉而不求人知明而终归于恕民神之主也政善故得民和故神降之福居是室也微有媿于心登斯坛也将有愧于神新社宫而及县治其寔相关其本则在讲学是说也健决之吏笑以为迂学道爱人者悦有取焉逢辰备数郡之学与侯相始终三载于此知侯为详辄述所见以诏无穷侯名梦高字子升治行转闻及瓜而代有日方进进为时用云淳佑五年岁次乙巳三月望日从事郎充建康府府学教授方逢辰撰并书奉议郎差充沿江制置使司主管机宜文字兼参议官汪埴篆额从事郎建康府上元县丞赵洪修职郎建康府上元县主簿赵崇檐迪功郎建康府上元县尉徐宗大同立石】

江宁县社坛在县西南府社坛之东

溧水县社坛在县西南二里【绍定四年知县史弥巩移建于县治西北望京门之里景定元年二月经县事赵介如重修】

句容县社坛旧在子城北今移在青元观西南【陈後山谈丛叶君表为句容令县有盗改置社坛而盗止】

溧阳县社坛一在县西南二里

记云【邑之祀事社稷为重祈报有常廼所以为民也记曰重社稷故爱百姓亶其然乎则垣级之隳毁祠室之挠腐詎容若是耶溧阳社坛在县治之西自立县固已立社第岁久不治坛圯壤夷藁莽潢污或致窳穉春秋荐享牲粢虽具而寓祭之所乃不克称行礼者慙覲礼者歉嘉定戊寅会稽陆公来视邑事始慨然念之然政务胶轲财计枵瘠支颠补罅未暇也越明年己卯岁则大熟十有一月嵒既尉兹邑获忝僚末以事公公眷顾特屋有怀必吐阅岁庚辰尝谕嵒曰社稷自古尚矣考先儒之释社者五土之神稷者五谷之神勾龙配食于社弃配食于稷盖亦各以其有功于水土者配然而牺牲既成粢盛既洁祭祀以时则可以必其无旱乾水溢之忧不然则且将变置其所配食之人矣古人兴事尽诚责寔幽明不间若此今兹登稔荐臻家给人足公私仓廩储粟浩穰岂非社稷之有功于民乎不葺其弊不新其旧不严其报非予责而谁责嵒曰唯于是九顿首以顺公之美赞公之决居无何公廼捐金发帑下公移尉司督役兵护作六月甲申衆工齐事七月癸丑乃成为二坛其广袤也丈九尺有五寸其崇峻也二尺有五寸以祀社稷又为三坛其广则丈其崇皆然列于左右以祀风雨雷之神斋献俎荐与灌奠燎瘞各共乃位各得其所外门旁庖绩藻一新明敞改观公始蒞事仪牧增焕神之听之祥祉昭格庶民用宁百谷用成公之重社之义为民之意于是乎验矣虽然昔子路使子羔从政于费邑吾夫子以为贼夫人之子子路曰有民人焉有社稷焉何必读书然後为学而夫子深?其佞盖子路谓有民人而治之有社稷之神而事之治民事神于是而习是亦为学而不知古者学而後入政未闻以政学者也然则詎可以不读书于治民事神之先乎矧惟公之先公世世积学逮于西清鸣道阐文日益富贍而源流所自公独深造之博洽经籍贯穿史传以至终夜不寝益进进而不息则其读书也岂寻常者比哉故其于县堂亦必以读书匾之凡政绩彰彰无非其英华之发见者也重社爱民特其一耳公命嵒记其事因以述之并及公学古从政之大?以示来者云时嘉定十有四年正月迪功郎建康府溧阳县尉陈嵒记 又记次

春初至溧上适行社祭入坛之境道莽而垣圯坛壝存纵广大畧祠官屋上漏下湿几不可顿足问其方所则违于经详其仪设则悖于礼观诸祝史则翫于习竣事而退厥衷愀焉曰令司社稷也社稷民命也春祈秋报此为何事以至于此盖邑犹家也整则事事条理不特内寝堂外门巷所以妥神灵者亦然若家废则事事踈窳居处出入弗治何有于幽明祝告之所次春静而思前此视邑之刳敝有不暇葺者况社稷乎虽然置彼整此犹不失为社稷主其邑孰为大社稷为大社稷不治是忘本也夫天统元气而始万物地统元形而生万物人禀气受形所以位天地育万物也先王之制飨帝则于郊祀社则于国凡皆以类来之邦国都鄙则设社稷之壇社土神也配以弃风雨雷因地为神也祭以时盖天之尊不可瀆而人依形以立取财以养惟地取亲故田社所以神地道也正道不明礼乐废坏土狃见闻之陋以疑天地之性人役利害之私以淆鬼神之分繇是祈哀于老佛乞灵于龙冈谓宝坊真館潭洞湫泺之所尊于社稷黄冠白足巫覡方伎之流上于禋禴呜呼其昧理也甚矣次春早夜恂栗幸邑治粗葺则及于社稷因考晦庵朱文公参订政和新仪凡神位祭器仪式具可法也廼正方向廼新閤垣廼辟涂路为屋凡九楹望拜有宫执献有位祭器有室更衣有所于以飭玩立愔示吾重社稷之意记不云乎重社稷故爱百姓重民爱也重社稷敬也爱固生于敬也轻社稷而曰吾能重民诬矣虽然人心涵太极五行之理所谓敬者澄穆虚静以此神明交彼神明无念不敬则无民不爱儆平日心与敬违虽矫饰于拜伏献裸之顷非敬也如民何次春既以自警并着其刻于社以告来者宝佑改元八月吉日宣教郎特改差知建康府溧阳县主管劝农营田公事兼沿江制置使司干办公事刘次春记】

风伯雨师坛附府社坛

祭龙坛在县西南十二里陰山上国朝景德三年置古太社太稷坛晋元帝建武元年初立宗庙社稷在古都城宣阳门外郭璞卜迁之左宗庙右社稷玄风观在太社西偏对太社右街东即太庙地社立三坛帝社太社各一稷一在县东二里

按宋书【晋元帝建武元年依洛京二社一稷礼左宗庙右社稷历代因之洛京社稷在庙之右而江左又然也吴时宫东开雩门疑吴社亦在宫东与庙同所也宋仍旧无所改作 寔录云晋初仍汉旧仪置官社而无官稷太社有稷而官社无稷故常二社一稷也太康中诏并二社之祀傅咸奏宜如旧诏一依魏制至元帝建武元年又依洛京二社一稷隋志梁社稷在太庙之西盖晋元帝建武元年所创有太社帝社太稷凡三坛门墙并随其方色】

雩坛通典晋穆帝永和中议制雩坛于国南郊之傍依郊坛远近注阮湛云在巳地隋志天监九年有事雩坛遂移於东郊在籍田之域内【武帝以雨旣陰类而求之正阳其谬也甚东方既非盛阳而为生养之始则雩坛应在东方祈晴雨于此】

籍田坛在城东十五里按隋志普通二年又移籍田於建康北?筑兆域大小列种黎柏便殿及斋官省如南郊别有望耕坛在坛东帝亲耕毕登此以观公卿之推别有祈年殿普通二年徙籍田於东郊外十五里【诏曰平秩东作义不在南前代因袭有年礼制可于震方问求沃野具兹千亩】大同五年又筑雩坛於籍田兆内【绍泰元年齐徐嗣徽复入至玄武湖陈武帝

遣侯安都扼之战于耕坛南即此地也】蔡宗旦金陵赋注梁籍田坛在城东二十里青龙山之前

鍾山坛在鍾山南岩上苻坚大军至壽春晋武禱於坛神曰当助攻坚见八公山上草木尽为人形又闻风声鹤唳皆言王师至坚衆大溃西走制使姚公希得任内勦修社坛邦之有社重祀也坛壝斋庖岁久頽敝景定四年鼎新修勦祭坛四座斋厅一所棧星门及前後左右挟屋看守宿屋大小总一十有七间周回界墙屋下装摺一圆备总费四万二千七百余缗米五十三石有奇

社坛大使马公光祖重建郡邑有社坛春祈秋报古也今存其名而礼制失之矣祀事之顷升降跪起听命胥徒动容鄙野甚非所以格神明而来灵贶也夷考政和五礼新仪坛壝崇广具有成式乃命主江宁簿杨相如按古制而筑之社稷之坛各一饰以方色煮以黄土南位而北向燎坛瘞坎悉如礼又为斋庖两间以备陰雨而祭风雨雷三坛位北向南亦鼎新焉

记云【社稷在祀典视羣祀为重以其关于民者大也我朝政和列于五礼新仪淳熙编次成书颁之天下制度威仪悉毕载自礼律同录藏于法家不能家传而人诵之州县循习苟简平居暇日莫过而问及乎行事惟执事者是听诿曰豆之事则有司存有志于古者相视太息而已金陵陪都立社有年矣坛壝非制祭器礼服犹阙咸淳丙寅夏潦害稼丁卯雨不时若裕斋先生马公念念在民靡神不举社稷莫失焉至诚昭格以克有秋嗣岁将兴祀事斯藏于是天台杨相如以江宁主书备员幕底公前而命之曰余三守兹土至则首謁于社环视谛观大异先朝所颁之制非阙典欤夫明则有礼乐幽则有鬼神天有四时春秋冬夏风雨霜露无非教也地载神气风霆流形庶物露生无非教也礼之不存神将安飨独念夫古者先成民而後致力于神曩民瘼未苏罔敢轻用其力兹岁事告丰民气熙洽繄神之贶今守臣古诸侯也社稷之事可不改而正诸子慈湖家学也从臣尝以明古礼荐于朝矣盍为我兴起而一新之俾此邦知有此典故洗积习之陋亦幸之大者竣事则执笔以记其勿多逊相如不敏惧弗克堪载惟公以社稷重臣心乎社稷如此何敢不恪乃只率指海荒谷旦度旧址聚羣材会衆工审其面势南直牛首二壝对峙五坛崇成社稷位于午风雨雷位于子昔主石不琢今方圆中度昔陛不四出今升降有阶昔方色不施今五彩辉映昔瘞燎无所今坛坎从方致斋有次熟牲有庖牺象豆笾簠簋尊俎罍洗勺筐拈帨巾冪必以式旒冕弁帨衣裳鞞佩组绶带履绩画絺绣必以等经始于良月越明年成一物不欺百废具举以此交神明其庶矣乎公之盛心岂为徼福于神而为是哉亦曰禱祠祭祀非礼不诚不庄期于仰称国家立社之意焉尔矧公之于政簿敛劝分蠲租已责养老慈幼惠孤恤寡狱无冤民庭无留讼已定对越而无媿社稷有灵愚知其福公之民也昭昭矣相如既奉公命董其役纪其成复请于公图而刻之碑陰以扶是礼于勿坠云戊辰正月既望修职郎建康府江宁县主簿兼本府金厅杨相如撰并隶古修职郎特差充建康府府学教授许稟篆盖】

诸庙

城隍庙唐天佑二年置旧在城西北今在府治南御街东太庙街内

东岳庙在城内西南斗门桥东国朝雍熙二年置绍兴十一年重建

江渎佑德庙在城西清凉寺东

事迹【绍兴三十一年十一月二十六日知枢密院事督视军马叶义问言比金人进逼江上与镇江建康太平诸郡才隔一水先被金人谋开第二港河欲径冲丹徒施工累日一夕大风沙涨截断不得渡以为水府陰佑仰惟陛下神圣威武将士用命虎狼之衆未遂冲突然??大江横截其前敌军为之逡巡退却虽有舟楫不得施者实神陰相于冥冥之中所以致然乞诏礼官考其制依五岳例峻加帝号令建康守臣择地建庙其金山采石二水府乞增封遣官精洁祭告已而太常寺言江渎已封广源王止系二字欲特增加六字作八字上拟昭灵孚应威烈广源王令建康府守臣即爽垆之地建庙赐额曰佑德其乞峻加帝号一节恢复中原日别议封册兼契勘广源王本庙系在成都府今来所封庙额并增八字王令本庙一体称呼从之黄度记云尔雅水自江出为沱汉为潜禹贡纪沱潜梁州以岷嶓见着所出也荆州以九江见着所入也汉东南行过大别与江俱东至彭蠡汉行于北为北江江行汉蠡之间为中江孔安国曰有北有中南可知近出苏文忠公遂以彭蠡为南江余谓此经文也禹贡导山出岷衡荆州分域衡阳为南界赣水发大庾峽下合彭庐牵淦盱浊余鄱僚循十川锺于彭蠡为大泽与江汉东入海是为南江其源委可考故曰此经文也扬州纪彭蠡下出三江江汉加彭蠡为三矣余登金山其北为鹞窠山两山对立江分为三而东因陆羽三泠之说验禹贡三江为信又求所谓第一泉者在今寺北趾僧舍中号中冷水冷冷字之讹也它日有为余言金山下二十里有海门山亦两山对立江分为三入海它日又有为余言历阳有东西梁山对立江中江亦分为三而趋东乃知自九江而下山之行乎江中者皆岷嶓下尾江域于山虽波流相渐被而异槽其安行顺道而不骇荡迁徙者由此也夫自汉尚书家说沱潜说三江皆失实吴越春秋范蠡泛舟出三江说者谓浙浦阳剡三水异出合流于会稽郡之东北今犹称三江口濒海小渎称谓偶同非一州之望不足纪录水经松江下流奇分为三酈道元引吴都赋指东江娄江与松江为三渎尤小本无三江之名且非口岸盖牵合不可凭也金陵故石头城南有江渎神庙不知其所起绍兴辛巳敌入寇郡祷于庙敌溃去有旨赐号佑德久之栋宇颓圯弗称灵贶岁在癸酉制置刘公改作之江导源岷山行梁荆扬三州三千余里挟汉蠡而长之由此入海灌溉济涉之功博矣食于此宜也因念河自秦汉不行九河故道济絶源不复截河入茱淮亦与汴泗交错多非禹迹四瀆惟江溟淼衍长持固处顺历数千载而津迳不易方其自梁入荆去海尚远甚而已有朝宗之势经特表见之夫岂非融结之初其受命于两间者为独异也】

真武庙在宫城西北清化市东国朝太平兴国二年置【建炎四年金人烧建康凡官舍民居寺观神祠无不荡尽惟此庙独存】

後湖真武庙本吴赤乌玄武观後毁於兵国朝嘉泰中王运使补之亲即其地祷雨而应遂建真武庙【取土得龟蛇】嘉定间胡运使擴增创前殿宝庆初丘大卿壽迈又增两廊三门

蒋帝庙在蒋山之西北去城一十二里

事迹神蒋姓名子文汉末尉秣陵死而灵异吴大帝为立庙【搜神记曰蒋子文广陵人嗜酒好色自谓已骨青死当为神汉末为秣陵尉逐盗至锺山下贼击伤额因解绶缚之有顷遂死及先主之初其吏见子文于道乘白马执白羽侍从如平生子文曰我当为此土神为吾立祠不尔使虫入人耳为灾吴主以为妖言後果有虫入耳皆死医巫不能治又云不祀我当有大火是岁数有火灾吴主患之封为中都侯加印绶立庙改锺山为蒋山表其灵异 吴志吴初封子文为中都侯次弟子绪为长水校尉皆加印绶立庙堂转号锺山为蒋山】晋加相国之号【晋苏峻之难锺山神同蒋侯为助且曰苏峻为逆当共诛锄之後果斩峻 太元中苻坚八寇望见王师部阵齐整又见八公山上草木皆类人形恍然有惧色初会稽王道子闻坚入寇以威仪鼓吹求助于锺山神奉以相国之号及坚望见若有助焉】宋加相国大都督中外诸军事封蒋王【杜佑通典宋高帝永初二年普禁淫祀自蒋子文以下皆絶孝建初修复加蒋侯爵位至相国大都督中外诸军为蒋王】齐进号为帝乃以庙门为灵光门中门为兴善门外殿曰帝山内殿曰神居【齐永明中崔慧景之难迎神还台以求福助事平乃进帝号】梁武尝祷雨有异及魏军围锺离复见陰助 南唐谥曰庄武帝更修庙宇【徐铉奉勅撰碑其畧曰蒋帝孕清明之气稟正直之资寔缺德之所生与五龙而比翼自西江考绩缺联事于玄夷北部申威辑庶功于黄缺于时祚终四百运偶三分人怀坠炭之愁家有剥庐之痛帝则勤劳狗物慷慨忧时既援张敞之桴即震李崇之鼓赤心未尽执汉节以忘生青骨难诬降北山而受享飞虫显裕生民之舒惨焉依白马耀奇平昔之威容如在云云 诏曰蒋帝受命上玄奠职兹土功昭累代泽被中区所谓有益于人以死勤事者也今位号已极名谥弗彰阙典未申朕甚不取其以胜敌克乱之业为人除害之功因姓开国追谥庄武仍令有司修飭寝庙备制度焉】国朝开宝八年庙火雍熙四年即旧址重建景佑二年陈公执中增修请於朝赐额惠烈【景佑二年春蒋庄武帝庙成庙去冶城北走据锺山之趾帝即东汉秣陵尉子文之神功烈载于前史威灵见于後世顷尝逐盗勇死誓当血食初有变怪乃祠于吴因姓名山雄压境上繇吴迄晋?侯或王陰助国难终败贼峻遂帝其号伪唐因之至于我朝日月寢远沿而不废开宝中田野弗时悉火其屋厥後完葺甫就像貌厪存岿然一隅鞠为榛莽前此出镇率巨公大臣所处尊重未始经虑今颍川陈公繇内阁来殿是邦下车之明年欵帝宇下周览咨嗟颓圯之甚以为扞菑御患实在祀典兹山之灵一府之望水旱疾疫岁时祷祠神罔攸居民不蒙福非岂弟父母之意即日庀徒飭材颐指面執尽剗故?聿图宏壮既立门户乃树堂宇前後挟室左右列庑南翼隆厦烹燂之处北峙表位游憩之所广敞静深几百许柱遐眄轮奐若病瞳刮膜忽见物象之明灭却睨巘 如丹青新图半出霄汉而飞动苹藻可荐箫鼓可乐千里之俗矍然惊眊叫呼奔走僉以为公尊奉神灵发扬幽光蕲于乐康觐于岁成君子曰左传有之神聪明正直依人而行者也若夫公之聪直与神明通故神有所依凭而山得以嗣兴说以使人不日而成不然何曩时之败坏一旦修葺若斯之盛欤先是御史蒋君司计东道盖出裔孙近在治所躬谒以竣鑿文于石府公感之愈加诚焉二贤固符徽惠邦人不朽之作古之制也御史以予尝学春秋绘传其事俾书始末而为之记云】政和八年漕使刘公会元重修【政和八年福唐刘公会元将漕江左以事谒祠下见其廊庑摧毁丹青皴剥惧无以仰称威灵用政和六年天子德音以官钱三万有畸委属县完治殿之毁者完之使新庑之狭者辟之使广明宫斋庐焕然一新工始于正月十一日甲午而成于九月十三日壬辰越三日公率属吏具祭祠下奉安神像事既毕以次列坐公顾客而谓曰事神者内诚欲其至外仪欲其肃然事有激于外而动于内者不可不察也令夫裸以入庙者仰首四顾凜然竦动毛髮惧色见顔面非胁于

刑威使然也彼其见于外者严肃可憚则恭畏之心恍然生于内自然之势也兹庙之食于金陵将千岁矣神之福斯民不可谓不久而昔之上雨旁风丹垩不饰俾民之祀者牵牲奉俎以入见其隳废若此则恭畏之心何自而生焉夫挟谩易之心以求于神而神弗荅岂神之过哉今幸甚栋宇复完使今而後民以业而育子孙士以神而莅官守者咸知事神之理若此则庶几乎兹庙常完而不隳神之聪明亦将昭荅于无穷矣属吏邵?撫公之言而为记】乾道八年枢密洪公遵重修【记畧云乾道七年诏侍卫骑军屯建康明年枢密洪公自当涂守安抚本道廼行城东直蒋山得高亢地以为营循山而北以謁于蒋帝之庙慨然念神之食于兹山千数百年赫有灵响辅世讨贼前王赖焉今貔虎万羣连营其左折冲之威神尚克相之而祠宇陋頽不葺何以徼福于是撰时鳩徒治其庙若神之百须皆侈而新之四月戊午告成移书石湖之上求文以为记云云窃惟神之英烈能杀身不顾发灵兵间漂疾无方掀推逆凶已敌先代所忤至像设輿马皆有行色可谓壮哉可谓异哉呜呼秣陵之盜不烈于焰天之寇石头之逼不惨于旧京之禾黍鍾离之桥郡阳之桺不炽于中原万里数十年之氛埃神于其小者犹能奋其威怒有此武功宁独无意于稽天之耻乎尝试酌椒浆桂酒酌神而问之其必有不虚之报以无负于洪公公亦将合人神之助崇建勲业以无负于上之倚重焉成大不佞故志其远且大者以告神且以复公之命八年十一月二十六日左朝奉郎充集英殿修撰新知静江军府事提举学事兼管内劝农使充广南西路兵马都干辖兼本路经畧安抚使兼提举买马吴县开国男食邑三百户赐紫金鱼袋范成大记并书资政殿大学士左中大夫知建康府事提举学事兼管内劝农使充江南东路安抚使马步军部总管兼营田使兼行宫留守鄱阳县开国子食邑六百户赐紫金鱼袋洪遵立】

题咏【元佑辛未裔孙新安仁令静题青骨沉埋恨未休寒烟深锁旧山愁悲风力扫揜抢日勇气平吞泽国秋身殒一朝心报国功褒千古首凝旒当年白羽云头扇还许来仍得见不又鍾阜巍巍插太虚祠堂高拱此山墟谁言荒草埋青骨时有仙风扫旧庐
曾极白马千年系庙门炉?浮动袞龙昏闔棺漫说荣枯定青骨犹当履至尊
杨备□区岩扉敞庙门灵风时动戟衣翻御灾扞患陰功大玉册荣加帝者尊 马之纯一尉为官亦已轻後來封爵一何荣骨青相貌由来异羽白威神俨似生尝遣陰兵随义旅不从私祷长奸萌自当血食鍾山上仍与鍾山换却名又爵以封王崇六代谥为庄武自南唐缘何血食垂千祀为有威灵庇一方魏有鍾离寻败走秦屯淝水辄奔王虫生火起徒妖怪载记还应择未详】

吴大帝庙在西门外清凉寺之西旧传今庙即当时故宫

题咏【袁世弼诗人若曹瞞虐天悲汉祚终山河分鼎峙气象发江东一旦墟京洛弥年豢幼冲炎精竟灰烬紫盖出艤艫长策资公瑾雄材得吕蒙招延师友议继述父兄忠旧府峨双阙惊涛涌半空风云龙虎势日月帝王宫地力因时险神谋与意同屈伸思所济逆顺审于衷骏足始交质灵牙曜即戎同盟界函谷独断保蚕丛定霸葵丘劣推心建武同长沙兆生讖典午刺余风战守余忠在登临四望中陇迁成万古世异想羣雄歌舞歆民祀干戈逐虏功征帆来浦外久客怆途穷精銳消孤剑飘零若断蓬徘徊廊庑下红叶乱江枫 曾极曾将一剑定全吴斗大祠堂泣楚巫故国神游应抚掌芦花枫叶几年无周师成曾是东南第一王眼看此地六

兴亡东缘有酒登京口西为无鱼忆武昌非复虎臣陪殿上空余猩血泣祠旁何年并建琅邪庙共对淮山草木长刘克庄露坐空山里英灵唤不回久无祠祭主曾作帝王来坏壁虫伤书残炉鼠印灰今人浑忘却江左是谁开】

晋元帝庙唐天佑二年置旧在城内西北卞将军庙侧国朝景德四年重修後移就嘉瑞坊城隍庙东庑嘉定五年黄公度作新庙于石头东两庑设礼乐羣英三十六像【太傅丞相中外大都督始兴文献公琅邪王导字茂弘 太保中书监录尚书事领扬州刺史卫将军大都督十五州诸军事赠太傅庐陵文靖公陈国谢安字安石

侍中太尉使持节都督并冀幽三州诸军事广武愍侯中山刘琨字越石

镇西将军豫州刺史赠车骑将军范阳祖逖字士稚

散骑常侍安车军司赠侍中骠骑将军开府仪同三司嘉兴元公吴郡顾荣字彦先

左光禄大夫开府仪同三司赠司空穆侯会稽贺循字彦先

骠骑将军散骑常侍赠开府仪同三司临湘穆侯丹阳纪瞻字思远

尚书右仆射赠光禄大夫平阳邓攸字伯道

安南将军使持节都督梁州诸军事梁州刺史赠征南将军寻阳壮侯汝南周访字士达 平南将军使持节都督江州诸军事江州刺史赠镇南大将军仪同三司观阳烈侯汝南应詹字思远骠骑将军都督兖豫幽冀雍并六州诸军事假节散骑常侍赠左光禄大夫仪同三司秣陵简侯广陵戴渊】

【字若思 尚书左仆射护军将军赠左光禄大夫仪同三司武城康侯汝南周顗字伯仁 散骑常侍辅国将军领左军将军监湘州诸军事南中郎将湘州刺史赠车骑将军谯闵王河内司马承字敬才 尚书令假节领军将军给事中赠侍中骠骑将军开府仪同三司建兴忠正公济阳卞壺字望之 侍中太尉使持节都督扬州诸军事赠太宰南昌文成公高平郗鉴字道徽持节侍中太尉都督荆江雍梁交广益宁八州诸军事荆江二州刺史赠大司马长沙桓公鄱阳陶侃字士行散骑常侍骠骑将军开府仪同三司使持节都督江州诸军事江州刺史赠侍中骠骑大将军始安忠武公太原温峤字太真 司空征西将军使持节都督江荆豫益梁雍六州诸军事江荆豫三州刺史赠太尉永昌文康公颍川庾亮字元规

右卫将军赠卫尉零陵忠伯琅邪刘越字世瑜 侍中赠光禄勳颍川锺雅字彦胄

散骑常侍宣城内史赠太常万宁简男谯国桓彝字茂伦 卫将军左光禄大夫开府仪同三司散骑常侍赠侍中车骑大将军江陵穆公吴郡陆晔字士光镇东将军散骑常侍会稽内史赠车骑将军开府仪同三司余不贞侯会稽孔愉字敬康

散骑常侍廷尉赠光禄勳晋安简男会稽孔坦字君平 使持节侍中都督扬豫徐州之琅邪诸军事扬州刺史骠骑将军录尚书事赠司空都乡文穆侯庐江何充字次道

左光禄大夫开府仪同三司赠侍中司空济阳文穆男蔡謨字道明

光禄勳右光禄大夫西平清侯琅琊顏含字弘都 廷尉领着作长乐侯太原孙绰字兴公

右将军会稽内史赠金紫光禄大夫琅邪王羲之字逸少

尚书令散骑常侍卫将军赠侍中骠骑将军开府仪同三司蓝田简侯太原王述字怀祖

散骑常侍护军将军尚书令赠左光禄大夫仪同三司谥简琅邪王彪之字叔虎 北中郎将都督徐兖青三州诸军事徐兖二州刺史赠安北将军蓝田献侯太原王坦之字文度 车骑将军

侍中使持节都督江荆梁益宁交广七州诸军事领护南蛮校尉荆州刺史赠太尉丰城宣穆公谯国桓冲字幼子卫将军尚书令开府仪同三司赠司空南康襄公陈国谢石字石奴散骑常侍左将军会稽内史赠车骑将军开府仪同三司康乐武公陈国谢玄字幼度彭泽令鄱阳陶潜字元亮】

叶公适作记【城隍庙晋元帝旧祠孤寄寒窳性瘦酒薄祝史桀慢执吏弛不记其王此土也嘉定五年江淮制置使黄公度作新庙于石头初卞壺有食糒绍配马公谓壺名辈後绍当以序列且均晋臣也因徙置庙东房又谓晋传四姓尝为中原共主更七八巨寇不害其立非用材致然耶故设绘事两庑起刘琨迄陶潜三十有四人表异之又谓玉导谢安独晋所恃以存也故特像于庙西房客或顾而嘻曰惜乎是役也商周之相孚终迓衡是以铭常勒鼎烝从祐示其不忘汉唐陋矣其殊勲盛烈亦纪官爵图形貌有麒麟云台凌烟之目夸其得意及後子孙忽于念功弃不省录运去物改臣主同尽名迹俱泯一抔之土不暇为谋徒使文士弄笔于坠编遗简之余骚客费吟于残烟衰草之外其亦有足哀也建康虽晋都邑千载既远迁革尤多寻冶城问新亭岂复异时髣髴哉今不惜数亩之宫聚其贤劳裸馈以伦山川具存楹桷可想行者翼然如瞻太极之题止者洗然如闻广室之论然则公之好古非若鲁殿秦碑爱其剥缺摧落而已苟有益于世教以今準昔犹一日也方王处仲篡势已成举朝不悟尚安恬自若惟帝视为腹心之疾决意讨除忧辱逮身忠义激发至于卒殒灭之不然晋亡久矣盖过于明断而无不足也自正始以风流相命党好成俗士虽坐谈空解不畏临戎及气倍勇积则袴襦子弟能破百万兵矣盖清谈致効而非丧邦也二事终始大节疑史妄评故畧着云五月一日龙泉叶适记吴人滕寔书鄱阳余襄篆额庙作于四月己卯八月丁丑落成十月己丑刻记】

题咏【曾极茅茨绵蕝寄江东陵庙回看渌血红右衽危冠才自保未能无责敢言功刘克庄元帝新祠西郭外野人吊古独来游陰陰画壁闲冠剑寂寂丝窠上冕旒势比龙盘犹在眼事随鸿去不回头叶碑廊下无人看欲去摩娑又少留】

忠烈庙即卞将军庙在天庆观西晋苏峻乱尚书令卞壺与其二子死难南唐保大中始建忠贞亭於其墓北国朝庆历三年改亭曰忠孝元佑八年列於祀典胡铨作记【建业实江左一大都会其事繁职重在祀与民为政者率皆先成民而後致力于神凡祀典所秩杂然不可倭数自社稷五祀四望四类六宗八蜡无所不当祭又有实柴以祀五纬十二次燔燎以祀中能上能狸沈以祭山林川泽鬯辜以祭四方百物又有礫禋以祭飊雨坛墮以祭地祇瓢齎以祭水旱厉疫营鄩以祭国门屏摄以祭羣小祀中溜以祭室神又有燔俎以侑食复胙以倂福以至十伦之义吁亦衆矣今大丞相观文大学士和国张公来镇此府下车之初独首及卞公之祠何哉铨尝求其说稽之汉则曰节行者国家之金城稽之唐则曰忠义者天下之大闲盖导以德礼则人尚名义婴以廉耻则人矜节行故父兄之臣诚死宗庙法度之臣诚死社稷辅翼之臣诚死君上守圉扞敌之臣诚死城郭封疆夫人皆戮力一心仗节死义则国家安圉隐若长城是不亦节行者国家之金城与秦以并吞八荒之心欲帝万世然云仗节死难之士有一茅焦几不免虎口故沐猴一呼而天下土崩东汉之乱献帝越在草莽曹操奉以为主当是时天下已无汉矣而惟曹氏之为听奸斧逆鼎人而肆其酷海内凛凛以为汉亡在须臾耳然杀

一孔文举而忠臣义士折首灭顶伏死以争终曹公之身而不得逞是不亦忠义者天下之大闲欤繇是观之公之所以首及卞公之祠其旨岂不深且远哉公道德忠孝伏一世用不用为天下重轻虽去国垂三十年海内至今歌思以相天子盖缺戕之叹破斧也人皆惜姬老之居东而折箠以荅赤眉也天岂容高密之久外况其高勲鸿烈藏在盟府视古人何愧焉而其意方将尚友古人歉然若不足孔子曰志士仁人无求生以害仁有杀身以成仁孟子曰生我所欲也义亦我所欲也二者不可得兼舍生而取义者也公之意岂不端出于是仰推无堤之輿展义吴会翫岁愒日虽卧薪仰胆而未见死绥之节虽寝草枕戈而蔑闻执兵之陪顾瓠脱之警日闻恢复之期未指而士气委靡皆竄偷生则苟而可微公崇尚名教以砥砺颓风则孔孟仁义之谈几何其不扫地也哉呜呼尚忍言之或谓铨子言信矣敢问杀身成仁与舍生取义二者同异铨曰不同夫仁人于死生无择故能成仁义士于死生有取舍焉故止能取义杀身成仁夷齐以之舍生取义子路有焉故结纓而死未能无择虽然夷齐远矣有志子路者或可企及不然犹不失为鲁仲连也卞公其何歉焉卞公讳壺字望之其大节旧史详矣故不复识绍兴三十二年岁次壬午十二月朔左奉议郎新权发遣饶州军州事庐陵胡铨记】绍兴八年叶公梦得又即亭之南为庙请於朝赐额忠烈为殿三间位置公像仍列公二子盱眙於右又以嵇侍中绍配食於左【请庙额状右臣伏见本府有晋尚书令卞壺庙一所在城西南隅谨按晋书壺当南渡之初与王导庾亮寔相成帝苏峻之难以壺都督大桁东诸军事扞贼力疾再战遂死于敌盱眙见壺没相随俱死忠孝之节萃于一门成帝特赠壺侍中骠骑将军开府仪同三司後复给钱修其莹兆历代封殖载在典祀自金人渡江残毁殆尽窃虑岁久渐致湮没臣已委官检计重建庙宇方时多艰如壺等辈数百年间不过三五人宜有褒显以诏後來欲望圣慈特依应天府张巡许远蔡州顔真卿例赐以庙额庶以兴起四方仗节死难之士共明君亲之义】绍兴十五年晁公谦之乾道四年史公正志嘉定四年黄公度皆修崇之互见忠孝亭及墓下

伍相庙按建康实录吴孙綝侮慢人神烧大航及子胥庙今不详其所【總龟诗话云仪真观西一水萦回南入大江号曰胥浦一日三潮俗云子胥解剑渡江处其西又有伍相林对南岸竹筱沟下口又有庙里俗呼为伍相泊马庙其地在上元县长宁郷】晋谢将军庙在城西南隅戒坛院之侧唐咸通九年建将军盖谢玄也

庙记【昔典午氏之东苻秦不庭空国南下淮淝之役将军谈笑而却之其功系诸生灵其名播之天下其行事焜耀于史册庙貌血食垂荣无疆此固不待记而传不因文而显也有唐咸通九载肇祀将军于城西南隅今统司中军讲武堂之右是其故址皇宋乾道间统制鲁侯安仁覩其堂皇浅隘日近尘嚣练习戒期往来杂沓迺改卜峻地用恢前规崇基峙凤集之台胜势接龙盘之阜然庭宇已成而不揭其号珉石既具而未刊其辞虽鸿勲伟绩显晦不在于斯而岁月无传踪迹莫考亦非所以垂方来示永久也阙典未备因循逮今丁巳之夏适值风雨飘飆祠门俄圯统领张辰会诸将校而言曰厥今王业偏安骄敌未殄于斯之时政宜勦力一心仰慕前烈将军之庙不克修葺则何以继鲁侯崇泰山之志慰忠臣奋激之心乎迺相与出俸资鸠工徒易其旧闕表以新额筑植告备赫然改观呜呼提八千之衆破百万之兵以生前之忠勇为身後之英灵草木皆人形风鹤皆军声俾幽冥之昭格矧躬列于神明将见壮我军容肃我行垒保佑社稷奠安边陲其有望于将军者如此于是乎书时庆元四年岁次戊午三月

朔日三山郑之翰记】

题咏【曾极儿辈能军国未危更令朱序助声威秦人若也全师集云母车盛晋鼎归 马之纯
苻秦亲自到淮淝真有回山倒海威只遣八千精锐去能令百万败兵归虽从太傅求方畧要
是将军识事机庙食如今知几岁英风隐隐动窗扉 阙
喜处谁知屐齿边分明江左再神乾莫教从此轻肥子容易谈兵夸少年】

晋陰山庙在城西南一十二里晋建武中丞相王导於冈阜间隐约见步骑数十驻立壠上导
怪之使人致问俄失其所夜见梦于导曰我乃陰山神也昨随帝渡江寓泊於此卿为我置祠
当福晋祚导以其事闻上乃置庙於此仍名其冈为陰山国朝开宝八年平江南曹翰重修因
为庙记书于堂之西壁

题咏【杨备炉香断暮云凝陰德山高衆所称开府琅邪旧蒙福龙飞一马至中兴 马之纯
相君一日到郊垆步骑俄逢十数兵拂晓见来殊隐约中宵梦此极分明陰山血食当知我晋
帝南巡适从行事既奏闻因立庙坡陀亦复享嘉名】

晋梅将军庙在城南门外雨华台东地名东石子冈晋梅颐尝屯营於此又名梅岭冈或名梅
颐营後人即此立庙

文孝庙梁昭明太子是也在城内西南新桥之西面临淮水建炎焚毁绍兴五年再建

题咏【曾极德隐前星民已和山隈水曲庙何多皇孙不得承天统犹使尔翁恨蜡鵞】

武成王庙在右南厢镇淮桥之北御街西唐开元中诏京师及天下州府并立太公庙南唐徐
铉武成王庙碑云入端门而右回旁太庙以西顾即今处也

李王庙在城东南十里南唐李主也里俗呼曰李帝庙岁时祀之

广惠庙在城东三里广德张王也

淳熙省劄【资正殿学士正奉大夫知建康军府事钱良臣奏臣伏覩建康军民昨于府城东
翔行盖造正顺忠佑灵济昭烈王庙一所保护一方军民消灾集福每遇祈祷雨泽无不应验
本府今岁缘自入夏以来雨水愆期有妨栽插秧苗臣于五月十九日躬亲前诣本庙祈祷即
获感应连日雨水霏霏高下之田悉皆沾足有此灵迹其正庙见在广德着于祀典委是诣实
欲望圣慈特赐加封庶使一方军民转至钦崇牒奉勅宜赐广惠庙为额】

题咏【叶适题开禧三年春不雨江河浅狭田野皆枯裂夏至秧老忧不得入土祷于祠山庙
期以三日逾日而雨大降插种毕犹有余泽乃作此诗刻于庙庑建业守龙泉叶适夏至老秧
含寸黄求田回回不敢犁羣农无计相聚泣欲将泪点和乾泥祠山今古同一敬籤卦分明指

休证传言环玦三日期注练翻车连晓暝龙神波后何惨怛昔睡今醒喜萧爽人云天上行水曹取此化权如反掌浙河以东尽淮壖哀哉震泽几为原愿三顿首帝王前请赐此雨周无偏】

三圣庙之神即苍史王也庙在府治之西偏未详所始嘉定十年李公珏始加增辟十六年余公嵘宝庆元年丘公壽迈皆相继修崇至于今不废祈祷以正者必应庙记【陪京重镇盘龙踞虎天设险要建旄仗钺坐麟堂听政眎方岳为独尊山川百神拱揖只命最亲且近者三圣神祠在焉历年多祠宇颓圯弗称厥祀蛛檐苏壁来者动情客燕宾鸿既去辄已嘉定丁丑制置判府安抚留守待制侍郎隆兴李公始克撤旧观鼎新之是役也不劳民力不费公帑割俸资用揆日告功殿庑宏敞而邃深庙像端严而俨肃璘璪华彩光射图壁精黼莹洁仪物毕陈日辉月明意象非畴昔矣神非有求于公公非求媚于神慨然注意若此岂废兴自有数遇合自有时邪吏民赞叹纪其事本末辛巳仲冬相与致辞属郡人吴藏为之记箴曰公帅西淮边无警尘夜月秦关春风汉陇太平杯酒恩意涵濡宅是南邦遹壮屏翰万山鳌镇一柱鲸波于江于淮福施滋广鏘鸾再驾惠信益孚和气致祥民物昌阜丰功伟绩殆不胜纪一祠宇之修何足侈公美乎涉笔非敢辞不敢僭也虽然昔风雨之飘摇今丹青而黼藻亦足为神贺矣始序其梗槩夫神无方无乎在无乎不在敬心所向神寔寓焉按耆旧所传王圣神祠古迹受世享者苍史史名颉黄帝时史官仿像类形创书法诏天下真有功万世朝廷省部官府奉事曰苍史王不忘其初也鸿荒迨今几千百年英灵在天不泯岂独私此邦诗书文物之地笃意信向故神之眷念益新神亦不轻于有所寄矣崇牙列戟门卫森严犀甲熊旗鳞次罗列神居其中密赞陰扈星犹在汉漏未传宵梅角声催人影月照守帅未正席过其祠者必先瞻礼守帅而下朝夕寅奉节朔祭告克恭克谨罔敢或怠暮春三月时维诞辰都人士翕乡崇仰神血食于此荣矣虽然神亦何负于此邦神之四目即有四司灵官曰举留曰开聪曰证误曰追失犹今府掾六曹郡緇悉事咸总焉一岁之间陰阳变调方内熙妥襦袴兴咏道不拾遗吏责寬矣神亦得以自宁不然吏方懔懔以为忧神能无动情乎一日之间官府晏如文书整治庭无留讼狱无滯冤吏治举矣神亦足以自慰不然吏方倥偬不暇神能无关念乎一日之间堂陰昼静燕寝香凝金鑱綠沈雍容樽俎神亦为赞喜其或鴈鹜拱前案牘丛委晓烛散午夜坐分更神岂能自暇逸乎有愆必致祷有祷必求应役役于神之前者总总也惕然惧无以应之殆有甚于吏之念民者矣夫孰有知其心者盖亦有知之者矣目相接知敬中有慊知畏处危难知警岸远舟移水平波静此念转异所以敬者暂而非久迹而非心也我公独能为神兴建祠宇于先再至又惧奉事有间选虞胥老于事曹其姓者专其责岂公之聰明正直默与神会爱民利物一念交感于心自有不容释者欤公知神之心神知公之心公知敬于神神知敬于公神能体公之意惠此邦之民绵绵永永于无穷民荷神之休亦将感公之赐縣縣永永于无穷矣敬书是以告来者时嘉定十四年长至前三日谨记】

又记【三圣大王乃通监史册苍史王也王姓苍名颉王有四目者掌籍掌筭开聪追失三圣者籍筭为其一开聪为其一追失为其一能明此三事故曰三圣所主官府之籍计筭忘失所在官府建祠王生而聪慧正直忠节乃三月三日圣诞世人多不知其生辰者遂致湮没于今徧行询问方得此寔行在省部往往立其香火祭祀不絕此间名之曰三圣省部奉之曰至圣苍史王名号虽异其寔一也王有四司灵官如府之六曹也一曰举留二曰开聪三曰证误四

曰追失内有一事灾咎随其所掌诚心祷之无不感应此间却阙此香火若能随力创制方为圆备王掌人之休咎灾祥无不关涉又有羊头三圣者行在亦有祠乃七国时功臣旌忠是其封今南门外越台正是其祠若比之府之三圣非也】

曹王庙旧在江宁社坛之前王讳彬谥武惠国初统兵平江南不杀一人邦人感之故立祠焉岁久祠废後人但以土地祀之事见年表

褒忠庙在城南门外建炎三年立褒杨邦乂死节之忠也详见年表及府学祠堂记

庙记【上即位三年金人再入寇渡淮薄江师于东采石先是车驾幸越宰相杜充总诸道兵留镇江左显谟待制陈邦光守建康李桢以前执政为户部尚书供馈饷充闻敌至出其军六万人列戍江南岸而闭门莫敢出师无统一居数日敌知充无鬪志遂渡江江上之军皆不战尽溃充与其戏下数千人北去遂降敌敌入建康桢与邦光不能守桢先降邦光欲弃城去後亦降独通判军府事杨君力拒不从大书其衣裾曰宁作赵氏鬼不为他邦臣以授其仆曰持此以见吾志吾即死矣桢邦光愧谢犹强拥君上马即郊次与俱见金四太子命使拜君叱曰我不降何拜亟遁归卧其家敌虽暴犹未敢辱君也明日遣其将张太师好谕君授以旧官君以首触阶陞曰我以志死何多以诱我为敌大惊卒止之徐曰公所守固高奈势不可何第归审思之吾明日复见公君退亟移书其将曰世岂有不畏死而可利者幸速杀我无久留我至明日其帅燕桢邦光坐堂上乐方作召君立庭下君瞠眦桢邦光叱曰天子以若拒贼不能抗俛首求活犬豕已不若复与共燕乐尚有面目见我乎贼将有起取幅纸书死活二字佯胁君曰公无多言即欲死趣书死字下我乃信君眦吏有簪笔持文书侧立即跃起夺其笔引手掣纸书字曰死敌相顾色又使引去明日再以见金四太子君不胜愤遥望见大骂极口痛诋仰视呼天曰天宁久假汝行礫汝万段尚安得污我敌怒使人疾击君梃交下君骂不絶口遂杀之剖腹取其心明年敌去州以事上闻天子为太息诏赠君直秘阁官其子二人即死所立庙绍兴三年资政殿大学士叶梦得为江东安抚使得其旧吏徐超知溧阳县事张知则皆君死时在旁知状言君甚详而前有司奏不尽备乃复列上请下太史书于策太常议谥时君家在远君尸犹藁葬城西关外诏加赠君朝奉大夫谥曰忠襄赐其庙额曰褒忠官为之改葬乃以是岁三月甲辰葬君城之东南隅二里既启殡君尸犹不尽腐胸腹轻虚如芝菌即其墓前为庙环以周庀禁四旁无得樵牧率其僚以天子之命告君祭以少牢而槨藏之君讳邦乂字希稷吉州庐陵人举进士入官先以奉议郎知溧阳县州兵叛囚其帅宇文粹中君部曲有起应贼者谕止之不聽尽围捕灭之檄邻邑兵入讨贼贼以故不得骋卒就擒其忠决果敢皆天性云君既列庙祀宜有歌诗岁时荐献乃具着其事而系之辞曰天生蒸民地限四极有不能然乃残上国既殄我民尔则逆天畴非赤子胡勿舍旃在昔恪恭罔加一矢不我来庭敢干我纪揭揭杨侯梗其喉牙万夫一躯莫我敢加谁谓尔狂我凭我抑谁谓尔残我挫我斥天子曰嘻唯我有臣曷不赎之人百其身屹屹崇冈侯安于域桢旌旅楹侯有庙食惟皇上帝命侯来归顾瞻山川申我王威侯食百世旗纛旖旎百灵齐趋从侯北指侯车轰轰于彼故疆覆其穴巢向有虎狼若叩帝阍帝笑为喜四方既平侯祀百世曷慕非忠曷畏匪死简于帝衷惟忠弗畏明明天子与帝一心是播是崇是显自今百流滔滔贯于南邦我诗孔昭配此大江资政殿大学士左太中大夫江南东路安抚大使马步军都总管兼知建康军府事管内劝农使行

官留守叶梦得撰端明殿学士太中大夫知建康军府事兼管内劝农使充江南东路安抚使马步军都总管兼营田使兼行宫留守范成大重立石】

旌忠庙在城南铁索寺之东南绍兴三十一年金兵犯淮西御前策选锋军统制姚兴独以一军与金接战於尉子桥鏖战数十合援兵不至竟没于阵将死犹手杀数十人知枢密院叶公义问以事奏闻特赠正任观察使仍命立庙赐今额

省劄【礼部状準绍兴三十一年十一月十二日三省枢密院机速房劄子知枢密院事叶义问劄子奏契勘建康府选锋军统制右武大夫姚兴十一月十七日与金人战于尉子桥以兵四队当敌数万衆鏖战数合手杀数百余人以援兵不至临阵战没死不忘君忠勇可尚当以旌赏以激士气为天下忠义之劝臣除已差参议官一员致祭及往其家抚视孤幼并支赙赠银仍开具诸军阵亡将士姓名保明推恩外欲望圣慈特降睿旨先次将姚兴赠观察使除依格与合得恩泽外更特与恩泽三资仍许奏异姓并于本寨立庙赐额候收复淮西日别于战场立庙牒奉勅宜赐旌忠庙为额】

忠节庙在城东三里与半山寺相望隆兴元年夏江淮都督张公浚命李显忠邵宏渊收复宿州宏渊将王珙深入敌营勦力鏖战自辰至申手杀其兵甚衆竟以战没督府以闻特赠閩州观察使命于本寨前立庙赐额忠节

庙记【上即位之明年建元隆兴夏四月命少傅枢密使魏国公浚董师北征五月甲子度淮已亥与金人战于符离拔其城前将军珙死之魏国公具以闻有诏赠珙閩州观察使官其子若弟八人命建康守择佳山庙食之十二月癸丑庙成赐号忠节惟将军姓王氏字伯温滨远军节度使赠太师谥威定讳德之第三子今武康军承宣使主管殿前因公事珙之弟威定公以西州虎臣遭时艰难扞大敌立大功为中兴名将威定没太上念之深收用其诸子绍兴三十二年冬金主亮入寇駸駸逼江岑以尚书户部侍郎被旨行江上时将军兄弟守柱石敌张甚淮屯多失守将军列强弩杨林堤上持满待敌我师乃济亮銳意渡江将军战舰中流遏击大破之亮即日遁去明年太上内禅又明年闻符离之役後四年岑至自江西才入秦淮殿前公遣刻省潘壽隆持书来曰自逆亮死朝廷未尝弛备而敌情狙诈无状陰扰淮人使不得奠枕中原遗民继踵请命者不絶逮王师北度所至迎降珙弟先拒隋河口而复进及符离敌骑来我军以五色分帜珙率所部绦衣铁冠奋勇苦战自辰至申凡数十合敌军辟易俄敌帅拥精骑数万直指珙军飞矢如雨贯胷洞胁珙拔箭鼓作益死战招讨使止之珙奋然谓国家多事来先人以善战名珙何敢辱今日以马革裹尸幸矣复上马激将士奋臂大呼而入手格杀数十百人城拔而珙亡矣此弟儿时已不凡先人讨贼山东留之济上方八岁为贼所掠问其名曰我王夜叉子也我父惟能杀贼贼惊怖不敢害具鞍马归之後十余年金人寇淮南诸帅合战柘皋先人自采石济江袭取昭关珙不俟命率骑士由万岁岭以前宣抚使张俊挥之殿珙曰父岂少我乎父不顾死矣子当从珙平时喜书史至古人死节处辄掩卷太息垂涕在军三十年得赏赉辄以享士士以故乐为之死重念先人易箠之诫曰我起陇亩中专斧钺为将帅臣上恩我厚矣我死汝曹当捐躯以报不然非吾子也珙果不辱命矣珙晚出雅闻杼山平生以名教自任愿借此笔以激後來岑不识所谓前将军而闻其不辱君不辱亲不辱兄如此

宜大书深刻以侈上赐以来无穷谨题曰赠阆州观察使王公忠节庙碑因作诗遗其子露使歌以祀之将军家世陇西秦将翦之後我国初徙通远军熟羊寨後所谓巩州者今陷敌矣威定公统军来建康因家焉辞曰皇天佑宋生虎臣奋身橐鞬起西秦勇义智畧卫霍伦西平再见愬复兴疾首仇敌敢凭陵恨不一举空朔庭鸣剑抵掌志幽并提兵北趋指神京遇敌大战符离城绦衣铁冠目怒瞋敌衆辟易屡窜奔飞失洞胁殒其身帝心震悼诏廷绅一旦失此飞将军作宫庙食妥其灵生为人雄死明神虽歿不愧远与巡气冲斗牛叩穹旻臣魄长驻大淮滨镇山之南勒坚珉百世祀兮慰忠魂徽猷阁直学士左朝散大夫吴兴郡开国侯食邑一千户赐紫金鱼袋致仕刘岑撰并书】

惠泽龙王庙在水西门里大军仓东政和元年建记云【政和元年夏五月余率僚属祷雨于上下神祇未应邦人愿恭迎鍾山真觉像于保宁方罄哀祈越翼日有蜿蜒降于州宅之阶楯大若指面长及尺许璀璨类青蜴蜥间以金线顾瞻升降怡融自若已而憩于瓶上之柳枝再夕乃去寻有迎致于保宁者彩鬣而黑足又有得于台门之肩者黑脊而紺尾神爽英异弗食弗饮每酌茶以献则腾跃入瓯摇曳汤上弗畏也郡僚再拜叹言且曰是岂顺济邪顺济于江湖庇赖往来甚大东南岁漕数百万舳舻相衔渡浩渺而无颠沉者盖其力也与凡睹灵姿靡不为福今乃屡降而其将至乎江城无小大咸有庙祝兹寔会藩廼寄梵宇悦沐大觐容筑祠以报亦民愿也余不敢诺而心然之未几甘泽霂流蒔秩遂徧倅车曰是可以举矣廼往相地余为请于部使者而得金钱委掌庾赵君司岸张君董其事肇工于七月之甲戌而告成于九月之癸酉堂室高深门序端翼前临通道下瞰秦淮往来之徼福者踵相接廼严像设备礼奉安廼为文以祭其词曰惟主陰功盛德庇赖南邦江流渺弥越数千里舳舻以济往来用宁封爵建祠载在祀典顾兹建业寔号会藩馆舍萧然乃依梵宇牲牢靡设民意缺如时当朱明愆亢方厉灵姿屡降来应祷祈甘泽霂流多稼用茂祝施既厚报称是图廼临康庄廼筑爽垲辰不累浹新宫既成轮奐高明用严崇奉载蠲谷旦式具醪羞尚其燕宁永为民佑既奠爵倏然复见大小有三而采色不同江宁宰曰愿勒祝词于石以示事始余曰是不可以不祀也乃并为书其本末以示方来云岁在辛卯十一月丙申资政殿学士太中大夫知江宁军府事钱塘薛昂记并书】

蜀三大神庙三神有德有功着灵远矣今东南州郡所在建祠金陵大都会独为阙典制使姚公希得蜀人也分阃是邦乃度地於青溪之侧鼎创是祠又於其傍建道室为燂燎之所取管下洞神宫额以名之【创造及房廊费三十三万米八百石买田解本各十万鑿诸石契据砧基寄军资库命道士王道立主之】

庙记【蜀三大神庙食东南无虑数十州陪京盘盘一都会宁神之宇孤寄委陋非所以妥灵旂严祀事也景定二年冬予被命留钥始至简节疏目治以不扰相古成民致力厥有先後明年雨阳来叙农事告登乃广地于青溪之阳厥既得卜则以季秋经始匠石材芻一取诸互送之礼撙节之余越中冬落成櫨櫨翼如泉流环绕契陰阳之回复合人物之指归吉日辰良乃安斯寝像设鼎列位序以伦爰率衣冠人士进礼庙下牺币有仪兴俯中度命宾为歌楚歌之九以乐之呜呜然新庙之感旧都之怀也或曰楚祠睢漳广祭南海古者各以其地祭之神显灵于蜀固也其歆祀于业乎诗曰神之格思不可度思谓其变动难测无方可泥尔名山大泽

之祇常周流乎冥漠譬之水天地间容有闭塞不通之脉心诚求之盖有不疾而速者先王祭法凡五禹之功契之教非此族也不在焉若清源君之凿离避沫驱除罔象西人永赖功不细矣梓潼君之雪母讐耻职是文人白崖君之谏君泽民之死靡二质诸祭法俱在勤事定国御灾扞患之科而禹契之事同一道也然则惟忠惟孝其道理取大贯三才关百圣由先秦越六朝迨今千六百年益见人伦天理神人寔共主张是顷金兵入蜀为梁于涪中外束手惟神之归皇武惟扬敌殪而遁非神之声赫灵濯蜀其不震乎师相载嘉神功以其事闻煌煌显封奕奕寢庙孔盖翠旂遥观上国忠孝之报其食未艾也矧金陵行阙王气所聚锺阜石城无以异于岷山剑阁之胜也三神来之燕来享于彼乎于此乎然则人不神不祇神人不人不依登斯庙者盍知予所以建祠之意云通议大夫试刑部尚书沿江制置使知建康军府事兼管内劝农营田使江南东路安抚使马步军都管主管行宫留守司公事节制和州无为军安庆府三郡屯田使兼权淮西总领郟县开国子食邑五百户姚希得记中奉大夫权兵部尚书兼直学士院兼侍读洪勲书朝请大夫试尚书礼部侍郎兼同修国史寔录院同修撰兼侍读年子才篆盖庙额参知政事杨阙书】

重修东岳庙府城旧有是庙岁久颓塌景定四年制使姚公任内鼎新重建九月十日兴工至十一月十五日毕其正殿门庑逐一修换像设庄严总费一十万二千九百八十余缗米四百二十五石五斗有奇

重建吴晋二帝两庙吴大帝庙旧石城西门外久已隳废仅存荒基景定五年春制使姚公希得专委添倅陈蒙相视据申以谓故基僻左不便欵谒晋元帝庙侧有废寺基颇堪改造庶几二帝庙貌接轸便于奉祀且有合昔人题咏何当并建琅邪庙之意遂即其地创立殿宇门楼廊庑等屋设帝像绘侍臣及办一应装摺供器都门着衣亭则与晋庙共之计用钱七万二千五百余缗米三百一十三石七斗有奇晋元帝庙殿宇重创视昔增高门庑墙壁则仍其旧而葺之臣主像貌庄严一新庑间三十四贤图形再从彩绘且作亭庙前尽挹江山为骚人墨客怀古游瞻之地用钱六万七千三百余缗米二百五十九石有奇

庙记【金陵自秦有王气之占後五百年孙氏建都邑以当其数而不知渡江自有一龙也然龙蟠虎踞则由孙氏发之而始为帝王州若吴与晋俱齎食万世可也今石头之西麓有大帝庙或谓吴故宫而图碣一无所考其东麓则晋元帝庙也嘉定五年江淮制置使黄公度繇城隍徙焉两庑设晋臣像凡三十有四王导谢安特位于西房体粗具而屋亦老矣吴庙去不五十步丘陇之所侵冒樵牧之所便安破屋余础颓像露空过者怆之水心叶公作晋庙记已谓邦人不记其王此土矧能记吴大帝邪骚人怀古徒有悲吟如曾景建芦花枫叶几年无之句如後村刘公今人浑忘却江左是谁开之句犹数千年前事後是可想矣景思将漕之明年是为刑部尚书潼川姚公希得尹厘之三年道洽政通阃无遗事郊车草具约登冶城观二卞庙曰吾修此以劝忠孝焉乃历石头城而人骇棖桷之菱碧丹之濩濩也曰是祠晋元帝即旧宇庚而新稍顾其右隆厦重起若主若宾曰是祠吴大帝繇故基徙而并石头江山最雄处异代英君昔所经营不妄于斯乎想夫沆寥之夕芒忽之间俨袞襜之嘉容纷冠剑其来□紫髯戟若龙顔炜如相与痛当日之偏安指神州之鹄没忘其为吴晋之异今昔之非也子其为我志之景思曰诺夫水旱菑疾之应祷者有司颺其事生死祸福之惊动人者凡民聚其力今公

之为是也越在祭法审先後之序矣而庙不以序乎从世代则晋当後吴论附庸则吴不得以先晋公曰是不然与孙氏以数州之地合刘而诛曹也并知任能恤民固境赤壁一战霸业以开江东君臣非下人者逮鼎分为三则天下事去矣它日听童谣而怀建业其志又有大可悲者焉晋之兴也虽取中原于魏而实得正统于蜀晋帝不幸寄国江沱其明断足以除凶激烈可以死士中华元气微弱相承更宋齐梁陈而後为隋唐之混一盖正统也今因晋而表吴所以本霸基左吴而右晋所以尊正统非欽景思请即是以表于庙董是役者通判四明陈蒙蒙告刻石更系以享神之辞辞曰山兮如慕水兮如诉问故宫兮莽何许有翼其宇有百其堵中冕旒兮冠佩以序邦伯维主酒醴维醺祉我民兮日毋沦我土景定五年三月二十五日中大夫集英殿修撰江南东路计度转运副使兼权淮西总领陆景恩撰并书太中大夫权礼部尚书兼直学士院兼给事中兼同修国史寔录院同修撰兼侍读年子才篆盖通议大夫试刑部尚书沿江制置使知建康府江东安抚使主管行宫留守司公事姚希得立】

重修忠烈庙卞公壮烈英风千载一日庙祀有严岁久弗治景定五年制使姚公希得乃捐库金重新修葺工物总费七万九千九百二十余缗米二百七十三石六斗有奇

记曰【忠烈晋尚书令右将军卞公祠绍兴三十二年十有二月魏国定献张公来殿是邦下车首严祀事澹庵忠简胡公记之所以崇节义淑人心也景定二年冬潼川姚希得寔护留钥後公牛百年庙貌弗葺栋檻挠顿旁风上雨治城吊古有慨于心及是昉克以成民余力为之经始匠石材苇不取诸民规矍佐置一仍其旧俨英灵之如在启人士之新敬先是庙有租以助经费後乃渔于道流漫失初意因厘正之俾庙不失利以备葺治成既落只盍石诸按公力疾鏖战奋不顾身死于忠而不废臣节眵眵亟赴父难鬪不旋踵死于孝而不失子道是翁是季一门所立如此虽古圣贤何以尚兹我朝列圣相承肇修人纪尽力君亲者必录得罪名教者必诛庆历元佑秩公祀典南渡中兴锡公庙额我魏公张而大之岂苟然哉善乎澹庵之言曰微公崇尚名教砥砺颓风则孔孟仁义之谈扫地噫仁而违亲义而後君古今万无是理也臣当死忠子当死孝天下一同是心也卞公之心魏公之心也澹庵之心也希得西士晚出承俊躅于百岁後能不以魏公之心为心乎晋史称公妻裴氏抚二子尸哭曰父为忠臣汝为孝子夫何恨乎殆与范滂母同一令名庙荐弗及非缺欤今并祠夫人于後堂春秋同奠焉发千古幽潜之光示万世臣子之法诗曰高山仰止景行行止故为之书】

重修晋都督谢将军庙景定四年制使姚公希得任内特拨钱米付都统司重行整葺自二月二十九至六月初九毕工计费旧楮四千余缗米九石六斗有奇重修姚显王庙景定四年制使姚公希得任内重行修葺九月十六日兴工至十月初五日毕费一千六百五十余缗米四石有奇

重修忠节王将军庙景定四年四月初四日兴工至五月初九日毕费一千一百五十余缗米四石有奇

景定建康志卷四十四

卷四十五

<史部,地理类,都会郡县之属,景定建康志>

钦定四库全书

景定建康志卷四十五 宋 周应合 撰

祠祀志二

宫观

天庆观在城西门内崇道桥北

考证南宋废国学置总明观地即吴冶城晋西州也其後总明观废道家者流以儒观之名为道士观伪吴时於其地建紫极宫司命真君殿徐铉作记云冶城峻址西州旧宇卞贞公之遗陇郭文举之故台本朝大中祥符间赐额改为祥符宫续又改为天庆观建炎兵火後羽流结茅屋以居至绍兴十七年留守晁公谦之请于朝重建之

旧太乙殿基即郭文举读书台也今在圣祖殿後冶城楼忠孝亭在观之右【详见卞壺墓】陈轩金陵集载富临狄咸郭祥正同游紫极宫竹轩观王相国旧题苏子瞻书子由诗祥正和之有老鹤唳风之句写之壁间未竟有白鹤数十翔舞北极坛上徘徊而去淳佑初留守别公之杰倡诸司捐金粟重修之太学正章公权为之记【记云汉兴三世至于孝文好道家之学躬修玄默而清静之化流我真宗皇帝绍修圣绪以时考之亦汉文时也意将不言而化行无为而事治迺大兴道教诏诸路军州各建天庆观至于或因或革或狭或广其土木费用或一出科降或兼资施舍则不能?全金陵之天庆盖晋冶城故地杨氏之吴建为紫极宫籍田二十顷在常之晋陵无锡间暨为天庆田亦因之熙宁间始勅免税役建炎初金人犯江兵火之後故迹尽矣其徒结茅居奉香火垂二十年晁公谦之守是邦迺请于朝一切鼎新帖请通元大师方清迪主之嘉熙淳佑之交旱魃为虐阊台望雨靡神不钦邈无应验制守资政别公之杰闻茅山景元范诚信质实行可对越其祖师即开山方君道法灵通的有传授迺选请住持就命祷雨章甫奏而迅雷烈风随作雨集沟浍皆盈已而有秋边烽亦熄别公遂以暇日数延见谈玄虚益加敬重因言观宇颓弊当葺更图开广别公慨然捐金粟以倡两台诸寄寓若有力者亦皆出貲共成自辛丑至辛亥十有一年迺毕工见者咸曰壮哉观而况竹亭翼然乎其东境界清特其西为冶城楼地形高楼又高寔留都絶境登楼梯想麦秀黍离近悲六代之故墟云霭微茫远认关洛于江淮之外古今变态尽在目中士大夫好尚闲雅常兹游息若其感慨之余道香涤尘静趣天契或兴遗世独立乘虚御风之想视乌衣翠微青溪赏心雨华凤台之游踵东南之迹皓齿细腰相与娱乐亦径庭矣噫道家以太虚为域宇宙为宫三光为灯烛云霞为香火主之以绹衣帝君妙不宰之宰修不工之工居天下之广居洞洞豁豁一无障碍此

道之所以为大今之宫室栋宇寔寄也然道自无而生有有复于无则无者超矣自虚而生寔寔归于虚则虚者至矣我有大患为我有身苟未能外其身而身存则凡教门之事意者有辅于世道尽心力而为之夫岂容已天庆自初建碑刻具详隳于火久不复合重建既备乌可竟泯其传故即羽流所述记其畧焉淳佑十二年正月日承直郎新除太学正古括章公权撰】

报恩光孝观在府治西南

考证观基元系陈朝进奏院故址崇宁二年十二月奉勅江宁府合置观赐崇宁观为额政和元年十二月圣旨崇宁观并改为天宁万壽观绍兴九年八月圣旨诸路天宁万壽观并以报恩光孝为额专充追崇徽宗皇帝道场其曾经烧毁去处州县不得因今来指挥辄兴工役本观愿自修盖者听

崇禧观在大茅峰北华阳洞南门之东即古太平观考证唐史方技传道士王知远少聪敏博综羣书初入茅山师事陶弘景传其道法高祖之潜龙也知远尝传符命太宗平王世充与房玄龄微服以谒知远曰此中有圣人得非秦王乎太宗以寔告知远曰方作太平天子愿自爱也太宗登极将重加禄位知远固请归山贞观九年润州置太平观以处之旧图经云晋陶隐居创後为永嘉馆复为嘉遁馆以待四方之衆即此也後号太平观为盗所焚南唐昇元初重建国朝祥符元年因祈祷致醮改今额建炎四年废于火绍兴中再剏

陶弘景传云大茅中茅间有积金岭先生于岭西立华阳上下馆

旧记云崇禧观即梁贞白先生陶君华阳之下馆茅山记云太师益国公以金帛建造观宇粗备先是真皇祈嗣兹山既获感应自此每岁遇圣节建金籙道场七昼夜内降青词朱表并降香施料命句容县宰充代拜官设醮於此至今为例由是总辖诸山此观为甲张商英撰碑铭

【东南之镇曰句曲山盖华阳洞天地肺福地易迁含真之所宅司命童初之所治晋宋以来得道之士二许杨陶遗坛故宅犹有存者宫观十二崇禧总之国家灵承天心敷锡民福鍤金之虬镂玉之简妙真之香丹素之词岁修常典间遣王人设官以提其纲赐田以瞻其衆宜其宫阙壮丽列圣下居廊庑深严万灵侍卫至者悚然有以移其视听居者肃然有以洗其心志僊科秘范之所出宝章灵篆之所宗而希夷淡泊之门寂寞无味之教学士大夫未之省或谓州县政事又非所先田租所入悉笼于官道侣计口而赋粮有司互券而出纳方斗筲之鈎考孰土木之暇议上下顾望岁月因循屋颠而不扶榱故而不革厅废而不兴垣颓而不作宝文待制何公君表在元佑中以趣向背时提举西京崇福宫居金陵尝至山中熟知其弊绍圣亲政召对便殿明年移镇于此伸发曩志议营缮之会商英谪莅管库公图以授商英曰子于道家之学博且久矣凡向背与开合之不如经者其悉据古考证之商英视图南面三门则道俗出入之所由也体三清北极本命三殿相直而玉皇殿迺在东隅商英谨按老子之书曰天法道道法自然所谓自然者清气之始也其天为清微其境为玉清其天尊为元始其帝为玉皇所谓道者气之纯清也其天为禹余其境为上清其太上为大道玉晨君其帝为天皇所谓天者气之积清也其天为大赤境为太清其太上为老君其帝为北极本命者支子之神以统于北极者也北极者中天之枢以承玉皇者也今以北极次三清以本命次北极而玉皇居左非道之序也神而来格亦莫安于其位矣请先玉皇後北极而左本命三门者神灵之所由也非祠醮则阖之东建道院西设宾馆如此则尊卑不相乱道俗不相淆人神不相杂矣公曰善乎

论也兹山宫宇古今废置不一道术之士有在于是者亦已多矣曾亡一人以三气三天三尊三帝之说辨正升降者岂崇无以复静者或阙于羣有之用造有以致动者或昧于至无之体哉已移句容县如子之议因而完之矣越明年五月玉皇殿成奉安之日有双白鹤终日回翔遶唳其上于是上清大洞法师刘混康与其?籙弟子曰异时白鹤尝以三目士八日来集或有或亡亦不常也今殿成而鹤降非何公崇敬之诚默与真契其何以召其祥请绘公于别室以永我邦人之思已事而求记于商英廼序而系之颂曰一气之先强名自然致虚为道运道成天三彰一隐一立三全分为九气列为八埏峩峩茅峰东南之望帝居道祠于山下上厥初经营先後错爽何公正之灵报如响仪仪者鹤来自云霄谁其驾之于焉逍遥气合太冲神游沆寥监观在下德馨孔昭宫室绚绚岩谷焕焕风马霓旌侯止侯燕维山有祥维国有良天子万年赖及四方何公于蕃百治皆具神之听之亦惟公故锡尔嘉谷宜其邦人介尔多佑耆宁厥身邦人感仰绘公之像配山久长以对景觐绍圣三年十月八日朝奉郎充宝文阁待制知江宁府事充江南东路兵马钤辖柱国赐紫金鱼袋何正臣立石】

玉晨观世人称为茅山第一福地

考证高辛时展上公周时郭真人巴陵侯汉时杜广平东晋杨真人许长史父子唐李玄静南唐王贞素并在此得道梁时陶隐居於此精修为朱阳馆唐太宗时为华阳观玄宗时为紫阳观皇朝大中祥符元年九月奉勅改为玉晨观【顏真卿茅山元靖先生李君碑云先生尝以茅山灵迹剪焉将堕真经秘籙亦多散落请归修葺乃特诏于杨许旧居紫阳以宅之韦景昭丹阳延陵人师事包士荣天宝中与元靖先生奉诏造紫阳而居焉徐铉紫阳观碑云紫阳观者今上为烈祖孝高皇帝元敬皇后之所重修也又华阳洞天寔羣僊之福地金陵地肺又三茅之福郷左凭柳汧烟霞韬映右带阳谷川原鳞隐伏龙靡迤镇以雷平之岭郁岗回合浸以护军之潭郭真人中舫之地不迁留岸许长史炼丹之井自冽寒泉】

太平观在茅山侧

考证梁书陶隐居读书万余卷善琴碁为诸王府侍读永明十年乃挂衣冠神武门居句容之曲山立馆自号华阳陶隐居国朝元符中改为太平观

崇壽观在茅山

考证九锡碑云宋太始中庐陵太守鲁国孔嗣之为道士华文贤建旧记云晋任真人旧宅宋元嘉十一年路太后建未详孰是齐建元二年立崇元馆为太子尝临之重广基堂唐天宝奉勅重修本朝改为崇壽观

下泊宫在中茅西

考证三茅记云茅君自秦汉间结庵修行於此得道飞昇至宣帝地节二年赐额为宫唐贞元十一年黄洞元作记【记畧云下泊宫者上清司命真君之旧宅也夫大道杳冥辽廓无像神

僊主宰尚有玄司太古立以祠堂示存教之迹也】

元符万宁宫在茅山

考证三茅记云嘉佑中有蜀人王略于积金峰结庐以炼丹药乐全张文定公以诗赠之事见乐全集中略後因事舍去刘混康初入山居之哲宗皇帝召混康赴阙诏以所居为元符观崇宁五年落成徽宗皇帝御题其榜曰元符万宁宫建炎四年为盗所焚少傅杨沂中以私财建造殿堂轮奐踰于旧矣

祠宇宫在中茅峰西侧

考证旧记云唐天宝七年勅于庙下立精舍度道士焚修屯田员外郎柳识建碑

华阳宫在茅山积金岭

考证旧记本贞白之上馆唐天宝七年三月勅度道士焚修後毁于兵宋朝政和中重建宣德郎郭衡为之记【记畧曰句曲山之华阳陶隐居之上馆也陶以上馆自居以中馆处弟子以下馆延四方高士累功修德上馆居多是以引珠泉以炼大还修本草以和名饵设大慈于宫而向道者心化置灵符于井而饮水者患愈功成事遂而馆名遽立于天监之时真积力久而华阳始建于天宝之际惜乎尔後干戈麀聚于中原烈焰炽延于深谷天后便阙啸聚者居之清虚东窗兵刃则藏之三峯鹤驭远九转丹炉隳垣圯神居迹屏上方暨至我朝海内清肃祥符天圣真风振兴皇佑以来迺有神隐大师道正庄慎质者天才超颖德操迈逸心恬渊静身乐清虚侍从师资安养斯馆爰及政和三年已踰六十六载悯漏弗填畏倾弗支于是起役山嵒鳩工云集征材蔽谷挥刃摩天昔唯茅茨今且华之昔唯土堦今且甃之此记】

乾元观在茅山大横山下

考证陶隐居真诰定录言大横山下有泉昔李明于下合丹而升玄洲梁天监十四年陶隐居翔郁罡斋室以追玄洲之踪天宝中玄静先生居之制旨建置殿堂台榭甚多皆明皇赐额曰栖真堂会真亭候僊亭道德亭迎恩拜表等亭国朝大中祥符二年国师朱观妙于此结庐修行先赐集虚庵为额天圣三年九月改赐今额

天圣观在茅山积金峰上

考证梁天监初陶弘景开翔池沼唐贞观中建立道靖至德中赐名火浣宫唐末遂废本朝景德中张明真结庐於此祥符中御制观龙歌送龙归三茅山所得之池即此处也天圣三年九月赐名延真庵五王赐额为观

五云观在茅山华阳洞西门五云峰下

考证仁宗景佑太师中书令王文穆公钦若於此建庵景佑四年四月七日赐额五云观庆历二年十月丞相晏元献公殊撰记後为雷所击碎碑不再刻文见晏公集中【记云丞相冀文穆公即世之明年其小君许国夫人闻于内朝请建道馆于茅山之南麓以为公栖神之所圣上追念大臣哀怜时思特命郡守旧相李公迪主其营缮又勅公门下吏右侍禁张得一董其力役後十四年夫人以制度之未备申命公之犹子右班殿直士顥往增葺焉姑赐名曰五云观僦工于天圣之丙寅已事于康定之庚辰其广袤因崖巘之回抱其奥阼视科文之品第崇堂以宅肖像秘殿以严真供层阁崛起广除环构修廊蔓衍高阁齐开庖厨有方廩库有次其外则坛场着前朝之蹟洞穴表灵峯之蕴乔松夹植?行旅之劳良田外营资糗膳之给妙择勤士恭修秘式其所以尊奉遗貌妥安净衆者罔不周具惟道家者流有清静冲虚之说归真复朴之教後代悦其风者触类而长于是乎幽经秘谈之敷演清都洞台之照临三云八景之鍾修童初广寒之游集上自后辟迄于臣民用资化原着在彝典初真宗皇帝既偃武节事修文事封太山歛后土谒僊里建灵宫务辑一王之仪邈追前代之盛公于是时都将相之重极风云之遇与一二元老泊鸿儒硕生内则翊赞宸猷外则讨论经礼用削藁之沈密荷沃心之赏待备前箸而谋定申巽风而令行至如检玉分丘瘞繒雕壤近向巡豫嘉坛袞对咸遵秘籙聿彰勤任用三洞之科式先八鸾而启行公则参仪卫之职焉寅受天瑞钦崇祖烈五岳升号灵泉效祉并敝真宇茂昭元贖公又历置使之任焉摠集髦隽纷披载籍结百世之龟监述方来之矩矱复诏公之典领焉公又以混元之法有助亨会函笈所蕴源流寔繁欣逢圣明得用论次乃复选通达其学者校讐而辨正焉名山洞室之藏金简玉文之萃多所刊定讫无抗谬本至性之冲漠益圣朝之参会徜徉乎重霄太霞之境讽咏乎广韶曲素之篇寤寐赤松之游沈酣金匕之药间接真士高谈妙枢由是翛然有乘圣骖鸞?人拚俗之想每出沐休暇或元辰令吉特想世事?修净醮坛宇严邃旌幡飒纒杳尘寰之不接疑景象之有闻縣襪寢久积精忘倦乾兴壬戌岁分符秣陵春言兹山寔近郊次俄奉中诏即伸嘉荐注慕灵壤襄徊净域适尔自得澹乎忘归隐士朱自英者肥遯中岩载更年所公乐其素尚宛若故交还朝秉钧之再岁以其名闻召至都下宴语紬绎异于常伦及其还山又约它日卜隣洞府音旨隆密朱生异之後数月而公捐館舍且有遗语卜兹締构前後所费私帑凡百五十万官给不预焉续诏自英往还临莅之皆从公之素志也按真诰言句曲地肺土良水清谓之华阳洞天可以度世种民是处三灾不干又言至忠至孝之人皆先受灵职次为列僊岁登降其幽明如人间之考绩则公之结思崇岫归诚妙象岂徒然哉矧夫出应贤运越登极位佐时勲大用物精多非特受灵气复踰羣品曷以协昌辰之伟任非默契僊籙往阶真格曷以显太和之挺生质于前闻其有冥合鸣嘻乘时奋庸握文武之柄尊主庇物罄其蕴怀执方持衡不疚风议恒赫輝燿以功名自终然後脱遣世氛与羡门偃佺之徒相期于烟霭之际不其盛欤不其伟欤惟夫人恪奉治命无忘遙追其嗣子殿中丞寅亮瞿瞿协心克终胜槩足播徽范永光图史谓殊夙以文翰游公馆宇见托撰述着之金石是用拜礼命之辱而忘其陋芜公姓王氏讳钦若字定国夫人姓李氏公之邑里世系历官差次上载史谍下刊碑志此得畧而不书庆历二年岁次壬午十月晏殊记】

抱元观在茅山柳谷泉

考证旧名柳谷庵政和八年六月二十九日因陈希微修行於此有勅赐抱元观为额庆元间

王元纲重建刘运使尝题诗【龙岗十里秀蟠云天斲灵虚舘异人柳眼长年驻春色金精一掬吐寒津田公羽驾随飚远长史琅函得语真今日我来师接否半窗飞雪话蒙屯】

昇元观在中茅峰西

考证本名白鹤庙刘至孝三遇僊桃之所也元佑中桐川道士汤友成友直居之政和八年守臣俞?奏改今额

栖真观在崇禧观东

考证本名玉霄庵旧记云贞白陶君之中馆和州史君尹士牟撰碑宣和中赐今额

华阳观在崇壽观西

考证旧名鸿禧院旧记云宝历二年奉勅置即梁昭明太子旧宅丘徵君亦隱於此上柱国李相德裕延太玄周先生於此建立院碑侍御史贾餗文宣和初改赐今额【周先生名隱遥字息元居洞庭包山不以尽夜更动息不以寒暑易纈厚不食而甚力虽饮而无漏唐令狐楚作记僊传拾遗有传】

清真观在大罗源中

考证政和中吴德清始营建为道人栖泊之所徽宗朝赐以观额绍兴间每岁三月十八日四方道人皆会於此斋时多有鹤至故谓之鹤会

燕洞宫在茅山柳谷汧东

考证宫之东南有燕口山三小山相偶梁普通中有晋陵女子钱氏妙真年十九辞家学道师事陶隐居独处幽岩诵黄庭经积三十年佩白练入洞自後奉祠不絕至唐天宝七年兴修为宫赐额燕洞宫度女冠以绍香火梁邵陵王为记国朝嘉佑甲辰野火焚之遂移於句容县绍兴二十年复於旧基上兴建

白云崇福观在中茅峰西白云峰下

考证先是华阳宫知宫道士王景温退居结庐於此绍兴三十二年名闻於上诏即所居为白云崇福观召对德壽宫赐紫衣虚静之号

永僊观在茅山国朝淳熙甲辰刘先觉以高士召赴行在赐对重华宫讲解南华真经引疾还山携赐诗於抱朴峰诛茅栖泊始名玉霄庵今改此额

宝华宫旧在方山南唐昇元中为母后所建後废淳熙七年度士吕志淳移其额於城南门外重建

洞玄观在方山南輿地志吴赤乌三年为葛玄子方山立观後玄白日昇天今方山犹有煮药铛及药臼在唐贞观六年并岩栖观入焉

永乐观在城东北七十里旧经云汉刘谦光舍宅为观南唐昇元中重修国朝改为崇虚观

修真观在天庆观西旧在越王台下南唐保大七年置为女冠观国朝开宝八年焚毁太平兴国二年移置於此

藏真观在茅山叠玉峰南临大路刘静一先生解真瘞剑之地国朝大观中建因赐额为藏真今观侧有静一先生墓

崇元观齐建元中改为崇元館唐天宝七年重修国朝大中祥符七年改今额

复洞神宫据旧志所载是宫旧在蒋山太平兴国寺东今有古基塔级存焉制使姚公希得任内因创兴蜀三大神庙於青溪侧景定四年就於其旁创一道宫以为祈报燎燹之所因以洞神旧额加之首命道士王道立为知宫【费十三万旧楮米五百石】

记云【天高地下万物散殊人以渺然之軀并列为三其所以与天地相似者曰诚而已诚也者寔然之理匪初匪终匪狂匪圣不可以聪慧求不可以声臭接而须臾不容?此知愚之所同得也天维高明日月星辰运行无息万物覆焉地体博厚岳瀆河海洪纖小大万物载焉上际下蟠无一隙不到古往今来无一息间断所以主张纲维其间微是理之寔然者其何所取证人与天地同厥有初听聪视明即此理之高目下耳者也是非决择即此理之赏善罚?者也万象不能匹形气不能碍昭昭灵灵毫末有欺而陟降左右已毛髮森豎于大譴大呵之域维皇上帝陰隲下民风雨霜露无非至教神祇上下昭布森列消息盈虚之易处襍祥祸福之异宜岂有心其间哉惟天苍苍以万物之心为心而自无心惟天无私以万物之感应为感应而自无感应不然何其形声影响不失锱铢如是可考不诬哉衆人昧上天本然之知而为人上天以衆人同然之体而为天其降衷不异而源委本末遂有毫厘千里之差可叹也後世不推源其自于天人之际岐而为二所以事天者始屋而居之像而崇之曾谓昭格之诚果在是乎虽然收其放心于主一不二之地则其本然不失者固非牛羊斧斤可以尽皆斲丧官宇之设其来已非一日矣建业旧有洞神宫久废不治景定辛酉东川姚公希得来司留钥其政以敬事而信节用而爱人为本既明年化行惠孚乃卜青溪之胜以祠蜀三大神又明年因洞神之扁筑琳宫于左命黄冠主其香火盖亦谓世俗耳目未可顿跻之本然之地其摄齐而入肃容而登则其心未始不如俸盘水如承大祭不待驱迫而天理见前斯亦入德之方也已宫後告成公俾复之记其行事复之嘉公之本心有在乎是于是乎书景定五年二月日朝散大夫直焕章阁主管成都府玉局观合阳文复之譔朝散郎差充沿江制置使司参议官严滩黄蛻书丹朝散郎差充沿江制置使司参谋官天台赵时橐题盖】

景定建康志卷四十五

卷四十六

钦定四库全书

景定建康志卷四十六 宋 周应合 撰

祠祀志三

寺院

保宁禅寺在城内饮虹桥南保宁坊内

考证吴大帝赤乌四年为西竺康僧舍建寺名建初刘宋有凤翔集此山因建凤凰台於寺侧宋更寺名曰祇园齐更名曰白塔唐初复名曰建初开元更名曰长庆南唐更名曰奉先国朝太平兴国中赐额曰保宁祥符六年增建经钟楼观音殿罗汉堂水陆堂东西方丈庄严盛丽安衆五百又建灵光凤凰凌虚三亭照映山谷围甃墉墙五百丈茂林修竹松桧藂蔚诏岁度五僧政和七年勅改神霄宫建炎元年勅复旧额三年四月大驾幸江宁权以祠为行宫闰七月如浙西其後命即府治修为行宫而御座犹在本寺岁久屋弊留守马光祖重建殿宇及方丈观音殿水陆堂厨堂库院移钟楼冠青龙首增建廊屋横直一十八间作新建凤凰台记详见凤凰台下【叶梦得轮藏记维摩氏极天下之辩而反之于默其为法名之曰不二一去不二即一矣不言其一而言不二岂以一犹为有在者与道未始有二也既已有物不得不裂为二彼自为二而吾强欲一之必有废其一以成其二者非道之全也要有非一而不二者存焉尔何特维摩氏为然孔子曰有鄙夫问于我空空如也我叩其两端而竭焉空空云者岂有物寔之者哉然犹意其堕于一也则叩之以两端盖维摩氏所谓不二法叩之两端而知其所解则以吾之所知证彼之所知可一举而尽矣之人也谓之鄙夫则可谓之君子则不可佛以无所言而为一切衆生无所不言以为有言不言是颠倒见以为无言不言是断灭见孰能辩其非一而不二者乎自汉永平为佛者始持其书入中国由晋宋历唐至于今不絶梵语华言更相发明传其学者又从而申衍之其说遂充满天下辑而藏之皆设为峻宇高臺雕刻彩绘备衆宝以为饰竭衆巧以为工苟可以庄严者无不至梁普通复有异人为之转轮以运之其致意深矣吾少时见四方为转轮藏者无几比年以来所在大都邑下至穷山深谷号为兰若十而六七吹蠡伐鼓音声相闻襁负金帛踵蹶户外可谓甚盛然未必皆达其言尊其教也施者假之以徼福造者因之以利鬻日远其本建康府保宁寺当承平时于江左为名刹更兵火久废今长老怀祖守其故址于煨烬之余十有四年堂殿门庑追复其旧而一新之最後作转轮藏余镇建康时见其始经营後四年余归石林祖以言来告曰藏成矣幸得记其本末祖盖以正法眼传其心者其为人洁而通精深而敏非徒以有为作佛事者也乃为推其师之言合诸儒之说正佛之所以言以晓世俗之弊祖当益以是救之夫方无所言则维摩氏之默如大阿难等得道受记诸大弟子皆不任问疾及其无所不言则虽观世音亦从闻所闻而入尔

乃寺之兴废系其时人之施舍系其力有石必记故不书】

正觉禅寺名铁塔寺在城内西北冶城後岗上

考证宋泰始中邦人舍地建精舍号延祚寺至唐有灵智禅师生无双目号罗睺和尚经论文字悉能明了时人称有天眼为建塔于寺内广明中赐额

梁侯景之乱王僧辩入讨景使其党宋长贵守延祚寺何逊有登延祚寺阁诗 佛殿前有铁塔二座铸云乾兴元年造有钟亦唐时所铸有经幢镌大吴金陵府延祚院寺有井十一口内一口最大号为百丈泉井栏上字乃保大元年所镌 国朝熙宁中赐寺名正觉塔名曰普照

王荆公尝於寺西作书院有轩名箴龙 建炎三年以法堂西偏为元懿太子攢宫【详见攢宫】曾极刘克庄皆尝题诗【曾极诗逝水无情去不回黄帘窳地隔风埃摩挲铁塔堪流涕此是君王思子台 刘克庄诗细认苔间寺方知铸塔时不因兵废坏似有物扶持古殿人开少深窗日上迟僧言明受寺相对各攢眉】

能仁禅寺在城内南厢嘉瑞坊

考证庆元年间游九言撰本寺佛殿记略云能仁寺南接秦淮数百步按其地古青溪之濱也初名报恩宋元嘉文帝为高祖剏建唐会昌中废伪吴太和六年毗陵郡公徐景运复为其亲造曰报先南唐昇元改兴慈无镌识可考独据图经所载然五代唐愍帝应顺甲午为吴之太和逆数会昌乙丑盖已九十年既曰废矣中间谁所继续乎院之老僧相传仅记本朝之言院故在西门双庙之东至道中有圆觉律师明者际遇太宗皇帝召见锡之御容及罗汉像以归咸平间重赐院基田产更律为禅宠以圣制诗章【诗见第四卷】院复大显至崇宁赐名承天政和七年改能仁今之寺基咸平所赐而迁也

蒋山太平兴国禅寺去城一十五里

考证梁武帝天监十三年以定林寺前冈独龙阜葬志公永定公主以汤沐之资造浮图五级於其上十四年即塔前建开善寺今寺乃其地也唐乾符中改为宝公院南唐昇元中徐德裕重修後主又改为开善道场 国朝太平兴国五年改赐今额庆历二年叶公清臣奏请为十方禅院【侍郎刘公岑蒋山大佛殿记云宝公道場始于梁武其女号曰永定公主割舍私财创为精舍当时词臣陆倕王均作为文章以纪其事我本朝大中祥符赐榜太平兴国禅寺加封宝公道林真觉庆历改元翰林学士叶清臣来守是邦以禅易律元丰主僧曰法泉者经营辛苦成大丛林焚于建炎复于绍兴云大佛殿前又有大毗卢阁两翼为行道阁属之殿其余堂庑极其雄丽皆绍兴以来所建淳熙十六年九月晦一火而烬今累年营缮駸駸复盛矣宝公旧像父老相传以沉香为之国初取归京师陈轩金陵集载狄咸游蒋山诗云旃檀归象魏窳塔卧烟霞盖谓此也本朝太平兴国七年舒氏柯萼遇老僧往万岁山指古松下掘之得石篆乃宝公记圣祚绵远之文于是遣使致谢谥曰宝公妙觉治平初更谥道林真觉大师按建康寔录开善寺有志公履唐神龙初郑克俊取之以归长安今洗鉢池尚在塔西二里法云寺基方池是也寺西有曰道光泉以僧道光穿斲得名曰宋熙泉以近宋熙寺基之侧有八功德水

在寺东悟真庵之後一云泉在寺北高峯絶顶寺东山巔有定心石下临峭壁寺西百余步有白莲庵庵前有白莲池乃策禅师退居之所寺後向东北有娄禅师之塔】题咏【李司徒建勲楼台虽少景何深满地青苔胜布金松影晚留僧共坐水声闲与客同寻清凉会拟归莲社沉湎终须弃竹林长爱吟经案上石窗秋霁向于岑因题道林虽向锤峯数寺连就中奇胜出其间不教幽树妨闲地别着高窗向远山莲沼水从双涧入客堂僧自九华还无因得结香灯社空王门玷玉班李中宿投林下寺中夜觉神清磬罢僧初定山空月又生笼灯吐冷艷起寒声待晓红尘里依前冒远程徐伯阳聊追邺城友蹊步出兰宫法侣殊人世天花异俗中鸟声不测处松吟未觉风此时超爱网还复洗尘蒙崔峒山殿秋云里香烟出翠微客寻朝市去僧背夕阳归下界千门见前朝万事非看心兼送目葭菼暮依依王荆公安石登宝公塔倦童疲马放松门自把长筇石根江月转空为白昼岭云分暝与黄昏鼠摇岑寂声随起鷗矫荒寒影对翻当此不知谁坐客道人忘我我忘言重登宝公塔空见方坟涌半霄难将生死问参寥应身东返知何国瑞像西归自本朝遗寺有门非輦路故池无鉢但僧瓢独龙下视皆陈迹追数齐梁亦未遥碧玉璇螺恍隔霄冠山仙冢亦寥寥空余华构延风日无复灵踪落市朝帐座追严多献宝供盘随施有操瓢他方出没还如此与物何心作迹遥宝公塔院祠堂斯文寔有?天岂偶生才一日凤鸟去千秋梁木摧烟留衰草恨风造暮林哀岂谓登处飘然独往来静照禅师塔简老已归黄土陌渊师今作白头翁百忧三十余年事陈迹山林草野中宝公塔道林真骨葬青霄一塔千秋未寂寥宝旁连大江起尊形独受衆山朝云泉别寺分三径香火幽人只一瓢我亦鷗峯同听法岁时歌呗岂辞遥

曾极六帝园陵堕劫独余灵骨葬崔嵬行人指点云间鹤唤得齐梁一梦回马野亭之纯凌晨同作蒋山游细雨轻丝雾不收谢得东风如有意旋教晴色渐盈眸松陰十里青障石磴千层白玉楼弥望寬平有如此故应常作帝王州】

半山报宁禅寺在城东七里距鍾山亦七里王荆公安石故宅也

考证其地名白塘旧以地卑积水为患自荆公卜居乃凿渠决水以通城河元丰七年安石病闻神庙遣国医诊视既愈乃请以宅为寺因赐额报宁禅寺寺後有谢公墩其西有土山曰培塿乃安石决渠积土之地由城东门至鍾山此半道也故今亦名半山寺寺中有宝禅师语录序王旂撰米芾书陈轩金陵集载荆公半山诗凡十五首【半山即事谁将石黛染春潮复捻黄金作柳条西庵东沟从此好笋舆追我莫辞遥

雪乾云净见遥岑南陌芳菲复可寻换得千顰为一笑春风吹柳万黄金南浦东冈二月时物华撩我有新诗含风鸭绿粼粼起弄日鷺黄裊裊垂水满陂塘谷满篝谩移蔬果亦多收神林处处传箫鼓共赛元丰第一秋放歌扶杖出前林遥和丰年击壤音曾侍玉堦知帝力曲中时有誉尧心

随意柴荆手自开沿冈度壑复登台小桥风露扁舟月迷鸟羈雌竞往来露积山禾百种收渔梁亦自富鰕鳢无羊说梦非真事岂见元丰第二秋湖海元丰岁又登旅生犹足暗沟塍家家露积如山壠黄发咨嗟见未曾豚栅鸡埘黿鵩间暮林摇落献南山丰年处处人家好随意飘然得往还

秋云放雨静山林万壑奔湍共一音欲记荒寒无善昼赖传悲壮有能琴半山岁晚即事日密畏前境渊明欣故园那知饭不餽所喜菊犹存亦有牀坐好但无车马喧谁为吾侍者稚子候

柴门长者一牀室先生三径园非无饭满鉢亦有酒盈樽不起华边坐常开柳际门谩知谈寔相欲辩已忘】

【言 半山春晚即事春风取花去遗我以清陰翳翳陂路静交交园屋深床敷每小息杖屨或幽寻惟有北山鸟经过遗好音 杨诚斋万里题半山寺霜松雪竹老重寻南荡东陂水自深凤去宅存谁与住不如作寺免伤心

老无稚子为麀门病有毗耶伴此身相府梵宫均是幻却须舍宅作离尘

日边赐额寺名新鸡犬相迎旧主人见说小儿齐拍手半山寺主裹头巾 杨鹄山元亨题半山寺蹇驴挟策一苍头罢相归来隐寂寥看到半山三不足依然野水漫青苗

罗北谷题半山寺道德文章一世师只伤学术欠通时不思翻动熙宁祸却欲重修作福基】

清凉广惠禅寺在石头城去城一里

考证伪吴顺义中徐温建为兴教寺南唐昇元初改为石城清凉大道場国朝太平兴国五年闰三月改今额 旧传此寺尝为李氏避暑宫寺中有德庆堂今法堂前旧基是也後主尝留宿寺中【诗有未能归去宿龙宫之句】德庆堂名乃後主亲书祭悟空禅师文乃後主自为之碑刻今并存东坡尝舍弥陀画像於寺中【诗云问禅不契前三语施佛空留丈六身】寺有大钟乃伪唐後主所铸【类说载江南李氏时有一民死而复苏云至冥司见先主被五木甚严民大骇曰主何至此耶主曰吾为宋齐立所误杀和州降者千余人汝归谓嗣君凡寺观鸣大钟吾受苦则暂休或能为吾造一钟尤善後主造钟于清凉寺镌云追荐烈祖孝高皇帝脱幽出苦】寺有白云庵【见王荆公诗】翠微亭不受暑亭郑介公书堂【详见亭堂】圣宋书画录云旧有董羽画龙李昱八分书李霄远草书时人目为三絶【王荆公故人不惜马虺隤许我年年一度来野館萧条无准拟与君对植浪山梅 苏东坡赠清凉长老代北初辞没马尘江南来见卧云人问禅不契前三语施佛空留丈六身老去山林徒梦想雨余钟鼓更清新会须一洗黄茆瘴未用深藏白氎巾 又赠清凉长老过淮入洛地多尘举扇西风欲污人但怪云山不改色岂知江月解分身安心有道年顔少遇物无情句法新送我长芦舟一叶笑看雪浪满衣巾 杨次公题君勿爱清凉清凉如火如沸汤君勿恶炎热炎热如水如积雪勿爱亦可恶未是逍遥处君不见海会山前一条路一车来一车去今在转辕向月作落花时节雨初晴黄莺枝上分明语 曾极李主避暑处至今多竹鶡鞞响断苑墙东敲戛椎间风玉声三百年间陵谷变寒潮不到石头城

秋月春花迹未陈袞龙曾绕梦中身夷门金鼓从天落惊起床头鼻□人 温?筠黄花红树谢芳蹊宫殿参差黛巘西诗阁晓窗藏雪岭画堂秋水接蓝溪松飘晚吹枳金铎竹?寒苔上石梯妙迹寄名竟何往下方烟暝草萋萋 张佑山势抱烟光重门突岬傍连檐金僧阁半壁石龕廊碧极丛高顶清池占下方徒悲宦游意尽日老僧房 马野亭出郭无多远登山有特高旧游曾到处此地足称豪日月真双毂关河等一毫松篁知我意故与北风麇 旧时月过女墙头风雨摧颓废不修地老天荒无处问松声谷响替人愁祥刑使者来何暮吊古诗篇清更幽收拾江山入怀袖却归讲序进鸿畴 刘後村塔庙当年甲一方千层金碧万缁郎开山佛已成胡鬼住院僧犹说李王遗像有尘龕坏壁断碑无首立斜阳惟应驻马坡头月曾见金輿夜纳凉 王潜斋五马南浮一化龙山川万古势增雄谁知佛祖安禅地曾是君王避暑宫古磴松篁秋意足

空江烟水夜潮通介翁祠宇依然在尽有廉顽立懦风
罗北谷清凉世界竹如云旧日君王爱此君时代改迁龙变化荒山啼鸟不堪闻 阙
赫日才升鞅鞶红江南百舌覆盆中斋余茗椀听僧话身在当年避暑宫】

天禧寺即古长干寺在城南门外

考证梁天监元年立大同元年幸长干寺阿育王塔出佛爪发舍利又幸寺设无遮会大赦丹阳记大长干寺道西有张子布宅在淮水南对瓦官寺长干是秣陵县东里巷名江东谓山陇之间曰干建康南五里有山冈其间平地庶民杂居有大长干小长干东长干并是地名小长干在瓦官寺南巷西头出大江梁初起长干寺按塔记在秣陵县东今天禧寺乃大长干也
皇朝开宝中曹彬下江南先登长干北望金陵即此地 天禧二年改为天禧寺政和六年建法堂【李公之仪端叔天禧寺新建法堂记云天禧寺者乃长干道场葬释迦真身舍利祥符中建塔赐号圣感舍利宝塔至天圣中又赐今额按梁书大同三年高祖改造阿育王塔出旧塔下舍利及爪髮发青绀色衆僧以手伸之随手长短放之则屈为蠡形始吴时有尼居其地为小精舍孙綝寻毁除之塔亦同泯吴平之後诸道人复于旧处建立焉中宗渡江更修饰之至简文咸安中使沙门安法师程造小塔未及成而亡弟子僧显继而修之至孝武大元九年上金相轮及承露其後西河离石县有胡人刘萨何遇疾暴亡而心下犹暖未敢便殓经七日更苏说云有两吏见录至十八地狱随报重轻受诸若毒见观世音语云汝缘未尽若得活可作沙门洛下齐城丹阳会稽并有阿育王塔可往礼拜则不复堕地狱因此出家游行礼塔次至丹阳未知塔处乃登越城望见长干里有异气色因就礼拜果是阿育王塔所放光明由是定知有舍利乃集衆掘之入一丈得三石碑内一碑有铁函函中有银函银函中有金函盛三舍利及爪髮各一枚长数尺即迁舍利近北对简文所造塔造一层塔十六年沙门僧尚者为三层即高祖所开者也 苏魏公颂长干寺诗注云晋时有沙门惠达至金陵长干获古佛塔因于其地建佛刹即刘萨何也至南唐时废寺为营庐久之舍利数表见感应祥符中僧可政状其迹并感应舍利状进有诏复为寺即其表见之地建塔赐号圣感舍利宝塔白塔在寺东即葬唐三藏大徧觉玄奘大法师顶骨之所金陵僧可政端拱元年得于长安终南山紫阁寺俗呼为白塔事具塔记元符二年知府事召公升卿请于朝改为十方住持 杨次公长干圣感塔诗云释迦八万四千塔一在江南古道场无碍展开青绀发取初分得白毫光 陈轩金陵集载槐京登长干塔诗云江南管当幸事毕尽凭庙筭非臣事眷言此地本军垒乞与招提安佛子盖叙国初事也】寺有阿育王塔天禧中赐名圣感有塔记题咏尤多【朱存 塔凝然镇梵宫举头层级在云中金棺舍利藏何处铎遶危檐声撼风 苏魏公次韵游长干寺寺接郡东南僧常为我谈初因晋大士来获古灵龕历世名空在重兴德乃堪先朝赐新额此地建精蓝亿载扶皇统生民息战函刹仍存故里龙复止深潭九级唯涂壁千梁尽架楠亭台各轩豁岩谷更空豁殿角芝成玉松梢露坠甘穴栖多礼□池怪集神魑可爱临冈曲何人结草庵欲来寻隐逸谁与共欢酣念往须勤到登高已旧谙低头小城市举目遍村岚静境繇兹达尘容却自惭常思真趣向可抑俗饕贪宇宙闲怀适江山极望涵相邀幸多暇命驾试追参又次韵登长干寺塔凡刼半佐山经营昔甚艰周遭严佛宇直上修天关登陟缘梯险淹留布坐慳椽楹亦涂附孺槛遍朱殷白日分明到青云咫尺攀龙潭斜影落鸟翼怯飞还基构从吴晋声名动貂蛮灯燃时照耀梵唱每循环往事稠重问前期指顾间谁知息心处香火老僧闲 王荆公梵筍清

闲侧布金小塘回曲翠烟深柳条不动千丝直荷叶相欹万盖陰漠漠岑云相上下翩翩沙鸟自浮沉羈人乐此忘归去忍向西风学越吟 曾极十丈祥光起相轮铁浮屠镇法王坟只愁西域神僧至夜捧长干刹入云周文璞云杪荧荧一塔灯觉皇舍利宝烟凝山门推上三更月似照前朝礼拜僧 马野亭两山回处是为干有塔亭亭高似山不但庄严增梵刹可能形胜助城关灯明星斗挂林木铃动天风吹佩环陌上行人遥见此有时东往又西还 阙帝王万世余磐石官????五家多旋过独立城南经六代问君心事竟如何】

鹿苑寺旧名法光寺即梁萧帝寺也在今城东南隅考证元屯田绦尝为记【金陵王气三百年声明文物与时隆替中间惟萧梁折节以佞佛故佛之庙貌充斥江表都城巽维直淮上所有精舍焉紫峯彩干反宇欲翔盘高孕虚含吐万景望之辉然如修虹亘霄丹碧焕发殿有圣像即山而成追琢之功极其精妙案輿地志不知从昔之名但後人以帝氏目之黄旗运歇势胜故在闰唐攘据因其迹而增华易榜法光标为胜概圣朝混一书轨以三代文教箫勺宇内四圣累洽浸厚福于生民梵刹禅林容仍旧物而兹寺垂阨瘁焉不支已卯春寺僧募大姓杜德明出楮金五十万程工就其地起高广殿水 不移芴櫟有严光辉复还风物异态又粉绘释迦文相即山塑十六天尊者生生之衆称是该备其秋告成乃作钟呗蒲飧以落之道俗和会圜视作适清溪之水木鍾阜之云物来入轩庀相为澄旷都人诧焉有修其状而至者会同闲赵郡李君从事海濒谓余有一日之雅授简不腆且曰欲以新志累子追惟胜冠筮仕彼都与故濮阳吴嗣复昌卿并游其壑沾醉抚翰刻名楹间晦明飈驰盖四十八甲子老龙死矣灵光岿然齎咨旧游恍若梦觉今之辱请可没其媿乎月而日之庶以传久康定二年三月八日记】寺有子隐堂即周处筑台读书处也【详见台观】佛殿前有郗氏窟旧传梁武帝郗后化蟒事颇迂怪不录

崇胜戒坛院即古瓦官寺又为昇元寺在城西南隅考证晋哀帝兴宁二年诏移陶官於淮水北遂以南?窑地施僧慧力造瓦官寺【旧志曰瓦棺者非也盖据俗说云瓦棺寺之名起自西晋时长沙城隅忽陆地生青莲两朵民以闻官掘得一瓦棺见一僧形貌俨然其花从舌根生父老云昔有一僧不说姓名平生诵法华经万余部临死遗言曰以瓦棺葬之遂以寺名为瓦棺而本于此其说颇涉怪诞纵果有此事亦在长沙于此无与也不知陶官之为瓦官而易官为棺殆傳会而为之说耳】淳熙中韩元吉尝为记每岁度僧於此受戒

严因崇报禅寺即景德栖霞寺在今城东北之摄山去城四十五里

考证齐永平七年明僧绍舍宅为寺见江摠持碑【明僧绍宋太始中游此山刊木结茅二十余年遂舍为寺】寺有舍利塔乃隋文帝葬舍利处 唐高祖改为功德寺增治梵宇四十九所楼阁延袤殿宇鳞次高宗御制明隐君碑改为隐居栖霞寺御书寺额有碑尚存字不可辨武宗会昌中废宣宗大中五年重建 南唐高越林仁肇建塔徐铉书额曰妙因寺 国朝太平兴国五年改为普云寺景德五年又改为栖霞禅寺元佑八年六月改赐今额为参政简翼张公皞功德寺 左有千佛岭後有天开岩碧鲜亭白云庵迎贤石醒石中峰涧石房白云泉亦名品外泉寺前有明僧绍高越墓寺中石碑及时贤题咏颇多【山中南谷昔有天台正观寺高僧法旷尝于寺紫溢峯下建般若堂演大论有虎穴寺在山中峯齐王融有游虎穴寺诗 宋景文初

鸡跖集云南齐栖霞寺大明法师好谈论手执松枝为谈梧隋文帝仁壽二年送到舍利天下凡八十一州官为造塔蒋州栖霞其一也唐则天建舍利塔于青龙山之巔唐末焚毁寺有金银铜像皆记畧云维大唐景龙二年四月八日洛州大福光寺前栖霞寺在比丘昙一于润州江宁县明隐君经坊内铸泻金银铜释迦像三躯奉为高宗皇天大帝则天大圣皇后应天神龙皇帝云又有石像在千佛岭栖霞诗注云明隐君与度法师讲无量壽经西峯石壁中夜发光光中现无量壽佛自尔舍家财凿岩造大像坐高五丈观音势智立像高三丈五寸南齐大帝造石佛千尊所谓千佛岭周繇栖霞寺赠月公明家不要买山钱施作清池种白莲松桧老依云外地楼台深锁洞中天风经絶顶回踈雨石倚危屏挂落泉欲结茅庵伴师住肯饶多少薛萝烟刘长卿东峯寻南齐明徵君故居山人今不见山鸟自相从长啸辞明主终身卧此峯泉源通石径磻户掩尘容古墓依寒草前朝寄老松风云生断壁万壑遍踈钟惆怅空归去犹疑林下逢李频居与鸟巢邻日将巢鸟亲多生从此性久集得无身树老风终夜山寒雪见春不知诸祖後传印与何人权德輿清论月轮低闲吟茗花熟又岩花点寒岫石磴扫春云张晕跻险入幽林翠微含竹殿李绅鸟噪啄秋果翠深衔素鱼李司徒建勲养花天气近平分瘦马来敲白下门晴色未开山意远】

【春容犹淡月华昏琅邪冷落存遗迹篱落稀疎带旧村此地几经人聚散只今王谢独名存知府事王随翠巘耸层云珎祠古迹存获登千佛岭仰荷九天恩塔影凌虚阁钟声度远村僧言前太守罕有到松门虚窗残烛明欹枕旅怀清永夜起松籁满山疑雨声吟余闲景象道胜小荣名钟鼎星河曙悠悠回旆旌

杨虞部备一炷香销百和焚有时钟磬梵天闻上方结草如高枕不独栖霞可卧云王荆公安石游栖霞庵约平甫至渺渺林间路萧萧物外僧高陰凉易入闲貌老难增官事真伤锦君恩更饮水求田此山下终欲忤陈登知府叶清臣僊峯多灵草近在东北维僧绍昔舍宅摠持尝作碑风高一緬邈废宇亦陵迟清泉漱白石霏雾蒙紫芝松萝日萧寂猿鸟自追随游人渺或诣隐者谁与期支郎笃清尚千里孤云飞览古玩青简寻幽穷翠微顾予荷戟守出宿简书违凭师访陈迹賸作雪山诗谷倪子阙去郭六十里闲游避世譁不将仙鹤伴还用白牛车草木隐君宅香灯占佛家几多吟景致无限笔光】

【华泉想寻新眼茶应发嫩芽遥知碧岩上举寺拂烟霞阙山川四絶自来夸茅屋荆扉三数家须有高人继肥遁莫疑僧室擅栖霞知府赵师龙寻幽访古到岩前仰视云霞接梵天六代兴王那复在千身化佛尚依然老松欲作苍龙去怪石常如猛虎眠已觉尘劳变清静何当筑室向危巔上元赵知县伯晟栖霞境界何清壮岳立五峯如列障三徵不复见高人千刻尚能瞻宝相摩空老木韵秋声云屋天岩满意行夜阑风定月将午门外呦呦闻鹿鸣】

隆报宝乘禅寺即旧草堂寺在上元县鍾山乡去城十一里

考证齐周顒隐居之所後顒出仕孔稚圭作北山移文假草堂之灵以讥之高僧传云时有释慧约姓娄少达妙理顒素所钦服迺於鍾山旧館造草堂寺以居之今寺左乃娄约置台讲经之地寺後即顒旧居也唐会昌中寺废国朝复建治平中赐额宝乘绍兴三十二年六月改

賜今額【王荆公安石與道源游西庵遂至草堂寶乘寺桑楊已零落藻荇亦銷沉園宅在人境歲時傷我心強穿西塋路共望北山岑欲見道人語跨鞍聊一尋親朋會合少時序感傷多勝踐聊為乐清談可當歌微風澹水竹靜日暖烟蘿興極猶難盡當如薄暮】

【何 草堂寺烏石岡邊繚繞山柴荆細徑水云間秋花嚼蘂長來往只有春風似我閑 游草堂寺次韻三首垣屋荒葛藟野殿冷檀沉鶴有思顯意鷹無戀遁心禪房閉深竹齋鉢度遙岑寂寞黃塵里金身倚一尋 僧殘尚食少佛古但泥多寒守三衣法飢傳一鉢歌寬閑每迸竹危朽漫牽蘿悵悵庭前柏西來意若何 野寺真蘭若山僧老病多疎鐘挾谷响悲梵入樵歌水映茅簷竹云埋菀女蘿拂塵書所見因得擬陰何 對基與道源至草堂寺北風吹人不可出清坐且可與君碁明朝投局日未晚從比亦復不吟詩

草堂一山主一公持一鉢想復度遙岑地瘦無黃犢春來草更深

草堂懷古周顒宅作阿蘭若萎約身歸窳堵波蕙帳銅瓶皆夢事翛然陳迹翳松蘿】

同泰寺案輿地志在北掖門外路西南與台城隔路考證寔錄梁武帝大通元年創此寺寺在宮後別開一門名大通對寺南門造大佛閣七層大同十年震火所焚略盡即更造未就而侯景亂南唐改為淨居寺尋又改圓寂寺其半為法寶寺又輿地志法寶圓寂寺即古同泰寺基旧址【梁大通元年初創同泰寺開大通門以對寺之南門取反語以協同泰自是晨夕講義多由此門寺即吳之後苑晉廷尉之地遷于六門外以其地為寺

龔穎運歷圖云大同元年幸同泰寺鑄十方銀像二年幸同泰寺鑄十方金像南史上幸同泰寺設四部無遮大會上釋御服持法衣行清淨大舍以便房為省素牀瓦器乘小車私人執役升講堂法座為四部大眾開涅槃經題羣臣以錢億萬祈白三寶奉贖皇帝菩薩眾僧默許百辟詣寺東門奉表請還宸極三請乃許上三荅書前後并稱頓首】六朝事迹云梁武帝起同泰寺在台城內窮竭帑藏造大佛閣七層為天火所焚梁帝舍身施財以祈佛福自大通以後無年不幸同泰寺設四部無遮大會俄而侯景兵起限城遂以虛器進膳自庚辰至丙戌七日不食而崩【曾極詩菩薩閣齊涕泗揮大通基址昔人非此身終屬侯丞相雜辦金錢贖帝歸楊虞部備詩佛事莊嚴國力疲照天金碧倚欄危沉檀爐上烟云合恰似當年煨燼時】寺今廢其半為法寶寺

法寶寺亦曰台城院乃梁同泰寺基之半也今在行宮北精銳軍寨內

考證梁武帝大通元年創同泰寺【詳見前寺】

偽吳順義二年以同泰寺之半置為台城十福院本朝改賜今額

寺前有丑石四各高丈余俗呼為三品石政和中取歸京師或謂之闕石 寺前牆外有井耆老相傳為陳時臙脂井叔寶與張麗華墜而復出之所也寺基取闊淳佑七年創置精銳軍同泰寺舊基皆為寨屋及蔬圃今井在寨內【今精銳軍寨在都統制司之後都統制司在行宮城之後法寶寺在精銳軍寨之後蓋都統制司地基及精銳軍寨基皆梁陳宮掖旧址也故景陽台基及臨春結綺望仙三閣故址與臙脂井皆在精銳軍寨內法寶寺老僧猶能記其祖師之言謂今行宮城後門乃梁陳宮城前門今法寶寺門牆外即梁大通門也】

湘宫寺旧在青溪桥北今徙置清化市北本宋明帝故宅改为寺费极奢侈虞愿曰陛下起此寺皆是百姓卖儿贴妇钱佛若有知当悲泣哀愍帝怒使人曳愿下殿【曾极诗数椽败屋湘宫寺虞愿忠规正凛然十级浮屠那复有虚抛贴妇卖儿钱】

景德寺在城内嘉瑞坊旧崇孝寺也伪吴置国朝景德中改今额建炎初其地为太庙徙城隍庙於旁今庙侧小巷中有僧舍数间仍用寺额

壽宁禅院在江宁县治南国朝开宝七年徙入城中盖参政张公洎南唐赐第也舍宅为寺并城北广孝寺入焉淳化五年改今额【其孙谔云建康志谓昔为爱敬寺者非也家集有公谢表证焉旧有琼花一在内翰张公怀材自维扬手植于此
郭祥正诗一种琼花内相栽年年排□待春来
吴思道诗壽宁闲锁翰林春月明空照琼花影今不存】

证圣寺在行宫後南唐保大中木平和尚居此寺故里俗至今呼为木平寺寺东有沟迤邐西北接运渚今湮塞仅存遗迹【王荆公诗云证圣南朝寺三年到百回不知墙下路今有几何开】

宝戒寺今在转运衙西本迦毗罗寺南唐改真际寺国朝开宝二年改今额

法济寺今在上元县治东北

封崇寺今在斗门桥北图经旧报慈廨院也

治平寺今在江宁县治西南

大悲寺今在炳灵公庙昔崇胜寺子院也

秀降院旧在城北国朝开宝八年废太平兴国五年重建寻又废绍兴中移于凤台山西

兴严寺旧在竹格渡之北本谢尚宅也亦号塔寺永和四年名庄严寺宋大明中改为谢镇西寺陈宣帝改名兴严寺国朝绍兴中徙今真武庙北

龙光寺在城北覆舟山下宋元嘉二年号青园寺【高僧传云西竺道生後还上都青园寺寺是惠恭皇后褚氏所立本种青处因以为名其年雷震青园寺佛殿龙升于天光影西壁因改龙光本朝嘉佑三年佛殿记云宋元嘉五年有黑龙见覆舟山之阳帝舍果园东建青园寺西置龙王殿今沼沚见存至会昌年废咸通一年重兴勅赐龙光院额旧志以为在龙光门外者非也】定林寺有二上定林寺旧在蒋山应潮井後宋元嘉十六年禅僧竺法秀造在下定林寺之西乾道间僧善监请其额於方山重建下定林寺在蒋山宝公塔西北宋元嘉元年置後废今为定林庵王安石旧读书处【王公安石诗衆木凛交覆孤泉静横分楚老一枝筇于此

傲人羣城市少美蔬想今困憊焚且憑东北风持寄岭头云定林自有主我为林下客客主各有心还能共岑寂穷谷经春不识花新松老柏自欹斜殷懃更上山头望白下城中有几家
定林修木老参天横贯东南一道泉六月杖藜寻石路午陰多处弄潺湲漱甘凉病齿坐旷息
烦?因脱水边?就敷牀上衾但留云对宿仍值月相寻真乐非无?悲虫亦好音
僧修定林路成独龙新路得平冈始免游人屐齿妨更有主林身半现与公随转作陰凉
定林所居屋绕湾溪竹绕山溪山却在白云间临溪放杖依山坐溪鸟山花共我闲
题定林壁怀李叔时云与渊明出风随御寇还燎炉无伏火蕙帐冷空山书定林院牕二首竹
鸡呼我出华胥起灭篝灯拥燎炉试问道人何所梦但言浑忘不言无道人今辍讲卷鍼?松萝
梦?波罗?当如习气何自白门归望定林有?蹇驴愁石路余亦倦跻攀不】

【见道人久忽然芳岁残朝随云暂出暮与鸟争还杳杳青松壁知公在两间
与徐仲元自读书台过定林横絕潺湲度深寻萃确行百年同逆旅一壑我平生
杨公万里诗鍾山已过万山深更过鍾山入定林穿尽松杉行尽处一庵犹隔白云岑
一个青童一蹇驴几年来去定林居经纶枉被周官误罢相归来始读书
半破僧庵半补篱旧题无复壁间诗只余手植双桐在此外仍兼洗砚池
踏月敲门访病夫问来谁是雪堂苏不知把烛高谈许曾举乌台诗帐无
罗公必元诗罢相归来再读书定林庵内守清虚少年错解周官处悔杀当朝是误渠
刘公渠诗联鑣小憩定林庵只欠携壶太子岩禪律兵机非二致山僧笑我饱曾参
周公燔诗定岩坐听松声好德水行穿竹影斜无限世间幽絕处天公分付与僧家 家之異五
絕山人当日济时艰要把唐虞作様看奏罢箫韶无凤至空教猿鹤怨盟寒功名良苦赋归欤
两鬢霜花百念枯钟?楼台浑一梦数间茅屋亦浮屠十载浮云几变更归来鍾阜碧嶙峋早知
山色无今古只与青山作主人六籍工夫四海名太平底事竟沈沈裕陵一去何年再长使时
贤泪满襟老屋三间山径幽中藏无限古今愁新诗吟罢春云合塔里金仙笑点头】

宋兴寺一名兴教院今在南门外寺基即刘裕故居【李建勲游宋兴寺东岩诗几年不到东
岩下旧住僧亡屋亦无寒日萧条何物在朽杉经烧石也枯
曾极诗晋至昌明祚已终?文犹有两昏童桓玄偷得宫中宝却属新洲伐荻翁】

高座寺一名永宁寺在城南门外甘露寺尝有云光法师讲法华经于寺天花散落今讲经台
遗址犹存或云晋朝法师竺道生所居因号高座寺【记畧云考图志此山得名于晋永嘉中
名甘露寺尸黎密多罗为王茂弘所敬故留竺生法师继号所居为高座梁邦宝公主之与五
百年大士俱有灵光师座山颠说妙法天花坠焉今号雨花台则故仆卢给事中名襄字赞元
者所命也寺易今名且百年矣故藏古今诗刻皆废可考者唐李翰林本朝吕侍讲王中父三
篇而已吾师遗言必求纪于耆艾舍公而谁宜余虽病勉强捉笔惟此父子能苦行自立于瓦
砾场中作大佛事无毫髮扰可称也哉可称也哉乾道三年闰七月望徽猷阁直学士左朝散
大夫吴兴郡开国侯食邑一千户赐紫金鱼袋致仕刘岑记并书左朝奉郎充荆湖南路安抚
使马步军都总管赐紫金鱼袋张孝祥篆额
曾极诗石子冈前高座寺犍车曾向此徘徊清谈未解倾人国更引胡僧渡海来】

殊胜寺在城南门外本宋福兴寺伪唐後主葬照禅师於此因名塔院

吉祥寺在城南二里余国朝治平二年赐额旧在城隍庙东後以寺基为太庙徙置於此

百福院在城南五里本梁解脱院今为枢密王公纶功德寺

均庆院在城南门外旧在金陵坊晋天宝寺唐开元十年改为天保寺国朝开宝八年毁太平兴国五年就修真观基重置绍兴初移其额於雨花台後坏於火因迁於台之下今止有古塔一座即无殿舍屋宇塔前镌宋故三藏特赐宝觉圆通法济禅师道公之塔一十八字後有宋故三藏法师道公塔铭

佛窟寺一名崇教寺在牛头山去城三十里旧传牛头山下有辟支佛窟宋大明中移郊坛於山之东峰执事者导从事余人游西峰石窟见一僧趺坐执事者问之忽无所有但遗锡杖香炉饼盂而已梁天监二年司空徐度造寺因名佛窟寺唐大历九年代宗因感梦勅修寺之东西峰顶七层浮图国朝太平兴国二年赐今额【杨虞部备诗曩事何人为证盟白云深鎖翠微坑已闻过去辟支佛未见当年弥勒生 马野亭之纯诗牛头山上有深隈佛窟何人向此开过去辟支还示见分明弥勒又生来刀如敝尽锋何在形若销亡气莫回死复受形明不灭有无真妄使人猜】

景定建康志卷四十六

卷四十七

钦定四库全书

景定建康志卷四十七 宋 周应合 撰

古今人表传序

崇厚风俗表章人材此南轩先生修志之训也建康牧守既表於志之前矣若古今名德生於此居於此职於此墓於此祠於此封於此者皆不容泯也因思汉史有古今人表润志有耆旧寓公传乃仿斯例表其人於志之後复传其事於表之後传凡十一曰正学二曰孝悌三曰节义四曰忠勲五曰直臣六曰治行七曰耆旧八曰隐德九曰儒雅十曰贞女表以迹而传以品有表而不必传者有传而不必表者有表传所不及者见之拾遗皆以寓崇厚表章之意云

古今人表【已入表志题名者不复录】

<史部,地理类,都会郡县之属,景定建康志,卷四十七>

<史部,地理类,都会郡县之属,景定建康志,卷四十七>

<史部,地理类,都会郡县之属,景定建康志,卷四十七>

<史部,地理类,都会郡县之属,景定建康志,卷四十七>

正学传

明道先生程子诤字伯淳其先河南人年十五六时奉父太中公【诤珣】之命师事濂溪周先生闻其论道遂?科举之业慨然有求道之志明於庶物察於人伦辨异端似是之非开百代未明之惑秦汉而下未有臻斯理也谓孟子没而圣学不传以兴起斯文为已任进将觉斯人退将明之书不幸早世皆未及也其辨析精微稍见於世者学者之所传尔先生自弱冠应诏中进士第官始於主簿终於宗正寺丞尝主江宁府上元簿盖其再调也上元田税不均比他邑尤甚盖近府美田为贵家富室以厚价簿其税而买之小民苟一时之利久则不胜其弊先生为令画法民不知扰而一邑大均其始富者不便多为浮论欲摇止其事既而无人敢不服者後诸路行均税法邑官不足益以他官经岁历时文案山积而尚有诉不均者计其力比上元不啻千百矣会令罢去先生摄邑事上元剧邑诉讼日不下二百为政者疲於省览奚暇及治道先生处之有方不阅月民讼遂简江南稻田赖陂塘以溉盛夏塘堤大决计非千夫不可塞法当言之府府稟於漕司然後计功调役非月余不能兴作先生曰比如是苗槁久矣

民将何食救民获罪所不辞也遂发民塞之岁则大熟江宁当水运之冲舟卒病者则留之为营以处曰小营子岁不下数百人至者辄死先生察其由盖计留然後请於府给券乃得食比有司文具则困於饥已数日矣先生白漕司给米贮营中至者即与之食自是生全者大半措置於纖微之间而人已受赐如此之比所至多矣先生常云一命之士苟存心於爱物於人必有所济仁宗登遐遗制官吏成服三日而除三日之朝府尹率羣官将释服先生进曰三日除服遗诏所命莫敢违也请尽今日若朝而除之所服止二日尔尹怒不从先生曰公自除之某非至夜不敢释也一府相视无敢除者茅山有龙池其龙如蜥蜴而五色祥符中中使取二龙至中途中使奏一龙飞空而去自昔严奉以为神物先生尝捕而脯之使人不惑其始至邑见人持竿道旁以黏飞鸟取其竿折之教之使勿为及罢官舣舟郊外有数人共语自主簿折黏竿鄉民子弟不敢畜禽鸟先生为政治?以寬处烦而裕当法令繁密之际未尝从衆为应文逃责之事人皆病於拘碍而先生处之绰然衆忧以为甚难而先生为之沛然虽当仓卒不动声色方监司竞为严急之时其待先生率皆寬厚施設之际有所赖焉先生所为纲条法度人可効而为也至其道之而从动之而和不求物而物应未施信而民信则人不可及也先生自上元移泽州晋城令寻以吕公着荐授太子中允权监察御史里行神宗素知先生名期以大用前後进说甚多大要以正心窒欲求贤育材为先不饰辞辩独以诚意感动人主尝言人主当防未萌之欲神宗俯身拱手曰当为卿戒之时王荆公安石日益信用先生每进见必为神宗陈君道以至诚仁爱为本未尝及功利荆公寢行其说先生意多不合事出必论列数月之间章数十上尤极论者辅臣不同心小臣与大计兴利之臣日进尚德之风寢衰荆公与先生虽道不同而尝谓先生忠信先生每与论事心平气和荆公多为之动而言路好直者必欲力攻取胜由是与言者为敌矣先生言既不行恳求外补神宗犹重其去上章及面请至十数不许遂阖门待罪神宗命执政除以监司复上章曰请罪获迁刑赏混矣累请得罢寻与外任虽在小官贤士大夫视其进退以卜兴衰哲宗圣政方新贤德登进先生特为时望所属召为宗正寺丞未行以疾终元丰八年六月十五日也享年五十有四士大夫识与不识莫不哀伤为朝廷生民恨惜【先生资稟既异而充养有道纯粹如精金温润如良玉寬而有制和而不流忠诚贯于金石孝弟通于神明视其色其接物也如春阳之温听其言其入人也如时雨之润胷怀洞然彻视无间测其蘊则浩乎若沧溟之无际极其德美言盖不足以形容先生行已内主于敬而行之以恕见善若出诸已不欲弗施于人居广居而行大道言有物而动有常先生教人自致知至于知止诚意至于平天下洒扫应对至于穷理尽性循循有序病世之学者舍近而趋远处下而闢高所以轻自大而卒无得也先生接物辨而不间感而能通教人而人易从恕人而人不怨贤愚咸得其心狡伪者献其诚暴慢者致其恭闻风者诚服觐德者心醉虽小人以趋向之异顾于利害时见排斥退而省其私未有不以先生为君子也详墓志】子三人端慤端懿端本元丰八年十月葬於伊川先茔太师潞国公文彦博题其墓曰大宋明道先生程君伯淳之墓【伊川先生表其墓曰周公没圣人之学不传孟軻死圣人之学不传道不行百世无善治学不传千载无真儒无善治士犹得以明乎善治之道以淑诸人以传後世无真儒天下贸贸焉人欲肆而天理灭矣先生生于四百年之後得不传之学于遗经志将以斯道觉人天不慙遗哲人早世乡人士大夫相与议曰道之不明也久矣先生出倡圣学以示人辨异端辟邪说开历古之沉迷圣人之学得先生而後明为功大矣于是帝师采輿议而为之称以表其墓学者之于道知所向然後见斯人之为功知所至然後见斯名之称情山可夷谷可堙明道之名亘万世而长存勒石墓旁以诏後人元丰乙丑十月戊子书】晦庵先生徽国文

公朱熹贊曰揚休山立玉色金聲元氣之會渾然天成瑞日祥雲和風甘雨龍德正中厥施斯
普嘉定中賜謚曰純【臧格議曰壽濂溪之脉吾道賴以復傳者有二程先生在載惟二先生
天分不齊及其體道成德則同歸一致有司泥節惠之典未免從而區別然二先生所得之妙
又豈容以差數觀哉謹考伯淳先生窮理盡性開示後學潞國太師叶之公言以表其墓曰明
道先生夫道之不明天寔憫之今茲篤生賢哲資稟特異天意固有所屍矣居洛十年充養備
至融會貫通內外洞徹人見其氣貌肅然不敢即也而和氣充浹睟面盎背遽色厲辭亡有也
人見其接物粹然若可易也而望之崇深截截乎規矩準繩不敢慢也局度清越世故若將浼
焉而克勤小物雖鄙賤猥瑣弗之憚也立言洒落近而易知扣之則無窮出之則愈新也竊議
先生者所見自不一而不知先生道積于中固純乎而弗雜也抑嘗究極先生所以用力之地
矣謂心不可以一事留謂學不可以一善止有適有莫戒其非天地之全容氣未消防其為義
理之勝以至去新學之支離非釋氏之不相聯屬忌學者之先立標準斥記誦之玩物喪志蓋
圭角少露皆先王之所不予若訓不息為生則曰中無間斷推明易理則曰敬無間斷純亦不
已此天之所以為天也先生妙造精義渾渾無涯其體純盡在是與異時身為御史不矜文字
以懲詆訐之失元佑羣賢悉起散地先生獨有忧色使之協濟于朝以施調一之功安有紹聖
報復之禍哉一時游其門者日游乎寬平樂易之中而無有枯槁憔悴蹙迫無聊之態如羣飲
于河各充其量故得先生之敬者非顯道之誠篤切近則公掞之端厚方重得先生之和者非
淳夫之安恬靜默則中立之簡易平淡誠以先生會道之全備隨其所得者固已足名世矣按
諸謚法中正粹精曰純伊川先生狀其行曰純粹如良金石本中撫諸先賢之論曰溫然純粹
張宣公嘗為之贊亦曰會其純全公謚以純庶足以賓其實當先生既沒門人學子相與推尊
稱美其間固有不同者夫以親見而師授既無異教必無異詞特以先王道大未易稱故各用
其所知者以名之使其有得乎純之說雖生乎千載之上又安有異詞乎 樓觀獲議曰嘗觀明
道先生有言曰仲尼元氣也顏子春生也孟子并秋殺盡見之又曰仲尼天地也顏子和風庆
云也孟子泰山岩岩氣象也先生之品藻聖賢區別于片言只字之間儼然如在其左右也然
則今之議先生之謚者烏可泛然而贅為之說乎博士謚曰純公豈有得于春生而為和風庆
云者乎及觀伊川先生狀其行曰先生資稟既異而充養有道純粹如精金溫潤如良玉寬而
有制和而不流信斯言也謚之以純曰宜】淳佑初詔曰明道初元天於河南篤生大賢是似
顏子故任承議郎宗正寺丞謚純程顥德性粹甚天理渾然由明而誠有过化存神之妙自体
達用有綏來動和之功使得相於熙寧蒼生之福未艾朕每追惜之然誦其遺書如有用我期
月而可真足以開萬世之太平也爰賚從祀仍錫追封以示褒崇可特封河南伯南軒先生張
子諱栻字敬夫故丞相魏國忠獻公浚之嗣子也生有異質穎悟夙成忠獻公浚愛之自其幼
學而所以教者莫非忠孝仁義之寔既長又命往從南岳胡公仁仲先生問河南程氏學先生
一見知其大器即以所聞孔門論仁親切之指告之公退而思若有得也以書質焉而仁仲先
生報之曰聖門有人吾道幸矣公以是益自奮厲直以古之聖賢自期作希顏錄一篇蚤夜觀
省以自警策所造既深遠矣而猶未敢自以為足則又取友四方益務求其學之所未至蓋玩
索評踐行體驗反覆不置者十有餘年然後昔之所造深者益深遠者益遠而反以得乎簡易
平寔之地其於天下之理蓋皆了然心目之間而寔有以見其不能已者是以決之勇行之力
而守之固其所以篤於君親一於道義而沒世不忘者初非有所勉慕而強為也少以?補右承
務郎辟宣撫司都督府書寫機宜文字除直秘閣是時孝宗新即位慨然以奮伐仇敵克復神
州為已任忠獻公浚亦起謫籍受重寄開府建康參佐皆極一時之選而公以藐然少年周旋

其间内赞密谋外参庶务其所综画幕府诸人皆自以为不及也间以军事入奏始得见上即进言曰陛下上念宗社之讎耻下闵中原之涂炭惕然於中而思有以振之臣谓此心之发即天理之所存也诚愿益加省察而稽古亲贤以自辅焉无使其或少息也则不惟今日之功可以必成而千古因循之弊亦庶乎其可革矣上异其言盖於是始定君臣之契已而忠献公辞位去用事者遂罢兵与敌和敌乘其隙反纵兵入淮甸中外大震然庙堂犹主和议至勅诸将毋得以兵向敌时忠献公已即世公不胜君亲之念甫毕葬事即拜疏言吾与敌人乃不共戴天之讎向来朝廷虽亦尝兴縞素之师然玉帛之使未尝不行乎其间是以讲和之念未忘於胸中而至诚惻怛之心无以感格乎天人之际此所以事屡败而功不成也今虽重为羣邪所误以蹙国而召寇然亦安知非天欲以是开圣心哉谓宜深察此理使吾胸中了然无纖芥之惑然後明诏中外公行赏罚以快军民之愤则人心悦士气充而敌不难却矣继今以往益坚此志誓不言和专务自强虽折不挠使此心纯一贯彻上下则迟以岁月亦何功之不成哉疏入不报後六年以补郡临遣见上首进明大义正人心之说明年召还上问曰卿知敌中事乎公对曰不知也上曰敌中饥馑连年盗贼四起公入对曰敌中之事臣虽不知然境中之事则知之详矣上曰何事公遂言曰臣窃见比年诸道亦多水旱民贫日甚而国家兵弱财匱官吏诞慢不足倚仗正使彼寔可图臣惧我之未足以图彼也今日首当下哀痛之诏明复讎之义显絶敌人不与通使然後修德立政用贤养民选将帅练甲兵通内修外攘进战退守以为一事且必治其寔而不为虚文则必胜之形隐然可见虽有浅陋畏怯之人亦且奋跃而争先矣上为叹息褒谕以为前未始闻此论也其後又因赐对反复前说上益嘉叹面喻当以卿为讲官冀时得晤语也时还朝未期岁而召对至六七公感上非常之遇知无不言大抵皆修身务学畏天恤民抑权幸屏谗谀之意至论复讎之义则反复推明所以为名寔之辨者益详於是宰相益惮公而近幸尤不悦遂合中外之力以排之而公去国矣盖公自是退居三年更历两镇虽不复得闻国论而蚤夜孜孜反身修德爱民讨军以俟国家扶义正名之举尤极恳至於是天子益知公可用尝赐手书褒其忠寔盖将复大用之而公已病矣病亟且死犹手疏劝上以亲君子远小人信任防一己之偏好恶公天下之理以清四海克固丕图为言若眷眷不能忘者写毕緘付府僚使驿上之有顷而絶呜呼靖康之变国家之祸乱极矣小大之臣奋不顾身以任其责者盖无几而其承家之孝许国之忠判决之明计虑之审又未有如公者虽降命不长不克卒就其业然其志义伟然死而後已则质诸鬼神而不可诬也公为人坦荡明白表里洞然诣理既精信道又笃其乐於闻过而勇於徙义则又奋厉明决无毫髮滞吝意以至疾病垂死而口不絶吟於天理人欲之间则平日可知也栻尝有言曰学莫先於义利之辨而义也者本心之所当为而不能自己非有所为而为之者也一有所为而後为之则皆人欲之私而非天理之所存矣呜呼至哉言也其亦可谓广前圣之所未发而同於性善养气之功者与公在建康干父谋国之暇尝游城南天禧寺竹间爱其清邃扫室读书名曰南轩後人因建寺焉朱文公赞曰扩仁义之端至於可以弥六合谨善利之判至於可以析秋毫拳拳乎其致主之切汲汲乎其干父之劳伋伋乎其任道之勇卓卓乎其立心之高知之者识其春风沂水之乐不知者以为湖海一世之豪彼其扬休山立之姿既与其不可传者死矣观於此者尚有以卜其见伊吕而失萧曹也邪【按此赞用湖海一世之豪盖乾淳间学士大夫有不知朱张二先生者以湖海豪目之故南轩别文公诗曰尽收湖海意仰希洙泗游而文公赞南轩亦有此语门人尝以为问文公曰吾始见敬夫时吾豪气未除者颇多敬夫尝以此见规故敬夫与吾诗有妙质贵强矫之语後数年吾力行敬夫之言豪气顿除而敬夫豪气犹有毫髮未去

也气质之难化也如此哉上元尉翁泳闻于其师蔡节斋文公作南轩碑终之以求仁得仁与文公再祭南轩文相表里文公许南轩传道之意备见于此】嘉定八年赐谥曰宣【孔炜议曰公盖代儒宗为国世臣起千载絶学负四海重名功业未究中道以没于今三纪矣易名之典久未克请维时师臣列其事于朝上即报可所以尊道崇化也天光下临雷厉风动岂容拘常袭故寔慊名浮者所可同日道哉公丞相魏国忠献之嗣子五峯先生胡公之门人也鍾美萃灵英特迈往亲承忠孝之传讲切义理之学既念孔孟既没正论沦鬱言道德者溺虚无尚功利者急变诈儒者功用泯然无见于世去古愈远流靡日激宋兴百年河南二程始倡明道学开迪人心由是圣贤不传之绪赖二公而续然俗之久安者难变理之仅明者易微公为此惧毅然以斯文为已任采摭遗书寻绎精义居敬穷理以立本开物成务以致用其学极于广大高远究其归则不离于简易笃寔故凡见之言语文字之间职守事功之会无非爽亮明白务寔求是谓克已复礼顔子所以为百世师也作希顔录早夜以自警谓仗义履正诸葛忠武所以为三代佐也作武侯传文为之记为之赞先汉人物独许董相以知学若赵营平之为国远虑尤拳拳焉则其?学之精微趋向之纯一识者有以知其心孝庙初元锐意规恢建置督府公参赞机幙间以军事入奏为上开陈正名复仇大义慷慨激切及为郎赐对申演前议乃在寔於修德寔于立政寔于备御而无取乎徒假其名经筵劝讲按古证今愿上以三代之治自期其论高矣至条举治要不过曰宅心为万事之纲修身为天下之本上稽天理下从人欲见于行事者皆至公务寔而已三复至言其视帝王盛时元臣硕辅所以识达国体启沃君心者异世一辙公自以蒙被殊知图惟补报奋不顾身尽言无隐如指切发运苛敛之病民力排枢筦除授之非据英词劲气至今凛凛直道难行毁言日至公不得久内矣越数岁天子深思其贤俾临藩屏公谊存报主不以内外为间随其所至先立成规其经畧广西也所以复于上者必欲以抚存安静为本及制置荆南也首以凡事务寔不但空言见义则为不敢顾避諄諄为上言之惟诚于为民若保赤子诚心求之不坠圣贤之训故洊更二镇凡民事利害休戚博采周咨惟恐不及如盐筴如马政如义勇如弓弩手究见本末立奏罢行曾无留滞必使封圻之远阊阖之细悉彻惟聪上亦嘉其忠寔玺书勉劳有志大用而公属疾矣病亟手疏劝上亲君子远小人信任防一己之偏好?公天下之理其爱君忧国至公血诚虽死不忘某读公遗编至此废卷永叹窃谓公平生大节所以对天地而不惭质鬼神而无疑者具学自不欺始盖理之寔然者谓之不欺公能存此心充此理任重道远日进无强自然讲于已者为寔学复于居者为实德建于民者为寔利笃志明善以知之鞠躬尽力以行之夫是以天下无不可为之事临事无不可成之功而儒者有益于人之国信矣夫唐人有言曰上不负天下不负所学其斯之谓与谨按谥法体和居中善闻周达曰宣公沉涵道真见理昭彻秉德制行浑然天成非体和居中乎人宗其学家藏其书君信其言民孚其惠非善闻周达乎节行壹惠请谥曰宣 杨汝明覆议曰惟公之学根原于中庸大学之奥旨参订于濂溪二程之微言渐渍于忠献之纯忠发挥于五峯之师说体此心于天地充其仁于万物辨之明毫厘必计行之力食息弗违故其在讲筵在宰属犹是心也在州郡在藩镇犹是心也今观其所言悉可?见知上有克复神州之志则以稽古亲贤为请知庙堂有和戎之谋则以悦人心充士气为言其补外临遣则请先克已私以明大义正人心其召还奏对则请先务寔以修德立政用贤养民论史正志为发运使则斥其病民之寔论张说金书枢密则惧其激武臣之怒在静江则变漕司折卖州盐之法申诸州按习效用之令息洞前之譁革纲马之弊在江陵则严盗贼之禁结诸将之欢正淮民出塞之罪行义勇量取之法考致要归无不自所学流出经曰天不爱其道董仲舒曰道之大原

出于天道固天之道天不轻以授人自周公孔子以至孟子厥後罕传虽间有经生文士性理是谈体用未明或相矛盾宋兴百年濂溪二程发明于前吕谢游杨扶持于後义理贯彻复出前儒公与晦庵朱氏出而嗣之相为师友于是演迤溥博丕阐于世得其大者足以名当世得其小者亦足善一身考论渊源所自公力居多今晦庵朱氏已谥曰文公没三十六年始议其谥时则後矣谥之曰宣尚与朱氏相参用见羽翼孔门之意谥法体和居中善闻周达曰宣公之明理谨独学精行茂是谓体和居中公之德言俱立君信民孚是谓善闻周达迹古以验今博士议是请从谨议】景定二年正月皇太子释奠於国学奏请以南轩张栻及东莱吕祖谦从祀大成殿上从之

西山先生真氏讳德秀字景元建宁人也少年中进士第寻召试博学宏词後归迁阳尽读朱文公诸书发挥天理人心之妙盖有及门而不尽得者诚意寔德见者心服嘉定八年江东大旱公为转运副使济人之政皆以身当其劳拯荒其一也合本道义仓及转般米数十万斛而厚其积因户部罢夏税之请以蠲其征取郡县官及寓公之贤以核其实大家勿劝分贫者赧乏者济已甚者辇粟赐之病者载药与之本之以河北救灾之议行之以青州之政栴风沐雨遍走二郡不足则开寄纳仓出官钱籴之吴中又不足则以翰苑橐中金益之不忍留都之不及则发私财以赈贍之乞事民益急则转赧为济赖以全活者数十万计广德守臣附会时好劾教官以闻公引咎以白其冤祷雨白鹭洲应如响迄以稔告捐金粟建明道书院设教一本于程子由是士知讲学公尝驿奏推本宁皇之仁一似仁祖而群臣般乐怠傲不异政宣者十事语意剴切上为感动初公涉三舘侍螭?入玉堂论事上前皆本仁义皆关君德治体切於君子小人之辨使金不达则益厉报仇雪耻之气中外想闻其风采其後守泉南帅豫章长沙三山惠民平盗尤多善政薄海警服天下惟恐其不入相更化立朝发明大学得失与盛衰治乱存亡之义上为诏读校文入奏懽然接纳将举国听之而公薨矣自濂溪而下六君子扶持道统者皆未得显位於时惟公续斯道之脉晚始向用世皆以尧舜君民望之命参大政不及拜朝野莫不悼惜今其着书立言存於世者羽翼考亭与其书而并传焉赠太师諡曰文忠

【或问十传首正学何也应合曰程子尝谓道统不传则百世无善治道学不明则千载无真儒故能传尧舜禹汤文武周公孔孟之心者为正道能明尧舜禹汤文武周公孔孟之道者为正学周子所谓为天地立心为生民立命为往圣继絶学为万世开太平者此也其所关系不亦大乎传首正学不亦宜乎或又问曰子尝记青溪先贤祠曰河南纯公龟山文靖公南轩宣公紫阳文公西山文忠公有道者五今正学传为道而立所传止及其三而龟山紫阳二先生不与焉详于记而畧於传何也应合曰记与传各有体记为祠作也祠已有位记则述之传为郡作也郡尝有迹传则列之祠有其位而祠记不书则疎郡无其迹而郡志有传则泛有如龟山紫阳二先生之道天下共尊之岂待建康有传而後知建康志传为一郡而作非为天下而作二先生之事迹偶未着于建康则不敢列于建康之传与程张真公三先生之尝有政于此者不同也或又问曰文公尝持漕节文靖公尝居溧阳而子谓二先生无迹于此邦何也应合曰文公虽尝授漕节实未供职未入建康之境青溪之所以祠公者非以为漕之故徽州公所居南康公所治皆在江东所部之内揭虔妥灵以后邦人景行之思祠之宜也建康郡志之有传盖书其有迹于建康者耳徽之居南康之治则于建康志不相干也至若杨文靖公之居于溧阳终于溧阳虽见于旧志之所载而未敢以为信按龟山先生本出弘农五世祖唐末避地

闽中寓南剑州之将乐县因家焉先生既没之後有大盗过其门而不入即将乐之居也未尝闻有迁居之所年七十时尝监常州市易务常州地近溧阳谓尝经从此邑恐或有之谓其尝居此邑则不可信自市易秩满召为秘书为着作为谏议为给事中其後丐去奉祠年八十三以疾终于正寝葬于将乐之西山胡文定公志其墓者不诬也而旧志乃谓先生终于溧阳又不可训墓志及吕舍人所撰行状皆言先生有子五人曰廸曰迴曰適曰造未闻有所谓杭者旧志乃谓先生之子名杭为编修者家于溧阳杭之孙庆嗣尝请建康乡举使先生果又有一子名杭墓志行状何缘不书以胡吕二公所书为信则溧阳志所书皆不可信今若信旧志之说以龟山尝居溧阳而存其传于建康则是疑胡吕而诬龟山矣应合所不敢也然显志所载亦必有说未详其故姑阙所疑後之君子傥有考焉宜有以折衷之】

景定建康志卷四十七

卷四十八

<史部,地理类,都会郡县之属,景定建康志>

钦定四库全书

景定建康志卷四十八 宋 周应合 撰孝悌传

王祥及览即乌衣王氏之先也祥字休徵本临沂人性至孝继母朱氏不慈每使扫除牛下祥愈恭谨父母有疾衣不解带汤药必亲尝母尝欲生鱼时天寒冰冻祥解衣将剖冰求之冰忽自解双鲤跃出持之而归母又思黄雀炙忽有黄雀数十飞入其幕复以供母乡里惊叹以为孝感所致有丹柰结实母命守之每风雨祥辄抱树而泣其笃孝纯至如此汉末遭乱扶母携弟览避地庐江隐居三十余年母终居丧毁瘠杖而后起徐州刺史吕?檄为别驾固辞览劝之乃应召自是累官至太常封万岁亭候天子幸太学命祥为三老祥南面几杖以师道自居天子北面乞言晋武践阼拜太保进爵为公大事皆諮访之以子肇为给事中使常优游定省祥疾笃着遗令训子孙曰言行可覆信之至也推美引过德之至也扬名显亲孝之至也兄弟怡怡宗族欣欣悌之至也临财莫过乎让此五者立身之本其子皆奉而行之薨年八十五谥曰元弟览继母所出也年数岁时见祥被母楚撻辄涕泣抱持至於成童每谏其母少止凶虐母屡以非理使祥览辄与祥俱又虐使祥妻览妻亦趋而共之母患之乃止母密使酖祥览知之径起取酒祥疑其有毒争而不与母遽夺反之自後母赐祥饌览辄先尝母惧览致毙遂止览亦笃行着闻应召累官至太中大夫薨年七十三谥曰贞祥五子肇夏馥烈芬肇仕至始平太守馥至上洛太守肇子俊守太子舍人封永世侯俊子遐为鬱林太守馥子根为散骑郎览六子裁为抚军长史基为治书御史会为侍御史正为尚书郎彦为中护军琛为国子祭酒丞相导即裁之子也世居乌衣巷衣冠之盛为江左第一旧志记祥墓在今江宁县化成寺北

顏含字弘都即宋延之之曾祖唐真卿之十四世祖也自含而下七世墓皆在建康碑犹可质也含少有操行以孝闻兄畿咸宁中得疾就医遂死於医家家人迎丧旛每绕树而不可解引丧者颠仆称畿言曰我寿命未死但服药太多伤我五脏耳今当复活慎无葬也其父祝之曰若尔有命复生岂非骨肉所愿今但欲还家不尔葬也旛乃解及还其妇梦之曰吾当复生可急开棺妇颇说之其夕母及家人又梦之即欲开棺而父不听含时尚少乃慨然曰开棺之痛孰与不开相负父母从之乃共发棺果有生验以手刮棺指爪尽伤然气息甚微存亡不分矣饮哺将护累月犹不能语饮食所须托之以梦闔家营视顿废生业虽在母妻不能无倦矣含乃絶弃人事躬亲侍养足不出户者十有三年石崇重含淳行赠以甘旨含谢而不受或问其故答曰病者绵昧生理未全既不能进噉又未识人惠若当谬留岂施者之意也含二亲既终两兄继没次嫂樊氏因疾失明含课励家人尽心奉养每日自尝省药饌察问息耗必簪屨束带医人疏方应须髯蛇胆而寻求备至无由得之含忧叹累时尝昼独坐忽有一青衣童子年可十三四持一青囊授含含开视乃蛇胆也童子逡巡出户化成青鸟飞去得胆药成嫂病即

繇由是以笃行着名本州辟不就晋元帝命为参军东宫初建补太子中庶子迁黄门侍郎本州大中正历散骑常侍大司农预讨苏峻功封西平县侯拜侍中寻除国子祭酒加散骑常侍迁光禄勳以年老逊位成帝美其素行就加光禄大夫门施行马赐牀帐被褥勅大官四时致膳不受郭璞尝遇含欲为之筮含曰年在天位在人修已而天不与者命也守通而人不知者性也自有性命无劳蓍龟桓温求婚于含含以其盛满不许惟与邓攸深交或问江左羣士优劣答曰周伯仁之正邓伯道之清卞望之之节余则吾不知也其雅重行实抑絕浮伪如此致仕二十余年九十三卒遗命素棺薄敛谥曰靖丧在殡而隣家失火火至丧所而灭盍以为淳行所感也三子髦历黄门郎侍中光禄勳谦至安成太守约零陵太守并有声誉

萧统字德施梁武帝长子也以齐中兴元年九月生于襄阳少日而建邺平天监元年十一月立为皇太子五年出居东宫生而聪慧三岁受孝经论语五岁徧读五经悉通讽诵性仁孝自出宫常思恋不乐帝知之每五日一朝多便留永福省或五日三日乃还宫八年九月於寿安殿讲孝经尽通大义讲毕亲临释奠于国学普通七年十一月母丁贵嫔有疾太子还永福省朝夕侍疾衣不解带及薨步从丧还宫至殡浆水不入口每哭辄恸絕武帝敕中书舍人顾协宣旨曰毁不灭性圣人之制不胜丧比於不孝有我在那得自毁如此可即强进饮粥太子奉勅乃进数合自是至葬日进麦粥一升武帝又勅曰闻汝所进过少转就羸瘦我比更无余病政为汝如此胷中亦填塞成疾故应强加饘粥不使我常尔悬心虽屡奉勅劝逼终丧日止一溢不尝菜果之味体素壮腰带十围至是减削过半每入朝士庶见者莫不下泣自加元服帝便使省万几内外有司奏事者填塞於前太子明於庶事每所奏谬误巧妄皆即辩析示以可否徐令改正未尝弹纠一人平断法狱多所全宥天下皆称仁性寬和容衆喜愠不形于色引纳才学之士赏爱无倦常自讨论坟籍或与学士商榷古今继以文章著述率以为常于时东宫有书几三万卷名才并集文学之盛晋宋以来未之有也性爱山水於玄圃穿筑更立亭馆与朝士名素者游其中尝泛舟後池番禺侯轨盛称此中宜奏女乐太子不答咏左思招隐诗云何必丝与竹山水有清音轨慙而止出宫二十余年不蓄音声未薨少时勅赐太乐女伎一部畧非所好普通中大军北侵都下米贵太子因命菲衣减膳每霖雨积雪遣腹心左右周行闾巷视贫困家及有流离道路以米密加赈赐人十石又出主衣绢帛年常多作襦袴各三千领冬月以施寒者不令人知若死亡无可敛则为备棺槨每闻远近百姓赋役勤苦辄敛容变色常以户口未实重于劳扰吴郡屡以水灾不熟有上言当漕大渎以浉浙江中大通二年春诏遣前交州刺史王奕假节发吴兴信义三郡人丁就役太子上疏曰吴兴累年失收人颇流移吴郡十城亦不全熟唯信义去秋有稔复非常役之民即日东境谷稼犹贵劫盜屡起在所有司皆不闻奏今征戍未归强丁疎少比得齐集已妨蚕农不审可得权停此功帝优诏以喻焉太子孝谨天至每入朝未五鼓便守城门开东宫虽燕居内殿一坐一起常向西南面台宿被召当入危坐達旦三年三月游後池乘雕文舸摘芙蓉姬人荡舟没溺而得出因动股恐貽帝忧深誠不言以寢疾闻武帝敕看问辄自力手书启及稍笃左右欲启闻犹不许曰云何令至尊知我如此恶因便呜咽四月乙巳暴恶驰启武帝比至已薨时年三十一帝临哭尽哀诏敛以衮冕谥曰昭明吁仁孝如统而不得其寿君子知梁之不能永矣幽而为神庙食百世宜哉

吕宣问字季通开封人文穆公之四世孙徙居溧阳父希圆绍兴甲子倅洋州妾韩氏生宣问

甫六岁辞去莫知所之父卒母李氏独在宣问既长将访所生以池阳当蜀人往来通道乃调录事参军凡蜀客经从必托使物色存否临满秩而仙井兵杨俊报之曰韩氏在彼时李氏已老无他男宣问不可舍李氏而远涉亟调峡州推官欲益近蜀至之次年被檄如荆门过当阳玉泉寺寺侧武安王庙求梦而应果得其母于仙井时绍熙庚戌相失四十余年至是母子如初相持感泣吏卒为之出涕李氏时年八十三韩亦七十矣洛阳吴仁杰斗南赋诗以美之详见夷坚志宣问寻改秩知蕲春县陶子锵张松张常洧徐铉李华潘祺钱戩并互见耆旧传

节义传

卞壺字望之济陰冤句人父粹张华壻也壺弱冠有名誉晋元帝镇建邺召为中郎甚见亲杖明帝时领尚书令与王导俱受顾命辅幼主王导称疾不朝而私送车骑将军郗鉴壺以导亏法从私无大臣之节御史中丞锺雅阿挠王典不加準绳并请免官举朝震肃壺裁断切直不畏强御皆此类也干实当官以褒贬为已任欲轨正督世不肯苟同时好庾亮将召苏峻壺固争谓亮曰峻拥强兵多藏无赖且逼近京邑路不终朝一旦有变易为蹉跌宜深思远虑恐未可仓卒亮不纳壺知必败司马任台劝壺宜畜良马以备不虞壺笑曰以逆顺论之理无不济若万一不然岂须马哉峻果称兵诏以壺都督大桁东诸军事壺率郭默赵胤等与峻大战於陵西为峻所破死伤以千数峻进攻青溪壺与诸军距击不能禁贼放火烧宫寺六军败绩壺时发背创犹未合力疾而战率厉散衆及左右吏数百人攻贼麾下苦战遂死之时年四十八二子眡眡见父没相随赴贼同时见害壺赠侍中骠骑将军开府仪同三司谥曰忠贞祠以太牢赠世子眡散骑侍郎眡奉车都尉徵士翟汤闻之叹曰父死於君子死於父忠孝之道萃於一门其後盗发壺墓尸僵须髮苍白面如生两手悉拳爪甲穿达手背安帝诏给钱十万以修莹兆壺第三子瞻为广州刺史瞻弟眡为尚书郎

皇朝杨邦乂字希稷吉州吉水县人政和申以上舍生赐第建炎元年为溧阳县令时江宁府禁卒周德叛囚其帅宇文粹中县卒有起应之者邦乂谕止之不听乃设方畧围捕杀之且檄邻邑共入讨贼贼以故不得逞卒就擒事闻于朝差通判军府事三年金人入寇渡淮薄江师于东采石先是车驾幸越宰相杜充总诸道兵留江上左显谟阁待制陈邦光守建康李昫以前执政为户部尚书供馈饷充闻敌至出其军六万人列戍江南岸而闭门莫敢出师无统一居数日敌知充无鬪志遂渡江江上之军皆不战尽溃充与其戏下数千人北去遂降金金入建康昫与邦光不能守昫先降邦光欲弃城去後亦降独邦乂力拒不从大书其衣裾曰宁作赵氏鬼不为他邦臣以授其仆曰持此以见吾志吾即死矣昫邦光愧谢犹强拥邦乂上马即郊次与俱见金四太子命使拜邦乂叱曰我不降何拜亟遁归卧其家金虽暴犹未敢辱之也明日遣其将张太师谕邦乂授以旧官邦乂以首触阶陛曰我以志死何多以诱我为张大惊卒止之徐曰公所守固高奈势不可何第归审思之吾明日复见公邦乂退亟移书其将曰世岂有不畏死而可利动者幸速杀我无久留我至明日其将燕昫邦光坐堂上乐方作召邦乂立庭下邦乂瞠眡昫邦光叱曰天子以若拒敌不能抗俛首求活犬豕已不若复与共燕乐尚有面目见我乎敌将有起取纸书死活二字佯胁邦乂曰公无多言即欲死趣书死字下我乃信邦乂眡吏有簪笔持文书侧立即跃起夺其笔引手掣纸书字曰死衆相顾色动又使引去明日再以见其四太子邦乂不胜愤遥望见即极口大骂复仰天而呼曰天宁久假汝行磔汝

万段尚安得污我敌怒使人疾击挺交下邦又骂不絕口遂杀之剖腹取其心明年敌去州以事上闻天子为太息诏赠直秘阁官其子二人即死所立庙赐额褒忠

忠勲传

范蠡南阳人事越二十余年句践即位三年而欲伐吴蠡进諫曰夫国家之事有持盈有定倾有节事王曰为三者奈何对曰持盈者与天定倾者与人节事者与地王不问蠡不敢言天道盈而不溢盛而不骄劳而不矜其功夫圣人随时以行是谓守时天时不作弗为人客人事不起弗为之始今君王未盈而溢未盛而骄不劳而矜其功天时不作而先为人客人事不起而创为之始此逆於天而不和於人王若行之将妨于国家靡王躬身王弗听蠡进諫曰夫勇者逆德也兵者凶器也争者事之末也陰谋逆德好用凶器始於人者人之所卒也淫佚之事上帝之禁也先行此者不利王曰无是貳言也吾已断之矣果兴师而伐吴战于五湖不胜栖于会稽王召蠡而问焉吾不用子之言以至于此为之奈何蠡对曰君王其忘之乎持盈者与天定倾者与人节事者与地王曰与人奈何对曰卑辞尊礼玩好女乐尊之以名如此不已又身与之市王曰诺乃令大夫种行成於吴吴人许诺王曰蠡为我守於国对曰四封之内百姓之事蠡不如种也四封之外敌国之制立断之事种亦不如蠡也王曰诺令大夫种守於国与蠡入宦於吴三年而吴人遣之归反至於国王问於蠡曰节事奈何对曰节事者与地唯地能包万物以为一其事不失生万物容畜禽兽然後受其名而兼其利美恶皆成以养其生时不至不可强生事不究不可强成自若以处度天下待其来者而正之因时之所宜而定之同男女之功除民之害以避天殃田野开辟府仓实民衆殷无旷其衆以为乱梯时将反事将有间必有以知天地之恒制乃可以有天下之成利事无间时无反则抚民保教以须之王曰不谷之国家蠡之国家也蠡其图之对曰四封之内百姓之事时节三乐不乱民功不逆天时五谷睦熟民乃蕃滋君臣上下交得其志蠡不如种也四封之外敌国之制立断之事因陰阳之恒顺天地之常柔而不屈强而不刚德虐之行因以为常死生因天地之刑天因人圣人因天人自生之天地形之圣人因而成之是故战胜而不报取地而不反兵胜于外福生於内用力甚少而名声章明种亦不如蠡也王曰诺令大夫种为之四年王召蠡而问焉曰先人就世不谷即位吾年既少未有恒常出则禽荒入则酒荒吾百姓之不图唯舟与车上天降祸於越委制於吴吴人之那不谷亦又甚焉吾欲与子谋之其可乎对曰未可也蠡闻之上帝不考时反是守强索者不祥得时不成反受其殃失德灭名流走死亡有夺有予有不予王无早图夫吴君王之吴也王若早图之其事又将未可知也王曰诺又一年王召蠡而问焉曰吾与子谋吴子曰未可也今吴王淫於乐而忘其百姓乱民功逆天时信谗喜优憎辅远弼圣人不出忠臣解骨皆曲相御莫适相非上下相偷其可乎对曰人事至矣天应未也王姑待之王曰诺又一年王召蠡而问焉曰吾与子谋吴子曰未可也今申胥骤諫于王王怒而杀之其可乎对曰逆节萌生天地未形而先为之征其事是以不成杂受其刑王姑待之王曰诺又一年王召蠡而问焉曰吾与子谋吴子曰未可也今其稻蟹不遗种其可乎对曰天应至矣人事未尽也王姑待之王怒曰道固然乎妄其欺不谷耶吾与子言人事子应我以天时今天应至矣子应我以人事何也蠡又对曰王姑勿怪夫人人事必将与天地相参然後乃可以成功今其祸新民恐其君臣上下皆知其资财之不足以支长久也彼将同其力致其死犹尚殆王其且驰骋弋猎无至禽荒宫中之乐无至酒荒肆与大夫觴饮无忘国常彼其上将薄其德民将尽其力又使之

望而不得食乃可以致天地之殛王姑待之至於玄月王召蠡而问焉曰谚有之曰觥饭不及壶飧今岁晚矣子将奈何对曰微君王之言臣固将谒之臣闻从时者犹救火追亡人也蹶而趋之唯恐弗及王曰诺遂兴师伐吴至於五湖【五湖即笠泽也溧阳县长塘湖亦名洮湖即五湖之一详见山川志】吴人闻之出而挑战一日五反王弗忍欲许之蠡进谏曰夫谋之廊庙失之中原其可乎王姑勿许也臣闻之得时无怠时不再来天予不取反为之灾赢缩转化後将悔之天节固然唯谋不迁王曰诺弗许蠡又曰臣闻古之善用兵者赢缩以为常四时以为纪无过天极究数而止天道皇皇日月以为常明者以为法微者则是行阳至而陰陰至而阳日困而还月盈而匡古之善用兵者因天地之常与之俱行後则用陰先则用阳近则用柔远则用刚後无陰蔽先无阳察用人无艺往从其所刚柔以御阳节不尽不死其野彼来从我固守勿与若将与之必因天地之灾又观其民之饥饱劳逸以参之尽其阳节盈吾陰节而夺之利宜为人客刚强而力疾阳节不尽轻而不可取宜为人主安徐而重固陰节不尽柔而不可迫凡陈之道设右以为牝益左以为牡蚤晏无失必顺天道周旋无究今其来也刚强而力疾王姑待之王曰诺弗与战居军三年吴师自溃吴王师其贤良与其重禄以上姑苏使王孙雄行成於越曰昔者上天降祸於吴得罪於会稽今君王其图不谷不谷请复会稽之和王弗忍欲许之蠡进谏曰臣闻之圣人之功时为之庸得时不成天有还形天节不远五年复反小凶则近大凶则远先人有言曰伐柯者其则不远今君王不断其忘会稽之事乎王曰诺不许使者往而复来辞愈卑礼愈尊王又欲许之蠡谏曰孰使我早朝而晏罢者非吴乎与我争三江五湖之利者非吴耶夫十年谋之一朝而弃之其可乎王姑勿许其事将易冀已王曰吾欲勿许而难对其使者子其对之蠡乃左提鼓右援枹以应使者曰昔者上天降祸於越委制于吴而吴不受今将反义以报此祸吾王敢无听天之命而听君王之命乎王孙雄曰子范子先人有言曰无助天为虐助天为虐者不祥今吴稻蟹不遗种子将助天为虐不忌其不祥乎蠡曰王孙子昔吾先君固周室之不成子也故滨於东海之陂鼃鼃鱼鼃之与处而鼃鼃之与同渚余虽腴然而人面哉吾犹禽兽也又安知是譏譏者乎王孙雄曰子范子将助天为虐助天为虐不祥雄请反辞于王蠡曰君王已委制於执事之人矣子往矣无使执事之人得罪於子使者辞反蠡不报於王击鼓兴师以随使者至於姑苏之宫不伤越民遂灭吴句践既平吴乃命蠡筑城金陵之长干【长干在今建康府城南天禧寺所故址犹在详见越台辨及越城下】以兵北渡淮与齐晋诸侯会於徐州致贡於周元王使人赐句践胙命为伯是时越兵横行江淮东诸侯毕贺号称霸王蠡乃辞于王曰臣闻之为人臣者君忧臣劳君辱臣死昔者君王辱于会稽臣所以不死者为此事也今事已济矣蠡请从会稽之罚王曰所不掩子之恶扬子之美者使其身无终没於越国子聽吾言吾与子分国不听吾言身死妻子为戮蠡对曰臣闻命矣君行制臣行意遂乘轻舟以浮於五湖【注见前】变姓名自谓鸱夷子皮苦身戮力父子治产居无几何致产数千万齐人闻其贤以为相蠡喟然叹曰居家则致千金居官则至卿相此布衣之极也久受尊名不祥乃归相印尽散其财以分与知友乡党而怀其重宝间行以去止於陶於是自谓陶朱公

周瑜字公瑾庐江舒人父异洛阳令瑜长壮有姿貌初孙坚兴义兵讨董卓徙家於舒坚子策与瑜同年独相友善瑜推道南大宅以舍策升堂拜母有无通共瑜从父尚为丹阳太守瑜往省之会策东渡到历阳驰书报瑜瑜将兵迎策策大喜曰吾得卿谐也遂从攻横江当利皆拔之乃渡击秣陵破笮融薛礼转下湖熟江乘进入曲阿刘繇奔走而策之衆已数万矣因谓瑜

曰吾以此衆取吴会平山越已足卿还镇丹阳瑜还顷之袁术遣从弟胤代尚为太守而瑜与尚俱还寿春术欲以瑜为将瑜观术终无所成故求为居巢长欲假涂东归术听之遂自居巢还吴是岁建安三年也策亲自迎瑜授建威中郎将即与兵二千人骑五十匹策令曰周公瑾英隽异才与孤有总角之好骨肉之分加前在丹阳发衆及船粮以济大事论德酬功此未足以报者也瑜时年二十四吴中皆呼为周郎以瑜恩信着於庐江出备牛渚後领春谷长顷之策欲取荆州以瑜为中护军领江夏太守从攻皖拔之复进寻阳破刘勳讨江夏还定豫章庐陵留镇巴丘【案孙策时始得豫章庐陵尚未能得定江夏瑜之所镇应在今已丘县也与後所卒巴丘处不同】策薨权统事瑜将兵赴丧遂留吴以中护军与长史张昭共掌衆事操新破袁绍兵威日盛建安七年下书责权质仕子权召羣臣会议张昭秦松等犹豫不能决权意不欲遣质乃独将瑜诣母前定议瑜曰昔楚国初封於荆山之侧不满百里之地继嗣贤能广土开境立基於郢遂据荆扬至于南海传业延祚九百余年今将军承父兄余资兼六郡之衆兵精粮多将士用命铸山为铜煮海为盐境内富饶人不思乱泛舟举帆朝发夕到士风劲勇所向无敌有何逼迫而欲送质质一入不得不与曹氏相首尾与相首尾则命召不得不往便见制於人也极不过一侯印仆从十余人车数乘马数匹岂与南面称孤同哉不如勿遣徐观其变若曹氏能率义以正天下将军事之未晚若图为暴乱兵犹火也不戢将自焚将军韬勇抗威以待天命何送质之有权母曰公瑾议是也公瑾与伯符同年小一月耳我视之如子也汝其兄事之遂不送质十三年九月操入荆州刘琮举衆降操得其水军船步兵数十万将士闻之皆恐权延见羣下问以计策议者咸曰曹公豺虎也然托名汉相挟天子以征四方动以朝廷为辞今日拒之事更不顺且将军大势可以拒操者长江也今操得荆州奄有其地刘表治水军蒙冲鬪舰乃以千数操悉浮以沿江兼有步兵水陆俱下此为长江之险已与我共之矣而势力衆寡又不可论愚谓大计不如迎之瑜曰不然操虽托名汉相其实汉贼也将军以神武雄才兼仗父兄之烈割据江东地方千里兵精足用英雄乐业尚当横行天下为汉家除残去秽况操自送死而可迎之耶请为将军筹之今使北土已安操无内忧能旷日持久来争疆场又能与我校胜负於船楫中乎今北土既未平安加马超韩遂尚在关西为操後患且舍鞍马杖舟楫与吴越争衡本非中国所长又今盛寒马无藁草驱中国士衆远涉江湖之间不习水土必生疾病此数四者用兵之患也而操皆冒行之将军擒操宜在今日瑜请得精兵三万人进往夏口保为将军破之权曰老贼欲废汉自立久矣徒忌二袁吕布刘表与孤耳今数雄已灭惟孤尚存孤与老贼势不两立君言当击甚与孤合此天以君授孤也权拔刀斫前奏案曰诸将吏敢复有言当迎操者与此集同及会罢之夜瑜请见曰诸人徒见操书言水步八十万而各恐懼不复料其虚实便开此议甚无谓也今以实校之彼所将中国人不过十五六万且军已久疲所得表衆亦极七八万耳尚怀狐疑夫以疲病之卒御狐疑之衆衆数虽多甚未足畏得精兵五万自足制之愿将军勿虑权抚背曰公瑾卿言至此甚合孤心子布文表诸人各顾妻子挟持私虑深失所望独卿与子敬与孤同耳此天以卿二人赞孤也五万兵难卒合已选三万人船粮战具俱办卿与子敬程公便在前发孤当续发人衆多载资粮为卿後援卿能办之者诚决邂逅不如意便还就孤孤当与孟德决之时刘备为操所破遣诸葛亮诣权权遂遣瑜及程普等与备并力逆操遇於赤壁时操军衆已有疾病初一交战瑜军败退引次江北瑜等在南岸瑜部将黄盖曰今寇衆我寡难与持久然观操军方连船舰首尾相接可烧而走也乃取蒙冲鬪舰数十艘实以薪草膏油灌其中裹以帷幕上建牙旗先书报操欺以欲降又豫备走舸各系大船後因引次俱前操军吏士皆延颈观望指言盖降盖放诸船同时发

火时风甚猛悉延烧岸上营落顷之烟炎涨天人马烧溺死者甚衆操军败退还保南郡权拜瑜偏将军领南郡太守以下雋汉昌浏阳州陵为奉邑屯据江陵刘备以左将军领荆州牧治公安备诣京见权瑜上疏曰刘备以梟雄之姿而有关侯张飞熊虎之将必非久屈为人用者愚谓大计宜徙备置吴盛为筑宫室多具美女玩好以娱其耳目分此二人各置一方使如瑜者得挟与攻战大事可定也今猥割土地以资业之聚此三人俱在疆场恐蛟龙得云雨终非池中物也权以操在北方当广肇英雄又恐备难卒制故不纳是时刘璋为益州牧外有张鲁寇侵瑜乃诣京见权曰今曹操新折?方忧在腹心未能与将军连兵相事也乞与奋威俱进取蜀得蜀而并张鲁因留奋威固守其地好与马超结援瑜还与将军据襄阳以?操北方可图也权许之瑜还江陵为行?而道於巴丘病卒【所卒之处应在今之巴陵与前所领巴丘名同处异也】两男一女女配太子登男循尚公主拜骑都尉有瑜风王导字茂弘光禄大夫览之孙也少有风鉴识量清远年十四陈留高士张公见而奇之曰此儿容貌志气将相之器也元帝为琅邪王与导素相亲善导知天下已乱遂倾心推奉潜有兴复之志帝亦雅相器重契同友执帝之在洛阳也导每劝令之国会帝出镇下邳请导为安东司马军谋密策知无不为及徙镇建康吴人不附居月余士庶莫有至者导患之会敦来朝导谓之曰琅邪王仁德虽厚而名论犹轻兄威风已振宜有以匡济者会三月上巳帝亲观禊乘肩輿具威仪敦导及诸名胜皆骑从吴人纪瞻顾荣皆江南之望窃覩之见其如此咸惊惧乃相率拜於道左导因进计曰古之王者莫不宾礼故老存问风俗虚已倾心以招俊乂况天下丧乱九州分裂大业草创急於得人者乎顾荣贺循此土之望未若引之以结人心二子既至则无不来矣帝乃使导躬造循荣二人皆应命而至由是吴会风靡百姓归心焉自此之後渐相崇奉君臣之礼始定俄而洛京倾覆中州士女避乱江左者十六七导劝帝牧其贤人君子与之图事时荆扬晏安户口殷实导为政务在清静每劝帝收其贤人君子与之图事尤见委杖情好日隆朝野倾心号为仲父帝从容谓导曰卿吾之萧何也晋国既建以导为丞相军谄祭酒桓彝初过江见朝廷微弱谓周顗曰我以中州多故来此欲求全活而寡弱如此将何以济忧惧不乐往见导极谈世事还谓顗曰向见管夷吾无复忧矣于时军旅不息学校未修导上书曰夫风化之本在於正人伦人伦之正存乎设庠序庠序设五教明德礼洽通彝伦攸叙而有耻且格父子兄弟夫妇长幼之序顺而君臣之义固矣方今强敌扇炽国耻未雪忠臣义夫所以扼腕拊心苟礼义胶固淳风渐着则化之所感者深而德之所被者大使帝典阙而复补王纲弛而更张兽心革面饕餮检情揖让而服四夷缓带而天下从得乎其道岂难也哉故有虞舞干戚而化三苗鲁僖作泮宫而服淮夷桓文之霸皆先教而後战今若聿遵前典兴复道教择朝臣之子弟并入于学选明博修礼之士而为之师化成俗定莫尚於斯帝甚纳之及帝登尊号百官陪列命导升御牀共坐导固辞至于三四曰若太阳下同万物苍生何由仰照帝乃止及刘隗用事导渐见疎远任真推分澹如也有识咸称导善处兴废焉王敦之反也刘隗劝帝悉诛王氏论者为之危心导率羣从昆弟子侄二十余人每旦诣台待罪帝以导忠节有素特还朝服召见之导稽首谢曰逆臣贼子何世无之岂意今者近出臣族帝蹴而执之曰茂弘方托百里之命于卿是何言耶乃诏曰导以大义灭亲可以吾为安东时节假之及敦得志加导尚书令初西都覆没海内思主羣臣及四方并劝进於帝时王氏强盛有专天下之心敦惮帝贤明欲更议所立导固争乃止及此役也敦谓导曰不从吾言几致覆族导犹执正议敦无以能夺初帝爱琅邪王裒将有夺嫡之议以问导导曰立子以长且绍又贤不宜改革帝犹疑之导日夕陈谏故太子卒定帝崩导复与庾亮等同受遗诏共辅幼主及石勒侵阜陵诏加导大司马假黄钺出讨之

军次江宁帝亲餞于郊俄而贼退解大司马庾亮将徵苏峻访之於导导曰峻猜险必不奉诏且山藪藏疾宜包容之固争不从亮遂召峻既而难作六军败绩导入宫侍帝峻以导德望不敢加害犹以本官居己之右峻又逼乘輿幸石头导争之不得峻日来帝前肆丑言导深惧有不测之祸时路永匡术贾宁并说峻令杀导尽诛大臣更树腹心峻敬导不纳故永等贰于峻导使参军袁耽潜讽诱永等谋奉帝出奔义军而峻卫御甚严事遂不果导乃携二子随永奔于白石及贼平宗庙宫室并为灰烬温峤议迁都豫章三吴之豪请都会稽二论纷纭未有所适导曰建康古之金陵旧为帝里又孙仲谋刘玄德俱言王者之宅古之帝王不必以丰俭移都苟宏卫文大布之冠则无往不可若不绩其麻则乐土为虚矣且北寇游魂伺我之隙一旦示弱窜於蛮越求之望实惧非良计今特宜镇之以静羣情自安由是峤等谋并不行导有羸疾不堪朝会帝幸其府纵酒作乐後令輿车入殿石季龙掠骑至历阳导请出讨之加大司马假黄钺中外诸军事置左右长史司马给布万匹俄而贼退解大司马复转中外大都督进位太傅又拜丞相依汉制罢司徒官以并之册曰朕夙罹不造肆陟帝位未堪多难祸乱旁兴公文贯九功武经七德外缉四海内齐八政天地以平人神以和业同伊尹道隆姬旦仰思唐虞登庸隳义申命羣官允厘庶绩朕思凭高谟宏济远猷维稽古建尔于上公永为晋辅往践厥职敬敷道训以亮天工不亦休哉公其戒之咸和五年薨时年六十四帝举哀于朝堂三日遣大鸿胪持节监护丧事赠襚之礼一依汉博陆侯及安平献王故事及葬给九游輶轎车黄屋左纛前後羽葆鼓吹虎贲班剑百人中兴名臣莫与为比锡谥曰文献祠以太牢六子悦恬洽協劭荟

谢安字安石少有重名初辟司徒府除著作佐郎并以疾辞寓居会稽与王羲之及高阳许询桑门支遁游处出则渔弋山水入则言咏属文无处世意年四十余征西大将军桓温请为司马将发新亭朝士咸送中丞高崧戏之曰卿屡违朝旨高卧东山诸人每相与言安石不肯出将如苍生何苍生今亦将如卿何既到温甚喜言生平欢笑竟日既出温问左右颇尝见我有如此客不温当北征会万病卒安投牋求归寻除吴兴太守在官无当时誉去後为人所思顷之徵拜侍中迁吏部尚书中护军简文帝疾笃温上疏荐安宜受顾命及帝崩温入赴山陵止新亭大陈兵卫将移晋室呼安及王坦之欲於坐害之坦之甚惧问计於安安神色不变曰晋祚存亡在此一行既见温坦之流汗沾衣倒执手版安从容就席坐定谓温曰安闻诸侯有道守在四隣明公何须壁後置人耶温笑曰正自不能不尔耳遂笑语移日坦之与安初齐名至是方知坦之之劣温尝以安所作简文帝谥议以示坐宾曰此谢安石碎金也时孝武帝富於春秋政不自己温威振内外人情噂???互生同异安与坦之尽忠匡翼终能辑穆及温病笃讽朝廷加九锡使袁宏具草安见辄改之由是历旬不就会温薨锡命遂寝寻为尚书仆射领吏部加後将军诏安总关中书事时强敌寇境边书续至梁益不守樊邓?没安每镇以和靖御以长算德政既行文武用命不存小察宏以大纲威怀外着人皆比之王导谓文雅过之尝与王羲之登冶城悠然遐想有高世志羲之谓曰夏禹勤王手足胼胝文王旰食日不暇给今四郊多垒宜思自効而虚谈废务浮文妨要恐非当今所宜安曰秦任商鞅二世而亡岂清言致患耶是时宫室毁坏安欲缮之尚书令王彪之等以外寇为谏安不从竟独决之宫室用成皆仰模元象合体辰极而役无劳怨又领扬州刺史诏以甲仗百人入殿时帝始亲万几进安中书监骠骑将军录尚书事固让军号于时悬象失度亢旱弥年安奏求晋初佐命功臣後而封之顷之加司徒让不拜复加侍中都督扬豫徐兖青五州幽州之燕国诸军事假节时苻坚强盛

疆场多虞诸将败退相继安遣弟石及兄子玄等应机征讨所在克捷拜卫将军开府仪同三司封建昌县公坚後率衆号百万次于淮淝京师震恐加安征讨大都督玄入问计安夷然无惧色答曰已别有旨既而寂然玄不敢复言乃令张玄重请安遂命驾出山墅亲朋毕集方与玄围碁赌别墅游陟至夜乃还指授将帅各当其任玄等既破坚有驿书至安方对客围碁看书既竟便摄放牀上了无喜色碁如故客问之徐答云小儿辈遂已破贼既罢还内过户限心喜甚不觉屐齿之折其矫情镇物如此以总统功进拜太保安方欲混一文轨上疏求自北征乃进都督扬江荆司豫徐兗青冀幽并宁益雍梁十五州军事加黄钺其本官悉如故是时桓冲既卒荆江二州并阙物论以玄勳望宜以授之安以父子皆着大勲恐为朝廷所疑又惧桓氏失职桓石?复有沔阳之功虑其骁猛在形胜之地终或难制乃以桓石民为荆州改桓伊於中流石?为豫州既以三桓据三州彼此无怨各得所任其经远无竞类皆如此又於土山营墅楼馆林竹甚盛每携中外子侄往来游集肴饌亦屡费百金世颇以此讥焉而安殊不以屑意常疑刘牢之既不可独任又知王味之不宜专城牢之既以乱终而味之亦以贪败由是识者服其知人时会稽王道子专权而奸諂颇相扇构安坐镇广陵之步丘筑垒曰新城以避之帝出祖于西池献觞赋诗焉安虽受朝寄然东山之志始末不渝每形于言色及镇新城尽室而行造泛海之装欲须经畧粗定自江道还东雅志未就遂遇疾笃上疏请量宜旋旆并召子征虏将军琰解甲息徒命龙骧将军朱序进据洛阳前锋都督玄抗威彭沛委以董督若二贼假延来年水生东西齐举诏遣侍中慰劳遂还都闻当輿入西州门自以本志不遂深自慨失因怅然谓所亲曰昔桓温在时吾常惧不全忽梦乘温輿行十六里见一白鷄而止乘温輿者代其位也十六里止今十六年矣白鷄主酉今太岁在酉吾病殆不起乎乃上疏逊位薨年六十六帝三日临于朝堂赠太傅谥曰文靖葬加殊礼依大司马桓温故事

温峤字太真司徒羨弟之子也聪敏有识量博学能属文少以孝悌称於邦族年十七州郡辟召皆不就平北大将军刘琨妻峤之从母琨深礼之请为参军与讨石勒有功迁右司马元帝初镇江左琨谓峤曰昔班彪识刘氏之复兴马援知汉光之可辅今晋祚虽衰天命未改吾欲立功河朔使卿延誉江南子其行乎对曰峤虽无管张之才而明公有桓文之志欲建匡合之功岂敢辞命乃以为左长史檄告华夷奉表劝进峤既至引见具陈琨忠诚志在效节因说社稷无主天人系望辞旨慷慨举朝属目帝器而嘉焉王导周顗谢鲲庾亮桓彝等并与亲善于时江左草创纲维未举峤殊以为忧及见王导共谈譔然曰江左自有管夷吾吾复何虑除散骑侍郎固让不拜苦请北归葬母不许後迁太子中庶子在东宫深见宠遇太子与为布衣之交数陈规讽又献侍臣箴甚有宏益时太子起西池楼观颇为劳费峤上疏以为朝廷草创巨寇未灭宜应俭以率下务农重兵太子纳焉王敦举兵内向六军败绩太子将自出战峤执鞚谏曰臣闻善战者不怒善胜者不武如何万乘储副而以身轻天下太子乃止明帝即位拜侍中机密大谋皆所参综诏命文翰亦悉豫焉俄转中书令峤有栋梁之任帝亲而倚之甚为王敦所忌因请为左司马敦阻兵不朝多行陵纵峤谏敦曰昔周公之相成王劳谦吐握岂好勤而恶逸哉诚由处大任者不可不尔而公自还輦轂入辅朝政阙拜覲之礼简人臣之仪不達圣心者莫不於邑昔帝舜服事唐尧伯禹竭身虞庭文王虽盛臣节不讐故有庇人之大德必有事君之小心俾芳烈奋乎百世休风流乎万祀至圣遗轨所不宜忽愿思舜禹文王服事之勤推公旦吐握之事则天下幸甚敦不纳峤知其终不悟於是谬为设敬综其府事干说密谋以附其欲深结钱凤为之声誉每曰钱世仪精神满腹峤素有知人之称凤闻而悦之深结好

於峤会丹阳尹阚峤说敦曰京尹辇毂喉舌宜得文武兼能公宜自选其才若朝廷用人或不尽理敦然之问峤谁可峤曰钱凤可用凤亦推峤峤伪辞之敦不从表补丹阳尹峤犹惧钱凤为奸谋因敦钱别峤起行酒至凤前凤未及饮峤因伪醉以手板击凤帻坠作色曰钱凤何人温太真行酒而敢不饮敦以为醉而释之临去言别涕泗横流出阁复入如是再三然後即路及发後凤入说敦曰峤於朝廷甚密而与庾亮深交未必可信敦曰太真昨醉小加声色岂得以此便相谗貳由是凤谋不行而峤得还都乃具奏敦之逆谋请先为之备及敦构逆加峤中垒将军持节都督东安北部诸军事敦与王导书曰太真别来几日作如此事表诛奸臣以峤为首募生得峤者当自拔其舌及王含钱凤奄至都下峤烧朱雀桁以挫其锋帝怒之峤曰今宿卫寡弱徵兵未至若贼豕突危及社稷陛下何惜一桥贼果不得渡峤自率衆与贼夹水战击王含败之复督刘遐追钱凤於江宁事平封建宁县开国公赐绢五千四百匹进号前将军帝疾笃峤与王导郗鉴庾亮陆晔卞壺等同受顾命时历阳太守苏峻藏匿亡命朝廷疑之征西将军陶侃有威名於荆楚又以西夏为虞故使峤为上流形援咸和初代应詹为江州刺史持节都督平南将军镇武昌甚有惠政甄异行能亲祭徐孺子之墓又陈豫章十郡之要宜以刺史居之寻阳滨江都督应镇其地今以州帖府进退不便且古镇将多不领州皆以文武形势不同故也宜选单车刺史别抚豫章专理黎庶诏不许峤闻苏峻之徵也虑必有变求还以备不虞不听未几而苏峻果反峤屯寻阳遣督护王愷期西阳太守邓岳鄱阳内史纪瞻等率舟师赴难及京师倾覆峤闻之号恸人有候之者悲哭相对俄而庾亮来奔宣太后诏进峤骠骑将军开府仪同三司峤曰今日之急殄寇为先未効勲庸而逆受荣宠非所闻也何以示天下乎固辞不受时亮虽奔败峤每推崇之分兵给亮遣王愷期等要陶侃同赴国难侃恨不受顾命不许峤用其部将毛宝说复固请侃行初峤与庾亮相推为盟主峤从弟充言於峤曰征西位重兵强宜共推之峤于是遣王愷期奉侃为盟主侃许之遣督护龚登率兵诣峤峤於是列上尚书陈峻罪状有衆七千洒泣登舟移告四方征镇曰贼臣祖约苏峻同恶相济用生邪心天夺其魄死期将至譴负天地自絶人伦寇不可纵宜增军讨扑辄屯次湓口即日护军庾亮至宣太后诏寇逼宫城王旅挠败出告藩臣谋宁社稷後将军郭默冠军将军赵胤奋武将军龚保与峤督护王愷期西阳太守邓岳鄱阳内史纪瞻率其所领相寻而至逆贼肆凶陵宗庙火延宫掖矢流太极二御幽逼宰相困迫残虐朝士劫辱子女承问悲惶精魂飞散峤闇弱不武不能殉难哀恨自咎五情摧陨慙负先帝托寄之重义在毕力死而後已今躬率所部为士卒先催进诸军一时电击西阳太守邓岳寻阳太守褚诞等连旗相继宣城内史桓彝已勒所属屯滨江之要江夏相周抚乃心求征军已向路昔包胥楚国之微臣重趼致诚义感诸侯蔺相如赵邦之陪隶耻君之辱按劔秦庭皇汉之季董卓作乱劫迁献帝虐害忠良关东州郡相率同盟广陵功曹臧洪郡之小吏耳登坛挿血涕泪横流慷慨之节实厉群后况今居台鼎据方州列名邦受国恩者哉不期而会不谋而同不亦宜乎二贼合衆不盈五千且外畏胡寇城内饥乏後将军郭默即於战阵俘杀贼千人贼今虽残破都邑其宿卫兵人即时出散不为贼用且祖约情性褊厄忌尅不仁苏峻小子惟利是视残酷骄猜权相假洽江表兴义以抗其前强胡外寇以蹶其後运漕隔絶资食空悬内乏外孤势何得久羣公征镇职在御侮征西陶公国之耆德忠肃义正勲庸宏着诸方镇州郡咸齐断金同稟规畧以雪国耻苟利社稷死生以之峤虽怯劣忝据一方赖忠贤之规文武之助君子竭诚小人尽力高操之士被褐而从戎负薪之徒匍匐而赴命率其私仆致其私杖人士之诚竹帛不能载也岂峤无德而致之哉士稟义风人感皇泽且护军庾公帝之元舅德望隆重率郭後军赵龚三将与峤戮力得有资凭

且悲且庆若朝廷之不泯也其各明率所统无後事机赏募之信明如日月有能斩约峻者封五等侯赏布万匹夫忠为令德为仁由已万里一契义在不言也时陶侃虽许自下而未发复追其督护龚登峤重与侃书曰仆谓军有进而无退宜增而不可减近已移檄远近言於盟府尅後月半大举南康建安晋安三郡军并在路次同赴此会惟须仁公所统至便齐进耳仁公今召军还疑惑远近成败之由将在於此仆才轻任重责实凭仁公笃爱远禀成规至於首启戎行不敢有辞仆与仁公当如常山之蛇首尾相卫又唇齿之喻也恐惑者不達高旨将谓仁公缓於讨贼此声难追仆与仁公并受方岳之任安危休戚理既同之且自顷之顾绸缪往来情深义重着於人士之口一旦有急亦望仁公悉衆见救况社稷之难惟仆偏当一州州之文武莫不翘企假令此州不守约峻树置官长於此荆楚西逼强胡东接逆贼因之以饥饉将来之危乃当甚於此州之今日也以大义言之则社稷颠覆主辱臣死公进当为大晋之忠臣参桓文之义开国承家铭之天府退当以慈父雪爱子之痛约峻凶逆无道囚制人士裸其五形近日来者不可忍见骨肉生离痛感天地人心齐一咸皆切齿今之进讨若以石投卵耳今出军既缓复召兵还人心乖离是为败於几成也愿深察所陈以副三军之望峻时杀侃子瞻由是侃激励遂率所统与峤亮同赴京师戎卒六万旌旗七百余里钲鼓之声震於百里直指石头次于蔡洲侃屯查浦峤屯沙门浦时祖约据历阳与峻为首尾见峤等军盛谓其党曰吾本知峤能为四公子之事今果然矣峻闻峤将至逼大驾幸石头时峻军多马南军仗舟楫不敢轻与交锋用将军李根计据白石筑垒以自固使庾亮守之贼步骑万余来攻不下而退追斩二百余级峤又於四望矶筑垒以逼贼曰贼必争之设伏以逸待劳是制贼之一奇也是时义军屡战失利峤军食尽陶侃怒曰使君前云不忧无将士惟得老仆为主耳今数战皆北良将安在荆州接胡蜀二虏仓廩当备不虞若复无食仆便欲西归更思良算但今岁计殄贼不为晚也峤曰不然自古成监师克在和光武之济昆阳曹公之拔官渡以寡敌衆仗义故也峻约小竖为海内所患今日之举决在一战峻勇而无谋藉骄胜之势自谓无前今挑之战可一鼓而擒也奈何舍垂立之功设进退之计且天子幽逼社稷危殆四海臣子肝脑涂地峤等与公并受国恩是致命之日事若克济则臣主同祚如其不捷身虽灰灭不足以谢责於先帝今之事势义无旋踵骑猛兽安可中下哉公若违衆独反人心必沮沮衆败事义旗将回指於公矣侃无以对遂留不去峤於是创建行庙广设坛场告皇天后土祖宗之灵亲读祝文声气激扬涕流覆面三军莫能仰视其日侃督水军向石头亮峤等率精勇一万从白石入挑战时峻劳其将士因醉突阵马蹶为侃将所斩峻弟逸及子硕婴城自固峤乃立行台布告天下凡故吏二千石台郎御史以下皆令赴台于是至者云集司徒王导因奏峤侃录尚书遣间使宣旨并让不受贼将匡术以台城来降为逸所击求救於峤江州别驾罗洞曰今水暴长救之不便不如攻榻杭榻杭军若败术围自解峤从之遂破贼石头军奋威长史滕含抱天子奔于峤船时侃虽为盟主而处分规畧一出於峤及贼灭拜骠骑将军开府仪同三司散骑常侍封始安郡公邑三千户卒年四十二江州士庶闻之莫不相顾而泣帝下册书曰朕以眇身纂承洪绪不能光阐大道化洽时雍至乃狂狡滔天社稷危逼惟公明鉴特達识心经远惧皇纲之不维忿凶寇之纵暴唱率羣后五州响应首启戎行元恶授馘王室危而复安三光幽而复明功格宇宙勲着八表方赖大猷以拯区夏天不憖遗早世薨殂朕用痛悼于厥心夫褒德铭勲先王之明典今追赠公侍中大将军持节都督刺史余如故赐钱百万布千匹諡曰忠武祠以太牢初葬于豫章後朝廷追峤勲德将为造大墓於元明二帝陵之北陶侃上表曰故大将军峤忠诚着於圣世勲义感于人神非臣笔墨所能称陈临卒之际与臣书别臣藏之篋笥时时省视每

一思述未尝不中夜抚膺临饭酸噎人之云亡峤实当之谨写峤书上呈伏惟陛下既垂御省伤其情旨死不忘忠身没黄泉追恨国耻獎臣戮力救济艰难使亡而有知抱恨结草岂乐今日劳费之事愿陛下慈恩停其移葬使峤棺柩无风波之危魂灵安於后土诏从之

陶侃字士行本鄱阳人吴平徙家庐江之寻阳庐江太守张夔召为督邮领枞阳令察孝廉至洛阳张华与语异之除郎中顾荣见甚奇之刘弘为荆州刺史辟侃为南蛮长史遣讨贼张昌破之弘谓侃曰吾昔为羊公参军谓吾其後当居身处今相观察必继老夫矣陈敏之乱弘以侃为江夏太守加鹰扬将军敏遣其弟恢来寇武昌侃出兵御之随郡内史扈瓌间侃於弘曰侃与敏有乡里之旧居大郡统强兵脱有异志则荆州无东门矣弘曰侃之忠能吾得之已久岂有是乎侃潜闻之遽遣子洪及兄子臻诣弘以自固弘引为参军资而遣之又加侃为督护使与诸军并力距恢侃乃以运船为战舰或言不可侃曰用官物讨官贼但须列上有本末耳於是击恢所向必破侃戎政齐肃凡有虏获皆分士卒身无私焉後以母忧去职服阕参东海王越军事江州刺史华轶表侃为扬武将军使屯夏口又以臻为参军轶与元帝素不平臻惧难作托疾而归白侃曰华彦夏有忧天下之志而才不足且与琅邪不平难将作矣侃怒遣臻遂东归於帝帝见之大悦命臻为参军加侃奋威将军假赤幢曲盖轺车鼓吹侃乃与华轶告絶顷之迁龙骧将军武昌太守时天下饥荒山夷多断江劫掠侃令诸将诈作商船以诱之劫果至生获数人是西阳王秉之左右侃即遣兵逼秉令出向贼侃整阵於钓台为後继秉缚送帐下二十人侃斩之自是水陆肃清流亡者归之盈路侃竭资振给焉又立夷市於郡东大收其利而帝使侃击杜?令振威将军周访广武将军赵诱受侃节度侃令二将为前锋兄子璜为左甄击贼破之时周顗为荆州刺史先镇淝水城贼掠其良口侃使部将朱伺救之贼退保淝口侃谓诸将曰此贼必更步向武昌吾宜还城昼夜三日行可至卿等谁能忍饥鬪耶部将吴寄曰要欲十日忍饥昼当击贼夜分捕鱼足以相济侃曰卿健将也贼果增兵来攻侃使朱伺等逆击大破之获其輜重杀伤甚衆遣参军王贡告捷於王敦敦曰若无陶侯便失荆州矣伯仁方入境便为贼所破不知那得刺史贡对曰鄱州方有事难非陶龙骧莫可敦然之即表拜侃为使持节宁远将军南蛮校尉荆州刺史领西阳江夏武昌镇于沌口又移入沔江遣朱伺等讨江夏贼杀之贼王冲自称荆州刺史据江陵王贡还至竟陵矫侃命以杜曾为前锋大督护进军斩冲悉降其衆侃召曾不到贡又恐矫命获罪遂与曾举兵反侃坐免官王敦表以侃白衣领职侃复率周访等进军入湘使都尉杨举为先驱击杜?大破之屯兵于城西敦奏复侃官?将王贡精卒三千出武陵江诱五谿夷以舟师断官运径向武昌侃使郑攀及伏波将军陶延夜趣巴陵潜师掩其不备大破之斩千余级降万余口贡遁还湘城贼中离阻杜?遂疑张奕而杀之衆情益惧降者滋多王贡复挑战侃遥谓之曰杜?为益州吏盗用库钱父死不奔丧卿本佳人何为随之也天下宁有白头贼乎贡初横脚马上侃言乞贡敛容下脚辞色甚顺侃知其可动复令谕之截髮为信贡遂来降而?败走进尅长沙获其将毛宝高宝梁堪而还王敦深忌侃功将还江陵欲诣敦别皇甫方回及朱伺等谏以为不可侃不从敦果留侃不遣左转广州刺史平越中郎将以王廙为荆州侃之佐吏将士诣敦请留侃敦怒不许侃将郑攀苏温马隼等不欲南行遂西迎杜曾以距廙敦意攀承侃风旨被甲持矛将杀侃出而复回者数四侃正色曰使君之雄断当裁天下何此不决乎因起如厕谘议参军梅陶长史陈颁言於敦曰周访与侃亲姻如左右手安有断人左手而右手不应者乎敦意遂解引其子瞻为参军侃既达豫章见周访流涕曰非卿外援我殆不免侃至始兴会杜弘反侃击斩之传首京师诸将皆请

乘胜击温邵侃笑曰吾威名已着何事遣兵但一函纸自足耳於是下书谕之邵惧而走追获於始兴以功封柴桑侯食邑四千户侃在州无事辄朝运百甓於斋外暮运於斋内人问其故答曰吾方致力中原过尔优逸恐不堪事其励志勤力皆此类也太兴初进号平南将军寻加都督交州军事及王敦举兵反诏侃以本官领江州刺史寻转都督湘州刺史敦得志上侃复本职加散骑常侍时交州刺史王谅为贼梁硕所?侃遣将高宝进击平之以侃领交州刺史录前後功封次子夏为都亭侯进号征南大将军开府仪同三司及王敦平迁都督荆雍益梁州诸军事领护南蛮校尉征西大将军荆州刺史余如故楚郢士女莫不相庆侃性聪敏勤於吏职恭而近礼爱好人伦终日敛膝危坐阍外多事千绪万端罔有遗漏远近书疏莫不手答笔翰如流未尝壅滞引接疎远门无停客尝语人曰大禹圣者乃惜寸陰至於衆人当惜分陰豈可逸游荒醉生无益於时死无闻於後是自弃也诸参佐或以谈戏废事者乃命取其酒器蒲博之具悉投之于江吏将则加鞭扑曰擣蒲者牧猪奴戲耳老庄浮华非先王之法言不可行也君子当正其衣冠摄其威仪何有乱头养望自谓宏达耶造船木屑及竹头悉令举掌之咸不解所以後正会积雪始晴听事前余雪犹湿於是以屑布地及桓温伐蜀又以侃所贮竹头作丁装船其综理微密皆此类也暨苏峻作逆京都不守侃子瞻为贼所害平南将军温峤要侃同赴朝廷推为盟主以峻杀其子重遣书以激怒之便戎服登舟星言兼迈瞻丧至不临五月与温峤庾亮等俱会石头诸军即欲决战侃以贼盛不可争锋当以岁月智计擒之累战无功诸将请於查浦筑垒监军部将李根建议请立白石垒侃不从曰若垒不成卿当坐之根曰查浦地下又在水南唯白石峻极险固可容数千人贼来攻不便灭贼之术也侃笑曰卿良将也乃从根谋夜修晓讫贼见垒大惊贼攻大業侃将救之长史殷羡曰若遣救大業步战不如峻则大業去矣但当急攻石头峻必救之而大業自解侃又从羡言峻果弃大業而救石头诸军与峻战陈陵东侃督护竟陵太守李阳部将彭世斩峻於阵贼衆大潰峻弟逸复聚衆侃与诸军斩逸于石头初庾亮少有高名以明穆皇后之兄受顾命之重苏峻之祸职亮是由及石头平惧侃致讨亮用温峤谋诣侃拜谢侃遽止之曰庾元规乃拜陶士行耶王导入石头城令取故节侃笑曰苏武节似不如是导有慙色使人屏之侃旋江陵寻以为侍中太尉加羽葆鼓吹改封长沙郡公邑三千户赐绢八千匹加都督交广宁七州军事以江陵偏远移镇巴陵遣谘议参军张诞讨五谿夷降之属後将军郭默矫诏袭杀平南将军刘胤辄领江州侃闻之曰此必诈也遣将军宋夏陈修率兵据湓口侃以大军继进默遣使送奴婢绢百匹写中诏呈侃参佐多谏曰默不被诏岂敢为此事若进军宜待诏报侃厉色曰国家年小不出胷怀且刘胤为朝廷所礼虽方任非才何缘猥加极刑郭默虓勇所在暴掠以大难新除威网寬简欲因隙会骋其从横耳发使上表讨默与王导书曰郭默杀方州即用为方州害宰相便为宰相乎导答曰默居上流之势加有船舰成资故苞含隐忍使其有地一月潜严足下军到是以得风发相赴岂非遵养时晦以定大事者耶侃省书笑曰是乃遵养时贼也侃既至默将宗侯缚默父子五人及默将张丑诣侃降侃斩默等默在中原数与石勒等战贼畏其勇闻侃讨之兵不血刃而擒也益畏侃苏峻将冯铁杀侃子奔于石勒勒以为戍将侃告勒以故勒召而杀之诏侃都督江州领刺史增置左右长史司马从事中郎四人掾属十二人侃旋于巴陵因移镇武昌侃命张夔子隐为参军范逵子眺为湘东太守辟刘弘曾孙安为掾属表论梅陶凡微时所荷一殮咸报遣子斌与南中郎将桓宣西伐樊城走石勒将郭敬使兄子臻竟陵太守李阳等共破新野遂平襄阳拜大将军劔履上殿入朝不趋赞拜不名上表固让咸和七年六月疾笃又上表逊位遣左长史殷羡奉送所假节麾幢曲盖侍中貂蝉太尉章荆江州刺史印传棨戟

以後事付右司马王愆期加督护统领文武侃輿车出临津就船明日薨于樊谿时年七十六成帝下诏曰故使持节侍中太尉都督荆江雍梁交广益宁八州诸军事荆江二州刺史长沙郡公经德蕴哲谋猷宏远作藩于外八州肃清勤王于内皇家以宁乃者桓文之勲伯舅是凭方赖大猷俾屏予一人前进位大司马礼秩策命未及加崇昊天不吊奄忽薨殂朕用震悼于厥心今遣兼鸿胪追赠大司马假密章祠以太牢魂而有灵嘉兹宠荣又策谥曰桓【朱文公请陶桓公庙额状载云江南刘羲仲所撰公赞曰晋太尉陶桓公侃有大功于晋读其书凜乎其见其唱义於武昌破石头斩苏峻何其壮也东坡苏公尝为予言桓公忠义之节横秋霜而贯白日晋史书折翼事岂有是乎且就其说考之桓公梦生八翼登天门九重登其八闾者以杖击之坠地折左翼及握强兵居上流潜有窥觐之志辄思折翼之祥自抑而止心之所寓者为志神之所寓者为梦何自而知其然哉至其书梅陶称机神明鉴似魏武忠顺勤劳似孔明岂不信哉魏武起徒步唱义兵非若桓公威名之着也以汉德之深磐石之固可折箠驱之以息天下之祸非若成帝削弱之资也董卓之乱未必大於苏峻魏武之功未必过於桓公保兖州以为固挟天子以为资其意安在则其托兴复以为名是乃窥汉之计也名莫大乎忠孝分莫大乎君臣若魏武无忠臣之节其所谓机神明鉴者奸雄耳桓公岂其比乎始苏峻之祸贼将害其子者冯铁也冯铁奔石勒为戍将石勒畏桓公之强杀冯铁石勒自以为一时豪杰标置二刘之间俯视曹孟德司马仲达而气出其右顾畏桓公如此桓公没距今几千年所在庙祀之都昌县南北庙为尤盛庙屡废而屡兴由其有功德於斯民者厚也又缴到近世抚州布衣吴澥所着辩论曰卓哉陶士行之独立也方魏晋之际浮虚之俗摇荡朝野一时闻人达士名卿才大夫莫不陷于末流罔知攸济唯士行深疾时弊慨然有作蓄其刚毅沈厚之气秉其忠愍正固之节以与流俗争衡虽动而见尤所向白眼一入仕途荆棘万状而方寸耿耿者未始少渝终日运百臂於竹头木屑间纖悉经营虽一束之縻劬劳不怠当时名士观之宜若老农俗吏无足比数而士行确然为之不屑也卒能恢廓才猷立功立事以大庇斯民当晋室横流之中屹为底柱自非明智独立安能臻此哉然览庾亮之传应詹之书则疑侃有跋扈之心观温峤之举毛宝之谋则见侃有顾望之迹比至洒血成文登天折翼动可疑怪岂有是事也哉此盖行高於人衆必非之加以苏峻之诛庾亮耻为之屈既士行湓先朝露後嗣零落而庾氏世总朝权其志一逞遂从而诬谤之耳秉史笔者既有所畏何所求而不得哉是其旁见曲出乃所以证成其罪也然观士行义旗既建一麾东下子丧不临直趋蔡洲一时勤王之师蔑有先者暨元勳克集实主斯盟而退然不有旋师归藩既坐拥八州据上流已重泰山晋轻鸿毛移其宗社曾不反掌而臣节益修未始擅作威福以自封殖朝廷惮其勲名每加疑备而士行泰然曾不少芥胷次及末年卧疾封府库而登舟举愆期而自代视去方伯之重不啻脱屣其臣节终始夷险无一可訾穷晋二百年间卓然独立不忠之迹果安在哉今舍其灼然之实而信其似是之虚岂可谓善观史也哉嗟乎自古欲诬人而不得者必污以闺房之事以其难明故也今晋史欲诬士行而乃以梦寐之祥是其难明殆又甚于闺房哉然不知士行而实怀异志则如此梦寐之祥正合自知耳人安得而知之晋史以此待士行其智果不得与小儿等其说固不待攻而自破云】

本朝曹彬字国华真定灵寿人也父芸成德军兵马使彬始生周岁日父母以百玩之具罗於席观其所取彬左手持干戈右手取俎豆斯须取一印他无所视人皆异之既长气质淳厚汉乾佑中为成德牙将周太祖贵妃张氏彬之从母也彬归京师得隶世宗帐下补供奉官累迁

西上合门使出使吴越乞事即行不受私觐吴越人以轻舟追遗之至於数四彬犹不受既而曰吾或终拒之是近名也遂受而归尽输内帑世宗强还之欲辞不获悉以分亲旧而一介不取迁引进使宋兴迁客省使与王全斌郭进屡破北寇太祖伐蜀以内客省使监归州路行营刘光毅军峡中郡县悉下诸将皆欲屠城杀降彬独任恕而戢下所至悦服太祖降玺书褒之蜀平王全斌等不恤军事蜀人苦其侵夺彬屡请旋师全斌等不从俄而全师雄等作乱拥衆十万彬复与光毅破之于新繁卒平蜀乱时诸将多有子女玉帛彬橐中唯图书衣衾而已太祖以全斌等贪纵不法属吏而谓彬清介廉谨拜宣徽南院使义成军节度使彬辞曰伐蜀将士俱得罪臣以无功独蒙褒宠恐无以劝天下太祖曰卿有茂功加以不伐设有微累全斌等岂惜言哉夫惩恶劝善朕所以励臣下也彬乃不敢辞太祖将亲征太原为前军都监率兵次团栢谷降贼将陈廷山太祖伐江南以彬将行营之师彬分兵由荆南顺流而东破峡口砦进克池州连克当涂芜湖二县驻军采石矶作浮梁跨大江以济师大破其军于白鹭洲师进次秦淮江南水陆十万陈於城下大败之俘斩数万计进围金陵李煜危甚遣其臣徐铉奉表诣阙乞缓师彬亦缓攻取冀煜归服使人谕之曰事势如此所惜者一城生聚若能归命策之上也城垂克彬忽称疾不视事诸将皆来问疾彬曰余之病非药石所愈惟须诸公诚心自誓以克城之日不妄杀一人则自愈矣诸将许诺共焚香为誓明日称愈遂克金陵城中皆按堵如故李煜与其臣百余人诣军门请罪彬慰安之待以客礼煜之君臣赖以获免自出师至凯旋士衆畏服无轻肆者其军政如此及入见以膀子进称奉敕江南干事回其谦恭不伐又如此初彬之总师也太祖谓曰俟克李煜当以卿为使相副帅潘美豫以为贺彬曰不然夫是行也仗天威遵庙谟乃能成事吾何功哉况使相极品乎美曰何谓也彬曰太原未平尔已而还朝献俘太祖曰本除卿使相然刘继恩未下姑少待之既闻此语美窃视彬微哂太祖觉之遽诘所以美不敢隐遂以前对太祖亦大笑乃赐彬钱五十万彬曰人生何必使相好官亦不过多积金钱耳未几拜枢密使忠武军节度使太宗即位加同平章事太宗议征太原召彬问曰周世宗及太祖皆亲征何以不能克彬曰世宗时史彦超败于石岭关人情惊扰故班师太祖顿兵甘草地会岁暑雨军士多疾因是中止太宗曰今吾欲北征卿以为如何彬曰以国家兵甲精锐剪太原之孤垒譬摧枯拉朽尔何为而不可太宗意遂决从平太原加兼侍中後为弭德超所诬罢为天平军节度使既而太宗悟其譖封鲁国公待之愈厚雍熙三年诏彬将幽州行营前军马步水陆之师与潘美等北伐败契丹于固安破涿州又与米信破契丹于新城战于岐沟关我师败绩责右骁卫上将军四年起彬为侍中武宁军节度使徙镇平卢真宗即位复同平章事召入为枢密使咸平二年被疾真宗亲视临问手为和药仍赐以白金万两问以後事对曰臣无事可言臣二子璨与玮材器有取臣若内举皆堪为将真宗问以优劣对曰璨不如玮薨年六十九真宗恻然震悼对辅臣语及彬必流涕赠中书令追封济阳郡王谥曰武惠与赵普配享太祖庙廷彬仁敬和厚在朝廷未尝忤旨亦未尝言人过失伐二国秋毫无所取位兼将相不以等威自异待遇士大夫必引车避之居官奉入给宗族无余积平蜀回大祖询官吏善否对曰军政之外非臣所闻也固问之唯荐随军转运使沈伦廉谨可任北征之失律也赵昌言在魏奏乞诛彬及昌言自延安还被劾不得入见彬在右府为请于太宗乃许朝谒彬之仁厚皆此类也子璨珣玮玘玘琮珣官至昭宣使玘左藏库副使玘尚书虞部员外郎珣东上合门使玘之女即慈圣光献皇后也芸累赠魏王彬韩王玘吴王谥曰安僖璨官至中书令谥曰武懿玮官至侍中谥曰武穆琮官至侍中谥曰忠恪

吕忠穆公讳颐浩字元直本沧州乐陵人五世祖因官遂家於齐州公登绍圣元年进士第初调北京成安尉再调密州司户以门下侍郎李清臣荐除大名府国子监教授避亲改邠州教授再任六年除周王宫宗子博士考满除通判延安府寻除两浙提举茶盐官改差提举河北东路常平等事就除河北转运判官召为太府少卿数月除转运副使寻陞都转运使奉法称职宣和四年春金人与契丹主天祚大战天祚败绩弃其国奔窜至本国东北末界依达靺以苟活契丹推择潭湘立之所谓九大王是也内侍童贯乘契丹之衰败祖宗信誓举诸路之兵欲图燕蓟朝廷命贯为宣抚使以蔡攸副之是年五月贯攸遣种师道和洗下砦于白沟以窥涿州潭湘遣首领四军大王者率兵来拒我师大败朝廷亦悔此举欲令班师会潭湘死贯攸意在贪功遂复聚兵以谋再举是年九月契丹将郭药师以兵五千据涿州以涿州来献易州之民亦以易州来献王师以十月初三日令刘延庆统兵仅十万自涿州取燕山府契丹之兵大集与王师相拒于良乡县杀伤相当延庆潜令郭药师引锐兵取间道入燕山府约别遣奇兵策应药师既入燕山府契丹以兵与药师巷战策应之兵不至药师败大将高世宣死之王师败走是时延庆置砦于卢沟河南契丹乘胜以轻兵来挑战又以奇兵断吾粮道延庆忧惶不知所出二十九日夜初更引中军南遁五军觉知遂尽弃輜重器械奔窜官军相蹂践於路契丹追袭至雄州境上杀伤我师莫知其数是时公在军前坠马失道望北斗南走徒步六十里赖幽人张兰僧引路间关至涿州仅能入城而契丹之兵已围合涿州矣被围凡十五日郭药师以兵来解围公与官员将校千余人乘雪夜走一百二十里至安肃军又两日至雄州贯攸尚欲再举兵而大兵已溃散不能兴师会金人于十二月初七日自居庸关引兵到燕山府契丹之衆闻风奔溃金人遂有燕山府及檀顺景蓟等州童贯蔡攸遣使往燕山府见金国主阿固达重许岁币求此四州之地使者凡五六辈来往商议金人知贯攸急要燕蓟以报天子须索益广倍于岁赐契丹之数银绢外下至药材姜橘藤竹陶器之类不可悉数议既定金国兵遂回贯攸引兵五万自云前去抚定燕蓟贯攸到燕山住十日而班师奏差詹度知燕山府继而王安中到燕山为本路宣抚使度乃罢是时郭药师所统兵二万号曰常胜军又契丹刺面军万余人号食粮军费用钱粮不可胜计朝廷命公为转运使公条奏燕山一路费用如此虽穷天下之力竭天下之财必无以善其後又条奏河北燕山路危急五事愿诏三省密院博议久长之策朝廷怒沮坏边事寻奉圣旨吕颐浩所奏意有包藏情不可贷可先次落徽猷阁待制仍降官如军粮阙误令宣抚使枷项仍依旧为转运使兼经制燕山府河北京东路财用後踰月宣抚使王安中奉御笔处分令公赴宣抚司出头听旨供伏军令状御笔云朕绍累圣之业继宁考之志复燕云之境土仰承帝休博采衆智蔽于朕心盖不专庙堂之论吕颐浩辈乃何人敢怀奸兴讹造讞每诋恢复大政自沈积中被罪益桀傲不逊无复顾藉分朋植党援引儉人对衆毁谤朝廷肆为轻侮唱不可守之说以疑衆心陈不可行之事以困朝论既欲动摇国是成其奸回又因沮抑疆事以求罢免为臣如此深骇所闻卿可勾颐浩赴宣抚司出示诏旨面加诘问及闻颐浩自云已办白金数千两为海外之行卿问颐浩不知编配之外朝廷别有典宪否此後应副边防一事一件少有阙误稽违或为国纖芥生事当以军法首坐颐浩永为臣子之戒卿具此取索颐浩伏军令状以闻仍令以此德意自谕其党不得下司公在燕山仅二年备历艰险常胜军索粮带甲持刃胁公每恐不能逃祸是时金人已深憾朝廷令王安中詹度纳结平州节度使张觉後金人以劲兵破平州觉挺身走至燕山匿姓名隐郭药师军中金国自尔渐生衅端变诈反复邀求不已徽宗皇帝感悟公前日之言遂复公官职进徽猷阁直学士宣和六年八月丁太夫人忧公扶护至济南府葬于山中未掩圻有旨起复催促

还任文移沓至不许辞免公再到燕山府又仅一年而金国大举兵悉衆南牧郭药师以兵五万交战于潞县败绩金人入燕山公与蔡靖以下文武官三百余员皆为金人所执差人监蔡靖与公同李与权沈琯等于後园以兵防守驱虏令随行既至东京城下凡一月金人既与本朝讲和欲班师朝廷遣宇文虚中到金人砦商议国书次渊圣皇帝有旨令宇文虚中访寻蔡靖吕颐浩李与权等得还朝廷不两旬差公再为河北都转运使公力辞不获又令随制置使种师中大军到滑州公缘?金百余日寒月饮冷致疾力乞宫祠朝廷下制置使司保明是实差提举西京嵩山崇福宫公既得闲方自开德府来南京寻访家属是年十一月挈家寄居扬州买小圃闲居无仕宦意建炎元年五月上即位於南京六月召公赴行在公以病辞免未起间先致书宰执云颐浩宣和五年八月内尝具奏燕山府一路开边濶远其势难守并条具利害寻被旨先次落职如有阙误令宣抚司枷项继又有处分令赴宣抚司诘责供伏军令状上件行遣并在朝廷去年二月到尚书省亦尝陈述金人八月必犯边十一月必大举不蒙省察以今日之事料之金人衅隙又甚于日前不待言而可知也若秋冬缘边不能扞御必又渡河分道并入朝廷何以枝梧为今日计莫若远斥堠明探报不入寇即已倘或复来宜速避地于江外以为後图此事诚不可忽去年秋冬间祇缘庙论不同或和或战胶扰不决又百官内少有知边事谋臣陈画利害致令朝廷受祸天下痛心今日之事不容更有蹉跌伏愿深思熟虑以保万全盖金人诡诈不测贪婪无厌与契丹相持二十年今岁讲和明年大战前後反覆卒吞契丹今日之势讲和亦不可恃欲战则力不逮若非迁避更无上策议者多以谓銮輿南渡必失中原大不然赤壁之战魏强吴弱然而魏武大衄者江淮之间沮洳之地又有长江之险非北人用重兵之利此吴所以胜也战胜则势张岂有失中原之理哉议者又曰敌人既能渡大河岂不能渡大江亦不然黄河水狭霜降之後水面不过一二里又无水战之具敌人渡河所以不能制大江则不然水面濶远狭处不下七八里若於南岸豫习水战俟其半渡由南岸以轻舟战舰顺流而下顷刻追及虽百万之师可挫也且以夏人号为善用兵与我师相持每迭胜迭负我师未尝如今日败衄者以泾原环庆等路皆山险之地非骑兵所利故也自金人犯边我师遇之不待接战而辄奔溃不暇成列者盖平原旷野步人不能抗骑兵故也愚意谓宜迁避者以三十年来贯槩掌兵柄军政尽坏赏罚不明人无鬪志必先革此弊然後可以语战兼自燕山之败金人连二年入寇後來数路官私马劫掠已尽步人之势终难抗骑兵霍去病传云自後更不议伐匈奴者以无马故也岂可不鉴哉望长虑却顾俯察愚夫之言况防秋在近机事甚迫梁宋间诸州环地十里城壁不固虽欲增修已不及矣伏愿发於诚心开悟天意先迁宗庙于江外大驾且驻南京若无探报只留南京万一有警速驾南来江淮地热又北马无秆草必不能久留俟其既往我复北去亦未为失计也兵法所谓彼入我出彼出我入兹诚今日备御之策若乃江淮荆湖两浙等路如何练兵如何养马如何选将佐如何修城壁如何备器械如何聚粮食此六者尤为今日急务惟速图之不可缓也又数日再有旨促公赴行在方就道差知扬州隆佑皇太后驾到维扬欲渡江往镇江而辛道宗所统兵叛劫镇江府焚之烈焰北照扬州城太母促召公至舟中帘前公率发运使梁扬祖同对太母问以镇江事及欲扬州暂留公以为便太母遂迁入府治是年十月二十三日圣驾幸扬州公前期缮治行宫分处三省密院百司及卫兵营舍扰不及民而事办十一月召对公奏劄云臣窃以金人裒百战之兵一年之内两犯京阙天佑陛下不堕贼中躬有神器臣窃观天下之势以拨乱为急务成败安危繫於施設臣不敢远引尧舜三代之事昔周世宗当中国残弊之後王朴献策曰唐失道而失吴蜀晋失道而失幽并观所以失之由知所以平之术在乎反唐晋之失而已必先进

贤退不肖以清其时用能去不能以审其材恩信号令以结其心赏功罚罪以尽其力恭俭节用以丰其财徭役以时以阜其民俟其仓廩实财用足人安将和则有必取之势无不成之功陛下睿算远图布昭圣武伏愿任贤使能信赏必罚理财节用积粟训兵裁抑恩幸无令挠朝廷之权搜选人材使之任将帅之责大开谏路而择其善总揽羣策而从所长则何为不成何战不胜哉此劄甚称旨公又旬余日再陛对进劄云淮南两路北距海南阻江土地膏腴形势雄胜陛下銮舆顺动以慰天人之心必得其宜矣臣尝谓强可以使之弱弱可以致之强昔汉高祖与项氏相持百战百败垓下之役一战遂成帝业越王兵败栖於会稽卑辞厚礼养兵蓄锐有待而发一战遂牧霸功然则陛下驻蹕淮甸岂非天意所以资陛下兴王业乎伏愿聚精会神苦心尝胆期於除祸乱致太平实万世无疆之休也上面谕公曰卿忠言甚切当朕心又曰除卿徽猷阁学士又数日除户部侍郎兼知扬州明年三月进户部尚书剧贼张遇有衆四五万自上江顺流而下破太平州真州至镇江府金山寺屯泊朝廷遣使招安遇虽听命然不御甲四向焚劫朝廷遣王渊刘光世杨惟忠韩世忠张俊康弼俱重等相持而诸将号令不一未有统率遂命公节制诸大将刘光世以下前去措置公携长子抗及辟差二三属官下砦于扬子桥公次日早单骑入贼砦中采访得张遇下第二名刘彦者为遇画谋令不卸甲及勿令放散被掳人民彦尤凶悍视杀人如刈草芥公呼张遇等近上首领十人询问不依元约卸甲及不放散被掳人民因依九人者皆指称刘彦为首公令壮士摔彦于庭下截其两足钉於扬子桥柱其余首领皇骇震恐即日卸甲纳于官公给公据放散被掳之民凡三四万人得被掳妇人五六千人以舟船载至扬州奏给钱米召人识认皆不失所是年十二月改吏部尚书公被旨令密具边防事宜乃陈备御十策一曰收民心二曰定庙算三曰料彼已四曰选将材五曰明斥堠六曰训强弩七曰分器甲八曰备水战九曰控浮桥十曰审形势累数言公久在西北极边谙知敌情料金人必犯淮南在版曹日屡乞先犖致左藏库官物过江及猷守淮之策甚备宰执不从明年二月初三日金人以轻骑逼扬州车驾仓卒南渡公与礼部侍郎张浚联马追及行在仅得渡江凡百司官物及侍从臣寮等士庶尽为金人杀掠公扈从至秀州除资政殿学士同签书枢密院事江淮两浙制置使引羸兵千余人守扬子江公沿路召募溃散之兵得四五千人就镇江府之北枕江下砦与金人对岸相持仅一月公日被甲乘轻舟时於江中往来督责军将官以舟济渡江北被掳逃归官员士庶军兵家小及选募敢死之士过江遇夜烧劫敌砦又分遣兵将官沿江上下招集溃兵金人北去朝廷命公兼领江宁军府事公即日泝流西行又两日抵江宁府此三月初九日也忽有赦书至上逊位于皇太子人情汹汹不安十一日公之子摭时任两浙漕属遣人齎蜡弹报公具道苗傅刘正彦反叛及擅废立仍推隆佑太后听政改年曰明受公曰今主上为贼臣所废迁于杭州睿圣宫此不戴天之讐也遂倡义曰我幸拥兵万余人必举兵讨贼公遂上表云臣契勘自崇宁以来内侍童贯谭稹互掌兵柄二十余年赏罚不明号令失信西则侵陵夏国北则与契丹败盟致将帅解体士卒不用命皆缘内臣基祸流毒天下遂令徒党为害近闻将相大臣被命剿戮内侍诚可以快天下之心纾臣民忿怒之气伏覩三月五日睿圣皇帝亲笔诏书以谓即位以来强敌侵陵远至淮甸其意专以朕躬为言朕恐其兴兵不已枉害生灵畏天顺人退避大位以此仰见睿圣皇帝出於至诚不吝至尊之位以纾敌国之祸也恭惟太后陛下仁圣恭俭之德三十余年孚于四方垂帘听政拥佑皇帝陛下四海之内孰不归依但臣有愚见不敢爱死而言方今强敌乘战胜之威羣盗有蜂起之势兴衰拨乱事属艰难岂容睿圣皇帝退避大位而享安佚伏望太后陛下皇帝陛下不憚再三祈请睿圣皇帝亟复帝位亲总万机从此以往屏絶内侍近习之

人褒赏立功将帅之士然後驾幸江宁以图恢复如此则宗庙社稷有无疆之休将相大臣有无穷之福不然恐天下祸乱不可胜言既而遣属官奉议郎李承造往镇江府约刘光世及遣官往平江府见张浚及以书抵韩世忠张俊等同起兵讨贼士大夫纷纷谓公曰今苗傅刘正彦挟太母幼主以令天下何擅起兵以取覆族之祸又公之子摭及家属在杭州苗傅闻公起兵令归朝官马柔吉监守之公曰主上在危难中我何敢顾家属至常州苗傅刘正彦差使臣齎状申公具道废立本末因令使臣白公云朝廷已留知枢密院阙以待公之来公斩其使臣督进兵行至望亭招张浚浚自平江府四十里来见公遂同榻定议讨贼之策次日至平江府公遂撰檄书曰恭惟宋有天下垂二百年太祖太宗开基创业真宗仁宗德泽在民列圣相传人心未厌昨因内侍童贯首开边祸遂致敌骑历岁侵陵逆臣苗傅躬犬彘不食之资取鲸鲵必戮之罪乃因艰难之际敢为废立之谋刘正彦以孺子狂生同恶共济自除节钺专擅杀生仰惟建炎皇帝忧勤恭俭志在爱民闻乱登门再三慰劳而傅等陈兵列刃凶焰弥天逼胁至尊仓皇逊位语言狂悖所不忍闻大臣和解而不从兵卫皆至于掩泣诏书所至远近痛心骇戾人情孰不愤怒顾惟率土何以戴天况傅等揭榜闾市自称曰余祖宗讳名曾不回避迹其本意实有包藏今者吕颐浩因金陵之师刘光世引部曲之衆张浚治兵於平江韩世忠张俊马彦溥各领精锐辛道宗永宗陈思恭总率舟师汤东野周杞扼据冲要赵哲调集民兵刘海李追馈饷刍粮杨可辅等参议军事并一行忠义将佐官属等同时进兵以讨元恶师次秀州四方响应用祈请建炎皇帝亟复大位以顺人心今檄诸路州军官吏军民等当念祖宗涵养之恩思君父幽废之辱各奋忠义共济多艰所有朝廷见行文字并是苗傅等伪命及专擅改元即不得施行敢有违戾天下共诛之三月二十八日公与张浚刘光世韩世忠张俊等率兵趋杭州仍率诸将列衔请上复位师至临平贼遣苗翊率步骑万余人迎击官军公督韩世忠血战大破之贼惶骇率衆离杭州望衢州路奔走上复位公以四月初五日朝见初七日除宣奉大夫尚书右仆射一行官吏将佐等第推恩时建炎三年四月也寻迁左仆射公在相位又与张浚密谋诛范琼一军帖然无事是时天下盗贼羣起金人离淮甸未久李成扼据宿泗靳赛薛庆裴润等据通泰承楚京城隔絶山东河北诸路命令不通四方寇盗不可胜计以前此朝廷赏罚失当将士解体公以谓若非大收将士之心国家兵威不能复振无由恢复中原公又奏乞置三省枢密院赏功司应自军兴以来诸路立功将校借补等人并许缴元立功干照自陈朝廷看详随宜推恩补转官资於是四方将士莫不归心朝廷又自苗刘伏诛之後士气稍振公措置招收诸路溃军盗贼殆无虚日又诸大将陈乞空名官告公奏臣三十年前曾在陕西鄜延环庆等路每见出师用兵成功则赏败事则罚罕曾给降空名官告勅劄自童贯开边後来统制官乘国家多事每遇出兵过有要求多乞空名告劄军前书填与亲旧技术无功之人致名器太轻无以激劝赴功力战之士今乞将所降空名勅告等更不给降若实有功绩之人即具名保奏乞从朝廷推恩庶革侥冒上嘉此奏而行之是年九月间时有探报金人举兵南来朝廷措置御敌之计遣兵守淮及要害分屯大兵于建康府等处控扼江上车驾未有顺动之意隆佑太后前期往江西面奉圣训六宫并随太母行公奏留六宫在此以安人心及分拨内尚书直笔之类在此以严命令蒙上嘉纳公初在相位力乞车驾临幸浙西奏劄云臣累日来以浙西溃散人兵头项尚多恐残害诸州及妨农务夙夕思虑寝食几废昨日与执政共奏乞差重臣提兵前去抚定者盖谓此也今有一事望陛下力行之庶几克济大业臣愿陛下到越州少歇数日留六宫百司在越州以近臣一员及兵官一员主越州留务陛下亲总六师前去镇江府抚定浙西号令江淮如此则诸头项溃兵盗贼自然斂衽得命矣盖车驾所至

威声气焰自可以警服人心故也昔汉高祖唐太宗取天下岂尝一日宁居黥布作乱是时谋臣猛将固不乏人然高祖不憚亲征太宗曰吾经营天下所至处买饭而食僦舍而宿是也陛下便鞍马精驰射盖天之所授将以拨乱安忍燕处清闲坐废白日乎臣侵寻老境常恐功业不成抱恨泯灭伏望圣慈询谋近臣察其可否然後奋发独断施行十月金人渡江杜充既败走金人破杭州欲渡浙江逼行在公忧愤不知所为遂乃献航海避敌之计圣意浩然开纳时廷臣所论皆不合惟圣意确然不移车驾自明州登海船精锐之兵万余人扈驾行至台州港泊数日乃趋温州是时金人已回至镇江韩世忠以舟师扼江路金人不得济公力请车驾回幸浙西宜下亲征之诏以为先声亟以锐兵策应世忠夹击之以擒敌人时车驾已驻跸于越州人心不乐浙西之行又中丞赵鼎上章谓车驾未可北去竟失机会公罢相遂除镇南军节度使开府仪同三司充醴泉观使任便居住公自四明买舟往台州未几被命充江东安抚制置大使兼知池州公力以疾辞上弗许差中使促行仍令过阙奏事公到行在上殿奏曰臣自去国以来不知金人探报之实似闻今已渡淮北去夫敌狡诈其情难测不可谓其去而弛备臣近自海道北来伏见朝廷聚集海船在明州岸下窃虑车驾欲为避寇之备夫避寇之计固不可不预办然备战之计尤不可缓也臣仰料车驾万一避寇不过如温州及闽中尔伏望圣慈鉴去年敌骑追袭之事选兵五万分为两项一项留屯浙西一项往屯饶信分据水乡或据山险邀其追袭之路而击之使将士戮力如明州城下之战则战无不胜矣万一金人今冬不渡江则臣去年所献於四五月间遣兵渡淮由京东以捣贼虚其事不可已也愿诏三省密院详议其说而今冬预为之计於明年四五月间遣兵二万由海道趋登州以摇青齐别遣兵二万由淮阳军徐州以图濮郛夫金人用兵深忌夏月我乘其忌而攻之此必胜之道也且中国衰弱其势已甚自淮以北皆非我有士大夫苟目前之安习太平时骄惰不振之气殊无北向以争天下恢复中原之心此臣所以感慨流涕而不能已也是年九月公到江东路欲趋池州所治而大寇李成遣贼将马进围江州守臣以蜡弹告急公曰江州乃池州上流江州破则池州岂可保公时驻饶州会节度使杨惟忠有兵七千人屯饶州惟忠乃公陕右同官素相好公请惟忠同起兵以解江州围聚兵得万五千人自饶州乘舟趋南康公遣大将巨师古往江州城下贼设伏前後夹击师古兵溃贼衆三万与杨惟忠鏖战惟忠与公以衆渡江避贼阵于江北洲溪具奏衆寡不敌乞济师上亲御翰墨诏公曰卿躬临行阵亲冒矢石功虽不成忠节显著已诏王 全军万人听卿节制同救江州公聚兵鄱阳得 一军以兵二万人再趋左蠡下砦会淮南崔增有兵八千人公以书招置麾下增舟师习水战令与 引兵与李成兵战于湖口大败之江州守臣以粮尽弃城去贼兵遂据江州公曰我为江东帅今不竭力以御贼则一路皆为贼境矣遂置砦于左蠡江岸明斥堠严纪律以遏贼冲砦地乃池饶诸郡界首三面皆贼屯前後数十战贼失利公兵益振朝廷遣大将张俊统兵三万由江西洪州路讨贼诏公谨守江东公分遣王 一军会张俊兵与贼大战贼兵败走成与马进仅以身免御笔召公赴行在拜尚书左仆射公初自左蠡班师回鄱阳而巨寇张琪李捧引兵五万人犯饶州邦人皇骇失措公帐下有兵不及万人而公爱将阎皋方在抚州招捉胡江一寇公走人檄召阎皋而皋已招胡江在路皋得檄连夜趋帐下公召诸将令听皋节制以姚端军为左崔邦弼军为右皋将中军公自画战图以令诸将皋等方出城五里而贼锋已至前军张守忠失利少却贼恃衆轻犯中军皋力战而崔邦弼姚端两军翼击之贼衆大败先是贼将别遣精锐为水军分道而进公自将水军崔邦弼迎击之贼皆败溺饶人安堵绘公像於郡中公再到朝廷言今天下之势先平内寇然後可以御外侮圣意开纳于时邵清等攻通泰范汝为据建州曹成马友之徒扰江

西公奏乞遣参知政事孟庾为宣抚使韩世忠为副使遂平范汝为等及随贼寇之大小分遣兵将官以金字牌招安不听命者加兵剿除诸路盗贼略平公奏金人今年既不渡江则诸事可以措手矣将以创中兴之业伏愿陛下发中兴之诚心行中兴之实事今当先定驻蹕之地据都会之要使号令易通於川陕将兵顺流而可下漕运不至於艰阻然後速发大兵一头项往江西湖南以平羣寇一头项往池州至建康府处置已就招安尚怀反侧之人於明年二三月间使民得务耕桑则大江以南在我之根本立矣然後乘今年大暑之际遣精锐之兵与刘光世渡淮犄角而北去由淮阳军沂州入密州以摇青郛命张俊躬亲统兵由河中府入绛州以撼河东乘两路余民心怀我宋未泯之时知王师有收复中原之意则中兴之业可觐也若不速为之逡巡过春夏则金人他日再来不惟大江以南我之根本不可立而日後之患不可胜言矣又奏人事可为者二天时可为者三乞为陛下陈之昨自车驾渡江以来初经扬州之变兵甲器械十失八九未容喘息而金人分遣重兵三路入寇二浙江东焚劫殆遍正兵或散而为盗或器甲不全虽欲战不能也陛下愤金人侵侮之甚连年宵旰专意军政汰冗兵修饬器械今张俊军有衆三万全装甲万余副刀枪弓箭皆足用韩世忠有衆四万如张俊军有衆二万三千人王 有衆一万三千人虽不如张俊军尽皆精锐亦非前日怯懦之比刘光世有衆四万虽老弱冗散者衆亦可得精锐二万人神武中军杨沂中统领以来有兵万人铠甲亦足用此外又有神武後军陈思恭不下万人御前忠锐如崔增张守忠赵琦徐文姚端等军亦二万人上考太祖皇帝取天下正兵不过十万人况今日有兵十六七万器械足用何惮而不为臣所谓人事可为者一也建炎三年四年绍兴元年大盗纵横邓庆寇广东李敦仁犯吉邵清扰通泰张琪劫徽饶李成破江端范汝为据建劔马友李横孔彦舟曹成张用刘超等散处大江之南为害於荆湖等路朝廷枝梧不暇力不能事外今则悉为王师扑灭民得安业矣臣所谓人事可为者二也尝观自金人南牧以来我师望尘奔溃莫敢婴其锋近年以来张俊获捷於明州韩世忠扼贼於镇江陈思恭邀击於长桥张荣大捷於淮甸良由金人贪残太甚逆天悖道人人有战心天意殆将悔祸臣所谓天时可为者一也金人命刘豫僭位以来尽以中原付之不欲南来而豫烦碎不知为国之体重敛以失百姓之心豫之所为虽三尺童子决知不能立国况兵不如我精将不如我能胜负固可料矣观宇文虚中密奏虽未能尽信然敌骑连年不至淮甸岂无牵制之故哉天意槩可见臣所谓天时可为者二也江浙等路连年失耕殖又苦水旱米价翔涌每贯一贯至二贯今年丰熟米不及五六百江上诸州米三四百天时可为者三也今韩世忠到行在臣愿圣心奋发睿断令世忠张俊与臣等商议决策北向明年三月半令韩世忠由宿州南京路以入令刘光世由徐曹诸州路以入又於明州留海船三百只令范温阎阜乘四月间南风北去径取登莱州凡此数路皆有粮可因不必调发吾民以资馈运而登莱尤有积蓄可因也大兵既集刘豫必北走所得州郡择逐州豪杰守之初则示以羁縻之义过则续为後图虽金人来年秋冬间必举兵争其地然彼入我出彼出我入此兵法也扰之数年中原必可复贾谊曰日中必昃操刀必割舍此机会而不乘後欲追悔何可及耶今有兵十六七万费用不赀朝廷竭力经营钱粮常若不办旷日持久必取於民民怨衆离乃自困之道祸乱之所起可不畏哉今日战兵其精锐者皆中原之人数年之後消磨必寢少异时虽欲举事势必不能可为深惜者也上嘉叹不已以公都督诸路诸军事总师北向公师次镇江病疟踰月蒙上宣医遣中使复召还公乞解机政以镇南军节度使开府仪同三司充醴泉观使寓居台州是年冬公得赵丞相鼎【字元镇】及二三大将书说及敌骑犯边尚留淮甸因以边防机事奏曰豫贼不知用兵之策而金人狃於常胜不知虑敌深入吾境此天亡之时

也愿陛下於此沍寒之时金人弓健马壮之际且敕诸大将固守江岸俟其粮尽欲退并力追袭此万全之策也金人大将如罗索栋摩国王斡里雅布皆已物故今次南来者达兰郎君四太子臣在燕山府皆闻之达兰有谋而怯战四太子乏谋而麤勇然四太子所统部曲比之达兰极衆且精锐四太子所向尤宜堤防也降诏奨諭之曰朕惟古所谓大臣者以国为家以身任天下非有内外远近之间也周王之命诸侯曰虽尔身在外乃心罔不在王室而况出入将相为时元老躬暨一德弼亮朕躬有如卿者哉强寇陆梁睥睨江淮安危之分间不容髮卿不远千里惓惓纳忠料敌商变深得其情运筹建策皆契机会朕既资其老谋而益嘉其得古大臣之义三复来奏深用叹咨又数日再奉诏云比以逆臣啸乱反易天常陰导敌人提兵南向朕亲乘戎辂号令六师将士協心人百其勇按甲江上时出轻兵所向奏功俘馘载道敌势既屈潜师遁逃念兹却敌之初图为善後之计卿以旧弼乃心王家必能为朕深思熟讲凡今攻战之利守备之宜措置之方绥怀之略可悉条具来上朕将虚已以听择善而从君臣之间期於无隱利害之决断以必行钦仁嘉猷冀闻确论公条十事上之一论用兵之策二论彼此形势三论举兵之时四论分道进兵之策五论运粮供军六论大兵进发日乞圣驾驻蹕镇江府七论经理淮甸八论机会不可失九论舟楫之利十论并谋独断又贴黄臣恐今日士论或以谓金人才退我国家事力未全财用未充未能大举臣曰不然若吝惜用兵之费则秋冬间敌骑必再来所费愈不貲矣况此举乃因粮之策无大费哉今将兵闲坐糜费钱粮与举兵北去所费均也但少有飞挽之劳尔是年十二月除公荆湖南路安抚制置大使兼知潭州湖南以荒岁之後郴州桂阳监衡州茶陵诸处羣寇王权萧和谭大萧尚十等窃发公分遣统领官步谅裴铎招捕悉平一路按堵明年十一月除少保充两浙西路安抚制置大使兼知临安府兼行宫留守是时车驾在建康朝省百司庶务悉当区处临安浩穰之地公决事明敏而又威令严重豪右震懼日才过午讼庭已寂然无事凡民间冤抑有十数年不能雪如医僧有谋杀妇人者之类公灼见其冤状置之於法輦轂之下政若神明宫禁内外咸赖以安绍兴八年车驾还临安府除公少傅镇南定江军节度使充江南东路安抚制置大使兼知建康府行宫留守公五上章力辞依前少保镇南军节度使充醴泉观使成国公免奉朝请九年二月五日召赴行在所七日赐亲札云朕以河南新复境土陕西最为重地惟卿旧弼元臣威望素着欲勤卿往调护诸将拊循遗民当体朕意趣装亟来以济事机毋为辞避常礼也公奏曰金人残破中原肆为荼毒交兵累年未见宁息今者无故割新黄河河南之地与我岂无意哉欲望圣慈与执政大臣子细商量及契勘陕西一路自割属我朝以来诸路帅臣守臣曾与未曾申发到文字及三省密院知与不知陕西逐路州军即今帅守之臣职位姓名如可以照见即遍以诏书差人镌諭具宣德意倘无凭照见即须分遣臣僚迤邐前去访问职位姓名传宣抚问其鄜延环庆泾原秦凤熙河路帅臣仍许以久任之意庶几逐路州军不致疑贰稍俟定叠徐为後图所贵抚绥新附之邦不致失策施設次第粗为有序兹今日之上策也十四日再奉御笔趣就道公奏契勘陕西利害今日所繫国体甚重若一触事机必貽後悔如张中孚等未见向背赵彬又系曲端门客本一书生其人尤桀点伏望睿明曲留圣虑十八日差中使宣押公力疾造朝传宣抚问宣医丞相秦桧被旨同参政孙近李光到寓所问疾得请扶病东归除少傅依前成国公致仕四月一日薨於正寝享年六十有九赠太师追封秦国公諡忠穆子五人抗撫拯摠撫孙八人曾孙十人

直臣传

张昭字子布本彭城人汉末避难南渡居秦淮尝为孙策长史後辅孙权为军师权每田猎常乘马射虎虎尝突前攀持马鞍昭变色而前曰将军何有当尔夫为人君者谓能驾驭英雄驱使羣贤岂谓驰逐於原野校勇於猛兽者乎如有一旦之患奈天下笑何权谢昭曰年少虑事不远以此慙君权於钓台饮酒大醉使人以水洒羣臣曰今日酣饮惟醉堕台中乃当止耳昭正色不言出外车中坐权遣人呼昭还谓曰为共作乐耳公何为怒乎昭对曰昔纣为糟丘酒池长夜之饮当时亦以为乐不以为恶也权默然有慙色遂罢酒初权当置丞相衆议归昭权曰方今多事职统者责重非所以优之也後丞相孙劭卒百僚复举昭权曰孤岂为子布有爱乎领丞相事烦而此公性刚所言不从怨咎将兴非所以益之也乃用顾雍昭每朝见辞气壮厉义形於色曾以直言逆旨中不进见後蜀使来称蜀德美而羣臣莫拒权叹曰使张公在坐彼不折自废安复自夸乎明日遣中使劳问因请见昭昭避席谢权跪止之昭坐定仰曰昔太后桓王不以老臣属陛下而以陛下属老臣是以思尽臣节以报厚恩使泯没之後有可称述而意虑浅短违逆盛旨自分幽沦长弃沟壑不图复蒙引见得奉帷幄然臣愚心所以事国志在忠益毕命而已若乃变心易虑以偷荣取容此臣所不能也权辞谢焉权以公孙渊称藩遣张弥许晏至辽东拜渊为燕王昭谏曰渊背魏惧讨远来求援非本志也若渊改图欲自明於魏两使不反不亦取笑於天下乎权与相反覆昭意弥切权不能堪案刀而怒曰吴国士人入宫则拜孤出宫则拜君孤之敬君亦为至矣而数於衆中折孤孤尝恐失计昭熟视权曰臣虽知言不用每竭愚忠者诚以太后临崩呼老臣於牀下遗诏顾命之言故在耳因涕泣横流权掷刀致地与昭对泣然卒遣弥晏往昭忿言之不用称疾不朝权恨之土塞其门昭又於内以土封之渊果杀弥晏权数慰谢昭昭固不起权因出过其门呼昭昭辞疾笃权烧其门欲以恐之昭更闭户权使人灭火住门良久昭诸子共扶昭起权载以还宫深自克责昭不得已然後朝会昭容貌矜严有威风权常曰孤与张公言不敢妄也举邦惮之年八十一嘉禾五年卒遗令幅巾素棺歛以时服权素服临吊谥曰文

郑侠字介夫其先光州固始人四世祖偁唐末随王氏入闽遂为福清人侠既冠遭妣黄氏忧念家贫亲老弟妹衆多慨然自誓当苦学以成名治平二年公随父晕赴江宁府监税得清凉寺一小室闭户读书时王安石以中书舍人持服寓江宁公携所业往见蒙安石称许治平四年擢进士甲科年二十四调光州司法以归安石服除起知江宁府相见愈厚及公赴浮光安石入参大政兴利除害言无不行公平日雅重安石以为尧舜三代君臣相遇有为於世太平可期月而望已而青苗免役方田保甲市易等事相次施行民间不以为便会光有疑狱数事公以谏议传奏为安石言之报下皆如公请公感知已欲尽忠以告秩满不复移令遂为入都之行时熙宁五年春也公行所过田父野老必从访问新法利害答者无一人言其是至京齐戒具书见安石甚獎之再见乃及试法之事时初行试法之令选人中者补京官公辞以未尝习法三见而问近何所闻公略言青苗免役数事与边鄙用兵在侠心不能无区区安石不答左右遽请公退自是不复见但时於门下具实封反复极言新法之为民害皆不报一日乡人张昞来访忽责介夫何好矫之过公问所以昞曰丞相令介夫试法不就何也公曰朝廷新立此科以待练习文法之士必使无丝发滥得然後可以勉饬後人侠素非习法但因浮光有四五件疑狱所司议法殊不与人情相近职在法官不得不详审乃於本条中自令式格律散行推考乃得其当故以丞奏辄蒙传相是而行下其余条贯实未尝见丞相以此见谓明习故使试法是以不能为能误丞相之知以苟进取此则欺天诬人侠虽饿乞所不敢为也久之得监

在京安上门辞安石安石曰却受监门去意殊不悦公在门局会丞相以春社还由本门法当迎揖道左安石一见惻然面加慰劳明日王雱来语以其父度支欲与诸公荐公试法切须愿就盖丞相意也公对如答张深道之言事遂寝未久置修经局安石使其侄婿黎东美访公云丞相欲令元泽辟公检讨公言检讨以备阙遗侠读书无几将何以备检讨之责此与试法何异因以书诗愧谢丞相已而黎生再来具言丞相致意凡人仕宦且要改得一京官然後可别图差遣何得介僻如此公曰侠自浮光入京本求一席之地执经丞相门下耳初不知官有美恶高下不意丞相一旦当路发言无非以官爵为先所以待士之来者如此而已果欲援侠而成就之区区所献有便民便物之事行其一二使侠进而无愧不亦善乎黎生去後数日复来问何事欲言时免行市利等税钱京师细民及商旅尤以为苦如负水拾髮担粥提茶之类皆有免行不输钱者毋得贩鬻市道门司商税院并行仓法专拦月赋食钱每正税百文外收事例钱十文以给之谓之市利钱逮法之行正税不及十文者亦收市利十文具末反重於本百姓至与专拦死争监官委曲谕以新法乃怫然投钱而去公覩其害言於丞相数矣至是又具书并陈青苗免役等弊事因黎生献之未几令下小夫稗贩者免充行旧税重者十减六七其大者将谓以次施行已而竟无所闻时安石有诗曰何处难忘酒君臣会遇时高堂拱尧舜密席坐皐夔和气袭万物欢声连四夷此时无一盏孤负鹿鸣诗公闻而和之曰何处难緘口熙宁政失中四方三面战十室九家空见佞眸如水闻忠耳似聋君门深万叠焉得此言通时亢旱日久自去年七月不雨至于三月民间焦熬殊无生意公度安石终不可谏乃以本门所见冬春以来三路流离之民每风砂霾噎大者车乘小者负担扶老携幼蔽塞道路羸瘠愁苦身无全衣城外饥民朝晚入城买麻粃麦麸之类合米为糜或茹木食草根以活及其妻鬻子狼狽困苦之状至於身被锁械而负瓦揭木卖以偿官者累累然於道公不忍坐视乃呼画工列为一图裁书诣合门投进不纳遂於本门勾马递於银台通进司奏为密急事仍自劾擅发马递之罪其书曰臣伏覩去年大蝗秋冬亢旱迄今不雨麦苗焦枯黍粟麻豆粒不及种旬日以来米价暴贵群情忧惶十九惧死方春斩伐竭泽而渔大营官钱小求升米草木鱼鼈亦莫生遂蛮夷轻肆敢侮君国皆由中外之臣辅相陛下不以道以至於此臣窃惟灾患有可召之道无可试之形其致之有渐而其来也如疾风暴雨不可复御流血藉尸方知丧败此愚夫庸人之见古今有之所贵於圣神者为其能图患於未然而转祸为福也方今之势犹有可救愿陛下开仓廩赈贫乏诸有司斂掠不道之政一切罢去庶几早召和气上应天心调陰阳降雨露以延万姓垂死之命而固宗社亿万年无疆之祉夫君臣际遇贵乎知心以臣之愚深知陛下爱养黎庶甚於赤子故自即位以来一有便民便物之政靡不毅然主张而行陛下之心亦欲人人寿富而跻之尧舜三代之盛耳夫岂区区充满府库盈溢仓廩终以富衍强大夸天下哉而中外之臣略不推明陛下此心而乃肆其叨憒剗割生民侵肌及骨使之困苦而不聊生坐视其死而不恤夫陛下所存如彼羣臣所为如此不知君臣际遇欲作何事徒只日超官资意指气使而已乎臣又惟何世而无忠义何代而无贤德亦在乎人君所以驾馭之如何耳古之人在山林畎亩不忘其君刍蕘负贩匹夫匹妇咸欲自尽以赞其上今陛下之朝台谏默默具位而不敢言事至有规避百为不肯居是职者而左右辅弼之臣又皆贪猥近利使夫抱道怀识之士皆不欲与之言不知时然耶陛下有以使之然耶以为时然则尧舜在上便有夔契汤文在上便有伊吕以至汉唐之明君我祖宗之圣朝皆有忠义贤德之臣布在中外君臣之际若腹心手足然君唱于上臣和于下主发于内臣应于外而休嘉之德下浸於昆虫草木千百世之下莫不慕之独陛下以仁圣当御抚养为心而羣臣所以和之者如此夫非时然抑陛下

所以驾馭之道未审尔陛下以爵禄名器驾馭天下忠贤而使之如此甚非宗庙社稷之福也夫得一饭於道傍则皇皇图报而终身餍饱於其父则不知德此庸人之常情也今之食禄往往如此若臣所闻则不然君臣之义父子之道也故食其禄则忧其事凡以移事父之孝而从事於此也若乃思虑不出其位尸祝不代庖人各以其职不相侵越至于邦国若否知无不言岂有君忧国危羣臣乃饱食厌观若视路人之事而不救曰吾各有守天下之事非我忧哉故知朝廷设官位有高下臣子事君忠无两心与其得罪于有司孰与不忠于君父与其苟容于当世孰与得罪於皇天臣所以不避万死深冒天阍以告诉于陛下者凡以上畏天命中忧君国而下念生民耳若臣之身使其粉碎如一蝼蚁无足顾爱臣窃闻南征西伐者皆以其胜捷之势山川之形为图而来献料无一人以天下之民质妻卖儿流离逃散斩桑伐枣拆坏庐舍而卖于城市输官余粟皇皇不给之状为图而献前者臣不敢以所闻谨以安上门逐日所见绘成一图百不及一但经圣明眼目已可嗟咨涕泣而况数千里之外有甚於此者哉如陛下观图行臣之言十日不雨即乞斩臣宣德门外以正欺君漫天之罪如稍有所济亦乞正臣越分言事之刑时七年三月二十六日也疏入神宗皇帝览毕反覆观图长嘘者数四即袖以入是夕上寝不寐翌早命翰林承旨韩维知开封府孙永体量免行钱先放元不系行人捉纳到钱万三千余贯又实计免行钱除每岁所须外并放又命三司使曾布体量市易司农寺发常平仓放商税务及诸门税钱三十文以下市利钱二十文以下令殿前马步军司及熙河路开具未用兵以前所管若干兵即日所管若干兵令三司具治平以前熙宁以後岁之出入各着于令河东河北陕西诸路具民物所以流离之因又有旨青苗免役并权罢追索方田保甲并罢如此之类十有八事民间謠呼相贺四月一日下诏责躬许内外臣僚实封言事越三日大雨远近沾足自公上疏至是才及浹辰初七日早朝羣臣既贺雨神宗出公所进图状宣示宰执且责之曰卿等每言法度修明礼乐兴行民物康阜虽唐虞三代无以过今来外事如此丞相以下各谢罪上问丞相郑侠何如人王安石对曰尝从臣学是日有旨放公擅发马递之罪安石即还府第不入中书迁定力寺求出於是中外方知三月二十七日以後所行皆因公入文字一时用事者莫不切齿争言於上或以为心狂或以为非毁良法或以为擅发马递惊御乞追逮所司勘罪御史台直请以公付台推劾遂有旨下开封取勘是时臣庶欲应诏言事者甚衆闻此皆沮缩唯司马温公辈一二文字得达上前憊佞之党日於匭函假名投书乞留王丞相坚守新法仍乞治公狂妄之罪已而熙河小捷群奸乘此力进其说吕惠卿邓綰之徒言于上曰陛下?罗英俊数年以来忘寝废食仅成此数事天下方被其赐一旦用狂夫之言罢废殆尽岂不轻信至相与环泣上前於是新法牢不可攻矣安石既已悬辞去位遂出知金陵而荐吕惠卿代已即除参知政事惠卿拜职之日京师大风霾黄土翳席逾寸公又上疏言天实之乱国忠已诛贵妃未戮人谓贼本尚在今安石虽去而惠卿复用事虽不同势岂少异盖安石本为惠卿所误以至于此既已觉知仍复遂非以相拔援其实表里自相胶固夫岂念宗庙社稷之重且惠卿能终无背安石耶奏入不报又为市易事与吕嘉问力辩乞不用嘉问举状是时西师屡动公上疏力言边兵不已为大不祥其言反覆累十余纸皆细书密行且言大兵之入诸部虏人相率扞御谓之贼兵夫中国谓虏为贼者正谓其掠我赤子夺我畜产也今我师亦然彼何得不以为贼乎且中国与四夷犹井上井底之异也井底之人欲出而已井上之人岂有欲入者哉知此则居井上者常当安存井底之人然後井上可得而安也又从而苦之何哉夫中国者子女玉帛之所聚文章礼乐之所出食稻粱衣文锦决无入蛮夷之心也彼风沙晦冥齷草饮水寒则皴裂暑则喝死日夜思中国之乐而不可得彼驱而来者犹拔井底之

人而出之平地此驱而去者犹挤井上之人而赴井底是以屡战屡败也上览罢属熙河奏捷杀戮甚衆上为恻然诸奸患公入文字不已遂取开封所勘擅发马递事行下刑部定罪罚铜十斤取旨勒停本候郊霈调官出京日见羣臣诬罔天听怀不能已复取唐书魏徵姚崇宋璟及李林甫杨国忠卢杞传为两轴题其一曰正直君子社稷之臣事业图其一曰邪曲小人容悦之臣事业图迹在位臣僚欺君误国之事暗合林甫辈而反於姚宋者各以类标题复为书上之事皆画一执政大怒言於上以为谤讪朝政追毁出身以来文字送汀州编管寻追回推勘狱成改送英州编管公虽谴逐言笑自若冒盛寒徒步至贬所未尝有悴容真阳俗鄙率未知向学公至为陈君臣父子大谊翕然化之留英十年学者日衆枢密直学士陈襄行经筵日论荐当世之士自司马公而下三十三人最後言郑侠小臣愚直敢言如此是亦发于忠义非陛下矜怜其志而使得生还谁复为侠言者神宗未暇收用会哲宗皇帝登极恩霈放还时内翰苏轼还朝与孙觉虞大宁等上疏荐公及王安国之子旂曰臣闻国之兴衰繫於习俗若风节不竞即朝廷卑故古之贤君必厉士气务求难合自重之士以养成礼义廉耻之风臣等伏见英州编管郑侠以小官触犯权要冒死不顾以成直言今来朝廷赦侠之罪复其旧官经今逾年而侠终不赴吏部参选考其终始出处之大节合於君子杀身以成仁难进易退之说若朝廷不少加优异则臣恐侠浩然江湖往而不返若一旦命先朝露则有识必为朝廷兴失士之叹已而就除泉州州学教授秩满诸生愿留州奏得再任元佑八年丁通直忧服除授泉州录事参军元符元年准敕再送英州编管徽宗皇帝即位大赦东归知广州朱师复上表荐公有旨复官又除泉州教授未几改差监潭州南岳庙未被勅复追毁前命勒停时崇宁元年也五年八月复将仕郎许叙用公不复出矣取所居山名自号大庆居士还乡所存惟一拂而已故自号一拂居士性清俭布衣粝食终其身或以为言公曰无功于国无德于民若华衣美食与盗无异州倅许景衡过公庐见其饮具皆白鐵既去遗以银器请易之辞曰不鬻则质之非贫家所常蓄也然喜宾客诲诱学者孜孜不倦客至无贵贱辄留与饮率不过蔬果一肉适饱而已且欲为陈古今忠孝之道圣贤立身之本家虽不裕于财嗇用而广施未尝有靳吝之色虽流落顿挫之余一话一言未尝不在君父觀政役?兴民物嗷嗷但顰顙而已尝作观碁诗有傍观饶好着当局奈嗔言坐观成败者安得不惊魂之句忧国之思深矣宣和改元八月二日考终享年七十九邑中长老诸儒相与立郑公坊以表其闾图其像祀于学建炎褒录熙宁元佑忠谏之士赠朝奉郎授其孙嘉正廸功郎越州山陰县尉不数年以朝散郎知建昌军曾孙謦举进士嘉定六年赐谥曰介今清凉寺有祠即公读书处也

卷四十九

<史部,地理类,都会郡县之属,景定建康志>

钦定四库全书

景定建康志卷四十九 宋 周应合 撰治行传

东汉史崇字伯勤家世杜陵建武中累迁右将军青冀二州刺史加骠骑将军封溧阳县侯天下既宁诏遣公侯皆就封崇褰帷泣政求民之瘼治尚寛简不威而化畋渔相逊桑梓成陰年七十九赠司空使持节徐兖二州刺史諡曰壮侯子孙因家溧阳遂为县人奕世济美里俗呼崇为史祖庙貌至今存焉子顗字叔升袭爵年七十諡曰文顗子茅字德英元初三年袭爵除尚书迁侍中转镇西将军雍州牧宰治得宜寛猛相济声誉播于歌謡年六十七諡曰顷茅子洽字君普袭爵除河内太守转司隶校尉雍州刺史羽仪当世骨鯁一时年八十一諡曰戴洽子泽字素广袭爵除左郎将转上郡太守迁御史大夫正色立朝贵戚敛手年七十一諡曰节泽子铉字安鼎建元四年袭爵改封兰山侯迁冀州刺史崇本抑末章程具举年八十五諡曰康铉子藻字睿文精究庶事明察枉直下无谤言 史嵩字仁基崇之裔孙仕吴为平越中郎将苍梧鬱林二郡太守封抚陵侯崇裔孙又有曰懿者吴征南将军陇西太守曰爽者晋冠军将军北中郎将五兵尚书从吴归晋本国大中正零陵郡公曰韶者交州属国都尉阳羡侯曰楚者晋建安太守安吉伯曰晃者晋轻车将军南蛮校尉长沙太守曰璜者晋苍梧太守曰隐者晋尚书侍御史曰渊者晋尚书左民郎江阳太守秭县侯曰谅者晋琅邪王府主簿平苏峻桓温有功封常安侯曰琬者晋散骑常侍轻车将军都亭侯曰陵者晋左中郎将御史中丞豫章太守曰援者晋轻车将军西中郎将 史光字伯朝崇裔孙仕晋中书侍郎迁侍中皆称其职光子雅字叔安晋散骑常侍中书令陈留太守雅子辉字李明晋积石将军辉子畴字伯伦晋豫章太守畴子宪字景法晋主待以殊荣再不应命制书责诮起为尚书左民郎转建安太守兴利除害举善黜恶朝廷嘉之封山陰县侯在郡卒年七十二赠江州刺史 史实亦崇之裔以溧阳人知溧阳县事盖伪吴大复二年也被牒云溧阳洛桥镇遏使知茶盐榷麴务银青光禄大夫检校刑部尚书兼御史大夫上柱国史实誉驰乡里才達变通御边徼以多能缉兵戎而有术加以洞详稼穡善抚蒸黎赋輿深见其否臧案簿穷知其利病以久无宰字尤藉招攜俾分兼领之荣庶养新归之俗悦闻报政别议酬劳差兼知溧阳县事

潘乾字元贞陈国长平人楚太傅潘崇之末绪也察廉除溧阳长布政优优令仪令色矜孤颐老重义轻利推泮宫之教反决拾之礼兴修学官宗懿招德既安且宁大侯用张发彼有的雅容载闲钟磬县具于胥乐焉详见校官碑其铭有云翼翼圣慈惠我黎蒸貽我潘君平兹溧阳彬文赳武扶弱抑强余辞譌泐不可读

晋刘超字世瑜琅邪临沂人少有志元帝渡江为中书舍人处身清苦衣不重帛家无儋石之

储所赐皆固辞帝不夺其志寻出补句容县令推诚待物为百姓所怀入为中书通事郎

孙谦字长远为句容令清谨强记号为神明

唐杨於陵十八擢进士调句容县主簿器量方峻进止有常度节操坚明终不失其正时人尊师之德宗立迁户部尚书以左仆射致仕

白季康太原人为溧水令温恭诚信为官贞白严重见知于郡守流誉於朋僚既歿邑人祀之至今不废从侄居易尝志其墓宰相敏中季康之子也

岑仲休为溧水令兄仲羲为金坛令弟仲翔为长洲令皆有治绩宰相语本道巡察御史无遗江东三岑马之纯字师文金华人也弱冠登隆兴进士第与南轩东莱讲贯精诣天文地理制度之学靡不洞究为三山法曹与上官争是非民之全活者衆有欲荐公中都官辄谢之其介峭恬退类此乔文惠公行简葛端献公洪皆横经执弟子礼庆元间以承议郎主管江东转运司文字廉平公正克相其长持画婉婉迈惠维多建康留守节度使吴公琚有几日不来春便晚开尽桃花之句盖与公倡酬也公篇章吟咏初不苦思而意已独至尝作金陵百咏用唐律体枢密潜斋王公桢称其事核辞质义正趣远兴亡理乱之迹盛衰因革之故了然在目覽之者足以慨六代之遗风垂万世之法戒同於诗史满秩授通判静江军府事不赴卒於家所著书解中庸大学说周礼随释讲义春秋编年图豫章沅芷杂着传於时世号野亭先生後六十年公之孙光祖一再开阩建康临民莅事壹以公为法民益德之思其祖而建祠事焉以孙资政恩赠太傅诰词曰禋于宗类于帝骏惠方行非其身在其孙庆源甚远爰放綏典加贲泉扃具官光祖故祖故官之纯尚友古人潜心大业聯名鴈塔韩欧为同榜之俊游讲道牛谿房魏多及门之高第富有茂陵之藏藁仅终康海之题輿惟嗇于前遂昌厥後藏祀既陈於驛享分膺首逮於麟符肆繇孤卿晋陟帝傳祭则受福诞霈燔柴之恩没而有知对越面槐之宠李朝正互见耆旧传

耆旧传

纪瞻字思远丹阳秣陵人也祖亮吴尚书令父陟光禄大夫瞻少以方直知名吴平徙家历阳郡察孝廉不行後举秀才尚书郎永康初州又举寒素大司马辟东合祭酒其年除鄱陵公国相不之官明年左降松滋侯相太安中弃官归家与顾荣等共诛陈敏召拜尚书郎与荣同赴洛在涂共论易太极瞻曰昔庖牺画八卦陰阳之理尽矣文王仲尼系其遗业三圣相承共同一致称易准天无复其余也夫天清地平两仪交泰四时推移日月辉其间自然之数虽经诸圣孰知其始吾子云矇昧未分岂其然乎圣人人也安得混沌之初能藏其身於未分之内老氏先天之言此盖虚诞之说非易者之意也亦谓吾子神通体解所不应疑意者直谓太极极尽之称言其理极无复外形外形既极而生两仪王氏指向可谓近之古人举至极以为验谓二仪生於此非复谓有父母若必有父母非天地其孰在荣遂止至徐州闻乱日甚将不行会刺史裴盾得东海王越书若荣等顾望以军礼发遣乃与荣及陆玩等各解船弃车牛一日一夜行三百里得还扬州元帝为安东将军引为军諮祭酒转镇东长史帝亲幸瞻宅与之同乘

而归以讨周馥华轶功封都乡侯石勒入寇加扬威将军都督京口以南至芜湖诸军事以距勒勒退除会稽内史时有诈作大将军府符收诸暨令令已受拘瞻觉其诈便破槛出之讯问使者果伏诈妄寻迁丞相军諮祭酒讨论陈敏功封临湘县侯西台除侍中不就及长安不守与王导俱入劝进帝不许瞻曰陛下性与天道犹复役机神於史籍观古人之成败今世事举目可知不为难见二帝失御宗庙虚废神器去晋于今二载梓宫未殡人神失御陛下膺籙受图特天所授使六合革面遐荒来庭宗庙既建神主复安亿兆向风殊俗毕至若列宿之宿北极百川之归巨海而犹欲守匹夫之谦非所以阐七庙隆中兴也但国贼宜诛当以此屈已谢天下耳而欲逆天时违人事失地利三者一去虽复倾匡於将来岂得救祖宗之危急哉适时之宜万端其可纲维大业者惟理与当晋祚屯否理尽於今促之则得可以隆中兴之祚纵之则失所以资奸寇之权此所谓理也陛下身当厄运纂承帝绪顾望宗室谁复与让当承大位此所谓当也四祖廓开宇宙大业如此今五都燔爇宗庙无主刘石窃弄神器于西北陛下方欲高让于东南此所谓揖让而救火也臣等区区尚所不许况大人与天地合德日月并明而可以失机後时哉帝犹不许使殿中将军韩绩彻去御坐瞻叱绩曰帝坐上应星宿敢有动者斩帝为之改容及帝践位拜侍中转尚书上疏谏诤多所匡益帝甚嘉其忠烈会久疾不堪朝请除尚书右仆射屡辞不听遂称病笃还第不许时郗鉴据邹山屡为石勒等所侵逼瞻以鉴有将相之材恐朝廷弃而不恤上疏请徵之明帝尝独引瞻於广室慨然忧天下曰社稷之臣欲无复十人如何因屈指曰君便其一瞻辞让帝曰方欲与君善语复云何崇谦让邪瞻才兼文武朝廷称其忠亮雅正俄转领军将军当时服其严毅虽常疾病六军敬惮之瞻以久病请去官不听复加散骑常侍及王敦之逆帝使谓瞻曰卿虽病但为朕卧护六军所益多矣乃赐布千匹瞻不以归家分赏将士贼平复自表还家帝不许固辞不起诏曰瞻忠亮雅正识局经济屡以年耆病久逡巡告朕深明此操重违高志今听所执其以为骠骑将军常侍如故服物制度一按旧典遣使就拜止家为府寻卒时年七十二册赠本官开府仪同三司谥曰穆遣御史持节监护丧事讨论王含功追封华容子降先爵二等封次子一人亭侯瞻性静默少交游好读书或手自抄写凡所著述诗赋牋表数十篇兼解音乐殆尽其妙厚自奉养立宅於乌衣巷馆宇崇丽园池竹木有足赏玩焉慎行爱士老而弥笃尚书闵鸿太常薛兼广川太守河南褚沈给事中宣城章辽历阳太守沛国武赧并与瞻素疎咸藉其高义临终托後於瞻瞻悉营护其家为起居宅同於骨肉焉少与陆机兄弟亲善及机被诛瞻恤其家周至及嫁机女资送同於所生长子景早卒景子友嗣官至廷尉景弟鉴太子庶子大将军从事中郎先瞻卒

王谅字幼成丹阳人也少有干略为王敦所擢参其府事稍迁武昌太守初新昌太守梁硕专威交址迎立陶咸为刺史咸卒王敦以王机为刺史硕发兵距机自领交址太守乃迎前刺史修则子湛行州事永兴三年敦以谅为交州刺史谅将之任敦谓曰修湛梁硕皆国贼也卿至便收斩之谅既到境湛退还九真广州刺史陶侃遣人诱湛来诣谅所谅勅从人不得入合既前执之硕时在坐曰湛故州将之子有罪可遣不足杀也谅曰是君义故无豫我事即斩之硕怒而出谅陰谋诛硕使客刺之弗克遂率衆围谅於龙编陶侃遣军救之未至而谅败硕逼谅夺其节谅固执不与遂断谅右臂谅正色曰死且不畏臂断何有十余日愤恚而卒硕据交州凶暴酷虐一境患之竟为侃军所灭传首京都

陶璜字世英丹阳秣陵人也父基吴交州刺史璜仕吴历显位孙皓时交址太守孙贲贪暴为

百姓所患会察战邓荀至擅调孔雀三千头遣送秣陵既苦远役咸思为乱郡吏吕兴杀譚及荀以郡内附武帝拜兴安南将军交址太守寻为其功曹李统所杀帝更以建宁爨谷为交址太守谷又死更遣巴西马融代之融病卒南中监军霍弋又遣犍为杨稷代融与将军毛炅九真太守董元牙门孟干孟通李松王业爨能等自蜀出交址破吴军于古城斩大都督修则交州刺史刘俊吴遣虞泛为监军薛珣为威南将军大都督璜为苍梧太守拒稷战于分水璜败退保合浦亡其二将珣怒谓璜曰若自表讨贼而丧二帅其责安在璜曰下官不得行意诸军不相顺故致败耳珣怒欲引军还璜夜以数百兵袭董元获其宝物船载而归珣乃谢之以璜领交州为前部督璜从海道出其不意径至交址元拒之诸将将战璜疑断墙内有伏兵列长戟於其後兵才接元伪退璜追之伏兵果出长戟逆之大破元等以前所得宝船上锦物数千匹遗扶严贼帅梁奇奇将万余人助璜元有勇将解系同在城内璜诱其弟象使为书与系又使象乘璜轺车鼓吹导从而行元等曰象尚若此系必有去志乃就杀之珣璜遂?交址吴因用璜为交州刺史璜有谋策周穷好施能得人心滕修数讨南贼不能制璜曰南岸仰吾盐铁断勿与市皆坏为田器如此二年可一战而灭也修从之果破贼初霍弋之遣稷炅等与之誓曰若贼围城未百日而降者家属诛若过百日救兵不至吾受其罪稷等守未百日粮尽乞降璜不许给其粮使守诸将并谏璜曰霍弋已死不能救稷等必矣可须其日满然後受降使彼得无罪我受有义内训百姓外怀邻国不亦可乎稷等期讫粮尽救兵不至乃纳之皓以璜为使持节都督交州诸军事前将军交州牧武平九德新昌土地阻险夷獠劲悍历世不宾璜征讨开置三郡及九真属国三十余县徵璜为武昌都督以合浦太守修允代之交土人请留璜以千数於是遣还皓既降晋手书遣璜息融勅璜归顺璜流涕数日遣使送印绶诣洛阳帝诏复其本职封宛陵侯改为冠军将军在南三十年威恩着于殊俗及卒举州号哭如丧慈亲子威领交州刺史在职甚得百姓心三年卒威弟淑子绥後并为交州自基至绥四世为交州者五人璜弟濬吴镇南大将军荆州牧濬弟抗太子中庶子濬子湮字恭之湮弟猷字恭豫并有名湮至临海太守黄门侍郎猷宣城内史王导右军长史湮子馥于湖令为韩晃所杀追赠庐江太守抗子囡自有传陶囡丹阳人也王敦命为参军转州别驾敦死司徒王导引为从事中郎迁司马苏峻之役囡与孔坦言於导请早出兵守江口峻将至回复谓庾亮曰峻知石头有重戍不敢直下必向小丹阳南道步来宜伏兵要之可一战而擒亮不从峻果由小丹阳经秣陵迷失道逢郡人执以为乡导时峻夜行甚无部分亮闻之深悔不从回等之言寻王师败绩回还本县收合义军得千余人并为步军与陶侃温峤等并力攻峻又别破韩晃以功封康乐伯时大贼新平纲维废弛司徒王导以回有器干擢补北军中候俄转中护军久之迁征虏将军吴兴太守时人饥谷贵三吴尤甚诏欲听相鬻卖以拯一时之急回上疏曰当今天下不皆荒俭惟独东土谷价偏贵便相鬻卖声必远流北贼闻此将窥疆场如愚臣意不如开仓廩以振之乃不待报辄便开仓及割府郡军资数万斛米以救乏絶由是一境获全既而下诏并勅会稽吴郡依囡振恤二郡赖之在郡四年徵拜领军将军加散骑常侍征虏将军如故囡性雅正不憚强御丹阳尹桓景佞事王导甚为导所昵回常慷慨谓景非正人不宜亲狎会苒惑守南斗经旬导语囡曰南斗扬州分而苒惑守之吾当逊位以厌此譴回答曰公以明德作相辅弼圣主当亲忠贞远邪佞而与桓景造膝苒惑何由退舍导深愧之咸和二年以疾辞职帝不许徙护军将军常侍领军如故未拜卒年五十一谥曰威四子汪嗣爵位至辅国将军宣城内史陋冠军将军隐少府无忌光禄勳兄弟咸有干用

张闿字敬绪丹阳人吴辅吴将军昭之曾孙也少孤有志操太常薛兼进之於元帝言闿才干贞固当今之良器即引为安东参军甚加礼遇转丞相从事中郎以母忧去职既葬帝强起之闿固辞疾笃优命敦逼遂起视事及帝为晋王拜给事黄门侍郎领本郡大中正以佐翼勲赐爵丹阳县侯迁侍中帝践祚出补晋陵内史在郡甚有威惠所部四县并以旱失田闿乃立曲阿新丰塘溉田八百余顷每岁丰稔葛洪为其颂计用二十一万一千四百二十工以擅兴造免官後公卿并为之言曰张闿兴陂溉田可谓益国而反被黜使臣下难复为善帝感悟乃下诏曰丹阳侯闿昔以劳役部人免官虽从吏议犹未掩其忠节之志也仓廩国之大本宜得其才今以闿为大司农闿陈黜免始尔不宜便居九列疏奏不许然後就职帝晏驾以闿为大匠卿营建平陵事毕迁尚书苏峻之役闿与王导俱入宫侍卫峻使闿持节权督东军王导潜与闿谋密宣太后诏於三吴令速起义军陶侃等至假闿节行征虏将军与振威将军陶固共督丹阳义军闿到晋陵使内史刘耽尽以一部谷并遣吴郡度支运四部谷以给车骑将军郗鉴又与吴郡内史蔡谟前吴兴内史虞潭会稽内史王舒等招集义兵以讨峻峻平以尚书加散骑常侍赐爵宜阳伯迁廷尉以疾解职拜金紫光禄大夫寻卒时年六十四子混嗣闿牋表文议传於世

乐道融丹阳人也少有大志好学不倦与朋友信每约已而务周急有国士之风为王敦参军敦将图逆谋害朝贤以告甘卓卓以为不可迟留不赴敦遣道融召之道融虽为敦佐忿其逆节因说卓曰主上躬统万机非专任刘隗今虑七国之祸故割湘州以削诸侯而王氏擅权日久卒见分政便谓被夺耳王敦背恩肆逆举兵伐主国家待君至厚今若同之岂不负义生为逆臣死为愚鬼求成宗党之耻耶君当伪许应命而驰袭武昌敦衆闻之必不战自散大勲可就矣卓大然之乃与巴东监军柳纯等露檄陈敦过逆率所统致讨又遣齎表诣台卓性不果决且年老多疑遂待诸方同进出军稽迟至猪口敦闻卓已下兵卓兄子印时为敦参军使印求和于卓令其旋军卓信之将旋主簿邓骞与道融劝卓曰将军起义兵而中废为败军之将窃为将军不取今将军之下士卒各求其利一旦而还恐不可得也卓不从道融昼夜涕泣谏卓忧愤而死

葛洪字稚川丹阳句容人也祖系吴大鸿臚父悌吴平後入晋为邵陵太守洪少好学家贫躬自伐薪以贸纸笔夜辄写书诵习遂以儒学知名为人木讷不好荣利闭门却扫未尝交游於余杭山见何幼道郭文举目击而已各无所言时或寻书问义不远数千里崎岖冒涉期於必得遂究覽典籍尤好神仙导养之法从祖玄吴时学道得仙号曰葛仙公以其链丹秘术授弟子郑隐洪就隐学悉得其法焉後师事南海太守上党鲍玄玄亦内学逆占将来见洪深重之以女妻洪洪传玄业兼综练医术凡所着撰皆精核是非而才章富赡太安中石冰作乱吴兴太守顾秘为义军都督与周玘等起兵讨之秘檄洪为将兵都尉攻冰别率破之迁伏波将军水平洪不论功赏径至洛阳欲搜求异书以广其学洪见天下已乱欲避地南土乃参广州刺史嵇含军事及含遇害遂停南土多年征镇檄命一无所就後还乡里礼辟皆不赴元帝为丞相辟为掾以平贼功赐爵关内侯咸和初司徒导召补州主簿转司徒掾迁谘议参军干宝深相亲友荐洪才堪国史选为散骑常侍领大著作洪固辞不就以年老欲链丹以祈遐寿闻交址出丹求为句漏令帝以洪资高不许洪曰非欲为荣以有丹耳帝从之洪遂将子侄俱行至广州刺史邓岳留不听去洪乃止罗浮山链丹岳表补东官太守又辞不就岳乃以洪兄子望

为记室参军在山积年优游闲养着述不辍着书凡内外一百一十六篇自号抱朴子因以名书其余所着碑诔诗赋百卷移檄章表三十卷神仙良吏隐逸集异等传各十卷又抄五经史汉百家之言方伎杂事三百一十卷金匱药方一百卷肘後要急方四卷洪博闻深洽江左絶伦着述篇章富于班马又精辩玄赜析理入微後忽与岳疏云当远行寻师尅期便发岳得疏狼狽往别而洪坐至日中兀然若睡而卒岳至遂不及见时年八十一视其顔色如生体亦柔软举尸入棺甚轻如空衣世以为尸解得仙云

许迈字叔玄一名映丹阳句容人也家世士族而迈少恬静不慕仕进未弱冠尝造郭璞璞为之筮遇泰其上六爻发璞谓曰君元吉自天宜学道时南海太守鲍靓隐迹潜遁人莫之知迈乃往候之探其至要父母尚存未忍违亲谓余杭悬溜山近延陵之茅山是洞庭西门潜通五岳陈安世茅季伟常所游处于是立精舍于悬溜而往来茅岭之洞室放絶世务以寻仙馆朔望时节还家定省而已父母既终乃遣妇孙氏还家遂携其同志徧游名山永和二年移入临安西山登岩茹芝眇尔自得有终焉之志乃改名玄字远游与妇书告别又着诗十二首论神仙事王羲之造之未尝不弥日忘归相与为世外之交自後莫测所终

陶弘景字通明丹阳秣陵人也祖隆王府参军父贞孝昌令弘景以宋孝建三年丙申岁夏至日生幼有异操年四五岁常以荻为笔画灰中学书至十岁得葛洪神仙传昼夜研寻便有养生之志谓人曰仰青云覩白日不觉为远矣父为妾所害弘景终身不娶及长身長七尺七寸神仪明秀读书万余卷一事不知以为深耻善琴碁工草隶未弱冠齐高帝作相引为诸王侍读除奉朝请虽在朱门闭影不交外物唯以披閱为务朝仪故事多所取焉家贫求宰县不遂永明十年脱朝服挂神虎门上表辞禄诏许之赐以束帛敕所在月给茯苓五斤白蜜二斤以供服饵及发公卿祖之征虜亭供帐甚盛车马填咽咸云宋齐以来未有斯事于是止于句容之句曲山立馆自号华阳陶隐居性爱山水每经涧谷必坐卧其间吟咏盘桓不能已沈约为东阳郡守高其志节累书要之不至弘景为人圆通谦谨出处冥会心如明镜遇物便了言无烦舛有亦随觉永元初更筑三层楼弘景处其上弟子居其中宾客至其下与物遂絶唯一一家僮得至其所本便马善射晚皆不为唯听吹笙而已特爱松风庭院皆植松每闻其响欣然为乐有时独游泉石望见者以为仙人性好着述尚奇异顾惜光景老而弥笃尤明陰阳五行风角星算山川地理方圆产物鑿术本草帝代年历以算推知尝造浑天象高三尺许地居中央天转而地不动以机动之悉与天相会云修道所须非止史官用是齐末议禪代弘景引图?数处皆成梁字梁武帝既早与之游及即位後恩礼愈笃书问不絶冠盖相望帝每得其书烧香虔受帝使造年历至巳巳岁而加朱点实太清三年也帝手敕招之锡鹿皮巾後屡加礼聘并不出国家每有吉凶征讨大事无不前以谘询月中常有数信时人谓为山中宰相二宫及公王贵要参候相继赠遗未尝脱时多不纳受天监四年移居积金东涧自隐处四十许年逾八十而有壮容仙书云眼方者寿千岁弘景末年一眼有时而方简文钦其风素召至後堂以葛巾进见与谈论数日而去甚敬异之无疾自知应逝逆尅亡日为告逝诗大同二年卒时年八十五顔色不变屈伸如常香气累日氛氲满山诏赠太中大夫谥曰贞白先生不娶无子从兄以子松乔嗣所着学苑百卷孝经论语集注帝代年历本草集注効验方肘後百一方古今州郡记图像集要及玉匱记七曜新旧术疏占候弘景妙解术数逆知梁祚覆没预制诗云夷甫任散诞平叔坐论空岂悟昭阳殿遂作单于宫诗秘在篋里化後门人方稍出之大同末士人

竟谈玄理不习武事後侯景篡果在昭阳殿刘系宗丹阳人也少便书画为宋竟陵王诞子景粹侍书诞举兵广陵城内皆死敕沈庆之赦系宗以为东宫侍书泰始中为主书以寒宦累至勲品元徽初为奉朝请兼中书通事舍人员外郎封始兴南亭侯带秣陵令齐高帝废苍梧明旦呼正直舍人虞整醉不能起系宗欢喜奉敕高帝曰今天地重开是卿尽力之日使写诸处分敕令及四方书疏使主书十人书吏二十人配之事皆称旨高帝即位除龙骧将军建康令永明初为右军将军淮陵太守兼中书通事舍人母丧自解起复本职四年白贼唐寓之起宿卫兵东讨遣系宗随军慰劳遍至遭贼郡县百姓被驱逼者悉无所问还复人伍系宗还上曰此段有征无战以时平荡百姓安恬甚快也赐系宗钱帛上欲修白下城难于动役系宗啓謫役在东人丁随?之为逆者上从之後车驾出讲武上履行白下城曰刘系宗为国家得此一城永明中魏使书常令系宗题答秘书局皆隶之再为少府詹林即位除宁朔将军宣城太守系宗久在朝省闲于职事武帝常云学士辈不堪经国唯大读书耳经国一刘系宗足矣沈约王融数百人于事何用其重吏事如此建武二年卒官

梁纪少瑜字幼璠丹阳秣陵人也本姓吴养于纪氏因而命族早孤幼有志节常慕王安期之为人年十三能属文初为京华乐王僧孺见而赏之曰此子才藻新拔方有高名少瑜常梦陆倕以一束青镂管笔授之云我以此笔犹可用卿自择其善者其文因此遒劲年十九始游太学备探六经博士东海鲍暕雅相钦悦时暕有疾请少瑜代讲少瑜既妙玄言善谈吐辩捷如流为晋安国中尉即梁简文也深被恩遇後侍宣城王读当阳公为郢州以为功曹参军转轻车限内记室坐事免大同七年始引为东宫学士邵陵王在郢启求学士武帝以少瑜充行少瑜美容貌工藁草吏部尚书到溉尝曰此人有大才而无贵仕将拔之会溉去职後除武陵王记室参军卒

陶子锵字海育丹阳秣陵人也父延尚书比部郎兄尚宋末为幸臣所怨被系子锵公私缘诉流血稽颡行路嗟伤逢谢超宗下车相访回入县诣建康令劳彦远曰岂忍见人昆季如此而不留心劳感之兄得释母终居丧尽礼与范云隣云每闻其哭声必动容改色欲相申荐会云卒初子锵母嗜蓴母没後常以供奠梁武义师初至此年冬营蓴不得子锵痛恨恸哭而絶久之乃苏遂长断蓴味

陶季直秣陵人好学澹于荣利为建安太守政尚清静百姓便之还迁黄门侍郎辞疾还乡里就家拜太中大夫梁祖曰梁有天下惜乎不见此人

丁咸序秣陵人耽儒学进修士业授衡阳判官太守贤之

淳于量字思明建康人父文成仕梁为梁州刺史侯景之乱量与王僧辩平之

张松建康人兄悌坐罪当死松及弟景各欲代其死县以讞上武帝以为孝义特降其死

卢郢金陵人好学有俊才以状元登第迁至南全守颇着治绩

史务滋溧阳人先为溧阳侯累吏劳迁司宾卿天授元年九月进拜纳言武后革命诏务滋等十人分行天下雅州刺史刘行实兄弟为侍御史来子询诬其反诏务滋与来俊臣杂治俊臣言务滋与囚善掩其反状后命俊臣并治遂自杀

沈恪丹阳人也永定初为宣猛将军陈霸先谋篡使中书舍人刘师知引恪勒兵入宫卫送梁主如别宫恪排闥见霸先叩头谢曰恪身经事萧氏今日不忍见此分受死耳决不奉命霸先嘉其意不复逼更以荡主王僧志代之

许淹句容人多识广闻精诂训与魏模公孙罗名家刘邺字汉藩句容人父三复以善文章知名少孤母病废三复丐粟以养李德裕为浙西观察使奇其文表为掌书记德裕三领浙西及劔南未尝不从会昌时位宰相擢三复刑部侍郎宏文馆学士邺六七岁能属辞德裕怜之使与子共师学德裕既斥邺无所依去客江湖间陕虢高元裕表署推官高少逸又辟镇国幕府咸通初擢左拾遗召为翰林学士赐进士第历中书舍人迁承旨邺伤德裕以朋党抱诬死海上令狐綯久当国更数赦不为还官爵至懿宗立綯去位邺乃申其冤复官爵世高其义後以礼部尚书同中书门下平章事许叔牙字延基句容人贞观时迁晋王府参军事宏文馆直学士于诗礼尤邃献诗纂义十篇太子写附经御史大夫高智周见之曰欲明诗者宜先读此

张常洵句容人建中四年父歿庐墓三年墓侧产瑞芝十二茎太守樊泌表奏旌表大和六年侄孙公珽亦以孝闻

徐铉字鼎臣广陵人也十岁能属文与韩熙载齐名江南谓之韩徐仕南唐为翰林学士御史大夫吏部尚书今摄山栖霞寺西来贤亭即其居也王师围金陵煜遣铉朝京师求缓兵太祖以礼遣之後随煜至京师太祖责之铉对曰臣仕江南国亡不能死臣之罪也太祖叹曰忠臣也以为太子率更令太平兴国初直学士院从征太原加给事中出为左散骑常侍坐事贬黜卒年七十六李穆尝使江南见铉及其弟锴文章叹曰二陆不能及也锴仕江南为内史舍人而卒铉好李斯小篆尤得其妙隶书亦工尺牋为士大夫所得皆珍藏之有集三十卷又有质疑论稽神录行于世

皇朝李华字君仪溧阳人父没居丧毁瘠尽哀母老得疾废于牀垂泣忧惧置家事不问专意奉养抱持卧起进粥药以至盥帨纖悉必躬必亲不出户庭衣未尝解带者十余年尤笃于友爱同气五人从容季孟间相亲以睦内外无间言有田十余顷岁水旱誓不一言减县官租谷翔贵亟发廩平价食其一方虚甑待炊者日以千计大观政和间蝗数害稼羣飞下其田辄去不食旁亩愧骇且以相告华曰偶然尔勿复言年八十六卒子朝正字治表性刚直不苟于势利游太学登第历勅令所删定官知溧水县民诣府举留知府叶参政梦得荐于朝被召赐对转一官赐银绯从民所欲命还溧水陛辞乞易所得章服封母从之秩满除太府寺簿母忧服阕再除勅令所删定官俄除户部郎改右司遂权户部侍郎奉祠知平江府绍兴二十五年卒年六十官至朝奉大夫

潘祺字长吉溧阳人好学问尚气节游太学知名与陈谏议东为心友陈欲献书阙下过祺谋

可否祺曰祺亲老不能与子俱子不可不勉陈意遂决祺性至孝父疾革露章请于帝愿减已筭益父寿父疾果瘳金以为孝诚所感登第调宣州司户卒年三十八里人痛惜之钱戡溧阳人居父忧有少年数人来曰而父在京师逋我金数百万戡欲偿之兄弟有难色且令举其要戡独曰大人与人交信厚彼必不我欺且彼谓吾父贷宿镪吾拒以无左验辞虽直顾非孝子待亲之道卒与之家为瘠不悔元夕家人出观灯邻不肖子闯其閤潜入家庙中伺夜将为盗觜识之亟遣守舍仆呼之前携谕曰尔良家何为乃至是取一白金合子与之使速去终不语人其子时敏始生有乌鹄衔青铜五铢钱一置庭中香案上识者知其陰德之徵以时敏恩赠奉直大夫时敏字端修早穎悟读书一覽即成诵属文敏速气岸轩豁勇于为义年十八县以明经上于郡庠贡辟雍擢上舍第繇大理寺丞迁秘书丞除驾部郎充奉迎两宫扈从礼仪使司属官改兵部郎检察郊祀大礼仪使迁右司郎兼权右史充礼部贡院参详官又兼外制拜权工部侍郎俄权兵部侍郎除敷文阁待制奉祠告老绍兴二十三年卒年六十八特赠正议大夫

钱周材字元英溧阳人质重气和退然似不能言望而接之知其为笃厚君子七岁能属文乡试第一登第繇大理司直擢晋安郡王府教授历迁校书郎著作郎兼教授如故除起居舍人迁刑部侍郎使金还拜中书舍人直学士院兼实录院修撰兼侍讲知常州奉祠孝宗登极以旧学召对便殿留奉内祠兼侍讲复为中书舍人迁给事中兼直学士院母忧服阙屡诏不赴以龙图阁直学士奉祠告老乾道三年卒年七十二官至朝议大夫

阎产昭字德甫世家建康之江宁徙居溧阳性敏悟遇事繁剧剴决愈精明轻财尚气义自浙西帅司机宜监六部门迁太府寺丞除仓部郎奉使淮东参议浙东江西帅幕除两浙运判奉祠乾道九年卒年七十九官至右奉直大夫子晃昂晟晃子一德历江陰建昌二军及泰眞二州太守累官至宗正寺簿

刁衍昇州人初仕南唐直清辉阁阅中外章疏甚被亲昵江南既平李昉扈蒙在翰林勉衍出仕因献圣德颂于朝乃复故官出宰桐庐凡七年不迁恬澹夷雅多推尊之太平兴国七年上疏言淫刑酷法非律之所载者望诏天下悉禁止之上覽疏甚悦

秦传序江宁人也淳化五年贼攻嘉戎泸渝涪忠万开八州时传序为开州监军力战而死上降诏嘉獎其子爽泝峡求其父尸至夔州船覆而死人谓父死于忠子死于孝奏至上嗟惻久之录传序次子煦为殿直赐钱十万

邵必丹阳人博学有雅望庆历六年差为编修唐书官必言史出衆手非是卒辞之

陈克字子高金陵人不事科举博学专以资为诗吕祉帅建康辟置为属

潘温之字温甫溧阳人好学王荆公称为江东书柜子登第终县令

宋存字【阙】金陵人也尝读吴大帝而下六朝书具详历代兴亡成败之迹南唐时作覽古

诗二百章章四句沿初泊末烂然碁布阅诗者嘉其用心之勤云

朱舜庸字【阙】建康人也好古博雅乡党推敬太守聘为府学正皆尊礼之尝编金陵事蹟二十年自里巷口传至僊佛之书无不研综舂容大雅余数文言庆元中节度使吴公琚来任留守得其编而契于心乃为之订证铨次刻梓以传目曰续建康志

隐德传

严光字子陵一名遵会稽余姚人也少有高名与光武同游学及光武即位光乃变名姓隐身不见尝结庐溧水上【十道四蕃志太平寰宇志皆云溧水县东南十五里有东庐山有水源三严子陵尝结庐于此】帝思其贤乃令以物色访之齐国上言有一男子披羊裘钓泽中帝疑其光乃备安车玄纁遣使聘之三反而後至舍于北军给牀褥太官朝夕进膳司徒霸与光素旧遣使奉书使人因谓光曰公闻先生至区区欲即诣造迫于典司是以不获愿因日暮自屈语言光不答乃投札与之口授曰君房足下位至鼎足甚善怀仁辅义天下悦阿谀顺旨要领絶霸得书封奏之帝笑曰狂奴故态也车驾即日幸其馆光卧不起帝即其卧所抚光腹曰咄咄子陵不可相助为理耶光又眠不应良久乃张目熟视曰昔唐尧着德巢父洗耳士固有志何至相迫乎帝曰子陵我竟不能下汝耶于是升舆叹息而去复引光入论道旧故相对累日共偃卧光以足加帝腹上明日太史奏客星犯御坐甚急帝笑曰朕故人严子陵共卧耳除为谏议大夫不屈乃耕于富春山後人名其钓处为严陵瀬建武十七年复特徵不至年八十终于家帝伤惜之诏下郡县赐钱百万谷千斛【溧水乃初隐处富春乃归隐处】

晋陶潜字元亮大司马侃之曾孙也潜少怀高尚博学善属文颖脱不羁任真自得为乡邻之所贵尝着五柳先生传以自况以亲老家贫起为州祭酒後为镇军建威参军事时刘裕为镇军将军潜其属也揣知裕意即有遯世之志尝赋诗曰望云慙高鸟临水愧游鱼聊且凭化迁终返班生庐谓亲朋曰聊欲弦歌以为三迕之资可乎执事者闻之以为彭泽令公田悉令种秫曰令吾常醉足矣素简贵不私事上官郡遣督邮至县吏白应束带见之潜叹曰吾不能为五斗米折腰拳拳事乡里小人即日赋归去来辞解印去後徵着作郎不就潜自以曾祖晋世宰辅不复屈身後代自刘裕称宋不肯复仕凡着文章所题年月义熙以前则书晋氏年号自永初以来唯书甲子而已宋元嘉中卒年六十三鲁胜字叔时代郡人也少有才操为佐着作郎元康初迁建康令到官着正天论尝岁日望气知将来多故便称疾去官中书令张华遣子劝其更仕再徵博士举中书郎皆不就

儒雅传

刘瓛字子珪沛郡相人晋丹阳尹惔六世孙也笃志好学博通训义年五岁闻舅孔熙先读管宁传欣然欲读舅更为说之精意听受曰此可及也宋大明四年举秀才除奉朝请不就兄弟三人共处蓬室一间为风所倒无以葺之怡然自乐习业不废聚徒教授常有数十丹阳尹袁粲于後堂夜集闻而请之指听事前古柳树谓瓛曰人谓此是刘尹时树每想高风今复见卿清德可谓不衰矣荐为秘书郎不见用後拜安成王抚军行参军坐事免瓛素无宦情自此不

复仕袁粲诛璠微服往哭并致赙助齐高帝践祚召璠入华林园谈话问以政道答曰政在孝经宋氏所以亡陛下所以得之是也帝咨嗟曰儒者之言可宝万世又谓璠曰吾应天革命物议以为何如璠曰陛下戒前轨之失加之以宽厚虽危可安若寻其覆辙虽安必危及出帝谓司徒褚彦回曰方直乃耳学士故自过人敕璠使数入而璠自非诏见未尝到宫门上欲用璠为中书郎使吏部尚书何戢喻旨璠笑曰平生无荣进意後以母老阙养拜彭城郡丞会稽郡丞学徒从之者转衆除步兵校尉不拜璠姿状纖小儒业冠于当时都下士子贵游莫不下席受业当世推其大儒以比古之曹郑性谦率不以高名自居之诣于人唯一门生持胡牀随後主人未通便坐门待荅住在檀桥瓦屋数间上皆穿漏学徒敬慕不敢指斥呼为青溪焉竟陵王子良亲往修谒十年表武帝为璠立馆以杨烈桥故主第给之生徒皆贺璠曰室美岂为人哉此华宇岂吾宅耶幸可诏作讲堂犹恐见害也未及徙居遇疾卒门人受学者弟子服临送璠有至性祖母病疽经年手持膏药渍指为烂母孔氏甚严明谓亲戚曰阿称便是今世曾子称璠小名也年四十余未有婚对建元中高帝与司徒褚彦回为璠娶王氏女王氏穿壁挂履土落孔氏牀上孔氏不悦璠即出其妻及居母忧住墓下不出庐足为之屈杖不能起此山常有鸛鹄鸟璠在山三年不敢来服释还家此鸟乃至梁武帝少时尝经伏膺及天监元年下诏为璠立碑谥贞简先生所着文集行于世

雷次宗字仲伦豫章南昌人也笃志好学尤明三礼毛诗隐退不受徵辟宋元嘉十五年徵至都开馆于鷄笼山聚徒教授置生百余人会稽朱膺之颍川庾蔚之并以儒学总监诸生时国子学未立上留意艺文使丹阳尹何尚之立玄学太子率更令何承天立史学司徒参军谢玄立文学凡四学并建车驾数至次宗馆资给甚厚久之还庐山公卿以下并设祖道後又徵诣都为筑室于锺山西岩下谓之招隐馆使为皇太子诸王讲经次宗不入公门乃使自华林东门入延贤堂就业二十五年卒于锺山子肃之颇传其业

伏曼容字公仪平昌安丘人晋著作郎滔之曾孙也父胤之宋司空主簿曼容早孤与母兄客居南海少笃学聚徒教授以自业为骠骑行参军宋明帝好周易尝集朝臣于清暑殿讲诏曼容执经曼容素美风采明帝尝以方嵇叔夜使吴人陆探微画叔夜像以赐之为尚书外兵郎尝与袁粲罢朝相会言玄理时论以为一台二絕昇明末为辅国长史南海太守作贪泉铭齐建元中为太子率更令侍讲卫将军王俭深相爱好建武中拜中散大夫时明帝不重儒术曼容宅在瓦宫寺东施高坐于听事有宾客辄升高坐为讲说生徒尝数十百人梁台建召拜司徒司马出为临海太守天监元年卒官年八十二曼容善音律射御风角医算莫不闲了为周易毛诗丧服集解老庄论语义

王端朝字季羔本澶渊人过江爱溧阳风土因家焉少以该洽闻年十八举建康第一後荐太学又为第一登第中博学宏词科历太学录秘书省正字江东帅司机宜除宗正丞提举两浙市舶知永州乾道二年卒年四十四官至承议郎

刘岑字季高本吴兴人後迁居溧阳天姿英伟学问该贯忠诚许国宽宏爱士有古君子之风文章雄贍字画遒劲登第累擢至著作郎再使金通判兴国军除湖北运判辟川陕随军转运使除金部郎累迁权户侍後出知太平州池州移镇江府除刑部侍郎迁户部侍郎知信州谪

单州团练副使全州安置在全五年移建昌军居住又历九年绍兴乙亥冬自便复官奉祠起知泰州移扬州温州除户部侍郎车驾亲征除御营随军都转运使奉祠告老除徽猷阁直学士乾道三年卒年八十一官至左朝散大夫先世葬乌程之杼山故号杼山居士熙宁中曾祖述字孝叔为御史知杂以忤荆公出知江州司马温公折简与孝叔有道胜名立之语杼山既居溧阳乃以道胜名其堂

崔敦礼与弟敦诗本通州静海人同登绍兴庚辰乡爱溧阳山水买田卜居傍舍凿池池上有读书之堂扁曰双桂于湖张孝祥笔也敦礼字仲由历江宁尉平江府教授江东抚干诸王宫大小学教授淳熙八年卒官至宣教郎敦诗字大雅性端厚议论疏通知大体博覽强记为文敏贍以词学自结主知秘书省正字除翰林权直兼崇政殿说书兼权给事中家难服阙除枢密院编修官学士院权直迁著作郎兼权吏部郎官又兼崇政殿说书进国子司业改权直学士院拜中书舍人加侍讲直学士院淳熙九年卒年四十四特赠中大夫李处全字粹伯徐州丰县人邯鄲公淑之曾孙後迁居溧阳天资超轶贯串古今忠诚许国寬大好贤慕刘杼山之为人文章閎肆诗体兼衆长字画遒丽登第繇宗正寺簿迁太常丞知沅州提举湖北茶盐除秘书丞兼礼部郎官迁殿中侍御史遂除侍御史母忧去朝奉祠後知袁州处州移贛州未赴改舒州淳熙十六年卒于任年五十九官至朝议大夫侄柄字子权知无为军舒州淳熙四年卒年四十二官至宣教郎

潘彙征字泰初寓居溧阳记问该洽议论醇正宗濂洛先儒之学四荐三魁登嘉定甲戌第廷对剴切漫塘刘公宰嘉其志不苟求学行才猷兼备深器重之时杜丞相范为湖州録参彙征为仪真郡文学漫塘遂并荐于朝历番阳推官安庆教班改宰崑山邑号难治人咸服其廉平再调繁昌年六十有九自号鹤山狷叟亦近世人物之贤者也

杨备字修之建平人也庆历中为尚书虞部员外郎分司南京上轻车都尉往复道出江上赋百篇二韵命曰金陵覽古百题诗各注其事于题之下与南唐朱存诗并传于时

陈已字九成豫章武宁人也自幼能属文通周礼及书春秋亦工于词赋壮游金陵从学者衆因家于镇淮桥西之竹街受其业者与计偕登上第皆有闻于时晚年厌科举业潜心理学理之学吟诗着书以自适淳佑中帅阉尝荐于朝称其问学操守穷坚老壮将表章之遽以疾终有周礼详说四书讲义南窗漫录传于世

纪少瑜许叔牙朱存朱舜庸并互见耆旧传

贞女传

贞义女史氏溧阳人吴王僚五年伍子胥去楚奔吴中道而疾乞食溧阳值女子击𦨇于瀨水筥中有饭子胥跪而乞餐女子饭之子胥餐已欲去谓女子曰掩子壶浆无令其露女子叹曰嗟乎妾独与母居三十年自守贞明不愿从适何宜馈饭而与丈夫越亏礼义妾不忍也子行矣子胥行反顾女子已自沉于瀨水其後阖闾十年子胥破楚入郢还过溧阳瀨水之上长叹

息曰吾尝饥乞食于女子女子饭我遂自沉而亡欲报以百金而不知其家乃投金水中而去有顷一老嫗悲泣而来或问曰何泣之悲乎曰吾女子往年击縣于此遇一穷途君子而辄饭之恐事泄自沉于水今闻伍君来不得其偿自伤虚死故悲耳人曰子胥欲报百金而不知其家投金水中而去矣嫗遂取金以归【李白记云皇唐叶有六圣再造八极镜清万方幽明咸熙天秩有礼自太古及今君君臣臣烈士贞女采其名节尤章可激清颓俗者皆扫地而祠之兰蒸椒浆岁祀罔缺而兹邑贞女光灵翳然埋冥古远琬琰不刻岂前修博达者为邦之意乎贞女者溧阳黄山里史氏之女也以家溧阳史阙书之岁三十弗移天于人清英洁白事母纯孝手柔荑而不龟身漂击以自业当楚平王时王虐忠助谗苛虐厥政芟于尚斩于奢血流于朝赤族伍氏怨毒于人何其深哉子胥始来奔勾吴月涉星遁或七日不火伤弓于飞逼迫于昭关匍匐于濊渚舍车而徒告穷此女目色以臆授之壶浆全人自沉形与口灭卓絕千古声凌浮云激节必报之讐雪诚无疑之地难乎哉借如曹娥潜波理贯于孝道聂姊殒肆槩动于天伦鲁姑弃子以却三军之衆漂母进饭没受千金之恩方之于此彼或易耳卒使伍君开张阖闾倾荡鄢郢吴师鞭屍于楚国申胥泣血于秦庭我亡尔存亦各壮志张英风于古今雪大愤于天地微此女之力虽云为之士亦焉能咆哮烜赫施于後世耶望其溺所怆然低回而不能去每风号吴天月苦荆水响像如在精魂可悲备惜投金有泉而刻石无主哀哉邑宰荥阳郑公名晏家康成之学世子产之才琴清心闲百里大化有名主簿扶风窦嘉宾县尉广平宋陟南郡陈然丹阳李济清河张昭皆有卿材霸畧同事相协緬纪英淑勒铭道周虽陵颓海竭文或不死其词曰粲粲贞女孤生寒门上无所天下报母恩春风三十花落无言乃如之人击漂清源碧流素手紫彼潺湲求思不可秉节而存伍胥东奔乞食于此女分壶浆灭口而死声动列国义形壮士入郢鞭尸还吴雪耻投金濊沚报德称美明明千秋如月在水】

卷五十

钦定四库全书

景定建康志卷五十 宋 周应合 撰

拾遗

战国策范环对楚怀王曰且王尝用召滑於越昧之难越乱故楚南察瀨湖而野江东鲍氏注云察犹治也楚有而治之以江之东为野此言楚乱有唐昧之难而能得越地以召滑乱之也然鲍注瀨湖乃以为南阳之属殆非也南阳未尝属越又与江东全不相近正谓溧阳之瀨水明矣

史记伍子胥去楚入宋奔郑适晋还郑奔吴橐载而出昭关未至吴而疾止中道乞食张勃曰子胥乞食处在丹阳溧阳县案昭关在今和州含山县北十八里正当孔道自昭关趋溧阳甚近也

汉溧阳长潘乾元贞校官碑灵帝光和四年所立时岁在辛酉杜少陵所谓骨立通神者盖此类也石沦於固城湖中绍兴十三年癸酉溧水尉喻仲远得之輦置听事之侧盖相距九百六十二年矣时时见光采弓兵宿直或以?衣顿於趺上必梦大龟逐而啮之乾道戊子有官告院吏出职为尉顾碑字多阙蚀以为无用且厌人之来呼隶史曹彦与谋将沉之宅後废沼内一寓客素好古为尉所敬闻其说往诘之尉慙谢而止邑宰陈容之为徙诸县圃作屋覆焉至辛卯岁金陵守作文一篇欲识石阴遣匠来甫镌两字遭碎屑激入目旋易它匠皆然竟不能施工【夷坚志】

校官碑长乐陈长方记曰两汉石刻多在关中东南所存无几吾友喻居中尉溧水得後汉光和中溧阳长潘君碑於固城湖之傍溧水故溧阳也风雨摧剥几不可读居中译以今字四百余其不可读者尚数十因举而置之官舍庶几传远老杜八分歌称苦县光和尚骨立盖苦老子庙碑是光和中八分书老杜称以为最古以是校之未知先後

晋简文帝命曲安远为句容令吏部尚书王彪之执不从曰句容近畿三品佳邑岂可任卜术之人无才用者耶【王彪之传】

贺循为太子舍人时廷尉张闾住小市将夺左右近宅以广其居乃私作都门早闭晏开人多患之讼於州府皆不见省会循出连名诣循质之循曰见张廷尉当为言及闾闻遽毁其门诣循致谢其为世所钦服如此【晋本传】

陆龟蒙云予为儿时 in 溧阳闻白头书佐言孟东野贞元中以前秀才家贫受溧阳尉溧阳昔为平陵句县南五里有投金濑濑南八里许道有故平陵城周千余步基址坡陀裁高三四尺而草木势甚盛率多大栎合数人抱丛筱蒙翳如坞如洞地洼下积水沮洳深处可活鱼鳖辈大抵幽邃岑寂气候古澹可喜除里民樵罩外无入者东野得之忘归或比日或间日乘驴後小吏募投金濑一往至则?木栎隐丛筱坐於积水之旁苦吟到日西而还尔袞袞去曹务多废弛令季操下急不佳东野之为立白上府请以假尉代东野分其俸以给之东野竟以穷去吾闻淫畋渔者谓之暴天物天物不可暴又可抉摘刻削露其情状乎使自萌卵至於槁死不能隐天能不致罚耶

洪内翰迈尝言古今忠臣义士其名载於史册者万世不朽然有不幸而泯没无传者南唐後主时有淮人李雄当王师吊伐出守西偏不遇其敌雄以国城重围不忍端坐遂东下以救之阵於溧阳与王师遇父子俱没诸子不从行者亦死他所死者凡八人李氏讫亡不沾褒赠其事仅见於吴唐拾遗录顷尝有旨合九朝国史为一书他日史肯为列之於李煜传庶足以慰斯人於泉下

南唐将亡数年前修昇元寺殿掘得古记视之诗也其辞曰莫问江南事江南事可凭抱鸡昇宝位趁犬出金陵子建居南极安仁秉夜灯东隣娇小女骑虎踏河水王师以甲戌渡江後主寔以丁酉年生曹彬为大将列栅城南为子建也潘美为副将城?恐有伏兵命卒纵火即安仁也钱俶以戊寅年入朝尽献浙右之地

江南保大中浚秦淮得石志案其刻有大宋乾德四年凡六字他皆磨?不可识令诸儒参验乃辅公祐反江东时年号後太祖受命国号宋改元乾德江左始衰弱岂非威灵将及而符?先着也

南唐将亡前数年宫中人按蔷薇水染生帛一夕忘收为浓露所渍色倍鲜翠因令染坊染碧必经宿露之号为天水碧宫中竞服之识者以为天水赵之望也开宝中新修营得一石记凡数百字隶书从头云从他痛从他痛如此连写至末云不为石子尽更书千万个从他痛从他痛不知其?也未几王师渡江云

金陵才士锺辐少年气豪一老僧相之曰君及第则家亡时樊若水爱辐之才以女妻之及宴尔应诏洛中果中甲科由是狂放携一女仆青箱过华州蒲城其宰乃故人延留累日一夕盛暑追凉县楼痛饮而寝是夕梦樊氏出一诗示生怨责颇深诗云楚水平如练双双白鹭飞金陵几多地一去不言归生梦中愧谢戏答一篇曰还吴东下过蒲城楼上清风酒半醒想得到家春已暮海棠千树必凋零既寤因趣装归至采石渡青箱心疼数刻暴卒生忽忽藁葬於一新坟之傍泊至家门巷空闲妻妾亡数月询之亲邻樊亡之日乃梦於县楼之夕也青箱葬处乃樊之莹地也不植他树惟海棠数株叶萼凋谢正符诗意锺叹曰浮屠老僧之说信哉竟不仕隐於锺山着书养气年八十余

陈乔仕江南为门下侍郎掌机密後主之称疾不朝乔预其谋及王师问罪誓以固守时张洎

为乔之副尝言於後主苟社稷失守二臣死之城?乔将死後主执其手曰当与我同北归乔曰臣死之即陛下保无恙但归咎於臣为陛下建不朝之谋斯计之上也掣其手去入视事厅内语二仆曰共缢杀我二仆不忍解所服金带与之遂自经後主求乔不得或谓张洎曰此诣北军矣乔既死从吏撤扉而瘞之明年朝廷嘉其忠诏改葬後见其屍如生而不僵髭发郁然初求屍不得人或见一丈夫衣黄半臂举手影自南廊而过掘得屍以右手加额上如所覩者

金陵人胡恢博物强记善篆隶臧否人物坐法失官十余年潦倒贫困赴选集於京师是时韩魏公当国恢献小诗自达其一联曰建业关山千里远长安风雪一家寒魏公深怜之令篆太学石经因此得复官任华州推官而卒

徐常侍铉仕江南日尝直澄心堂每幙被入直至飞虹桥马辄不进裂鞍断辔箠之流血掣缰却立铉贻书於余杭沙门赞宁答云下必有海马骨水火俱不能毁惟沤以腐糟随毁者乃是铉斲之二丈余果得巨兽骨上脰可长五尺膝而下长三尺脑骨若梁柱积薪焚三日不动以腐糟沤之遂烂焉

南唐後主留心笔札所用澄心堂纸李廷珪墨龙尾石砚三物为天下之冠自李氏亡龙尾石不复出景佑中校理钱僊芝知歙州访得其所乃大溪也李氏尝患溪深不可入断其流使由他道李氏亡居民苦溪之回远导之如初而石乃絶僊芝移溪还故道石乃复出遂与端溪并行

元丰中王荆公在金陵东坡自黄北还日与公游尽论古昔文字公叹息谓人曰不知更几百年方有如此人物东坡渡江至仪真和游蒋山诗寄金陵守王胜之【益胜】公亟取读至峰多巧障日江远欲浮天乃抚几曰老夫平生作诗无此二句又在蒋山时以近制示东坡坡云积李兮缟夜崇桃兮炫昼自屈宋没世旷千余年无复离骚句法乃今见之荆公曰非子瞻见谀自负亦如此然未尝为俗子道也

余为儿童时尝闻祖母集庆郡夫人言江南有国日有县令锺离君与邻县令许君结婚锺离女将出适买一婢以从嫁一日其婢执箕箒治地至堂前熟视地之窰处惻然泣下锺离君适见怪问之婢泣曰幼时我家父於此穴地为球?道我戏剧岁久矣而窰处未改也锺离惊曰而父何人婢曰我父乃两政前县令也身死家破我遂落民间而更卖为婢锺离君遽呼牙侖问之复质牙老更其得其实是时许令子纳采有日锺离君遽以书抵许令而止其子且曰吾买婢得前令之女吾特怜而悲之义不可久辱当以吾女之奁篋先求壻以嫁前令之女也更俟一年别为吾女营办嫁资以归君子可乎许君答书曰蘧伯玉耻独为君子君何自专仁义愿以前令之女配吾子然後君别求良奥以嫁君女於是前令之女卒归许氏祖母语毕叹曰此等事前辈之所常行今则不复见矣余时尚幼恨不记二令之名姑书其事亦足以激天下之义矣

兴化尉胡滋其妻宗室女也自言梦人衣金紫云王待制来为夫人儿妻寻产子介甫闻之自京师至金陵与夫人常坐於船一帘下见船过辄问得非胡尉船乎既而得之举家悲喜亟抚

视涕泣遗之金帛不可胜数邀与俱还金陵滋言有捕盗功应诣铨求赏介甫使人为营致除京官留金陵且半年欲勾其儿其母不可乃遣之

金陵道士章齐一善为诗好嘲咏一被题目即日传诵人皆畏之凡四百余篇曲尽其妙後得疾嚼舌而死

建炎车驾南渡百僚仓皇渡江舟人乘时射利停桡水中每渡一人必须金一两然後登船是时叶宗谔为将作监逃难至江浒而寔不携一钱旁徨无措忽覩妇人於其侧美而艷语叶云事有适可者妾亦欲渡江有金钗二只各重一两宜济二人而涉水非女子所习公幸负我以趋叶从之且举二钗以示篙师肯首令前妇人伏於叶之背而行甫扣船舷失手妇人坠水而没叶独得逃生怅然以登南岸叶後以直龙图阁帅建康其家影堂中设位云扬子江头无姓名妇人岂鬼神托此以全其命乎

陈侍郎岩肖云绍兴初予之官建康舫舟溧阳邮亭见壁间题云十年弃微官归来事却扫扁舟访安期要觅如瓜枣不知膏粱珍恶食时自好田园苦无多生理何草草浊酒时一樽孤斟从醉倒然不着名氏不知何时所作观其言淡而旨远决非汨没名利而不知返者也

溧阳豪民吴璋以财横乡曲非特外人畏之其家子弟亦甚严惮每坐堂上则无敢过其前必先穴壁觐窥伺璋不在方敢入弟十九郎者因窥隙见金紫人向堂立後有服朱绿数人少长俨列惊异之疾走入门乃无所覩私窃自喜以为家庆殊未艾既而璋以不法为邑丞龚鏊所治至於窜流远方弟亦连坐黥徙袁州家赀皆估籍刘侍郎岑买其居缘居室之故为请袁守免其弟归因得服役门下适刘当岁除享祀偶於壁隙窥之金朱绿袍恍然曩日所见者始以语人

碧服周先生者常州人以善相游公卿间刘侍郎致仕寓居溧阳周往从之尝从容薄暮起曰侍郎明日有陨坠败面之厄刘曰当来其食以验不然当罚尔曰定矣旦未及食邻家失火刘仓卒奔避碍於户限仆地面伤焉其他大率类此

刘侍郎以先世葬乌程之杼山故自号杼山居士杼山曾祖述字孝叔熙宁中为御史知杂以忤荆公出知江州温公折简与孝叔有道胜名立之语杼山既居溧阳乃以道胜名其堂

淳熙十一年溧阳仓斗子坐盗官米黥配而籍其家得草书二轴题云庚申岁书其名权花押正如一劒之状盖锺离翁也其词云露滴红兰玉满畦闲拖象屐到峰西但令心似莲花洁何必身将槁木齐古堑细香红树老半峯残雪白猿啼虽然不是桃花洞春至桃花亦满溪李粹伯跋之曰字画放逸有翔龙舞凤之势脱去寻常畦迳非得於心而应於手者不能尔飘然神僊风度固有所本云真本藏於建康府治军资库绢素標饰处皆断裂独字画不动庚申岁者岂非艺祖创业建隆元年乎

洪辑居溧阳县西寺事观音甚敬幼子佛护病痰喘医不能治凡五昼夜不乳食证危甚呼医

杜生诊视之杜曰三岁儿抱病如此虽卢扁复生无如之何矣辑但忧泣办凶具而其母以尝失孙愁悴尤切辑益窘惧投哀请祷於观音至中夜妻梦一妇人自後门入告曰何不令服人参胡桃汤觉以语辑洒然悟曰是儿必活此盖大士垂教耳急取新罗参寸许胡桃肉一枚不暇剥治煎汤灌儿一蜺殼许喘即定再进遂得睡明日以汤浸去胡桃皮取净肉入药与服喘复作乃只如昨夕法治之信宿有瘳此药不载於方书盖人参定喘而带皮胡桃则斂肺也

溧阳璧桥巫能以异法治骨鯁虽与被鯁者相去远或不见其人亦可疗淳熙九年长巷村人王四因食鹅遭鯁三日不能下饮食尽隔势且死遣子持钱诣巫巫即於竈内取灰筛布地上炷香焚镬诵呪召神结印次以苇筒作小犁状耕灰中云此骨甚深凡耕至一再筒中忽微有声亟倾注水盥间乃驚翅骨也璧桥距长巷四十里王氏子还家父平复已半日矣其病之浅者一犁即愈云

建炎初有妇人题黄连步接官亭之壁云妾鄱阳人也女工之外从事诗礼不幸严霜下坠泰山其颓飘泊一身所适非偶薰莸同器情何以堪昨浮家洞庭怒帆一张良人倏为鬼录吁臣不事二主女不事二夫其奈何哉偶携稚子来登客亭感时伤心遂成小絶知我者其天乎诗云故里萧条一望间此身飘泊叹空还感时有恨无人说愁歛双蛾对暮山

圣汤延祥温汤元序金陵属邑溧水溧阳旧多蛊毒丞相韩滉之为浙西观察也欲更其俗絶其源终不可得时有僧住竹林寺每绢一疋易药一圆远近中蛊者多获全济值滉小女有恶疾浴於镇之温汤即愈乃尽舍女之粧奁造浮图庙於汤之右谋名僧以葳寺事有以竹林市药僧应之滉欣然迎置且求其药方久之僧始献於是其法流布仍刊石於二县之市唐末丧乱石不复存而温汤之寺至今在焉镇之大族夏氏世传其法药以温汤为名志其所自也温汤元方五月初桃皮末【二钱生用】蟹螯末【一钱先以麦麸炒去翅足】大□末【二钱生用】右三味以米泔淀为圆如枣核形如中一切蛊毒食前用米泔下一圆修合时於净室中切忌妇人孝子猫犬见崇宁间住持僧智淳得其方於府帅曾氏家

南唐李後主猎青龙山一牝狙触网见主雨泪稽顙屡指其腹主戒虞人保守之是夕诞二子还幸大理寺亲录囚系一大辟妇以孕在狱未几产二子煜感牝狙之事罪止於流其山去城东二十五里

溧水县东南二十五里有乌鲤庙昔民有女感黑龙於田野归而有娠後产鲤鱼投於水中复能变化随母所後乘云而去母亡每春时必来坟所乡人因立庙祠焉

开宝七年南唐後主金陵苑囿中鹿忽一旦人语牧者叱之鹿亦叱牧者曰明年今日汝等俱为鬼物苑囿荒凉焉能拘我明年王师渡江牧者俱死鬪敌苑囿亦废矣

裴长史新罗国人忘其名後主朝行建州长史开宝八年王师攻金陵未下建州守查元方知长史善伎术进赴金陵五月路由歙州长史托疾不行密告刺史龚□仪监军軫镐曰有状托以附奏言金陵事者五一金陵立春节後出灾谩宁无事二润州不过九月当?三朱令贇舟师

气候不过池州四江州血气覆城明年春末夏初血涂原野五大朝明年十月有大丧後皆如其言

杜秋娘李錡妾也錡灭籍入宫有宠於景陵後赐归故乡杜牧过金陵为之赋诗牧谓秋为金陵女国史补本事诗云李錡之擒婢配掖庭者曰郑曰杜杜名秋娘建康人也有宠於穆宗穆宗即位以为漳王傅姆太和中漳王得罪国际除诏赐秋归老故乡中书舍人杜牧为诗以唁之【诗云京江水清滑生女白如脂其间杜秋娘不劳朱粉施老渢即山铸後庭千蛾眉秋持玉笋饮与唱金缕衣渢既白首叛秋亦红泪滋吴江落日渡灞岸绿杨垂联裾见天子盼眄独依依椒壁垂锦幕镜奁蟠蛟螭低鬟认新宠窈窕复融怡月上白璧门桂影凉参差金阶露新重闲捻紫箫吹莓苔夹城路南苑雁初飞红粉羽林仗独赐辟邪旗归来煮豹胎饕餮不能饴咸池昇日庆铜雀分香悲雷音後车远事往落花时燕祿得皇子壮发绿綈綈画堂授傅姆天人亲捧持虎睛珠络褙金盘犀镇帷长杨射熊馆武帐弄哑咿渐抛竹马戏稍出舞鸡奇嶄嶄整冠佩侍宴坐瑶池眉宇俨图画神秀射朝晖一尺桐偶人江充知自欺王幽茅土削秋放故乡归觚棱拂斗极回首尚迟迟四朝三十载似梦复疑非潼关识旧吏束髮已如丝却唤吴船渡舟人争得知归来四邻改茂苑草菲菲清血洒不尽仰天知问谁寒衣一匹素夜借邻人机我昨金陵过闻之为?歔自古皆一贯变化安能推夏姬灭两国逃作巫臣妻西子下姑苏一舸逐鸱夷织室魏豹俘作汉太平基误置代籍中两朝尊母仪光武绍高祖本系生唐儿珊瑚破高齐作婢春黄縢萧后去扬州突厥为阏氏女子固不定士林亦难期射钩後呼父钓翁王者师无国要孟子有人毁仲尼秦因逐客令柄归丞相斯安知魏齐首见断厕中屍给丧蹶张辈廊庙冠裳危珥貂七叶贵何妨戎虏支苏武却生还酆通终死饥主张既难测翻覆亦其宜地尽有何物天高复何之指何为而捉足何为而驰耳何为而聽目何为而窥已身不自晓此外何思惟因倾一樽酒题作杜秋诗愁来独长咏聊可以自怡】

李珣字温叔都官外郎之幼女也八岁能作诗後适江夏人王常同泛舟射利江湖间委彻为江州清风亭记常方叹美珣曰未之尽也何不云好山绿水万里有尽处清风明月千古无老时一日举其文示彻彻卒用其言为破题不久常死珣溺舟於三山矶下後三日尸忽出於水中土人异之为立庙熙宁中都山张芝过庙作三絶焚於庙中【一云风软潮生江水早遥峯隐隐漫寒青自从香骨沉波底独我为诗吊尔灵二云轧轧橹声离远浦潇潇帆影落寒涛殷懃沥酒陈佳果将此深心慰寂寥三云江雨初晴远岸低心因啼鸟?思归尔如会我题诗意魂梦相求一处飞】既夜一青衣召云娘子奉俟久矣芝曰娘子为谁青衣曰早来献诗与谁耶芝乃悟见一妇人谓芝曰早来佳章欲托以梦寐是或不真不能尽所怀故求面见妾溺此时水官令赋诗及校九江会源录一夕而毕水官大悦令江神出其尸显其灵今有祠在此血食於人谢子之诗意所不敢当答以诗【梅天半霁江水涨水摇花影红荡漾东风抛雨过江西截江一瞬生银浪闇然不见鸥鹭飞渔唱四沉烟暝荡忽然晴霁碧云濶水色天光月下上柳风和软浪无声客橹呕轧中流鸣两岸沙头捻翠女嬉笑携手相将行秋入空江源水静澄流一碧如寒镜远帆灭没入云中菱唱微茫晚风暝西风脱木露三山隐隐樵居乱石间霜猿哀落岩前月杜宇枝开更啼血篷窗风紧客衣单中夜危肠几欲絶我本名家闺中女聘得良人共途路相将云水二十年所得欢心亦无数岂期天祸及一身夫死身沉大江去猛风吹云无定踪尽日陰愁难得雨秋高水冷白骨寒孤儿稚女归何处因公遗我白玉篇慰此穷泉生和

气明朝僊舸宿何州回首寒江烟雨暮】芝见诗叹赏久之俄出白金二百星赠芝曰烦礧一石载妾前事亦有奉报芝受其金送芝出幄则已五鼓矣芝後因循不为立石舟再过三山矶下几至倾覆是夕又梦其女深诟责之事见翰林名谈

晋譙閔王承遭王敦之难其子无忌以年小获免咸和中无忌拜散骑侍郎累迁屯骑校尉中书黄门侍郎江州刺史褚裒当之镇无忌及丹阳尹桓景等餞於板桥时王廙子丹阳丞耆之在坐无忌志欲复讐拔刀将手刃之裒景命左右救扞获免御史中丞车灌奏无忌欲专杀人付廷尉科罪成帝诏曰王敦作乱閔王遇祸寻事原情今王何责然公私宪制亦已有断王当以体国为大岂可寻绎由来以乱朝宪主者其申明法令自今以往有犯必诛於是听以赎论

晋元帝渡江随帝有王离妻者洛阳人将洛阳旧火南渡自言受道於祖母王氏传此火并有遗书二十七卷临终使行此火勿令断絶火色甚赤异於余火有灵验四方病者将此火煮药及灸诸病皆愈转相妖惑官司禁不能止及季氏死而火亦絶时人号其所居为圣火巷在今县东南三里禅衆寺直南出御街又齐武帝末年先是匈奴中谣言云赤火南流丧南国於是匈奴始规为寇帝方患而忧之是岁果有沙门从北来齎此火而至火色赤於常火云可治疾贵贱争取之多得其验二十余日京师咸云圣火诏使吏浇灭之而民亦有窃蓄者治病先齐戒以火炙桃板七炷而疾愈吴兴丘国宾窃还乡邑邑人杨道庆虚疾二十年形容骨立依法炙板一炷即痊是月武帝崩【建康寔录注】

愍帝建兴五年春正月琅邪王出师路北躬环甲冑移檄天下徵兵时有玉册见於临安白玉麒麟神玺出於江宁其文曰长寿万年日有重晕皆以为中兴之象

国史纂异云王羲之告誓文今之所传即其藁本不具年月日其真本维永和十年三月癸卯朔九日辛亥而书亦真开元初润州江宁县瓦官寺修讲堂匠人於鸱吻竹筒中得之与一沙门至八年县丞李延业求得上岐王以献便留内不出王家失火图书悉为灰烬此书亦见焚矣

张舜民芸叟曰李後主杂记数千言德庆堂题榜大字如截竹木小字如聚鍼丁似非笔迹所为者欧阳永叔谓顔鲁公书正直方重如其为人若以书观李後主可不谓之倔强丈夫哉然亦何柔弱□骹之甚也孔子所谓以貌取人失之子羽圣人亲见其面犹不能知其心况以字画揆人者哉【德庆堂字刻在清凉寺今存】

西清诗话曰自古文人虽在艰危困踣之中不忘於述作盖性之所嗜虽鼎镬在前不恤也况下於此者乎後主在围城中犹书长短句未就而城破所谓樱桃落尽春归去蝶翻金粉双飞子规啼月小楼西曲栏珠箔惆悵卷金泥门巷寂寥人去後望残烟柳低迷尝见残藁点染晦昧心方危窘意不在书耳

昔黄太史有跋王荆公书陶隐居墓中文云熙宁中金陵丹阳之间有盗发墓得隐起塼於塚中识者买得之读其书盖山中宰相陶隐居墓也其文尤高妙王荆公常诵之因书於天庆观

斋堂壁间黄冠遂以入石予常欲摹刻於樊道有李祥者欣然砉石来请斯文既高而王荆公书法似晋宋间草书此固多闻广见之所欲得也【今刻石江东漕廨】

晋戴安道年十岁在瓦官寺画王长史见之曰此童非徒能画亦终当致名但恨吾老不见其盛耳【见世说新语】

顾恺之建康寔录注云京师寺记兴宁中瓦官寺初置僧衆设会请朝贤鸣刹注疏其时士大夫无有过十万者顾恺之字长康直打刹注一百万长康素贫时以为大言後寺成僧请勾疏长康曰宜备一壁遂闭户往来一百余日画维摩一躯工毕将欲点眸子谓寺僧曰第一日开见者责施十万第二日开可五万第三日可任例责施及开户光明照寺施者填塞俄而果百万钱也【苏魏公题维摩像据画体工用云顾生首创维摩诘像有清羸示病之容隐几忘言之状陆探微张僧繇效之终不能及至唐寺废杜牧之为池州刺史道过金陵叹其将圯募工搨写十余本遗好事者其一乃汝陰太守某人也不能携去至今置於州廨亟相临淄公镇颍日尝语从事鑱石以记其始末嘉佑壬寅予领郡事暇日数取以观之案长康晋人故所画服饰器用皆当时所尚其意态位置非常画之比也杜本已为後人窃取今所存者盖再经誊榻矣而气象超远髣髴如见当时之人物已可爱也况牧之所传乎况长康之真迹乎韵语阳秋云荐经兵火壁既不存而画亦不可得见往岁京口都洁圣与来为建康总领询维摩不存之因寺僧莫能答因语之日某守南雄尝有人示石碣云唐会昌中杜牧尝寄瓦官维摩摹本於陈颖张彦远刻於郡齐某因求颖之本又刻於南雄尚有墨本在篋笥以付予宜刻之戒坛庶几旧物复归而观者皆知顾笔神妙果如此亦可谓戒坛之异事僧乃刻之】

梁张僧繇名画录云金陵安乐寺画四龙不点睛每云点之则飞去人以为妄诞因请点之须臾破壁二龙乘云上天未点睛者见在初吴曹不兴图青溪龙僧繇见而鄙之乃广其象於龙泉亭其画留在秘阁时未之重至太清中震龙泉亭遂失其壁方知神妙又天皇寺明帝所置也内有栢堂僧繇画庐舍那佛及仲尼十哲帝怪问释门内如何画孔圣僧繇曰後当赖此尔及後代灭佛法焚天下寺塔独以殿有宣尼像乃不令毁

开宝中王师伐金陵所得府藏悉充军中之赏有步卒李贵径入佛庙得建康人王齐翰所画十六罗汉鬻於市有富商刘元嗣以白金四百两请售之元嗣入郁复质於相国寺普满塏主清教处及元嗣往赎并为所匿讼於京师时真宗方尹京按证其事清教辞屈乃出元画为真宗嘉叹各赐白金十两释之後十六日即位名曰应运国宝罗汉藏於秘府【圣宋名画录】

艾宣金陵人工画花竹翎毛孤标雅致别是风规败草荒榛尤长野趣又有昇州厉昭庆工佛像尤长於观音句容郝登以丹青自乐周文规能画鬼神冕服车器人物昇元中命图南庄最为精絶江宁沙门已然画烟岚晚景当时称絶建康蔡润善画舟船及江湖水势曹仲元工画佛道鬼神竺梦松工画人物女子宫殿台阁顾德谦工画人物刘道士工画佛道鬼神【图画见闻志云】

王荆公晚年删定字说出入百家语高而意深尝自谓平生精力尽於此书好书者从之请问

口讲手画终席几至千余字金华俞紫琳清老尝冠秃巾衣埽埴服抱字说逐荆公之驴往来法云定林过八功德水逍遥洵亭之上龙眠李伯时曰此胜事不可以无传

也遂画以为图【韵语阳秋曰京师学士院有燕侍郎山水阙生绡阙

五峯暮云楼阁有阙遥望锺山与此同後张天阙东髣髴锺山与阙然身在画图中】

景定建康志卷五十